

中国古今医案类编

妇科病类

主编 鲁兆麟 严寄澜 王新佩

中国建材工业出版社

中国古今医案类编

妇科病类

主编 鲁兆麟 严寄澜 王新佩

中国建材工业出版社

图书在版编目(CIP)数据

中国古今医案类编. 妇科病类/鲁兆麟主编. - 北京:
中国建材工业出版社, 2001. 4

ISBN 7-80159-123-2

I. 中… II. 鲁… III. ①医案—汇编②妇科病—
医案 IV. R249.1

中国版本图书馆 CIP 数据核字(2001)第 021660 号

中国古今医案类编·妇科病类

鲁兆麟, 产寄澜 王新编主编

中国建材工业出版社(北京海淀区三里河路 11 号)

新华书店北京发行所发行 各地新华书店经销

河北省邮电印刷厂

开本: 850mm×1168mm 1/32 印张 26 字数 650 千字

2001 年 6 月第一版 2001 年 6 月第一次印刷

印数: 1—2000 册 定价: 39.00 元

ISBN 7-80159-123-2/R·011

序

“医案”之书，古已有之。它有立体与直观的效果。能反映医家当时的辨证思维、选方用药之特长、治疗得失成败之所在，包罗万象，引人入胜。

“医案”通于史学，《史记·扁鹊仓公列传》载有淳于意 25 例“诊籍”，而使《汤液经法》的“火剂”由此而流传。

先圣张仲景读史于“越人人虢之诊，望齐侯之色”，缅怀先贤，奋起直追，终成泰斗。可见“医案”涵有史学之意义，岂可轻视之哉？

夫禅宗之有“语录”，兵家之有“阵图”，围棋之有“棋谱”类也。孟子曰：“出乎其类，拔乎其萃”，惟吾医家之“医案”有理有例，有案有戒，读之其味隽永，用之而又神奇，集名医先贤于篇帙之间，可以谈心，可以神游。无怪乎经学大师章太炎先生赞为“中医之成绩，医案最著”，而良有以耶！

鲁兆麟教授，重视“医案”之学，又虑其年代湮远，而濒于失传；不畏艰难，与医学同志严寄澜、王新佩诸君，历时数载，选出数百家名医医案，约有六百余万言洋洋大观。名为《中国古今医案类编》。

夫此书之著也，承前启后，使“医案”臻于完备，而又总其大成。不言而喻，对《内》、《难》、《伤寒》、《金匱》之要义、临证之经验，亦尽在其中矣。

余今年八十岁，垂垂老矣，喜读“医案”新编，不禁手舞足蹈而乐为之序也。

劉渡舟

编写说明

一、本书收集了《名医类案》、《续名医类案》及《续名医类案》成书之后至中华人民共和国建国初期已故的名医医案，也收录了《续名医类案》成书之前未收之医案。共收集医案专著 200 余部，选录医案 1500 余则。

二、为了准确地反映历代医家的学术思想，所收医案均摘自原始资料。

三、《中国古今医案类编》系列丛书分类按：温病类、伤寒类、肺系病类、脾胃病类、心肾病类、肝胆病类、气血津液病类、经络肢体及杂病类、外科骨伤科病类、妇科病类、儿科病类、五官科病类划分。各病之医案均按成书年代先后编排。

四、本书中药物的计算单位均保持原著原貌，未予统一。

五、部分医案后附有按语、注解等，均为原著中所有。

六、所收医案均注明出处。

前 言

《中国古今医案类编》是汇集我国名医医案精华,反映各家丰富临床经验的医案学著作。

在我国医学史上,曾有两部医案名著问世:一为明·江瓘《名医类案》,一为清·魏之琇《续名医类案》,二书将先秦到清代中期的名医医案进行了系统收集整理,它们在祖国医学发展史上产生过重要影响。然而自清代中期以后,尚无人对名医医案作过系统地整理研究。

《中国古今医案类编》系列丛书是继《续名医类案》之后,将清代中期直到新中国初期谢世的各家名医的医案进行了广泛的收集,经反复筛选、整理成书,填补了这一历史时期医案收集整理的空白。同时,将《名医类案》、《续名医类案》按病症分类,归其各科分类书中。这套丛书共收集名医400余家,选录医案4万余则,涉及内、外、妇、儿、眼、五官、骨伤等科400余种疾病,按病症分类,每种病症有30~70个医案,内容极为丰富。从中可以尽窥各地名医宝贵的临床经验和医术之圆机妙法。对于广大中医工作者具有很高的临床应用价值。

医案凝聚着医家的心血和经验,最具有真实性和实用性,可以“宣明往范、昭示来学”。著名学者章太炎先生曾说:“中医之贡献,医案最著”。作为一名中医工作者,若能掌握古今名家之医案,有如拿到祛病除疾的万能钥匙,可借鉴前人的经验,应用于临床。本书形成一个完整的医案学学术体系,为广大中医工作者提供一部较完整的医案学参考工具书。对于提高中医临床疗效和学术水平,将会起到重要的作用。

编 者

2000年10月于北京

目 录

月经先期	(1)
月经后期	(12)
月经先后不定期	(37)
经期延长	(42)
月经过多	(45)
月经过少	(48)
月经不调	(52)
痛经	(58)
崩漏	(148)
经行发热	(239)
经行头身痛	(241)
经行忌邪	(243)
逆经	(244)
经行便血	(253)
经行乳胀	(254)
经断前后诸症	(255)
年老经断复行	(256)
白带	(259)
青带	(287)

黄带·····	(288)
赤白带·····	(291)
五色带·····	(301)
妊娠感冒·····	(302)
恶阻·····	(330)
妊娠腹痛·····	(345)
胎动不安·····	(357)
胎漏·····	(365)
胎热·····	(373)
堕胎·····	(373)
小产·····	(386)
滑胎·····	(401)
子瘕·····	(404)
子嗽·····	(406)
子烦·····	(412)
子悬·····	(413)
子肿·····	(414)
子淋·····	(422)
妊娠小便不通·····	(423)
妊娠小便频数·····	(428)
子晕·····	(430)
子痫·····	(431)
妊娠患疟·····	(442)

妊娠下痢·····	(444)
妊娠便干·····	(452)
妊娠泄泻·····	(452)
妊娠便血·····	(455)
妊娠肢痛·····	(455)
妊娠发斑·····	(456)
胎死不下·····	(457)
其它·····	(466)
难产·····	(482)
恶露不下·····	(495)
恶露不绝·····	(513)
胞衣不下·····	(518)
产后血崩·····	(519)
产后血晕·····	(531)
产后感冒·····	(544)
师尼寡妇寒热·····	(552)
产后发热·····	(553)
产后汗症·····	(597)
产后腹痛·····	(617)
乳汁不行·····	(645)
产后遗尿·····	(647)
产后小便不通·····	(648)
产后浮肿·····	(652)

产后尿血·····	(658)
产后大便难·····	(659)
产后泄泻·····	(662)
产后便血·····	(664)
产后下痢·····	(665)
产后吐泻·····	(676)
产后痉病·····	(678)
产后发狂·····	(686)
其它·····	(689)
阴痛·····	(716)
阴疮·····	(722)
阴痒·····	(722)
阴肿·····	(725)
阴挺·····	(726)
阴吹·····	(733)
梦交·····	(734)
肠覃·····	(738)
癥瘕·····	(745)
女子不孕·····	(770)
干血癆·····	(775)
热入血室·····	(782)
寒入血室·····	(814)
脏躁·····	(815)

月经先期

何书田

产后营阴失养，经至先期而少。此奇经病也，家用滋清之剂。

炒阿胶 全当归 生杜仲 淮山药 桑螵蛸炙 炒生地 牡丹皮 沙苑子 煨牡蛎 赤茯苓

《竿山草堂医案》

王孟英

枫泾程笙伯令正，半产之后，汛事先期，淋漓不断，时且痛胀，衄衄减餐，苦渴苦黄，脉弦而数。频服补剂，久不能瘳。余投沙参、龟版、制香附、丝瓜络、茹、棟、菖、蒿、梔、薇、柏、藕十余剂，次月经即调，复来求诊，与柔养善其后。

《归砚录》

林佩琴

李氏。月来兼旬再至，小腹痛胀，面黄食减，手足心热，口微渴，脉虚促。此脾肝肾阴亏损症也，延成劳热则难治。暂用阿胶四物汤：潞参、熟地砂仁末炒，各三钱，当归、白芍酒炒，各二钱、川芎八分、阿胶水煨二钱，麦冬、山梔、续断俱炒。各钱半、香附童便炒、二钱。四服诸症俱减。改用八珍汤去白术，仍加阿胶、麦冬、脉较和，食较进。后专用潞参五钱、龙眼肉二钱，煎服，味甘生液。又用归脾丸加白芍、香附常服，经始调。

《类证治裁》

费伯雄

某。心脾有亏，肝胆郁热，化火入血，经行先期而至，预作头晕，

气撑胸闷，懒倦减食，皆属肝胆不和。宜和营平肝。

川楝子三钱 当归二钱 郁金二钱 炙草五分 川断三钱
茯苓二钱 小胡麻二钱 蒺藜四钱 赤芍二钱 丹皮二钱 藕三片

《费伯雄医案》

张乃修

龚右。每至将寐，辄觉震痉，头昏作胀，时易汗出，中脘胀满。肝风鸱张，木强土弱。拟养血熄肝，参以凉营，盖经愈前则血愈虚也。

阿胶三钱 丹皮二钱 大生地四钱 黄芩酒炒，一钱五分
女贞子酒炒，三钱 朱茯神三钱 白芍酒炒，一钱五分 香附二钱
金铃子一钱五分 橘叶二钱 黑豆衣三钱 生决明六钱

二诊：咽中如阻，中脘不舒，筋脉跳动，甚至欲厥，经一月再行。营血久亏，风阳震动。再育阴以涵肝木。

阿胶珠二钱 天冬三钱 豆蔻花四分 潼沙苑盐水炒，三钱
丹皮二钱 大生地四钱 干橘叶一钱五分 炒白芍一钱五分
煅牡蛎三钱 生山药三钱 茯苓神各二钱 淮小麦五钱

三诊：每至气冲，中脘胀满，按之作痛，甚则汗出。冲气逆上，拟镇坠滋养柔和。

代赭石四钱 炙鳖甲四钱 生熟草各二分 金铃子一钱五分
火麻仁三钱 煅牡蛎五钱 淮小麦五钱 橘皮一钱 糯稻根四钱
白芍酒炒，一钱五分 大南枣四枚

四诊：火从上升，则溽溽汗出，头面为甚，足心烙热，经不及期，左肩臂酸痛。冲阳逆上，皆由阴虚木失滋涵。

阿胶珠三钱 柏子霜三钱 炙甘草四分 地骨皮二钱
旱莲草三钱 煅牡蛎五钱 生白芍一钱五分 乌贼骨三钱
淮小麦五钱 南枣三枚 女贞子酒炒，三钱 糯稻根五钱

五诊：经事一月再期。肝阴愈虚，肝气愈旺，头昏作胀，寐则头汗溽溽，心中震痉，脑膺作胀，咽中如阻，肩臂作酸。宜滋肾养肝，参

以凉营。

大生地十两 粉丹皮二两 生牡蛎八两 大天冬三两
黑豆衣三两 朱茯神三两 奎党参四两 白归身二两 旱莲草三两
炙鳖甲十两 炒枣仁二两 肥玉竹三两 炒木瓜二两 制首乌五两
炒黄肉二两 火麻仁三两 柏子霜三两 甘杞子二两 干橘叶二两
香附醋炒，二两 杭白芍酒炒，三两 生熟草各三钱 淡黄芩一两五钱
女贞子酒炒，三两

加阿胶四两，龟板胶三两，鹿角胶一两，溶化收膏，每晨服一调羹。

《张聿青医案》

王旭高

奚。肝为藏血之脏，脾为生血之源。肝气郁则营血失藏，脾气弱则生源不足。腹中结瘕，肝气所结也。经事先期，肝血失藏也。饮食少纳，脾气弱也。便后带血，脾失统也。气弱血虚，宜乎不孕矣。调补肝脾，则冲任充足，自然有孕。

西党参 大熟地 冬术人乳拌 白芍 香附醋炒 杜仲盐水炒
茯神辰砂拌 菟丝子 归身 木香 川断 艾叶炭 阿胶米粉炒
乌贼骨

丁。经事参前而色淡，淡则为虚，参前属热，是血虚而有热也。

四物汤加香附、阿胶、党参、冬术、丹皮、炮姜炭、玫瑰花。

渊接：佐炮姜以行四物之滞，非温经也，可谓得旨。

《王旭高临证医案》

柳宝诒

牛。每值小洩淋闭，必因经水先期而起。此必有瘀热流注膀胱，偶因劳动，肝肾之火内炎，与膀胱瘀热相合，有升无降，故上则呕恶不止；下则点滴不能，此病发之情形也。刻下病势暂平，而仍觉气陷

搜浊。膀胱之瘀热犹恋，将来势必复发。拟方疏利瘀热，清调肝肾，务使瘀热得清，病根乃拔。

小生地 赤白茯苓 猪苓 血余炭 飞滑石 红花同研 泽兰
甘草梢 川柏 淡竹叶 大蓟炭 牛膝 丹皮炭 木通

王。寒热早晚间作，胀闷呕恶，邪由少阳阳明而发。病已经旬，汗出不多，舌尖将干，经水先期而来，热之内蕴者已重。便溏不爽，胃气下流。法当表里两解。

葛根 淡芩 川连 姜汁炒 青蒿 豆卷 苏叶 槟榔 青皮
郁金 黑山栀 丹皮 竹二青

二诊：内蕴之热，尚未畅达。脉象弦而不畅，胀呕仍作。拟清少阳而通阳明，仍兼表里两解之意。

川连 半夏 广皮 茯苓 枳实 郁金 青皮 淡芩 滑石
蔻仁 苏叶 青蒿 竹茹 茅根

三诊：阴分邪热未清，太阴之气，因而不化。胸脘浮满。于清阴中，兼和脾胃。

青蒿 丹皮 白薇 银花 荆芥 滑石 薄荷同研 大腹皮
茯苓皮 广皮 砂仁壳 通草 薄荷叶露 香稻叶露冲服

四诊：阴分留热未清，便溏减而未止。清热和中两法，均宜轻用。

藿梗 广皮 六神曲 茯苓皮 奎砂仁 青蒿 白扁豆 银
花炭 丹皮炭 益元散 香稻叶露冲服

《柳宝诒医案》

陈莲舫

蒋。肝脾不协，营虚气痹，久产未复，腹膨结痞，致奇经无从禀丽，每每超前，腰腹俱酸且痛，脉象细涩。体禀气亏，营阴亦为不足。拟调气和营，兼和八脉。

吉林须 抱茯神 沙苑子 菟丝子 炒夏曲 玉蝴蝶 制香

附 花龙骨 川杜仲 淡乌贼 广陈皮 生白芍 红月季

上海,某。心脾两虚,肝气失调,致奇经不得禀丽,月事愆度超前,而复绵延,渐至腹痛足肿,脉见濡细。属气亏于营,补气为主,和营次之。

吉林须 抱茯神 沙苑子 制女贞 桑寄生 广陈皮 阿胶
珠 花龙骨 川杜仲 焦艾绒 法半夏 荷蒂 红枣

《蓬斋秘旨》

何长治

右。肝郁气滞,致胁胀腰楚,寒热,经事趲前,脉弦。法以疏肝清营,佐以理气。

乌贼骨三钱 白芍钱半 丹皮钱半 香附三钱 泽泻钱半
茜草钱半 川芎八分 山栀钱半 川断三钱 青皮钱半

《何鸿舫医案》

王仲奇

赵右,老靶子路,七月廿七日。流产胞脉暗损,经常趲前,色或黄或紫而为日多,腰疼少腹痛,头眩体酸,脉弦涩。以温煦调养之。

紫石英煨先煎三钱 龟板炙黄先煎,五钱 全当归三钱 白芍炒二钱
丹参二钱 泽兰三钱 川杜仲三钱 续断炒二钱 海桐皮三钱
白蒺藜三钱 菟丝饼三钱 陈艾叶炒,八分

二诊:七月晦。经仍趲前,惟色较正,非若前之黄紫相杂,腰疼少腹业已获愈,脉弦涩。胞脉因流产暗伤,以湿煦调养之。

紫石英煨先煎,三钱 龟板炙黄先煎,五钱 全当归三钱
白芍炒,二钱 白蒺藜三钱 续断炒,二钱 川杜仲三钱 菟丝饼三钱
甘枸杞炒,二钱 条芩酒炒,一钱二分 海桐皮三钱 陈艾叶炒,八分

杜右,龙吉里,七月初六日。经事趲前,数月来色紫黑,将行之际掌跖灼热,头眩胸闷,腰酸肢麻,脉弦。治以调营可也。

石决明煨先煎四钱 粉丹皮炒，钱半 丹参二钱 羌蔚子炒，二钱
全当归二钱 杭白芍炒，二钱 条芩酒炒，一钱二分 白蒺藜三钱
续断炒，二钱 桑寄生二钱 海桐皮三钱 乌鳢骨炙黄三钱
红月季 两朵

二诊：七月十一日。经事已净，热亦获愈，惟营热肝亢，耳鸣目花，腰酸肢麻带频色黄，胸闷心烦善怒。仍以清肝调营可也。

石决明煨先煎，四钱 左牡蛎煨先煎，三钱 丹参二钱
羌蔚子炒，二钱 白芍炒，二钱 白蒺藜三钱 甘菊花钱半 金钗斛二钱
当归身蒸二钱 续断炒，二钱 茯苓三钱 绿萼梅八分
红月季花两朵

《王仲奇医案》

金子久

肝肾二脏不振，奇经八脉不固，月事早期。来如崩漏，甚而有块，净后带下，少腹作痛，腰脊亦痛，木乘于中，痿患腕痛，当用固摄下元八脉，参入两和肝胃。

菟丝子 芡实 牛膝 白芍 羌蔚子 归身 丹参 丹皮
梔子 杜仲 牡蛎 海螵蛸

《金子久专辑》

丁泽周

杨右。血虚有热，脾弱积湿下注，经事超前，行而甚多，纳少便溏，腿足浮肿，朝轻暮重。宜养血调经，崇土化痰。

白归身盐炒，二钱 大白芍二钱 连皮苓四钱 生白术三钱
陈广皮二钱 大腹皮二钱 陈木瓜二钱 川牛膝二钱 汉防己二钱
冬瓜皮四钱 生熟苡仁各五钱

汪右。肺阴已伤，燥邪痰热留恋，咳嗽已久，时轻进剧，经事超前，血室有热也。宜清肺化痰而调奇经。

霜桑叶三钱 光杏仁三钱 川象贝各二钱 瓜蒌皮三钱
抱茯神三钱 炙远志一钱 嫩白薇钱半 丹皮炭钱半 冬瓜子三钱
鲜藕二两 枇杷叶膏三钱、冲服

黄右。经事超前，淋漓不止，臍行燥结，冲任亏损，血室有热也。
拟芩荆四物汤加减。

炒荆芥一钱 炒条芩一钱 白归身二钱 生白芍二钱
生地黄炒三钱 阿胶珠钱半 侧柏炭二钱 川石斛三钱 抱茯神三钱
莲蓬炭三钱 藕节炭三枚 贯众炭三钱

汪右。血虚有热，带脉不固，经行超前，腰酸带下，肢节酸楚，宜
养血清热，崇土束带。

全当归二钱 大白芍二钱 生地炭三钱 抱茯神三钱
炒丹皮钱半 嫩白薇钱半 厚杜仲三钱 乌贼骨三钱 西秦艽二钱
生白术钱半 陈广皮一钱 焦谷芽三钱

张右。血室有热，经事超前，行而不多，带下绵绵。宜清营祛瘀。
而化湿热。

小生地二钱 粉丹皮钱半 生赤芍钱半 赤茯苓三钱
生苡仁四钱 乌贼骨三钱 侧柏叶钱半 紫丹参二钱 羌蔚子三钱
藕节两枚 青橘叶钱半

《丁甘仁医案续编》

贺季衡

李女。冲为血海，任主胞胎，二脉隶乎肝肾。阴亏血少，虚而生
热，肝火易升，土受木制，阳明不和，以致胸膈不命，巅顶掣痛，肝热
则血无归，冲任之气亦复不摄，经事先期，色紫，平素谷食不旺。夫
胃为五脏六腑之海，经脉之大源，一身气皆赖乎此。血为心之主，心
荣大亏，少寐易惊，经谓诸痛发心脾二经者是也。拟从心脾二经立
法调治。

白归身二钱 生白术二钱、芝麻拌炒 淮山药三钱、炒 川断肉四钱

柏子仁四钱 合欢皮四钱 煅龙齿五钱，先煎 大白芍二钱
佩兰一钱五分 陈橘皮一钱 红枣三个

常服方：培养心脾，以调冲任。

潞党参三钱 炒子术一钱五分 潼沙苑四钱，盐水炒 白归身二钱
炒枣仁四钱 柏子仁四钱 川杜仲三钱 川续断三钱 云神三钱
紫石英三钱，煨 红枣三个

刘女。湿热窜入血分，血不归经，屡次便血，间或脱肛，月事先期且多，胸胁气痛，或咽痒，呛咳多痰，两足若痿软，则不能安卧，心中筑筑，午后腹胀，舌苔不时黄腻满布，左脉浮弦，右手沉数。血热肝旺，藏守无权，暴崩可虑。先当清肝肃肺，以安血络。

大生地五钱，炙炭 当归二钱，土炒 阿胶二钱，蒲黄八分炒
淮牛膝一钱五分 云苓神各三钱 南沙参四钱 川贝母一钱五分
炒苡仁五钱 大白芍二钱 地榆炭四钱 橘红八分，盐水炒
冬瓜子四钱 藕二两切

袁女。女性以肝为先天，肝藏血，肝旺则气火内灼，藏守无权，血不安乡，于是月事先期，延绵时日不净，少腹或胀痛，血色不正，或内热，或肢冷，口渴，舌红，胃呆便结。一派热象，最忌增咳。先当柔肝调经，而安血络。

当归二钱 紫丹参一钱五分 川郁金二钱 佩兰一钱五分
云苓三钱 炙甘草五分 大白芍二钱，桂枝三分拌炒 大生地四钱，炙炭
金香附一钱五分，醋炒 炒谷芽四钱 金橘皮四个 红枣三个

另：八味逍遥丸二两，四物丸一两，和匀，每服三钱，开水下。

姚女。月事先期，甚则一月两至，且延绵时日，赤白带淋漓，腰痛，少腹胀，加以久咳，痰难出，入夜内热，脉弦滑而数，舌苔苍黄。血虚肝旺，湿热乘入血分，冲带不调。先当清肝葆肺，凉血化湿。

大生地五钱，炙 煅牡蛎八钱，先煎 乌贼骨四钱炙 大白芍二钱
白归身二钱 北沙参三钱 清阿胶二钱，蒲黄五分拌炒珠 白茯苓四钱
丹皮一钱五分，炒黑 冬桑叶一钱五分 炒苡仁五钱 莲房二钱，炙

另：乌鸡白凤丸四粒，每以一粒去壳陈酒化，开水过口。

《贺季衡医案》

方公溥

余女。月事先期，经带紫瘀，入夜寒热交作，脉象沉滞，先与凉血调经。

白当归 9克 地骨皮 9克 香青蒿 9克 云茯苓 9克
生甘草 3克 制香附 9克 白芍药 9克 盐黄柏 6克 大生地 9克
生牡蛎 15克，打碎 软柴胡 3克 黑荆芥 9克

复诊：进凉血调经，入夜寒热已解。头眩，腹胀减而未痊，再进一步治之。

盐水炒全当归 9克 白芍药 9克 制香附 9克
盐水炒黄柏皮 6克 炙鳖甲 9克 炒荆芥 9克 大生地 9克
瓜蒌皮 9克 麦门冬 9克 生甘草 3克 紫丹参 9克 黑芝麻 9克
地薰草 4.5克

注：地薰草系柴胡之别名。

三诊：月事已净，腹痛已平，唯左少腹胀结旧恙未痊，再拟益气补血。

白当归 9克 蛤粉炒东阿胶 9克 熟地黄 9克 白芍药 9克
制川芎 4.5克 制香附 9克 荆芥炭 6克 新会皮 4.5克
宋半夏 9克 云茯苓 9克 清炙草 3克 引香谷芽 9克
另别直参 3克，另炖服

华女。天癸先期而下，少腹疼痛，腰部酸楚，胸次闷闷，经量较多色带紫黯，脉滑数，舌苔薄黄，姑拟凉血调经。

粉丹皮 6克 地骨皮 9克 炒栀子 9克 制香附 9克
生白芍 9克 白当归 9克 香青蒿 9克 盐黄柏 6克 炒延胡 9克
炒荆芥 9克 云茯苓 9克

复诊：进凉血调经法，腹痛腰酸，已见好转，经行已按时而下，

色泽亦见正常，证势已大有转机，药既应手，再从前意化裁调之。

处方同前，加益母草 9 克

吴女。

湿热内阻，月事超前，带下颇多，腹痛频频，法当清经化湿理气止痛。

生白芍 9 克 盐水炒黄柏 9 克 粉丹皮 6 克 地骨皮 9 克
云茯苓 9 克 全当归 9 克 益母草 9 克 延胡索 9 克 香青蒿 9 克
制香附 9 克 荆芥炭 9 克

复诊：月事已净，带下粘白尚多，腹痛减而未痊，再拟清理之方。

处方同前，除香附、丹皮、地骨皮、青蒿、当归、延胡、益母草。加炒淮山药 9 克、生甘草 3 克、车前子 9 克 新会皮 4.5 克，象贝母 9 克、光杏仁 9 克、软柴胡 3 克、全福花（包）9 克、瓜蒌皮 9 克。

三诊：腹痛已止，带下尚多，咳嗽痰粘。再与理肺束带。

冬桑叶 9 克 粉前胡 6 克 光杏仁 9 克 象山贝 9 克
云茯苓 9 克 白芍药 9 克 瓜蒌皮 9 克 生甘草 3 克 炒淮山药 9 克
黄柏皮 4.5 克 南芡实 12 克 新会皮 4.5 克 全福花 9 克。包

《方公溥医案》

孔伯华

高女，十月十一日。肝家抑郁，水不涵木，三焦为水所蓄，不得右侧卧，经不当期两至，舌赤糙，小溲短黄，脉滑弦而数大，治当解郁，抑肝以畅三焦。

石决明两，生研先煎 旋覆花钱半，布包 血余炭钱半 知母三钱
黛蛤粉两，包先煎 生赭石钱半 郁李仁二钱 川黄柏三钱
川郁金三钱，生白矾水浸 盐橘核四钱 朱莲心一钱 乌药二钱
益元散四钱，包 藕两，切片

丁妇，十月十二日。阴虚血燥，肝家阳盛，经事先期，行不自己，

历代中医资料大全分享

你好，我是**逢原**，你现在看到的这本资料是我从网上收集整理的。

本人自学中医多年，耗时多年搜集珍藏了众多的中医资料，包括了目前已经出版的大多数中医书籍，以及丰富的视频教程，而这些中医资料，是博览群书，勤求古训之必备。

只需要在下面输入你的邮箱并确认就可以直接下载中医资料：

http://list.qq.com/cgi-bin/qf_invite?id=03157beabc6d50e0b64029a2715966596d94dcac7ed0cfd7

如果有你也喜欢中医，需要一些学习中医的资料；或者是学习中医的路上碰到了什么问题需要交流；或者碰到一些疾病的困扰，需要求助，可以通过以下方式联系我：

一、发邮件：fyzy999@qq.com

二、加我 QQ/微信：**2049346637**

三、关注微信公众平台——逢原中医，经常有中医文章更新。

四、关注我的空间：<http://user.qzone.qq.com/2049346637>

免责声明：所有资源均是网上搜集，本人收集整理这些中医资料，仅仅为了方便中医同道中人私下交流学习之用，不为营利，将不对任何资源负法律责任。所有资源请在下载后 24 小时内删除，任何涉及商业营利目的均不得使用，否则产生的一切后果将由您自己承担！如果您觉得满意，请购买正版资源。



私人微信号：2049346637



公众平台：逢原中医

脉弦数兼滑，左关较盛，宜滋柔摄化。

生牡蛎八钱 血余炭三钱 川草薢四钱 知母三钱 石决明六钱
生侧柏叶三钱 莲子心二钱 川黄柏三钱 赤小豆六钱
炒丹皮钱半 元胡三钱 橘核三钱 生滑石块四钱 旋覆花钱半
生赭石钱半 藕两，切片

《孔伯华医集》

章成之

朱女。经先期，淋漓半月，其量多，其色或鲜或紫。此症起于产后，已历数年。腹不痛而腰脊酸，加凝固血液与收缩子宫之属。

益母草 12 克 生茜草 9 克 仙鹤草 12 克 熟地 15 克
大川芎 6 克 藏红花 4.5 克 苎麻根 12 克 桑寄生 12 克

另：乌贼骨 18 克研末，分三次吞。

王女。经先期而量多，一来复，仍色鲜不净，面容与脉皆不足。古人有肝脾不能藏统之说。

当归 6 克 阿胶珠 12 克 潞党参 9 克 五味子 4.5 克 川芎 6 克
熟地 12 克 炮姜炭 3 克 川断肉 9 克 桑寄生 12 克 茯神 12 克
震灵丹 6 克，分二次吞

陈女。据现代研究，经先期者反量多，多属于卵巢黄体之变化，治之以脏器疗法。今两脉细数，所谓阴虚火旺，血热妄行。

生熟地各 12 克 苎麻根 12 克 仙鹤草 18 克 女贞子 9 克
旱莲草 12 克 潼沙苑 9 克 杭白芍 9 克 黑山栀 9 克 黑大豆 24 克
柏子仁 12 克打、包

董女。经行先期而少腹胀，色淡如赤豆水，手足不温。先期属血热之说不可泥。

淡吴萸 4.5 克 山萸肉 9 克 阿胶珠 15 克 菟丝子 9 克
巴戟 9 克 制香附 9 克 补骨脂 9 克 艾叶 9 克 台乌药 9 克

清炙草 3 克

《章次公医案》

叶熙春

孟，女，二十一岁。三月。上海。肝郁气滞，冲任失调，经来超前，量少色竭，乳房作胀，少腹疼痛，腰脊酸楚，五心烦热，脉弦小数，口苦苔黄。治拟养血疏肝调经，丹栀逍遥散加减。

炙当归 9 克 炒赤芍 9 克 柴胡 3 克 茯苓 12 克 丹皮 6 克
黑山栀 9 克 炙青皮 5 克 川郁金 6 克 甘草 2.4 克 四制香附 8 克
薄荷纯梗 5 克

二诊：此届经来，瘀滞减少，量亦较多，乳胀腹痛，不若前甚，脉象弦滑。再拟疏肝调经。

炙当归 9 克 丹参 9 克 赤白芍各 6 克 柴胡 2.4 克
炙青皮 5 克 丹皮 6 克 川郁金 6 克 制香附 5 克 益母草 9 克
路路通 6 克 炙甘草 2.4 克

《叶熙春专辑》

月经后期

王孟英

壬寅春，邵小婢室，患汛愆。释医诊以为妊，广服保胎药，渐至腹胀跗肿，气逆碍卧，饮食不进。入夏延孟英视之，曰：血虚气滞，误补成胀也。先以黄连、厚朴、山楂、鸡内金、橘皮、大腹皮、枳实、茯苓、栀子、楝实、杏仁、紫菀、旋覆等药，稍佐参、术服之，气机旋运，胀去食安。渐入滋阴养血之治，数月经行而愈。

张养之侄女，患汛愆，而饮食渐减。于某予通经药，服之尤恶谷。请孟英诊之：脉缓滑。曰：此痰气凝滞，经隧不宜，病由安坐不劳，法以豁痰流气，勿投血药，经自流通。于某闻而笑曰：其人从不

吐痰，血有病而妄治其气，胀病可立待也。及服孟英药，果渐吐痰，而病遂愈，养之大为折服。予谓世人头痛治头，脚痛疗脚，偶中而愈，贪为已功，误药而亡，冤将奚白？此《寓意草》之所以首列议病之训也。孟英深得力於喻氏，故其议病，迥出凡流，安知见识之超，总由读书而得，虽然人存政举，未易言也。

《王氏医案》

林佩琴

何氏。肝郁失畅，循经则头项作胀，乘脾则痰浊化酸，入络则肌肉刺痛，腋下零湿，经信愆期，左关沉弦。治在疏肝，佐以渗湿。厚朴、香附、郁金、白芍、茯苓、金橘皮、山梔、钩藤、当归须。三四服诸症减，自述平昔肠鸣，必倾泻乃爽。亦木气乘土之咎，且肥人虑虚其阳。前方去郁金、山梔、加制半夏、炒白术、薏米、炙草。经亦调。

殷氏。年少脉匀，主无病，尺中虚，必月信后期，溺后白淫，非不孕之体。据述经前不痛，但迟，后色淡，平时白带耳。治宜补气以培营之源，摄下以固肾之滑。用秘元煎：人参、茯苓、白术、炙草、枣仁、山药、芡实，加当归、白芍、杜仲、何首乌，服之可孕。

族女。腕胀噎腐，经迟腹痛，间发寒热。按东垣云：胃为卫之本，脾乃营之源，脾胃阳衰、纳运不旺，致胀满瘀停，宜乎营卫失度，冲任不调矣。仿《内经》浊气在上则生腹胀之例，以通阳降浊。二陈汤去甘草，加白蔻壳、韭子、益智子俱炒、小茴香、谷芽、神曲俱炒、香附姜汁制、煨姜。数服诸症皆平。

《类证治裁》

李铎

傅氏，年二十余，左关弦数，右脉洪滑，医者以为妊，用补剂养胎，致泛愆两月，色紫而少。据述天癸素属过期，每临期先两日必腹痛，牵及两腿骨，痛不能举步，平日口多燥渴，喜饮食物，乃血实气

滞之候。书云：阳太过则先期而至，阴不足则后期而来。是以经候愆期，总由阴阳盛衰而致也。夫过期紫黑者，血热也，将行而痛者，气滞也。故《内经》云：百病皆生于气。盖人身血随气行，气一壅滞则血热气郁，故月事不调，心腹作痛也。治宜凉血调气，仿加味道遥法，兼进越鞠丸。

当归 白芍 柴胡 茯苓 丹皮 山梔 元胡 泽兰 益母草 吴萸炒黄连

又(缺数字)三剂，另与一逐瘀通经之法，二三剂。

归须 桂心 元胡 牛膝 蒲黄 灵芝 卷柏 母草

又 连进逐瘀道经法，心腹腿痛如失，经水亦行，足征通瘀之功。盖气滞积瘀，与日生新血相搏，故作痛也。今瘀血既去，必当补生新血，便能对经孕育矣。

熟地 当归 川芎 柏子仁 白芍 龟鹿胶 丹参 甘草

经病误作妊象，用补养剂，则血愈实而气愈滞，久则必有干血成癆之累。用凉血调气，逐瘀通经主治甚合。寿山。

熊姓妇，年二十五，形体丰软，脉象迟细，毕姻九载不孕，经事后期，此阳虚血寒之质。古人谓：血寒经必后期而至。然血何以知其寒也？以其阳气不足，则寒从中生，而生化失职，是即所谓寒也。且血寒则凝滞，故经来必先腹痛也。大凡阳气不足，血寒经迟者，色多不鲜而黯黑，又非热也，治宜温经，舍姜、桂、附子不用，而以泛泛四物、逍遥调经生血，率循常法，非其治也。再论常苦头痛眩晕，是痰厥之患。按头为诸阳之首，其为阳虚，又属显然体肥多痰，痰厥是脾阳不运，寒痰停阻于中，而上厥也，诸宗古圣之旨，非杜撰耳。

半夏 附子 干姜 桂心 吴萸 云苓 香附 橘红

此方服十剂，接服温经汤一月，必有大效。

温经汤

半夏 吴萸 文党 麦冬 桂心 当归 白芍 丹皮 阿胶 甘草 生姜 大枣

血寒则经水后期，气滞亦经水后期，能于脉象兼症上辨得的确，试不致误。寿山

周氏，年十九，两寸脉数，肝脉弦，脾脉细迟，两尺沉细而弱。症见骨蒸潮热，日晡而发，五心烦热，咳嗽痰血，气逆喘急，头目昏重，经候衍期，鼻红舌黄，口渴咽干，细按书属血虚肝燥，火盛克金之所致也。盖肺有郁热则咳嗽，甚则逼血上行，故吐衄咳血。又肺受害之本也。治宜养血平肝，清金泻火，拟方以俟高明裁之。

当归 白芍 柴胡 香附 丹皮 知母 贝母 炒芩 薄荷 甘草

又 日晡潮热已退，各候渐减，足征清燥养血平肝之验，肝脉差平，余脉仍是火旺克金之象，知病源已深，非易奏效也。一切辛热动火之品，生冷凝痰之物，概不可进。拟生脉合逍遥散，日服一剂，庶内葆清金而渐平火亢。

洋参 麦冬 枯芩 柴胡 白芍 当归 阿胶 桑叶 甘草 白茅根

又 据述食鱼又发咳血，实为不节饮食之故。经曰多食鱼令人瘕中，况为火亢金燥之病，犯之恶得不剧也。脉虽略平，症虽略减而精神倦怠，咳嗽头晕，以及左肋微痛，经候衍期，仍是肝气不调，内燥未清之故，务宜慎口息气，静养心神，庶使肝气调畅，木不侮金，脾关清运，土不壅火，否则肝病而经不调，经不调而诸症蜂起矣。拟方仍从清降佐以辛平。

杏仁 郁金 枳壳 香附 白芍 黄芩 知母 贝母 茜草 侧柏炭

又 进清降法甚效，咳红已除，惟咳嗽心烦，掌心灼灼，议喻氏清燥救肺汤。

经霜桑叶 杏仁 麦冬 石膏 阿胶 高丽参 麻仁 甘草 枇杷叶 水一碗煎六分，食远服。

又 廿六日，拟补阴退阳、养血调经之则，以善其后。

当归 生地黄 川芎 羌藟子 石斛 龟板 丹皮 白芍
沙参 甘草

相病有识，始爲平肝舒郁，继观清金润燥，周围打算处处不失，然后拟以调经一法，非同草率者比。寿山

余氏，年廿一，寸脉微弱而涩，两关带弦，月经或二三月一行，或月余一行，极无常候。舌赤唇红，口臭喉腥，嗽痰常带红，明是阴虚肝燥之故。夫血属阴，阴虚则生内热，阴主水，水亏则不能涵木，木火乘肺则嗽痰带血，口臭喉腥也。兹先与逍遥散，以木郁达之。逍遥去术加生地、麦冬、川贝母、黄芩。

又 连进加味逍遥法，嗽痰带红已止，四肢麻木已解，木喜条达之征，且经候愆期多由气结血虚所致，法宜益阴补土，兼调其气。

沙参 冬术 茯苓 熟地 白芍 当归 丹参 木香 鹿胶
甘草

《医案偶存》

杨毓斌

王姓妇，骨蒸盗汗，时作寒热，小腹结块，时时隐痛，月信过期不调，欲食颇健。症逾两年，杂治不效，叩治于予。

按：此必内有瘀血结伏，诸症皆由于此瘀，其他可不治而愈。但为患已久，峻猛之剂恐不能受，且饮食虽健，而人殊瘦损。用扶正化瘀法，为丸方以授之，尽丸两料，寻愈。

丸方：连皮、生炙黄芪各一两 怀山药一两 白术五钱 甘草五钱
牡蛎一两 当归尾五钱 海螵蛸一两 鳖甲八钱 霜桑叶五钱
浮小麦八钱 粉丹皮八钱 地骨皮八钱 杭白芍五钱 桂心三钱
延胡索三钱 茜草五钱 桃仁一两

《治验论案》

张乃修

钱右。经事愆期，腹痛脐下滞坠，按之尤痛。冲脉气滞。姑为宣通。

熟地炭三钱 赤白芍酒炒各一钱 制香附二钱打 台乌药一钱五分
南查炭三钱 全当归二钱 川芎一钱 降香片七分
上徯桂四分，饭丸

二诊：少腹作痛未止，经事未行。再宣通气血。

制香附二钱 乌药一钱五分 川桂木五分 羌蔚子三钱
小茴香五分 延胡索酒炒，一钱五分 缩砂仁五分 泽兰叶二钱
降香片七分 查炭三钱

三诊：经来而仍未畅，少腹仍然作痛。营气阻滞。再为宣通。

全当归酒炒，二钱 乌药一钱五分 炒小茴香五分 炮姜五分
川芎一钱 川桂枝三分 香附二钱 柴丹参二钱 羌蔚子三钱
益母草六钱

胡右。十二经之血，注于冲脉，从冲脉而下者，谓之月经。冲为肝之隶脉，情怀抑郁，木土失和，中脘作痛。冲脉之气，因而阻滞，经事数月方行，面色浮黄。唇白舌淡无华，脉象细涩。气血皆滞，当为宣通。

川桂枝五分 制香附二钱 炒枳壳一钱 紫丹参二钱
单桃仁二钱 白芍酒炒，一钱五分 全当归酒炒，二钱 砂仁末五分
羌蔚子三钱 香橼皮一钱

二诊：宣通营滞，脉细稍起，经事未来，脘腹作痛。久病营血必滞。仍为宣通。

川桂枝五分 单桃仁二钱 制香附二钱 紫丹参二钱
川断肉三钱 延胡索酒炒，一钱五分 台乌药一钱五分 炒赤芍一钱五分
羌蔚子三钱 归身二钱 川芎一钱

王旭高

张。形壮，面色紫黑，经事或数月或数十日而后来，来亦色淡不多。今经行后少腹攻痛，痛在左则左股酸而无力，痛在右亦如之。兼有淋带如膏，此瘀凝化浊，冲任失调也。通络泄浊治之。

五灵脂 香附 丹参 金铃子 延胡 当归尾 冬葵子 吴茱萸 旋复花 新绛 青葱管

《王旭高临证医案》

柳宝诒

武。肝主血，肝病则不特气窒，而血络亦不调畅矣。经迟，胀闷腹痛，皆由乎此。木郁化火，内耗胃阴，或嘈或胀，或作头眩，悉属风木之化。当气营两调，参以泄木安胃。

青皮醋炒 川郁金醋炒 炒当归 白芍土炒 丹参 制香附 刺蒺藜 黑山栀姜汁炒 广陈皮 砂仁 左金丸，包 乌药 陈佛手

于。癸水迟期，色带黄紫，是肝木不调，营气阻窒之病。时复冒眩，乃木郁化风，挟瘀结之火，上窜于厥阴之路也。纳谷作呕，胃为木克，不能清降也。病在肝脏，木气不达，非旦夕可效。先与和营泄木，佐以化瘀清风。

归尾 白芍 桂枝 瓦楞子 川雅连吴茱萸汁拌炒 紫丹参 川广郁金各 制半夏 小青皮 刺蒺藜 丹皮 稻豆衣 夜交藤 竹茹

《柳宝诒医案》

方耕霞

刘。从肝胃不和而为经事愆期，为寒热往来，无非木邪侮土所致。先从平肝和胃着手。

柴胡 於术 归身 白芍 茯苓 肉桂 醋炒延胡 香附
砂仁 炙黄芪

《倚云轩医话医案集》

陈莲舫

刘。两足浮肿，晡作寒热，头痛呕吐，当腕有时作痛，皆产虚未复，属升降失调，致表里偏痹。月事退后，五旬未至，奇经亦有所伤。治以和养。

吉林须 红藤膏 抱茯神 法半夏 木防己 厚朴花 银柴胡 全当归 川杜仲 新会皮 焦米仁 姜竹茹

角直，颞。结痞攻动，且胀且痛，形黄肢倦，渐至肝脾统藏失职，月事愆期太远，治宜兼顾。

北柴胡 沉香曲 西洋参 川杜仲 炒当归 制丹参 制香附 鲜佛手 九香虫 川郁金 生白芍 新会皮 枇杷叶

朱。气虚扶湿，产后足跗肿。肿久未退，且有腕痛，痛甚为厥，致心脾两虚，肝失所养，奇经遂失禀丽，月事愆期不准，脉息细涩，关部浮弦，拟用温养。

吉林须 制香附 全当归 川杜仲 抱茯神 炒夏曲 野於术 白蒺藜 生白芍 沙苑子 白茯苓 广陈皮 红月季花

钱。产育太早，营阴受伤，心肝两经失养，心悸少寐，头眩腰酸。奇经遂失禀丽愆期不育，脉象细涩，久防怔忡，治以和养

西洋参 绿萼梅 抱茯神 法半夏 川杜仲 生白芍 细香附 玉蝴蝶 苍龙齿 陈秫米 合欢皮 新会皮 姜竹茹

丁。奇经内亏，月事愆期而未育，渐至头眩气逆，肢腰酸痛，脉象细涩，属营亏气痹，治以和养。

西洋参 沙苑子 黑料豆 川石斛 乌沉香 陈阿胶 川杜仲 制女贞 生白芍 杭菊花酒炒

周浦，金。肝气侮中，吞酸吐沫，渐至奇经失调，愆期太过，三五月一至，腰酸心悸，淋漓数日，甚至寒热频来，治以和养。

红藤膏 绿萼梅 抱茯神 炒归身 法半夏 川郁金 制香附 佛手花 远志肉 川杜仲 广陈皮 姜竹茹 檀香

复方：月事愆期，三五月或半载一至，至则淋漓数日，冲海不固，诸经又失会归，脉息濡细，治以和养。

阿胶珠 抱茯神 炒归身 沙苑子 姜半夏 桑椹子 代代花 制香附 制丹参 生白芍 川杜仲 新会皮 北柴胡 鳖血炒竹茹

海宁，某。先期属热，后期者往往属虚。惟愈虚愈热，月事退后，两月三月不定，腹腰略有酸痛，将尽又有块下。诸经营亏，气痹不能会聚冲海，致虚则愆后，热则凝结成瘀。脉右浮濡，属体偏气虚；左脉细涩，属营分不充。大致肝气失调，心肺不得荣养，久则病及奇经，拟清营调气，以理心肝脾，而八脉不治自治。

西洋参 抱茯神 炒归身 红藤膏 川杜仲 柔白薇 野於术 远志肉 生白芍 淡乌贼 菟丝子 泽兰叶 代代花

复方：吉林须人乳拌 抱茯神 全当归 元生地 厚杜仲 宋半夏 姜竹茹 西绵芪 制丹参 生白芍 制女贞 沙苑子 橘叶 红枣

许。三阴素禀不足，致八脉无从统摄，期退于后，腰痛带下。营阴既虚，必至气痹，当脘胀满，脉息濡细，治以和养。

吉林须 白蒺藜 全当归 阿胶珠 沙苑子 新会皮 制香附 绿萼梅 大丹参 淡乌贼 川杜仲 红月季花

王。经愆带多，八脉受伤非浅。渐至腰脊如折，肢清潮热，头蒙目花，心悸神疲，脉见濡细，纳微脘胀。如此食少病多，必至有虚成损有损成劳之势，治以固养。

吉林须 金石斛 抱茯神 淡乌贼 川杜仲 佛手花 西砂仁 鸡血藤膏 生白芍 花龙骨 潼蒺藜 金狗脊 新会皮 代

代花

《莲舫秘旨》

邵兰荪

癸涩趑迟，带注，腹痛有症，左脉涩，右沉弦，中脘胀闷，背掣，姑拟顺气、利中、平肝。

乌药一钱五分 鸡内金三钱 青皮八分 化龙骨三钱
沉香五分，冲 木蝴蝶四分 广郁金三钱，原料 绿萼梅一钱五分
川楝子三钱 炒谷芽四钱 厚朴一钱 四贴

《邵氏医案》

王仲奇

朱右，北火车站，八月初一日，连年产育，营血大亏，悲伤忧愁，气分郁结，是心头眩耳鸣，肢酸乏力，面黄胶黄唇淡，殊少津泽，胸脘痞闷而痛，脉濡弦。治以养血调营，参以舒气宣郁。但宜怡悦逸乐，庶几有治。

当归蒸二钱 白芍炒，二钱 金钗斛二钱 白蒺藜三钱 茯苓三钱
丹参二钱 黄郁金钱半 绿萼梅八分 甘菊花钱半
旋复花布包二钱 甘甘枸杞炒，二钱 代代花七朵

二诊：八月十四日。悲愁损神，产育耗血，遂致体弱不振，头眩倦闷，侘傺不乐，脘腹间作痛，食难运化，大便近日溏泻，经事愆期，脉濡弦。更从心脾治。

于术蒸，钱半 白芍炒，二钱 益智仁一钱 茯苓三钱 白蒺藜三钱
续断炒三钱 金钗斛二钱 橘红衣一钱 丹参二钱
陈六神曲炒三钱 代代花七朵

三诊：八月廿一日。经事已行，便溏转实，忧愁郁闷较舒，少腹环脐作痛，脉濡弦，仍从心脾调治，稍佐舒肝。

于术蒸，钱半 白芍炒，二钱 益智仁一钱 茯苓三钱 白茯苓三钱
续断炒，二钱 丹参二钱 绿萼梅八分 广木香六分 肉果煨，一钱
陈六神曲炒，三钱 代代花七朵

四诊：九月朔。经行已净，精神较爽，唇舌亦转红润，日来腹又作痛，大便仍溏，脉濡弦。仍从心脾治，参以疏肝可也。

于术炒，一钱二分 陈六神曲炒，三钱 广木香六分 益智仁一钱
肉果煨，一钱 法半夏钱半 白芍炒，二钱 佛手柑一钱 青防风炙一钱
佩兰三钱 茯苓三钱

顾右，昆山，五月廿一日。胞脉为病，肠回失舒，恶露淤黑有块，缠绵日多，少腹胀痛，作坠，左边益甚，左腿肢酸麻，腰俞作酸，淋洩作胀不爽，头痛，山根眉棱亦胀，脉弦。治以舒肠调荣，冀弭隐患。

柴胡炙，钱半 茯苓三钱 生于术二钱 全当归炒炭三钱
白芍炒炭二钱 香白芷三钱 海桐皮三钱 络石藤三钱 白藜三钱
柏子仁杵，三钱 续断炒，二钱 五灵脂炒去砂石，二钱 乌贼骨炙黄，三钱
凌霄花二钱

二诊：六月十日。肠回较舒，少腹胀痛作坠稍愈，垒块数平，腰脊得伸，左腿肢酸麻较瘳，右腿肢酸痛又起，月事过期不来，山根眉棱仍然酸胀，纳食则胸脘痞闷，不食又作嘈难受，脉濡弦。仍取阳明，用调奇恒可矣。

柴胡炙，钱半 茯苓三钱 生于术二钱 全当归三钱 白芍炒，二钱
白茯苓三钱 海桐皮三钱 鹿衔草三钱 络石藤三钱 白藜三钱
柏子仁杵，三钱 凌霄花二钱 乌贼骨炙黄，三钱

三诊：六月廿四日。肠回较舒，垒块较平，少腹胀痛作坠较瘳，眉棱酸胀亦愈；惟经事五十日未至，右腿髀疼痛，脊膂难伸，脉弦滑。脑、髓、骨、脉同为奇恒之府也，小洩绯红，喉干咽燥，亦与胞脉有关。仍取阳明，以调奇恒。

柏子仁杵，三钱 茯苓三钱 金钗斛三钱 潼沙苑三钱
鹿衔草三钱 鸡血藤二钱 续断炒，二钱 瓜蒌根三钱 海桐皮三钱

白薇三钱 石楠叶二钱 十大功劳二钱 乌贼骨炙黄,三钱

《王仲奇医案》

曹南笙

某右。十三年不孕育,其中幻病非一,病人述经期迟至,来期预先三日,周身筋骨脉络,牵掣酸楚,不得舒展,凡女人月水诸络之血,必汇集血海而下。血海者即冲脉也,男子藏精,女子系胞,不孕、经不调,冲脉病也。腹为阴,阴虚生热,肢背为阳,阳虚生寒,皆产后不复之虚损,肝血阴虚,木火内寄,古人温养下焦必佐凉肝坚阴,勿执经后期为气滞,乱投破气刚药。

河车胶 生地 枸杞 沙苑 生杜仲 白薇 山楂 黄柏
白花益母草

《吴门曹氏三代医验集》

金子久

汛事愆期,带下无常,关系均在八脉,八脉隶于肝肾,欲调八脉,须养肝肾。

熟地 川芎 杞子 鹿角霜 当归 党参 杜仲 龟板 白
芍 冬术 苡蓉 牡蛎 香附 绵黄芪

冲任积受寒湿,气街欠通,腹笥为之作痛。气郁及营,月事为之愆期。近加形寒身热,发作无序,似非外感,良由营卫失和所致。诊得左右弦涩,法当两和肝脾,双调营卫。

白归身 白芍 软柴胡 川芎 制香附 牛膝 炒枳壳 冬
术 桂枝 羌蔚子 小茴 煨老姜 红枣

《金子久专辑》

丁泽周

沈右。脉象左弦右涩,舌质红绛,苔薄黄。见症气升呕吐,屡次

举发，内热口干，经事愆期，行而不多，夜不安寐，此抑郁伤肝，肝气横逆，脾胃受制，中焦所生之血，既无以养心，又不能下注冲任也。《经》云：“二阳之病发心脾，有不得隐曲，一传为风消，再传为息贲也”。肝为刚脏，非柔不克，胃以通为补，当宜柔肝通胃，养血调经。

生白芍二钱 紫丹参三钱 银柴胡一钱 茯神三钱 仙半夏二钱
左牡蛎三钱 左金丸包，七分 川石斛三钱 炒枣仁三钱
青龙齿三钱 茺蔚子三钱 广橘白一钱 生熟谷芽各三钱

刘右。血虚受寒，肝脾气滞，经事愆期，腰腹痛，腿足酸楚，舌苔薄腻，脉弦小而紧。宜温营理气，而调奇经。

全当归二钱 茺蔚子三钱 怀牛膝二钱 杜红花八分
紫丹参二钱 广艾绒八分 云茯苓三钱 青橘叶钱半 制香附钱半
春砂壳八分 绛通草八分

郭右。胸闷纳少，腹痛便溏，脾胃不和，经事愆期，脉象濡迟。宜疏邪和中，祛瘀通经。

炒黑荆芥一钱 紫苏梗钱半 清水豆卷四钱 紫丹参二钱
赤茯苓三钱 炒扁豆衣三钱 陈广皮一钱 炒苡仁三钱 炒谷芽三钱
焦查炭三钱 春砂壳八分 茺蔚子二钱 干荷叶一角

《丁甘仁医案续编》

贺季衡

舒女。屡愆半产，冲带两伤，血不荣肝，气火交迫，经事愆期，少腹筋梗作痛，牵及乳部，不时内热，食少脘仄，带下淋漓，头眩腰酸，脉弦细小数，舌红苔黄。虚而生热，当养血和肝，以调冲带。

当归二钱 大丹参一钱五分 乌贼骨四钱炙 大白芍二钱
白蒺藜四钱 大川芎八分 大生地五钱 云神四钱 粉丹皮二钱
茺蔚子四钱 川楝子一钱五分 金橘皮三个 红枣三个

顾女。迭经小产五次，冲带二脉暗伤，任脉复损，少腹筋梗作痛，月事后期，色淡如水，内热轧牙，脉弦细而数，舌红无苔。血愈少

而肝木愈旺，先当养荣清肝，再调八脉。

白归身二钱 大丹参一钱五分 川杜仲四钱 女贞子四钱
大生地五钱，藏红花五分合炒 旱莲草四钱 大白芍二钱，吴萸三分拌炒
细青皮一钱，醋炒 川楝子一钱五分，醋炒 炙甘草八分 桑寄生三钱
红枣三个

另：益母八珍丸三两，每服三钱，开水下。

吴女。月事后期已久，刻下已年余不行，腹胀作痛，惟腰俞酸楚，五年不育，脉滑舌白。痰浊久羁下焦，冲任不调也，非血虚经闭可比。

当归二钱 大白芍二钱，吴萸五分拌炒 金香附一钱五分，醋炒
五灵脂三钱，醋炒 青陈皮各一钱 川断肉四钱 云苓三钱
法半夏一钱五分 藏红花五分 延胡索一钱五分，酒炒
川楝子一钱五分，醋炒 佛手花八分

另：四制香附丸二两，二陈丸一两，和匀，每服三钱，开水下。

《贺季衡医案》

张山雷

某右。汛期已届，姙尚未行，腹胀满闷，饱噯恶心，脉涩且小，舌滑无苔。是宜泄降和肝。

炮姜炭 1.8 克 广郁金 4.5 克 制半夏 4.5 克 姜炒竹茹 4.5 克
桃仁泥 6 克 生延胡 6 克 生楂肉 6 克 泽兰 9 克 益母草 9 克
厚朴花 4.5 克 天台乌药 4.5 克 大腹皮 6 克 小青皮 4.5 克
淡吴萸 0.6 克

包右。二三月间汛事阻隔，本月已如常而至，虽有泛恶，纳食无味，脉亦滑利，挟痰也恒如是。舌有腻苔，姑先和调肝胃，未可轻以妊论。

淡吴萸 20 粒 川黄连 0.5 克 宋半夏 4.5 克 乌药 4.5 克
益智仁 3 克 川椒红 10 粒 广木香 1.8 克 陈橘红 3 克

炒鲜竹茹 4.5 克 紫苏叶 0.6 克 带壳砂仁打, 2 粒 象贝母 4.5 克

孙右。痰热未楚, 咳嗽减而未净, 婁事逾期, 腹筒稍臌胀, 此气火上行, 致令经尚未行。舌根黄膩, 脉则左弦, 是宜柔肝泄降, 化滞通经。

生延胡 6 克 四花青皮 4.5 克 制半夏打, 6 克 当归尾 4.5 克
生打光桃仁 9 克 泽兰叶 6 克 生楂肉 6 克 生紫菀 9 克
杜兜铃 4.5 克 炒荆芥 4.5 克 茺蔚子 9 克 瓜蒌皮 6 克

二诊: 经事未净, 腹胀已蠲, 胃纳已醒, 鼻流浊涕, 脉左弦搏, 舌心薄黄, 是肺肝郁热。再以毓阴培本, 清肺治标。

炒萸肉 4.5 克 甘杞子 6 克 厚杜仲 6 克 象贝母 9 克
杜兜铃 3 克 生桑白皮 6 克 霜桑叶 6 克 鲜竹茹 4.5 克
炒荆芥 4.5 克 泽兰叶 6 克 生紫菀 12 克 天台乌药 4.5 克

《张山雷专辑》

沈绍九

经行后期, 十余日不净, 胃痛, 腰疼, 畏寒肢冷, 舌苔白, 脉沉迟, 迟则为寒, 沉为在里, 由于素禀阳虚, 寒湿阻滞气血运行, 不通则痛, 法当温中通阳, 佐以补下。

制附片三钱, 先煎 茯苓三钱 西砂仁二钱 草拨二钱
高良姜一钱 制香附二钱 当归三钱 艾炭一钱五分 补骨脂四钱
炒杜仲四钱

《沈绍九医话》

曹颖甫

王右。无表证, 脉缓, 月事后期而少, 时时微恶寒, 背部为甚, 纳谷减, 此为血运迟滞, 胃肠虚弱故也, 宜桂枝汤以和之。

川桂枝三钱 大白芍三钱, 酒炒 炙甘草三钱 生姜三片
大枣十二枚

顾右。产后，月事每四十日一行，饭后则心下胀痛，日来行经，腹及少腹俱痛，痛必大下，下后忽然中止，或至明日午后再痛，痛则经水又来，又中止，至明日却又来又去，两脉俱弦，此为肝胆乘脾藏之虚，宜小建中加柴芩。

桂枝三钱 生白芍五钱 炙甘草二钱 软柴胡三钱 酒芩一钱
台乌药钱半 生姜五片 红枣十二枚 饴糖三两

拙巢注：一剂痛止，经停，病家因连服二剂，全愈。

《经方实验录》

方公溥

蔡女。月事后期而下，腹痛，腰酸，头昏眩晕，法当温经养血行滞。

全当归9克 制香附9克 白芍药9克 大川芎6克
熟地黄9克 生甘草3克 淮牛膝9克 桑寄生9克 益母草9克
淡桂枝4.5克 紫丹参9克 台乌药9克 炒延胡9克

复诊：月事后期，腰痛、腹痛、乳胀。经量仍少，再进一步治之。

处方同前，除熟地、生草、桂枝、寄生。加单桃仁9克、杜红花4.5克、厚杜仲9克、炙甘草3克。

三诊：月事后期，经少难净，头眩，腹痛，乳胀均有好转，药既应手，再与调治。

处方同前、除杜仲，加益智仁9克。

四诊：月事逾期而下，头昏眩晕，腰部酸楚，再进理血调经。

白当归9克 白芍药9克 益母草9克 熟地黄9克
制川芎4.5克 荆芥炭9克 炒厚杜仲9克 炒川续断9克
桑寄生9克 制香附9克 炒折艾绒4.5克

五诊：进理血调经，头昏眩晕，腰酸较瘥，经行已止，再与调理之方。

处方同前，加新会皮4.5克。

六诊：诸恙渐平，腰酸未复，再进养血固肾强腰。

白当归 9 克 白芍药 9 克 桑寄生 9 克 炒厚杜仲 12 克
炙甘草 3 克 炒淮山药 9 克 炒川续断 9 克 熟地黄 9 克
山萸肉 9 克 淮牛膝 9 克 制狗脊 9 克

《方公涛医案》

翟竹亭

一腊梅庄卞凤魁妇，年三十有二。患泄泻三年余，每日夜三、四次不等。由此经水三、五月一行，面黄肌瘦，短气无力，十指甲均秽，奄奄卧床。迎余诊视，诊得脾脉虚极，肝脉细急，此因泻伤脾肾，肝木为贼，耗肾水而克脾土。男精女血，乃五谷之宝秀。饮食既减，血从何生，所以经水三、五月一行也。看某医方，作经水不调治之，用破血开郁诸方，经水仍旧，泄泻更甚。余曰：“洁古谓决干河求长流何得也。”余用景岳先生左右归饮加减治之，服五帖稍效，二十余帖痊愈。待三月之后，经度如常矣。

左右归饮加减

熟地 18 克 山药 12 克 茯苓 10 克 山茱萸 6 克 白术 10 克
破故纸 10 克 当归身 10 克 附子 6 克 油桂 6 克 炮姜 6 克
芡实 12 克 砂仁 6 克 白芍 10 克 辽五味子 6 克 炙甘草 10 克 水煎服

《湖岳村叟医案》

孔伯华

苏妇，六月六日。脾湿气郁，业经日久，经来腹痛，且愆期至，胸膈闷损，时作痛疼，脉象弦滑而数，亟宜清柔渗湿。

石决明 六钱 川草薢 四钱 制香附 三钱 生橘核 四钱
台乌药 三钱 旋覆花 四钱，布包 代赭石 四钱 佛手片 二钱
生知母 三钱 生黄柏 三钱 炒枳壳 三钱 元胡 三钱 川郁金 三钱

川厚朴二钱 川牛膝三钱 荷叶一个 藕两 制乳香钱 制没药钱

张妇，九月二十五日，痛经已久，针后渐至轻缓，而癸水愆期，色黑而少，气血失调，复有湿邪之象，脉弦数兼滑，治宜调经渗化、兼柔肝经

鸡血藤膏三钱，黄酒蒸化去渣兑服 连皮苓三钱 生石决明二钱
川芎钱半 炒苡仁一钱 川郁金二钱 桃仁钱半 炒丝瓜络一钱
旋复花一钱 代赭石一钱 陈皮钱半 制稻衣三钱 乌药二钱
酒丹皮二钱 当归三钱

《孔伯华医集》

章成之

赵女。经后期，将行先下白物，既行其色淡，平居洒洒然有寒意。古人之概念，为虚寒之象。

肉豆蔻9克 炮附片6克 炮姜炭4.5克 白芍9克
补骨脂9克 北细辛3克 川桂枝4.5克 黄芪9克 青防风9克
炙甘草3克

二诊：药后凛寒大定。平素经多后期，每月递减。距离经期不远，以此方催其早行。

全当归9克 山萸肉9克 北细辛3克 制香附9克 丹皮9克
大川芎6克 补骨脂9克 官桂皮4.5克 炮姜炭3克
两头尖9克，包

丁女。经过期旬日，不见腰酸腹胀，即无攻之征候。登高则呼吸为之不平匀，而心动悸，脉虽不细，但甚数。凡此皆一派虚象。

全当归12克 潞党参9克 白术9克 云苓9克 阿胶珠15克
熟地黄18克 白芍6克 炙甘草3克 川芎6克 杞子9克

二诊：经已见，腹痛则其色淡，腹不痛则色正常，而其腹胀殊甚。

全当归9克 制香附9克 青皮9克 破故纸9克 大川芎6克

吴萸 4.5 克 延胡 9 克 肉豆蔻 9 克 炮姜炭 4.5 克

方女。脉有弦意，此种脉主拂逆恚怒。经行后期，将行乳房作胀，少腹尤甚，今经将行。

酸炒柴胡 4.5 克 杭白芍 9 克 丹皮 9 克 薄荷 4.5 克
全当归 9 克 生白术 9 克 赤苓 9 克 延胡 9 克 泽兰 9 克
生姜二片

二诊：经已见，所苦如故，必待经净而后已。

当归 9 克 延胡 9 克 小茴香 9 克 旋复花 9 克，包 川芎 6 克
泽兰叶 9 克 炒丹皮 9 克 粉甘草 3 克

三诊：凡经行乳房作胀者，此与经之多少无绝对关系；其少腹之胀，如经量增多则稍舒，药后其量仍少。

全当归 9 克 泽兰叶 9 克 卷柏 9 克 土牛膝 12 克 大川芎 6 克
粉丹皮 15 克 苏木 6 克 桃仁泥 12 克 香附 9 克

杨女。经愆期，甚则二、三月一行。此番闭止，将及三月；行而量少色淡，腰部酸楚特甚。此症法当温补。

当归 9 克 川芎 4.5 克 粉丹皮 9 克 吴萸 2.4 克
肉桂末 1.2 克，分两次冲入 紫丹参 9 克 山萸肉 9 克 金毛脊 9 克
胡芦巴 6 克 炙乳没各 2.4 克

吴女。经过期不潮，辄有胃症状，如消化不良，吞酸甚。今拟散剂调治。

苍术 12 克 陈皮 6 克 杭白芍 9 克 厚朴 3 克 当归 12 克
柴胡 9 克 云茯苓 18 克 薄荷 6 克 生白术 15 克 粉甘草 3 克
大黄廬虫丸 18 克

共研细末，饭后吞服 4.5 克。

朱女。每月经多后期，将行每觉倦怠食减，既行色紫量多，少腹痛。今经期已届而来就诊。

全当归 9 克 川芎 6 克 上肉桂末 1.2 克，分二次吞 制香附 9 克
淡吴萸 2.4 克 丹皮 9 克 山查肉 12 克

二诊：投温经汤加减，经水届期而至，色转鲜红，精神亦较前为佳，唯少腹痛依然阵作。予前法再进。

全当归 9克 川芎 9克 上肉桂 1.2克，冲 郁金 9克
制香附 9克 白芍 9克 山楂肉 9克 丹皮 9克 绿萼梅 2.4克
艾叶 9克

王女。平素经多后期，但其量多，上月后期如故，而其量少。今又过期旬日以上，量较多而俄顷即止，自后头眩，饮食不消。考经不正常，恒能引起胃症候。

香附 9克 苍术 9克 薤白头 12克 黑山栀 9克 谷麦芽各 9克
川芎 6克 枳实 9克 沉香曲 9克 山楂肉 15克

张女。主症在神经衰弱，易患怒，多齿痛，皆其候也。虽最近数月，经后期旬日，其色淡而量少；比日正值经行，不但量少，其色且黑，少腹胀满不舒。此当攻补兼施之法。

当归 9克 熟地 15克 淮牛膝 9克 泽兰叶 9克 五灵脂 12克
紫丹参 9克 炒丹皮 9克 卷柏 9克 桃仁泥 9克 制香附 9克
炮姜炭 3克 川芎 4.5克

罗女。经事不以时下，多能影响胃障碍，今拟加味越鞠丸予之。

当归 9克 川芎 5.4克 苍术 9克 制香附 9克 神曲 12克
黑山栀 9克 陈皮 6克 山楂 12克 厚朴 2.1克，后下 苏梗 6克

陈女。经后期已历多年，频年以体弱而更甚，既行腰酸特甚，腹亦胀，其量少，约五日而净。此卵巢实质病，可攻，但必复入营养药。

全当归 9克 泽兰叶 9克 熟地 18克 粉丹皮 9克 制香附 9克
杜仲 9克 菟丝子 9克 淮牛膝 9克 独活 6克 桑寄生 12克

二诊：大致经先期量多；后期者量反少。上者卵巢黄体疾患，下者卵巢实质疾患。今少腹酸楚则经下少许，盖卵子无力分裂，催经药即使无力转为有力耳。

全当归 12克 粉丹皮 9克 紫丹参 9克 淡吴萸 4.5克
桃仁泥 12克 泽兰叶 9克 淮牛膝 12克 延胡 9克 大川芎 6克

苏木 4.5 克 阿胶 24 克, 烔冲 路党参 9 克 炙草 3 克 红枣 五枚

王女。属于内分泌患者之经后期, 植物性药, 本无大效。仲景多用动物、虫类。

熟地黄 18 克 杭白芍 9 克 醋炒柴胡 9 克 泽兰 9 克
全当归 12 克 大川芎 6 克 川桂枝 4.5 克 粉丹皮 9 克

另立丸方于下:

地鳖虫 15 克, 连头足翅 藏红花 6 克 晚蚕沙 12 克
虻虫 9 克, 连头足翅, 两头尖 15 克 当归 30 克 五灵脂 15 克
炙鳖甲 24 克 鸡血藤 24 克

上药共研细末, 蜜泛为丸, 如桐子大, 每服二十粒, 日二次。

胡女。经过期不至, 少腹隐痛, 得温霏则雷鸣, 此寒与气相搏。

台乌药 9 克 制香附 9 克 海南片 9 克 川楝子 6 克
官桂皮 6 克 淡吴萸 2.4 克 半硫丸 4.5 克 五灵脂 9 克
薤白头 9 克 佛手片 6 克

陈女。经居将及五十日, 少腹胀痛, 洒然恶寒, 予桂枝茯苓丸;
苔白, 食入则胀, 复入平胃散。

川桂枝 4.5 克, 后下 粉丹皮 9 克 赤芍 9 克 云苓 9 克
桃仁 9 克 生苍术 6 克 川朴 2.4 克, 后下 陈皮 6 克 粉草 3 克

二诊: 药后腹胀差减, 而胸胁攻筑作痛。古人有治血先治气之说。

制香附 9 克 苏梗 9 克 旋复花 9 克, 包 青皮 6 克 川楝子 9 克
香甘松 9 克 刺蒺藜 9 克 沉香曲 9 克 佛手 6 克 延胡索 9 克
娑罗子 9 克

柴女。经停将及两月, 色脉皆现虚象, 曾经两足肿, 其肿在停经以后。通经药不可孟浪, 寓养血于健脾之中。

黄芪皮 9 克 路党参 9 克 生白术 9 克 云苓 12 克
黑大豆 18 克 木瓜 9 克 杏仁泥 9 克 生熟苡仁各 12 克 杭芍 9 克
大枣 九枚 熟地黄 12 克, 砂仁 2.4 克拌 连皮生姜 2.4 克

王女。经恒二月一行，有三月一行者，且无所苦，头眩、目花而已。据其目光少神，可以测知内分泌之障碍。古人以肾开窍于目，亦有理由。

生熟地各9克 淮牛膝9克 潼蒺藜9克 女贞子9克
稻豆衣12克 菟丝子9克 仙鹤草12克 苎麻根12克
桑麻丸9克，分二次吞

《章次公医案》

冉雪峰

苏联医学专家某女同志，任某医院内科主任，体颇丰健，自近年患经事愆期以来，常三个月来经血一次，头脑晕闷，心膈微痛感，上下肢时或麻痹，不安寐，自为治疗，一切状况均好，惟经事仍不准期。遂来中医研究院门诊部诊察，一则实地研究我国医学，二则商讨治疗问题。予诊得脉劲数中带滞涩象，劲则阴伤，数则为热（前此经色过赤，即是血热象征），滞涩为热壅气滞，经隧痹阻（此即血分有热，经事不提前而反滞后原因），惟其血热，所以有头晕、胸痹、腹胀、不安寐等现象，惟其热壅，所以有肢节麻痹，颜面烘热等现象。拟方养血宁心，通络导滞，半调半疏，亦清亦和，药用：全当归、杭白芍各五钱。云茯神四钱，酸枣仁三钱，葳灵仙、玄胡索、刺蒺藜、泽兰叶、青木香各三钱，甘草一钱。次月，经事趋近（前为三月始至，此为四十日即至），量数、潮期比较正常，头晕、胸痹、腹胀、不安寐轻减，但仍存在，拟方：全当归、杭白芍、去皮茯神各四钱，川芎、泽兰叶、生蒲黄、玄胡索、牡丹皮、金铃子各三钱，甘草一钱，再下月，经事按期一月而至，头晕、胸痹、腹胀，不安寐等证逐渐向愈，拟方：全当归、杭白芍各四钱、川芎莪三钱、云茯神、酸枣仁各四钱、玄胡索、金铃子、泽兰叶、桑寄生各三钱，甘草一钱，缓调。后回国时，来我处辞谢，并赠影印名人画像数张，情意恳挚。便中复诊，为拟归脾丸缓调善后。查调经为妇科常有证，特普通经事不调多虚证，此为实证，经

随后多寒证，此为热证，治疗共历三月，第二月即效著，第三月向愈，颇顺利效速。

《再雪峰医案》

叶熙春

王，女，四十一岁。十一月。杭州。生育过多，又复流产，阴血耗伤，冲任攸亏，经来愆期，色淡量少，平时带淋甚多，头晕目眩，心悸寐劣，腰酸足软，不耐步履之劳。旧冬服膏滋方后，今春以来，诸恙悉减，经水已能按期，惟量不多。近因劳累，腰酸复甚，头晕乏力，脉细，苔薄白。冬令调补，当予滋阴养血，填补肝肾，使肾气充沛，冲任得养，诸症自可向愈。

炙当归 120 克 制川断 120 克 制女贞子 90 克 炙甘菊 45 克
炒香玉竹 90 克 炙川芎 45 克 草决明 60 克 米炒怀山药 90 克
炒丹参 120 克 鸡血藤 120 克 天麻 45 克 米炒上潞参 180 克
生地黄 180 克 秦艽 60 克 川郁金 45 克，打 米炒白术 90 克
大熟地 180 克 千年健 90 克 炙青皮 45 克 潼蒺藜 90 克
制首乌 90 克 煨狗脊 150 克 夏枯草 60 克 炒杜仲 90 克
炒白芍 60 克 炙甘草 45 克 炙陈皮 90 克
龙眼肉、红枣、白果肉各 120 克 阿胶 180 克 霞天胶 120 克，另炖烊，
收膏入 冰糖 500 克，收膏入

陆，女，三十岁。十月。杭州。去岁血崩，气血俱虚，经行愆期，色淡量少，拖延时日，头昏心悸，腰楚跼软，面色少华，舌淡红，苔淡白，脉涩无力。证属冲任两伤，治当调摄奇经。

大熟地 24 克 炙当归 9 克 炒阿胶珠 12 克 炒枣仁 9 克
制远志 6 克 炙黄芪 9 克 炒柏子仁 6 克 炒白芍 9 克
猪心血炒丹参 9 克 炒川断 9 克 炙川芎 1.5 克

二诊：前方服后，头昏心悸，腰酸均减，但寐况欠佳，纳食乏味。续以心脾两顾。

米炒上潞参9克 炒冬术6克 炙当归9克 炒枣仁12克
制远志6克 炙黄芪9克 清炙甘草2.4克 广木香5克
炒杜仲9克 潼蒺藜9克 炒川断9克 炒阿胶珠12克

三诊：寐况好转，面色较前红润，经汛将临，腰酸又甚，脉缓滑，苔白薄。原法出入。

炒上潞参9克 丹参12克 炙当归9克 茯苓12克
炒菟丝子9克 制川断9克 炒枣仁12克 炒白芍12克
炙川芎2.4克 大熟地12克 炒杜仲12克

四诊：此届经来如期，色量正常，脉缓，苔白薄。再拟养血调经。

炙当归9克 炒丹参12克 益母草9克 炒白芍9克
炙川芎3克 炒菟丝子9克 炒杜仲12克 炒阿胶珠9克
炒白术5克 新会皮5克

沈，女，三十三岁。八月。杭州。前次月经愆期五月方来，此届又逾期未行，小腹胀痛，昨见鼻衄，量多色红，颜面烘热，头痛而胀，神烦寐劣，大便燥结，舌白薄黄，脉象滑数。此血热逆行故也。

丹皮9克 赤白芍各6克 益母草12克 泽兰9克
炒枳壳8克 生卷柏9克 川牛膝8克 杜红花5克 全当归9克
茅根30克 川芎5克

二诊：前方服后，衄止寐安，月经未行，少腹胀痛如故。上行之血已有下达之渐，原方仍可续进。

全当归9克 泽兰9克 生卷柏9克 炒桃仁5克 益母草12克
川牛膝5克 赤芍9克 杜红花5克 丹参9克 凌霄花9克
陈茅根30克

三诊：月经已行，色鲜量少，小腹胀痛已除。再拟气血两顾，以调冲任。

米炒上潞参9克 炒晒白术5克 云茯苓9克 炙当归9克
炒白芍9克 大生地12克 清炙甘草2.4克 陈皮5克 阿胶珠9克

程，女，二十六岁。二月。上海。经水每每逾期而来，色淡量少，

少腹冷痛，得温则舒，四肢不暖，面色苍白，脉来涩迟，证属冲任虚寒，气滞血阻，仿长沙法。

炙桂枝 5 克 炒白芍 9 克 酒炒当归 12 克 炒川芎 5 克
炙甘草 5 克 炙艾叶 5 克，包 酒炒丹参 15 克
桂心 2.4 克，研粉，饭和丸，吞 制香附 9 克 郁金 5 克 制川断 9 克
炮姜 5 克 红枣 5 只

二诊：前方服后，腹痛减轻，肢冷转暖，脉象迟缓，苔薄白。前方既效，仍守原法出入。

炙桂枝 5 克 炒白芍 9 克 酒炒当归 12 克 酒炒丹参 15 克
炙川芎 5 克 炙艾叶 5 克，包 制香附 9 克 郁金 5 克 制川断 9 克
炮姜 5 克 益母草 9 克 桂心 2.1 克，研粉，饭和丸，吞

三诊：两进温通行血，胞宫寒凝，得暖而散，腹痛若查，脉缓苔白。再拟益气养血。

炙当归 9 克 炙川芎 5 克 炒杭芍 6 克 郁金 9 克 制川断 9 克
炙桂枝 3 克 炙甘草 6 克 炙黄芪 9 克 砂仁 2.4 克拌 熟地 18 克
米炒上潞参 9 克 制香附 9 克 红枣 5 只

冯，女，四十三岁。七月。乌镇。情志抑郁，肝失疏泄，月经数月一转，量少色紫，年余于兹，自觉少腹有块不时攻痛，面色暗滞，肌肤甲错，舌紫，脉象弦涩。气滞血瘀，任脉为病，治拟疏肝理气，活血行瘀。

抵当丸 6 克，分二次吞 丹参 15 克 生苡仁 15 克 泽泻 6 克
小青皮 5 克 芸茯苓 15 克 广木香 2.4 克拌炒 白芍 5 克
制香附 6 克 小茴 2.4 克拌炒，当归 9 克 郁金 5 克 白术 5 克
桑海螵蛸各 9 克

二诊：前方服后，少腹攻痛不若前甚，而月经仍然未行，脉象弦涩，舌紫。仍守原法出入。

抵当丸 6 克，分二次吞 丹参 15 克 木香 2.4 克 拌炒白芍 5 克
炒川芎 5 克 炒金铃子 6 克 郁金 5 克 小茴 2.4 克拌炒，当归 9 克

炒白术 5克 杜红花 2.4克 小青皮 5克 制香附 6克
桑海螵蛸各 9克

三诊：昨日月经来临，量多色紫，夹有血块，少腹之痛已除，肌肤甲错如前。再拟养血调经。

炒当归 9克 炙川芎 3克 炒丹参 15克 炒白芍 9克
益母草 9克 藏红花 3克 云茯苓 12克 郁金 6克 炒川楝子 9克
青皮 5克 制香附 6克

《叶熙春专辑》

月经先后不定期

王孟英

褚芹香女校书，患汛愆寒热，医以为损，辄投温补。驯至腹胀不饥，带淋便闭，溲涩而痛。孟英诊脉，弦劲而数。乃热伏厥阴，误治而肺亦壅塞也。与清肃开上之剂，吞当归龙荟丸，两服，寒热不作而知饥，旬日后，诸恙悉安。

吴瞿斋令姊，禀质素弱，幼时，凤山诊之，许其不秀。癸巳失其怙恃，情怀悒悒，汛事渐愆，寝食皆废，肌瘦吞酸，势极可畏。孟英以高丽参、盐水炒黄连、甘草、小麦、红枣、百合、茯苓、白芍、旋复花、新绛、牡蛎等药治之，各恙渐已。继以（高丽）参、（当）归、（熟）地滋阴，康强竟胜于昔。

《王氏医案》

费伯雄

某。经乱腰腹酸痛，气撑胸阻，乳房掣痛，过期则寒热气滞。肝胆失和，郁热不化。拟逍遥散平肝理气。

当归二钱 白芍一钱半 制香附二钱 丹参二钱 沉香一钱半
炙草五分 青蒿二钱 茯苓二钱 薄荷一钱 乌药一钱半 郁金二钱

柴胡四分 佛手五分 橘饼 桑枝

《费伯雄医案》

张乃修

沈右。阴虚气弱，脾不运旋，封藏不固。每至冬令，辄易感风，大便或结或溏，经事愆期，不时带下。脉濡细，苔薄白。拟气阴并调。

党参三钱 茯苓三钱 炒山药三钱 白芍酒炒，一钱五分
炒扁豆三钱，研 潼沙苑盐水炒，三钱 于术一钱 炒木瓜皮二钱
菟丝子盐水炒，三钱 杞子三钱 六味地黄丸晨服一钱五分

二诊：脾虚则大便或结或溏，肾虚则封藏不固。收藏之令，辄易感冒咳嗽，经不应期，时为带下。脉象濡细。气阴并调，从前法扩充。

炒萸肉一钱五分 大熟地砂仁炙，四钱 杭白芍酒炒，一钱五分
橘白一钱 奎党参三钱 炒于术二钱 生山药三钱 炙甘草三分
茯苓三钱 潼沙苑盐水炒，三钱

三诊：脾虚则不运，肾虚则不藏，脾不运则大便时溏，肾不藏则封固不密。每至冬令，易召外感，而为喘咳，经事遂不应期，带脉从而不固。宜从脾胃并调。

炙绵芪三两 炒萸肉一两 炒山药二两 奎党参四两
远志肉五钱 炒扁豆二两 川断肉二两 炒于术二两 白茯苓三两
炙黑草五钱 制首乌四两 菟丝子二两 破故纸二两 巴戟肉二两
甘杞子二两 制香附一两五钱 潼沙苑盐水炒，三两 广皮一两
大熟地砂仁炙，四两 制半夏一两五钱 粉归身酒炒，一两五钱 杜仲三两
杭白芍酒炒，一两五钱 紫丹参一两五钱 泽泻一两
大生地姜汁炙，四两 炒枣仁一两，研

清阿胶三两，鹿角胶二两，龟板胶二两，以上胶溶化收膏，晨服七八钱。

《张聿青医案》

王旭高

张。营血不足，经事愆期。肝气有余，瘀凝停滞。心荡头眩，腹鸣胀满，是其征也。胀满能食，病在肝而不在脾。拟舒肝化瘀、和营养阴法。

金铃子 吴茱萸 当归 延胡索 陈皮 沙苑子 茯苓 香附 大麦芽 青皮

《王旭高临证医案》

陈莲舫

蒋。产后虚弱，经事愆期，腰酸腹痛，治以和养。

制香附 红藤膏 炒当归 川杜仲 补骨脂 广陈皮 杭甘菊 沙苑子 生白芍 菟丝子 焦艾绒 沉香曲 檀香

张。奇经内亏，期愆色淡。诸经之营，难于汇集冲海，以致腰腹痛胀。盖下虚每为上实，遂为两目痛痒发干，口内碎痛种种。经不调则百病丛集，或肢热背寒，或背热肢寒，逢劳则又觉头眩腕泛。大约营卫不和，气虚血为偏也。序案代扎，附以方，请鉴政。

吉林须 红藤膏 元生地 抱茯神 辰砂拌 煅牡蛎 金石斛 制香附 全当归 生白芍 远志肉 川杜仲 广橘红

马。奇经失养，月事不准，腰酸股痛，并无色泽，心悸头眩，诸虚皆由八脉而来，治以和养。

阿胶珠 抱茯神 全当归 沙苑子 陈艾绒 制丹参 制香附 花龙骨 生白芍 川杜仲 淡乌贼 新会皮 红月季

《莲舫秘旨》

吴鞠通

丁亥闰五月初四日，池氏。前因中下焦有寒，服霹雳散已效，惟月事总不应期。经云：“二阳之病发心脾，女子不月。”二阳者，阳明

也。阳明阳气受伤，肝来克土，故常吐白沫，胃虚而肝乘之，故时发呕逆。现在受病，确与经文相合。议与和胃益胃，和则不呕，肝不来克，纳食旺，自然生血，经所谓：“中焦受气取汁，变化而赤，是为血。”又谓：“营出中焦，阳气充满，则血无阻滞。”此等调经法，世人绝不知之。

姜半夏五钱 薏仁五钱 生香附三钱 云苓块三钱 广皮三钱
降香末三钱 生姜五大片 煮成三杯；分三次服。以至不呕不吐沫纳食旺为度。

《吴鞠通医案》

金子久

肝肾营虚气滞，月事不以时下，奇经冲任少摄，带下频频不止，肾为胃关，肾虚关窒，腰酸脘胀，纳谷呆钝，脉象弦数，当益乙癸之虚，兼调八脉之滞。

小茴 当归 桂枝 白芍 防风炒绵芪 柴胡 菟藟子 杞子 冬术 云茯苓 杜仲 佛手 青皮 砂壳

《金子久专辑》

丁泽周

乔右。经事超前落后，腹痛隐隐，多年不育，冲任亏损，肝脾不和，宜养血调经。

潞党参二钱 云茯苓三钱 生白术二钱 清炙草六分
全当归二钱 大白芍二钱 大熟地三钱 抚川芎八分 紫丹参二钱
菟藟子三钱 月季花八分 红枣五枚

妇科八珍丸六两，间日服三钱。

朱右。营阴不足，肝阳上升，冲任不调，经行腹痛，或前或后，头眩眼花。宜养血柔肝，理气调经。

生白芍三钱 黑稻豆衣三钱 川石斛三钱 生石决六钱

朱茯神三钱 炒杭菊钱半 薄荷炭八分 羌蔚子三钱 紫丹参二钱
生香附钱半 炒怀膝二钱 嫩钩钩后入，三钱 青橘叶钱半

《丁甘仁医案续编》

贺季衡

孙女。荣卫不调，积湿化水，水与气搏，腹部膨胀，不时水声漉漉，搅扰不安，月事或先或后，切脉沉弦而滑，舌苔腐而黄。业经一年，难收速效，调畅为先。

当归二钱 大丹参一钱五分 旋复花一钱五分，包 白蒺藜四钱
大白芍二钱 沉香曲一钱五分 泽泻一钱五分 云苓三钱 台乌药一钱
大腹皮四钱 降香片八分 香椽皮一钱五分

另：沉香顺气丸二两，每服二钱，开水下。

张女。气血凝滞，肝胃不和，气逆善噫，月事不调，或先或后，少腹痛，或作胀，白带多，头眩肢困，脉弦细，舌红。得于小产后，冲带二脉已伤，先当和理。

当归二钱 大丹参二钱 大白芍二钱，吴萸五分拌炒
金香附一钱五分，醋炒 白蒺藜四钱 大川芎八分 云神四钱
羌蔚子三钱 大生地五钱，红花四分炒 乌贼骨四钱炙 佛手花八分
红枣三个

《贺季衡医案》

孔伯华

石女，四月初四日。劳损伤湿，经无定期，时或并月而下，兼有瘀块，周身经络亦为湿郁，渐有周身关节痛楚之患，脉弦滑不和，亟宜渗化达络，兼事和血为法。

生牡蛎四钱，布包先煎 桑寄生六钱 生海蛤八钱，布包先煎、
川牛膝三钱 威灵仙三钱 生滑石块四钱 代赭石三钱 元胡三钱
旋覆花三钱，布包 杜仲炭三钱 土炒台乌药三钱 焦麦芽三钱

生知母三钱 生黄柏三钱 生橘核四钱 赤小豆五钱,布包

犀黄丸八分(分二次冲服)二剂

《孔伯华医集》

经期延长

抱灵居士

赵氏,手指麻木,身腰胀痛,子午发热,背恶寒,五心热,口干,腹胀,经行淋漓不断,脉浮濡。以八味逍遥散,热退;以二陈汤加黄连、丹、栀一剂,经止。二十日发热,身腰股胀痛,以逍遥散合四物汤加香附二剂,热胀止,经来二日止;以四乌散加元胡一剂,经来些少,又加桃、红一剂,经来些少,夜微热,头昏,肢节痛;以八味逍遥散加香附,病减;以六味加归、芍二剂,热退。至四十日,五心热,夜热口干,白带,胸胁饱胀,经不至,脉沉涩,以四乌散加法夏、云苓二剂而孕已成矣。

《李氏医案》

张乃修

朱右。经来淋漓不止,少腹酸痛,偏右痞块攻筑,血色紫殷。冲脉气滞。宜调冲任而宣气滞。

阿胶珠三钱 川芎一钱五分 炙艾叶七分 制香附二钱
川断肉三钱 生地炭三钱 酒炒白芍一钱五分 干橘叶一钱五分
酒炒当归二钱 公丁香三分

二诊:淋漓仍然不止,中脘痞闷,少腹酸坠。冲气不和,冲脉不固。拟和营平木。

乌贼骨三钱 鸡血藤膏三钱,冲 阿胶珠二钱 土炒白芍一钱五分
橘皮一钱 茜草炭一钱五分 干橘叶一钱五分

半夏曲一钱五分，盐水炒 制香附二钱 左金丸二次服，五分

《张聿青医案》

王旭高

王。经来半月不止，有紫血块，少腹疼痛，气坠阴门，诊脉沉涩，下午恶寒。阳陷入阴，营虚失守。法以升阳收摄其阴。

党参 熟地 黄芪 升麻 归身 阿胶蒲黄炒 冬术 白芍
柴胡 淡芩 血余炭

《王旭高临证医案》

陈莲舫

昆，姚。奇经内亏，早通而期愆，色淡，脉弦，头疼，营阴内亏，气痹不宣，治以和养。

西洋参 红藤膏 炒当归 川杜仲 淮牛膝 广陈皮 制香
附 抱茯神 生白芍 沙苑子 佛手花 代代花

《莲舫秘旨》

叶熙春

王，女，三十六岁。十月。上海。每次经来，色鲜量多，拖延时日，面色萎黄，心悸不宁，纳不便漉，脉象细小，舌苔白薄。心脾两亏，主统无权，拟补益心脾。

米炒上潞参9克 清炙黄芪9克 炒晒白术6克 炒归身5克
炙甘草2.4克 炒杵枣仁9克 制远志6克 炮姜1.5克
炒阿胶珠9克 砂仁1.5克拌炒 大熟地12克 煨广木香6克
龙眼连核5只

二诊：前方连服十剂，经漏即止，胃纳亦增，接服归脾丸，以善其后。

《叶熙春专辑》

施今墨

臧某某，女，20岁。十六岁初潮，经期尚准，半年以来经行虽按期。但时间逐渐延长。每来一周多始完，最近两个月竟淋漓不止，头晕目眩，心悸气短，胸闷胀，食不香，腰酸神疲，二便睡眠正常。舌苔薄白，脉象沉细有力。

辨证立法：素日体弱，又复早婚，气血未充，是以经行时间延长，脾胃不健，食欲减退，后天补给不足，肝气郁结，头晕目眩，胸闷胀满。气不摄血，冲任失固，渐趋淋漓。拟助气摄血。扶脾健中舒肝解郁之法。

处 方：黑升麻3克 生牡蛎10克，生龙齿10克同打同布包
五味子3克，五味子3克同捣 黑芥穗6克 白蒺藜10克 沙蒺藜10克
生熟地各6克，砂仁3克同捣 杭白芍10克，柴胡5克同炒
鹿角胶6克，另溶兑服 阿胶珠10克 山萸炭15克 茅根炭15克
米参党6克 厚朴花6克 玫瑰花6克 柏叶炭10克 莲房炭10克
炒建曲10克

二诊：服药两剂，月经显著减少，但仍未断，心跳气短，头晕依旧，食不香，胸胀闷，脉象如前，仍按上方加减。

处 方：黑升麻3克 川杜仲10克，炒炭 黑芥穗6克
川续断10克 生牡蛎10克，生龙齿10克同打同布包 阿胶珠10克
生熟地各6克，砂仁5克同捣 杭白芍10克，醋柴胡5克同炒 山萸炭15克
厚朴花6克 莱菔子6克，炒 仙鹤草12克，炒 玫瑰花6克
莱菔荚6克，炒 茅根炭15克 谷麦芽各10克 酒黄连3克
沙蒺藜10克 炒远志6克 酒黄芩6克 白蒺藜10克

三诊：服药三剂月经已止，食欲转佳，胸腹闷胀已愈，惟仍头晕目眩，心悸气短，下午感觉烦热，脉象不似从前之沉细。气血已亏，来复需时，改服丸剂以善后。

处方：每日早午各服人参归脾丸1丸，夜晚服玉液金丹1丸。

共服三十日。

《施今墨临床经验集》

月经过多

王孟英

王西翁令孙芝生茂才室，久患汛行太速，头痛神疲，形瘦内烦，渴喜热饮，纳食滞膈，络胀少眠，脉至软滑虚弦，腿酸而有赤块甚痛，乃阴亏水不涵木，风阳内炽，气郁痰凝。议宜养清潜互用法：沙参六钱，鳖甲八钱，首乌三钱，茯神、菊花各二钱，梔炭、竹茹、桑叶各一钱五分，白薇、黄柏、丝瓜络各一钱，以藕二两，十大功劳一两，煮汤煎药；外用葱白杵烂，蜜调，涂腿上赤块。仲冬复视，烦减能眠，汛行较缓，头疼腿块均已渐瘥，乃与通补柔潜之剂。后信来知其服甚效。

《归砚录》

张乃修

解右。产后血虚气滞，腹时胀满，每至经来，血行甚多。气为血帅，宜调其气。

当归二钱 炒枣仁二钱 黑豆衣三钱 厚杜仲三钱
茜草灰一钱五分 潼沙苑三钱 池菊花一钱五分 乌贼骨三钱
藿香正气丸先服三钱 茯神三钱

二诊：此次经来未至过多，然腹中尚觉胀满，有时气冲至脘。还是冲气未平，缓商调补。

制香附三钱 土炒白芍一钱五分 炒枳壳一钱 广皮一钱
茯神三钱 炒枣仁三钱 金铃子三钱 砂仁壳五分
四制香附丸清晨服二钱 木瓜皮一钱，炒

三诊：一阳将夏，肝阳不平，腹满中脘作痛，头昏眩晕，平月经

事过多。皆肝经气火有余。再熄肝木。

川楝子一钱五分 土炒白芍一钱五分 黑豆衣三钱
黑山栀一钱五分 制香附二钱 菊花一钱五分 橘皮一钱 炒枳壳一钱
干荷叶边三钱 女贞子三钱

《张聿青医案》

王旭高

曹。经事来多去少，似崩非崩，是血虚有热也。所谓天暑地热，则经水沸溢。用白薇汤加阿胶主之。

女贞子 白薇 阿胶米粉炒 淡芩炭醋炒 黄柏
沙苑子盐水炒 白芍 莲心 归身炭 旱莲草

《王旭高临证医案》

王仲奇

王右，海盐，七月廿六日。经来日多，盆涌有块，带淋缠绵，头眩耳鸣，胸闷腰酸，腹胀痛，有垒块起伏，时有寒热，间有牙宣，脉濡弦，奇恒有亏，防崩漏。

左牡蛎煅先煎，三钱 香白薇炒，二钱 白蒺藜三钱 绿萼梅八分
续断炒，二钱 丹参二钱 全当归三钱 白芍炒，二钱
五灵脂炒去砂石二钱 乌贼骨炙，三钱 白薇三钱 鸡冠花钱半

二诊：七月廿九日。胞脉为病，肠回失舒，经来盆涌有块，带淋缠绵，腹胀痛有垒块起伏，头眩耳鸣腰酸，间有牙宣，脉濡滞而弦。治以舒气调营，用防崩漏。

柏子仁拌，三钱 川楝子理，钱半 刘寄奴二钱 全当归三钱
白芍炒，二钱 白蒺藜三钱 续断炒，二钱 白薇三钱 乌骨炙，三钱
五灵脂炒去砂石，二钱 茜根二钱 凌霄花二钱 鸡冠花钱半

三诊：八月九日。腹痛见愈，少腹膨胀未消，垒块亦未消弭；头眩耳鸣较安；经常愆期，带淋缠绵，脉濡弦。仍以舒气调经，用防崩

漏。

柏子仁_{拌,三钱} 川楝子_{煨,钱半} 刘寄奴_{钱半} 青皮_{炒,钱半}
制川朴_{钱半} 台乌药_{钱半} 缩砂仁_{钱半} 泽兰_{三钱}
五灵脂_{炒去砂石,二钱} 乌贼骨_{炙,三钱} 红花_{八分} 白薇_{三钱}
鸡薏花_{钱半}

《王仲奇医案》

孔伯华

卜妇,六月初六日。血虚肝旺,以致经水较多,脾湿亦重,经络失畅,腰腿酸疼,腹胀,脉盛两关,亟宜育阴渗化。

石决明_{八钱} 旋复花_{三钱} 代赭石_{三钱} 威灵仙_{四钱} 知母_{三钱}
云苓皮_{四钱} 桑寄生_{八钱} 炒乌药_{三钱} 杜仲炭_{三钱} 橘核_{四钱}
宣木瓜_{三钱} 生牡蛎_两 大腹绒_{三钱} 川牛膝_{四钱} 莲子心_{二钱}

《孔伯华医集》

章成之

朱女。行经量多如冲,面色不华,头眩。即当固摄,先治其急。

大熟地_{15克} 阿胶_{9克烊冲} 金毛脊_{9克} 川断_{9克} 瞿麦_{9克}
苈麻根_{12克} 仙鹤草_{15克} 党参_{9克} 黄芪_{9克} 陈棕_{12克}

二诊:前方不能止,经之天下如冲,予加味胶红饮。

生阿胶_{9克} 藏红花_{6克} 全当归_{9克} 瞿麦_{9克} 冬瓜子_{9克}
仙鹤草_{15克} 乌贼骨_{60克} 威喜丸_{15克,包煎}

三诊:经多如血冲,以胶红饮而暂止。

大熟地_{12克} 金毛脊_{9克} 川断_{9克} 仙鹤草_{15克}
乌贼骨_{30克} 元武板_{15克} 威喜丸_{15克,入煎}

《章次公医案》

施今墨

龙某某，女，53岁。年逾五旬，经水未断，反而淋漓不绝，量不多，有白带，全身酸软，头晕腰疼，患者不能服汤药，要求以丸药治之。舌苔薄白，六脉细弱。

辨证立法：更年期之期，月经断绝是属正常，反而淋漓不绝者，本体素虚，气血不足，统摄无力也。拟调理冲任，补其本元治之。

处方：每日早服人参归脾丸10克，午服紫河车粉3克，晚服强心丹12粒。

二诊：服药十日后，诸证均减，血已少，白带不多，头晕心跳好转，精神亦佳，仍以丸药治之。

处方：每日早服参茸卫生丸1丸。午服强心丹12粒。晚服玉液金丹1丸。

三诊：服丸药二十日经水已止，白带微量，腰痛头晕均大见好，精神较佳，两胁有时窜痛，心跳气短较前好转。

处方：每日早服逍遥丸6克，午服强心丹8粒。晚服参苓白术丸10克。

四诊：前诊三次，共服药二个月，诸证皆失，要求巩固疗效，防止再发。

处方：每日早服紫河车粉3克，晚服参茸卫生丸1丸。

《施今墨临床经验集》

月经过少

王旭高

李。妇人之病，首重调经。经事初起不来，状如怀子。以后来而略少，但腹渐大，三载有余。尚疑有孕，岂非痴人说梦耶？《内经》谓肠覃、石瘕皆腹大如怀子，石瘕则月事不来，肠覃则月事仍

来，而提其要曰：皆生于女子，可导而下。夫岂徒有虚文而无斯症哉！余曾见过下红白垢污如猪油粉皮样者无数，调理得宜，亦有愈者。藉曰不然，则天下尽有高才博学之医，就有道而正焉，无烦余之多赘也。

大黄廑虫丸每朝三十粒，炒大麦芽泡汤送下。

《王旭高临证医案》

柳宝诒

熊。养血托邪，疏通奇经，两法迭用，咳热均减；惟少腹滞痛转甚，经速而少，此下焦瘀热内阻，奇络不能疏畅之故。脉象细数带弦，虚中挟实，但与滋养，恐难愈病。仍拟于清养中，佐以疏导。

当归 白芍土炒 小生地炒 川芎炭 炒丹皮 延胡索醋炒
金铃子酒炒 长牛膝红花酒煎拌炒 乌药 沉香片 青广木香各
川断肉炒 白薇 佛手

《柳宝诒医案》

金子久

丰腴之体，脂膏充满，子宫满塞，故难孕育，询知月事准期，来而甚少，脉象滑大，病关八脉，治当温养下元，以涵奇经。

炙绵芪 党参 熟冬术 广皮 茺蔚子 杜仲 鹿角霜 白芍 潼蒺藜 归身 刺猬皮 菟丝子

《金子久专辑》

丁泽周

沈右。气升呕吐，止发不常，口干内热，经事愆期，行而不多，夜不安寐，舌质红，苔薄黄。脉象左弦右涩，弦为肝旺，涩为血少。良由中怀抑塞，木郁不达，郁极化火，火性炎上，上冲则为呕吐，经所谓诸逆冲上，皆属于火是也。肝胆同宫，肝郁则清静之府岂能无动，

挟胆火以上升，则气升呕逆，尤为必有之象。口干内热，可以类推矣。治肝之病，知肝传脾。肝气横逆，不得舒泄，顺乘中土，脾胃受制。胃者，二阳也。经云：二阳之病发心脾，有不得隐曲，女子不月。以心生血，脾统血，肝藏血，而细推营血之化源，实由二阳所出。经云：饮食入胃，游溢精气，上输于脾。又云：中焦受气取汁，变化而赤，是谓血。又云：营出中焦。木克土虚，中焦失其变化之功能，所生之血日少，上既不能奉生于心脾，下又无以泽灌乎冲任，经来愆期而少，已有不月之渐，一传再传，便有风消息贲之变，蚊穴溃堤，积羽折轴，岂能无虞。先哲云：肝为刚脏，非柔养不克，胃为阳土，非清通不和。拟进养血柔肝，和胃通经之法，不治心脾，而治肝胃，穷源返本之谋也。第是症属七情，人非太上，尤当怡养和悦，庶使药达病所，即奏肤功，不致缠绵为要耳。

生白芍二钱 朱茯神三钱 仙半夏一钱五分 川石斛二钱
炒枣仁三钱 代赭石煨二钱 旋复花包一钱五分 银柴胡一钱
青龙齿三钱 广橘白一钱 羌蔚子三钱 丹参二钱 鲜竹茹一钱五分
生熟谷芽各三钱 左金丸包，七分

二诊：气升呕吐未发，夜寐不安，经事行而不多，苔灰黄，按脉弦细而涩。皆由营血亏耗，肝失条达，脾失健运，胃失和降为病。昨投养血柔肝，和胃降逆，助以调经之剂，尚觉获效。仍拟逍遥合复赭二陈加减，但得木土不争，则诸恙可愈。

白归身二钱 朱茯神三钱 炒枣仁三钱 炒竹茹一钱五分
生白芍二钱 仙半夏一钱五分 青龙齿三钱 广橘白一钱五分
银柴胡八分 北秫米包三钱 代赭石煨三钱 羌蔚子三钱
川石斛三钱 旋复花包一钱五分 青橘叶一钱五分

《丁甘仁医案》

周镇

荣某氏，辛亥夏仲腹中气滞，少腹痛，左膀有形，经来甚少如

无，体灼内热。审系血虚气郁，虚而有瘀。拟方当归、白芍、丹参、远志、鳖甲、香附、生地、香橼、乳香、功劳子、预知子，研细。每服三钱，空腹服。至半月，腹痛大定，经来如墨且多，轰热陡退，胃口大馨。然头眩目花带下，虚象大著。转服四物、六味、杜仲、龟板以养肝肾，即觉有孕。此可证病因虚者必先顾正，若虚而因悲郁，气滞而血瘀少，以至体灼轰热，即宜通宣，亦一效也。

《周小农医案》

方公溥

徐女。四月十六日诊：经行量少而不畅行，少腹胀满殊甚，经色紫暗而瘀块，脉弦涩，治以理气舒肝，宽胀行瘀。

广木香 4.5 克 制香附 9 克 炒延胡 9 克 元红花 4.5 克
大川芎 4.5 克 全当归 9 克 光桃仁 9 克 赤芍药 9 克
新会皮 4.5 克 台乌药 9 克 粉丹皮 6 克

四月十九日复诊：经行较畅，经色紫暗，少腹胀满减而未痊，再进一步调理。处方同前，除赤芍、红花，加制厚朴 4.5 克炒枳壳 4.5 克。

《方公溥医案》

冉雪峰

陈兰，女，泰国人，往岁曾患甲状腺机能亢进，有心跳，眼珠突出，易倦等证象，经手术后，证状转好，不久又出现容易疲倦、食欲不振及眼眶浮肿、皮肤干燥、月事减少、色黑等证。在某医院治疗，认为甲状腺大部切除，功能低减，治以甲状腺制剂（轻量）。谓宜久服，半年余转来中医研究院门诊部诊治。查询如上经过，此病前为甲状腺机能亢进，后为甲状腺机能减退，根据现有证象为基础，调摄整个机体为斡旋，润液育阴，凉营沃燥，随病机出入加减于其间。初拟方系人参养荣丸和五子衍宗丸加昆布、海藻、桑螵蛸等，似效

不效。继拟方：当归、白芍、川芎各三钱，茯神四钱，枣仁三钱，元胡索、丹皮、茅根、泽兰叶各三钱，生谷芽四钱，煎服。二星期有效，四星期效著，心跳胸痹未发，手不颤，各证大半转好（前药中，或加梔子、地骨皮、山萸肉、牡蛎及威灵仙、元胡索等）。继续拟方，宗前法，加重培育扶正，又四星期，一般状况甚佳，基础代谢率由-15至-20升为-2。病已向愈，体重增加，自觉无不适。末后拟方，仍守前法，轻其制而减其量，半清半调，隔日服一剂，阅四月无变化，即偶有不适或附带他病，随治随愈，时值夏热，赴青岛避暑，病大体已愈，为拟调摄方：人参归脾丸一斤，每服一钱至二钱，日二次。秋凉回京，尚来诊一次，一般良好，嘱仍服归脾丸缓调善后。

《冉雪峰医案》

月经不调

陈念祖

月事不调，头晕，胸脘胀满，心腹隐隐作痛，脉形两寸浮数，左关弦。乃阴虚内热，肝郁血滞所致。宜养血舒气，佐以解郁平肝。

当归身三钱，酒炒 大熟地三钱 炒白芍二钱 川芎一钱
 阿胶二钱 黄芩二钱 郁金一钱 制香附八分 泽兰叶二钱
 粉丹皮二钱 艾叶七分，炒

《南雅堂医案》

黄凯钧

俞女，十九，患月信不调，不时气逆冲胸，迷闷呕吐，甚至神昏发厥，脉大而涩，证似木乘土。因脉不合症，视其面色，并无忧怒之形，缘询病起几时，自述前岁饮井水停经，旋起腹胀，后经通而气冲之病作矣。予既得其情，即处一方，以温经逐瘀利气三法并施。

炮姜八分 归尾二钱，酒润 艾叶一钱五分 大黄三钱，酒润迟入

枳实一钱五分 延胡索一钱五分 香附二钱 橘皮一钱 桃仁二钱
红花一钱

时适行经之期，服两剂，所下瘀块甚多，胸宽腹和，不知病之去向矣；惟觉形软，诊其脉无涩大之象，三载沉痾，应手取效，下法不可不知。改调补气血方，母女不胜欣悦而返。

《肘后偶钞》

何书田

癸水不调，时欲腹痛，纳食脘次不舒；脉形弦细而数。此肝络不和，气郁、血郁为患也。急切不能奏效，以疏郁调营主治。

制香附 煨木香 白归身 炒黄芩 川楝子 小郁金 新会皮 炒白芍 牡丹皮 鲜橘叶

《芋山草堂医案》

王孟英

张养之令正，饮食如常而肌肤消瘦，汛事如期而紫淡不恒，两腓发热而别处仍和，面色青黄面隐隐有黑气（色）。俨似虚寒，多药不效。始延孟英诊之，脉似虚细，而沉分略形弦滑。曰：此阳明有余，少阴不足，土燥水涸。仲圣有急下存阴之法，然彼外感也，有余之邪，可以直泄，此内伤也。无形之热，宜以甘寒，义虽同而药则异，赠以西洋参、生地、生白芍、生石膏、知（母）、（黄）柏、（茯）苓、梔（子）、麦冬、花粉、楝实、丹皮、（麦）门冬、木通诸品，服至数斤，黑气退而肌渐充，腓热去而经亦调矣。

《王氏医案》

费伯雄

某。经停两月，诊脉虽滑，而痰饮亦为滑。更兼乳儿之期，经本无常，是以难定弄璋。刻下寒热咳嗽，胸阻气呛，倦怠无力。急宜疏

解平肝。

苏梗二钱 炒枳壳一钱 杏仁三钱 乌药二钱 茯苓三钱
姜半夏一钱半 神曲三钱 生草五分 郁金二钱 桔梗一钱
青陈皮各一钱 竹茹二钱

复诊：加沉香曲一钱半 南沙参三钱 丹皮二钱 去苏梗。

《费伯雄医案》

李铎

聂姓妇，年三旬，寸脉浮数，左关带弦，两尺细涩，面目浮黄、咳嗽痰鸣，气逆头眩，经候不调，证属血虚肝燥。书云：肝病则血病，血病则经不调，经不调则诸症蜂起矣。治宜平肝清肺，仿木郁达之之义。

当归 白芍 白术 柴胡 川贝母 丹参 茯苓 薄荷 桑叶 甘草 兼服九制香附丸

又 连进加味逍遥之剂，嗽痰稍减，诸症亦渐缓，显是肝气逆行，内风乘肺之征。治以舒肝，故火散而肺宁也。惟久嗽损及中州，脾失输化之职，以致食减神倦，气逆不舒，肺无所资，久嗽仍是难愈。且停乳不月，足见真阴亏损，合之脾肾两脉濡弱，自当从脾肾子母相生主治，勿用见嗽治嗽泥法。议八珍汤加减，并宜薄味节气，静养心神。

北沙参 冬术 云苓 木香 熟地 当归 鹿角胶 陈皮 炙草 晚間服六味丸五钱，五味子汤下。

徐姓妇，年二十余，腹内患一气块，不时上攻，或痛而有声，吞酸痞满，常发寒热，月经不调，小溲频数，面色青黄，年余服药无效。余诊之，两关弦实，此肝脾气滞，兼有郁恼，用归芍六君加柴胡、木香、水煎，吞左金丸一钱。四剂气稍舒，痛亦减，即与归脾汤下龙荟丸二钱，月余而诸症退，痞块消，再与调中益气加茯苓、牡丹皮，俾中气旺而月经自调。若再失治，成癆成鼓，难免后忧。

是即脉之弦实处究出病源，故诸症自除。寿山

《医案偶存》

杨毓斌

某氏妇。方书谓：经多为热，经多妄行亦为热。医家率用滋阴凉血之品，由是久而变成骨蒸、怯损、癆嗽者比比矣，而不知此证多因土湿卑监，不能堤防所致。盖脾主统血，脾病则血无所统故也。前贤谓：血得温则归经；又谓：运之者，其阳和乎。斯言诚得治血调经三昧。尊恙兼症，时觉虚烦，两腿板肿；时胀时痛；脉右寸关来盛去悠，显露芤革之象，右尺沉弦而微，左三部虚弱。阴血固伤，阳气亦殊欠振运，病已多日，姑仿归脾汤意加减，以消息之，三剂后果验。原方出入十余帖。遂瘳。附存初方：

炙黄芪 炙野白术 醋炒当归身 盐水炒 陈皮 水炙甘草
首乌藤 宣木瓜 川续断 煨木香 白茯苓 生谷芽

沈姑。胃弱纳谷不香，腰痛，溏泄，天癸不调，延经半载，叩治。为拟温养脾胃，和肝调经，制方四五服，竟全瘳。

当归身四钱 生白芍三钱 真阿胶三钱 糯米炒杜仲二钱
盐水炒补骨脂二钱 山茱萸二钱 潞党参三钱 乌贼骨三钱
怀山药三钱 茯苓三钱 炮姜二钱 煨木香一钱 炙甘草二钱
生姜一钱 饴糖三钱

《治验论案》

陈莲舫

王。经事不调数日，必发盗汗，腕胀，神疲头蒙，脉数，营亏气痹，治以和养。

鸡血藤膏 白蒺藜 抱茯神 大丹参 厚朴花 代代花 生
白芍 杭甘菊 远志肉 柔白薇 焦米仁

《莲舫秘旨》

王埶

越数月，余送堂儿府试，与观察日日见面。

谈及其如君云，癸水不调，脐腹常疼，精神委顿，饮食不思，偶受孕，三四月辄坠。前在崑，曾服药无数，兹又请教授齐老师治之，又请府幕钱老夫子治之，病仍不愈。皆以为癆矣，请一决之。如君出则荆钗布裙，寒素依然，向余展拜，余答之。诊其脉则六脉俱虚，而无数象，右关尤甚。告观察曰，此乃脾虚土衰之证，故精神少，饮食滞。至月事不调，怀孕辄坠，则中气不能健固之故。极可治。但须积日累月，非旦夕可愈之病也。若迟延不治，则久而泄泻，或久而咳嗽发热，而赤恶寒，真癆症矣。余先进以六君子汤加益智、干姜、芡实，命服八剂后，服资生健脾丸。观察问，丸药服几斤？余曰，多多益善。

后余归介，观察解账归崑。二年后，在会垣见其长子，问前病状，则曰：迩来体甚壮硕，去年冬，竟举一女，家父犹时时道及而铭感焉。

《醉花窗医案》

金子久

先天不足而水亏，相火有余而金燥，不独此也；下焦冲海亦亏，月事为此不正，遂使逆而上行，或有咳呛，每至傍晚，烦冒冷热，喉间自觉梗痛，蒂丁已见下坠，右手脉象，独见弦数，右手寸脉，颇形虚数，法当壮水以涵木，参用潜火以清金。

淮牛膝 芫蔚子 旋复花 橘红 枇杷叶 粉丹皮 白茅根
冬桑叶 玄参 蛤壳 冬虫 夏草 藕节

《金子久专辑》

张山雷

厉右。产后年余，汛水见过两次，淡黄不赤，寒热往来，畏风日久，五心烦热，夜央少寐，脉数舌淡无苔，神萎色衰。昨议补养，诸恙皆减，胃纳知味。

党参 4.5 克 黄芪 4.5 克 白术 4.5 克 桑螵蛸 9 克 乌贼骨 9 克
杜仲 9 克 炮姜 2.4 克 木香 3 克 青陈皮各 2.4 克 乌药 6 克
归身 4.5 克 白芍 6 克 砂仁 2.4 克 杞子 4.5 克 银柴胡 4.5 克

《张山雷专辑》

方公溥

潘女。月事失调，经行不爽，头昏眩晕，心悸频频，脉弦郁，法当养血调经。

全当归 9 克 大川芎 6 克 白芍药 9 克 制香杞 9 克
熟地黄 9 克 益母草 9 克 光桃仁 9 克 生甘草 3 克 元红花 4.5 克
朱茯神 12 克 柏子仁 9 克。

复诊：经行较爽，心跳亦轻，头眩未痊，再进一步调理。

处方同前，除茯神、益母草、乌药。加生绵芪 9 克、关沙苑 9 克、嫩勾尖 9 克，生草为炙甘草 3 克。

《方公溥医案》

孔伯华

刘妇，十二月十三日。湿热郁阻，经水失调，带下黄而多，经色黑，少腹酸痛，舌苔黄腻，呕逆泛酸，脾家湿象较盛，脉滑弦而数，宜调经化湿郁。

石决明 六钱 炒秫米 三钱 元胡 三钱 桑寄生 五钱 白蒺藜 二钱
土炒乌药 三钱 旋覆花 二钱 代赭石 二钱 炒丹皮 钱半
云苓皮 四钱 赤小豆 四钱，布包 川草薢 三钱 川黄柏 三钱

益元散四钱 盐橘核三钱 川牛膝三钱 藕两

《孔伯华医集》

痛经

周南

沟口长左卫门妻，三十岁。脉沉数而涩；左侧不可卧，卧则气升；右半头痛，鼻中涕结成硬条；时时带下，临经两乳胀痛，小腹痛引腰，月事不调且少，色如烂鱼肠。此肝气有余，肝血不足，冲任虚而有火也。治法当以去瘀为先，方用柴胡、青皮以疏肝，芎、归以养血，丹皮佐之，玄胡、乌药、桃仁、大黄去瘀行滞，官桂、红花佐之。三剂而左侧可卧，八剂而经水大行，瘀积垢污尽去，胀痛全除，脉已大而不涩三日。方止经血已多，通体松快，经后以补中益气调养之剂。即继调经丸药，次月不用通经，自顺流而下矣。

《其慎集》

缪遵义

经行速而为日多，冲不摄也；寒热发而腹中痛，营气虚也。病关八脉，阳维、督脉、冲、任皆及也。法以调奇经为主，使河津渐充流于经脉，病可渐愈矣。

熟地炭 羊尾骨炙 艾炭 阿胶 杞子炭 沙蒺藜 杜仲
炙螵蛸 丝吐灰 白薇

《缪氏医案》

何书田

经不应月，临时腹痛，此肝郁络滞也。恐难于孕育。

炒艾绒 焦茅术 炒归身 炒丹参 羌蔚子 制香附 川郁金 炒白芍 川楝子 陈皮

温经疏肝主之。

陈阿胶 炒白芍 制香附 牡丹皮 羌蔚子 炒艾绒 炒归
须 广陈皮 川楝子

肝郁气滞，临经腰楚。治以温疏之法。

炒阿胶 当归 枸杞子 紫丹参 怀牛膝 炒艾绒 炒白芍
炒杜仲 制香附 羌蔚子 桑寄生

偏产后，临经腹痛，兼下血块。此奇经八脉病也。治宜温养冲任、通调癸水主治。

炒艾绒 炒当归 枸杞子 川楝子 炒怀膝 上肉桂 炒白
芍 制香附 紫丹参 紫石英

《竿山草堂医案》

王孟英

赵听樵令妹，每汛至则腹胀呕吐，腰脊酸痛，两腿肿痛，筋掣脘痛，甚至痉厥，多药不效。孟英以金铃子散合左金(丸)加“二陈”(橘皮、半夏)、竹茹、枳实、桂(枝)、茯(苓)，数剂而愈。续用苡蓉、菟丝、淫羊(藿)、杜仲、桑椹、木瓜、续断、香附、(当)归、(白)芍、茴(香)、楝(实)调之，汛至如期，略无痛苦。初冬适杨子朴，寻即受孕。

里中张君雪沂令正，三十七岁。于乙巳年患经行腹痛，医进胶艾汤多剂，痛乃日盛，而加以呕吐，迄今十载，诸药备尝，逾年经至益频，痛势益剧，满床乱滚，声彻比邻。乞余诊之，脉弦滑而数。曰：巅痛、口渴乎？带多、腰痛乎？汛色紫黑乎？病者惊以为神，惨容为之一展。余谓雪沂曰：此证不但温燥膩补不可用，即四物汤亦在禁例。宜乎遍访女科，而竟无一效也。与芩、连、栀、胆、茹、柏、蒿、薇、乌贼、茅根、藕为剂，服至下月经行，即不吐，痛亦大减。此等药服逾半载，各恙悉蠲。

《归砚录》

林佩琴

肖氏。经前腹痛，经水淋漓，胀满食减，脉虚小。系冲任血滞，而主治宜在脾。用香附_{姜制}、砂仁、茯苓、白术、炙草、当归、白芍_{桂木炒}、木香、延胡_{酒炒}、杜仲_{姜汁炒}、续断，神曲糊丸。姜汤下，一料宿痾愈而获孕。

徐氏。积年痛经，属血中气滞。用调经饮：当归、牛膝、制香附、茯苓、山楂肉，加乌药、小茴香。痛止后，因夹虚迟早不调，用芎归六君子汤加益母膏、白芍、香附、红枣而经调。

《类证治裁》

张大曜

痛经数年，不得孕育。经来三日前必腹痛，腹中有块凝滞，状似症瘕、伏梁之类。纳减运迟，形瘦神羸。调经诸法，医者岂曰无知。数载之中，服药无间，何以漠然不应？询知闺阁之时无是病，既嫁之后有是疾，痛之来源，良有以也。是证考古却无，曾见于《济阴纲目》中，姑勿道其名目，宗其意而立方。不必于平时服，俟其痛而进之，经至即止，下期再服。

荆三棱一钱 莪术一钱 延胡一钱五分 香附一钱五分 制军一钱
归身一钱五分 丹皮一钱五分 川芎四分 桃仁二钱 枳实七分

再诊：前方于第二期经前三剂。经来紫黑，下有似胎非胎一块，弥月不复痛而经至矣。盖是证亦系凝结于胞中者，今既下矣，复何虑乎。

白芍一钱五分 石斛三钱 川芎五分 醋炒柴胡三分 橘白一钱
白术一钱五分 归身一钱五分 丹皮一钱五分 谷芽一两

《柳选四家医案》

张乃修

王右。屢次滑胎，茲則經事先期，色紫不澤，臨行痛楚。姑宣暢營衛。

全当归酒炒，二钱 白蒺藜三钱 紫丹参二钱
杭白芍酒炒，一钱五分 橘络红花汤炒一钱 薪艾炭四分 炒川断三钱
菟丝子盐水炒，三钱 炒牛膝三钱 制香附二钱

二诊：气血不固，屢屢滑胎。治法唯有调气养营，作日就月将之计。

大熟地砂仁拌，炭成炭 泽泻一钱五分 细子芩酒炒，一钱五分
橘皮一钱 白芍酒炒，一钱五分 萸肉炭一钱五分 茯苓神各四钱
炒山药三钱 生熟谷芽三钱 粉丹皮二钱 制香附二钱

朱右。经来淋漓，少腹作痛。脉弦尺涩。冲气不调，则冲脉不固矣。

制香附 生熟蒲黄各四分 砂仁 当归灰茯神 乌贼骨 茜草炭 磨苏梗 广皮 台乌药

二诊：调气和营，未尝止血而止痛也，然淋漓已定。可见血为气之配，气和则妄行者循经而不乱矣。前法再参养营。

磨苏梗 杭白芍 首乌 当归 广皮 香附 炒枣仁 砂仁 茯神

《张聿青医案》

费伯雄

某。气血凝滞，宜和营调畅。

当归二钱 丹参二钱 小胡麻二钱 香附二钱 乌药二钱
佩兰叶一钱 郁金二钱 木香五分 砂仁一钱 茯苓二钱
怀牛膝二钱 川断三钱 柏子仁二钱 姜一片 芥饼三钱 降香一钱

二诊：营分不调，佐以温理。

前方加川朴一钱 半夏一钱 艾绒一钱

某。寒入血室，行经作痛。宜调荣理气。

当归 丹参 香附 小胡麻 广木香 砂仁 乌药 新会皮
青皮 佩兰 川朴 肉桂姜

二诊：加延胡 赤芍 郁金 沉香曲 枳壳

《费伯雄医案》

王旭高

朱。痛而经来，肝气横也。经事参前，血分热也。色黑有瘀，和而化之可也。

金铃子 延胡索 香附 当归 丹皮 山楂肉 泽兰叶 白芍 木香 茯苓 砂仁

徐。经行后奔走急路，冷粥疗饥，少腹疼痛连腰胁，兼及前阴。此肝肾受伤，又被寒侵而热郁也。经云：远行则阳气内伐，热舍于肾。冷粥入胃，则热郁不得伸，故痛也。遵寒热错杂例，兼腹痛治法。

川连酒炒 炮姜炭 桂枝 白芍 芡实三分煎汁，炒 木通 全当归 香附 山查炭 焦山栀 旋复花 新绛屑

王。经后少腹痛连腰股，肛门气坠，大便不通，小便赤涩热痛。拟宣肝经之郁热，通络脉之凝涩。

柴胡 川楝子 焦山栀 郁李仁 延胡索 新绛 旋复花 归尾 龙胆草 青葱管

渊按：此经未尽而行房过度所致，乃经血乘虚入络，冲任之脉受伤也。

《王旭高临证医案》

马文植

某。营卫不调，气机不畅。宜培养宣化法。

乌贼骨三钱 焦白术一钱 砂仁壳一钱 杜仲三钱 茜草二钱

当归二钱 川断三钱 陈皮一钱 木香八分 川芎八分 补骨脂一钱
福曲二钱 焦谷芽三钱 生姜一片 红枣三枚

二诊：前投四乌贼一惠茹法，服后下瘀血颇畅，痛止，带下尚甚，六脉均起，尺部微弱。系营卫皆亏之候。调之当可嗣育也。

西党参三钱 制冬术一钱五分 炙升麻三分 陈皮一钱
炙草五分 酒炒独活一钱 柴胡六分 川断三钱 补骨脂一钱
炙芪三钱 当归二钱 姜一片 红枣二枚

《马培之医案》

邵兰荪

先腹痛而后经，气滞为多。脉涩右沉弦，头晕腰酸，姑活血理气调经。

当归二钱 香附三钱 延胡三钱 乌药二钱 川芎一钱
丹参三钱 生牡蛎四钱 佩兰叶一钱五分 杜仲三钱 茺蔚子三钱
鸡血藤三钱 七贴

《邵氏医案》

王苏民

王庶人夫人，肢体羸弱，肝脾大伤，八脉皆病，临经周身筋痛，头痛腰痛，咽阻脘痞，腹胀便利，干嘔食少，舌心赤，苔积如粉，脉细如丝，恙久防败。

膏方

土炒秦归身三两 蛤粉炒阿胶珠一两 川续断一两七钱
土炒大白芍三两 土炒冬白术二两 炙甘草四钱 鸡血藤膏三两
抚芎四钱 粉丹皮一两 茯苓三两 延胡索一两七钱 金橘叶五十片
淮山药一两七钱 青皮络一两七钱 川郁金一两七钱 南沙参三两
绿萼梅花七钱 川楝子一两七钱 共熬浓汁，用文冰一两收膏，每晚服

三钱

《王苏氏先生脉案》

曹沧州

某右。血分不充，气失流畅，癸水先期，每至小腹作痛，痛甚有作寒之状，脉濡，胃纳式微，带下腰痛，三阴内乏，累及奇经，拟先从调气养血。

全当归一钱半 台乌药一钱半 川断三钱 陈皮一钱
四制香附一钱半 延胡索一钱半 杜仲一钱半 鸡血藤膏一钱半
丹参三钱 抱木茯神四钱 宋半夏一钱半 广郁金一钱半
生谷芽五钱，麵包

某右。经不多，胸闷口干，少腹痛，脉弦细，拟气营两治。

川桂木四分 枳壳一钱半 丹参三钱 赤芍三钱
淡吴萸二分，盐水炒 五灵脂一钱半，醋炒 杜仲三钱，盐水炒
白蒺藜三钱，去刺 台乌药一钱半 延胡索一钱半，醋炒
川断三钱，盐水炒 川石斛三钱 陈佛手一钱半

某右。痛经色紫，少腹胀滞，当气冲兼治。

四制香附一钱半 丹参一钱半 六曲四钱 月月红五朵
延胡索一钱半 泽兰三钱 乌药一钱 丹皮一钱半 苏梗一钱
茺蔚子三钱 金铃子三钱

某右。经前腹痛，曾经昏晕似厥，脉状带滑，宜和气营，参以涤痰平肝之品。

全当归 制香附 白金丸 石决明 紫贝齿 赤芍 台乌药
制南星 灵磁石 丹参 泽兰 宋半夏 青礞石

《吴门曹氏三代医验集》

曹南笙

某右。酸涩入里，气血呆钝，痛自心胸，胀及少腹，昔经行三日，

今日犹未已，为凝涩所致痛胀，读《内经》遗意，以辛胜酸主治，但辛气最易入表，当求其宣络者宜之。

韭白汁 桃仁 延胡索 小茴 归须 川楝子

某右。初诊：夏令寒热经阻，少腹痛胀，血结洞泻不爽，乃内伤气血不和兼有时令湿邪。

茯苓皮 大腹皮 生益智 厚朴 蓬莪术 青皮子

二诊：服五剂后气已略平。

葱白丸

用生蕲艾 红枣 煎汤送丸。

《吴门曹氏三代医验集》

丁泽周

徐右。经云：暴痛属寒，久痛属热，暴痛在经，久痛在络。少腹痛阵作，痛甚有汗，已延匝月。形寒纳少，咳嗽泛恶，胸闷不舒，口干引饮，肝热瘀阻，气滞不流，阴伤津少上承，肺虚痰热留恋，舌质红绛，脉细如丝 虚羸太极，恐难完璧。

金铃子二钱 旋复花包一钱五分 朱茯神三钱 赤白芍各一钱五分
全瓜蒌切四钱 光杏仁三钱 真新绛八分 川象贝各二钱
焦楂炭三钱 银柴胡八分 失笑散包三钱 青橘叶一钱五分
炒山栀一钱五分

二诊：少腹痛已舒，泛恶渐止，有汗甚多，四肢逆冷，形瘦骨立，口渴欲饮。肝郁化热，热深厥深，阴伤津少上承，肺虚痰热留恋，舌质光，脉细依然。颇虑阴不敛阳，阳不藏阴，致有厥脱之变。皆由虚羸太极，不任攻补使然。

川石斛三钱 朱茯神三钱 川象贝各二钱 花龙骨四钱
乌梅炭八分 炒山栀一钱五分 大白芍二钱 浮小麦四钱
生白术一钱五分 银柴胡八分 紫丹参二钱 生熟谷芽各三钱
清炙枇杷叶去毛、包三钱 柿霜八分

三诊：厥复汗收，胃纳渐进，佳兆也。形瘦骨立，脉细如丝，舌红而绛，咳嗽泛恶。木郁化火，肝病传脾，阴伤津少上承，肺虚痰热留恋。难经云：从所不胜来者为贼邪。虽见转机，未足恃也。

前方去朱茯神、紫丹参、柿霜，加生甘草五分、陈木瓜二钱。

《丁甘仁医案》

陈在山

戴士富之内人，回教人，经来色黑，腹痛腰酸，脉见弦细，两尺若失，系下虚经寒之征也，拟用平肝建脾，调经法治之。

醋柴 茯神 广皮 香附 木香 酒归 炙草 元胡 焦术
山药炒 川朴 故脂 杜仲炒 生地炒 砂仁 川断

第二方：香附 木香 丹参 缩砂 酒归 焦术 山药 川朴 茴香 皮苓 杜仲 枳壳 柴胡 川断 生姜

第三方：丹参 薄荷 香附 川芎 广皮 山药 枳壳 当归 甘草 焦术 生地 皮苓 薏米 川朴 灯心

《云深处医案》

贺季衡

张女。经来腹痛，少腹胀，血块磊磊，寒热呕吐，脉沉涩，舌苔浮黄。血瘀气滞、肝胃失和之候。

当归二钱 五灵脂二钱，醋炒 金香附一钱五分 白蒺藜四钱
大白芍二钱，吴萸五分拌炒 大丹参二钱 延胡索一钱五分
柴胡八分，醋炒 川郁金二钱 川楝子一钱五分，醋炒 炮姜八分
陈艾绒八分 红枣三个

虞女。经事不调已久，或三月一来，或五月一至，腹胀作痛，少腹尤甚，不时头痛，易于呛咳，脉弦细，舌红无苔。此血虚生热，荣卫不和，加以肝失条达，气火易于升腾，故其十年不育者，即坐斯弊也。

当归二钱 大丹参一钱五分 乌贼骨四钱炙 大白芍二钱，
吴萸三分拌炒 南沙参四钱 粉丹皮一钱五分 云神四钱 白蒺藜四钱
佩泽兰各二钱 冬瓜子四钱 金橘皮三个 藕二两，切片

姜女。月事先期，色黑且少，腹痛作胀，状如怀子，入夜痛甚，两足为之屈曲不伸，胃呆作恶，便结不通，脉弦细而数，舌红中黄。热结血分，肝胃失和也。

当归二钱 大白芍二钱，吴萸五分拌炒 宣木瓜一钱五分
刺蒺藜四钱 五灵脂二钱，醋炒 大丹参一钱五分 川楝子一钱五分，醋炒
延胡索一钱五分 金香附一钱五分，醋炒 细青皮一钱
五香丸三钱，开水另服

二诊：药后便结已通，少腹痛亦减，惟痛时两足尚屈曲不伸，胃呆作恶，月事先期，色黑且少，脉弦细，舌红中黄。热结血分，肝气横逆而来，当守原意更进。

当归二钱 炙乌梅一钱五分 延胡索一钱五分
金香附一钱五分，醋炒 淮牛膝一钱五分 大白芍二钱，吴萸五分拌炒
川楝子一钱五分，醋炒 白蒺藜四钱 五灵脂二钱，醋炒 宣木瓜一钱五分
细青皮一钱，醋炒 五香丸二钱，开水另下

任女。结婚六载，未兆梦兰，经前腹痛，腹右及腰部酸楚抽掣，月事先期，淡而且少，脘仄胃呆，内热如蒸，心烦口渴，脉弦数，右关尺兼涩，舌红中黄。气瘀凝滞，荣卫失和，冲任不调所致。速效难求。

当归二钱 丹参一钱五分 五灵脂三钱，醋炒 炮姜八分
大生地五钱，红花五分拌炒 川楝子一钱五分，醋炒 金香附一钱五分，醋炒
淮牛膝一钱五分，酒炒 大白芍二钱，吴萸五分拌炒 延胡索一钱五分
云苓三钱 陈艾绒八分，红枣三个

《贺季衡医案》

张山雷

某右。营阴不充，肝木偏旺，带脉不摄，只是疏泄太过之咎。临

信腹痛头疼，但少安寐，心跳，脉甚弦劲，木焰肆恣何？莫非阴不涵阳？加以灼液凝痰，逗留隧络，项间结块，叁伍杂见，舌滑不腻，阴亏阳扰之病情如绘。经年宿恙，不易旬日藏功。差幸胃纳粗安，拟於平日进以毓阴潜阳，宣络化痰之剂。经事来临，则另拟方药治之。

大元地 12 克 砂仁末 1.8 克，同打 净萸肉 6 克 生打牡蛎 9 克
生石决明 9 克 炒竹茹 6 克 紫背天葵 6 克 甘杞子 4.5 克
炙桑螵蛸 4.5 克 生白芍 4.5 克 新会皮 3 克 润元参 4.5 克
制半夏 3 克 杏仁泥 3 克 淡昆布 4.5 克 台乌药 4.5 克

又预定经事将临，腹痛头疼时暂服方，拟以疏肝顺气，潜降和血立法。

台乌药 4.5 克 楂肉 6 克 泽兰叶 3 克 生石决明 10.5 克
光桃仁 3 克 生延胡 4.5 克 小青皮 2.4 克 广木香 2.1 克
藏红花 3 克 炒黑香附 4.5 克 炒白芍 6 克 鸡血藤 4.5 克
全当归 3 克

又预定经事将临时第二方，拟以和肝清养，参以调经主治。

炒白芍 4.5 克 茺蔚子 3 克 全当归 3 克 制半夏 2.4 克
甘杞子 6 克 泽兰叶 3 克 生打牡蛎 9 克 广木香 2.4 克
台乌药 4.5 克 藏红花 3 克 净萸肉 6 克 炒杜仲 6 克 焦楂肉 9 克

冯右。脾虚欠运，湿阻碍化，神阙黄水自滋，时见淡红，经临腹痛，纳减泛恶，潮热进退，脉涩不爽，舌则皓白。兹当婢见，先以和肝顺气。

炮姜炭 1.2 克 台乌药 4.5 克 制半夏 4.5 克 广郁金 4.5 克
茅术炭 3 克 茺蔚子 6 克 生楂肉 6 克 泽兰叶 6 克 制香附 4.5 克
生延胡 4.5 克 广藿梗 4.5 克 干佩兰 4.5 克 西茵陈 9 克
淡吴萸 0.9 克，同炒川黄连 0.6 克

二诊：脾虚积湿，神阙流黄浊之水，汛前则发，汛后则减。脉涩舌红，后根稍腻，再以扶土化湿。

苍白术各 4.5 克 西茵陈 9 克 炒车前 6 克 天台乌药 4.5 克

四花青皮 4.5 克 生鸡内金 4.5 克 汉防己 6 克 粉萆薢 6 克
制香附 6 克 生苡仁 9 克 干佩兰 4.5 克 带壳春砂仁 1.2 克

《张山雷专辑》

范文甫

周右。行经腹痛，经量很少，淋漓不畅，舌质紫黯，少腹有瘀，经阻使然。

小茴香 3 克 炮姜 3 克 官桂 3 克 元胡 9 克 五灵脂 9 克
没药 6 克 川芎 6 克 当归 9 克 蒲黄 6 克

张姑娘。经来腹痛，量少色淡，手足不温，舌淡，脉沉。

桂枝 6 克 白芍 15 克 甘草 3 克 生姜 3 克 大枣 6 克
饴糖 30 克 当归 9 克 川芎 9 克

《范文甫专辑》

沈绍九

经期小腹胀痛，腰腿酸疼，脉沉弦。由于气血失调，不通则痛，证属痛经，应予调理肝脾。

薄荷一钱 柴胡二钱 白术三钱 云茯苓三钱 当归三钱
川芎一钱 炒白芍三钱 制香附二钱 陈皮一钱五分 炒续断四钱
补骨脂四钱 炒杜仲四钱 煨生姜三片

血虚挟瘀，气机阻滞，导致经行不畅，小腹胀痛拒按，腰疼，宜予和血理气，佐以行瘀温肾。

当归三钱 炒白芍三钱 川芎一钱 木香一钱五分 制香附三钱
三棱一钱 莪术一钱 茜草二钱 炮干姜二钱 补骨脂四钱
杜仲四钱

《沈绍九医话》

曹颖甫

宗嫂。月事将行，必先腹痛，脉左三部虚，此血亏也，宜当归建中汤。

全当归四钱 川桂枝三钱 赤白芍各三钱 生甘草钱半
生姜三片 红枣七枚 饴糖二两冲服

按：当归建中汤，即桂枝汤加味也。姑以本方为例，甘草之不足，故加饴糖。白芍之不足，故加赤芍。桂枝之不足，故加当归。本经表桂枝治上气咳逆，表当归治咳逆上气，然则其差也仅矣。我今用简笔法，略发其义于此，而贻其详畀读者。

《经方实验录》

周镇

查右，中桥，年三十余。因其夫为店友作保，需赔千金，大忿。由庚申中秋节起，经行腹痛，图治未痊。十月经来且多，腹痛攻撑至脘，身热苔黄。医谓经瘀未尽，药方玄胡、吴萸、芦巴温热之剂。便闭，用大黄者已数剂。东延西治，费资三十金，如石投水。吸烟痛减，腹即胀急。十一月来诊：脉伏不见，苔黄而干，身热口渴，形瘦而长。是肝火内郁，气闭，血脉亦痹，二便亦闭。拟桑叶、丹皮、柴胡、归须、白芍、黑山栀、旋复、橘叶络、川连、石斛、枸橘李、金铃子、玄胡、茅根。另伽楠香、龙涎香、鸡肉金、黑丑等为末服。二便俱畅，苔黄口渴渐减，腹痛亦轻。原方出入七剂，脉渐起而愈。先是，陈仲贤之室腹痛攻撑，乡医扭于经后，用干姜、吴萸、瑶桂等温热之剂，其痛更甚；便秘，亦用大黄直攻，无效。来诊，脉亦伏匿，苔白。木火旺，厥气滞络，亦室痹也。予逍遙散、旋复花汤，化肝煎，金铃子散出入。另伽楠、藏红花等末服。数剂痛止，脉亦起。查右病即陈家所指引云。

《周小农医案》

翟竹亭

邑西南罗庄李姓幼妇，二十余岁。遭逢不偶，姑悍夫拙，终日诟詈挞楚，渐渐经水不调。每逢行经三日之前，先发寒热，腹疼非常，经水虽下，其色深紫，瘀而成块，七、八天后，经水方净。归宁，请余诊治，诊得脾脉虚弱，肝脉沉滞而弦。此因郁怒伤肝，木旺克土。经曰“肝藏血”。经水将行，先发寒热者，肝病却然可知。腹疼者是经水欲下，而肝气不肯疏泄，譬如客欲去而主欲留，不免有牵掣之势。所以每逢行经七、八日方净者，即此理也。倘肝气一疏，脾气自旺，饮食日增，何有经水不调之病哉！余用小柴胡汤合四物汤加减，服八帖痊愈，越一年又生一子。方开于后。

小柴胡 30克，酒炒 党参 10克 半夏 10克 当归 12克
川芎 10克 白芍 15克，酒炒 怀生地 12克 香附 12克，酒炒
陈皮 10克 生姜 5片 红枣 5枚，去核 水煎服。

《湖岳村叟医案》

章成之

郑女。经后期二日而来，将行，少腹沉坠，且隐隐作痛，既行，坠与痛皆消失，而小溲频。夫经与溲在生理并无绝对关系，今如此，亦虚故也。

党参 9克 绿升麻 3克 杜仲 9克 五味子 4.5克 白芍 6克
补骨脂 9克 旋复花 9克，包 罂粟壳 9克 乌药 6克 甘草 3克

唐女。上月经行因郁怒而阻，回下黄水数日。此番经逾旬日而行，将行少腹酸胀，腰酸如折；始则淋漓，继则大血块色黑，腰酸所苦如故。原来经之生理虽在卵巢，亦受神经系之支配。古人调经多用疏肝，即此理也。

醋炒柴胡 6克 小茴香 6克 香甘松 6克 大川芎 6克
延胡 9克 旋复花 9克，包 川楝子 9克 失笑散 12克，包

香元皮 6 克 炒丹皮 9 克 肉桂末 1.8 克,分三次吞
半硫丸 6 克,分二次吞

二诊:经已净,少腹左侧作痛,其脐下按之痛更甚,此输卵管炎之象。带下多而粘。

生侧柏叶 30 克,煎汤代水 白芍 9 克 生麻黄 3 克 椿皮 9 克
白薇 9 克 羌活 4.5 克 杏仁泥 12 克 延胡索 9 克 失笑散 12 克,包
粉甘草 3 克

沈女。经先期,如在旬日左右,是病态;仅二三日,无碍也。八年来,梦熊无征。其主因正在后:面色萎黄,一也;经将行,先腰酸腹痛,二也;带下频频,则头眩目暗,三也。今经将行。

全当归 9 克 破故纸 9 克 熟地黄 18 克 肉豆蔻 9 克
肉桂末 1.2 克,分吞 淡吴萸 4.5 克 大川芎 6 克 厚杜仲 9 克
丹皮 4.5 克 炮姜炭 3 克

黄女。病者所述,经后期居多半。其经之将行,少腹痛。其痛处不类常人之痛经,自觉从少腹左侧有筋脉斜走入于少腹,隐隐作痛,数年来均如此。既然经色不正常,且经净后再行,赤白相间,少腹不痛而胀,此卵巢、子宫皆病者。少腹痛时,自觉冷感。

生侧柏叶 15 克 炒丹皮 9 克 苦参片 6 克 小茴香 6 克
杭白芍 9 克 川黄柏 4.5 克 苍术 9 克 荜拔 9 克 炮姜炭 3 克
肉桂 1.5 克,研末分吞 粉萆薢 9 克

杨女。距离上次经行仅有半月,少腹痛,侧卧则痛更甚,脉有数意。数者,表示某处有炎症。

椿皮 12 克 黄柏 9 克 生茜草 9 克 侧柏叶 9 克 苦参片 6 克
象贝母 9 克 云茯苓 9 克 琥珀 3 克,研冲

孙女。以古人之概念,经之色黑而有块者,以为下焦虚寒,多用温药。此类药,刺激卵巢机能一也;流畅血液循环,二也;强壮体力,尚其余事。

淡吴萸 6 克 炮姜炭 4.5 克 仙灵脾 9 克 炒丹皮 12 克

生艾叶 1.5 克 肉桂末 1.5 克 破故纸 9 克 大川芎 6 克 党参 9 克
当归 9 克 制香附 9 克 炙甘草 3 克 来复丹 6 克,分二次吞

马女。在哺乳期,经居五十余日,少腹痛而沉坠,得按则减,此可通之。头痛脉数,外邪未尽也。

醋炒柴胡 9 克 当归 9 克 丹皮 12 克 泽兰叶 9 克 荆芥 6 克
薄荷 4.5 克,后下 赤芍 9 克 丹参 9 克 土牛膝 12 克

戴女。五年前,因经停三月,用攻剂,大下如冲;冲止,体弱而行经量少,色黑,将行腹隐痛。今行经第二日,以温经汤调之。

当归 9 克 杭白芍 6 克 肉桂末 1.5 克,分吞 丹皮 6 克
吴茱萸 4.5 克 阿胶珠 12 克 炮姜炭 4.5 克 潞党参 9 克
川芎 4.5 克 姜半夏 6 克 炒麦冬 6 克 清炙草 3 克

宋右。麻黄之治痛经,以子宫痉挛为当,如炎症则无效。病者经后凝痛,在腹之右侧,按之亦痛。

生麻黄 2.4 克 旋复花 9 克,包 六轴子 1.5 克 丹皮 9 克
制香附 9 克 粉甘草 3 克 延胡索 9 克 羌活 6 克 香甘松 6 克
桃仁泥 15 克

胡女。经净后之痛,多属实质上变化,如内膜炎、附件炎等。有炎症,多有热。当归芍药散。

当归 9 克 泽泻 9 克 生苍术 9 克 大川芎 4.5 克
炙乳没各 4.5 克 杭芍 9 克 柴胡 6 克 延胡索 9 克 粉甘草 3 克

吴女。经不以时下,有一月再见者,有四、五十日一行者,但行必痛,其痛与经相终始。

全当归 9 克 粉丹皮 9 克 官桂皮 6 克 失笑散 12 克
大川芎 6 克 延胡索 12 克 小茴香 4.5 克 桃仁泥 12 克

陈女。经已行而少腹依然胀痛者,属诸瘀凝,故其色紫黑。凡瘀滞亦有虚实之分,虚者以温运为主,实者以攻瘀为主。今患者喜热按,两脉无力,当着重温运。

淡吴萸 4.5 克 姜半夏 9 克 白芍 9 克 党参 9 克 全当归 9 克

阿胶珠 15 克 川芎 1.5 克 丹皮 9 克 肉桂末 2.4 克,分三次吞
清炙草 3 克

郑女。经将行,腹必痛,痛其剧,量多更痛。

炮附块 4.5 克 全当归 9 克 川断肉 9 克 金毛脊 9 克
菟丝子 9 克 生艾叶 9 克 延胡索 9 克 生麻黄 4.5 克 全蝎 3 克
共研细末,每服 3 克,日服三次。

蔡女。正值经行,骤逢拂逆,从此经少而少腹胀痛。古人谓木
不条达,正对此等症候而言。

全当归 9 克 白芍 9 克 丹参 9 克 柴胡 9 克 云苓 12 克
薄荷尖 3 克,后下 甘草 2.1 克 生姜三片

另:五灵脂、香附、莪术、肉桂各 6 克。研末,每服 1.5 克

沈女。前人以经后腹痛拒按属诸瘀滞,行气攻瘀,无非使局部
之瘀血得以通行。今经已净,因痛而再见淡红水。

丹皮炭 9 克 桃仁泥 12 克 藏红花 2.4 克 丹参 9 克 茜草 9 克
苏木 6 克 乳没各 4.5 克 延胡 9 克 炒条芩 4.5 克
失笑散 12 克,包

杨女。经行时受寒。少腹绞痛殊甚,按之硬,是内有所积,脉弦
苔白。当温通之。

生麻黄 3 克 莪术 9 克 五灵脂 9 克 炮干姜 3 克 桃仁泥 12 克
台乌 9 克 延胡 9 克 小茴香 3 克 肉桂末 1.8 克,分二次吞

另:白芷、川草乌各 6 克,共研细末,葱汁、蜜糖调敷患者痛处。

李女。经将行,腹先痛,经色紫黑,量少。

川芎 9 克 丹皮 9 克 延胡 9 克 丹参 9 克 艾叶 9 克
当归 9 克 桃仁泥 12 克 香附 9 克 泽兰 9 克 失笑散 9 克,分二次吞

《章次公医案》

王文选

周某某,25 岁,1959 年 9 月 9 日初诊。

自诉每逢经前，少腹疼痛下坠；两股内侧抽痛，腹痛时剧时缓，经量较多，有块，曾服药多剂不效。妇检宫颈一度糜烂，平时白带多，已经二胎，已停三年。现在腹痛，脉紧舌淡。身体一般，面色微青。症系气滞血瘀，当从肝治。处方：

升麻 1.5 克 柴胡 3 克 青皮 4.5 克 香附 4.5 克 羌活 4.5 克
白芷 4.5 克 山梔 3 克 桂枝 1.5 克 苏叶 3 克 甘草 3 克 灵脂 3 克
泽兰 3 克 益母草 6 克

9月16日二诊：服药二剂后痛减，第二天行经，血块增多，血量同前，已六天仍未净；体乏头痛，脉缓。从脾治，以补中益气汤加益肾之品。方药：

黄芪 6 克 当归 3 克 白术 4.5 克 党参 6 克 升麻 1.5 克
柴胡 3 克 炙草 1.5 克 远志 4.5 克 羌活 3 克 续断 4.5 克
卷柏 3 克 杜仲 3 克 桂枝 3 克 白芷 3 克 百草霜 6 克

9月20日三诊：服药二剂，月经已净2克，以丹梔逍遥散服一周。以后每月经前腹痛，即服初诊方二至三剂。经净后，再服丹梔逍遥散半月。如此治疗三个月，痛经已止。

《中医医案医话集锦》

叶熙春

陈女，三十四岁。十月。于潜。每届经来淋漓不畅，色紫而黯，夹有血块，小腹胀痛，痛甚拒按，手足心内热，五月于兹，舌紫绛，脉细滞。气滞瘀阻，失笑散加味。

酒炒蒲黄 5 克 酒制玄胡 6 克 青蒿梗 6 克 泽兰 9 克
五灵脂 15 克 青皮 5 克 赤白芍各 5 克 生鳖甲 21 克
酒炒当归 12 克 生山楂 12 克 酒炒柴胡 5 克 盐水炒川楝子 9 克

二诊：经行畅通，胀痛显减，手足心热亦除。治用原方去失笑散、青蒿、鳖甲，加郁金、四制香附续服。

《叶熙春专辑》

冉雪峰

朝鲜崔某女性，患痛经，谓当行经时腰腹痛。调经为妇科常见病，经事不调，百病丛生，癆瘵、风消、息贲多缘于此，最易见、常见者，莫若带下。带下不是带有秽浊，乃秽浊由带脉而下。病者行经时，腰腹痛，量多，有黑块，头晕，心慌，食思不振，此八脉不固，下元空虚，而内有瘀滞，兼往岁曾患咯血、消化性溃疡，病原下而兼中，故腰腹痛，胃有时附带亦痛。带下较多，饮食精汁不化气血而化秽浊，精神安得不萎顿？诊脉虚数，虚为血伤，数则为热，舌尖色赤，为热郁象征，皮肤炕灼，为血虚象征，病理甚为昭显。拟方养血清血，固肾宁心，滋润涵濡，芳香醒豁，药用：全当归、杭白芍各三钱，云茯神四钱，炒杜仲三钱，炒山栀一钱五分，牡丹皮、地骨皮、大浙贝、桑螵蛸、青木香各三钱，薏苡仁五钱，甘草一钱，煎服（此方平时调理）。复诊经事方至，药用：全当归、杭白芍、川芎莪各三钱，云茯神四钱，元胡索、生蒲黄、威灵仙、制香附、青木香各三钱，甘草一钱，煎服（此方系行经时半调半疏）。上二方，前之一方可常服，亦可稍停不服，有标邪或他病时，酌量加减；后之一方限于经来时服，三剂或五剂，亦可酌量病机加减。准上规划，治之三月，经不过多，较前有节度，腹痛亦缓，不似前次剧痛，带下时少时多，不似前次经常多。治之五月，带下显著减少，行经时或无腹痛感，神志渐佳，一般均好。曾因公回国，数月复来，据述病无变化，经事一度正常，不腹痛，但消化不良，有时食后上腹痛，（此与经痛另为一证）。予谓经痛虽妇科常有证，要为慢性病，只能培之育之，补之固之，导之宜之，使自宜之，优游以俟之，非若客感标邪，可用大药强制攻除，急切图功。宜增用前法，守服前方，时方青年，身体逐渐成长，附带杂证当亦可逐渐消失。

《冉雪峰医案》

施今墨

郝某某，女，16岁。去岁天癸初行量甚少，经来腹痛，食欲减退，两胁窜痛，情志不舒，时生烦躁，形体瘦弱，面色少华。舌苔腻，脉细缓。

辨证立法：情志不舒，两胁窜痛，均属肝郁，肝为藏血之脏，脾为生血之源，肝病传脾，血亏不得荣养经脉，冲脉为血海，血不充则经水少而腹痛。拟调冲任、理肝脾法。

处方：醋柴胡5克 春砂仁5克 酒川芎5克 杭白芍10克
生熟地各6克 酒当归10克 醋祁艾5克 阿胶珠10克
炒枳壳5克 香附米6克 酒元胡6克 炙甘草3克 厚朴花5克
月季花5克 紫苏梗5克 玫瑰花5克 代代花5克 苦桔梗5克

二诊：服药三剂，食欲增，精神好，两胁已不窜痛，月经尚未及期，未知经来腹痛是否有效，嘱于经前三日再服前方，以资观察。

三诊：每届经前均服前方三剂，已用过四个月，均获效，月经量较前多，血色鲜，经期准，及期腰腹不觉酸痛，精神好，食欲强，面色转为红润，拟用丸方巩固。

处方：每届经前一周，早晚各服艾附暖宫丸1丸

武某某，女，16岁。十三周岁月经初潮，三年间只来五次，每次腹痛甚剧，量少色黑，别无它证。舌苔正常，脉象沉迟。

辨证立法：《诸病源候论》云：“妇人月水来腹疼痛者由劳伤血气，以致体虚，受风冷之气，客于胞络，损冲任之脉”。故脉象沉迟，经来腹痛，治以调冲散寒湿为宜。

处方：盐橘核10克 砂仁5克 桂枝3克 盐荔枝10克
生熟地各6克 柴胡3克 祁艾叶6克 醋香附10克 杭白芍10克
酒当归10克 阿胶珠10克 酒川芎5克 益母草12克
台乌药6克 酒元胡10克 炙甘草3克 川楝子6克

二诊：服药六剂，适届经期，竟然未痛，遂嘱每於经前一周即服

此方数剂。

《施今墨临床经验集》

李用粹

茸城朱公亮令媛，血枯经闭已年余矣，大肉去半，饮食减少，日晡寒热，至夜半微汗而解。予诊其脉，两手细数，证属难疗。《素问》曰：二阳之病发心脾，有不得隐曲，女子不月。夫心统各经之血，脾为诸阴之首，二经乃子母之脏，其气恒相通也。病则二脏之气乘涩，荣血无以资生，故地道之不行，由心脾之气不充也。张洁古师弟首重《内经》，一以调荣培土为主，而薛新甫将逍遥、归脾二方为用，使气血旺而经自通，若不培补其源，反以消坚破硬，苦寒伤胃，道道癸水为捷径。殊不知愈攻则虚，而愈闭其生生之源。从此剥削殆尽，直至风消贵闭，虽有神丹，难为治矣。不信予言，专行通道，竟至不起。

《旧德堂医案》

永富凤

一妇人三十余岁，月事断不来，年年肥大，腰带数围。一月一、二次发头痛，药食并吐，医与抵当丸、漆湿丸数百帖，血不来。余诊之，其腹脉坚实，唯心下硬塞，推之难彻底。乃以瓜蒂末一钱大吐一日。其翌按心下，硬塞减半，又作抵当汤与之数日，大便溏泻，日五、六次。后十日而再与瓜蒂五分，又与抵当汤如前，肚腹剧痛，代用以丸，日三、五分。三十余日而经水来如常，头痛渐渐而退。

《漫游杂记》

缪遵义

诊脉小而弱，经阻四月，脉不见滑象，未可即以妊断，但体质素虚之人，往往脉形有不见滑利者，以气血不充故也。治法不妨为子

莫执中之说，则于本体有益无损，可无畸重畸轻之弊。

苏梗汁 陈皮 金柑皮 藕 归身 砂仁 炒锅巴

经闭半年，腹肿未消，脾虚，肝乘中焦，营气失职，经何由而至？
今又客邪侵肺，咳嗽间作，宜兼理之。

当归 白薇 丹参 丹皮 川贝 桔梗 楂炭 生麦芽

《缪氏医案》

陈念祖

经闭已久，脉上出鱼际，此情怀失旷，郁而成热，少火化为壮火。形瘦食减，久嗽，已俱损象。奈何？急养心脾营血，舒肝胆郁结，图尚未迟。然必俟通经纳谷，始佳。

柴胡一钱 当归身二钱 炒白芍二钱 炙甘草五分 炒白术二钱
白茯苓二钱 粉丹皮一钱五分 钩藤一钱五分 陈皮五分 大枣二钱

经水百日不至，脐下痠聚有形，逆气上冲，胸脘痞闷，咽喉不利，后攻背部胀痛，口渴引饮不止，食入胀闷尤甚，小便通利如常，大便不爽。由情志抑郁，肝胆木火内炽，气血阙滞不行，冲任奇脉内损为病。拟用苦辛清降一法。

芦荟一钱 山楂肉三钱 山梔一钱五分，炒黑 胡黄连八分
鸡内金五钱，瓦上焙

水煎服，另化回生丹半丸。

久咳不已，发热汗出，食减腹痛便溏，脉弱无力，经阻，近半年。虑其内损成劳，治之匪易。若再以寒凉清肺治嗽，徒然克伐生气，势必增剧。今与以建中汤法，必须经行纳谷，方可进图。

桂枝五分 当归身一钱五分 生白芍一钱五分 炙甘草五分
饴糖二钱 大枣十二枚，去核

《南雅堂医案》

齐兼慧

曾治龚云从之妇，经信两月未行，医用胶艾四物汤加红花二十余剂，则芒刺满生舌苔，腹膨作泄。人事困倦，身重恶寒，云从来寓求治。予曰：饮食减少，腹膨作泄，属太阴。人事困倦，身重恶寒，属少阴。胎刺干黑，太阳虚不能薰腾津液之所致也。方用芪、术、姜、附，砂仁、桂、苓、故纸，服六剂，而身发大热。吾知其泄旦夕必可止，再三剂其泄止矣。身热渐微，而腹中又觉大热，惟大恐附子太过。予曰：“里阳来复，佳兆也，积阴可化，经当自通。”又十余剂，而人事康复，饮食加健，膨胀俱消，舌苔尽退，经信行通如故。

《齐有堂医案》

程文圃

病逾四载，起初呕吐，渐致经期不行，温清攻下遍投无验，医乃视为癆瘵，弃而不治。诊脉不数，亦无风消、息贲、寒热、咳嗽兼证，似与癆瘵有间。果真损怯已成，病人膏肓，焉能久延岁月乎？经云：治病必求其本。又云：先病为本，后病为标。恙由呕吐而起，自当以呕吐为病之本也。苟能止其呕吐，则仓禀得藏，生生有赖，气血周流，诸证不治而自安矣。考诸方书，论吐证非止一途。斯病既非真寒，又非实火，所以温清俱不投机。至子下法，乃治伤寒暴急之方，施于内伤久病，殊属悖谬。询其饮食下咽，停注膈间，不肯下行，旋即呕出，冲逆不平，时时噯噫。所以然者，乃肝为受病之源，胃为传病之所。胃宜降则和。肝气横逆，阻胃之降，致失其和而为患也。夫脾为湿土，胃为燥土，六君、异功，止可健运脾阳。今病在胃，而不在脾，湿燥异歧，不容笼统而论矣。再按肝为将军之官，脏刚性急，木喜条达，最嫌抑郁。古人治肝病，辛散，酸收，甘缓，与夫补水生木，培土御木，方法多端，非仅伐之、泻之而已。治宜安胃制肝，厥阴、阴

明两调。王道无近功，戒怒舒怀，以佐药力为要。

《杏轩医案》

王九峰

左脉弦出寸口。志意隐曲不伸，郁损心阴。阴虚血少，血不养肝营脾，脾伤不能为胃行其泽液。胃不能容受水谷而化精微，精血日衰，脉络得之枯涩。经闭半载有余，腹中虚胀作痛，容色萎黄，饮食减少。《经》言二阳之病发心脾，有不得隐曲，女子不月是也。其传为风消，再传为息贲者，不治。

四君子汤加归身 远志 枣仁 柏子仁 香附 阿胶 桂圆肉 泽泻

复诊：曾经服药五剂，病势似有转机，因循急治，停药月余，遂至羸肉全消，喘鸣肩息。证本隐情曲意，郁损心脾，病传于胃，所谓二阳之病，发自心脾是也。心为生血之源，胃为水谷之海，脾为生化之源，海竭源枯，化机衰惫，经血枯闭，气郁化火之疾。风热消灼肌肉，故瘦削如风驰之速；金伤灼气，气无依附，故喘息如流水之奔，即经旨风消息贲之忌。仓扁复生，无如之何。勉拟一方以副远涉就医之望。

生地 洋参 麦冬 当归 泽泻 柏子霜 茯苓 阿胶

《王九峰医案》

吴麓

官詹秦易堂云：女儿自幼性傲多病。出阁后月信杳然。夜热盗汗，形气羸弱，饮食日减。余曰：脉弦细数，乃思虑过度，血虚肝燥。盖忧愁则伤心而血逆气滞，神色先散，故月水先闭，阻隔不通也。宜服八味逍遥散，加牡蛎、贝母，先抑肝气，兼以解郁行经。服数剂甚效，改用加味柏子仁丸，服之而愈。

京卿查小山述，大女经水久已不通，迨来骨蒸发热，饮食少思，

百治罔效。予云：脉大弦数，由于阴虚血燥，胞络火盛。因过服温补阳药以致火炎水竭，真阴消烁，故血枯经闭使然。即用清骨散先清肌骨劳热，再论活血调经之法，遂服十剂，甚效。易以八味逍遥散及调卫养荣汤、泽兰汤，逐日随证更方。调治两月，诸证悉退。惟经水不通，遂为定此丸方，服之未及三月，不惟血活经行，而体气饮食俱胜常矣。

柏子仁 牛膝 卷柏 泽兰叶 续断 熟地黄 归尾 赤芍
阿胶 丹参 延胡索 刘寄奴 红花

炒研为末，用益母膏炼蜜为丸桐子大，每空心服三五钱，开水送下。

佟氏经水不行，腰酸腹疼，带浊频下，瘦弱不孕，饮食不甘，脉沉迟细，系气血虚寒，肝郁气滞，冲任经伤，不能滋养百骸，以致劳怯经闭不行。当投毓麟珠加补骨脂、肉桂、沉香，温补下元，益气养血。使雪消则春水自来，血盈则经脉自至，而诸疾悉瘳矣。

《临证医案笔记》

何书田

产后数月，营分失调，神倦经阻。久防肿满，以和脾调营主治。

炒阿胶 炒归身 川断肉 制香附 丹参 炒艾绒 炒白芍
生杜仲 广陈皮 乌贼骨

产后疟疾，肝肾两亏，经阻数载，以致少腹作痛。久之，恐其结癖成臌。以温养奇经主治。

炒阿胶 炒归身 枸杞子 川芎 炒怀膝 炒艾绒 炒白芍
紫丹参 陈皮 上肉桂

哀感内伤，经阻腹痛，满甚则呕吐作酸；脉弦而紧，防成臌胀。以疏理营络为主。

上肉桂 制香附 法半夏 炒归尾 炒怀膝 炒艾绒 川郁
金 广陈皮 紫丹参 菟藟子

经阻腹胀，肝郁络滞也。不易治。

炒白芍 焦茅术 川芎 炒青皮 炒怀膝 归须 制香附
川郁金 陈皮 茯苓皮 冬瓜皮

《竿山草堂医案》

王孟英

管君幼斋令正，汛停七月，至仲秋经行不多，腹乃微胀，继则胸闷不饥，身有寒热。吕某以桂枝、黄连等药进，而痞闷转加，二便不行，口糜而渴，得饮即吐，夜不能寐，五内如焚。余诊之，脉弦而细，面赤足冷，神惫不支。是营阴素亏，气机多郁，郁久生热，辛燥忌投。授沙参、萎、薤、栝、茹、旋、菀、冬瓜子、枇杷叶，二剂而燥矢行，胸腹舒，知饥，吐止，继以宣养而瘳。其汛停良由血不足，非有血不行而阻也。

盛泽王西泉丈仲郎巽斋刑部夫人，年未四旬，而十八年前诞子之后，汛即不行，医以为虚，频年温补，略无小效。董味青茂才嘱就余诊。脉弦滑而体甚丰，乃气郁生热，热烁津液以成痰，痰复阻其气道，不能化血以流行，以致行度愆期，腹形胀痛，肢背不舒，骨疼寐惕，渴不欲饮，间或吐酸，二便不宜，苔黄口苦，皆风阳浮动，治节横斜之故也。与沙参、蛤粉各四钱，丝瓜络、石菖蒲各一钱，紫苑、仙夏、旋覆、蒺藜各一钱五分，茯苓三钱，丹参二钱，黄连四分，海蛇二两，鳧苈一两，服十余剂，来转方云：胀痛蠲而腹背皆舒，夜寐安而二便亦畅，酸水不吐，痰出已松，是肝已渐柔，惟食少无味，骨节酸疼右甚，乃阳明虚无以束骨利机关也。拟通养法：参须、石菖蒲各一钱，茯神、络石各三钱，薏苡四钱，仙夏、竹茹各一钱五分，木瓜八分，姜汁炒黄连三分，十大功劳一两。仲冬招余往游复视，则诸恙皆安，惟右腿尚疼耳。即于通养方内加黄柏、仙灵脾，服之遂愈。

钱塘张君簪伯令郎韵梅茂才之室，自去年夏间娩后，虽不自乳，经亦未行。方疑其劳也，四月间患感，医进升散药，遂腹膨气逆，

肢痠欲厥，或又疑其娠也。延余诊之，脉弦巅痛，乃营虚肝郁，微挟客邪，误投提表耳。以清解轻宣之品数剂而愈，继参养荣，月事亦至，人皆詫为神治，其实非大病也。

《归砚录》

林佩琴

束氏。经阻疑孕，胸痞呕酸，寒热胫冷，食减便难，两部沉弦。乃气逆浊踞，非恶阻病，宜和肝泄浊。吴萸、香附盐炒、茯苓、厚朴、半夏俱姜汁炒、橘白、苏梗、枳壳、煨姜。三服前症渐平。

陈氏。性偏不育，脉沉涩，气急痰闷，经闭三钱。当先调畅肝郁，三因七气汤：半、朴、苓、苏，加当归、香附、郁金、合欢、玫瑰二花煎。随用平调肝肾。甘杞子、沙苑子、补骨脂、牛膝、当归、制首乌、益母霜，意取温行，不十服经行矣。

《类证治裁》

抱灵居士

一女笄期，春月吐血咳嗽，至秋经闭，夜热恶寒，白带，盗汗冷，脉浮数，肝甚。以茯苓补心汤二剂，热退，咳减，胁痛，头昏心慌，口渴；以八味逍遥散加知、贝、麦冬、骨皮三剂，热退汗止，渴减，咳甚。脐上痛，为血滞；足夜肿，为血坠。以四物合小柴胡汤加香附、梔子、元胡、双皮一剂，咳减，胁痛止，头昏除，腹下痛，脉弦数；以前方去梔、芩，加桃红、牛膝、韭汁、酒三剂，白物大下而不复红，胁腹腰俱痛，脉弦数，此血热有瘀也，宜玉烛下之。或代抵挡汤，或以药峻厉阻之。以四物汤加知、柏、元胡、香附平剂，大黄、牵牛、桃、红、归、芍、滑、青未散，两进而脐腰痛止，则血停不动矣，咳甚则火又上炎矣。虽用清热和血、润肺理气之品，不过养虎为患，岂能回生哉？

一妇，经闭，发热、心悸，干呕作泻，吐白沫多于平日，以败毒散、正气饮不应；以二陈汤加荆芥、防风、枳实、竹茹、柿蒂、桑半夏

用三钱二剂，呕止，热悸在；以小青龙汤一剂，两耳气冲；以前方加白术、丁香不纳药，询之，乃行经后饮冷茶一碗，经行一日止，心悸，发热，泻黑尿，脉浮滑，以百顺丸三钱，泻三次黑尿；以小柴胡汤加生地、全归、桃仁、丹皮一剂，小腹微痛，此蓄血症也；以生地、赤芍、桃仁、红花、香附、肉桂、茯苓、枳壳、归尾、甘草、干姜、酒为引一剂，大汗热退；三剂，两月经行而愈。

《李氏医案》

蒋宝素

经闭三月，血结成症，下离天枢寸许，正当冲脉上冲之道，是以跳跃如梭，攻痛如咬，自按有头足，凝生血鳖。肝乘脾位食减，木击金鸣为咳。中虚营卫不和，寒热往来如疟，从日晡至寅初，汗出而退。脾伤血不化，赤白带淋漓。脉象空弦，虚劳渐著。第情志郁结之病，必得心境开舒，方能有效。

大生地 当归身 小川芎 大白芍 五灵脂 生蒲黄 怀牛膝 茜草根

昨暮进药，三更腹痛，四更经行，淡红而少，五更紫色而多，小腹胀坠而痛，停瘀未尽。依方进步。

大生地 当归身 小川芎 大白芍 五灵脂 生蒲黄 怀牛膝 茜草根 虻青皮 延胡索

经通，瘀紫之血迤邐而行，诸症俱解。小腹犹疼，瘀犹未尽，症势稍减，跳动如初。盖所下之血，乃子宫停瘀症结，盘踞肠胃之外，膜原之间，无能骤下。症本不动，跳动者，正当冲脉上冲之道故也。幸借冲脉上升之气，可以逐渐消磨。若症踞脉络幽潜之处，则终身之累矣。交加散主之。

大生地 老生姜

等分，捣汁互炒为末。茶调服三钱。

《问斋医案》

何平子

经阻腹胀，清窍不利，以调气渗湿，自然腹松。

瓜蒌皮 青皮 梗苏梗 厚朴 车前子 法半夏 细香附
黑山栀 赤苓 冬瓜子 淡姜皮

接方：白归身 川石斛 茯苓 炮姜 泽泻 炒白芍 细香附
川楝子 于术 焦谷芽

复：月事已通，腹胀亦愈。现在气血两虚，法当温补。

焦于术 茯苓 白芍 车前 菟丝子 上肉桂 香附 腹皮
泽泻 冬瓜子 煨姜

月事停止，少腹胀及脚肿，脉来细软。属中焦寒湿所阻。温通分理治。

茅术 于术 统归 块苓 炮姜 防己 香附 猪苓 艾绒
冬瓜子 橘叶

复诊：西党 茅术 于术 茯苓 肉桂统归 红花 香附
焦谷芽 荷蒂 橘叶

经停半载，腹胀浮肿，气郁挟温也。分理破瘀治。

归须 元胡索 青皮 桃仁 瓜蒌皮 苏木 细香附 赤苓
法夏 泽泻

又方：全归 香附 苏梗 赤苓 川郁金 泽泻 木香 羌
藿 冬瓜子 紫石英 橘叶

复诊：瓜蒌皮 单桃仁 归须 元胡索 淮膝炭 炒厚朴
细香附 瓦楞子 大腹皮 元明粉

《金春升房医案》

王廷俊

喻嘉言《寓意草》载，杨季登女经闭，汗出如蒸笼气水，先生治愈，谓此证可治处，全在汗出，以汗出则表里通达，不致逼热内燔，

使其阴烁尽而死也。方用当归龙荟汤，数服后，变汤为丸，缓缓调理，汗敛经通而愈。学医时阅之。喜其一点灵光，炯炯纸上。悬壶后，每遇此证，必究其源，绝不取以通套药，模棱了事，误人性命。道光三十年庚戌，大邑县青霞镇卢晋山之女，抱病延诊，二日始至其处。晤晋山，见其修洁有静气，询之，学而未成，一巾不及焉。谈吐之余，彼此浹洽，乃询令媛何病，远道招诊。曰：“闭经三月，医谓成劳，待其死而不忍。敦请先生，冀出奇制胜，或有疗也。”“几何岁？”曰：“十五岁。”“起病何状？”曰：“小女十四经通，今年时令不时，忽发寒热，本地医投十神汤，得大汗病解，三四日复作，以为复感，又饮神术散，是夜大渴。更医，谓脉微细，且发汗后宜补气血，由是忽轻忽重，似疟非疟，寒热总不脱体，而月事竟不来矣。因循至今，奄奄一息。惟尚思食，不即死耳。”引予内室诊脉，沉数有力，而询发寒热否？心里发烦，心下硬痛否？口苦咽干否？腹痛便闭否？咳嗽呕吐否？女云：“心口下一块抵住胀痛，思食而不敢食，食即欲吐，勉强忍住，大腹即痛，发寒发热，终日不体，咳嗽近日才有，痰咳不出。”予思沉数有力，为实热当下，合之外证，一大柴胡汤可愈。乃服补药，究竟补者何药，不可不阅其方。出，令将此三月来所服方，备出予观。观之，左右不离八珍、六味、五福饮、七福饮、决津煎、养营煎，张景岳新方中，庸滥伎俩。予笑曰：“可惜此人全副精神，一腔心血，皆为《景岳全书》所蔽，而以误己者误人也。然犹幸其胆量尚小，未用桂附，燥干津液，或可一救。”濡墨伸纸，即以柴胡汤与之。晋山哑然，谓：“前已表过，又经三月，体气羸弱，柴胡散其外，大黄攻其内，恐病久不耐，阴阳两脱奈何？”予婉告曰：“十神、神术两方，燥劫伤阴，所以汗出而寒热不解。后医知脉细弱为虚，而不知由骤伤津液所致，一味呆补，营卫不和，初感之时邪，终无由去，现在少阳、阳明实证未罢，不乘此时，元气未溃，表里两解，一鼓荡涤净尽，再为稽迟，将外而经气，内而藏府，久久壅闭。迨至脾阴干槁，附丽于阳明之冲任亦枯，阳明以下行为顺，愈枯愈逆。愈逆愈枯，经之源头既

绝，则万万无生路矣。此时人虽瘦削，而肌肤尚润，可见胃阴尚存，以芽胡启发清气，而开少阳门户，少阳一开，枢转有力，则上下降，一齐灵活，又得枳实之形圆臭香者，直达三焦，大黄之逐瘀涤热者，推陈致新，一举而三善备，病必减去八九，继为清补，即可望痊，何惧之有！”晋山观予言之娓娓，似非毫无把握者，撮药与服。是夜子正敲门，告予，谓服药后，心下硬块，滚入腹中，大痛几阵，大解两次，遂作津注而睡，睡亦安适。予曰：“燥结既去，宿热必挟粪水大下，阳进阴进，月信亦可望通，可喜之至。”次日续服两煎，果如言寒热顿减，自谓倦极思卧，甚不欲食。晋山恐其胃败，予又告曰：“前之食者，胃之阳气有余，食之究亦不安，今不食者，脾之阴气不足，不食可免腹胀，且睡而安适，则阴亦易长，此中消息，非久于医者不知也。停药以俟化机，有我在，必不致误乃事。”伊复促诊，沉数尽去，脉甚缓小，令无惊醒，反侧数次，干后乃醒，精神清爽，进粥二盂。次日，晋山欣欣喜色，谓月信已动，予诊其脉如昨。改用麦门冬汤，连服四剂，月信大至，初下紫黑，自云觉其大热，渐次调适，六日乃毕。留予小住半月，所服不地梔于豆豉炙草汤，白芍甘草汤而已，而体已元复，眠食如常，临别务求丸方，与炙甘草汤，令煎作膏服之，而去。是役也，病之外象，全似虚劳，所幸脉得沉数，实为外邪未解之候，若易沉数有力，为细数无神，则阴气枯涸，百不一生，卢扁束手矣。生死之机，辨于毫忽，医道岂真易为乎哉！

大柴胡汤

柴胡八钱 枳实四钱 生姜五钱 黄芩三钱 白芍三钱
大黄二钱 法夏三钱 大枣十二枚

陈古愚曰：凡太阳之气，逆而内干，必藉少阳之枢，转而外出者，仲景名为柴胡证，但小柴胡证，心烦或心下悸，重在于胁下苦满；而大柴胡证，不在胁下，而在心下，曰“心下结”，郁郁微烦，曰“心下痞硬”，以此为别。小柴胡证曰“喜呕”，曰“胸中烦而不呕”，而大柴胡不独呕，而且呕吐；不独喜呕，而且呕不止，又以此为别。所

以然者，太阳之气，不从枢外出，反从枢内入，干于心主之分，视小柴胡证颇深也。方用芍药、黄芩、枳实、大黄者，以病势内入，必取苦泄之品，以解在内之烦急也。又取柴胡、半夏，以启一阴一阳之气，生姜、大枣，以宣中焦之气，盖病势虽已内入，而病情仍欲外达，故制此汤，还藉少阳之枢而外出，非若承气之上承热气也。汪切庵谓加减小柴胡、小承气为一气，未免以流俗见测之也。

方解为太阳病未解，便传入阳明，大便不通，热实心烦，或寒热往来者说法，予治此证，即从心下硬痛，寒热往来悟入。不用小柴胡而用大柴胡者，以其脉沉数有力，知有实热，非黄芩一味泻里热所能了也。三阳以少阳为门户，三阴以少阴为门户，柴胡为转枢大药，得之则一开而无不开，一阖一辟谓之变，往来不穷谓之通，人身中经隧血脉，流行不息，今寒气入而稽迟之，热气入而燔灼之，津液受伤，脾不能升，胃不能降，以致胆气热郁，挟心肺之阳而上亢，心烦、口苦、咽干、肌肤灼热之证作矣。肝气寒郁，逼膀胱之水而下凝，振战鼓栗，手足寒冷之证作矣。不于此批郤导窾，而妄投补剂，必蹈壅满增气之弊，有升无降，月事焉能以时下？后医之呆滞，怀前医之燥劫，厥罪均也。予用大柴胡汤，看似峻厉，其实表里上下，一齐开解，外邪净而内自安也。麦门冬汤，女科要药，陈徽庵讲解最明，另录于后。

麦门冬汤

麦门冬四钱，不去心 法夏二钱 大枣二枚 炙甘草一钱
梗米二钱五分 西洋参三钱

陈徽庵曰：此方可治妇女返经上逆吐衄等证。盖以此方专入阳明，阳明之脉，以下行为顺，上行为逆，冲任之脉，丽于阳明，三经主血，故以此方为正治之法。若去梗米加蜂蜜八钱，取百花之菁华，以补既亡之胃阴，更为周到，观此则知燥烈劫阴，月经不行，以此治之，无余蕴也。

黄堂

陆，三十岁。孕育既多，营阴必亏，而舌苔腻浊酸，腹痛溏泄。脾元乏运，由是生化无权，经旨营出中焦，当宗此议。

归芍六君汤加丹皮 砂仁 十大功劳叶

二诊：前议调中法，诸恙皆减，且喜经通，最为佳处。惟寒热未已，营卫之虚，难骤复也。

潞党参 归身 半夏曲 丹皮 于术 桂枝拌炒白芍 白薇
白砂仁 白茯苓 广皮 十大功劳叶

三诊：经通，诸恙俱减，惟内热未清，舌苔未化，渴而不欲饮。阴虚之中，而胃家挟湿也。

西洋参 于术 金石斛 丹皮 砂仁 制半夏 橘红 茯苓
薏仁

《黄氏纪效新书》

王燕昌

一妓，年二十三岁，经闭六年矣。左关沉，结块疼甚也；左尺沉微，白带多也；右关弱细，食少也；右尺虚大，相火盛也。用四君子、桂、附、炮、姜、丹参、当归、萸肉、牛膝、制鳖甲，大剂，二服疼止，能食。原方用酒炒丹参五钱，炮姜二钱，连服四剂而经通。原方去牛膝、肉桂，因其经既通，不再引下，不再疏泄，加牡蛎三钱，龙骨二钱，四剂白带止。又去龙骨、附子，加首乌五钱，杜仲三钱，十剂后块消。又去鳖甲，加黄芪二钱，十剂后全愈，经又行矣。

《王氏医存》

杨毓斌

陶谨之冢妇，两年来叠见经阻，刻又停经三月，向右半头而耳，下至颈臂时觉烧热蒸蒸。医用苦寒泄火，清血热及通经化瘀之品不

验。予按脉微弱，欠神，杳无血热之征。当属冲任虚而失调，以致少阳胆火不靖，肝胃之恙杂见。冲为血海，丽于胃而附于肝者，既非瘀热为患，恣用苦寒破血，未免诛伐无辜，致蹈虚虚之失。自以温养为宜，从冲任奇经，调气活血消息之。症见经年，难期骤效。先用煎剂，觉有验，继以丸缓调，寻愈。

汤药方：醋炒当归身三钱 桂心三分 牡蛎四钱 乌贼骨四钱
朱茯神三钱 紫丹参二钱 黄芪二钱 生甘草一钱五分
小香附人乳炒，二钱 生姜一片 饴糖三钱

丸方：炙黄芪三两 当归身一两 乌贼骨一两五钱
蛤粉炒阿胶二两 紫丹参一两五钱 酒洗白薇一两 茜草六钱
桂心二钱 香附二两 朱拌茯神二两 炙甘草一两 牡蛎三两
龙骨二两 煨生姜二钱 大麦糖为丸

杨月秋茂才尊闾。产后断乳经阻两年余。枯脊羸法，稍一劳烦便不能支。一日，月秋从友处识予，固请往诊。适卧病有日矣，色枯，神馁，气夺息微，身热，颐红，语不出声，脉如游丝，危若朝露。予曰：病若斯夫人，而知不可为矣，惟有大健中气，冀其来复再议。用黄芪建中汤加牡蛎、倍加黄芪。明日往，神气稍振，语声倾耳可辨。前方进退消息之，不十日竟全愈。惟年甫逾笄，血虚经断，羸若衰柳，终非寿征。调治经年，眠食加健。值隆冬，为立膏方如左，以调其经。明年春，药尽两料，经水两下，方幸功成。逾两月，复病经月，虽诊治获痊，而天癸又断，停药静养半年，无恙。未几病寒热，治愈。越半月，绕脐痛甚，不思食，延医诊数日无效，仍恳予治。为立方如左，愈。更立膏方以善其后。按经治未有如此难且久者。三年中随症补救，虽应手取效，而血海终枯，本实先拨药饵，无能为役也。附方特千虑之一得，故志之。

周经治验方：鹿角胶一两 乌贼骨三两 紫石英八钱 干姜五钱
桃仁五钱 元胡索五钱 桂心二钱 炙黄芪二两 醋炒归身八钱
白术一两 炙草五钱 大枣十枚 白蜜六两

环脐痛治验方：当归身四钱 生白芍三钱 阿胶三钱 茯苓三钱
糯米炒杜仲二钱 乌贼骨三钱 炮姜二钱 炙草二钱
山茱萸二钱土炒 党参三钱 山药三钱 煨木香一钱
盐水炒补骨脂二钱 生姜二钱 饴糖五钱

姚嫂郑宜人。据述：素本血虚肝旺，偶因闪跌，初亦不甚痛楚，逾半月，右腿自体枢以下至足拘挛痛甚，不能移动，串肿时起时消。医经十二人，凡烧针、围药、汤丸，内外杂治七十余日，更加痛楚，夜不能寝，饮食日减，牙战心烦，身重经阻，三月有奇，每汗至颈而还。

按：舌上滑底粗，面色青淡，脉结微毛，乃久痛入络，伤气耗营，治节之令不行，筋脉凝结，不能流通所致。误作外证治，烧针、围药重伤筋络血脉，未易复矣。握少阳阳明，先调其筋脉，有效再议。时己丑四月二十八日初诊。

当归 红花 桑寄生 首乌藤 白芍 山茱萸 苡仁 茯神
炙甘草 谷芽 饴糖

二十九日，脉左滑右弦，寸上鱼际尺弱，防厥逆之变。

前方去当归、山茱萸，加牡蛎、陈皮、芪皮。

三十日，汗下透至胸，痛减，卧较安。

生芪皮、桂枝、白芍、炙草、桑枝、红花、茯苓、陈皮、首乌藤、谷芽。

汗透下至小腹，大便难。阴液不足。

芪皮、白芍、当归、炙草、红花、茯神、兔丝饼、阿胶、知母、苁蓉。

初二日，经水大来，饮食有加。是拨转气血流通之效。

当归身、阿胶、炙草、桂枝、炮姜炭、桑寄生、兔丝饼、炙黄芪、鳖血炒柴胡、谷芽、饴糖。

初三日，据述，昨早服药后，一日痛大减，心神较畅。至晚因洗濯劳动，感风湿气，人夜半后，忽壮热、神昏、语乱、人事不省。按脉弦数而浮，重按全软、舌苔薄白，中分适当。经至血行过多，心肝之阳易扰。《金匱》云：妇人经至，中风发热，昼则明了，暮则谵语，此为

热入血室。今昼并不能明了，大暑伤气，湿动风生火扰。颇防猝变，治以先清心体为要。

竹叶卷心二钱 朱砂伴茯神三钱 酒洗白薇一钱五分 龙骨二钱
蛤粉炒阿胶二钱 鳖血炒柴胡一钱 炒枯芩一钱五分 炙草一钱

初四日，神识清，烦闷，右脚跟热痛，小便短赤。脉左参伍不调，右弦细。阳气下陷于阴，佐以开提通调。

竹叶卷心 瓜蒌根 黄郁金 砂茯神 酒洗白薇 牡蛎 龙
齿 杏仁 柏子仁 木通 生草

诸症俱平，惟痰多胸闷，苔白，不思食，立方两服愈。

姜汁炒竹茹 姜半夏 朱茯神 炒贝母 陈皮 炙草 焦谷
芽

十六日，喉齿间觉有浮热，右腿动则仍痛。因事触恼气逆，腹膨食不香。

菊花 霍斛 刀豆子 砂仁 炙草 白芍 当归

二十二日，大便难，右腿腹痛。

前方去砂仁、陈皮，加生地、续断、胡麻

二十六日诸恙全愈，请立膏方，以调养之。乃健旺逾常，惟右腿稍跛，系前烧针所伤，然不为患矣。

膏方：炙芪 炙草 归身 炒杜仲 桑寄生 黑芝麻 苁蓉
丹参 陈皮 木瓜 须谷芽 饴糖

《治验论案》

温载之

友人张雨亭室人，年三十余，偶患经闭，腹起痞块。医用顺气通经之药不效。愈形困惫，痛楚难堪，势甚危殆。延余诊视。审其两关脉沉迟。症必由寒而起，以致血凝，非利气药所能愈。渠云：“实因前日母故正值天癸欲来之期，一媼云热血喷丧于家不利，可服冷水以止之。殊室人无知，竟从其教。再三究诘，今方吐实。君曰是

寒，果然不谬。”余闻之，哑然而笑，曰：“真奇谈也。天地间宁有是理乎？”妇女忌讳实多，不知妄作。观此，轻信单方者均可引以为戒。余遂用驱寒逐瘀之品，经通块消，三剂而愈。

《温病浅说温氏医案》

陈虬

乐司房石友室人，经停三月，小腹胀大。杭城医者投以试胎药，腹中辄动，于是诸医皆注意养胎，而胀满日加，遂渐不思食矣。时予适应试在省，慕名求医。诊脉，两尺迟涩，左寸关弦长，上出鱼际，右关沉结无神，沉思良久而告之曰：“《阴阳别论》曰：阴搏阳别，谓之有子。王启玄注，阴，谓尺中也；搏，谓搏触于手也。尺脉搏击，与寸脉殊别，阳气挺然，则为有妊之兆。《平人气象篇》曰少阴脉动甚者，妊子也。虽各家解少阴为心脉，而全元起古注原作足少阴解。今两足迟涩，法为虚寒血少，其非胎脉灼然无疑。但每投试胎药，何以辄验？此事正自费解，向所以狐疑不决者，端为此耳。近思《巢氏诸病源候论》，称症瘕之病，不动者直名为瘕，若病虽有结瘕，而可推移者，名为症瘕。按症瘕之起，皆因气血凝阻，而试胎之药，不外破气活血，故每投辄应。既知确非胎脉，则据脉论症，当系忧思损脾，郁怒伤肝所致，未悉果否？”曰：“身唯一子，垂长而夭，忧思容或有之，若郁怒则无也。”予以左关弦出鱼际，显有别故，今既症无确据，向未草率疏方，乃弃笔而回。迨予归寓，则一老姬已在寓许久矣，曰：“先生真名医也。五月乐师爷新置一妾，乐奶奶在家已嚷吵百余遭，病当由此。”因乞施剂，遂授以大剂逍遥散，四服而弦脉少减。乃再以当归四钱 川芎二钱 白芍三钱 牛膝二钱

桃仁五钱 肉桂三分 川连五分 醋炒锦纹四钱 下瘀血如猪肝色，而反腹痛异常。盖瘀血方行也，仍取原方半剂，而加青皮五分，以下尽瘀血为度。于是胃开思食，非复从前之胀满，命服归脾汤

十五剂，而望后旋报信水来矣。

《蜚庐诊录》

陈幻生

女子二七而天癸至，天一所生，自然之水也，随气流行，一月一见，其行有常，故名曰“经”。经至子闭，失其常矣。其病有外因六气而成者，有内伤七情而成者。乙未，上海有陈姓闺媛，天癸数月不至，迭饮通经之剂，以致形瘦食少，咳嗽吐红，心中烦懊，夜寐不安。冬初，来速余诊，切其脉，滑而疾，盖是年六月酷热异常，人感其气，蕴久不化，真阴销灼，阳气上蒸，血亦随之，有升无降，经由是闭。余用羚羊清血汤，二剂，症减；再用羚羊益血汤，二剂，症平。后参调经方意治之，天癸即至。丙申春，上海有刘姓妇，血闭不行，恶寒发热，五心烦燥，口苦舌干，面色青黄，病情颇重，来延余诊。切其脉，缓而大，审是经期时过食生冷所致，以逍遥饮、紫金丸意合为一方，数剂即愈。按：此二症，一系火邪外感，一系生冷内伤，随症治之，病去而经自来，以是知专事通经无济也。且女子与妇人异，妇人与师尼异，师尼与娼妓异。随人而治，因症而施，庶乎可耳！

《诊余举隅录》

张乃修

奚右。由脘痛而致腹中胀满，得泄则松。肝脾不和，气湿不运。气为血帅，月事因而不行。以调气为先。

制香附二钱 砂仁五分 丹参二钱 苏木一钱五分 枳壳一钱
茯苓三钱 鲜佛手一钱 上广皮一钱 木香三分 降香五分

二诊：腹满较舒，中脘室痛。再从肝脾胃主治。月事不来，且勿过问。

制香附二钱 陈皮一钱 金铃子切一钱五分 前胡一钱
鲜佛手一钱 缩砂仁五分 延胡索酒炒，一钱五分 光杏仁三钱打

紫丹参二钱 苏梗二钱

陈右。久痛久呕，中脘板硬，月事两月不来。此必有形之滞，郁阴胃中。拟宣通气血。

延胡索酒炒，一钱五分 瓦楞子四钱 炒赤芍一钱
台乌药一钱五分 查肉二钱 土鳖虫去头足，炙三枚
单桃仁去皮尖打，三钱 归须酒炒，二钱 降香片五分

二诊：宣通营卫，大便解出凝而色红，脘痛势减，板硬变软，呕吐未发。再为宣通。

五灵脂酒炒，三钱 制香附二钱 炒枳壳一钱 焦麦芽三钱
陈皮一钱 薤白头二钱 延胡索酒炒，一钱五分 砂仁末五分
土鳖虫去头足，二枚 广郁金一钱五分

三诊：宣通营滞，大解带黑，脘痛呕吐俱减。然咽中觉哽阻，中脘仍然坚硬。脉象弦紧。效方扩充，再望应手。

上桂心五分 炒桃仁三钱 薤白头二钱 干漆炒烟尽，三分
橘红一钱 土鳖虫三枚 延胡索酒炒，一钱五分 制半夏一钱五分
湘军酒炒，八分

董右。少腹作痛，经事不行，脉形不爽，面部丹赤成片，不时发露。营气不宜。宜为宣通。

全当归酒炒，二钱 台乌药一钱五分 延胡索酒炒，一钱五分
制香附二钱 杭白芍酒炒，一钱 芫薸子三钱 炒桃仁去皮尖，打三钱
降香片七分 查炭三钱

二诊：经停少腹作痛。营气滞而不宣。当通和奇脉。

川桂枝四分 当归酒炒，二钱 制香附二钱 乌药一钱五分
芫薸子三钱 泽兰二钱 延胡索酒炒，一钱五分 川芎一钱
炒赤芍一钱五分 查炭三钱

三诊：宣通营滞，而理气机，腹仍作痛。血中气滞，气行则血行，故曰调经以理气为先也。

制香附三钱 紫丹参二钱 台乌药一钱五分 川芎一钱

炒枳壳一钱 全当归酒炒，三钱 延胡索酒炒，一钱五分

鸡血藤膏一钱五分 桂枝四分 白芍一钱五分，酒炒 红花酒炒，七分

四诊：血虚气滞，经阻不行，面发痞瘰，腹中疝痛。宣通气滞，以望经行，再商调理。

当归酒炒，二钱 牛膝三钱 卷柏二钱 丹参二钱 苏梗三钱
红花酒炒，一钱 川芎一钱 炒川断三钱 泽兰二钱 香附二钱
鸡血藤膏一钱五分 杏仁三钱

《张章青医案》

王旭高

陆。营虚发热，瘀阻经停。心中若嘈，饮食厌纳，时吐酸水，是脾胃不足而夹痰饮者也。夫心生血，脾统血，肝藏血，胃为气血之总司。调治之方，以和脾胃为第一。脾胃健则营血自生，停饮自运，瘀凝自化。

半夏 陈皮 川连吴萸炒 茯神辰砂拌 桃仁 旋复花 新绛
丹参 野蔷薇花 白扁豆

孙。经期一载不来，大便时常秘结，每月胸中不舒数日，此肝血虚而胃气不和也。理气之方，不在平肝而在养血；和胃之法，不在破气而在补气。气血充而肝胃自和矣。

西党参 熟地砂仁拌 枣仁 陈皮 归身 制半夏 丹参
于术人乳拌炒 茯苓 白芍 沙苑子 橘饼 谷芽

又：肝肾素亏，气郁，胃气不舒，脾阴不足。饮食知味而不能多进，经事不来，二便时常不利，肩膝酸疼，舌苔或黄或白，此有湿热夹杂其中。初养气血之方虽稳当，然无理气化浊之品，未能奏效。今拟一方，以观验否。

制首乌 怀山药 枣仁 牛膝 焦山栀 柏子仁 茅术炭
陈皮 半夏 建莲肉

常服苡仁、红枣煮食。

陈。经行作呕，血虚肝旺也。呕止而腹中结块，经事四、五月不来，当脐跳动，疑为有孕。恐其不然，想由瘀凝气聚与痰涎互结成块耳。《内经》肠覃、石瘕二证，状如怀子，病根皆在乎血。虽不敢大攻，当气血兼理，仿妇科正元散法。

党参 白术 川芎 茯苓 陈皮 半夏 当归 砂仁 木香
枳壳 香附

有无孕，最难辨别。此症断乎非孕。服此二十余帖，至八九月而经始行。

某。经停，少腹痛，小溲淋塞有血缕。此肝火与瘀凝交阻，当通而导之。

龙胆草 小蓟炭 车前子 丹皮 桃仁 大黄酒炒 冬葵子
海金沙 延胡 焦山梔

徐。咽干干咳，全由津液之亏；内热经停，已见虚劳之候。设欲生津降火以养其阴，而饮食减少者适以伤脾。计惟调其中气，俾饮食增而津液旺，以复其真阴之不足。盖津液生成于水谷，水谷转输于脾胃，舍此别无良法也。

白扁豆 茯苓 白芍 玉竹 炙甘草 怀山药 苡仁 金石斛
玫瑰花 枇杷叶

陆。惊恐饥饱劳碌，内伤气血。血凝气滞，经停不来，已及八月。内热食少，虑成干血劳损。

肉桂一钱二分 桃仁二钱三分 川断一钱 麝香五厘
当归二钱五分 大黄酒炒，一钱三分 砂仁四分 牛膝酒炒，三钱
乳香去油五分 没药一钱 五灵脂酒炒，钱半

共研细末，分五服。每日一服，陈酒送下。

渊按：此调经散加减法，颇得古人遗意，元气可支者用之。

《王旭高临证医案》

姚龙光

殷春台夫人产后失调，迁延年余，服药罔效，时时畏寒，咳嗽痰清，肢体倦怠，夜不欲寐，口不欲食，神疲不离枕席，时吐白沫，胸中闷塞，经水久闭，诊其脉两寸弦紧搏指，两尺俱微弱，舌本淡紫，苔白厚而干。余曰：此上实下虚之候也。上实者，腹中之痰湿壅于上焦，下虚者，阴中之真阳虚于下焦，惟下焦真阳不足，不能蒸水上潮，肺气无权，脾湿又将窍隧阻塞，故舌干而白沫时吐，血不能生，气不能利，故经闭而倦怠也，为用丸剂清上，膏剂补下，以白术、炙草、枳壳、橘红、贝母、桑白皮等，水叠丸，食后服之，以肉苁蓉、枸杞、杜仲、鹿角胶、鹿角霜等熬膏，空心服之，一月余，颇见安好。忽又延毕医诊视，服滋阴降火两帖，反觉沉困，因仍服吾之丸剂、膏剂，八月余，经水始通，诸症皆瘳，饮食渐加，吾嘱令多服为是。

阶翁夫人逾二年又生一女，产后经水止，乳汁甚多，二年断乳，经仍不行，乳间结核而痛，间又吐血，血色鲜红，幸不甚多，余因内人病故，由鄂返里，至蒋宅有事，其姑邀予为诊，余告以脉象不佳，宜善调摄，且切勿断乳为要，至季冬，病者卧床不起矣，复请予诊，见其干咳无痰，汗多不敛，下午潮热，饮食不思，脉则弦数而疾，私谓其姑曰：法在不治，其在来年春分前后乎。果殁于来年春分前三日。盖此人体弱性傲，肝木本旺，产后乳多，非血气有余，乃肝脾两经之血为肝火鼓而上行，通化为乳，循厥阴经至乳间而出血，虽暗伤而肝木转遂其疏泄之性，故经不行而反无病，及断乳后，其肝木上冲如故也，通血化乳如故也，而乳窍已闭，欲泄不得，故乳中结核胀痛矣，其未化为乳之血，肝火逼而上出，故吐而见诸口矣。血久上行，便成熟路，以化乳上出为顺，转以化经下行为逆，故欲经行必不可得矣。医者不察，以乳痈常法治之，木火愈旺，金气伤则干咳无痰，土气败则饮食不思，血不化乳，乃化为汗，则上身大汗淋漓，脉又弦疾劲强，是胃气将绝，阳越于上，阴竭于下矣。有阳无阴，有升

无降，《内经》曰：出入废则神机化灭，升降息则气立孤危。卯月木气发生，下无真阴以济之，何以为生身之本乎？故必死于春分前后也。在断乳胀痛时，脉弦数尚未搏指，舌鲜红尚有薄苔，若用苦剂敛其血以入内，而下通于冲脉，则经自行，血自止，乳核自消，再以和平养阴之剂，植其根本，肝自柔和，何至及此乎？医者能不认症乎？

《崇实堂医案》

柳宝诒

花。经甫至即停，其停也无因，并无瘀阻见证。一载以来，并无疾苦，此属血少而停，自无疑义。近日渐有午后寒热，入夜愈重，脉象虽数，而与劳热之虚数有异。窃思经候久愆，营气之流行必滞，冬寒因而内着，得春气而邪气外发；又苦营阴先馁，不能鼓托而达，以致缠绵不已，无汗，经月不愈。若任其留恋，转恐阴气日耗，本非损证，而延成损证者，亦往往有之。兹拟养阴和营，透邪清热，必先使邪机尽达，乃可续用养阴，以善其后。

大生地酒炙 当归酒炒 苏叶 制香附 丹参 青蒿 炒丹皮 嫩白薇 广陈皮 秦艽 鳖甲 茅根肉 益母草

穆。经停数载，少腹胀硬而痛，上及于腕，其为血积无疑。甚则青筋脐突，冲气上逆。幸得通瘀之剂，胀势稍松。但所行者，仅得黄水，未见瘀积，则病根未拔，胀必复剧。惟久病未可急攻，拟改用缓法，再与疏泄。

归尾 白芍酒炒 延胡索醋炒 广木香 乌药 桃仁泥 长牛膝红花酒炙拌炒 京三棱酒炒 蓬莪术醋炒 丹皮炒 川芎炭 川断 香橼皮

另：大黄廋虫丸

须。少阳木火之气，上窜经络则齿痛，内犯中土则脘胀；下阻冲任则经停。阴血虚则木火甚，气机窒则营络阻。病绪纷纭，顾此失彼。姑先上清木火，佐以和肝畅营。

制香附 炒丹皮 黑山栀 滁菊花 川连吴萸煎汁，拌炒 广木香 青皮醋炒 沉香 姜半夏醋炒 乌药 夏枯草 竹茹

佐。先患五更泄泻，是脾肾阳虚之病。近日胀满，甚于脐下，朝宽暮急，亦属阳气被困、转输无力所致。上脘与少腹，时有块撑。肝气乘虚内扰，致腑气不得通降。大便秘结不爽，迟至半月有余，而无燥象，其非实热阻结可知。经停数月，而脉象弱细微数。既非妊象，亦无瘀阻确证，乃肝脾不营，冲任血少而然。病情纷错，大旨在脾肾虚寒，肝经血少气滞。姑与温养脾肾，疏达肝木，以举其大纲，其余诸病，只可随时兼治，不能一一缕及也。

参须 于术 白芍桂枝煎汁，拌炒 当归身炒 肉苁蓉漂洗长牛膝吴萸煎汁，拌炒 小青皮醋炒 金铃子酒炒 川郁金醋炒 茯苓皮 陈香橼皮。

另：桂心制白附等分，二味为细末，饭为丸。每次三分，药汁下。

伍。内热较前得减，而月信杳然，少腹渐觉块痛。病蒂在于营分，非通畅不能为功。

当归 桃仁 丹参 延胡索醋炒 川芎炭 山查炭 橘核 炙甘草 胡桃肉 大黄红花酒拌透，烘干，炒微黑

宗。经停内热，由乎营气虚损。下焦本无瘀热，与血痹致损者不同。血生于肝脾，而统摄于冲任。今脉象虽见虚数，幸纳谷尚佳，营血之源未竭。拟与滋养肝脾，通调奇脉。

洋参元米拌炒 黄芪 炒当归 大生地炒 枣仁 茯神 春砂仁 煨木香 菟丝子酒炒 川断炒 川怀牛膝各酒炒 丹皮 白薇 木瓜酒炒 龙眼肉

干。肝气挟痰浊犯胃，则脘搅呕恶；挟风火上扰，则眩晕耳鸣。本属脏气偏胜之病，况癸信久羁，肝营不畅，又宜兼顾为稳。

羚羊角 炒丹皮 黑山栀 刺蒺藜 杭菊花 煨天麻 东白芍 枳实 长牛膝炒 苡米 广陈皮 石决明 羌蔚子 竹茹

《柳宝诒医案》

余听鸿

常熟早北门吴姓女，十九岁，经停四月余，饮食如常，脉亦不涩，肌肉不削，不内热，不咳嗽。其父母恐停经而成干血。余曰：饮食如常，肌肉不削，少腹胀硬，此乃水寒与血互相胶结于血室之中，若不趁其正气旺时攻之，待至日久，正虚难以再攻，即以瞿麦、桃仁、红花之类，罔效。再以归尾、红花、肉桂、山棱、莪术、延胡、五灵，炮姜，桃仁等品，服百余剂。不效。自六月至十月，少腹渐硬，诸药不效。至十二月，余适回孟河度岁，请某姓妇科，服以四物等汤，恐其血虚，经不能济，先养其血，少腹更硬。又延某医治之，曰：被余某破血太甚，急宜补之。进以四君、补中益气之类，少腹仍然。二月，余回琴，仍邀余诊。少腹胀硬，令其母扪之，其冷如冰，痛不可言，肢冷面青。余曰：水与血互结血室，下之亦死，不下亦死。既是血虚，岂有服山棱、莪术、归尾、桃仁等百余剂而不死者耶。余即进桃核承气汤，大黄四钱，桂枝一钱，炙草一钱，芒硝二钱，桃仁三钱，陈酒和水煎，分三次服。初次服下，小便中即下黄腻水，连服三次，连下三次，腹痛稍缓，神气极疲，少腹稍软。明晨，余恐其过下气脱，即进以活血理气之品，血仍不下，腹痛更甚。再进以桃仁承气汤，送下抵当丸，不料腹痛欲厥，即以艾叶煎汤，洗熨少腹，下黄腻水更多，又下紫血块数枚，而痛即止。两月后，信水如常，至九月出阁，强健如昔。余读《金匱》仲圣有瘀血在少腹，或水与血结于血室，大黄甘遂汤、下瘀血汤、抵当汤，皆非大黄不可，因大黄是血分之下药也。此症若不遵古训而不用大黄、虽山棱、莪术千剂，亦徒然耳。所以仲景之书不可不读也。

《余听鸿医案》

方耕霞

郭。经停脉数，舌碎口疮，心脾之蕴热也。防涉癆损。

细生地 薄荷叶 盐水炒柴胡 丹皮 五灵脂 川芎 归尾
蒲黄 左金丸 香附 赤芍

再诊：口疮略好，脉仍数疾、腹痛，厥阴之气滞血凝矣。不易治。

原方加山栀 青皮 木香 去蒲黄 左金丸

《倚云轩医话医案集》

张锡纯

天津陈氏女，年十七岁，经通忽又半载不至。

病因：项侧生有瘰癧，服药疗治，过于咸寒，致伤脾胃，饮食减少，遂至经闭。

证候：午前微觉寒凉，日加申时，又复潮热，然不甚剧。黎明时或微出汗，咳嗽有痰，夜间略甚，然仍无妨于安眠。饮食消化不良，较寻常减半。心中恒觉发热思食凉物，大便干燥，三四日一行。其脉左部弦而微硬，右部脉亦近弦，而重诊无力，一息搏逾五至。

诊断：此因饮食减少，生血不足以至经闭也。其午前觉凉者，其气分亦有不足，不能乘阳气上升之时而宣布也。至其晚间之觉热，则显为血虚之象。至于心中发热，是因阴虚生内热也。其热上升伤肺易生咳嗽，胃中消化不良易生痰涎，此咳嗽又多痰也。其大便燥结者，因脾胃伤损失传送之力，而血虚阴亏又不能润其肠也。左脉弦而兼硬者，心血虚损不能润肝滋肾也。右脉弦而无力者，肺之津液胃之酸汁皆亏，又兼脾胃之气分皆不足也。拟治以资生通脉汤，复即原方略为加减，俾与证相宜。

处方：白术三钱，炒 生怀山药八钱 大甘枸杞六钱 龙眼肉五钱
生怀地黄五钱 玄参四钱 生杭芍四钱 生赭石四钱，轧细
当归四钱 桃仁二钱 红花钱半 甘草二钱 共煎汤一大盅，温服。

复诊：将药连服二十余剂（随时略有加减），饮食增多，身形健壮，诸病皆愈。惟月信犹未通，宜再注意通其月信。

处方：生水蛭一两，轧为细末 生怀山药半斤，轧为细末

每用山药末七钱，凉水调和煮作茶汤，加红蔗糖融化，令其适口，以之送服水蛭末六分，一日再服，当点心用之，久则月信必通。

效果：按方服过旬日，月信果能下，从此经血调和无病。

方解：按水蛭《神农本草经》原无炙用之文，而后世本草谓若不炙即用之，得水即活，殊为荒唐之言。尝试用此药，先用炙者无效，后改用生者，见效甚速。其性并不猛烈，惟稍有刺激性。屡服恐于胃不宜，用山药煮粥送服，此即《金匱》硝石矾石散送以大麦粥之义也。且山药饶有补益之力，又为寻常服食之品，以其粥送水蛭，既可防其开破伤正，且又善于调和胃腑也。

天津杨氏女，年十五岁，先患月闭，继又染温疹属急。

病因：自十四岁月信已通，后因肝气不舒，致月信半载不至，继又感发温疹，初见点即靨。

证候：初因月信久闭，已发热瘦弱，懒于饮食，恒倦卧终日不起。继受温疹，寒热往来，其寒时觉体热减轻，至热时，较从前之热增加数倍，又加以疹初见点即靨，其毒热内攻。心中烦躁怔忡，剧时精神昏愤，恒作谵语，舌苔白而中主已黄，毫无津液。大便数日未行，其脉觉寒时似近闭塞，觉热时又似洪大而重按不实，一息五至强。

诊断：此证因阴分亏损将成癆瘵，又兼外感内侵，病连少阳，是以寒热往来，又加以疹毒之热，不能外透而内攻，是以烦躁怔忡，神昏谵语，此乃内伤外感两剧之证也。宜用大剂滋其真阴，清其毒热，更佐以托疹透表之品当能奏效。

处方：生石膏一两，捣细 野台参三钱 玄参一两 生怀山药一两
大甘枸杞六钱 知母四钱 连翘三钱 蝉退二钱 茵陈二钱
僵蚕钱半 鲜芦根四钱

共煎汤三盅，分三次温饮下。嘱其服一剂热不退时，可即原方再服，若服至大便通下且微瘳时，即宜停药勿服。

复诊：将药煎服两剂，大热始退，不复寒热往来，疹未表出而心已不烦躁怔忡。知其毒由内消，当不变生他故。大便通下一次亦未见潜，再诊其脉已近和平，惟至数仍数，和其外感已愈十之八九，而真阴犹未复也。拟再滋补其真阴，培养其血脉，俾其真阴充足，血脉调和，月信自然通顺而不愆期矣。

处方：生怀山药一两 大甘枸杞一两 玄参五钱 地骨皮五钱
龙眼肉五钱 北沙参五钱 生杭芍三钱 生鸡内金钱半，黄色的捣
甘草二钱

共煎汤一大盅，温服。

三诊：将药连服四剂，饮食增加，精神较前振作，自觉诸病皆无，惟腹中间有疼时，此月信欲通而未能即通也。再诊其脉已和平四至矣。知方中凉药宜减，再少加活血化瘀之品。

处方：生怀山药一两 大甘枸杞一两 龙眼肉六钱 当归五钱
玄参三钱 地骨皮三钱 生杭芍三钱 生鸡内金钱半，黄色的捣
土鳖虫五个大者捣 甘草钱半 生姜三片

共煎汤一大盅，温服。

效果：此药连服十剂，腹已不疼，身形已渐胖壮，惟月信仍未至，俾停药静候。旬日后月信遂见，因将原方略为加减，再服数剂以善其后。

或问：方书治温疹之方，未见有用参者。开首之方原以治温疹为急务，即有内伤亦当从缓治之，而方中用野台参者其义何居？答曰：《伤寒论》用白虎汤之例，汗吐下后加人参，以其虚也；渴者加人参，以其气虚不能助津液上潮也。今此证当久病内亏之余，不但其血分虚损，其气分亦必虚损。若但知用白虎汤以清其热，不知加参以助之，而热转不清，而更有病转加剧之时观白虎加人参以山药代粳米汤后附载医案可知。此证之用人参，实欲其热之速退也。且此证疹腐之急，亦气分不足之故。用参助石膏以清外感之热，即借其力以托疹毒外出，更可借之以补从前之虚劳。是此方中之用参，诚

为内伤外感兼顾之要药也。

或问：凡病见寒热往来者，多系病兼少阳，是以治之者恒用柴胡以和解之。今方中未用柴胡，而寒热往来亦愈何也？答曰：柴胡虽能和解少阳，而其升提之力甚大。此证根本已虚，实不任柴胡之升提。方中茵陈其性凉而能散，最能宣通少阳之郁热，可为柴胡之代用品。实为少阳病兼虚者无尚之妙药也。况又有芦根亦少阳药，更可与之相助为理乎？此所以不用柴胡亦能愈其寒热往来也。

《医学衷中参西录》

陈莲舫

张。经阻不行，腕胀，舌剥，营亏气痹，治以和养。

西洋参 炒香附 佛手花 抱茯神 沙苑子 川石斛 淮小麦 银柴胡 广陈皮 绿萼梅 制丹参 川杜仲 生白芍 红月季

《莲舫秘旨》

邵兰荪

西庄俞。潮热不清，右脉涩，左关沉弦，大便忽泻，经停，腹中有痕，脐下痛较缓，气转至咽，舌微黄。宜清热、养胃、和肝。

银柴胡一钱 扁豆衣三钱 制香附三钱 乌药钱半 地骨皮三钱
茯苓四钱 杜仲三钱 绿萼梅钱半 青蒿梗钱半 丹参三钱
广木香七分

清煎五帖。

又：寒热较差，胃纳已和，右脉虚，左弦细，经停，腹中有痕，脐下偶痛。肝木抑郁，仍宜逍遥散加减。十一月初四日

柴胡八分 当归钱半 青木香五分 木蝴蝶四分 炒白芍钱半
制香附二钱 杜仲三钱 川楝子钱半 茯苓四钱 生地三钱
炒青皮八分

清煎，四帖。

史介生评：肝郁不畅，血气凝滞，以致脐下偶痛，而经停成癥，然大便作泻，又是肝阳侮脾之候。治以理气疏肝，健脾清热，而寒热较差，胃气稍和。次以泄肝热而解肝郁，逍遥散为对症之方，因其既和气血，又佐柴胡以微升，藉引少阳之生气。如是治疗，俾郁勃之气由此可以条畅。

安昌徐妇。膈气作吐，脉左沉弦，右弦滑，经停五月，舌薄白，根稍厚。此肝逆肺胃，宜厥阴阳明同治。五月十七日。

仙半夏钱半 炒谷芽四钱 新会皮钱半 藿梗二钱，吴茱五分拌炒
川连七分 苏梗钱半 绿萼梅钱半 猬皮一钱 川朴一钱
木蝴蝶四分 蔻壳钱半

清煎。

又：膈气较差，脘中稍和，脉两手切来弦滑，经停五月，舌根微黄。仍遵前法加减为妥。六月二十日

猬皮一钱 广藿香钱半 乌药钱半 川楝子钱半 苏梗钱半
蔻壳钱半 木蝴蝶四钱 绿萼梅钱半 钗斛三钱 炒谷芽四钱
新会皮钱半

清煎，三帖。

史介生评：肝郁气逆，胃液被劫，势成隔症，故以厥阴阳明同治。但脉滑经停而兼呕吐，虽属肝胃不和，似乎妊娠之象，且治法并未能经活血，惟用和胃理气，但案中未曾叙明孕育，鄙见难以臆断。然蔻壳劫津，究宜慎用。

《邵兰荪医案》

俞世球

绍兴王杰臣君夫人膏滋方医案。初诊：脉如悬丝，由本质虚寒。年前经来颇多，嗣渐短少，厥后则经年不至，且白带淋漓，其色或黄或白，当脐胀痛，两耳时鸣。肝无血养，肠液亦亏，致大便闭塞，数日

方解，解时胀痛。若徒伐肝，必伤其气，当为柔肝润肺并养心肝两脏之血，自然肺畅肝平。其呃逆亦由肝阳上升之见症。拟用逍遥散，以银柴胡易北柴胡，以茯神易茯苓，去白术，加龙骨、山药、松子仁、新会皮、更衣丸。

二诊，加肉苁蓉、沉香曲。三四诊，去更衣丸，加地骨皮、火麻仁、女贞子。五诊，加纹党参、西洋参（米合炒），又加牡蛎粉、粉丹皮、鸡头肉。即脉转大，大便逐日轮解，白带全止，胃口亦开，两耳不鸣，肝阳亦静，食人不胀。夜能睡，心不跳，神气太和。至夜亦不发，各症俱痊。此已拔出虚门矣。惟经尚未行，佐以益母胜金丹法，是为合方。若能宽怀静养，俾血足经自行，无不天降石麟，预贺预贺。

纹党参二两，去芦蜜炙 地骨皮一两，酒蒸 薏苡仁一两，炒
西洋参一两四钱，去芦米炒 白芍药一两五钱，酒炒
牡蛎粉一两五钱，煨，有左纹者佳 陈阿胶四两，蛤粉炒珠后入
净蚕沙一两，洗净 甘枸杞一两，勿见火 银柴胡九钱，醋炒
肉苁蓉一两五钱，酒洗四次 香附末六钱，姜酒醋制 当归身三两，酒浸
抱茯神一两，去木，展砂拌 粉甘草四钱，蜜炙 真龙骨一两二钱。酥
粉丹皮九钱 益母膏二两五钱，后入 女贞子一两九钱，盐水炒
大生地一两，酒洗 淮牛膝五钱，酒炒 鸡头肉一两，焙
茺蔚子一两，盐酒炒 大熟地八钱，砂仁末拌 紫丹参一两四钱，酒浸
广化红八钱，去白 於潜术四钱，蒸 淮山药二两，焙 川芎八钱，酒洗

以上依方炮制后再熬膏，其阿胶珠、益母膏，候各药将收膏时，再将二味合入，不必再熬。用磁罐收好，退火一二日。每早空心炖热，服下四钱。如经来停服，经净仍可服完。

《摘录经验医案》

王埏

里中钮某之妻，体素壮，忽患月事不至。始以为胎。久而腹痛，

又以为虚，补之益甚。留连数月，腹大如鼓，饮食不思，迎余治之。诊其脉，两关坚劲。问发渴乎？曰，前半日多渴，后半日方可。余曰，此胃热血结也。寻常必患胃热，发则胸膈如烧，甚则发咳，痰必稠。病者曰，良是。先以三黄四物汤破之，二服后下紫块十余，腹少减。又以两地地黄汤加山栀、连翘、通草，叠进之。逾月而潮至，然前后尚不齐也。命常服归芍地黄汤，数月后，如期血至，久而受孕矣。

妇人经闭一症，其因多端。而各有虚实之分。审其实而攻之，察其虚而补之。偶一不慎，致祸尤速。

友人王福友之妻，少以贫寒致痞疾，适王数年，面黄肌瘦，月事不至，至或淡少，久而腹痛增胀。延医视之，见其形症，皆以为虚，补之不应，而王固粗质，亦任之。半年腹大如鼓，见食辄吐，渐至不起，乃邀余治，诊其六脉坚大而迟，知为寒凝食积。问曰：胃中按之有坚块否？病者曰然。告曰，此自幼生冷风寒伤胃气，故其则增痛，且四肢发厥，盖虚人实证也。不温胃以散其结，则气凝而血必闭，无怪补之增剧。乃以五积散投之，两服而腹稍舒。又以香砂平胃散合乌药散并用之。有邻人素看医书，见方论曰，病属经闭，治当行血，乃用销食之剂，无乃非法。余曰，君自不信，看药后效验何如。王命其妻服之，越两日而下秽物，腹膈顿舒。又命常服香砂养胃丸，廿日余而月事至矣。

邻人请其故，告曰：人身之气血，相须而行。若置气而理血，断无效验。且人以胃气为主，乃一身生化之源，而胃经多气多血，气舒则血行；气结则血滞；气热则血凝；气寒则血少。前人调经诸方，理血无非理气也。今王某之妻，气为寒食凝滞，故血亦不行，非血本亏也。若用四物等类血药多凉性，转于胃气有碍而愈不行。今以祛寒销食之品投之，气温则行，食销则通。气行而通，血不通者，未之有也。闻者首肯再三，凡有疑，辄质问焉。

又邻人李寿昌之妻，年四十余，忽患经闭，其夫素务农，日用颇窘，兼无酒德，醉后辄加诟厉，妻久而郁结，遂成病。适夏间阴雨，李

忽踏泥而至。问何为？曰，家人病甚，拟请诊视，余问何病？则曰：经闭数月矣，此时腹中胀痛，饮食不下，人皆以为蛊。请一视之，果不可治，亦听之矣。问身体肿否？曰，不肿，乃曰，不肿则非蛊也。问痛多乎？胀多乎？对曰：痛有止时，胀则时时如此，几乎大便不利。余曰，此气滞碍血也，无须诊脉，但服药三四付，则病愈。李曰：不如一诊，较为稳当，余曰：此病显而易见，何在诊脉，尔无非愿病愈，但能病愈，何必诊也。乃处以《本事》琥珀散，命服四付。李持而去，余亦忘之。至中秋晚餐无事，余巡行田陇间，李忽携镰自禾黍中出而叩首，余惊问何故？对曰，内人服君药一服，即胸膈雷鸣下气而胀减，再服之，病全失矣。余以其病已愈，不必再服，至今月事不愆，饮食壮健，真仙方也。以农忙未得叩谢，兹遇君敢申意也。余笑而扶之起。说麻问稷，日暝而归。

相国之长媳，子禾之夫人也。性颇暴，而相国家法甚严，郁而腹胀，月事不至者两度，众以为孕，置而不问。且子禾未获嗣，转为服保胎药，则胀而增痛。一日子禾公退，偕与往视，诊其左关弦急，乃肝热郁血。以逍遥散合左金丸处之，子禾恐其是胎，疑不欲服，余曰，必非胎，若胎则两月何至如是，请放心服之。勿为成见所误。乃服二帖，腹减气顺，惟月事不至。继以加味乌药汤，两日而潮来，身爽然矣，至是每病必延余，虽婢仆乳媪染微恙，皆施治矣。

《醉花窗医案》

费承祖

佚名，营血久虚，肝阳上亢，销灼胃阴，胃失降令，胸脘不舒，内热口干，甚则头眩。居经不行，已三阅月，脉来沉弦而滑。治宜养血清肝，兼和胃气。

北沙参五钱 生甘草五分 云茯苓三钱 女贞子三钱
陈皮白五分 冬瓜子四钱 川贝母三钱 川石斛三钱 大麦冬二钱
钩藤钩一钱五分 生谷芽四钱 熟谷芽四钱

二诊：肝阳升腾之势渐平，胃气下降。内热口干，较前已减。惟呛咳头眩，卧难着右。居经不行，已三阅月。肺阴久虚，清肃无权。脉弦略退，细数未改。宜宗前法进治。

北沙参三钱 生白芍一钱五分 生甘草一钱五分 白茯苓四钱
生淮药三钱 黑料豆三钱 生杜仲三钱 川贝母三钱 川石斛三钱
陈皮白三钱 冬瓜子四钱 生谷芽四钱 炒谷芽四钱 莲子十粒

南京黄君仲贤之室，患呛咳气喘，内热汗多，时常咯血，精神萎顿，四肢软弱无力，行动需人扶持。居经不行，已经半载。予诊其脉细弱。此气液皆虚，阴血不注冲任，肝阳上灼肺阴，气失清肃，渐成干血癆症。治必滋阴养气液，兼清肝益肺。月事能通，方有转机。

吉林参须五分 西洋参一钱五分 女贞子三钱 生杜仲三钱
蛤蚧尾三分 白芍一钱半 川贝三钱 天花粉三钱 川石斛三钱
广皮白五分 毛燕翅包煎汤，三钱

连服十剂，经血即行。再照方加大生地二钱、麦冬三钱。咳嗽止而饮食增，内热清而精神振。不过月余全安。

《费绳甫医话医案》

吴鞠通

杨室女，二十一岁。经停一年，腹有症瘕，寒热往来，食少，肝阳郁勃下陷，木来克土。先与提少阳生发之气。

姜半夏五钱 桂枝三钱 全当归二钱 焦白芍三钱 青蒿一钱
白蔻仁二钱 生薏仁五钱 广皮二钱 黄芩炭二钱 煮三杯，分三次服。服三、四帖，而寒热尽退。

再与天台乌药散，每日早晚各服一钱；驱脏中之浊阴，即所以通下焦之阳气，不惟通下焦之阳，亦且大通胃阳，胃阳得开而健食，健食而生血，所谓受气谓谷气取汁取胃汁，变化而赤，是为血。此血也，心主之，脾统之，肝藏之，由脉下注冲脉，在男子上升于唇，生须髥，在女子下泄为经。故此方服二十余日，而瘕散经通矣。盖巴豆

多用则杀人，少用则和胃。此方中用巴豆之气，而不用其质，少之又少，既能祛下焦之浊阴，又能通胃中之真阳，以胃虽受浊而最恶浊，驱阴正所以护阳，通阳正所以驱浊，一笔文字，而两面俱醒，此其所以见效若神也。

《吴鞠通医案》

曹沧洲

某右。孕育之后，经居半年，肝气攻心，痛甚则厥，易于寒热火升，脉细弦，理之不易。

旋复花 丹参 当归 沉香片 瓦楞粉 五灵脂，醋焙 赤芍
川石斛 代赭石 延胡索，醋炒 川楝子 朱茯神
真水獭肝七分，研温酒调服

《吴门曹氏三代医验集》

丁泽周

宋右。恙由抑郁起见，情志不适，气阻血瘀，土受木克，胃乏生化，无血以下注冲任，经闭一载，纳少形瘦，临晚寒热，咳嗽痰沫甚多，脉象左虚弦，右濡涩，经所谓二阳之病发心脾，有不得隐曲，女子不月，其传为风消，再传为息贲，若加气促，则不治矣。姑拟逍遥合归脾、大黄廬虫丸，复方图治。

全当归三钱 大白芍二钱 银柴胡一钱 炒潞党二钱
米炒於术一钱五分 清炙草五分 炙远志一钱 紫丹参二钱
羌蔚子三钱 川贝母二钱 甜光杏三钱 北秫米包三钱

大黄廬虫丸一钱每日吞服，以经通为度

复诊：临晚寒热，虽则轻减，而咳嗽依然。经闭纳少，舌光无苔，脉左弦右涩，此血室干枯，木火刑金，脾胃生化无权。还须怡情适怀，以助药力。今拟培土生金，养血通经，然亦非旦夕所能图功者也。

蛤粉炒阿胶二钱 茯神三钱 淮山药三钱 川贝二钱
甜光杏三钱 紫丹参二钱 茺蔚子三钱 全当归三钱 怀牛膝二钱
广艾绒六分 西藏红花八分 北秫米包三钱 大黄廋虫丸吞服，一钱
《丁甘仁医案》

吴右。脐腹胀渐减，胸脘胀依然，屢屢作痛，食入难化，头晕目花，血亏肝气横逆，犯胃克脾，浊气凝聚，经闭四月，气不通则血不行也。恙根已深，非易图治，再宜养血泄肝，健运分消。

全当归二钱 炒赤白芍各钱半 紫丹参三钱 春砂壳八分
连皮苓四钱 陈广皮一钱 大腹皮二钱 茺蔚子三钱 瓜蒌皮三钱
薤白头一钱 仙半夏二钱 炒谷麦芽各三钱 陈葫芦瓢三钱
嫩钩钩后入三钱

徐右。类疟后脾胃两伤，无血以下注冲任，经闭三月，面色萎黄，屢屢头痛，脉象弦细，虑成干血癆重症。宜培养中土，以生营血。

炒党参二钱 云茯苓三钱 清炙草五分 全当归二钱
怀牛膝二钱 紫丹参二钱 广艾绒八分 绛通草八分 生于术二钱
大白芍二钱 茺蔚子二钱 藏红花八分 月季花八分

妇科八珍丸六两，每早服三钱，米饮汤送下。

葛右。产后冲任亏损，脾弱不运，经事六载不行，形瘦便溏，脉象弦细，舌苔白腻，已成干血癆重症。姑拟培养中土，而调冲任。

炒路党参一钱 熟附块八分 炮姜炭五分 清炙草四分
米炒于术二钱 云茯苓三钱 陈广皮一钱 大砂仁八分 范志曲三钱
炙栗壳三钱 紫丹参二钱 炒谷麦芽各三钱
灶心黄土四钱，荷叶包煎

二诊：腹痛便溏渐见轻减，形瘦纳少，经事六载不行，头眩神疲，脉象细弱，冲任亏损，脾胃不运，干血癆重症。再宜培养中土，而调奇经。

炒路党参钱半 熟附块八分 炮姜炭五分 清炙草四分
云茯苓三钱 米炒冬术二钱 炒怀药三钱 带壳砂仁八分

陈广皮一钱 炙栗壳三钱 紫丹参二钱 范志曲二钱 焦谷芽三钱
焦苡仁三钱 干荷叶一角

三诊：腹胀满，便溏泄，纳少形瘦，经闭六载，呕恶带血，脉象弦细，脾土败坏，肝木来侮，症脉参合，已入不治之条，勉方冀幸。

炒潞党参三钱 炮姜炭五分 怀山药三钱 米炒于术钱半
云茯苓三钱 炒谷芽三钱 带壳砂仁八分 炒苡仁三钱 陈广皮一钱
炙栗壳三钱 范志曲三钱 清炙草五分 乌梅炭五分 干荷叶一角
金匱肾气丸五钱，包煎

许右。咳嗽音声不扬，形瘦经闭，盗汗颧红，脉象细数，腑行滞薄，肺、脾、肾三阴俱亏，无血以下注冲任也。已成损怯，恐难完璧，仍宜培土生金，和营通经。

蛤粉炒阿胶二钱 左牡蛎四钱 花龙骨二钱 川象贝各二钱
怀山药三钱 云茯苓三钱 紫丹参二钱 羌蔚子三钱 米炒于术钱半
炮姜炭三分 诃子皮二钱 御米壳二钱 浮小麦四钱

王右。冲任亏损，肝胃不和，经闭五月，纳少泛恶，形瘦神疲，此干血癆症也。宜培养气血，和胃平肝。

潞党参二钱 云茯苓三钱 生白术二钱 陈广皮一钱
紫丹参二钱 炒谷芽各三钱 羌蔚子三钱 全当归二钱
大白芍二钱 佛手八分

妇科八珍丸三两，间日服三钱。

戴右。血虚脾弱，宿瘀留恋，经事数月不行，腹痛便溏，形瘦潮热，脉象弦细。势成干血癆之重症，姑拟扶土养血，祛瘀通经。

炒潞党参二钱 生白术三钱 云茯苓三钱 紫丹参二钱
炮姜炭五分 清炙草六分 羌蔚子三钱 煨木香八分 延胡索一钱
焦查炭三钱 杜红花八分 炒怀药三钱 干荷叶一角 红枣五枚

陈右。新寒引动厥气，经行中止，血为气滞，少腹作痛拒按，日晡寒热，稍有咳嗽，姑拟疏邪理气，祛瘀生新。

紫丹参二钱 炒赤芍二钱 金铃子二钱 延胡索一钱

云茯苓三钱 制香附钱半 春砂壳八分 生蒲黄包三钱 五灵脂钱半
绛通草八分 光杏仁三钱 象贝母三钱

青橘叶钱半，两头尖，酒浸包，钱半

二诊：少腹痛较减，腰脊酸痛，日晡寒热，稍有咳嗽，新寒外束，肝失疏泄，宿瘀交阻，不通则痛，再宜疏邪理气，祛瘀生新。

炒黑荆芥一钱 金铃子二钱 延胡索一钱 赤茯苓三钱
春砂壳八分 制香附钱半 紫丹参二钱 生蒲黄包三钱 五灵脂钱半
藏红花八分 光杏仁三钱 象贝母三钱 绛通草八分
两头尖酒浸包，钱半

刘右。头眩眼花，时轻时剧，经闭十月，内热口干。冲任亏损，肝阳易于升腾，姑宜养阴柔肝，和营通经。

阿胶珠二钱 生白芍二钱 熟女贞子三钱 左牡蛎四钱
川石斛三钱 黑芝麻三钱 朱茯神三钱 炒枣仁三钱 月季花八分
潼蒺藜三钱 紫丹参二钱 荒蔚子三钱 怀牛膝二钱

妇科八珍丸六两，每日服四钱。

章右。右胁下痞块渐消，经事两月不行，胸闷脘胀，肝胃不和。宿瘀留恋，再宜泄肝理气，和营通经。

全当归二钱 紫丹参二钱 金香附钱半 云茯苓三钱
荒蔚子三钱 广艾炭六分 藏红花八分 怀牛膝二钱 桃仁泥钱半
月季花八分 青橘叶钱半

王右。肝失疏泄，湿热宿瘀留恋下焦，膀胱宣化失司，少腹作痛，经阻二月，小溲不利。宜泄肝理气，滋肾通关。

银柴胡一钱 炒赤芍二钱 金铃子二钱 延胡索一钱
赤茯苓三钱 制香附钱半 春砂壳八分 细青皮一钱 荒蔚子三钱
紫丹参二钱 绛通草八分 炒谷麦芽各三钱 滋肾通关丸包三钱

《丁甘仁医案续编》

萧琢如

病者：族侄孀媳陈氏，年近四十岁。

病名：寒燥阴结。

原因：先患大便不利，医者予玉竹、麻仁、牛膝等药，驯至小溲难涩，久之月事亦不通，身微热，已五阅月，更数医，率用滋润破气及行血之品。一日雇舆至余馆所迎诊。

症候：大腹满胀，胸膈时痞时宽，饮食减少，困倦嗜卧。

诊断：脉沉迟而涩，舌苔湿滑而暗。心念疾木阴寒，今因误药，由气分而累及血分，气血交病，药当气血并治，方能有济。继悟气为血帅，气行则血行，毋庸多惹葛藤，倘气治而血不和，转方调血，正自易易。

疗法：单从气分斩关夺隘，疏方用大剂通脉四逆汤冷服，嘱其每日必服二剂，并用半硫丸二两，分作七日，每早食前淡姜汤送下，许以服完即愈而去。

处方：黑附块八钱 川干姜五钱 炙甘草三钱 清苈便两酒盅，冲

半硫丸方 半夏一两，汤洗七次，晒干，为细末 硫黄一两，明净好者，研令极细，用柳木槌子杵过

右以生姜自然汁同熬入于蒸饼末，搅和匀，入臼内杵数百下，丸如梧子大，每服十五丸至二十丸，无灰温酒或生姜汤任下，妇人醋汤下，俱空心服。

效果：嗣后不十日，遣丁来云，药完而疾愈，请善后方。即授通脉四逆加人参，令其守服十余剂。后余以他事至其家，云后方仅服十剂，即平复如常矣。族侄媳愈后，隔数日，即有邵阳周某妻，年才三十，病症大抵相同，但为日不多，药误亦少，势较轻，即上方减轻分量，授之而愈。厥后上症验案甚多，以无甚出入，不复赘云。

廉按：此案方法，与前案大同小异，惟用量较为轻减，其效力终在半硫。盖硫黄热而不燥，能疏利大肠，半夏辛下气，温开郁，三焦

通而大便自利矣。惟修制此丸，必须用倭硫黄。吴鞠通曰：硫黄有三种，土黄、水黄、石黄也。入药必须用产于石者，土黄土纹，水黄直丝，色皆滞暗而臭，惟石硫黄方棱石纹，而有宝光不臭，谓之黄矾，其形大势如矾，按硫黄感日之精，聚土之液，相结而成，生于艮土者佳，艮土者少土也，其色晶莹，其气清而毒小，生于坤土者恶，坤土者老土也，秽浊之所归也，其色板滞，其气浊而毒不堪入药，只可作火药用。石黄产于外洋，来自舶上，入莱菔内煮六时则毒去。观此，则石黄即析出毒质之纯硫黄，俗称松花硫黄，即日医所谓金硫黄也。

《全国名医验案类编》

陈在山

金妇三十，据说胀满不食，经不来行，延他医调治，用调经药治之，不效，问治于余。余曰：此脾胃虚寒所致，先以香砂六君子汤加三消饮二剂，病觉大愈，稍有心悸之症，再去三消，加四物、远志、枣仁、节蒲等药，一剂痊愈。

朱李氏，因去春产后，满月后经血即断，至秋又增吐血之症，觉两胁疼痛，今春咳嗽甚重，恶食烦渴，四肢无力，头眩目昏，六脉全虚，细弦少神，都缘血虚气不通畅之所至也，用调补兼施法。

香附 广皮 木香 当归 紫朴 甘草 皮苓 丹参 醋芍
橘红 杏仁 花粉 生地 寄奴 节蒲

第二方：白术 木香 醋柴 香附 当归 紫朴 丹参 醋芍
郁金 汾草 节蒲 茯神 薏苡 山药 泽兰

第三方：西参 茯神 贡术 木香 紫朴 香附 炙草 熟地
当归 酒芍 山药 枳壳 橘皮 薏米 灯心

第四方：茯神 远志 当归 白术 酒芍 芡实 薏米 山药
汾草 节蒲 枣仁 郁金 香附 丹参 广皮 大枣

第五方：西参 炙芪 茯神 枣仁 芡实 炙草 酒芍 熟

地 当归 白术 香附 薏米山药 广皮 紫朴 大枣

服以上数方，每用两剂，自觉诸症皆效，惟四肢虚软无力，余再酌拟丸药一料

人参 贡术 当归 酒芍 熟地 厚朴 茯神 枣仁 炙芪
炙草 山药 莲子 芡实 香附 木香 郁金 仁米 丹参
陈皮 共末，蜜丸、三钱重

张秀峰之内人，自说产后王月经不来行，忽然感受风寒，周身骨节酸痛，多饮少食，六脉沉缓，舌苔淡黄而厚，询其素有腿痛之疾，腹湿血寒等病，早已成矣。今可舍现在之外感，仍从旧症治之，先用温通法，拟服数剂，效后再议补血。

茅术 皮苓 泽兰 木香 缩砂 车前 厚朴 甘草 坤草
薏米 川断 香附 广皮 生姜

服前方，颇见功效，周身疼解，惟午后头项微觉疼痛，舌生红刺，此湿邪外散之故也，仍用前方加减进之。

西参 茅术 皮苓 甘草 川芎 香附 泽兰 坤草 薄荷
菊花 川断 生地 广皮 木香

又拟加减逍遥散，服数付，必获全愈。

当归 茯神 枣仁 焦术 薄荷 节蒲 菊花 汾草 丹参
川芎 青皮 柴胡 香附 醋芍 生地 灯心

《云深处医案》

邵杏泉

病后天癸不行，腹中膨胀，防成血鼓。

鸡金散 白芍 川断 丹参 归身 杜仲 泽兰 延胡索

《三折肱医案》

俞道生

叶女。经水停行，蕴蓄为患，内留于脾膀胱二肠之间，外滞于经

络肌表之分，败血尽变为水，泛滥妄行，肚腹胀大，呆滞，泛逆，病势之危已可概见矣。脉左细涩，右弦紧，舌苔黄腻，口燥而干，盖肝脾肾气血凝滞已甚，排泄之功用失常，津液不得上承也。考《金匱》肿胀一证，本有血分水分之分，则血行可知气亦病也，勉拟调气通瘀佐以行水之品，观其动静。

川桂枝 1.8 克 桃仁泥 9 克 制锦纹 9 克 制川朴 4.5 克
生蒲黄 4.5 克 五灵脂 9 克 炒泽兰 9 克 西麻黄 1.5 克
带皮苓 9 克 酒炒淮牛膝 6 克 炒归尾 9 克 炒车前 9 克
引真西珀末 1.2 克，冲服

复诊：经水停瘀为患，肿胀因之发生，两足亦然，按之坚急，盖血滞则气不通行，气阻则血化为水，内则充塞于脏腑膀胱，外则泛滥于肌腠经络也，按脉弦涩，弦为水饮之充盈，涩乃气血之凝注，舌苔黄腻而有灰影，水流湿，湿气上熏于胃，胃气不得下行，泛逆，纳呆是故也。昨进调气通瘀行水之剂，病情颇有效机，再宗原方进步。未识然否留候，请方家匡正。

西麻黄 1.5 克 酒炒东白芍 4.5 克 炒桃仁 9 克 炙廔虫 9 克
淡附子 4.5 克 川桂枝 2.1 克 炒泽兰 9 克 生蒲黄 4.5 克
元红花 4.5 克 炒归尾 9 克 酒炒淮牛膝 9 克 京三棱 2.4 克
引带壳砂仁 3 克，后入 炒车前 9 克

三诊：肿胀业经渐退，腹中气响甚喧，可知内蕴之气血得有流行之势，惟病情来势甚猛，非一朝一夕所能铲除尽净断根截株者也。营卫不和，微寒微热，脉左细软右弦大，舌苔仍黄腻，浊气上熏于胃，胃中亦未肃清，暖气纳呆，职此之由也。前方既妥，毋庸更张，依方进步再投，必得经水通行，庶几病根拔出，方保万全。

处方同前，除桂枝、蒲黄、红花、归尾、带壳砂仁、车前，加安桂丸 1.5 克（吞下）、小茴香 1.5 克同炒白归身 9 克、延胡索 4.5 克、茺蔚子 12 克、大川芎 4.5 克 云茯苓 12 克、桃仁（用酒炒）9 克。

《俞道生医案》

孔继炎

经曰：二阳之病发心脾，有不得隐曲，女子不月。夫不月者，经闭也。二阳者，阳明也，胃之经也。病起于胃，发于心脾，而经因以闭，可知病源不在血分。有识者于此，可以得师矣。姻戚李君某之室，病经闭发热，块结满腹，日服攻坚破块之药，病日以剧，饮食不进，形体肉削，殆将不起矣。予诊其脉，细涩无力，症系积血，无可疑者，幸脉来不数，犹尚可为。疏方用六君子合当归、芍药、红花、鳖甲、元胡、青皮与之，再进而饮食进。五剂而经血通，块减大半，余悉柔和。乃翁喜曰：此病治经数月，三棱、莪术、大黄不能动，君之方，吾以为无益也，何神如是？予曰：此非神。治法应尔，君自不察耳。夫人之气血，非坯然不动之物也。其留而为积，结而为块者，固经隧有阻碍之处，亦生息有不续之机。若使留者未结，生者已来，其冲激鼓荡，先有涣然冰消之势，安得如孟如拳，结聚满腹哉！然虽形症如此，亦非本来病势之自致，所以然者，积之始起，气滞而后血凝，及其久也，血凝而气腹散。以气本属阳，性复善动，不能凝然长伏也，是所积者，离气之死血耳。夫天下有死血满腹，而人不即死者乎？夫又用抱病之人，形神俱羸，犹能日生余血，渐盈渐结，充然腹者乎？必不然矣。吾以理断此症，又复参之于脉，以其细涩无力，知有积亦不多。所以坚大如此者，药致之耳。夫久闭之血积如瓦砾泥块然，非有新血滋润涤荡于其间，虽以正气领之亦不动，而欲以独行之药力劫之使下，必不得之数也。故大黄、莪术等物，频服未能破其血，余力先以伤其气。气为药逼，涣散无归，窜入积血之窟，复与败血相搏，则胶结固护，病乃石坚而铁硬，腹亦箕张而盆鼓矣。吾以活血理气之药，从容宣导，勿令气血再伤，而重借六君之中和，养其脾胃，胃气一复，饮食自进。由此而气有所生，血有所化，渐积渐充，渐通渐洽，而已结之滞气，自与正气相合，久积之死血，亦随新血以动。故攻之而愈坚者，夺其流通之源，其势逆也；导之而自下者，授

以领载之资，其机顺也。逆其势者难为力，顺其机者易为功，凡事皆然，病亦如是，何神之有哉！李君称善，复求诊视。乃于煎剂外，疏丸药一方，服未尽而病痊。次年，遂生子矣。

从妹适于郭，以病召予，适不获暇，阅月往视。问其病，曰：连月以来，头患发热，昼轻夜重，下身尤甚，腿足如蒸，左胁偏下有块，时觉腹胀，饮食减少，腰腿无力。诊其脉，不数不涩亦不和，右关微弦而劲。视所服方，则皆清热和血破滞之品。予曰：此非发热症，何为遽用此药？妹夫争曰：现在发热，何言非也？左胁有块，非积血而何？吾家以此病死者二人矣。予曰：君家死者，以不药死乎，抑用药不痊而后死乎？曰：用药多矣，皆以不痊死。予曰：用药不痊，君知其死于病乎，死于药乎？使病皆如此，而日用骨蒸虚劳之治，鲜有不死者矣。吾为君言其故。夫块有气积、血积、痰积、水积种种之不同，热有外感、内伤、阴虚、阳陷纷纷之各异。此症虽云有块，而脉来不涩，则不得指为血积矣。且血积之起，亦必有因，非经行不顺、经闭不通，则产后败血稽留之故。今吾妹产后年余无病，迩来方觉有块，其非败血可知。甥男方在食乳，冲任例不下通，其非经病可知，何所依据而必指块为血积乎？块非血积之块，热亦自非阴虚之热，其所以昼轻夜重者，脾胃有受伤之处，阳气下陷于阴中也。夫脾胃之脉弦而劲，此非肝气乘脾，即是寒邪伤胃。脾胃伤而饮食减，中焦失健运之权，而下陷之阳气，随阴气而同时并动，此所以过午则热，入夜尤热，而腿足下体之热亦复倍重于上身也。此症久而失治，自当转于阴虚发热之一途，目下犹系阳陷之热，阴分未为甚虚也。曰：左胁之块，究系何物？予曰：以脉覘之，则气病耳。脉来不和，气分未尝不郁，而又无停痰、积水、积血之脉，不属之气，则将何属，夫左为肝部，肝之气最不平者也，过怒则病，过燥则病，血不足以濡润则亦病。今脾胃受伤，饮食日减，气之输于上者少，血之生于心者亦少矣。血少则肝不濡，燥气内动，结为硬块，肝之难调，往往如是。今但温中和胃，少加理气之药以治之，可必效也。清热养阴之物，不宜

于虚寒之脾胃，用之何为？遂以补中益气汤，参用附子、桂心、芍药、白蔻、砂仁之属，增减调治，未及一月而瘳。

族剪桐公之女，予姊妹行也。病经闭发热，饮食不下，强进少许，亦苦不快，甚则噤醋吞酸，积有日也，肌肉因以大损。予时自滕赴曲阜，枉道过其居，为其兄病也。比至，族婶杜孺人呼令出见，并求诊视，为道其病甚详。问所服药，大都补益之品。予诊视之，见六脉沉细欲绝，而右关隐隐犹带涩结之象。予曰：此为停滞积食病也，正在胃中，非泻不可。杜孺人疑曰：积食病乎？何以发热？予曰：内伤饮食，本应发热，而此症之热，非但饮食伤也。以脉观之，久已病及阴分矣。夫胃中氤氲冲和之气，人之所以生也，气血津液，胥由此化。胃为食伤，本气先失其和，而饮食减少，谷精不继，又无以化气而生血，则血之亏有日矣。血亏则内无以养脏腑，中无以润筋脉，外无以溉皮肤，风消、息贲、索泽、急挛等症，往往由此而起。发热，其先见者也，其又何疑？曰：何以经闭？予曰：此亦血亏为之也。经虽应月有常，实皆妇女有余之血。故血之旺者，或一月而再经；血不足，或数月而一经，非病也，实有余不足之分耳。不足之极，而后发热，热盛伤阴，血愈不足，荣身且苦弗给，岂复更有余血溢于冲任，入于胞宫，而下注为经水乎？是其由来，亦胃伤食少之所致，标病也，非病之本。若系本病，则年来遏闭之经血，久以结为症瘕，而其热亦日增月盛，不知作何景象矣，容能至今日乎？杜孺人犹未释然。予曰：无疑也。由经病而发热，以致热盛经闭，而后渐不能食者，病在血分。由食少而经少，以致发热经闭，而益大不能食者，病在胃家。妹之病究属何先？曰：是也。其始心腹疼痛，不思饮食，厌厌数月，诸症乃作。由今思之，必有停滞。然病久矣，向来皆补，敢议泻乎？泻或不支，将奈何？予曰：向来皆补，何以至今犹病？可见补之失治也，何所惮而不敢泻？且补与泻亦顾其当否何如耳，原不拘乎病之久近。补不当而助热增滞，补反是泻。泻之当而邪退正复，泻即是补。故补而及于病者误矣，泻不及于病者失矣。吾观妹肌肉虽

不丰，而神色不败，行立如常，可以用泻，无庸疑者。若果泻而不支，再补抑又何妨？遂以枳、术、香砂、大黄、橘皮等攻消之药服之。一剂未泻，而胸膈顿宽，饮食大进矣。喜求再诊，脉亦顿起有神。连用数剂，泻下积滞一二升。视之，皆生李也，形色犹鲜，距食时已期年矣。自是，病遂如失，经亦自通。

姻妻王姓之女，出阁半载而经不至，发热食减，以为妊也。逾三月，经忽见，阅月复闭，热亦日盛，精神颓败。其母少寡，止此女，忧惧甚，求予诊视，并决病之吉凶。予视其脉，寸大而尺小，往来不畅，两手皆然，曰：此气病也，勿忧勿躁，心宽则病减矣。其母急问吉凶。予曰：无关生死，有何吉凶之可说。其母曰：发热经闭，妇女大症也。且日止一餐，餐止稀粥碗许，多则欲呕欲吐矣。倘病久不愈，可无恐乎？予曰：病有标本，难以皮相。凡此诸症，俱非本病，更有急于此者，君家特未知耳。其母惊问何病，予曰：其胸膈闷否、膈否？常苦烦热闷闷不清否？曰：是则然矣。予曰：是其所以病也。夫人身之气，虽升降出入，周流无间，然清常居上，浊常居下，有三焦以为之部署，有脏腑以为之管领，必不混乱杂揉，合为一处。故经曰：清气在下，则生飧泄；浊气在上，则生腹胀。清浊之不可倒置，犹高下之不可易位也。今脉来上天下小，而自关以上，浑然壅郁，则知下部浊阴之气，皆升腾而上填于胸膈矣。夫胸膈清阳之分，心肺之所居也。心为生血之主，肺为司气之官，浊阴填之，心肺俱病，则气之运者不运，而膈闷日亟；血这生者不生，而真阴日亏矣。此饮食不进，经闭发热诸症之所由来也。虽然，此时此症，虽勉强饮食，阴血日生，亦不免于经闭而发热。所以然者，血与气相附而不相离者也。气顺则血亦顺，气逆则血亦逆。以此症之气壅上膈，若使内有余血，非激而为吐为衄，则停而为症为结。吐衄则血从上逆，不复下注而为经。症结则血与气搏，益将郁闭而增热。故经闭发热之症，气病者，类皆不免。如此症之经闭发热，犹是血少阴亏之故，顺而常者也。其余诸症，更是标中之标，无足道者矣。匪气之急，而顾他症，此病何以能

愈？曰：由是言之，病本决在气分矣。顾气何以病，遂遽重如此？予曰：此则非予之所能知矣。以理论之，大约郁怒忧思之故。夫情之为病，于气者六，而莫甚于怒，其次则忧思。经曰：怒则气上，谓肝气应心，怒则肝之气上奔也。思则气结，谓脾气应心，思则脾之气内结也。脾气结则不能食，肝气上则胸胁胀，参之此症，合乎否乎？且夫小女子之性情，好为不平者也，亦多不知自爱，偶遇拂情之事，则蕴怒蓄憾，隐而不言；遭非义之忤，则积忿萦思，势不复解。甚且私叹其生命之不时，甚且自废其饮食，直至郁结已成，且臍且胀且烦闷，则亦知为切身之灾，然而饮食已真不能下，而经闭发热等症，无不丛起而并见矣。此予所得于阅历，亦习闻而习见者，非真以为此症之起，亦如是也。毋抑小同大异，微有相类者乎？其母熟知女病，因积怒废食而得，大以予言为神，恳求坐治。予用理气药，而仍以和胃健脾之药主之，一剂大效，十余剂，诸症全瘳。

予在王庸民家时，庸民之子妇病，以乃翁之病方剧，未遑理也。庸民病瘳，乃延诊。问何病？得自几时？症形若何？曰：因惊闭经，逾数月矣。日渐发热，饮食减少，头晕心跳，腰腿无力，予乃入诊。见腕肉充盛，而六脉沉弱，无数象。疑曰：此症不应脉弱，此脉不应发热，又形体甚充，不似有如此脉症之人，何也？岂脉为病瘤，病有别因乎？乃疏方用活血之药，少加大黄以开之。次日，晕不能起，脉更弱矣。予曰：此先天不足，脉症俱是真弱，不当从形体论，昨日大黄误也。乃用活血之药，加六君子为治，而参至一两，服四五剂，饮食健进，神气俱爽；七八剂，热止，诸症俱退。至十剂，经血大下，淋漓数日，病全瘳矣。乃伯某翁喜曰：吾素不信医药，据此翁媳二病，乃知草木根皮，真能起死。然此症之用参，何也？予曰：此症数月之前，因惊闭经，两月之前，复殇一男。经曰：惊则气乱，恐则气下，悲则气消。惊恐与悲哀交侵，而正气日耗，不能载血以行矣，此所以非参不可也。虽然，此亦确有可凭，使其脉少带数象，或微有滞机，猝投参、术，便属孟浪。吾前日见其腕肉充盛，曾疑脉症不真，乃用大

黄，而弱愈甚，乃知此症之弱，本乎先天，重以后因，固不当与他症同治也。盖凡内因发热之症，多属阴虚，而此症之发热，其虚不在阴，而在阳，迹其饮食减少，头晕心跳，腰腿无力，何尝不似阴阳两亏？然阴主形，阳主气，从古及今，未有血亏而肌肉不减者。此症形体充盛，则发热之故，断断不可归之阴虚，而又别无偏盛之邪阳，何者？无面赤、口干、腹胀、喘满之症，无浮数、洪大充盛有余之脉也。然则此症之热，不归之阳虚则无属矣。夫阳虚生外寒，阴虚生内热，阴阳之定理，轩岐之明训也。阳既虚矣，其现症宜皮寒、肢冷、多凉、少温，何得反而为热？不知天地之阴阳互根，人身之气血交资，血既不亏，气未有虚至已甚者，其所以虚者，因恐而乱，因惊而下，因悲而消，更或因思而结，乃至郁于血中，而运行之权不伸。夫人之一身，血主濡之，气主煦之者也。气郁而不能运，而其阳煦之本性，始戢戢乎蒸腾于肉腠，浮溢于肌表，而发热之症作矣。若使其气沛然充足，何至郁而不宣如此哉？因虚而郁，因郁而热，故此症之热，确乎以阳虚为断，本是而立治法，则所以清热，所以通经者，举不外是矣。盖他症之清热，先养其阴，此症之清热，先宣其阳；他症之通经，先利其气，此症之通经，未助其气。以经之闭，由于气滞，气之滞，本于不足也。然则此症虽有惊恐悲思之众因，而真气不足，得自本来，溯流穷源，止此昆仑一脉。吾借六君子之中和，大补脾胃中宫之阳，面芎、归以和其血，枳、橘以开其滞，参之晕、悸诸症无不合，衡之沉弱之脉恰相符，虽不必清热通经，而所以清热通经者，莫捷于此矣。此所以十剂而获全效也。若拘拘于参、术助热之见，而改用清凉则失之远矣，岂从脉断症、随症立治之理也哉？是症也，自后遂不药，越月，乃孕。孕后复病，胎病也，家人不察，以为经复闭，延医调治，恣用破块通经之药，卒坠其胎，男也，孕七月矣。胎下而命亦殒。牖民悔恨，以为未逢高手，遂受庸医之害。嗟乎！胎未三月，不现于脉，况此妇禀赋本弱，自受孕之后，即服通利之药，其胎形必不充，胎脉必不旺，迨至将坠未坠之时，料胎脉尽变为病脉，即高明遇之，亦难

辨其为胎，况庸庸者乎？然则业医者其慎哉！

胡俊亭女病，俊亭馆于外，不及内顾。乃翁鲁玉闻予在其邻舍，延往诊视。问系何病？曰：症瘕发热经闭，二年余矣。问饮食何如？曰：现苦腹胀，自胸迄小腹，两胁尤甚，饮食晨进少许，不能多也。过午必发热，热则呕吐痰水，连食俱出。问嗽乎？曰：嗽甚，呕因嗽起。问二便何如？曰：前曾大泻数日，今止矣，小便甚无多也。予偕姻亲赵君往视。既诊脉，谓赵君曰：此病有假，出议之。出谓鲁玉曰：令孙女病，非真症瘕也，必先有块，而后经闭。曰：然。腹中块积年余，然后经闭。问今腿足肿乎？曰：自足而上，迄胸腹皆肿。问头面肿乎？曰：目窠下微肿，余则否，然两颧皆红。问腹胀自几时？曰：久矣，日甚一日，以至于今，尚可治否？予曰：可治，然作症瘕发热治，不可也。因为案曰：此症发热、咳嗽，经闭有块，极似阴虚癆瘵症。然六脉不细不涩，沉数而滑，过指流利。夫滑非症瘕之脉，痰饮之脉也。且症瘕之起，必由于血气之阻留，血不阴，不能有积，积不久，不能成块。故经闭而后成积，积成而后块现。发热颧红，应有之症也，何有于肿胀？咳嗽、食减，应有之症也，何有于呕吐？即呕矣，呕食呕血，犹属应有，痰水自何而来？日日呕痰呕水，何得如许之多？由此参之，即无滑脉，此症亦当别观，况明明有滑脉可据乎？经曰：腹满腹胀，支膈胀胁，下厥上冒，过在足太阴、阳明。故知此症本始于停饮，饮停不去，则熏蒸而为痰，痰饮日盛，与气相搏，旧者坚结内着，新者散布四出，于是外溢皮肤而为肿，内阻血隧而经闭，此先有块面后经闭之由也。然则此症也，痰饮为本，经闭为标。发热，经闭所致也；咳嗽，热所熏也；颧红，热所蒸也，皆标病也。呕吐，痰饮上溢也；胸腹胀痛，痰饮多而不能容也；其呕必于过午者，痰饮阴邪，故时交阴分，随阴气而冲激内动，又其出由于胃，故必俟阳明用事之时也，皆本病也。《金匱》论妇女之病，有水分，有血分。此病因痰饮而闭经，正属水分，故当先祛痰饮，痰饮一减，腹胀自除，呕吐自止，饮食亦自进，此目下之效也。俟痰饮全消，隧道无阻，经将

不药而自通。设或不通，再用清热之药，鲜不愈矣。病有标本，治有先后，谓不可与寻常发热症同治者，此也。案出，鲁玉疑未决。予曰：愚见如此，亦不敢必以为是，不立方可也。赵君力赞，乃请方。既见重用大黄，又疑不决。予曰：无妨。今晚一服，当下痰水数次。明日，胀臌减，呕吐止，饮食进，发热亦轻，此所谓目前之效，可旋至而立见也。次日，果然。欲再服，予曰：法当攻补互用，但此症形气不甚弱，无需乎补，补反增热，间日一用可也。及再用，而予适北旋，越二十日，再往前处，问其症，已大重矣。盖更方用养阴药，助湿生痰故也。再请往视，淳辞不得已，复与调理，复前效，而已止药不用矣。噫！主病者本不在意，予故为之谆谆辨症，多乎哉？

《孔氏医案》

贺季衡

姜女。经期落后已久，甚则二、三月一行，出阁之后，更入阅月不行，腹中既不胀痛，又无痞硬，饮食如恒，形体日丰，脉弦滑，舌苔白腻。一派痰阻气运，冲脉不行之象。于生育最有关系。亟为化痰理气、和血调经。

当归二钱 大丹参二钱 生香附一钱五分 法半夏一钱五分
乌贼骨四钱炙 块苓四钱 大白芍二钱 延胡索一钱五分
淮牛膝一钱五分 橘皮络各一钱 川郁金二钱 降香片八分

李女。经居五年，不时腹痛，必悬，内热，腕仄，头眩，不时恶寒，脉弦细，舌光。血虚气滞，营卫不和。先以调畅为事，非血瘀经闭者比也。

当归二钱 大丹参一钱五分 大生地五钱，红花五分拌炒
金香附一钱五分 大白芍二钱 白蒺藜四钱 大川芎八分 云神四钱
女贞子三钱 粉丹皮一钱五分 金橘皮三个 红枣三个

焦女。经居六年，每值春秋两委，前阴必肿痛，不得移动，自溃流血及黑污而后退，内热腕痞，舌质光绛，脉弦滑。肝阳挟湿热下注

冲海而来，此症诚少见之候。拟龙胆泻肝法。

龙胆草二钱 细木通一钱五分 淮牛膝一钱五分 当归二钱
柴胡梢八分 泽泻一钱五分 川楝子一钱五分 生甘草八分
粉丹皮一钱五分 中生地五钱 赤苓四钱 藕二两

二诊：进龙胆泻肝汤，前阴肿痛及流脓血虽减，而发时反勤，二便不利。据述经居六年，每年必发数次。结瘀积湿，久结下焦，冲脉不通，假此而泄也。症属仅见。

生军五钱，后入 中生地六钱 当归二钱 淮牛膝一钱五分
桃仁二钱，并 黑山栀二钱 延胡索一钱五分 赤芍二钱
川楝子一钱五分 赤苓四钱 粉丹皮一钱五分。

王女。经居年半，腹大有形，状如怀子，不时攻痛，溲后沥浊，咽梗呕吐，头昏眩晕，脉滑，舌苔腐腻。湿痰气瘀，互结不化之候。速效难求。

当归二钱 金香附二钱 青陈皮各一钱 延胡索二钱
大白芍二钱，吴萸三分拌炒 大丹参二钱 乌贼骨四钱炙 云苓三钱
川郁金二钱 炮姜八分 陈艾绒八分 佛手八分

改方：加白蒺藜四钱。

另：菩提丸二十粒，每服五粒，开水下。

二诊：药后下利痰浊颇多，经居年半遂通，腹大如怀子已十去其六，溲后沥浊亦少，惟腹痛不已，咽梗或呕吐，脉弦滑，舌苔腐腻。气瘀初化，肝胃未和之候。

当归二钱 大丹参二钱 青陈皮各一钱 金香附二钱
白蒺藜四钱 黑山栀二钱 姜半夏一钱五分 乌贼骨四钱炙
大白芍二钱，吴萸五分拌炒 云神四钱 冬瓜子四钱 佛手八分

另：二陈丸、四物丸各二两，和匀，每服三钱，开水下。

李女。始而停经六月，即猝然崩血甚多，既止后，又年余不行，腹大有形，状如怀子，按之痞硬，脉沉数，舌苔黄腻满布。湿热窜入血分可知，非血枯经闭可比。

当归二钱 大丹参二钱 川郁金二钱 中生地五钱，红花五分合炒
炒茅术一钱五分 小青皮一钱 赤苓四钱 大白芍二钱 桃仁泥二钱
马鞭草一钱五分

另：菩提丸二十四粒，每服六粒，开水下。

黄女。经居年余，并无腹痛结痞等患，惟食少或作胀，右腿麻痹，足底火燎。痰多难出，或眩晕，夜分多梦，脉沉滑，舌苔腐腻。此痰热阻络，荣卫无以流行，际此秋令，不宜增咳。

当归二钱 大丹参二钱 大白芍二钱 粉丹皮二钱 云神四钱
净橘络八分 淮牛膝一钱五分 荒蔚子三钱 藏红花五分
刺蒺藜四钱 月季花七朵 红枣三个

顾女。去冬丧失所天，怨哀郁结，气血凝滞不行，经居半载有余，右少腹结痞，日以益大，按之痛，甚则攻窜呕吐，寒热头痛，脉弦细，舌黄。气郁化火，柔调为先。

当归二钱 大白芍二钱 左金丸八分 川郁金二钱
金香附一钱五分 大丹参二钱 川楝子二钱，醋炒 延胡索一钱五分
小青皮一钱，醋炒 旋覆花一钱五分，包 刺蒺藜四钱 佛手花八分

另：八味逍遥丸二两，四制香附丸一两，和匀。每服三钱，开水下。

周女。年已三十有三，水源一经未通，而每月必腹痛，腹左痞硬，食少作恶，或吐痰水，脉弦细，舌白。荣卫不调，斯为得天地之偏者，收效不易。

当归二钱 大丹参二钱 炮姜五分 上肉桂五分
大白芍二钱，吴茱五分拌炒 金香附一钱五分 醋炒青皮一钱
姜半夏一钱五分 旋覆花一钱五分，包 刺蒺藜四钱 佛手八分
红枣三个

另：四制香附丸三两，每服三钱，开水下。

二诊：年已三十有三，地道一经未通，而每月必腹痛者数年，少腹痞硬，脘闷作恶，口碎，舌白转黄，脉弦数。冲带不通，斯得天地之

偏者。刻下当疏肝和胃，以调荣卫。

左金丸八分 大白芍二钱 当归二钱 大丹参二钱 白蒺藜四钱
细青皮一钱 五灵脂三钱，醋炒 川楝子一钱五分，醋炒 云苓三钱
延胡索一钱五分 月季花四朵

《贺季衡医案》

张山雷

王右。阴虚潮热，延经半年，骨节烦疼，汛阻已久，脉弦且数，舌根黄腻。姑先和营活血。

生延胡 6克 制半夏 4.5克 当归尾 4.5克 制香附 6克
西赤芍 4.5克 地骨皮 6克 川断肉 6克 炒杜仲 6克
广藿梗 4.5克 茺蔚子 9克 炒川柏 4.5克 大丹参 6克
广郁金 4.5克 生鳖甲 15克 生牡蛎 18克，两物先煎

二诊：阴虚潮热，汛事久稽，天柱萎奥，骨酸疲惫，脉细，而沉则弦搏，舌亦不腻，昨授和营退热，稍知一二，法宜踵步，不易近功。

苏木屑 4.5克 当归尾 4.5克 生延胡 6克 地骨皮 6克
大元地 6克 砂仁末 1.2克，同打 山萸肉 6克 川断 9克
桂枝 1.2克，同炒 大白芍 9克 生鳖甲 12克 台乌药 4.5克
广郁金 4.5克 四花青皮 4.5克 生鸡内金 4.5克 生牡蛎 6克

三诊：阴虚潮热，经事久居，两拟和荣，其势稍减，脉弦，舌润色正，带脉不固。再以固摄养阴。

砂仁末 1.2克，同打 大元地 9克 广藿梗 4.5克 生鸡金 4.5克
地骨皮 6克 甘杞子 4.5克 生延胡 9克 制女贞 9克
旱莲草 6克 大白芍 6克 生山萸肉 6克 生紫草 9克 生鳖甲 12克
生牡蛎 12克，二物先煎

四诊：阴液久虚，信事久阻，带脉不摄，脉小涩。前授和营摄纳，未始不应，舌尚不腻，且能引饮，近因灸法，夜热弥加，所谓火气虽微，内攻有力。阴虚得此，其效见矣！姑再滋潜，请质明哲。

大白芍 6克 山萸肉 9克 生延胡 6克 苏方木 6克
 生鸡内金 6克 青蒿子 4.5克 银柴胡 4.5克 地骨皮 6克
 菟藟子 9克 熟女贞 12克 旱莲草 9克 台乌药 4.5克
 另生苍龙齿 6克 生打牡蛎 24克 生鳖甲 15克,三棱先煎

周右。向已居经及期,今又四月不行,时见泛恶而脉则两尺甚弱。仍是真阴不足于下,肝胆气浮于上,舌色尚和,姑再潜阳纳气。

大白芍 4.5克 宋半夏 6克 炒竹茹 4.5克 旋复花 9克
 四花青皮 4.5克 制香附 6克 炒杜仲 9克 乌梅肉炭 2枚
 金毛狗脊去毛,6克 潼蒺藜 9克 玫瑰花 6克

二诊:居经四月余,腰脊有胀坠之势,漾漾泛恶,心中懊恼,脉两尺极细,无非阴虚阳浮,未可攻破。舌色皓白,屡授涵阳和阴,尚属相安,姑仍踵步。

大白芍 4.5克 炒萸肉 4.5克 制半夏 4.5克 广郁金 4.5克
 姜竹茹 4.5克 炒杜仲 6克 淡吴萸 14粒,同炒 川黄连 0.6克
 炮姜炭 1.2克 金毛狗脊 6克 甘杞子 6克 生延胡 4.5克
 菟藟子 9克

《张山雷专辑》

魏长春

许妇,年二十一岁。三月二十三日诊。

病名:虚寒经停带下。

原因:体寒宫冷,风寒内袭。

证候:少腹气下注,带多腰酸,腹痛畏寒,经停四十余日。

诊断:脉迟软,舌淡红。子宫寒冷证也。盖肺感寒则流涕,肠受寒则下利,子宫受寒则流带,同一病理。惟所受之地不同,故所发之病亦异也。

疗法:温暖子宫。

处方:西归身三钱 炒白芍三钱 川芎一钱 阳春砂五分

白术三钱 香附三钱 杜仲三钱 芡实三钱 吴茱萸五分 艾叶一钱

次诊：三月廿七日。腹痛止，畏寒罢，脉软缓，舌淡红，苔薄黄。下元不足，带下未断，用温养子宫法。

次方：西归身三钱 生白芍三钱 川芎一钱 大生地四钱
阳春砂五分，冲 杜仲三钱 川断三钱 陈皮一钱 木瓜一钱
制首乌三钱 艾叶一钱

三诊：四月二日。脉软，舌淡，脘酸带下，虚寒之证，再进温养。

三方：西归身三钱 川芎二钱 大熟地八钱 白芍三钱
阳春砂五分，冲 杜仲三钱 艾叶一钱 白术三钱 炙甘草一钱
吴茱萸一钱 阿胶三钱

龙骨四钱 淡附子一钱

效果：服药后，经水通调，胃强带止。

炳按：子宫寒，带下经断，用紫石英八钱、鹿角霜三钱、醋炒艾叶六分、菟丝子三钱、丹参二钱、炒白芍三钱、海螵蛸三钱、阳春砂二颗、炒臭椿皮三钱、炒杜仲三钱，服三四帖，带止，经来，病自愈。

魏庆增之妻俞氏，年约三十余岁。九月三日诊。

病名：停经似孕。

原因：经停十月，腹大微胀，病者自拟为孕，初则惮于服药，嗣因时届足月，绝无分娩之象。始悟为病，乃进城求治。

证候：经停十月，腹大微胀，按之坚硬，起居如常。

诊断：脉象沉弦，舌红。证系寒气夹瘀经闭，非妊娠也。

疗法：宗仲景法，用桂枝茯苓丸作汤。

处方：桂枝一钱 生白芍四钱 桃仁三钱 丹皮三钱 茯苓四钱

次诊：九月十七日。服桂枝茯苓丸方三剂，经行五日颇多，腹胀逐消。脉弦滑，舌红。用湿暖子宫法。

次方：当归三钱 白芍三钱 川芎三钱 香附三钱 茯神四钱
艾叶一钱 小茴香二钱 大生地三钱 淮牛膝三钱 桃仁三钱
杜红花三钱 吴茱萸三钱

效果：服后身健，嗣后经水调畅。

炳按：停经腹胀，当通瘀活血以行经，得经水畅行，瘀滞尽去，胀无不退矣。

《慈溪魏氏验案类编初集》

沈绍九

某妇，年三十余岁，平时月经正常，因肝气抑郁引起经闭，随即吐血，吐血后胃痛甚剧，舌苔薄白而润，脉象沉弦。治以调肝解郁温胃之剂。方用：丹参、当归、砂仁、炒白芍、黑豆、薄荷、柴胡、广陈皮、甘草、煨生姜。

此人因肝气抑郁气血不调，导致经闭，胃为多气、多血之腑，肝病及胃，发生吐血，故以逍遥散加减，调肝解郁为主，并兼治阳明，不必急于止血通经。以丹参、归、芍和血，薄荷、柴胡舒肝解郁，广陈皮、砂仁、煨生姜温胃，而去白术之守补。

再诊：胃痛减轻，吐血亦止。原方去砂仁加蔻壳，又服数剂，月经来潮，吐血胃痛皆愈。

《沈绍九医话》

曹颖甫

王女士初诊：经停九月，咳呛四月，屡医未效。按诊脉象虚数，舌苔薄腻，每日上午盗汗淋漓，头晕，心悸，胸闷，胁痛，腹痛喜按，食少喜呕，夜寐不安，咳则并多涎沫。证延已久，自属缠绵。拟先治其盗汗，得效再议。

川桂枝一钱 大白芍二钱 生甘草八分 生姜一片 红枣四枚
粽子糖四枚 全当归二钱 花龙骨四钱，先煎 煨牡蛎四钱，先煎

二诊：三进轻剂当归建中汤加龙骨牡蛎，盗汗已除十之三四，腹痛大减，恶风已罢，胸中舒适，脉数由百四十次减为百二十次，由起伏不定转为调匀有序，大便较畅，咳嗽亦较稀，头晕心悸略瘳。前

方尚合，惟量究嫌轻。今加重与之，俟盗汗悉除，续谋通经。

炙黄耆三钱 川桂枝钱半 肉桂心二分 炙甘草钱半
大白芍三钱 全当归四钱 生姜二片 红枣八枚 粽子糖六枚
龙骨六钱，先煎 牡蛎八钱，先煎

《经方实验录》

陈筱宝

何立三太太，形体壮实而经停三月，某医投破血行经药不应，反觉腹中胀满，就诊于先君，视其面色，枯索无泽，问其生活情况，知其操劳过甚，诊脉细弱无力，认为积劳内损，虽外形壮硕，所谓外强中干之质，不宜峻攻，以损元气，改以香草汤（香附子、益母草、鸡血藤、当归、泽兰叶、大川芎、柏子仁、红糖）投之。服三剂后，腹部胀满得除；再服三剂，月经遂行。

陈桂春太太，病伤寒之后，越半年而经水不至，手足烦热，肌肤枯索。一日经忽来临不多而有瘀块，医者以为必有停瘀，方用桃仁、红花、当归等药，五六剂后，经水仍不至，见胸腹胀满，认定瘀不下，更加京三棱、蓬莪术，病者遂见潮热、心悸、不寐等等。先君诊之，谓此犯虚虚之戒，化源告竭，恣意通利之法，无怪病日增重。乃予回天大补膏（人参、茯苓、当归、白芍、生熟地、陈阿胶、知母、红花、山药、玄参、丹皮、龟板胶、牛羊乳、人乳、柿霜、梨汁、天门冬、银柴胡、鳖甲胶、八制香附），嘱每日进服。二月后诸恙渐瘳，三月后经行正常，病全愈。

谢毓英小姐，年届标梅，经停三月，日渐尪羸，手足掌心烦热，胃纳衰败，心悸失眠。医者咸认为劳损已成，议用补益。先君诊视，目眶熏黑；抚其肌肤，枯索而燥。告之曰：“凡少女正如好花初放，面容必有光彩，肌肤亦必润泽。今色泽适得其反，此即《金匱》所谓肌肤甲错，两目黯黑之征。是正气内伤，血瘀凝积，宜缓中补虚，和血

化痰。”以四物汤合乌鳊骨丸投之。二月后经行，病渐向愈。

《近代中医流派经验选集》

周镇

孙某之室，小渲。丙辰五月停经，至秋中，腹痛，面白无华。脉细濡，苔白。初就南城孙诊，指为损症。时已不食不饥，服药未应，来诊。脉果细沉，苔白，面白无泽，俨似虚怯。惟询有气忿，否则流涕。直认细沉之脉是气闭之由，气滞则血亦滞，经阻不为无因。知乳子二岁。食少乳不足。因嘱旷怀勿戚，不致成千血劳。初拟苏梗、半夏、厚朴花、茯苓、金铃子、玄胡、香附、乌药、沉香曲、扁豆衣、麦芽、合欢皮、橘叶络、鸡内金。三剂，知饥，稍进食，腹痛减，脉稍振。原方加減，胃已大馨，续拟全当归、川芎、丹参、赤白芍、红花、桃仁、玄胡、金铃子、炙乳香、没药、苏噜子、路路通、郁金、鸡血藤。腹痛大定，经仍不汛，前方增损为丸，嘱其日服。至九月中，经果通行。

荣女，大孙巷。丙辰九月，经停数月，宿有吐血，咳嗽痰多，脉右大不敛，舌红。经血不循常度。肺有蕴热，常年鼻塞，亦属一征。宜静摄，忌五辛。疏叭杏、象贝母、山梔仁、紫菀、郁金、白归身、赤芍、抚芎、香附、青蛤散、泽兰、荒蔚子、玄胡。一剂经行，乃与射干、瓜蒌、苍耳子、枫果、郁金、甜杏、香附、乌药、荒蔚子、金铃子、玄胡等。咳与鼻塞均得平减，续予调理而安。

杨妇，己卯十二月四日诊：经阻四月，腹痛，攻撑，胃口不馨，左脉现弦数。肝火化气留阻，宜为疏达。柴胡六分，全当归三钱，丹皮二钱，白芍三钱，香附三钱，乌药三钱，甘松一钱，娑罗子五钱，旋复花三钱，代赭四钱，苏梗子二钱，郁金三钱，玄胡三钱，陈香橪三钱，鸡内金五钱。左金丸八分，开水下。三剂，经即通行。

许成衣，西里人。其女十八岁，甲寅二月停经，延至七月中旬，其父来延诊。余审系久病，非一二剂可已，即嘱来诊。其现恙寒热不扬，咳嗽腹痛，便溏食少。察其面色淡白带青，毫无红色，脉濡，苔

白。是血虚经停，伏邪身热，不节荤膩，旁证悉起。其父谆谆以攻积血为嘱。乃晓之曰：“近病热咳便溏，似有损症之象，实系血亏，徒粹糠粃无益。且不察其发蛻乎！鬓发已秃，其血已涸，发名血余，其义自见。然现证如是，亦非可急顾血虚而以四物膩滑等相授。”爰拟银胡、黑山栀、青蒿、茯苓、象川贝母、金沸草、枇杷叶、范志曲、扁豆花、车前子、楂炭、乌药、银花炭等。数剂，寒热、咳嗽、便溏渐减。伏热既祛，续予健脾醒胃，并理气滞，以裕生化气血之源，如冬白术、黄精、云苓、玉竹、扁豆、范志曲、生谷芽、远志、木香、白芍、红枣等。胃纳渐旺，数剂全馨，面转红活。又欲通经，且告或传藏红花等法。余谓血不甚余，毋早通经。仍宜治其生化之源，如日食童鸡，亦一法也。渠遂恪从食疗法。腊底春初，授以复方：琼玉膏、益母膏，溶入阿胶、鸡血藤膏，而以当归、红花煎汤冲服，以为补方。直至乙卯春月，经事始自然通行。

《周小农医案》

方公溥

王女。居经二月，头眩，呕逆，胸闷，纳呆，伤寒初愈，余邪未清微有寒热，先拟清理化湿，养血调经。

鲜藿香 9克 赤茯苓 9克 制半夏 6克 生白芍 9克
新会皮 4.5克 香青蒿 9克 粉丹皮 6克 川黄柏 6克 焦山栀 9克
春柴胡 4.5克 盐水洗白当归 9克 六一散 12克，包

复诊：寒热已清，少腹酸坠，经行不畅，有瘀块，脉弦数，舌苔薄黄，再进清经凉血。

炒延胡 9克 制香附 9克 粉丹皮 4.5克 赤茯苓 9克
白芍药 9克 地骨皮 9克 盐黄柏 6克 大生地 9克 炒栀子 9克
香青蒿 9克 盐水洗白当归 9克

三诊：月事渐净，少腹酸坠渐平，腰部酸楚，再从前法出入。

处方同前，除延胡、栀子、加淮牛膝 9克、桑寄生 9克、厚杜仲

9克。

四诊：天癸已净，腰腹酸坠亦平，头脑微见眩晕，再与平肝潜阳。

白芍药 9克 杭菊花 9克 生甘草 3克 石决明 12克，打
川天麻 9克 嫩勾尖 9克 炒天虫 9克 冬桑叶 9克 炒白芍药 9克
大生地 9克 生牡蛎 12克，打 云茯神 9克

五诊：投以平肝潜阳之剂，头昏眩晕好转，而头脑作胀，药既应手，再从前议出入。

处方同前，除桑叶、天虫、加制川芎 4.5克、制香附 9克。

六诊：诸恙渐平，精神亦好，再与调理之方。

处方同前，除川芎、加霜桑叶 9克

《方公博医案》

陆正斋

祝某某，女，30岁。

一诊：婚后八年未育，体丰、胸闷，咳嗽多痰，纳谷不香，带下频频，苔腻。痰湿素盛，胞宫受阻。

冬瓜子 10克 莱菔子 10克 白芥子炒 10克 苏子梗各 6克
光杏仁 10克 法半夏 6克 化橘红 6克 粉甘草 3克

二诊：咳嗽减，痰未净，经仍未通，时腹胀。

原方加：川厚朴 6克 泽兰 6克

三诊：诸恙减，经未至，少腹隐痛。

原方减杏仁，加：香附 6克 菟藟子 6克

四诊：昨月经至，量少色淡，夹有紫块，腹部冷痛，方转温通。

当归 10克 香附 6克 姜半夏 6克 陈皮 6克 小茴香 2克
川桂枝 3克 菟藟子 10克 焦山楂 10克 陈艾叶 二片

王某某，女，19岁。

停经半载，时有低热，咳嗽、痰中带血，体瘦神倦，慎防成癆。

前胡水炙,5克 当归 4.5克 白薇 6克 杏仁 6克 炒山栀 6克
丹皮 6克 广橘红络各 6克 炙甘草 1.5克 藕节洗,4克
慈菇芽洗拍,5克

《陆正斋医疗经验》

孔伯华

吴女,七月十八日。情怀怏郁已久,冲任两脉不相和,讯事愆期,近又数月不至,形体渐瘦,腹中满胀,食少,两颧较赤,足肢微有浮肿,周行之气血不通已久,络脉阻塞,血海渐涸,干血之象已露,幸未延误,脉沉弦而细,姑拟逐瘀生新之法以图之。

生鳖甲三钱,先煎 地骨皮三钱 生麦芽四钱 炒黑丑七分
炒白丑七分 川郁金四钱 鸡血藤五钱 生川牛膝四钱 大腹绒二钱
桃仁泥三钱 炒粉丹皮三钱 焦栀子三钱 生海蛤两,先煎
生珍珠母两半,研先煎 醋制香附二钱 汉防己四钱 元胡三钱
煨广木香七分 旋覆花钱五分,布包 代赭石二钱
落水沉香五分,研细粉分两次随汤药冲服

大黄廑虫丸一粒(煎入药内)二剂

二诊:七月二十二日。前方药服后,瘀象较为松动,但经道未通,天癸尚不能复,日来腹中微有潮热,体惫之象较前好转,脉象较数,再以前方稍加清润之品。原方去防己、桃仁,加酒当归四钱、真川芎钱、粉甘草钱、冬葵子三钱。二剂。

三诊:七月二十五日。太冲脉渐充,络脉闭塞之象骤通,是以经水畅至,腹中顿畅,谷化之机亦渐开,纳食颇香,腹胀仍未消除,阴液正气被伤日久,再进滋养之品。

生鳖甲三钱,先煎 金毛狗脊三钱 杭芍药三钱 山萸肉二钱
杜仲炭二钱 生左牡蛎五钱,布包先煎 天冬二钱 麦冬二钱
大熟地四钱 桑寄生六钱 全当归三钱 云茯苓三钱 地骨皮三钱
炒粉丹皮二钱 大腹绒二钱 甘草一钱 白术钱五分 桃仁泥三钱

大枣三枚 三剂

李女，三月二十三日。经闭十四月未通，服药未效，近有膨胀意，口渴喜饮，兼有鼻衄，又不似逆行势，腰腿痛楚颇剧，脉弦涩而实，姑予重剂通经。

石决明两，生研先煎 生鳖甲五钱，先煎 生石膏六钱，研先煎
元胡四钱 川牛膝四钱 旋覆花四钱，布包 生赭石五钱 大腹绒二钱
北细辛钱五分 川郁金四钱 桑寄生两 威灵仙四钱 制乳香二钱
制没药二钱 杏仁泥三钱 桃仁泥三钱 鸡内金四钱 生黄柏三钱
生知母三钱

水煎兑无灰黄酒一杯

落水沉香五分(研细末分二次冲)

大黄廋虫丸一粒(分二次化)

二诊：三月二十五日。一剂药后，血遂攻破而潮，腹中骤爽，据云血色淡，黑块壅下，伴白色粘质，脉候实象已退，尺位仍弦，予丸方周治。

按原方量加一倍，去黄酒，廋虫丸改为五粒，同研细末，炼蜜为丸，早晚各服二钱，以稻豆五钱煎汤分送。

邱女，八月十八日。阴分不足，肝家失养，湿乘虚入，夜不能寐，经月四阅月未下，周身麻痹，气机也为湿郁而胸脘阻痛，脉弦滑而数，当滋阴化湿，以交心肾，兼调气机。

生牡蛎四钱，布包先煎 莲子心一钱 旋覆花钱五分，布包
代赭石钱五分 大腹绒钱五分 桑寄生五钱 杭芍药三钱
台乌药三钱 竹茹四钱 首乌藤一两 磁朱丸三钱，布包先煎
丝瓜络一钱 稻豆衣六钱，布包煎 鲜藕一两 车前子三钱，布包煎
合欢花四钱 玫瑰花二钱 二剂

二诊：八月二十一日

晋服前方药，证象略转，第阴分久亏，肝家失养，故气逆阻痛尚不能止，周身麻痹较轻，气血虚滞尚未畅调，闭经无动意，再依前方

稍事增减。

生牡蛎五钱，布包先煎 鸡血藤五钱 生鳖甲三钱，先煎
杭芍药四钱 台乌药三钱 大腹绒钱五分 威灵仙三钱
磁朱丸三钱，布包 川楝子四钱 血余炭钱五分 杜仲炭二钱
旋覆花二钱，布包 代赭石二钱 六曲三钱 煨肉豆蔻钱五分
厚朴七分 生甘草五分 炒枳壳二钱 桑寄生八钱 鲜藕一两 二剂

程女，五月初八日。血因气结，肝湿亦盛，经停四月，腹部胀痛，兼有痞块拒按，大便滑下，日晡口渴，气机不畅，舌苔白腻，脉弦滑而数，治宜通经化瘀，兼利湿调气之品。

生海蛤两，布包先煎 生鳖甲钱五分，先煎 石决明两，生研先煎
川牛膝四钱 鸡血藤四钱 花蕊石四钱 代赭石三钱 生橘核四钱
旋覆花三钱，布包 川草薢五钱 炒黑丑一钱 炒白丑一钱
台乌药三钱 桃仁泥二钱 生知母三钱 小川连一钱 干廙虫二枚
焦麦芽三钱 焦稻芽三钱

兑黄酒一杯随汤药冲服。二剂。

二诊：五月十一日。服药后腹部胀痛减轻，午后发烧亦不似前盛，精神好转，带下颇多，腰肢及小腹有酸楚下坠之感，取脉弦实，瘀血渐活动，再宗原方加减以逐之。

原方加广木得香七分（煨）、大腹绒钱五分、红鸡冠花三钱、白鸡冠花三钱，二剂。

三诊：五月十四日，瘀血已下，量颇多，而腹部仍未舒畅，腿肢酸软无力，湿热已下移矣，饮纳二便皆正常，脉弦而有力，气分仍未和也，再变通前方治之。

石决明两，生研先煎 川楝子四钱，打 醋炒小麦皮三钱
全当归三钱 桑寄生六钱 鸡血藤五钱 煨广木香七分 大腹皮二钱
焦谷芽四钱 焦稻芽四钱 炒黑丑二钱 炒白丑二钱 小木通四钱
生橘核四钱 台乌药三钱 焦栀子四钱 川牛膝四钱
生滑石块五钱 桃仁泥三钱 焦槟榔钱五分 旋覆花三钱，布包

代赭石四钱 川芎钱五分 落水沉香四分，研细粉分两次冲
犀黄丸一钱，研细粉二次冲服 二剂

四诊：五月十七日。腹中痞块已消，按之甚平软，胀痛已止，血下减少；仍挟血带，多透明质粘；舌苔白薄，脉弦滑有力，余皆正常，再进调中滋益之品。

生牡蛎五钱，布包先煎 云茯苓四钱 生鳖甲钱五分 陈皮一钱
珍珠母两半，生研先煎 全当归四钱 桑寄生五钱 台党参七分
法半夏二钱 土炒白芍钱五分 乌药三钱 川萆薢四钱 益智仁三钱
代赭石二钱 制香附二钱 旋覆花钱半，布包 地黄二钱
何首乌三钱 炒焦稻芽四钱

《孔伯华医集》

章成之

李女。经闭一年有半，形质不消瘦而丰腴，当攻之。

全当归 12 克 泽兰叶 12 克 益母草 12 克 生茜草 12 克
蓬莪术 9 克 土牛膝 12 克 京三棱 9 克 两头尖 12 克，包
海南片 9 克 黑丑 9 克 大黄廬虫丸 12 克，分二次吞

二诊：经闭既无虚劳嫌疑，前方重其制。

全当归 15 克 土牛膝 12 克 大川芎 9 克 丹皮 12 克
蓬莪术 12 克 制黑丑 9 克 王不留行 9 克 紫丹参 12 克
抵当丸 9 克

朱女。室女之停经：一、由于内分泌障碍；二、营养不如所需；三、神经系之变化。而第三者为最普遍，《内经》所谓“二阳之病”。

当归 12 克 云苓 9 克 白术 15 克 薄荷 6 克，后下 白芍 9 克
柴胡 9 克 生姜二片 甘草 3 克

大黄廬虫丸 12 克，分二次吞服

二诊：室女停经，萎黄病、子宫结核、内分泌障碍病，皆可从望、切两诊得之；惟神经系之变化，则少迹象可寻。

生白术 9 克 黄芪 9 克 茯神 9 克 酸枣仁 9 克 广木香 2.4 克
潞党参 9 克 当归 9 克 远志 3 克 龙眼肉 9 克 粉甘草 3 克
生姜二片 枣四枚

陈女。室女停经，多能引起胃障碍，古人用平胃散通经，即是此理。

春柴胡 6 克 陈皮 6 克 官桂皮 6 克 制香附 9 克 小青皮 6 克
生艾叶 4.5 克 淡吴萸 4.5 克 薤白头 9 克 小茴香 6 克
台乌药 6 克

另：平胃丸 60 克，分十次吞服。

刘女。连续三次流产。此番经停四旬余，带下频，孕之与否，不能肯定。但头目晕眩。不能支持，四肢麻，胸次窒闷不得息。经西医诊断为心脏病。以其脉之表现，确实不误。心脏病者，如怀孕，确有危险。

当归 9 克 制香附 9 克 怀牛膝 12 克 紫丹参 9 克
粉甘草 4.5 克 川芎 9 克 吴茱萸 4.5 克 赤白芍各 9 克 藏红花 6 克

二诊：四药而经见，但头目为之眩晕。心脏患者，原忌猛攻；不攻之，又难达通经之目的。

当归 9 克 淮牛膝 15 克 萸肉 9 克 肉桂 0.9 克 制首乌 12 克
党参 12 克 杜仲 9 克 泽兰 9 克 桃仁 15 克 藏红花 9 克
炙甘草 3 克

三诊：经虽见，其色为桃红而质粘，但淋漓不得充分排泄。以其两脉之不鼓指，虽见腹胀，仍忌猛攻。

当归 15 克 黑丑 6 克 山萸肉 9 克 熟地 15 克 炮附块 6 克
炙甘草 1.5 克 香附 9 克 三棱 9 克 巴戟 9 克 川芎 9 克
炮姜炭 4.5 克

钱女。季春流产后，血大下如崩，曾经晕厥，虽未濒于危殆，以此血液亏耗，难以恢复。夏天经曾一见，迄于今兹。征以面容之惨淡，心之动悸，攻是无益。

全当归 9克 阿胶珠 15克 枸杞子 9克 潞党参 12克
山萸肉 9克 熟地黄 18克 旱莲草 9克 抱木神 12克
谷麦芽各 9克

另：两仪膏 24克，每服一匙，日二次，开水冲服。

陆女。冲为血海，任主胞胎。经事久闭，冲任失职也。以汤剂调治之。

当归 9克 金毛脊 9克 大川芎 6克 巴戟天 9克 菟丝子 9克
杜仲 9克 淮牛膝 12克 川续断 9克 肉桂末 3克，分二次吞
吴茱萸 4.5克 炮姜炭 3克 炙草 4.5克

吴女。舌中抽剥，无胃病便是营养不良；头之眩，经之停，倦怠无力，良有以也。

黄芪 15克 党参 15克 当归 9克 熟地 12克 杭白芍 9克
天麻 6克 沙苑 12克 菟丝子 12克 稻豆衣 15克

《章次公医案》

张汝伟

姚崇英(女)，年三十五，南汇，住龙华陆家堰六十号。肝郁气滞，湿热中阻，营血凝聚，经停四月，少腹结块作痛，腰脊腿足酸楚。脉弦细而濡，此瘀癖之渐，初起宜疏肝流气，通瘀止痛治之。

北柴胡 龙胆草各一钱 炒赤芍二钱 炒归尾 细生地 粉革
藕 制香附各三钱 川楝子 炒延胡 佩泽兰 炙乳没各钱半

二诊：进龙胆泻肝合四物加味法后，经事微来点滴，大便下出如涕，小溲则短少而黄，少腹结块作痛略减，再与通瘀止痛，柔肝泻热法治之。

粉归须三钱，炒 小茴香一钱，炒 延胡索二钱，打 广木香五分，打
细生地 藏红花 单桃仁各三钱 细柴胡一钱 赤白芍各二钱
佩泽兰各钱半 制乳没各钱半 更衣丸一钱，吞

三诊：连进数剂，经事有欲行之势，少腹之块，化如弓弦状，上

升至胁，下注至腿，时痛时止，但偏于左，右面不痛。此肝气入络，积瘀成块，犹之男子的疝。前法已经见效，兹进一步，经通即愈，块亦自消化于无形也。

醋炒柴胡 川楝子各钱半 荔枝核 川草薢 威灵仙 桑寄生 生熟香附 炒赤芍 羌蔚子 当归须各三钱 小茴香一钱 酒独活二钱 娑婆子三钱 白螺蛳壳三钱

本证始末：此证，月经素不准确，上次患倒经，经伟治愈后，经停四月，受气后发生此证。服第三方后，经事畅行，瘀块消散而愈。

方义说明：女子之病，不离乎肝，三方用药，亦不离乎肝。上行下掣，知有消散之可能。倘用手术，亦无何物之可割。方药之义，不再一一写出，审证之法，已尽见于案语之中。

《临症一得》

叶熙春

盛，女，二十岁。七月。东岳。室女经停三月未转，少腹冷痛，四肢不暖，脉来紧细。寒客胞宫，冲任失调，治当温通奇经。

紫石英 12 克 桂心 1.8 克，研粉，饭丸，吞 三角胡麻 9 克
桃仁 6 克 当归尾 6 克 红花 5 克 酒炒白芍 8 克 卷柏 9 克
四制香附 6 克 川芎 5 克 炙地鳖虫 12 克 泽兰 9 克
盐水炒牛膝 9 克

二诊：前方服后，腹痛减轻，脉见弦滑。寒气得温而散，瘀滞有下达之渐。仍守原法出入。

紫石英 12 克 桃仁 9 克 三角胡麻 9 克 卷柏 9 克
酒炒蓬术 8 克 泽兰 9 克 酒炒川牛膝 9 克 制香附 6 克
路路通 9 克

三诊：经泛已转，色量亦属正常。再拟调经继之。

炙当归 9 克 川芎 5 克 炒白芍 12 克 泽兰 6 克 杜红花 5 克
路路通 9 克 制香附 6 克 酒炒牛膝 9 克 益母草 9 克

汤，女，三十二岁。五月，上海。情志抑郁，肝失疏泄，经停年余，饮食日减，头晕目眩，腰楚跗软，脘腹而且痛，脉来细涩，舌苔白薄。气机失调，冲任不和，治拟疏肝调经。

炒娑罗子 9克 制玄胡 6克 三角胡麻 9克 炙当归 9克
炒小茴 2.4克，包 炒川芎 5克 杭白芍 8克 泽兰 9克
炒金铃子 9克 酒炒丹参 9克 决明子 12克 四制香附 5克
青陈皮 各5克

二诊：前方服后，脘腹痛减，纳食见增，而头目晕眩如故，腰酸虽减未除，脉细苔薄。仍守原法出入。

沙娑罗子 9克 炙当归 9克 三角胡麻 9克 制玄胡 6克
酒炒丹参 12克 炙川芎 5克 制牛膝 9克 炒赤芍 9克
四制香附 6克 泽兰 6克 青陈皮 各5克

三诊：前方连续服十剂后，脘腹之痛已止，月经昨日已临，但量少色淡，脉转缓滑。再拟养血调经。

炒当归 9克 酒炒丹参 12克 炙川芎 5克 炒赤芍 9克
泽兰 6克 炒小茴香 2.4克 制川断 9克 炒娑罗子 9克
制续断 9克 四制香附 8克 煅石决明 12克 炒川楝子 9克

《叶熙春专辑》

施今墨

褚某某，女，30岁。既往月经基本正常，无任何特殊症状，去夏以来，发现月经延期，量少，且开始周身不适，食欲减退，腰腿酸楚，去年九月量后一次经行之后，至今十个月迄未再来，但无发烧，咳嗽、消瘦等现象。近来则感头晕，腰酸不思饮食，经仍不至而求诊。舌苔白而微腻，脉象弦涩。

辨证立法：经云：“月事不以时者，责之冲任。”冲为血海，隶于阳明，阳明属胃，饮食入胃，游溢精气而化为血；营出中焦，中焦失其变化功能，所生之血日少，上既不能奉生于心脾，下又无以泽冲

任，是以经血无从而来。经谓：“二阳之病发心脾”，拟以和胃健脾，养血通经之法。

处 方：川杜仲 10 克 生熟地各 6 克，砂仁 5 克同捣
杭白芍 10 克，柴胡 5 克同炒 川续断 10 克 沙蒺藜 10 克 白蒺藜 10 克
酒川芎 5 克 苦丁茶 5 克 鹿角胶 6 克，另溶兑服 野於术 6 克
酒当归 10 克 金狗脊 12 克 酒丹参 10 克 绿萼梅 6 克
谷麦芽各 10 克 炙甘草 3 克

二诊：服药三剂，诸症如前，原意疏方继服。

处方：全当归 10 钱 左金丸 6 克，布包 生熟地各 6 克，砂仁 5 克同捣
旋复花 3 克，真新蜂 5 克同布包 酒丹参 10 克 酒川芎 5 克
鹿角胶 6 克，另溶兑服 阿胶珠 10 克 野於术 6 克 谷麦芽各 10 克
赤白芍 10 克，柴胡 5 克同炒 羌蔚子 6 克 绿萼梅 6 克 广陈皮 6 克
淮牛夕 10 克 炙甘草 3 克

上药囑服六剂，并于每晚临睡时服玉液金丹 1 丸，共服十五天。

三诊：患者照囑服完汤药六剂丸药十五天，四日前，月经来潮，量不多，色黑，脉象转趋流利尚带弦意，再本原方加减。

处方：沙蒺藜 10 克 桑寄生 12 克 白蒺藜 10 克 桑寄生 12 克
细辛 1.5 克，砂仁 5 克同打 生熟地各 6 克 赤芍 6 克 酒当归 10 克
柴胡 3 克，桂枝 3 克同炒 白芍 6 克 油松节 10 克 酒川芎 5 克
蕲艾叶 5 克 阿胶珠 5 克 山楂炭 10 克 炙草节 6 克
旋复花 6 克，新蜂 6 克同布包 鸡血藤 15 克

四诊：上次经行五天而止，三诊处方共服四剂，月事再延两月又来一次，血量仍少，四天而止，食欲已好，困倦酸楚之感大减，脉象沉而有力，恙延已久，拟服丸药，益气生血，以使阳生阴长。

处方：酒丹参 30 克 粉丹皮 30 克 泽兰叶 30 克 茜草根 30 克
益母草 120 克，酒洗 羌蔚子 30 克，酒炒 南红花 30 克 沙苑子 30 克
金毛脊 30 克 功劳叶 30 克 酒当归 30 克 生熟地各 30 克，酒炒

白蒺藜 30 克 酒川芎 30 克 酒川军 30 克 鹿角霜 30 克
炒枳实 30 克 野於术 30 克 海沉香 15 克 春砂仁 15 克
炙甘草 30 克

上药共为细末，加炼蜜，为小丸，每日早晚各服 10 克，白开水送服。

谢某某，女，22 岁。月经一年未至，日形消瘦，精神疲惫，读书过目即忘。下腹坠痛、腰酸、微有白带，形体瘦弱，面色滞晦。舌质暗红，六脉沉涩。

辨证立法：六脉沉涩，舌质暗红，闭经将近一年，是有瘀血之象。但形体瘦弱，不宜峻攻，拟先活血通经，后再调养，使气血充盈，月事即可以时而下。

处方：两头尖 10 克 凌霄花 6 克 茜草根 6 克 茺蔚子 6 克，酒炒
酒元胡 6 克 酒当归 6 克 酒川芎 5 克 酒丹参 15 克 祁艾叶 5 克
炙甘草 3 克

二诊：服药四剂，在第二剂时即稍见红，以后则下黑紫色血，且有块，下腹坠痛及腰酸均见好。

处方：每日早晚各服八宝坤顺丸 1 丸。连服一个月。

张某某，女，23 岁。平素行经错后，本年初因家事不顺，心情郁郁，由二月至今五个月经水未来，腰背疼痛，食少，头晕，日渐消瘦，睡眠及二便尚属正常。舌苔薄白质暗，六脉沉涩而细。

辨证立法：情志不舒，气滞血瘀，月经五月未至，应以舒肝活血法治之。

处方：柴胡 5 克 砂仁 5 克 玫瑰花 5 克 赤白芍各 6 克
生熟地各 6 克 厚朴花 5 克 益母草 12 克，酒洗 酒川芎 5 克
酒当归 10 克 佛手花 6 克 佩兰叶 10 克 炒丹皮 6 克 月季花 6 克
泽兰叶 10 克 炒丹参 6 克 白蒺藜 10 克 沙蒺藜 10 克
炙甘草 3 克

二诊：服药四剂，腰背疼痛减轻，食欲好转，惟月经仍未来。

前方加桂枝 3 克，细辛 1.5 克再服四剂。

三诊：前方服四剂，月经已见，量少色暗，少腹坠痛，拟用丸方调理。

处方：每日早服八宝坤顺丸 1 丸，晚服玉液金丹 1 丸。

《施今墨临床经验集》

崩漏

汪石山

一妇，年逾四十，形色苍紫，忽病血崩。医者或用凉血，或用止涩，俱罔效。诊基六脉皆沉，濡而缓，按之无力。以脉论之，乃气病，非血病也，当用甘温之剂，健脾理胃，庶几胃气上腾，血循经络，无复崩矣。遂用补中益气汤，多加参、芪，兼服参苓白术散，崩果愈。

一妇身瘦面黄。旧有白带，产后忧劳，经水不止五旬余，间或带下，心前热，上身麻（气不运），下身冷，背心胀，口鼻干，额角冷，小便频而多，大便溏而少，食则呕吐，素厌肉味，以书来问。汪曰：虽未见脉，详其所示，多属脾胃不足。令服四君子汤加黄芩、陈皮、神曲、当归身，二贴，红止白减，继服十余剂，诸症悉除。

《名医类案》

江汝洁

叶廷杰之内，十月病，眼若合即麻痹，甚至不敢睡，屡易医，渐成崩疾。江诊得左手三部举之略弦，按之略大而无力的，右手三部举按俱大而无力的。经曰：血虚脉大如葱管。又曰：大而无力的为血虚。又曰：诸弦为饮。又曰：弦为劳。据脉观症，盖由气血俱虚，以致气不周运而成麻痹，时医不悟而作火治，药用寒凉过多；损伤脾胃，阳气失陷而成骨矣。以岁运言之，今岁天冲主运（少角东宫震位，乃天冲司也，九星分野之名），风木在泉；两木符合。木盛而脾土受亏，是以土陷而行

秋冬之令；以时候言之，小雪至大雪之末（冬至小寒），六十日有奇，太阳寒水主令（少阴君火），厥阴风木客气加临其上，木火胜矣。《经》曰：甚则胜而不复也。其脾大虚，安得血不大下乎？且脾裹血，脾虚则血不归经而妄下矣。法当大补脾经为先，次宜补气祛湿，可得渐愈矣。以人参三钱，黄芪二钱，甘草四分，防风、荆芥、白术各一钱，陈皮八分，水煎食远服，一剂分作三服，不数剂而安。

《名医类案》

薛己

一妇人，久患血崩，肢体消瘦，饮食到口但闻腥臊，口出清液，强食少许，腹中作胀，此血枯之症，肺肝脾胃亏损之患。用八珍汤、乌贼鱼骨圆，兼服两月而经行，百余剂而康宁如旧矣。

一妇人而黄或赤，时觉腰间或脐下作痛，四肢困倦，烦热不安，其经若行，先发寒热，两肋如束，其血如崩。此脾胃亏损，元气下陷与相火湿热所致（元气下陷，人间有知之者，相火湿热知之者寡矣）。用补中益气加防风、芍药、炒黑黄柏，间以归脾汤，调补化源，血自归经矣。

一妇年五十岁，辛丑患崩，诸药罔效。壬寅八月，身热肢痛，头晕涕出，吐痰少食，众作火治，转炽绝粒，数日淹淹伏枕，仅存呼吸。薛诊之，谓脾胃虚寒，用八味丸料一剂，使急煎服，然胃虚久，始下咽，翌早遂索粥数匙。再剂，食倍热减痛止，兼服八味丸良愈。

归大化之内，患月事不期，崩血昏愦，发热不寐（虚极）。或谓血热妄行，投以寒剂，益甚；或谓胎成受伤，投以止血，亦不效，乃延薛诊之。曰：此脾虚气弱，无以统摄故耳，法当补脾，面血自止矣。用补中益气加炮姜，不数剂而效。惟终夜少睡惊悸，另服八味汤，更不效，复叩诸先生，曰杂矣，乃与归脾汤加炮姜以补心脾，遂如初。

西园公，不知何郡人，曾治一妇人，年六十二岁，患血崩不止。经黄连解毒汤四贴，后服凉膈散合四物六贴，即愈。此妇因悲哀太过则心闷急，肺布叶举而上焦不通（妙论），热气在中，血走面崩，故

效。

《名医类案》

江纂南

一妇，血崩两月余，服诸寒凉止血之药，不效，且痰喘。乃以人参、黄芪各五钱，防风、麦冬各一钱，更加荆余穗、升麻、五味、附子（投附子人所难），一服喘崩减半，二服减十之八，继以豁痰调经之剂，治之愈。

《名医类案》

江应宿

昆山顾氏，年四十余，患崩漏两月余，形瘦唇白。诊得气口紧实，乃食伤太阴中焦郁阻滞而然，化食行滞乃愈。

龚水部宜人，的四十余，患崩漏，泄泻发热，头痛，盗汗自汗，倦怠羸瘦，已逾二年，医药无功，逆予诊视。六脉浮滑弦数，重按割然无力，此气血俱虚，元气下陷，脾虚不能摄血归源，内虚寒而外假热。投补中益气，人参三钱，黄芪五钱（蜜炙），加炮姜、蔓荆子、川芎、蒲黄、阿胶数剂，汗与头痛俱止，五十余剂良愈。

《名医类案》

薛立齐

一妇人性急每怒，非太阳。耳、项、喉、齿、胸、乳作痛，则胸满吞酸，吐泻少食，经行不止，此皆肝火之症。肝自病则外症见，土受克则内症作。先以四物加白术、茯苓、柴胡、炒梔、炒龙胆，清肺养血，次用四君加柴胡、白芍、神曲、吴茱萸、炒黄连，以培土制肝，渐愈。惟月经不止，是血分有热，脾气尚虚，以逍遥散倍用白术、茯苓、陈皮、又以补中益气加酒芍，兼服而安。

一妇人怀抱不舒，腹胀少寐，饮食素少，痰涎上涌，月经频数。

薛曰：脾统血而主涎，此郁闷伤脾，不能摄血归源耳。用补中益气、济生归脾而愈。

一妇人血崩兼心痛三年矣，诸药不应。每痛甚，虚症悉具，而色痿黄。薛曰：心主血，盖由去血过多，心无所养，以致作痛，宜用十全大补汤，参术倍之，三十余剂稍愈，百余剂全愈。

大尹王天成之内久患崩，自服四物凉血之剂，或作或辍，因怒发热，其血不止，服前药不应，乃主降火，更加胁腹大痛，手足俱冷。薛曰：此脾胃虚寒所致，先用附子理中汤，体热痛止。又用济生归脾、补中益气二汤，崩血顿愈。若泥痛无补法，则误矣。

锦衣杨永兴之内患血崩，过服寒凉之剂，其症益甚，更加肚腹闷痞，饮食不入，发热烦躁，脉洪大而虚。薛曰：此脾经气血虚而发躁也。当急用八珍汤加炮姜以温补之，缓则不救。不信，仍服止血降火之剂，虚症蜂起，始信其言，缓不及治矣。

一妇人因怒崩血久不已，而青黄而或赤，此肝木制脾土而血虚，用小柴胡合四物清肝火生肝血。又用归脾、补中二汤，益脾气生肝血而瘥。此症若因肝经风热而血不宁者，防风为丸，以兼症之药煎送；或肝经火动而血不宁者，炒条苓为丸，以兼症之药煎送；若瘀血为患，用五灵脂为末，烧钱器焯酒调服，无不效者。

周晖内人病血山崩，诸医皆危之。刘春斋用当归一两、荆芥一两、酒一钟、水一钟煎服，立止如神。

《续名医类案》

易思兰

一妇患崩，昼夜十余次，每次去血升许，用止血药愈甚，卧床月余，羸瘦食少，而青爪黑，气促痰喘，诊之心脉平和，肝脉弦大时一结，肺脉沉而大且有力，脾胃脉沉涩，两尺沉而无力。曰：此气郁病也。询之果因午餐小婢忤意，发怒构疾。随以四神散与之，服药半盂，未及一时，顿觉神爽。易曰：未也，明日子时分，指甲变桃红色，

方可救。至期甲色果红，复诊之左三部如前，肺脉微起，脾胃虽沉缓而不涩，二尺仍旧，谓其家曰：午时血当大崩，毋得惊惶，以骇病者。至期果然下紫黑血块数枚，自此遂止。后用杜真五和丸，调理月余全愈。次年生子，方用四神散，以香附行气为君，乌药为臣，苏梗通十二经之关窍，白芷化腐血生新血为佐。加当归引气入心而生新血，川芎引气入肝，舒肝之郁而去旧纳新，神曲引气入脾，畅脾结而统新血，白术健脾胃而和中气为使。以行气为主，活血辅之，此治血先调气之法也。

《续名医类案》

吴平先

俞氏妇血淋廿载，已成痼疾。因幼孙出痘危险，忽下血两昼夜不止，汗泻交作，晕数次（思虑恐惧，三阴并伤也）。脉向弦大而革者，忽变而数疾欲脱，奄奄一息。用人参、黄耆各一两，制附、炮姜、枣仁各三钱，五味、龙骨各一钱。或疑附子太热，且谓何不用血药？曰：血脱补气，古人精义，谓有形之血不能速生，几微之气所当急固。又脾胃气血，俱喜热而恶寒，姜附宜服也。二剂脉渐转，前方加归芍等血药，症已除。然脉气不弦，非三年调摄未易复也。自后参耆不辍，计服补剂六百余帖，膏丸数料而起，并宿疾亦瘳。

一妇半月前小产，继以血崩，舌硬心摇、汗出发润，日夜俱热，耳闭不闻，目视不见，身浮浮如在舟车，六脉细数欲脱，用人参二两，黄耆二两，白术一两，熟地二两，当归五钱，炮姜、制附、枣仁各三钱，龙骨一钱五分，一剂顿减，二剂精神爽慧。

《续名医类案》

陆养愚

王笠云母年四十九，经事已止半年，一日忽暴至不止，昏晕厥逆，脉之两手沉微如丝，急以八物汤加附子、姜灰，煎灌之，半时方

醒，连进二大剂乃止十之七八，至十剂，六日方止。后数月复崩，亦昏晕，或以犀角地黄汤加藕节阿胶之属，不止，脉仍沉弱，以附子、干姜、鹿茸，俱烧存性，同釜底墨，酒调服之即止。后以六味加四物料服之约二斤，一年不作。次年八月间又暴至，昏晕更久，脉之如旧，仍以八物汤加附子，连进二剂，昏晕自晡至晚未醒，咸谓必死。诊之决其必苏。盖气血暴脱一时，至未能与胃气相迎耳，或投以牛黄丸，至半夜人事稍省，而血尚未止。明早复诊之，仍割八物汤少加姜附二剂，或适至云：昨夜之苏乃牛黄丸之功，公实不知也，向因屡服参附致屡崩，今人事既省，断宜顺气行瘀，去其病本，岂可复蹈前辙？曰：昨早投大补之药，即不服牛黄丸亦苏，此等脉症，急宜续投参耆，少缓恐成不救，况可更以他药乎？或乃怫然而去，曰：读父书而坑赵卒，天下每多此人，陆令先服煎剂，随制存性附子等灰，午后人事更爽进粥，晚投末药一服，夜间血少止，明日又汤散并投，血遂止，再服前汤十剂而瘳。

《续名医类案》

薛立斋

一妇人饮食，因怒忽患血崩，四肢逆冷，抽搐口禁，如发痉然，吐痰如涌，灌以二陈、柴胡、山栀、枳壳，吐出酸味，神思稍醒，药止次日进薄粥少许，但乳胁胀痛，此悉属肝火炽盛，致脾气不能运化。先用六君、柴胡、山栀、钩藤，诸症顿退。惟四肢不遂，血崩如初。或又为肝火未息，欲投清肝凉血之剂，此肝脾气血俱弱，先用补中益气汤，培其脾土而血气归经，又用四物、参、术、柴胡，养肝经而四肢便利。

一妇人月经淋漓无期，作郁怒伤肝脾，虚火动而不归经，乃肝不能藏，脾不能摄也。当清肝火补脾气，与归脾汤、逍遥散二药，四剂而愈。

一妇人因怒经事淋漓，半月方竭，遇怒其经即至，甚则口噤筋

牵，鼻衄头痛，痰痞抽掇上视。作肝火炽盛，以小柴胡加钩藤、黄连、熟地、山栀而愈。

王执中治皮匠妻，患血崩两月，饮食不进，与镇灵丹，服少减而未断，因捡得耆域方如圣散，用棕榈、乌梅、干姜各一两，煎烧存五分性为末，每服二钱，食前为乌梅汤调下。合一剂与服而疾平，患者不过三服。有巡抚夫人年逾五十，因伤寒而血崩，与胶艾四物汤，一服渐愈，后因劳复大作，与镇灵丹十五丸而止。或无此丹，烧鹿角存性为末，酒调服亦佳，屡验。（同上）

《续名医类案》

陈良甫

一妇人崩漏暴下，诸医投姜、附、桂等药，服之愈甚，诊之六脉紧数，遂用金华散兼《局方》龙脑鸡苏丸，数服即安。《本事方》单用黄芩者，亦此意也。

一亲戚妇人年四十五，经年病崩漏不止，而黄肌瘦，发黄枯槁，语言声嘶，服诸药无效，诊之六脉微濡，问服何药？云：凡是当归、川芎、涩血诸品、丹药，服之皆不作效。遂合溥济方，伏龙肝散兼白矾丸服之愈。（同上）

《续名医类案》

缪仲淳

董清山夫人患血崩，由于中年郁怒，百药不效，用大剂参耆，令兔胎发百余丸，火煨调人药，服久之渐愈，煨发用小砂罐盐泥炼极熟，将发入罐中，封固阴干，以炭火围之，俟黑烟将尽即起，若青烟出，发枯不可用矣。非细心人不可任，盖火候不可过也。

王肯堂曰：徐朝奉传其内人，有血崩症，服诸药不效。用香附炒为末，每服二钱，米饮调下，服后遂痊。（未选入）

一亲戚黄卿内子凌夫人，忽苦血崩，百药不效，用五灵脂一味，

不拘多少，炒会烟尽研末，每服一钱，温酒调下，旋服遂安。

《续名医类案》

蒋仲芳

毛氏妇，经来淋漓不断，已径三月，凉血止血之药，服至五六十剂不效，而口干唇燥愈甚，脉来微涩，询其大便必泻，果然。即以四君子汤加熟附、炮姜、熟地、血余，二剂而止。盖寒客于中，火浮于上，脾虚而不摄血，故淋漓不已也。

聂久吾妇年三十九，生子月内调养未善，次年春其经两月余不行，一日忽暴至不止，一二饭久即昏晕不省人事。急用十全大补汤去桂，倍加参耆，又加熟附子、炒干姜各一钱，灌之苏省，后连服二大剂遂止十之七八，又十余日，共服二十余剂，乃得全止。次年春崩又大作，比前尤甚，昏晕更久，又服前方三十余剂，尚未全安。后用鹿茸炒烧存性研末，酒调二钱，服数次而血止，继服峻补丸药，幸年余不发。然病根未除，次年中秋忽又暴至，前方连服二大剂，血流如水涌，吐冷痰，至日晡昏晕，初更而气绝，惟胸次微温，至三更用灶心土研细，水调灌一二酒杯，冷痰少开，遂饮滚汤一钱，苏省渐安。岂初发时服大补二剂，能令生意不绝耶？后又服峻补之剂而血止。因思三年之内，尝服峻补丸药而病仍大作者，何也？或谓补血太过，是以积而成崩；或谓不宜用附子等热药，推动其血遂至子崩（此说极是，惜聂君未及明）抑知土虚不固，然后山崩。今既血崩则是血大虚，且血气相依附，气虚甚则降令多，升令少，是以不能摄血，致血不归经而妄下，不惟大补血，而尤当大补气也。前丸方虽峻补，不合掺入香附、益母、砂仁、元胡等损气之品，乃令病根不除而屡作也。因纯用补气血药，一料而神气爽健，二料而病根除。次年遂孕而生第八儿矣。

刘氏嫗年七十，病血行如壮年，月事久之，淋漓不断两月余，耳鸣心跳，头晕目眩，恶食罕眠，奄奄就毙。医者不一，有与归脾补中

者，六味四物者，十全八珍者，诸治未为未见。然服归脾补中，则上脘胀而面肿，似不宜于补气；服六味四物，则小腹胀而足肿，似不宜于补血；服八珍十全，则中脘胀而气急，似气血兼补又不宜。延诊先告以不宜用补，以症皆缘补而增也。脉之沉小而涩，两关尤甚，且无神。曰：此肝脾两伤之候也。以七旬之年，两月之病，非补何以能瘳？第余之补异乎人之补，无虑也。与熟地二两，以一两炒炭，杞子一两，白芍炒、枣仁炒各五钱，酒连三分，四剂而淋漓止，去连四剂而肿胀消，诸症亦愈。

姚氏妇早寡，年三十余因月事暴至，遂崩漏不止，势甚猛，脉之两寸上溢，两尺甚弱。据脉不可与补中益气，据症又不可不暂升提，以挽其下陷。先与熟地、杞子、白芍、枣仁，重剂服之，果不应。急以蓖麻仁十数粒，去壳研入麝一分，捏作饼子，用绿云膏贴脐上，再服前药，血去渐缓，少顷再服药，觉血不行，即令揭去之，又服数剂全愈。

《续名医类案》

程从周

吕君锡令政年十八时，经事五日一行，或十日一行，抑且过多，淋漓不断，五、六日方止。平素性躁，君锡以前症告予，余曰：“何不为其调治？”曰：“荆室于归未久，不肯服药，且畏其姑嫜，煎饮不便。”予曰：“丸药侵晨私服，其谁曰不可？”彼乃喜托予制药。予思此症，虽未见脉，详其所云，乃是怒动肝火，复伤其脾。且肝主藏血，又主风，风动则木扬，故血不能潜藏。盖脾主摄血，虽具坤静之德，而有乾健之运，脾气既亏，不能束摄运行，因而流注血海。血海充溢，亦不能如期而下矣，理宜健脾疏肝，清热养血，仍复升举其阳，使气血各守其乡。又何患经之不信矣？遂用参、术、芍、归、升麻、柴胡、子苓、白芍、生地、香附、甘草、黑蒲黄、玄胡索、陈皮、青皮之剂，蜜丸空腹吞之。服药五月经即止。后越二十日方行。次月至二十八

日方行。第三月经事不行，而且孕矣。后十月足乃产一女。

《程茂先医案》

李用粹

大场张公享内正，年逾四旬，伤子悲恸，崩涌如泉。用四物、胶艾或增棕榈。棉灰毫不可遏。医颇明义理，谓阳生阴长，无阳则阴不能生。用补中益气以调脾培本，势虽稍缓，然半载以来，仍数日一崩，大如拳块，彻夜不卧，胸膈胀满，势甚危殆。邀予诊视，面色青黄，唇爪失泽，四肢麻木，遍体酸疼，六脉芤虚，时或见涩，此病久生郁，大虚挟寒之象。夫脾喜歌乐，而恶忧思，喜温燥而恶寒湿。若投胶艾止涩之剂，则隧道壅塞，而郁结作矣。若专用升、柴提举之法，则元气衰耗，而生发无由也。乃以归脾汤加益智、炮姜大剂，与服四贴而势缓，便能夜寐，胸膈顿宽，饮食增进，调理两月，天癸始正。记前后服人参十六斤，贫者奈何？

揣李孝廉沈天生夫人。血崩不止，势如涌泉。医谓血热则行，血寒则止。四物加芩、柏等剂，两昼夜不减，延家君往治。诊其脉息，安静全无病象，肌体清癯，原非壮实，知为脾胃气虚，不能摄血。苦寒杂进，反以潜消阳气，须用甘温之品，以回生长之令。乃以补中益气汤加阿胶、炮姜大补脾元，升举阳气。二剂而崩止，以后调理渐安。

《旧德堂医案》

郑重光

萧我容翁令眷，年近四十，戊辰夏月，胸胁胀满，吐血涎血片，两、三日一发，饮食衰少而经水时或大行不止，有似崩漏。初真州时道，皆以凉血滋阴为主，以致脾胃益虚，竟不能食，来扬就医。脉之细濡不任寻按，有时忽大，此思虑伤心，脾血不归经，非真阴虚损。丹溪云：“胃虚则血出上窍，脾虚不裹血，则血下崩。”此非血热妄行

之证，用人参、白术、茯苓、炮黑姜、香附温补中宫，用当归、白芍、枣仁、丹皮以和营血，重用人参。服一月，吐血先止，下血暂少。后脾胃得温而胀减，再加黄芪、元眼肉，合归脾汤以收功。

吴翰臣兄令眷，予族之女也。清明夜，门首看城隍会，甫入堂，忽昏仆于地，不能言语，抬上床一刻，即大吐，口出妄言，谓城隍夫人需侍者，已得三人，令其人庙服役，语毕，仍闭目昏睡。其家惊畏，暮夜迎余，自门首至寝所，皆烧冥资，观其色无青黑鬼气，切其脉两手相同，至止不乱，但虚大无力。余询其声变否，家人对以如常，如殊不似中恶之证也。又问：“前有病否？”家人云：“经水行有半月未止，数日前，即燃灯通夜不熄，翰臣外出，要人作伴，似有畏惧之状。”盖邪之所凑，其气必虚。因脱血心虚，夜看城隍会，见扮鬼形，心怖而神乱矣，即成中恶，亦因其虚也。以人参五钱，桂心一钱，银一铤煎熟灌下，又将渣再煎灌下，片刻即醒，问其前事，全然不知，惟记门首看会，不知何由在床，但称心慌手麻而已，随用归脾汤数服，经止病愈。

《素园医案》

永富凤

有一妇人经水五十余而不断，其至也，每月十四、五日，血下三倍寻常之人，面目黎黑，肌肤甲错，晕眩日发四、五次，不能数步，彻夜不眠，呻吟声闻于四邻，其脉沉细，其腹空胀，心下及肚腹各有一块坚如石，盖败血凝结，震荡鲜血也。余一诊曰：“腹力虚竭，积块不可攻，与滋润，之方观其动静而已。”家有二子，恳请不已。乃作当归建中汤，日服二帖，经五十余日，无它异，唯觉晕眩仅减。又数日，其左足发毒肿，一日三、五次暴热来去。家人惊请它医，它医诊为气疾，与三黄汤。二日许，晕眩大发，卒厥欲死，于是遽遽再请余。余曰：“病不可攻而攻，故有斯变。斯人斯病，除当归建中汤，别无一方可进也。”服建中汤数百日，身觉滋润，徐徐可艾炷。于是再作建中

汤与之。居半年，晕眩不发，日行数百步，血来减前。于是灸脊际，日三、四穴，渐增至五、六穴，凡三十有七穴，每月轮次，终则始，与建中汤。如是一年许而血来减半，面目肌肤生津液。又经一年，徒步涉山河，能得游后筑善导寺而还。

《漫游杂记》

齐秉慧

曾治友人周大有之妾，性多欲。忽暴崩不止，昏晕床褥。适余在渝回，彼知请诊。按其脉小无力，乍有乍无，乃血脱之象。大有曰：“敝妾还可治否？”予曰：“幸脉小身凉，可有救危。”乃与安崩汤，用黄芪、白术各一两，另用人参二钱煎汤，调三七末三钱冲服，可反危为安也。夫血崩之后，惟气独存，不补气而单补血，缓不济事。今亟固其欲脱之气，佐之三七末三钱，以涩其血，真气固而血自不脱也。”果服一剂而崩止。吾意男女好色，均皆所同。遂与补中益气汤合六味地黄汤，大剂煎饮十余剂顿愈。又与六味地黄丸加龟胶、鹿茸、鹿鞭三味，配服一料而元气大复。

曾治李符山之妻，午膳后，闻夫舟覆，怒气填胸。忽患血崩，四肢作逆，痰涎上涌。促骑求诊，按之六脉沉小，惟左关尺细数无伦。乃与逍遥散，加黑山栀、黑侧柏、黑姜炭各三钱，炒黑马通即干马粪，收贮经年者佳，五钱，桔梗、枳壳、半夏各二钱，白蔻一钱，为细末调药水，服一剂。吐出痰涎碗许，神志稍清，明晨进稀粥一碗。惟左乳肋胀痛，寒热往来，欲呕不呕，四肢困倦。予曰：“此肝火炽盛，中州不运。”遂与六君子汤加柴胡、栀仁、芥穗而诸症顿退，惟血崩时下。其夫归家谢曰：“拙荆恐肝火未息，先生用凉血之药可乎？”予曰：“不可。此乃心肝脾三经血弱气虚，宜服补中益气汤，补脾土，脾统血也。”连服四剂而崩止。乃与鹿茸鞭加于六味地黄丸内，兼服前汤，而元气复，明年四十八双生。

《齐有堂医案》

黄凯钧

沈氏，二八，小产后一月，血崩不止。

党参二钱 蒸於术一钱五分 枸杞二钱 白芍一钱五分，酒炒
山药二钱，炒 菟丝子饼二钱 杜仲一钱五分，盐水炒 荆芥灰一钱
炙草三分

服两剂即愈，此方治挟虚崩漏多效。

《肘后偶钞》

王九峰

《经》以阴虚阳搏谓之崩，阴络伤则血下溢。夫精血乃水谷之精气，调和于五脏，洒陈于六腑。源流而来，生化于心，统摄于脾，藏受于肝，宣布于肺，施泄于肾，灌溉于一身，所在皆是。上为乳汁，下为月水，上以应月，月以三旬而一盈，以三旬而一至，象月满则亏也，亏极则病。阴亏无以化阳，阳盛搏阴络，阴伤则血妄行，血去则气随以散，气散则不能摄血，必致气血两亡，阴阳离决。年逾四旬，素患崩漏，数载以来，屡发不已，至今益甚。其色或紫或鲜，腹无胀满，非停瘀可比。血去后必继之以呕吐，中虚可知。其至心烦意乱，不知所从，动作云为，异乎平素，下损已著。歧伯曰：人年四十，阴气自半矣。当阴气减半之年，值数崩亡血之后，阴液愈亏，不得滋营，必乘土位，胃气不能容受水谷，脾虚不能运化精微，以致呕吐。肾阴无以配阳，胞络之火入心为笑。《内经》：神有余则笑不休，言常人也。《难经》：人心为笑，则病气也。脉来数数而空，有喘汗痉厥之虑。阴阳本不相离，气血宜为流贯，血随气引，气赖血补。不补其气，无以摄血；不补其血，无以化气。无阳则阴无以生，无阴则阳无以化。爰以甘温壮肾水以镇阳光，使阳从阴化，佐以酸涩。欬肺气以摄营血，使阴为阳生，气血各守其乡，阴平阳秘，精神乃治。

熟地 山药 萸肉 人参 三七 冬术 五味 麦冬 黄芪

龙骨 牡蛎 海螵蛸 水泛丸

《王九峰医案》

何书田

年逾五旬，经漏不止，崩证间作，兼有带下，显系肝肾八脉俱亏。皆多劳多郁所积而来，不易全愈。

大熟地 枸杞子 炙甘草 山药 远志肉 炒归身 鹿角霜
紫石英 茯神 棕榈灰 杜仲 乌贼骨 桑螵蛸

带下血崩，奇经内损所致。治在肝肾，兼须节劳戒气为嘱。

炒阿胶 沙苑子 炒杜仲 紫石英 山药 茯苓 炙龟板
全当归 川断肉 煅牡蛎 桑螵蛸

《竿山草堂医案》

王孟英

郎氏妇崩后淋带，五内如焚，溲热口干，不饥脘闷，腰疼肌削，卧榻呻吟，头晕耳鸣，夜不能寐，脉来细数，少腹不舒。滋补杂投，皆不见效。余以沙参、菖蒲、斛、柏、薇、苓、蛤壳、冬瓜子、藕、十大功劳先为清展，服五剂，热退渴和，脘舒安谷，且能起坐，夜亦能眠，其气机已调畅矣，参入潜阳养血而瘥。

周光远妻，因悲郁而患崩漏，面黄腹胀，寝食皆废。孟英用龟版、海螵蛸、女贞、旱莲、贝母、柏叶、青蒿、白薇、小麦、茯苓、藕肉、莲子心而康。

《王氏医案》

林佩琴

杭氏。崩漏日久，近添腹痛。医疑孀居气悒失调，用失笑散破血中气滞，加阿胶、归、芍熄风和营。究竟腹痛未止，淋漓益加，血如豆汁。晡时神倦火升，阴络既伤，奇脉不固，虚阳易炎，左部虚不受

按，右部浮大少力。治宜固摄冲任，兼镇虚阳。赤石脂二钱、五味五分、龙骨煨、丹皮各钱二分 杜仲盐水炒、熟地砂仁蒸、白芍、山药俱炒。各二钱、钗石斛、茯神各三钱、莲子十五粒、鸡血藤膏二钱，四服淋痛已止。去石脂、龙骨，加杞子焙，一钱五分，龟甲心炙，三钱，虚火亦除。冲任为奇经，崩久不止，必固奇经之药，鸡血藤膏用以引入阴络也。

贡氏。小水闭涩，服导赤散加归尾、赤芍、赤苓、牛膝，得利。尺脉犹坚搏，知必经闭血瘀为患，逾旬寒热腹痛，暴崩紫黑成块，继而鲜红如注，后则淡红如水，或红白相间，淋漓匝月不止，头晕脘痞，粥饮不入，神惫肢冷，脉细欲绝。此阳衰不能摄阴，滑而将脱也。急用四维散加半夏、砂仁、茯神，脉症乃定，后用大补汤而安。

邹氏。五旬外暴崩成块，晕绝而苏，脉虚芤。此虚风扰动阴络也。用阿胶三钱，水煨服，血止。仍用熟地、茯神、白芍、荆芥醋炒，炒黑、续断、杞子、甘草炙黑、乌梅，取甘酸化阴熄风之旨，寻愈。

王氏。七七之期，经断半载，忽又崩淋不已，虽血海亏虚，但宜续、杜摄血，兼艾、附调气足矣。医辄以棕灰、黑蒲黄止涩，乃至小腹胀满硬痛拒按，头疼脘痞，热渴心烦，小水短涩，脉左弦右数，此络瘀阻痹攻痛。宜主理瘀，佐通络，乃奇经治法，非失笑散决泽煎之比。五灵脂、郁金汁各八分、牛膝、栝蒌、橘络各钱半、延胡、桃仁、赤芍、木通各一钱、当归须、降香末各二钱，三服瘀行腹软。但口干微渴，头仍不清，必由液虚风动。改用阿胶、甘菊炒、麦冬、石斛、荆芥醋炒、枣仁、茯神、白芍、莲子、龙眼肉。血止，诸症亦退。又下白带，为气虚陷。用党参、玉竹、茯苓、续断、杜仲盐水炒、生地炭、芡实、杞子俱焙，三服全愈。

魏氏。经阻暴崩，疑为胎漏，按脉无孕象，乃聚瘀日久致患，曾经调治得安。今暑湿令行，头晕呕恶，哺后骨蒸，寤不成寐，忽又暴崩，脉虚疾。症属内因，必由阳明脉亏，木火乘侮，是以贯膈犯巅，震及血海，血海一空，则骨髓生热。治宜和阳安胃，佐以镇络。嫩桑叶、

甘菊炒、天麻、白芍、钗斛、枣仁、茯神、牡蛎煨研、海螵蛸醋炙、橘红、半夏曲炒、续断，数服诸症悉平。惟左关尺芤弱，乃肝肾阴伤。用熟地、黄肉、山药、白芍俱炒、茯苓、杜仲盐水炒、海螵蛸、鳖甲俱炙、阿胶烊、数十服行痊。又接服鸡血藤膏而经固。

包氏。经闭疑胎，血下每谓胎漏，忽然崩注，杂下脂膜甚多，身热头晕，面赤心烦，咳呕绿沫。上咳则下漏，呕作晕频，汤饮不纳，急用煨姜汁止呕，咳逆定，神渐苏。脉虚小而数，沉候如无，两尺空空，显非胎象。良由起居不时，生冷失节，气血阻滞，一时暴下阴虚，阳失依附，变化内风，眩冒呕逆，如风翔浪翻，当知阴虚阳搏，崩漏乃成。血海空乏，虚阳升逆，乃气不摄血之咎，况阴从阳长，宜宗立斋、景岳两先生治法，敛阳以摄阴。用洋参焙、茯神、白芍炒。各三钱、炮姜一钱、五味五分、制半夏、焦白术、甘草炙黑、续断、杜仲盐水炒各二钱，二服漏止热退。稍恶寒，阳气尚虚，前剂加制川附五分，遂愈。

许氏。中年血脱，延为带浊，必冲任脉虚。夫冲为血海，任主担受，而冲脉隶于阳明，阳明先衰，胃纳不旺，致血海不固，但任失司，此淋漏根由也。近则食后脘腹不爽，或暖腐宵胀，必由脾肾阳虚。治法摄阴先在益阳，以崇生气，以纳谷味。且脉来左右缓弱，温通为宜。制附子三分、益智仁煨八分、沙苑子、白芍、归身、制半夏各二钱、破故纸、杞子俱焙、乌鲛骨醋炙、续断酒炒。各一钱半，胡桃肉二枚、煨姜三钱，三服漏止食进，去附子、故纸、半夏，加芡实、杜仲、菟丝子俱炒，又数服乃固。

王氏。崩漏成带，至小溲如泔如涕，髀骨痛，腰膝酸。从未饵药，势必沥枯髓液，延成不治。近又春温气泄，身热食少，口渴颊红，液涸阳升，脉右弦左弱，急摄阴固下。熟地炒、阿胶烊、石斛各二钱、洋参三钱、麦冬、茯神、赤石脂各钱半、白芍、杜仲青盐炒、甘杞子、续断各三钱，加莲、枣煎。数服症渐减，去石脂再服。又去阿胶，加芡实、山药俱炒，各三钱，又数十服得效。

吴茱。胎漏半产已匝月，崩带未止。用补气摄血之剂，犹淋漓不断，延至怔忡不安，腰腿酸痛，《脉诀》所谓崩中日久为白带漏下多时骨髓枯也。急须摄固奇经，仿徐之才涩以止脱意，用金锁匙丹。龙骨煨研、牡蛎醋煨研、茯神、远志炒、赤石脂研、杞子酒焙，加杜仲、枣仁俱炒、乌梅，一服漏止，怔忡亦减。又加减前方而安。

谢氏。天癸当断之年屡患崩漏，近兼利血白带，头震耳鸣，项麻面赤。症由任带两亏，火升风煽，致心神浮越，怔忡不安。治以镇阳摄阴，务使阳下交阴，阴上恋阳，震麻暂已。再血海存贮，阴络不伤，下元重振，专在静摄。勿以操持扰动厥阳，则宵寐汗泄渐安矣。熟地、山药、五味炒、杞子焙、龟板、龙骨、阿胶、牡蛎煨研、杜仲盐水炒、龙眼肉，数服甚适。去龙骨、牡蛎、杜仲，加羚羊角、丹皮、白芍、茯神、莲子、芡实、续继等熬膏，即用阿胶收，小麦煎汤和服。渐愈。

《类证治裁》

顾德华

汪。小产之后，血崩月余，音低气怯，寐少咽干，而目浮肿，干呛阵作。良由血去过多，一派虚象猥集矣。古人以血崩为之崩中。中者，即脾胃也。前方纯用滋纳固涩，久服不效，何以尚不悟其理耶？盖肝主藏血，脾主摄血，脾失统血之司，血从内渗不已，由于滋之涩之，凝滞络中。所以时或淋漓若净，忽又瘀块如掌大者络绎而下，自觉心神无依，肢冷泄汗。《经》云：阴阳互根，如环无端。阴从下渗，阳从上冒，其中枢纽，能无虑其不续耶？急进归脾法以为砥柱中流之计。

大有党参三钱 九制于术一钱 新会皮七分 丹皮炭一钱五分
大有黄芪二钱 大熟地炭五钱 地榆炭三钱 龙眼肉三钱 归身一钱
白芍一钱五分 枣仁三钱 用藕肉二两，湘莲肉五钱，煎汤代水。

又诊：前进血脱益气法，兼清营分。虚火崩决之阵顿止，胸脘乃觉舒和，略思纳谷，可知从前谬执黄芪闭气之误。然肝肾空乏，八脉

交虚，最虑腹膨漏带，干呛寒热，此四者崩后极易见之，不可不为预防。

人参须一钱五分 大有芪一钱五分 陈阿胶二钱 地榆皮三钱
西党参三钱 制于术一钱五分 炒丹皮一钱五分 枣仁三钱
白芍一钱五分 云苓三钱 元眼肉三钱 湘莲肉四钱

又诊：崩止三日，神脉皆振，头晕轰热，时仍有之。必得营阴恢复，风阳游行之象，方可全熄耳。

人参一钱 制冬术一钱五分 陈阿胶二钱 牡蛎五钱 枣仁三钱
黄芪二钱 西党参三钱 熟地炭四钱 川贝三钱 白芍一钱五分
加鲜藕肉一两

又诊：肝风渐定，诸症较平，夜寐渐安。惟面色指爪皓白不堪，胃气虽醒，脾少健运，知饥不任油腻。须得屏除烦劳，静养百日，气血充复可期也。

人参须一钱五分 制于术一钱五分 甘枸杞三钱 炒枣子三钱
绵黄芪三钱 炙甘草四分 陈阿胶二钱 炙陈皮七分 元眼肉三钱
大黑枣二枚 加建莲三钱

又诊：日来精神大胜于前，唇渐转红，眠食颇佳，阳明血液日长矣。

党参三钱 炒枣仁三钱 炒米仁三钱 九制于术一钱五分
黄芪二钱 炒白芍一钱五分 炙陈皮五分 炙黑甘草三分
陈阿胶二钱，蛤粉炒 元眼肉三钱 大黑枣两枚

谢。思虑伤脾，郁怒伤肝。血崩之下，气营大虚，彻夜不寐，神不自持，触事惊疑，此乃怔忡疑虑之症，并非癫痫类也。脉症合参，脾藏气血大伤。脾为营之源，虽云心主生血，然血不自生，须得脾气运液，中焦取汁，变化面成。心虚而不知补脾，绝其生血之源矣。且大便亦滞，胆怯异常，显属不足之症，切勿执定痰火有余也。

大生地 炒白芍 炒枣仁 云苓 制冬术 广郁金 元眼肉
麦冬 莲肉 川贝

又诊：脉象细而带弦，微见虚数。血崩本属气虚下陷，血去阴液亦亏，心中悸惕，惊疑无主。寻源求本之计，宜补立中气为先，倘专清痰火，必有延成痼疾者也。

党参 制冬术 大麦冬 归身 黄芪 炙黑草 血余炭 白芍 云苓 枣仁 川贝母 加龙眼肉，大黑枣。

又诊：日来脉象，颇形起色，元气渐振，故恐惧忧疑之象，已可支持。肝郁日畅，寡有恼怒，诚佳机也，心脾血液未充，尚须怡养为佳。

制洋参 云茯神 五味子 川贝 制冬术 左牡蛎 元眼肉 苡仁 枣仁 生甘草 加金橘饼，野蔷薇露，临卧服白金丸三分。

又诊：不寐阳升，脾气下陷，风阳游行无定，肾志少液，当引阳潜藏之法。

党参 大熟地 左牡蛎 白芍 黄芪 制附子 池菊瓣 枣仁 橘白 炙草 川石斛 元眼肉 加鸡子黄。

又诊：大便得实，肾液藏而脾气运矣。神情渐复，惟或感心事，肝阳犹易扰及包络，亦由心营血气未能充足耳。

党参 元参心 远志炭 炒枣仁 黄芪 川贝母 大熟地 柏子仁 山药 炙甘草 龙眼肉

又诊：行动步履有力，眠食亦均匀适中。中气虽复，血虚犹少营养，血不养肝，肝经郁火，欲达未达。现值暑令，当于补剂之中，参入清畅之品，秋凉肃降时，可冀无恙，仿许学士法加减。

大生地 党参 赤芍 川贝 乌犀尖 云苓 玳瑁 山药 麦冬 橘白 加囟囟鸡子黄，白荷花露

俞。经居三月之余，骤然腹痛，酸坠不已，曾经小产。手厥阴经络受伤，脉胎已至脱根，气从下陷，深恐血崩之虑。仿东垣法。

人参三钱 柴胡二分 新会皮五分 云苓二钱 黄芪二钱 枣仁三钱 春砂仁五分 炙草三分 冬术一钱五分

又诊：昨进补中益气汤，酸坠之势虽缓，而瘀下如崩，肢冷发痉。幸元气尚属扶住，未知厥脱，然胎尚未下，须防气陷血脱，浊瘀下注。

人参须七分 老苏梗一钱五分 炮姜炭四分 陈皮五分
炒冬术一钱五分 春砂仁三分 枣仁三分 茯苓三钱 归身一钱五分
胎产金丹半粒

又诊：血崩止之后，自觉胎元跃跃如常而动。肝升烦热，寅卯更衣，感冒寒邪，形冷发搐，郁木内扰，悲从中来，骤然哭泣，面色泛桃，神志模糊，脉细无神。此属血去胎伤，又失于调养，胎殒腹中，浊向上蒙，至危至险候也。

人参须一钱 大腹皮一钱五分 陈皮七分 老苏梗一钱
炮姜炭一钱 江枳壳一钱 砂仁五分 赤苓三钱 广郁金五分
胎产金丹半粒

又诊：药后得寐，神志渐清，面桃略转，少腹酸楚，急坠极甚，如欲大便而便闭。盖小产胎殒，重于大产，或有气衰血热，或因内外感触，损其根柢。漏红之后，本当调养气血，听其自然，但血去已多，胎涸难于下行，不得已，用平胃法，宜佐保本为要。

人参须七分 元武版五钱 大腹绒三钱 炙陈皮五分
炮姜炭一钱 元明粉七分 江枳壳一钱五分 焦白芍一钱五分
老苏梗一钱五分 归身一钱五分

又诊：昨投平胃散加元明以下瘀浊，佛手散温通气血。刻间腹中酸坠异常，秽水下行极多，即觉舒和，因知人立方之神妙也。但瘀浊尚有未净，胞衣或有留顿，亦宜留意虚阳上冒，慎调至嘱。

熟地炭四钱 炮姜五分 陈皮七分 归身一钱 炒于术二钱
丹皮三钱 云苓二钱 白芍一钱 炒枣仁三钱 青皮五分 谷芽三钱
益母草煎汤代水。

又诊：瘀露下而黑色，停瘀留顿未化，胃纳渐安，寐亦稳贴，神脉皆涉和平。但恐有胎元未化，仍宜留意也。

熟地炭四钱 川石斛三钱 煨枣仁三钱 川贝母二钱
生冬术一钱五分 白蒺藜三钱 净归身一钱五分 粉丹皮一钱五分
西琥珀五分 陈皮一钱 云苓三钱 桃仁七粒

又诊：益阴通瘀之下，夜寐得安，脉息稍静，正气渐醒，今晨瘀中虽下茄蒂之象，此即胞胎之根柢也。前日或指停经，或指崩漏，定可剖析分明而无惑矣，仍守昨法。

熟地炭四钱 怀牛膝一钱五分 川贝二钱 炒冬术一钱五分
紫石英三钱 枣仁三钱 白芍一钱五分 旋复花三钱 西琥珀五分
益母膏三钱

又诊：小产后，肝肾阴虚，虚阳易升，逆胃为汗泄气急，脉见芤数。阳衰已复，阴血尚难速长，眠食何安，自可日臻佳境，百日内务宜慎养。

生洋参一钱五分 制首乌四钱 川贝母二钱 归身一钱五分
生冬术一钱五分 金石斛三钱 茺蔚子三钱 白芍一钱五分
西琥珀五分 枣仁三钱 茯苓三钱 小红枣三枚

又诊：日来色眊已转，脉惟右寸关尚弦数，由于盗汗自汗互伤营液，故易于心悸也。今瘀已净，可以补中，寓以收摄法矣。

党参三钱 熟地炭四钱 甘枸杞一钱五分 炒白芍一钱五分
炒冬术一钱五分 五味子三分 炒枣仁三钱 生甘草三分
炒竹茹一钱五分 菟丝子三钱 炒香谷芽三钱

《花韵楼医案》

张大曦

经停三月，骤然崩冲，阅五月而又若漏卮。询系暴崩属虚，虚阳无附，额汗头震，闻声惊惕，多语神烦，脉微虚软。势将二气脱离，其危至速。拟回阳摄阴法，急安其气血。

附子五分 鹿角霜一钱五分 杞子炭一钱 熟地七钱 五味七粒
白芍一钱五分 人参一钱 龟板一两 天冬一钱五分 山药三钱

诏按：证情已急，须得重剂，方可挽回。方中选药甚合，特嫌分量太轻耳。

再诊：脱象既除，经漏较稀，脉犹濡细，神思尚怯。气血乍得依附，再宗暴崩属虚之例，拟温补法。

人参一钱 熟地一两 枸杞一钱五分 鹿角胶一钱五分 杜仲三钱
巴戟一钱五分 白芍一钱五分 归身一钱五分 阿胶一钱五分
天冬一钱五分

《柳选四家医案》

费伯雄

某。经停两月忽行，淋漓旬余不止，胸阻作恶，乳肿腹痛。宜黑逍遥散加减。

潞党三钱 当归二钱 川楝子炒，三钱 炙生地三钱 柴胡炒，八分
丹皮二钱 川芎八分 乌药二钱 青皮一钱 赤白芍各一钱半
炒冬术一钱 炒荷叶一钱 金橘饼三枚 藕节三枚

某。心生血，肝藏血，脾统血。今肝不能藏，脾不能统，是以荣血妄下行趋，崩漏不止。宜养血柔肝，补土收纳。

当归二钱 川断三钱 真潞党三钱 炮姜炭八分 茯苓二钱
金毛脊三钱 砂仁一钱 炒枣仁三钱 木香五分 陈皮一钱
莲子十粒 甜冬术炒一钱 杜仲三钱 红枣三钱

某。崩漏已久，荣血大亏，气色痿疲，纳少头眩，入夜潮热，势已成损。法宗经旨，久崩久漏，宜清宜通。

生地 丹皮 知母 白芍 茜草 甘草 丹参 侧柏 牡蛎
橘络 生石决

另补中益气丸。

某。心生血，肝藏血，脾统血，郁怒伤肝，思虑伤脾，肝脾气郁化火，火旺血动，则肝不能藏，脾不能统，是以荣血下趋，崩漏不止。阴血既已下流，心失荣养，以致悸惕不宁，夜寐不酣。脉来虚弦而数，

舌无苔而尖绛。姑拟养血柔肝，扶土摄纳。

归身 白芍 茯神 柏子仁 炒枣仁 乌贼骨 丹皮 阿胶
杜肿 川断 陈皮 莲蓬炭 牡蛎 棕炭

某。寒热久延，经水淋漓，腰腹腿酸，头眩胸闷，两关俱弦。黑
逍遥散。

炒柴胡八分 炒薄荷二钱 炙生地三钱 香独活一钱 炙草五分
毛脊四钱 赤白芍各一钱半 丹皮二钱 橘红八分 酒炒川断三钱
当归二钱 桑枝三钱 核桃二枚

《费伯雄医案》

李铎

吴姓妇，年近四十，崩漏三年。诊色脉俱夺，面浮肘肿，肌乏华
色，饮食日减，精神困惫，气逆上冲，腰如束带，肠鸣出声，耳鸣作
噓，两年来医药无功，乃冲任督带交病。阅诸医用药，都是参、地、
芪、术，呆守补法，宜乎不效，是未达奇经之理。古人谓暴崩暴漏，宜
温宜补，久漏久崩，宜清宜通。又考《内经》于胸膈支满妨食，时时前
后血，特制乌贼丸咸味就下，通以济涩，更以秽浊气味为之引导，同
气相求，圣语昭然。当宗是论立法，议早进通阴潜阳方，晚服乌贼
丸。

龟板 鹿角霜 鹿角胶 阿胶 牡蛎 柏子霜 琐阳 苁蓉
紫石英 续断

乌贼丸 乌贼骨半斤 鹿角霜四两 茜草二两，即茜茹卵甘枝 和
鲍鱼汁泛丸

又 进潜阳通阴颇验，显是奇经内损，足征前案非诬，正与先
哲云暴崩宜温涩，久漏宜宜通若合符节矣。盖久漏久崩则血去阴
耗，是以宜清宜通，故饵补阳不应，况乎芪、术固守中焦，不能入奇
经，无病用之诚是好药，藉以调病，焉克有济。且肠鸣声出溺孔，上
噫气，下泄气，皆属挟热之象。然证固属虚，当有阳虚阴虚之别，书

曰阴虚生内热也，又《素问》诸病有声，皆属于热，足见阴虚挟热无疑。但非可清可降之比，当从柔润清补兼施之法。

龟胶 驴胶 洋参 天冬 茯神 龙骨 桑螵蛸 旱莲 女贞 棕榈炭 仍服乌贼丸

崩漏经年，内阴必损，损则热生，故古人云宜清宜通兼济，以扶阴祛热，拟法极是，医专用芪、朮呆补阳药，于病不合，于理亦背。

寿山

一老妇，年六十余，患血崩不止，脉数形瘦，唇红口燥，舌干心烦，胸满便结。询知因家难悲哀过甚，以致心闷气急，肺布叶举而上焦不通，热气在中，血不禁而下崩。此正《内经》所谓阴虚阳搏谓之崩，实非虚损之证，是以杂投补剂，固经止血不效。余用子和法，以四物合凉膈散四帖，后服四物加香附、炒黑黄柏，十余剂而愈。

按：经漏、崩、淋，并由精窍出，惟溺血从溺窍而下，妇女虽自知，然赅于细述，医者不知分别，往往误治，更有因病泛愆，而冲脉之血改从大肠而下者，人亦但知为便血也，临证均须细审。

《医案偶存》

凤实夫

施右。经停三月，骤然崩冲，越五日而犹若漏卮。询系暴崩属虚，虚阳无附。额汗头震，闻声惊惕，多语神烦，脉微虚软。势将二气脱离，其危且速。拟以回阳摄阴法急莫安其气血。

人参另煎一钱 制附子五分 鹿角霜二钱 熟地七钱
生白芍二钱 元武板一两炙 天冬钱半 怀山药三钱 杞子炭钱半
五味子七粒

复诊：脱象既除，经漏较稀，脉犹濡细，神思尚怯。气血乍得依附，再宗暴崩属虚之例，拟以温补。

人参另煎一钱 巴戟肉钱半 鹿角胶烱入，钱半 熟地一两
杞子炭钱半 清阿胶烱入，钱半 天冬钱半 炒杜仲三钱 炒白芍二钱

加醋炒归身炭钱半

《凤氏医案》

黄堂

陆，四十岁。经漏四十余日，脉海空亏，怔忡阴吹。《金匱》云，胃气下泄也。更兼呕吐不止，脉虚芤弦，风木来乘，变端有不可测者。姑宗妙香意，参辛香两和肝胃法，冀呕止再商。

党参 益智仁 茯苓 龙齿 姜渣 乌梅 枣仁 紫石英

二诊：衄血频下，而漏得止，余恙亦稍安适，所患阴吹，于未小便时仍然，脉虚芤弦。冲任空匮，本宜补摄，而呕伤胃气，滋腻难投，姑以扶胃安神法。

西洋参 归身 乌贼骨 丹皮 砂仁 紫丹参 白芍 白薇
茯苓 谷芽

三诊：诸恙向安，惟少腹微痛，阴吹未除。

原方去茯苓、白薇，加香附制

《黄氏纪效新书》

张畹香

六脉全芤，妇人崩漏。兹小产后，血分大虚，故有此脉。冷气上冲，丹溪曰：凡自觉冷者，非真冷也，此属肝气之逆。

大生地六钱 当归三钱 炙鳖甲四钱 炙龟板四钱 怀山药四钱

煅牡蛎四钱 阳春砂八分，冲 川续断三钱 新会皮八分

建石斛三钱

六脉已起，胃口亦开，是病已净尽。若论补法，则惟凉滋肺胃，是热病之后路。

大生地八钱 炒白芍三钱 麦冬三钱 北沙参五钱 怀山药四钱

茯苓三钱 象贝三钱 新会皮八分 建石斛三钱 生苡仁四钱

戚云门

许公安令媳，脉数弦芤，肝肾真阴内损，阴虚阳搏，血动下溢淋漓，固当滋益肾阴，引血归肝，但肝病必然乘脾，又当佐以植土。又脉缓弱，火渐降，血自得引归经，但汗多食减色夺，此阴虚阳无所附也。急宜补气以通血，勿徒见血投凉。

《龙砂八家医案》

陈勿生

非时下血，淋漓不止，谓之漏下；忽然暴下，若山崩然，谓之崩中。其症有虚实之分，实者易治，虚者难治，虚中有实者尤难治。丙申冬，余客天津，刘君伟齐之侄妇，月水淋漓不尽，已经数月，并见胸腹胀闷等症，余诊之，脉数，右盛于左，知是温邪内蕴，血不归经所致，用芩栀二物汤、槐榆清血汤加减治之，两旬而愈，愈后，匝月即孕。盖《经》所谓：阴阳和而后万物生也。此实症易治之一证也。癸巳春，余客都门，水部主政周君涤峰之室，病血崩，每阅五日，必崩一次，崩后第一日，腹中稍宽，后又逐日胀满，至五日必复崩如故，缠绵两月，夜寐不安，饮食尤微，面舌、唇口并手指，俱痿白无色，医投补气摄血一剂，病势如剧，来速余诊，脉象虚微，惟按左尺，细数有力，余思此症，系温邪袭入血室，血得热而妄行，以致浑身之血，不能归经，久则血尽，气亦脱矣。人第知血脱益气，不知气有余即是火，不去其火，但补其气，非惟关门捉贼，抑且助纣为虐，何以望愈？因用桃仁承气汤加味，囑仅服一剂，服后，泻两次，腹中快甚，病者以其效也，又服一剂，仍泻两次，明日再诊，六脉虚微已甚，改用大补气血之剂，并加桂附，调养而痊。盖此症正气虽虚，阴分深处，尚有邪热未净，所谓虚中有实症也，非用下夺法，邪不得去，正

无可扶，先泻后补，实常法耳。然药味太峻，不宜多服，接服二剂，未免过矣。幸速温补，始能复元，不然，转而为危，谁执其咎，且不惟硝、黄峻药，不可或过，即寻常之味，亦以适病为宜。盖虚怯之人，陈皮多用数分，即嫌耗气，甘草多用数分，即嫌满中；藿香多用数分，亦嫌其热，白芍多用数分，亦嫌其寒，而况寒于白芍，热于藿香，满中甚于甘草，耗气甚于陈皮者乎？是不可以不谨。

《诊余举隅录》

张乃修

张右。漏经不止，成块成片而下，迺则胸脘不舒，涎涌作恶，气撑腹满。脉细，关部弦劲。此由阴血失营，致厥气冲侮胃土。恐虚中生变，不可不慎。

广皮 制半夏 茯苓 旋复花 煅赭石 金铃子 金石斛
砂仁 盐水炒竹茹 左金丸

又。调气镇逆，而和肝胃之阴，作恶较定，复下血块，气撑胸满，由此而松。良以冲为血海，其脉从气街夹脐上行，而散于胸中，冲瘀既行，则胸中之气自展。特口中粘腻，津液悉成涎沫，不能下咽，频吐之余，喉舌转燥，舌边白糜星布，脉虚左大，右关无情。胃阴耗残之甚，恐虚火挟浊上蒸，而糜腐大布，所谓虚中生变者，即此而是。

西洋参 麦冬 赤苓神 制半夏 橘皮 乌贼骨 茜草炭
赭石 竹茹 枇杷叶

又。昨进降胃之逆，和胃之阴，口腻恶心顿减。其为胃阴耗残，略见一斑。脉象较敛，舌糜已化。药既应手，宜再扩充。

前方去赭石，加细子芩、北沙参、金石斛。

席右。经事一月数至，至则如涌。营热之甚，恐致血崩。

大生地 当归灰 制香附 丹皮炭 细子芩 乌贼骨 老苏梗
元参 鲜藕煎汤代水

二诊：经不及期，色鲜甚多，头胀作痛。风热袭入营分也。

细子芩 炒防风 当归灰 丹皮炭 茯神 制香附 生地炭
旱莲草 炙乌贼骨

《张聿青医案》

王旭高

何。漏下淋漓不断，少腹板痛，微寒微热，口渴不欲饮。此有瘀血着于脐下，拟化瘀生新法。

小生地 当归 丹参 桃仁泥 泽泻 延胡 旋复花 柴胡
大黄炭酒炒 地鳖虫酒浸

又：漏下淋漓，少腹板痛。化瘀和营，未能奏效。食少无力，微寒微热。治在肝脾，缓之调之。

柴胡 当归 丹参 茯苓 泽泻 赤芍 白术 香附 地鳖虫 山查炭

陆。营分有热，则经至而淋漓；卫分有寒，则脉小而迟缓。脾为营之本，胃为卫之源。经至而舌苔反布，胸无痞闷，是胃阳虚而无气以化浊也。拟醒胃阳以摄脾阴为法。

归芍六君子加神曲。

又：经行过多，血气两衰，肝肾失固，丽翁所论包括尽矣。然治病之道，有相机从事之权。夫舌白多痰，胃有浊也。咽干色红，阴虚而火浮也。脉细迟缓，中气不足也。考古人肾虚有痰浊者，金水六君煎；气虚而上有浮火者，生脉四君子。合而参之，似觉不可擅易，还祈哂政。

大熟地 半夏 五味子 归身炭 陈皮于术 茯苓 麦冬
人参 谷芽 建莲肉

又：肝肾与脾胃同治，经漏仍然不止。左脉稍觉有力，原得归地之功；右脉更觉细微，脾气虚衰不振。许学士谓补肾不如补脾，盖谓脾胃虚者言之。今心跳食少，必脾不足可知。经血如漏卮不息，冲任不得不固；腹中微痛，气虚且滞，不得不补，不得不通。仿黑归

脾法。

熟地炭 黄芪炒焦 茯神 枣仁 白芍 广木香 归身炭
冬术 人参 陈皮 炙草

渊按：既云固冲任，而无固冲任之药。仍用归脾，恐漏仍不止。古人治崩漏急证，自有专方，如血余、棕炭、百草霜、倒挂尘等，殊有效验。且脉小迟缓，其漏未必属热，或脾肾阳虚，不能固摄其血，尤非固而兼温不效，未可见血即以为热也。

《王旭高临证医案》

柳宝诒

归。崩漏不止，腹胀色浮。肝脾两病，失藏统之职，血不归经，转为瘀滞，而木燥生风，兼见眩暈。或通或涩，均属碍手，姑与通摄法。

归身炭 白芍 石决明 丹参 乌鳢骨 茜草根 茯神 稻
豆衣 炒丹参 於术 煨木香 荷叶炭 龙眼肉

二诊：血漏不已，而腹满肢浮，无非血不统于脾土所致。再与归脾法，佐以清肝。

於术炒 当归土炒 白芍土炒 茜草炭 乌鳢骨 砂仁炒 炙
鸡金 石决明 煨木香 稻豆衣 刺蒺藜 丹皮炭 夜交藤 荷
叶炭

孟。崩漏屡发而多，兼有瘀块。而经之来，仍如期不爽。此平日曲蘖之性，助其肝火冲扰，营血不能归经，遂使崩久致虚，延成剧候。

大生地炒 归身 白芍 炒丹皮 黑山栀 滁菊花炒 石决
明 茜草炭 阿胶蒲黄粉拌炒 侧柏炭 陈棕炭 藕节炭

黄。肝气不和，营络因之室塞。癸期迟速不匀，停阻两月，忽作崩漏，血色鲜瘀杂下，少腹时痛，兼旬不止。血去阴伤，渐增内热，舌红脉数，两关带弦。理宜疏肝和络，滋养营血。所嫌肝气横逆，上自

肺胃，下及少腹，气之所在，无所不窒，不独下焦营络，宜通不宜塞也。而肝失所养，风阳浮扰，又标病中之最要者。刻下肝血宜养，络血宜通，于养阴和络中，参而疏肝畅气之法，必得血随气运，则诸恙乃就绪，无治丝而纷之虑矣。

大生地炒 白芍 炒当归 丹参 制香附 炒丹皮 石决明
乌鲗骨 茜草炭 橘络 川断 鸡血藤膏 枇杷叶 藕节

二诊：瘀块畅行，营血得以疏运，本属至顺之境。惟少腹尚觉撑痛，余瘀未净，而正气先伤，恐其不克支持，自宜以扶助本原为要。今早形寒发热，其来势似挟新凉，与寻常虚热不同。扶正以固本，畅气以和营，此两层必须并重，而表热一层，亦须顾及为稳。

洋参 参须 大生地炙 炒当归 延胡醋炒 乌药
金铃子酒炒 茜草根炭 沉香磨 青蒿 鲜藕煎汤代水

加减：如少腹不痛，去延胡、金铃子、乌药、沉香，加丹参；鲜血不止，去当归，加童便、赤芍、阿胶（蒲黄炒）、丹皮、枣仁；寒热止，去青蒿；胃纳不佳，加霍加斛、春砂仁、扁豆、宜木瓜。

昌。病情繁变，大略是血虚气滞，木燥火浮所致。刻下心悸不寐，头晕呕恶，是风阳扰胃也；而少腹块痛，经漏紫而不畅，营虚热恋，最易延成阴损之候，切宜小心静养。

大生地炒 白芍 枣仁川连煎汁，拌炒 滁菊花 西洋参元米炒
刺蒺藜 石决明 丹参 丹皮炒 延胡索醋炒 乌药 金铃子
归身炒黑 佛手片 竹茹

《柳宝诒医案》

张士驥

王敬翁夫人，平时肝胃虚寒，每病厥寒上逆，头巅痛疼，呕吐不止，脉迟虚。大进吴萸汤加减，二剂即愈。此次暴崩如注，身寒战栗，头痛筋掣，吐泻并至，腿与尾间刺痛欲裂，脉沉两关紧甚。寒邪伤及血分，应以血脱益气法主之，参人温中之品。

炒白术一两 高丽参三钱 鹿角霜四钱 炙黄芪八钱
炮干姜二钱 川附片二钱 全当归四钱 阿胶珠三钱 血余炭四钱
炙甘草二钱 艾叶炭五钱 伏龙肝一两

再诊，脉滑大数急，右关迟紧，各症略减。因去血过多，仍以前意加以养血之品。

生白术五钱 阿胶珠四钱 熟地炭五钱 炒白芍四钱
米党参八钱 炮姜炭二钱 牡丹皮钱半 炙黄芪五钱 乌梅炭一钱
炙甘草二钱 淡吴萸六分 血余炭三钱

再诊，各症递减，呕止，周身筋痛，尾闾刺痛，脉已静，紧形犹存。当于血中补气，参入温寒之品。

生白术五钱 米党参八钱 炮姜炭钱半 炒白芍四钱
炙甘草钱半 乌梅炭一钱 阿胶珠四钱 炙黄芪五钱 血余炭三钱
茯苓片三钱 当归身四钱 大枣肉三枚

又，炮吴萸二钱 米党参八钱 当归身三钱 半夏三钱
炒白术四钱 阿胶珠三钱 炙甘草钱半 干姜二钱 蕲艾叶二钱
焦白芍三钱 代赭石四钱

再诊，脉沉紧，无神，腰与尾闾刺痛欲裂，心空无主发发，温补督冲为要。

川附子三钱 炒杞子五钱 黑归身三钱 川杜仲四钱
破故纸二钱 炙黄芪五钱 鹿角霜三钱 巴戟天三钱 高丽参三钱
鹿茸末一钱

《雪雅堂医案》

马文植

安徽，黟右。四十岁。脉沉细带涩，肝脾两伤，波及奇经。腹痛，经事淋漓成块，腰痛带多，头晕，谷食不馨，防成崩漏。当调气养营，以固奇经。

党参二钱 白术一钱五分 白芍一钱五分 炙草三分 黑料豆三钱

茯神三钱 枣仁二钱 淮山药二钱 川断一钱五分 炙生地三钱
广木香三分 红枣五枚

二诊：调养肝脾，以固奇经，恙已减轻。宗前法治。

黄芪 党参 白芍 生姜 当归 枣仁 木香 红枣 川断
杜仲 生冬术 炙草 茯神

三诊：漏下已止，惟腰酸带多，头目眩晕，心悸少寐。心脾不足，血少肝虚。益气养营，以固奇经。

归身 潞党参 炙黄芪 煨龙齿 杜仲 炒白芍 煨姜 枣
仁 茯神 木香 冬术 炙草 炙生地

丸方：加大熟地、菟丝子、乌贼骨，去生地、煨姜、龙齿。

北沙上，王右。败血有年，时作时止，脉虚软，面无华色。当养血归脾。

当归一钱五分 党参藿香炒，一钱五分 大砂仁打，六分 川芎八分
炮姜炭五分 丹参一钱五分 焦白术土炒一钱 香附炭一钱五分
白芍一钱五分 上肉桂炙、研、冲，三分 木香四分 艾绒醋炒一钱
红枣五枚

二诊：脾土较充，脉数亦平。仍从前意加减。

炙黄芪三钱 上肉桂研，冲，三分 党参藿香四分炒，一钱五分
香附炭一钱五分 当归二钱五分 炮姜炭八分 艾绒醋炒，一钱
大白芍一钱五分 砂仁四分 白术一钱 川芎八分 杜仲二钱
红枣三枚

《马培之医案》

刘子维

某之室，年三十余，于岁前三日经净，今正月初一日复来，即十余日不止，左脉有力。往常经期大约二十六七日至。

紫草三钱 秦归二钱 泡参三钱 地骨皮二钱 杭芍三钱
黄芩一钱，酒炒 甘草三分

二付。

李俊注：此经漏也。月事不时而至，谓之经漏，经漏者，血崩之渐也。宿昔皆先期至者，血分素有热也。冬尽春来，由寒生温，寒温相搏，郁而生热，则血分较往时尤热，故离经妄行而为经漏。正月建寅，肝木渐旺，至而太过，则满于经，故左脉有力也。本旺宜平，故平以白芍；血热宜凉，故凉以紫草、地骨皮；寒温相搏而生热，热宜凉而寒宜散，故散以当归；五行消长之序，木旺则金衰，金愈衰则木愈旺，故用酒芩泡参，清金益肺以生水养木；四时皆不离土，故微用甘草以和中也。

服毕血止，惟右胁串痛，又方正月下旬。

秦归三钱 泡参三钱 杭芍四钱 苡仁三钱 木通二钱
甘草五分

一付全愈。

李俊注：肝脉布胁，助脾之用，在右，右胁串痛者，木旺克土也。白芍平肝之有余，当归散寒活血，木通行经络以止痛，泡参益气生血，苡仁健脾除湿，甘草和中则补土生金以胜本也。

《至真要大论》曰：风气大来，木之胜也，土湿受邪，脾病生焉。夫木有余则土不足而生湿，本方之用苡仁、木通者，此也。然白术为补脾燥湿要药，授《金匱要略》肝病当先实脾之例，正中竅要，而竟不用者，盖病之本由于血热，血热则燥胜，白术温燥，利于脾则不利于肝，故仅用苡仁平淡之品以为治，而免顾此失彼也。前后两方皆平淡无奇，惟上工能以平淡无奇之药治大病。孙子曰：善用兵者，无赫赫之功，此之谓矣。

《圣余医案诠释》

赵廷玉

崩漏夹外感寒热，恶浊行之不已，胸寒痰多，木郁亦重，形体消瘦损怯之象，防生枝节，拟方斟酌服。

蒲黄炒阿胶三钱 紫丹参三钱 焦谷芽三钱 小青皮钱半
 全当归三钱 抚川芎钱半 黄郁金 钱半 省头草钱半 白茯苓三钱
 广陈皮钱半 大白芍三钱 益母花三钱 沉香片四分，水炒
 鲜金橘叶七片

《医案》

方耕霞

王。营虚气弱，冲任失固，经事淋漓，腰酸带下，头目晕眩，肝肾两伤，脾不能统，延防崩漏，宜肝脾肾三脏并治，兼摄奇经。

土炒当归钱半 苏梗盐水炒，钱半 生甘草三分
 紫丹参盐水炒，钱半 乌贼骨三钱 煅牡蛎先煎，七钱
 赤白芍土炒，各钱半 黑料豆三钱 云茯苓三钱 沉香曲包三钱
 大砂仁盐水炒，一钱 青陈皮各一钱 震灵丹包，钱半
 潼白蒺藜盐水炒，各三钱 薄荷梗后下，五分

何。胞门虚冷，督脉不固，带浊频漏不已，脉细弱，拟温下元以摄之。

补骨脂蜜麸肉炒 川断 菟丝子 杜仲鹿角霜 益智仁 大茴香 杞子 五味 覆盆子 牡蛎 龙骨

任。气虚营热，木火易张，肺经受刑，为咳嗽经事淋漓。拟凉营益气，佐以调固奇经。

细生地 黄芪 牡蛎 萸皮 百全 升麻 南北沙参 茜草炭 浮麦 风白芍 桑叶 川贝 红枣 冲入鲜藕汁一杯

二诊：经漏已止，咳嗽亦松，再养血清肺。

熟地 当归 风白芍 川续断 黄芪 乌鲗骨 牡蛎 川贝 前胡 桑皮 砂仁

三诊：带止咳瘳，议益气以生血。

四物汤加黄芪 艾绒 蒲黄炒阿胶 陈皮川续断 砂仁

屈。寒热往来而见灰膩湿伴之苔，湿遏热伏于太阴阳明耳。汗

多不解恶露淋漓，脉浮虚数，小产既伤其血，汗出复夺其营，病涉虚虚，但一候有余，伏邪未化，更属正虚邪实，殊难措手。

黄芪桂枝汤去炙草合小柴胡汤去参枣加茯神 竹茹

二诊：昨晓寒热来时瘀露又大行，几至气逆昏厥。今冷热未作，口渴较减，舌苔较化，伏邪已有化机。但左脉空大，正气营液虚极，若再寒战汗出，恐有厥脱之变。拟方同承之先生酌议。

黄芪桂枝汤合小柴胡汤加阿胶 陈皮 竹茹

三诊：伏邪解后，漏止胃醒，颇为佳象。惟白带未净，少腹作痛，乃小产元虚，气不固摄，八脉失护所致，再养血益气以摄之。

熟地 白芍 艾绒 归身 小茴 黄芪防 风炒 阿胶 炮姜 黄柏炭 炙草 牡蛎

程。由脾不统血而为癸事淋漓，致血舍空虚，手足麻木，腰如束带，胸中嘈杂，阴血既亏，跷维督带，俱不用事。病关八脉，未能急于建功。

制首乌 白芍 冬术 鹿角霜 朱麦冬 风归须 升麻 枳子 朱茯神 天麻 枣仁 木香

顾。肝脾两伤，脾伤则气陷，为癸事淋漓。肝伤则气逆，为脘腹作痛。病延日久，脉细而弦，由肝脾而及冲任矣。舌苔光剥，乃阴亏，进以腻补恐伤胃气。今先平其肝逆，举其陷气，使木气条达，土气和煦。苟能谷食日增，虽不补阴补血，自能潜滋默长。

于术 炙草 吴萸 肉桂炒白芍 归身 柴胡 砂仁 鹿角霜 艾绒 川断肉 防风

《倚云轩医话医案集》

张锡纯

天津徐姓妇，年十八岁，得血崩证。

病因：家庭不和，激动肝火，因致下血不止。

证候：初时下血甚多，屡经医治，月余血虽见少，而终不能止。

脉象濡弱，而搏近五至。呼吸短气，自觉当呼气外出之时，稍须努力，不能顺呼吸之自然。过午潮热，然不甚剧。

诊断：此胸中大气下陷，其阴分兼亏损也。为其大气下陷，所以呼气努力，下血不止，为其阴分亏损，所以过午潮热。宜补其大气，滋其真阴，而兼用升举固涩之品方能治愈。

处方：生箭芪一两 白术炒五钱 大生地一两 龙骨一两，煅捣
牡蛎一两，煅捣 天花粉六钱 苦参四钱 黄柏四钱 柴胡三钱
海螵蛸三钱，去甲 甘草二钱

西药麦角中者一个，掺乳糖五分，共研细，将中药煎汤两大盅，分两次服，麦角末亦分两次送服。

效果：煎服一剂，其血顿止，分毫皆无，短气与潮热皆愈。再为开调补气血之剂，俾服数剂以善其后。

《医学衷中参西录》

巢渭芳

夏壑，某右，二十六岁 崩漏屡作，面黄带红，并不腰痛，脉来弦滑无力，此乃肝虚湿瘀阻经。宜调肝化湿法。以螯梗、炒白芍、炒黑杜仲、法半夏、杭甘菊炭、大丹参、炮黑姜、制香附、茯苓、橘红、佩兰、川续断、红枣等治之而痊。

小河，王右，三十五岁。崩下，因多服化湿药，以致胃脘疼痛，血仍不止，食物不多，服此方效。炮姜、归身、五味子、香砂仁、炙草、川断、炒白芍、川杜仲、黄芪、丹参、延胡索、枸杞子、南枣。

王右，四十四岁。血崩已久，前曾经治愈。近来气虚血弱，温摄兼酸缓微甘法进治，以白归身、川杜仲、五味子、卷柏炭、鹿角胶、茯苓、川续断、炙黑草、大白芍、大丹参、生黄芪、炒防风、龙眼肉，三剂已效。

《巢渭芳医话》

陈莲舫

海宁，蒋。肝脾统藏失司，连年转月，如崩如漏。春夏交崩而尤甚，遂至肢体浮肿，头眩心悸，肢节俱酸。腹痞减而仍留，带下不断赤，脉细涩。营阴过伤，气无依附。防气不归原，拟用温养。

吉林须 抱茯神 大生地 蒲黄炒炭 菟丝子 沉香屑 炒夏曲
侧柏叶 安肉桂 花龙骨 生白芍 川杜仲 北五味 广陈皮
皮 红枣

复方：台参须 抱茯神 丹参炭 血余炭 柔白薇 炒夏曲
侧柏叶 生於术 花龙骨 归身炭 生白芍 沙苑子 广陈皮
红枣

朱奶奶。妇科以肝为先天。肝气偏旺，肝营有摄，牵引心脾两经，如崩如漏，绵延月余，腹角作痛，子下更多。渐至头眩心悸，腰腿酸软，脉息濡细。治以和养，接以摄纳。

安肉桂 吉林须 元生地 抱茯神 川杜仲 炒侧柏 制香附
陈阿胶 生白芍 花龙骨 沙苑子 广陈皮 红枣

复方：红藤膏 吉林须 西洋参 抱茯神 川杜仲 陈棕炭
制香附 陈阿胶 生白芍 川棘子炒 花龙骨 沙苑子 小蓟炭
荷蒂

蒋。崩漏受伤，致营虚气痹，腹间结痼，攻动痛胀，遂至上实下虚，头眩耳鸣，肢腰酸冷。上下不协，中焦乃为胀满作痛。脉息沉弦，拟用调气和营。

制香附 广橘叶 大丹参 川石斛 九香虫 洋佩兰 绿萼梅
小青皮 抱茯神 川杜仲 生白芍

复方：吉林须 制香附 旋覆梗 抱茯神 川杜仲 柔白薇
新会皮 红藤膏 真獭肝 丝瓜络 远志肉 沙苑子 生白芍
伽南香

角直，某。脘腹攻痛，腰脊酸疼，痛甚似经似带，淋漓不断，治以

和养。

制香附 全当归 抱茯神 沙苑子 新会皮 生白芍 九香虫 花龙骨 川杜仲 侧柏叶

角直，某。崩止仍漏，劳顿即甚，致心脾失养，肝阳转旺，遂至头眩颤红，腰脊酸楚。营愈亏则气偏独用，当脘胀满，腹痞上升。再以和养。

吉林须 真獾肝 玉蝴蝶 制香附，抱茯神 川杜仲 柔白薇 阿胶珠 绿萼梅 代代花 广橘叶 花龙骨 生白芍 乌沉香 丝瓜络

初夫人。偏产后，月事参差淋漓太多。近复如漏绵延，腰酸，色淡，多食则每为飧泄。脉息细涩，左弦。拟和心脾，而兼厥阴。

吉林须 抱茯神 补骨脂 川杜仲 陈棕炭 煨木香 佛手花 阿胶珠 花龙骨 淡吴萸 艾绒炭 炒侧柏 生白芍 南枣青浦，宋小姐。心脾两虚未复，肝气转旺。得食胀满，两足浮肿，脉象细弦。八脉亦失充养，以致气无以摄，营无以补，再从固养。

吉林须 抱茯神 元生地 蒲黄同打 川杜仲 炒夏曲 细香附 秋石炒 炒侧柏 炒於术 白芍 花龙骨 炮姜炭 新会皮 绿萼梅 红枣

复方：月事淋漓已止，脘胀足肿亦渐减轻。再培心脾，而和肝气。

吉林参 抱茯神 元生地 川杜仲 法半夏 制香附 炒侧柏 野於术 陈阿胶 生白芍 菟丝子 新会皮 炮姜炭 红枣

《蓬斋秘旨》

邵兰荪

崩漏后，腹满气滞作痛，脉清数，腿跗浮肿不退，宜和营卫为主。

当归二钱 菴荳蔻三钱 西琥珀八分 炒白芍一钱五分

广木香六分 炒车前三钱 抱木茯神四钱 五加皮三钱 冬瓜子三钱
九香虫一钱 佛手花八分 四贴

邵氏医案》

何长治

右 咳呛多痰，骨蒸，经漏 肺肝同病也

生地三钱 归身二钱 苏梗钱半 山药三钱 酒炒黄芩钱半
甘草四分 川贝二钱 茯苓三钱
冬瓜子三钱

右。崩漏后，右臂发痠已久，近溃出水如豆渣，兼黄水，脉细数无力。系郁思伤肝，瘀凝结毒也。拟和肝理气为先。

当归身二钱 抚芎劳八分 香乌药钱半 赤茯苓三钱
炒山栀钱半 生甘草四分 酒炒白芍钱半 炒青皮钱半 广木香五分
香附炭二钱 广陈皮八分 加酒炒细桑枝三钱 海藻四钱

《何鸿舫医案》

王仲奇

孙右，汉口，六月廿二日。冲为血海，女子系胞即系于此。结稿十一载，未尝孕育，经事缠绵日多，少腹胀坠，或一月而两至，头脑眩暈，脉来弦涩。恐崩漏之渐，治以镇摄。

龟版炙枯黄先煎，六钱 石决明煨先煎，四钱 续断炒，二钱
白蒺藜三钱 金钗斛二钱 条芩酒炒，一钱二分 白芍酒炒，二钱
贯众炒 钱半 海桐皮二钱 凌霄花二钱 山茶花两朵 红月季花三朵
红鸡冠花一钱二分

二诊：七月初六日。胞脉为病，经事缠绵日多，前以镇摄即止，睡眠亦颇安逸，惟头眩，目珠胀，少腹时仍作坠，肌肤中隐有青黄色。仍守原意，参用调营，为防崩漏。

紫贝齿煨先煎，二钱 白决明煨先煎，四钱 龟版炙去黄丹，六钱
条芩酒炒，一钱二分 当归头炒，三钱 杭白芍炒，二钱 全钗斛三钱
续断炒，二钱 白蒺藜三钱 卷柏炒，钱半 地榆炒，三钱 红鸡冠花钱半

二诊：七月十一日。经水适来，少腹酸胀作坠，往常寒甚哆而淋漓日多，胞脉为病，中海失摄；头眩目珠胀 中海通脑海故也；肌肤及面容色黄，则血虚之过。

左牡蛎煨先煎，三钱 石决明煨先煎，四钱 龟版炙去黄丹，六钱
禹余粮制先煎，三钱 白蒺藜三钱 白芍炒，三钱 续断炒，二钱
地榆炒，二钱 卷柏炒，钱半 阿胶珠二钱 条芩酒炒，钱半
甘甘枸杞炒，二钱 红鸡冠花一钱二分

四诊：七月廿七日。上月经行颇爽，少腹痛寒，惟既净以后复见淋漓少许始已，头眩、目珠胀向安，形色亦稍充平，脉濡滑 仍以调营，固奇恒之府可也。

紫贝齿煨先煎，二钱 白决明煨先煎，四钱 龟版炙去黄丹，六钱
青防风炙，一钱 淮香二钱 续断炒，二钱 白蒺藜三钱 白芍炒，二钱
地榆炒，二钱 卷柏炒，钱半 条芩酒炒，一钱 红鸡冠花一钱二分
山茶花三朵

方有 霞飞路，七月廿三日 上月经行淡旬方净，现来两来复未强，初起乍涌色深有块，日来则淋漓色黄，气殊恶浊，少腹坠胀了脏为病，消弭隐患于未然，斯为上策。

禹余粮制先煎，二钱 紫贝齿煨先煎，二钱 条芩酒炒，钱半
白薇三钱 贯众炒，二钱 白蒺藜二钱 凌霄花一钱 忍冬藤二钱
卷白炒，钱半 乌鲗骨炙黄，二钱 海桐皮三钱 红白鸡冠花各一钱

二诊：七月卅日。恶露已弭，少腹胀坠获舒，隐患可冀潜消。仍守原意为之，以期除恶务尽

禹余粮制先煎，三钱 紫贝齿煨先煎，二钱 石决明煨先煎，四钱
龟版炙黄丹，六钱 白薇三钱 条芩酒炒，一钱 忍冬藤二钱
海桐皮二钱 乌鲗骨炙黄刮去皮，三钱 凌霄花二钱 红白鸡冠花各一钱

白芍炒，二钱

张右，周家咀路，七月廿一日。经来四十余日，或淋漓缠绵，或全涌而至，是为崩漏；但少腹有所膨胀而痛，乍起乍伏，痛剧欲坠，便溺不爽，腰酸心悸，脉弦涩而数。不仅气结血耗，脉海弗固，殊防隐疾也。

龟版炙焦黄先煎，六钱 石决明煨先煎，四钱 地榆炒，三钱
卷柏炒，钱半 贯众炒，钱半 忍冬藤二钱 络石藤三钱 续断炒，二钱
凌霄花三钱 茯苓三钱 粉丹皮炒，钱半 乌鲗骨炙黄，三钱
红鸡冠花一钱二分 震灵丹吞，二钱

二诊：八月初六日。恶露红已见净，白仍未弭，少腹膨胀有癖，卧则扪之可得，便溺不利，脉弦滑；日来感受伤风，咳嗽痰多。仍以原意消弭隐患，参以化风豁痰。

法半夏钱半 生苡仁三钱 玉苏子二钱 桑白皮炙，钱半
杏仁去皮尖杵，三钱 紫菀钱半 茯苓三钱 青皮炒，一钱二分
厚朴钱半 凌霄花三钱 白藜三钱 卷柏炒，钱半 乌鲗骨炙黄，三钱
白鸡冠花一钱二分

三诊：八月十七日。恶露弭已三日，小溲较畅，少腹膨胀气癖亦瘥，精神稍振；仍有咳嗽，胃纳未强。守原意变通之。

白蒺藜三钱 茯苓三钱 贯众炒，钱半 杏仁去皮尖杵，三钱
橘红衣一钱 紫菀钱半 忍冬藤三钱 绿萼梅八分 卷柏炒一钱
乌鲗骨炙黄，三钱 凌霄花二钱 白鸡冠花一钱二分

帅右，候家浜，一月中经来三转，淋漓继续弗爽，乍寒乍热，夜难安寐，入寐多梦，腹乍痛，大便不调，脉濡弦。心藏神主血属营，营行脉中，脾为营之源，心神失宁，脾运呆钝，营弱不共卫气谐和。姑以本事方意。

青龙齿煨先煎 香白薇炒 青蒿 全当归 柴胡炙 生于术
茯苓 丹参 远志肉炙 橘红衣 绿萼梅 鸡冠花 乌鲗骨炙黄

二诊：恶露已断，大便欲解弗爽，少腹两旁暨腰肋作痛且胀，偏

左较甚，胸闷欠适，时或暖噫，夜寐多梦弗宁，或有汗出，脉濡滑而弦。仍以心脾两治，参以疏肝。

青龙齿煨先煎 远志肉炙 茯苓 全当归 白芍炒 柴胡炙
生于术 香白薇炒 续断炒 绿萼梅 白蒺藜 鸡冠花
乌鲗骨炙黄

于女士，爱麦虞根路。流产之后胞脉损伤，久未平复，恶露忽行忽止，劳顿吃力较甚，神思失宁，胃纳弗旺，喜麦恶谷，脉濡滑。且以调营镇摄。

左牡蛎煨先煎 龙骨煨先煎 茯苓 生于术 当归头 白芍炒
菟丝饼 白薇 刺猬皮炙 乌鲗骨炙黄 鸡冠花 椿榔白皮
赤石脂煨先煎 震灵丹分吞

二诊：胞脉已固，恶露获止，惟四肢仍酸软乏力；缘流产奇恒有亏，精血难复，脉濡滑微弦。仍以原法出入。

左牡蛎煨先煎 赤石脂煨先煎 生于术 当归头 白芍炒
菟丝饼 潼沙苑 淡苣蓉 甘甘枸杞炒 续断炒 茯苓
乌鲗骨炙黄 鸡冠花

胡右，建平，二月廿九日。去夏坐蓐之后，曾作血晕，久不吮乳，胞脉仍闭，当脐动跃，按之以手抗力甚大，日前忽漏下盈盘，今尚未净，面浮，肌肤萎黄，耳鸣头眩，脉空弦。此子脏病，涉及心脾也。从崩漏治法，以防晕厥。

紫石英煨先煎，四钱 代赭石煨先煎，三钱 灵磁石制先煎，三钱
龟版炙黄先煎，六钱 续断炒，二钱 地榆炒，三钱 贯众炒，钱半
当归炒炭，三钱 白蒺藜三钱 茯苓六钱 乌鲗骨炙黄，三钱
震灵丹吞，二钱

二诊：三月二日。当脐动跃，按之以手反抗力稍平，头眩耳鸣、面浮、肌肤萎黄较愈，惟漏下未止，昨仍盆涌面至，腰酸，稍有咳嗽。仍从崩漏治法，摄冲海以养心脾。

紫石英煨先煎，四钱 左牡蛎煨先煎，三钱 龟版炙黄先煎，六钱

当归炒炭，二钱 贯众炒，二钱 地榆炒，三钱 续断炒，二钱
条芩酒炒，一钱二分 白蒺藜二钱 海桐皮三钱 紫菀钱半
乌鳢骨炙，三钱 红鸡冠花一钱二分 震灵丹吞，二钱

三诊：三月初四日。脐间动跃虽未静息，然不似前之刚劲强硬；头眩耳鸣、面浮、肌肤萎黄较瘥；漏下未住，腰酸，忽而形寒，忽而温热，盖血去多，营卫不相谐也。再以镇摄冲海，养心脾，调营卫。

紫石英煨先煎，三钱 左牡蛎煨先煎，三钱 淮耆三钱 当归炒炭二钱
白芍炒，三钱 白蒺藜三钱 地榆炒，三钱 续断炒，二钱 海桐皮三钱
条芩酒炒，一钱二分 甘甘枸杞二钱 乌鳢骨炙黄，三钱
红鸡冠花一钱二分 震灵丹吞，二钱

四诊：月廿七日。证药相安，腰酸耳鸣见愈，脐间筑筑而动稍减然未平息，有时气升，胸脘作胀，未食则思，既食则厌，虽食欲较前增加而轻微之寒热日作未止，是皆崩漏之后。冲海之镇摄，营卫之循行尚未恢复也。仍拟摄冲海，养心脾，调营卫。

左牡蛎煨先煎，三钱 鳖甲炙，先煎，三钱 淮耆三钱 当归炒炭二钱
白芍炒，二钱 青蒿三钱 香白薇炒，二钱 法半夏钱半 茯苓三钱
白蒺藜三钱 橘红衣一钱 条芩酒炒，一钱 乌鳢骨炙黄，三钱

舒右，山西路。胞脉损伤，奇恒失藏，恶露淋漓缠绵月余不住，紫黑红黄杂见，且有瘀块，腰俞尾骶作酸，少腹关元作痛，头疼心悸，脉弦涩而濡。治以清泄镇摄互施。

左牡蛎煨先煎 龙骨煨先煎 赤石脂煨先煎 大有耆 当归头
刺猬皮炙 柴胡炙 升麻炙 香白芷 白蒺 乌鳢骨炙黄 凌霄花
鸡冠花 木莲烧炭研末冲

诊 恶露淋漓缠绵业已见止，惟少腹关元间仍作痛，尾骶腰俞作酸，头眩心悸，脉软弦。仍守原意，冀弭隐患。

左牡蛎煨先煎 龙骨煨先煎 赤石脂煨先煎 大有耆 当归头
川杜仲炒 续断炒 菟丝饼 益智仁 茯苓 白蒺 刺猬皮炙
椿栲白皮 乌鳢骨炙黄

阮右，九亩地。胞脉为病，恶露始初盆涌有块，既而淋漓缠绵，将近四十日弗住，少腹胀痛有症结，脉弦。从崩漏治法。

左牡蛎煨先煎 全当归 白芍炒焦 紫胡炭 条芩炒 生于术 茯苓 续断炒 香白芷 白苡 刺猬皮炭 乌鲗骨炭 红白鸡冠花

二诊：恶露淋漓缠绵，紫黑红黄杂见，今已获止，惟少腹症结未消，有时胀痛，头眩脐酸，脉濡弦。守原意出入。

赤石脂制先煎 当归头 白芍炒焦 柴胡炭 生于术 制川朴 条芩酒炒 远志肉炭 茯苓 白蒺藜 香白芷 白苡 五灵脂炒去砂石 凌霄花

吴右，贝勒路，九月廿六日，经行淋漓缠绵月余不住，今见盆涌而至，有瘀块甚夥，始为漏下，延为崩中；少腹痛，头眩，腰疼腿酸，脉弦涩而数。子脏内伤，恐成隐疾。

龟版炭煨黄先煎，六钱 禹余粮制先煎，三钱 贯众炒，二钱 地榆炒，三钱 条芩炒，钱半 续断炒，二钱 川芎炒，八分 当归炒，二钱 阿胶珠 三钱 乌鲗骨炭煨三钱 陈艾叶炒，八分 红白鸡冠花各一钱二分

二诊：十月初七日。崩漏缠绵四十余日，前已稍减，时断时续；日来则又盆涌而至，腰疼腿酸，头脑昏闷不清，惟少腹痛较愈，脉弦涩。再以清泄固摄互施，防弭隐患。

紫贝齿煨先煎，三钱 左牡蛎煨先煎，三钱 禹余粮制先煎，三钱 条芩炒 钱半 贯众炒，二钱 地榆炒，二钱 旱莲草 三钱 白苡 三钱 续断炒，二钱 刘寄奴 钱半 凌霄花 三钱 红白鸡冠花各一钱 乌鲗骨炭煨三钱 震灵丹 存 二钱

三诊：十月十四日。崩漏两月，进清泄固摄互施，业已见弭，头痛、腰疼、腿酸获愈，已得安寐，脉来濡涩。守原意出入可也。

左牡蛎煨先煎，二钱 龙骨煨先煎，三钱 禹余粮制先煎，三钱 桑螵蛸炒，二钱 淮薏 二钱 旱莲草 三钱 冬青子 三钱 菟丝饼 二钱

续断炒，二钱 潼沙苑三钱 白芍酒炒，二钱 条芩酒炒，一钱二分
红白鸡冠花各钱半 震灵丹吞，钱半

四诊：十月廿六日。崩漏已愈，带淋未住，不能劳事，脉濡弦。冲任脉海未固，再以补摄。

石决明煨先煎，四钱 左牡蛎煨先煎，三钱 甘甘枸杞炒，二钱
杭白芍酒炒，二钱 制首乌四钱 川杜仲三钱 续断炒，二钱
菟丝饼二钱 潼沙苑三钱 冬青子三钱 淮耆二钱 金钗斛二钱
白鸡冠花钱半

杨右，高昌庙，九月廿四日。崩漏缠绵三月，有瘀块而秽恶，少腹胀痛，腰酸时欲作坠，便溺不爽，头眩肝酸，面黄肌黄，脉弦涩。子脏已伤，隐患难消弭也。

贯众炒，二钱 地榆炒，三钱 刘寄奴钱半 续断炒，二钱
忍冬藤三钱 络石藤三钱 条芩酒炒，钱半 茯苓三钱 白藜三钱
乌鲗骨炙三钱 红白鸡冠花各一钱二分 凌霄花三钱 震灵丹吞，二钱

二诊：九月廿七日。崩漏缠绵三月，有瘀块而秽恶，前与清通镇摄，恶露已弭，少腹仍然胀痛，腰酸时欲作坠，数大便而不爽，头眩肢酸，面黄肌瘦，脉弦涩。子脏久伤，隐患难消弭也。

禹余粮制先煎，三钱 条芩酒炒，一钱二分 贯众炒，二钱
续断炒，二钱 全当归三钱 茯苓三钱 白藜三钱 陈枳壳炒，钱半
杏仁去皮尖三钱 乌鲗骨炙三钱 凌霄花三钱 红白鸡冠花各一钱

三诊：十月十九日。崩漏瘀块业已见弭，面黄肌黄稍有津泽，少腹胀痛，腰酸作坠，便溺仍不爽适，纳食胸脘闷痛，脉弦涩。隐疾之萌孽未除，宜慎毋忽。

刘寄奴钱半 凌霄花三钱 白藜三钱 杏仁去皮尖三钱
条芩酒炒，一钱二分 厚朴花钱半 陈枳壳炒，钱半 茯苓三钱
青皮炒一钱 续断炒，二钱 台乌药钱半 乌鲗骨炙三钱
白鸡冠花一钱

四诊：十月廿三日。恶露瘀块弭经已久，便溺已畅，腰酸略减，

四肢仍酸，头痛容黄，纳食胸脘依然胀闷，脉弦。守原意出入。

刘寄奴钱半 凌霄花一钱 续断炒，二钱 佛手柑一钱 泽兰三钱
白蒺藜三钱 马鞭草二钱 蒲公英三钱 厚朴花一钱
青皮炒，一钱二分 乌鲗骨炙黄，三钱 陈枳壳炒，钱半
白鸡冠花一钱二分

陈右。广西路，嘉平初七日。经来时断时续已经匝月，头眩，脉濡弦涩。夜寐太迟，营血内耗，脉海失固，防崩漏。

龟版炙黄先煎，六钱 石决明煨先煎，四钱 左牡蛎煨先煎，三钱
禹余粮制先煎，三钱 地榆炒，三钱 贯众炒，二钱 续断炒，二钱
白芍炒，二钱 白蒺藜三钱 海桐皮三钱 条芩酒炒，一钱二分
乌鲗骨炙黄三钱 红鸡冠花钱半

二诊：十二月二十日。胞脉既固，时断时续缠绵匝月之经水得以见止，带下仍多，脉濡弦。守原意调其奇经可矣。

龟版炙黄先煎，六钱 石决明煨先煎，四钱 左牡蛎煨先煎，三钱
甘甘枸杞炒，二钱 白芍炒，二钱 续断炒，二钱 潼沙苑三钱 丹参二钱
野茯苓三钱 乌鲗骨炙三钱 白鸡冠花一钱

汪右。三月经停不行。四月忽全涌如崩漏，头眩目花，筋骸酸痛，心悸脉数，夜寐不安，治以调摄冲海。但素有水肿之患，今足肢尚微肿，亦宜兼顾也。

龟版炙黄先煎，五钱 石决明煨先煎，四钱 生牡蛎先煎，三钱
茯苓三钱 丹参二钱 白蒺藜二钱 续断炒，二钱 金钗斛二钱
桑寄生二钱 丝瓜络三钱 条芩炒一钱 夜交藤三钱

二调：调摄冲海，以和络血，络血通行，方免跗肿之患，冲海镇摄，庶无崩漏之虞。

紫石英煨醋淬，一两二钱 牡蛎煨，两半 禹余粮制，二两
乌鲗骨炙黄刮去皮，二两 全当归两半 白芍炒，两半 续断炒，二两
于术蒸一两 茯苓二两 川桂枝六钱 白蒺藜二两 丹参两半
桑寄生两半 条芩炒，八钱 海桐皮两半

上药研末，用益母草二两熬水法丸，每早、晚以开水送下二钱。

《王仲奇医案》

刘奶奶。初诊：九月四日。

胞脉损伤，恶露淋漓缠绵，或时断时续，或崩涌而下，紫黑红黄杂见，头痛日眩，时有心悸，已阅月之久。脉濡弦涩。治以镇摄，冀弭隐患。

生丁木二钱 当归头炒炭，三钱 煅牡蛎四钱 赤石脂一钱，包
草河车二钱 茯苓三钱 炒焦白芍二钱 白蒺藜三钱 白敛三钱
炙刺猬二钱 乌鲗骨三钱 鸡冠花一钱五分 震灵丹三钱
桂圆肉七枚同包煎

复诊：九月七日。

冲任之脉，并起胞中，胞脉损伤，冲少镇摄，恶露淋漓缠绵，紫黑红黄杂见，已三阅月之久。时有心悸，寐觉喉舌干燥，腰膝作酸。脉濡弦。前以镇摄颇安，守原意出入之。

煅牡蛎四钱 炙龟板八钱 白蒺藜三钱 煅龙骨四钱
金钗斛二钱 天花粉二钱 赤石脂三钱，包 白敛三钱 草河车二钱
乌鲗骨二钱 鸡冠花一钱五分 震灵丹三钱，桂圆肉二枚同包煎

三诊：九月十日。

胞脉稍固，奇恒较藏，恶露淋漓缠绵，紫黑红黄杂见，经三阅月之久，日来将净未净，似带非带，喉舌作干较甚，惟心胸曾觉嵌下欠适。脉濡滑而弦。守原意为之可矣。

煅牡蛎四钱 炙龟板八钱 白蒺藜三钱 煅龙骨四钱
金钗斛三钱 炙远志肉一钱 白敛三钱 凌霄花二钱 生地黄五钱
草河车二钱 乌鲗骨三钱 鸡冠花一钱五分 震灵丹二钱
桂圆肉七枚同包煎

四诊：九月十五日。

冲为血海，阳明隶属。冲海失摄，肠胃腑气又复失和，恶露淋漓缠绵，经二阅月之久，日前，已渐见水，昨今又较见多；且腹笥欠适，

便溺觉热，胸宁气闷，时欲泛呕，脉濡弦，肛有痔患，治当两顾。

白茯苓三钱 生于术二钱 炙远志肉一钱 茯苓三钱
制川朴一钱二分 炒条芩一钱五分 炒陈枳壳一钱五分 凌霄花二钱
白敛二钱 草河车二钱 乌鲗骨三钱 鲗鸡冠花一钱五分
木莲一钱，烧炭研末冲

五诊：九月廿五日。

恶露已弭，肠急失舒，腑气不通，大便里急，欲下不下，殊觉吃力；且肛有痔患，尤感觉不快，时或眩晕。脉弦滑而濡。治以通腑利便，参以清脑可也。

柏子仁四钱 油当归三钱 瓜蒌仁四钱 炒麻仁四钱
冬葵子四钱 杏仁三钱 玉苏子二钱 炒陈枳壳一钱五分
无花果三钱 紫菀一钱五分 玄明粉三钱，冲 白蜜三钱，冲

《近代中医流派经验选集》

孙采邻

海盐张铁珊乃室，道光丙戌十二月二十四日诊。经停两月余，忽于是月十七，经行三日，至二十日，骤然大崩，以致神倦乏力，食少汗多，怕明喜暗。服药后经水仍频出不止，于是始告治于余。余至，适前医周半池兄诊完疏方，用人参、黄芪、於术、熟地、龟板、鹿角霜、牛角腮、枣仁、棕灰、龙齿、牡蛎、阿胶、续断、杜仲等。观其方意，却是固气统血之法，第熟地、阿胶辈，可以从缓。一嫌其腻，又嫌其食饮未贪者，恐不利于脾胃也，余于方中去此二味，加丹参三钱，血余炭五分冲，五味子三分临服，冲入童便一酒杯。佐此四味，取其安神定志，亦固纳止崩之一助耳。

二诊：进昨议方，崩血渐减。因欲贪食，稍啖荤味，便泄随至，脉象细软。滋腻之剂宜缓投，宜以益气扶脾，希其坤土得令，庶几无妨。用党参、山药、芡实、茯苓、益智仁、煨木香、炙草、陈皮、南枣等。煎服三、四剂，漏下已停，而便泄仍日四、五次，皆缘脾土之不足耳。

拟异功法，加建莲、芡实、砂仁、归、芍、陈皮、南枣等。治之服两贴，便溲日一次，再二贴而止矣。

《竹亭医案》

王靖

邻人刘锡庆之姊，三醮而仍寡，年近五旬，忽患血崩，村医以为蹉跌，用发灰、地榆类涩之而不效。经月余，来邀余治，见其面白如灰，气息仅属，甚不堪。视其脉则沉细迟弱，凡虚象无所不有。乃曰，此病危如朝露，过半月，恐不救也。又贫寒难事药饵，急欲辞归，其婿忽止之曰：岳母病如可愈，药钱我任之，万一不救，则不必矣。余感其义，乃告之曰：君热肠如是，余当竭力，虽无旦夕效，然性命或无碍也。投以大剂六味回阳饮，二日而精神起，然崩则如故。其婿来曰，命似可救，而血崩不止。余曰，君无虑，止血崩实易事，但岳母阴阳两虚，不固其气，血崩难止。今有回阳饮以作其气，再用提补，靡不效矣。又投人参养荣丸，加柴胡、升麻以提之，又加芡实、龙骨以涩之，凡五进而血止，因命专服人参养荣丸，两月后，偕其婿来敛衽拜谢。就内人取针线数事而去。越数日精心密缕，封而呈焉。并云贫无可酬，聊以手指答救命之恩云耳。

戊午秋，张七兄亲家之夫人，继室也。年未四旬，得血崩疾。其家富甲一乡，因距城颇远，恐有仓猝病，医药不便，乃设药肆于家。而乡中贫苦者，辄造而请视疾。故亦时时观医书。以夫人病崩，自用血余数止之不效。更一医，又以为热，用寒凉清之，转益甚。乃囑张俛求余治，余以路远辞，而张哀恳至再，不得已，随之去。入而视之，见病者面如石灰，唇指皆白，知为血虚之极。乃诊其脉，则微弱特甚。乃曰，此中气下陷，脾虚不能摄血，故崩不止。再服寒凉恐血脱也。此时不宜峻补，但提其中气，气能统血，则崩自止。涩之、截之皆非法。因为开补中益气汤，宋似嫌其平平无奇。乃告之曰，君曾读医书，不闻士材先生之言乎，其云：“补气有行血之功，补血无

行气之理”。二语极为明确。可见血随气行，气升则血升，气降则血降。若不摄其气而徒止其血，所谓扬汤止沸也。今升其气，使摄血而不下降，然后再用圣愈、养荣之类补其虚，气血相调，并可受孕，治病犹余事耳。宋豁然悟，首肯者数四。更为开大剂圣愈汤，告曰，服补中汤不四贴血当止，后以圣愈汤继之，如恐其烦，可易汤以丸。余去矣，不必再视也。归不数日，时将春夏之交，宋遣人担过牡丹二本。并道病已痊愈。再三申谢。余受而栽于盆，培植灌溉，以吾乡水土杂盐卤，其性极恶。除石榴、葡萄而外，凡花果皆不宜此水，宋所送之牡丹，来时正含苞欲吐，余遣人灌溉，不数日，苞痿而枝渐枯，拔而弃之，增惜焉尔。

《醉花窗医案》

袁焯

李姓妇年逾四旬，素患血崩症。遇劳则发，思虑恼怒亦发。每发时，予皆以养阴止血之法奏效。壬子正月，病大剧，下血成斗。头晕心悸，奄奄一息，两脉虚弱，面色无华。盖失血过多，势将脱矣。因师魏柳洲治宋申甫室人之法，用熟地黄八钱，枸杞子五钱，阿胶四钱，枣仁四钱，路党参三钱。作一煎剂，一日服尽。服后心悸稍定，血下亦稍缓。接服三剂而血止。复以此方加麦冬、柏子仁等作膏剂，常服而痊。

叶姓妇年二十余。因事烦劳过度，经水淋漓不止，头晕，心悸，咽痛，脉息虚小，舌红无苔，此劳神太过，阴虚血热妄行。热上升则咽痛。其头晕心悸者，血虚而心无血养，脑筋衰弱也。先宜养血调经以止血。方用干地黄四钱，元参、阿胶、枣仁、牡蛎、麦冬、白芍各三钱，炒熟地炭二钱，香橡皮一钱五分。接服两剂，经水已止，惟咽痛头晕，饮食不多，舌红无苔，左脉较小。前方如鳖甲三钱，珍珠母五钱，桑叶三分，枸杞子、女贞子各二钱。接服四剂痊愈。

《丛桂草堂医案》

吳鞠通

丁亥二月十二日，阮氏，三十七岁。六脉俱细，左兼弦紧，下焦虚寒，八脉不固，阳气不摄之病，岂纯阴所能静守！虽暂用固涩，不旋踵而仍复崩溃；占谓初崩宜温，现在且用温经，将来非峻补八脉不可，以兼有带症故也。

鹿角霜五钱 艾炭三钱 小茴香黄酒炒，三钱 真阿胶四钱
全归二钱 干姜炭三钱 煮二杯，分二次服。二帖。

十四日：《金匱》谓：“脉双弦者寒也”，又谓：“大则为虚，弦则为减，女子半产漏下，主以小建中”。其意盖以中焦阳气为要，令营卫调和，胃旺自能生血。前以崩漏而用温下焦之阳，现在虽止，脉仍弦紧，阳未复也；况又自汗，纳食不旺。今日仍宗前法，兼与建中，以卫阳虚故也。

鹿角霜三钱 桂枝二钱 黑杞子二钱 焦白芍四钱 全归三钱
真阿胶二钱 艾炭二钱 炙甘草一钱，加黄酒湿透，炒半黑 小茴香三钱
川草薢三钱 煮三杯，分三次服 服此方四肢畏寒解，纳食旺。

十六日：崩带脉弦，左手更紧，四肢畏寒，纳食不旺，皆误用阴药之故。昨与温补下焦，兼用建中调中焦，现在四肢畏寒解，纳食稍旺，左脉之紧亦解，崩止而带未除。与通补八脉法。

鹿角霜五钱 草薢四钱 小茴香三钱 云苓块三钱 全归三钱
紫石英生研，细三钱 炙龟板四钱 杞子炒黑三钱 生姜炭一钱 煮
杯，分三次服。

十九日：前方内去生姜炭，加桑螵蛸三钱

廿二日：崩止而带未除，于前方内加入参、海螵蛸、鲍鱼。

二十三日：八脉虚寒，脉弦紧，与通补奇经丸。

鹿角胶四两 黄毛鹿茸十二两，加黄酒湿透，炒黑 小茴香六两
鹿角霜四两 云苓六两 补骨脂六两 生牡蛎六两 杞子炒黑，六两
肉苁蓉四两 炙龟板八两 草薢六两 兔丝子四两 高丽参四两

全归六两 紫石英壹研水飞，四两 右为细末，老蜜丸，如小梧子大。每服二钱，日三服；若服三钱，早晚各一次。

乙酉八月十九日，余氏，二十三岁。无论半产与暴崩，六脉沉软而细如伏，阳虚体质，产后漏经半年，经止后一年有余，忽来如崩，又疑半产。一以温经为要。

阿胶壹钱，去渣后化入 小茴香炒炭四钱 干姜炭三钱 艾叶四钱 全当归二钱 炙甘草二钱 煮两大茶杯，分三次服。

二十三日：经停年余始行，故多若暴崩，脉沉细若伏，少腹痛甚，故用胶艾汤温经。兹又感受燥金寒温，面肿胸痛而泄，少腹痛拒按，舌上白苔满布。仍与温法，去守补之阿胶、甘草。

艾叶炭五钱 炮姜五钱 小茴香炒炭五钱 姜半夏五钱 云苓五钱 淡吴萸三钱 生薏仁五钱 全归二钱 川椒炭五钱 降香末三钱 煮三杯，分三次服。

二十七日：经色全然不赤，面肿已消，似当用补？但六脉滑甚，舌苔较前虽薄，仍然纯白，腹中按之则胀，少腹仍痛，湿邪之归下焦者未消。仍与温经行湿。

艾叶炭五钱 薏仁五钱 车前子五钱 姜半夏五钱 白通草一钱 炮姜三钱 大腹皮三钱 云苓皮五钱 厚朴二钱 小茴香炒炭三钱 广皮二钱 益母膏二钱 煮三杯，分三次服。

九月初一日：经经十年有余，经通后舌白滑，五日前面肿腹痛，带下特甚，其为带脉之寒湿下注无疑。

艾叶炭五钱 薏仁五钱 车前子三钱 小茴香炒炭五钱 草薢五钱 白通草一钱 姜半夏三钱 全归三钱 益母膏二钱 大腹皮三钱 炮姜三钱 煮三杯，分三次服。

十六日：湿多成五泄，兼之口糜。与五苓散法加薏仁、木通。

猪苓五钱 云苓皮五钱 桂枝一钱 泽泻五钱 苍术炭五钱 木通三钱 薏仁五钱 煮三杯，分三次服。服二帖全愈。

十一月十四日：带症已少，不时举发，经不调，六脉阳微之极。

皆产后受伤，虚不肯复之故。治在八脉，非通补奇经丸不可；且与溺剂行湿而温经，体厚脉细易肿者湿多，此方不妨多服。

云苓皮六钱 全归三钱 紫石英三钱 川革薺六钱 艾叶炭五钱
莲子去心，连皮，五钱 炒杞子三钱，小茴香三钱 芡实五钱 煮三杯。
分三次服。

通补奇经丸方：带下本系八脉虚寒之病，久带则下焦愈虚，古人所以有漏卮之喻也。一以通补八脉为要。此证阳虚兼湿，一用熟地、萸肉阴柔之品，断无生理。

鹿角胶四两 鹿茸八两 沙蒺藜四两 肉苁蓉六两
小茴香炒炭，六两 人参四两 补骨脂四两 川革薺六两 当归六两
炙龟板四两 乌贼骨四两 桑螵蛸六两 生牡蛎六两 杜仲炭二两
紫石英生研，二两 枸杞子四两 右为细末，益母膏和丸，如小梧子大。每服三钱，早晚各服一次，不知午刻加一次。暂戒猪肉，永戒生冷，若不能戒，不必服药。间服震灵丸四、五十丸。

丙戌正月初六日：大凡胞宫累及阳明者，治在胞宫；阳明累及胞宫者，治在阳明。此症兼而有之。病起产后，漏经半年，胞宫之损可知。体厚湿重易肿，蛰食不旺，阳明之虚又可知矣。当兼治之。每日空心服奇经丸三钱，以补胞宫；午间、晚间各服汤药一碗，汤药以理阳明为主。

姜半夏六钱 云苓六钱 益智仁三钱 川革薺六钱 广皮四钱
川椒炭三钱 生薏仁八钱 生姜三钱 水八碗，煮取两碗，午服一碗，临卧服一碗。纳食渐旺，形体稍瘦，则不必服；食减不瘦，则再服。

《吴鞠通医案》

曹沧洲

某右。服酸带下经漏，使渣，牙疳肿腐，病绪杂出，当治新急。

青蒿子一钱半 白蒺藜四钱 怀山药三钱 杜仲三钱

桑叶一钱半 石决明一两 茯苓四钱 金樱子三钱 川石斛四钱
飞中白一钱半 扁豆衣三钱 六曲三钱 焦麦芽五钱，颜色

某右。正月间小产大脱血，旋下红血带，经又大至，今每来多而超前，腹胀骨酸，块从少腹上冲，声如以石激水，块攻血下，少寐心悸，晨咳，脘膈肋刺，其胀不一，善移，此皆肝不敛血，乘脾犯胃，病愈沉则块愈盛，血崩虚情，皆属可虑。

水炙鳖甲心五钱 陈情阿胶一钱半，焙粉炒珠 生白芍三钱
牛角腮炭一钱半 煅牡蛎一两 朱茯神四钱 怀山药三钱，炒焦拌
川楝子一钱半，炒 枯芩炭一钱半 炒枣仁三钱 厚杜仲三钱，盐水炒
醋节炭五钱 生熟谷芽五钱，布包

某右。带脉久陷，气营并乏，崩漏带下互缠，遂致气不化湿，湿郁熏热，少腹满而痛，牵连腿膝，而浮色眇，脉虚细而数，近又咳嗽，夜易不寐火升，正气日损，病根日深，延恐喘汗，理之竟非易易。

西洋参 盐半夏 杜仲 甘草梢 丝瓜络 生地炭 败酱草
川断 知母 藕节 生蛤壳 川楝子 淡竹叶 白薇

某右。气不化水，水下血亦随之而来，今午冲晕，较上次为剧，当时恶心暖气，呵欠并作，左手足时麻且冷，惊惕，手振，脉不敛静。

熟地炭 左牡蛎 紫石英 陈棕炭 制首乌 辰茯神 杜仲
白芍 苍龙齿 香枣仁 台乌药 漂白术

某右。初诊：心痛如饥，口吐涎涎浊沫，值经来甚多，因惊动肝，阳化内风欲厥之象，治以咸苦，佐以微辛，使人阴和阳。

阿胶 牡蛎 川楝子 小川连 川芎 当归

二诊：和阳固阴诸病大减，因经漏阴伤，阳易浮越，心怔悸，肢末痛，内风未息，药以甘柔，使胃汁日充则砥柱中流矣。

人参 阿胶 麦冬 生白芍 炙甘草 茯苓

某右。初诊：经漏三年，色脉俱夺，面浮跗肿，纳谷日减，便坚不爽，背脊腰膝酸楚如堕，入夏形神日羸，夫经水系诸血贮于血海而下，其不致崩厥淋漓者，任脉为之担任，带脉为之约束，刚维晓脉之

拥护，髻脉以总督其统摄。今但以冲脉之动而血下，诸脉皆失其司，症固是虚，饵补汤不应者，未达奇经之理耳。《内经》于胸胁支满妨食，时时前后血，特制乌贼丸咸味就下通以济涩，更以秽浊气味为之导引，同气相需。后贤谓久漏久崩宜清宜通，正与圣经相符。夏月大气泄越，脾胃主令，岁气天和保之最要，议早进通阴以理奇经，午余天热气泄必加烦倦，随用清暑益气之剂以顺天气，俟秋半收肃令行，可望其藏聚气交而奇脉渐固，此久损难复，非可体试以速功者。

早上汤药议用通阴潜阳法。

龟甲心 鹿角霜 真阿胶 柏子霜 生牡蛎 锁阳

另煎人参汤入滤清药，内煮五十沸。

鹿性阳入督脉，龟体阴走任脉，阿胶得济水沉伏，味咸色黑，熄肝风养肾水，柏子芳香滑润，养血理燥，牡蛎去湿消肿咸固下，仲景云：“病人腰以下肿者，牡蛎泽泻汤，锁阳固下焦之阳气。”乃治八脉之大意。

乌贼骨丸

乌贼骨四分，鹿角一分，米醋炙，去甲，另研水飞。

上为细末，用雀卵量捣为丸，每服三钱，药前先饮淡鲍鱼汤一小杯为导引。

二诊：进前法潜阳颇效，但左耳鸣盛，肠中亦鸣，肝阳内风升动未息，减刚用柔。

龟甲心 真阿胶 柏子霜 天冬 女贞实 旱莲草

另煎人参汤入清药内，再煮五十沸。

三诊：两进柔润清补颇投，询知病由乎悲哀烦劳，调理向愈。继因目病，服苦辛寒散太过，遂经漏淋带，年前七八日始净，今则两旬而止，此奇脉内乏，前议非诬，据述周身累现瘾疹痞垒，搔痒不宁，想脂液久渗，阴不内营，阳气浮越，卫怯不固，客气外乘，凡六淫客邪无有不从热化，《内经》以疮痍诸病皆属于火，然内症为急，正不

必以肌腠见病为治。两三月间又将值经期，拟进固脉安下，佐以东垣泻阴火意，经至之先用此方。

龟甲 鹿角 真阿胶 人参 桑螵蛸 生白龙骨 旱莲草 茯神 知母

某右。崩漏两年，先有带下，始而半月发病。今夏季每交申酉其漏必至，思平午为阳中之阴，阴虚阳动，冲脉任脉皆动，下无提防约束，夫奇经肝肾主润为多，而冲脉隶于阳明，阳明久虚，脉不固摄，有开无合矣，但以涩剂苟安旦夕，未乃按经论病，毫无一效。海螵蛸 鲍鱼 茜草 生菟丝子 石决 广莲肉

接服乌贼鱼骨丸。经漏十二年，五液皆涸，冲任不用，冬冷稍安，夏季病加必摇动，腹中热，腰膝跗骨皆热，此皆枯槁日著，古谓暴崩宜温，久崩宜清，以血去阴耗耳。

人参 生地 天冬 人乳粉 柏子仁 茯神 枣仁 白芍 知母 阿胶 蜜丸

《吴门曹氏三代医验集》

金子久

一妇人以肝为先天，肝藏血而脾统之。肝有宿热，则肝阳偏强，藏失其职，则疏泄太过，经水来时不能摄止，且脾脏有湿，阴分日亏，而带下不止矣。益以悲愁交集，抑郁不舒，肝木失条达之性，而心神亦耗。心肾失交，不能主血，此崩漏所以日盛也。腰痛腿酸，眩暈耳鸣，胃纯口苦，而浮腹痛，动辄气喘。脉左关独弦，余部濡细，拟治当以柔肝凉血为主，而以养心滋肾辅之。

生地炭 乌贼骨 柏子仁 炒白芍 炙龟板 丹皮 茜茜根 龙齿 九孔石决明 佩兰叶 生谷芽 焦山栀 黑地榆 左金丸 茯苓 砂仁 棕榈炭

先由白带，继而赤带，益以经水淋漓，甚而色紫成块，少腹抽

痛，率及经络，形寒头痛，脘满食少，脉象弦芤，舌苔腻白，病在奇经八脉，兼挟寒湿阻遏，治法益气血之虚，参用遏气血之滞。

丹参 白芍 牛膝 新绛 丹皮 茺蔚子 驴皮胶 海螵蛸
紫石英 法半夏 橘络 甘草

二诊：肝肾阴虚，冲任失固，自白带而转赤带，由经漏而致成块，血去气无所附，气逆乘于络脉，少腹掣痛，而目浮肿，冷热头暈，耳鸣盗汗，脉象弦芤而滑，舌苔薄腻而白，脾胃为湿所困，治法缓投滋腻。

旋复花 归须 白蒺藜 杜仲 丹参 炒白芍 新绛 甘草
茯苓皮 海螵蛸 丹皮 枳壳炒白术

肝脾肾脏阴虚，奇经八脉交亏，下焦固摄失权，腹痛漏红带下，左脉关部弦涩，右部虚大。当用滋填三阴足经，参入固纳下元，以充冲任。

茜草根 炙龟板 白芍 海螵蛸 粉丹皮 大生地 紫丹参
枣仁 枸杞子 淮牛膝 藤鱼胶

《金子久奇解》

丁泽周

王右。经事淋漓太多，有似崩漏之状，脉象弦细，冲任亏损，血不归经，宜胶艾四物合三甲饮加减。

阿胶珠三钱 广绒炭八分 白归身二钱 大白芍二钱
抱茯神三钱 生地炭三钱 活贯众炭三钱 左牡蛎四钱 花龙骨三钱
炙鳖甲三钱 陈棕炭三钱 莲蓬炭三钱 藕节炭三钱

曹右。肝虚不能藏血，脾虚不能统血，经行太多，似有崩漏之象，腰酸骨楚，头眩少寐，脉象细弱。拟归脾汤合胶姜饮加减。

潞党参二钱 生黄芪三钱 白归身二钱 陈广皮一钱
朱茯神三钱 炒枣仁三钱 生白术二钱 厚杜仲三钱 阿胶珠三钱
炮姜炭六分 大白芍二钱 活贯众炭三钱 红枣四枚 藕节炭三钱

余右。冲任亏损，血不归经，经事淋漓，行而太多，有似崩漏之状，目白红赤，肝火升腾。姑拟调摄奇经而清肝火。

阿胶珠三钱，蒲黄四分同炒 白归身二钱 大白芍二钱 左牡蛎四钱
抱茯神三钱 荆芥炭一钱 花龙骨三钱 象贝母三钱 滁菊花二钱
青箱子钱半 陈棕炭三钱 血余炭包三钱 藕节炭二枚
活贯众炭三钱

二诊：经行太过，似有崩漏之象，头眩心悸，胸闷纳少，脉象左弦、右细，舌苔白腻。此冲任亏损，血不归经，肝气肝阳上升，胃失降和，仍宜养血柔肝，调摄奇经。

生白芍二钱 白归身二钱 阿胶珠二钱 朱茯神三钱
左牡蛎四钱 花龙骨三钱 黑稻豆衣三钱 潼蒺藜三钱 厚杜仲三钱
活贯众炭三钱 广橘皮一钱 生熟谷芽各三钱 藕节炭二枚
嫩钩钩后入三钱

三诊：目白红赤已见轻减，崩漏虽减，未能尽止，冲任亏损，血不归经，仍宜调摄奇经，而清肝热。

清阿胶三钱，蒲黄炭同炒 白归身二钱 大白芍二钱 抱茯神三钱
左牡蛎四钱 花龙骨三钱 厚杜仲三钱 陈棕炭三钱
血余炭包，钱半 乌贼骨三钱 贯众炭三钱 嫩白薇钱半 藕节炭三枚

陶右。经事淋漓不止，腰酸头眩，冲任亏损，血不归经，肝阳易于上升，兼之咳嗽，宜调摄奇经，清肺化痰。

阿胶珠三钱 左牡蛎四钱 花龙骨三钱 黑稻豆衣三钱
抱茯神三钱 厚杜仲三钱 炒杭菊三钱 冬瓜子三钱 冬桑叶二钱
光杏仁二钱 象贝母三钱 贯众炭三钱 藕节炭三枚

方右。产后冲任亏损，经事淋漓不止，腰酸腹痛，脉象细弱。宜调摄冲任，而潜浮阳。

吉林参须一钱 抱茯神三钱 米炒白术二钱 清炙草六分
白归身二钱 大白芍二钱 生地炭三钱 厚杜仲三钱 川断肉三钱
阿胶珠二钱 春砂壳八分 乌贼骨三钱 藕节炭二枚

... 奚右，经事淋漓，头眩眼花，脉象细数，冲任亏损，血不归经，姑宜效艾四物汤加减。

何胶珠三钱 侧柏炭钱半 生白芍二钱 白归身二钱
朱茯神三钱 生地炭三钱 花龙骨三钱 左牡蛎四钱 黑稻豆衣三钱
贯众炭三钱 藕节炭二钱

《丁甘仁医案续编》

陈在山

张慎堂内人，脉来沉缓而弦，独两尺微弱至甚，必是怒伤肝脾，又不能统血归源矣，较夏令之脉尤为难治，只可免拟一方服之，有效再为斟酌。

人参 炙芪 当归 枣仁 远志蜜 茯神 杜仲炭 枸杞
熟地 贡术 棕炭 牡蛎炭 莲须 炙草 元肉 大枣

内慎堂服前方二剂，未能见其大功，脉来两尺稍有升腾之象，脱血亦必轻些，小效而已，再遵前方加减治之。

何首乌 人参 炙芪 苁蓉 茯神 远志蜜 枣仁炒
芡实炒 山药炒 牡蛎 杜仲炭 香附炒 炙草 焦术 当归

内慎堂服前方，病已见功，因怒又致经血复脱，六脉甚来微弱，只缘伤血过多，肾气必然不固，再用涩精秘气之品，多服则佳。

茯神 远志蜜 莲肉 山药炒 芡实炒 人参 炙芪 焦术
炙草 龙骨 牡蛎 当归 杜仲炭 芥穗炭 熟地炭 元肉

张子声之内人，患漏血之症，脉来虚数无力，腰酸头晕，精神不足，四肢软，减食，以归脾汤加减治之。

人参 蜜芪 远志 艾炭 龙骨 元肉 焦术 芡实 炙草
当归 地榆炭 枣仁 灯心 大枣

第二方去元肉、枣仁，加酒芍、熟地，前后服五剂，全愈。

《云深处医案》

傅松元

东北乡吴姓妇，年三十许，自正月血崩后，漏不止，至十二月初，始邀余诊。谓自春至冬，计大崩六次，至漏下则未尝有一日净，凡昆山、太仓、嘉定、娄塘、茜泾、刘河有名各科，遍诊无效。余切其脉，沉细紧急如刀刃，唇舌熟白，肌色白然，小溲热痛，大便燥结，惟粥饭尚可每餐一碗。余思崩漏日久，失血已多，理当色白声萎而脉芤弱，今声音洪亮，脉细紧急，便燥溲痛，非火而何？阴血日少，相火日炽。治宜泻火凉血，火去则阴不沸溢，乃用龙胆泻肝汤，加芦荟、地榆、知母、黄柏两剂，而大便润小便不痛。继以生地、归、芍、地榆、龟板、知母、川槿及血余、蒲黄等炭，又二剂而漏渐减。再以前方去黄柏、血余，加阿胶、丝绵炭，四剂而漏止，便调，食增。又与人参、黄芪、当归、地黄、龟板、阿胶、知母、续断、地榆、首乌等六剂，适因年关节近而药止。卅年后复遇之，据云，自此即未再发也。

《医案摘奇》

孔继类

赵仁趾夫人，年四十余。暴崩失血，一日不止，呼救于予。予问其因，虚耶？劳耶？气耶？火耶？其有所伤而损耶？赵君曰：损则无，其余数者似皆有之，难以确指也。问：何不早治？曰：医欲用十灰散，以未得棕，尚在寻觅。予曰：固哉！虽有所求，迫急之时，得一则用一，得二则用二，至十备其九，亦云全矣。乌有因一味不备，而令人忍死以待者。此无他。殆恐服不效，而又别无他法，故为此藏拙之计耳。目下病势何如？曰：现在时下时止。其下也，周身经络处处作响，自四肢宛转而内，渐达于胸膈，渐下于胁腹，渐及于脐下，则血入下矣。下已，周身又响。予曰：此脏腑血尽，转而挹之外体，外体又尽，转而挹之四肢，至四肢之血尽，则更无余矣。此时必心热烦躁，气逆而喘，头面一阵大汗，阳从上脱，不可复挽矣。及其

未脱也，当重用养阴敛气之药，但资十灰无益也。十灰仅能止血，不能复阴，阴已将尽，无以续之，则危矣。归与医商，时不可缓。赵君急归，则医已潜踪去矣。于是，飞舆延予。予至，则病人头汗津津，心中烦热，兼之呕逆，势危甚。人诊其脉，浮数无根，谓赵君曰：此惟人参可救，乡僻安从得此？重用党参，合诸养阴之品，可也。乃用党参、生地、白芍各一两，麦冬、萸肉、黄芩、元参各六钱，阿胶四钱，石斛五钱，五味子钱半，煎汤二升，加十灰散二钱服之。服后稍寝，头汗渐止，呕逆不作，复以稀粥服之，遂熟睡。次日，更进一剂，连服稀粥数次，心中始不复热，脉之浮者渐沉，数者渐退矣。乃少减前药，去萸肉、黄芩、加山药、芡实，嘱令日进一剂，而续续分服，必与稀粥更迭间进。赵君请问其故，予曰：君不知乎？食以养阳。夫阴阳互根者也，大失血后，固属阴亏，然血去而气亦随之，阳亦几于无余矣。此症重用阴药以养阴，即当并用阳药以养阳。养阴之味，地黄、芍药之属，足以胜任矣。养阳之味，止一薄劣无力之党参，其堪恃乎？舍党参而他求，性味又不相宜，不得已借资于粥，不过奏功稍缓，其实为用无弊。所以然者，粥之气味，粹然精醇，易食易消，能升能降，与胃中清和之气最相得者也。胃有谷力，正气不馁，药之入于胃中者，各自从容散布于各经。是参力不及之处，而谷精以为之续，则阳生阴化，血之复也可望矣。曰：古人养血，皆用四物，兹何以不用芎、归？又去萸肉、黄芩，而用山药、芡实，何也？予曰：芎、归诚能养血，然性动而气温，其行之阴也，滞者可使之流，静者能使之动。夫惟阴血不静，乃至崩而天下，又可以流走窜动之品，助其动而引之下乎？去萸肉者，已有芍药，恐酸敛之太过也。去黄芩者，已有元参，恐苦寒之伤胃也。用山药、芡实，正与用党参、稀粥同义。然党参合稀粥，生发胃气，宣通之意多，恐阴药之滞腻不行也。山药合芡实，填补胃气，固涩之意多，恐阴药之沉滑作泻也。夫病至危迫之时，治法亦极为逼仄，岂一意孤行，遂能安全无弊乎哉？赵君称善。予将归，复嘱之曰：此病全在保养，慎勿妄动，起坐行立即能，亦勿

遽耳。目下血止不下，仅有得生之意而已，可保无虞则未也。更历一载不犯，则气血重固，乃更生之日矣。复指其幼子曰：当为此子，善观其母。盖赵君之于室家，多有不甚平处，故因以规之云。

《孔氏医案》

贺季衡

卜女。漏红三月，或带黄水，脘闷作恶，而黄厌食，日晡潮热，口渴，舌苔糙黄满布，脉沉细无力。血虚湿热乘之，血不安位，肝脾失调，冲任无以约束也。

大生地五钱，炙炭 乌贼骨三钱 炮姜炭五钱 乌梅炭一钱
旱莲草三钱 大白芍二钱 香附炭一钱五分，醋炒 煅牡蛎五钱，先煎
当归二钱 阿胶珠二钱，蒲黄五分拌炒 莲房二钱，炙

另：乌贼骨丸一两，每服二钱，开水下。

二诊：今日潮热未来，脘次尚水畅，腻痰上泛则作呕，加之漏红三月，或带黄水，今又化为赤白带，淋漓且多，脉仍沉细无力，重取小数，舌苔仍糙黄满布。阴血久亏，湿热乘虚袭入血分所致，未宜滋补，清养分渗为先。

当归二钱 香白薇三钱 地骨皮三钱 大白芍二钱，桂枝三分拌炒
银柴胡一钱 炙鳖甲八钱，先煎 粉丹皮一钱五分 青蒿一钱五分
炙甘草七分 云苓三钱 青荷叶一角 炒竹茹一钱五分

三诊：日来潮热已清，赤白带淋漓亦少，惟又复漏红，或带黄水，脘仄不畅，粘痰上泛则作恶，胃纳不甘，切脉沉细少力，舌苔满布已宣。血分之湿热初清，肝胃未和，阴土日伤之候。刻当和胃清肝，以涤余热。

南沙参三钱 川石斛三钱 地骨皮四钱 粉丹皮二钱
乌贼骨四钱炙 香白薇四钱 当归二钱 大白芍二钱 焦谷芽四钱
陈橘白一钱 云苓三钱 金橘皮四个

四诊：经治来，潮热大清，赤白带及漏红亦已，惟黄水尚多，脘

灰胃呆、粘涎上泛则作恶，脉沉细而滑，舌苔已化，舌心尚腻。阴分
之热虽清，冲带湿浊未净，肝胃未和也。

路党参三钱 当归二钱 乌贼骨四钱炭 大白芍二钱
真白术三钱 粉丹皮一钱五分 川石斛三钱 陈橘白一钱 云苓三钱
焦谷芽四钱 薄荷叶一角 红枣二个

张女。年甫十三，月事初行，血块磊磊，入夜尤甚，月余不已，脉
弦数鼓指，舌苔腐白。冲海积热不清，不宜入延。

当归二钱 大丹参一钱五分 大生地五钱，炭 京赤芍一钱五分
蒲黄炭一钱五分 香附炭一钱五分 阿胶珠二钱 粉丹皮一钱五分
荆芥炭一钱 炙甘草八分 旱莲草三钱 血余炭一钱五分 红枣二个

二诊：月事淋漓已止。腹中尚或作痛，舌白口干。年甫十三，患
此症者亦仅见。当再和荣调经，以善其后。

大生地三钱，炭 当归二钱 川郁金二钱 大丹参一钱五分，炒
金香附一钱五分，炭 白蒺藜四钱 炒丹皮一钱五分 炙甘草五分
荆芥炭一钱 大白芍二钱 莲房三钱炭 红枣二个

另：四物丸三两，每服三钱，开水下。

朱女 始而经居五月，刻下猝然崩漏如注，血块磊磊，腹大虽
减，右畔尚结痞有形，按之痛，外痔肿突作痛，两足肿，日来又增左
半头痛，脉虚弦右扎，舌苔腐白满布。积瘀未清，肝阳暴升，风湿乘
袭也，症殊夹杂。

荆芥炭一钱 大生地五钱，炭 大川芎一钱五分 大白芍二钱
当归二钱 大丹参一钱五分 白蒺藜四钱 川楝子一钱五分 醋炒
清阿胶二钱、黄芩六分拌炒珠 香附炭一钱五分 荷蒂四个

改方，加炮姜五分。

二诊：经治来漏红虽少，秽水如鱼肠者尚多，前阴坠胀已退，逐
日寒热将清，头痛去其七，舌苔亦化，脉转虚滑小数。湿瘀日化，
营卫未和，腰前痛，下元暗亏矣。不宜生枝。

当归二钱 大川芎一钱 大白芍二钱 白蒺藜四钱 川断肉四钱

云苓神各三钱 乌贼骨四钱炙 大丹参一钱五分 厚杜仲五钱
焦白术二钱 佛手八分 红枣二个

陈女。荣阴久亏，肝乏藏守之职，血不归经，不时崩漏，或杂血块，少腹痛，心悬头昏，脉弦细而数，舌质光绛。当清荣柔肝，调其冲任。

大生地六钱，炙炭 当归二钱 大白芍二钱 阿胶珠二钱
血余炭一钱五分 云神四钱 五灵脂二钱，醋炒 炙甘草七分
旱莲草四钱 煅牡蛎六钱，先煎 香附炭一钱五分 莲房三钱，炙

程女。崩漏已久，八脉皆伤，气从下陷，肛坠，尾闾胀，便结，不寐，少腹急胀，脉沉滑细数，舌红苔白。业经已久，势无速效可图。

淡从蓉三钱 当归二钱 大生地五钱，炙炭 旱莲草三钱
鹿角霜三钱 大白芍二钱，吴萸二分拌炒 炙黄芪三钱 炮姜炭五分
大丹参一钱五分 炙甘草八分 香附炭一钱五分 紫石英三钱

另：补中益气丸二两，黑归脾丸二两，和匀。每服三钱，开水下。

彭女。漏红数年，或多或少，血块磊磊，或带下，少腹坠痛，腕冷涎上泛，脉沉细，舌红根白。冲带两伤，年已四旬有六，暴崩可虑。

当归三钱 大白芍二钱，吴萸三分拌炒 香附炭一钱五分
炮姜炭八分 大丹参一钱五分 大生地炭五钱 五灵脂二钱，醋炒
炙甘草八分 旱莲草四钱 云神四钱 血余炭一钱五分 红枣三个

另：黑归脾丸二两，每服三钱，开水下。

《贺季衡医案》

赵文魁

褚右，46岁。

癸事淋漓不止，发已半载有余，面色萎黄，指爪无华，左寸关细小且滑，按之弦而急躁，右脉弦小略数，舌红口干，心烦，夜不安寐。全是失血过多，冲任失和，肝气横逆，厥阴失和。养血育阴以治其

本，升和疏化少佐止红。辛辣宜忌，切不可恼怒动气，防其成崩。

醋柴胡一钱 醋升麻一钱 当归二钱 白芍四钱 细生地四钱
清阿胶三钱，烔化 黄芩二钱半 生牡蛎四钱

按：患者癸事淋漓不止，病延半年有余，失血过多，阴亏血少，冲任不固。血不上荣则面色萎黄。肝藏血司血海，冲脉附于肝肾，失血过多，血海空虚则肝血亦虚。肝血为魂之所寄，肝血虚则无以制肝阳，肝阳上亢，魂不守舍，而见心烦，夜寐不安。肝阳上亢，肝气横逆，又可扰动气机，使血不循常道而外溢，加重出血。肝主筋，其华在爪，肝血不足则爪指无华。左寸关脉细小而滑，说明心肝阴血不足而有热，按之弦面急躁，说明肝阳偏亢。右脉弦小略数，舌红口干，均为血虚阳旺之征。综观本案，以阴亏血少，冲任不和为本，以肝阳偏亢、厥阴失调为标。治当养血育阴、调理冲任以治其本，抑肝潜阳、升和止血以治其标。

方中当归甘辛而温，补血和血，调经止痛。白芍甘苦酸而气寒，入厥阴肝经，味酸则能柔肝止痛，敛阴止血，味苦则能降泻，平抑肝火，味甘则补血养阴，故崩中漏下、心烦不寐、月经不调等症，白芍为必用之品。阿胶甘平，为血肉有情之物，能补血养阴而润燥，且因胶质粘腻，能凝固血络，故又善于止血。生地甘苦且寒，能滋阴养血，清热凉血止血。柴胡辛苦且微寒，性升散而疏泄，“为肝之所喜”，疏肝解郁以防肝气横逆。柴胡与白芍相配，柴胡理肝之用，白芍补肝之体，一散一敛，一补一泻，刚柔相济，以复肝木曲直升降和条达之性。冲任不固，血液下泄日久，清阳亦随之下陷，出血愈发难止，故用升麻配柴胡，升阳举陷，又可清热解毒，流通气机，且能防止生地、阿胶等滋腻碍胃，醋制者，即能引药入肝，又可防其升散太过。生牡蛎咸涩而微寒，育阴潜阳以平肝气之横逆，收敛固涩以止血液之淋漓。诸药合用，使阴血充足，肝气条达，冲任调和，则漏下难疾可望向愈。

辛辣之品可以动火助热，恼怒恚恨可使肝气逆乱，肝阳鸱张，

均可使气血运行逆乱，迫血妄行，恐有成崩之虞，慎之戒之！

《赵文魁医案选》

魏长春

刘阿毛之母，年四十五岁。二月十五日诊。

病名：春温血崩。

原因：平素积劳，冬伤于寒，至春发为温病。

证候：形寒内热，耳聋神昏谵语，咳嗽气促，痰粘，二便稀少，纳钝渴饮。

诊断：脉象沉数，舌红。证系伏气温病。

疗法：用沈尧封六神汤加减，透热化痰，佐以紫雪丹，芳香开窍。

处方：紫雪丹三分，灌 旋复花三钱，包煎 茯神四钱 鲜竹叶三钱
鲜石菖蒲二钱 益元散五钱 制半夏三钱 淡竹沥一两，冲
黄郁金三钱 象贝母三钱

炳按：半夏太燥宜去之，用白薇四钱，再加淡豆豉二钱、鲜生地四钱，合透营热。

次诊：二月十六日。咳逆痰粘，渴饮，神识稍清，二便不畅，寐安，纳钝。脉滑，右尺泽滑数，舌苔黄色。热痰蒙蔽，肺炎叶举。用麻杏石甘汤加味清下之。

次方：礞石滚痰丸四钱，吞 朱茯神四钱 竹茹三钱 制半夏三钱
苦杏仁四钱 全瓜蒌四钱 炙麻黄一钱 生石膏八钱 浙贝母三钱
炙甘草一钱 旋复花三钱，包煎

三诊：二月十七日。便下二次，伏热外扬，目赤颧红，咳痰不爽，气平，神识清楚，胃呆，渴饮，微有寒热。脉滑数，舌苔黄腻。体温一百零二度。治用人参白虎汤加减合凉膈去硝黄。清降痰火。

三方：鲜淡竹叶三钱 连翘三钱 薄荷一钱 黄芩三钱
焦山栀三钱 炙甘草一钱 生石膏一两 知母四钱 玄参八钱

天花粉八分 鲜生地八分

四诊：二月十八日。便下一次，身热已减，体温一百度，神昏渴饮。脉数，舌红润苔黄 肺热未清，证防变端。

四方：桑叶二钱 枇杷叶五片，去毛 玄参八钱 原麦冬四钱
炙甘草一钱 苦杏仁三钱 生石膏一两 鲜生地八钱 天花粉八钱
万氏牛黄清心丸一粒 去壳研吞

五诊：二月十九日。昨夜陡然崩血，汗出淋漓，肢冷面白，气喘促。脉沉细，舌干燥 证象剧变，厥脱堪虞，亟拟纳气敛汗镇逆法，以希转机

炳按：热伏营分血分，治以清气分之热，以致营血热极，逼而下溢，为大崩。凡伏热多在营血，苟能早用清透营分伏热之药，或无此崩也。

五方：化龙骨八钱 煅牡蛎八钱 原麦冬四钱 五味子一钱
高丽参二钱 陈山萸肉一两

六诊：二月二十日。崩止汗敛，肢温神清，胃呆，呕逆不渴。脉缓，舌苔黄白灰，杂色满铺。用调营和胃法治之。

六方：当归二钱 生白芍二钱 炙甘草一钱 煅石斛一钱五分
原麦冬一钱 制半夏三钱 乌梅肉一钱 陈山萸肉四钱 紫石英四钱
冰糖一两

七诊：二月廿一日。面色萎白，口渴思饮，时欲呕吐。脉滑，舌红中灰 用养胃镇逆法。旋复代赭汤合金生脉散加减。

七方：原麦冬三钱 五味子三分 北沙参三钱 金石斛二钱
旋复花二钱，包煎 代赭石四钱 炙甘草一钱 制半夏三钱

效果：服药后病痊。惟记忆力弱，言词瞢瞢，令服天王补心丸渐愈。

炳按：营分早有伏热，若早用生地豆豉等，透营之药，营热外透，不致逼血妄行，而为崩下也。

杨阿金之妻，年四十一岁。七月二十六日诊。

病名：湿温挟崩漏。

原因：湿温热炽，下逼血室。

证候：壮热口渴有汗，寒热往来，经水崩漏颇多，淋漓不绝，呕吐不纳，便闭六日未解除。

诊断：脉弦数，舌红苔黄粘。湿温热逼血室，血液妄行，下溢而为崩漏证也。

疗法：用大柴胡汤合桃仁承气汤，清解少阳阳明。

处方：柴胡二钱 黄芩三钱 制半夏三钱 炙甘草一钱
生姜一钱 红枣四个，赤芍三钱 元明粉三钱 桃仁三钱 枳壳一钱
醋炒大黄三钱 天花粉三钱

炳按：生姜红枣宜易荆芥炭一钱五分、海螵蛸三钱，大黄元明粉宜减半。

次诊：七月廿七日。昨服药后，便下六次，身热稍减，经来未断，胸满气逆呕吐。脉细，舌红糙苔黄。用葛根苓连汤加味，清透伏邪。

次方：葛根三钱 川连一钱 黄芩三钱 炙甘草一钱
益元散五钱 天花粉三钱 白薇三钱 青蒿三钱 银花三钱
淡豆豉三钱，同打 鲜生地五钱

三诊：七月廿八日。脉细涩，舌中剥边苔黄腻。胸闷气逆呕吐，经漏未止，寒热晡发甚剧。拟清血分伏湿。

三方：鲜藿香二钱 川朴五分 制半夏三钱 带皮苓四钱
丹皮炭三钱 陈棕炭三钱 侧柏炭三钱 淡豆豉三钱 荆芥炭一钱
升麻炭二钱 益元散五钱 黄芩炭三钱

四诊：七月廿九日。脉软缓，舌红中剥，苔黄腻。吐止气平，崩漏渐少，寒热减轻，便下赤色，咽干。用清热止崩法。

四方：白头翁三钱 北秦皮三钱 川连八分 茯苓三钱
白芍炭三钱 川柏炭三钱 丹皮炭三钱 陈棕炭三钱 侧柏炭三钱
黄芩炭三钱 升麻炭二钱 银花炭三钱

五诊：八月一日。脉弦涩，舌红绛无苔。寒热已退，腹痛泄泻，

咽干寐安。用钱氏白术散去藿香，参入育阴止崩。

五方：葛根三钱 广木香五分 西党参三钱 炒于术三钱
伏苓三钱 炙甘草一钱 焦白芍三钱 银花炭三钱 熟地炭三钱
阿胶三钱 煅牡蛎五钱

六诊：八月三日。脉缓，舌红中剥，边苔薄。腹痛崩漏未已，呕吐痰涎，用胶艾汤合左金丸加味。

六方：当归三钱 白芍三钱 川芎八分 竹茹三钱
大熟地炭四钱 阳春砂五分 艾叶一钱 茯神三钱 阿胶三钱
煅牡蛎四钱 吴茱萸二分 川连三分 乌梅一钱

七诊：八月五日。吐止崩愈，腹痛未已。脉弦清，舌红润。胃苏病瘳，进调和肝胃方。

七方：乌梅安胃丸三钱，吞 丹皮二钱 桑叶三钱 橘皮一钱
竹茹三钱 西党参二钱 制半夏二钱 泽泻二钱 白芍三钱
炙甘草一钱 陈棕炭三钱

效果：服药后，腹痛止，病愈。

炳按：经崩不止，多血中有热，必清血热，兼化瘀清络热之法，则热退崩止，自然瘳矣。

《慈溪魏氏验案类编初集》

张山雷

王右。崩后血虚，投摄纳补中，带脉渐固、纳谷渐醒。惟脉尚见弦，头空欲眩，仍是阴不涵阳之征。舌滑无苔，色稍绛，仍须一路滋填，果能静养，可许康复。

炒贡熟党6克 炒净萸肉6克 桑螵蛸炙4.5克 炒杜仲6克
甘杞子6克 生白芍9克 生芪皮9克 佛手花3克 绿萼梅2.1克
生牡蛎9克 生鳖甲9克 乌药4.5克 大元地6克
砂仁末1.5克，同打

郑右。冲任不摄，经漏绵延，所失不少，真阴伤矣。腰酸背痛，

脉细弱，体伟年弱，治宜固摄。

炒潞党 1.5 克 制於术 4.5 克 生牡蛎 15 克 炙桑螵蛸 4.5 克
血餘炭 1.5 克 生延胡 4.5 克 炒厚杜仲 6 克 蕲艾叶 1.2 克
广木香 1.8 克 带壳春砂仁 4 粒

二诊：经漏日久，昨议补中固摄，仍是鲜瘀杂下。脉细弦涩，舌滑无苔，阴虚本质，虚阳不摄，且有干咳，宜摄纳固护奇经。

西洋参 4.5 克，另煎调冲 枸杞子 6 克 苍龙肉 6 克 生牡蛎 1 克
炙龟板 6 克 炙桑螵蛸 6 克 炒山萸肉 9 克 生杜仲 6 克
大生地 12 克 石榴皮炭 6 克 侧柏炭 6 克 小蓟炭 9 克
丹皮炭 7.5 克 带壳春砂仁 1.2 克，料

《张山雷专辑》

范文甫

戴师母。苦血崩。

西党参 30 克 生於术 24 克 炙甘草 6 克 炮姜炭 6 克
淡附子 9 克 真阿胶 9 克 童便 1 杯

二诊：原方淡附子易厚附子，加桑叶 9 克。

陈师母。苦血崩，量多色淡，面色无华，舌淡脉细，尺脉尤甚。

厚附子 9 克 西党参 30 克 生冬术 12 克 姜炭 6 克
炙甘草 9 克 真阿胶 9 克 黄芪 9 克

二诊：厚附子 9 克 西党参 30 克 生冬术 12 克 姜炭 9 克
炙甘草 9 克 真阿胶 9 克 桑叶 9 克

三诊：血崩已止，气血两亏。

厚附子 9 克 归身 9 克 茯苓 9 克 党参 30 克 川芎 6 克
炙甘草 3 克 炒冬术 12 克 黄芪 30 克 真阿胶 9 克

冯右。血崩为日已久，淋漓不净，色淡质薄，面色㿠白，舌淡，脉细滑，血虚已极。

白术 9 克 党参 9 克 黄芪 30 克 当归 9 克 甘草 3 克

茯神 9克 远志 3克 木香 3克 大枣 6枚 龙眼肉 9克
侧柏炭 9克

二诊：崩漏止。体倦，面虚浮肿，脉细。

当归 9克 桂枝 3克 白芍 12克 炙甘草 6克 生姜 3克
大枣 6枚 饴糖 30克

《范文甫专辑》

沈绍九

经行无定期，量多质清，血色淡红，十余日不净，气短心悸，体倦乏力，舌体胖，脉虚大，此脾虚不能统血，冲任不固所致，议益气摄血，兼固冲任。

别直参三钱，先煎 白术三钱 炙黄芪五钱 茯苓三钱
炙甘草一钱 炒枣仁三钱 当归三钱 炒白芍三钱 炒黑豆四钱
炮干姜一钱 乌贼骨五钱 茜草根炭三钱

《沈绍九医话》

范宜斋

杨某妻，52岁。住岐山县麦禾营公社朱家塆大队。1965年4月15日就诊。自诉：经停已三年有余，今年3月24日因家事不和，与儿媳争吵，遂致经水来潮，量甚多。曾住入某地段医院，诊断为功能性子宫出血，因疗效不佳，又转入某县医院诊治，经过17天住院治疗，血量虽减而始终不净，院方恐为癌性病变，嘱其家属赴外地作进一步检查，以免贻误病情。来宝后，患者本人坚决要服中药，遂商治于余。根据经色淡，淋漓不断，形体消瘦，面色萎黄，食欲不振，倦怠无力，睡眠不稳，头晕眼花，心神恍惚。舌苔白，脉虚软。综观脉证，显系由崩漏而致心脾血虚之证，遂处以下方。

地锦草一两半 棕炭一两 茜草四钱 棉籽炭一两
糯糟粕子半斤 红糖二两 先将前四味连煎两次去渣，共取药汁两

大碗半，再将醪糟柏子、红糖下入，用文火熬至两大碗，分两天四次空心喝完。

一剂而止，并嘱其购服归脾丸一月，以巩固疗效。

《宝鸡市老中医经验选编》

朱南山

有姜姓者年四十二岁，生八胎，末次用人工流产手术后，月经初尚正常，四个月后忽然行经过多，形成崩漏，持续五六个月，淋漓不断，形瘦心跳，腰酸失眠，心中懊恼，复刮宫二次，崩量更多。西医认为必须切除子宫，方能止血，患者不愿，转请中医治疗，服复补益血止涩药多剂，未见功效，乃来先君处求治。所述症状，如头晕眼花，腰酸肢软，精神疲倦，多属虚象，惟按其小腹则隐隐作痛，切其脉则虚细而涩。先君认为久病且流血过多，固属虚亏，但其中尚有残余瘀滞未化，因此新血不能归经，所以前服补养固涩剂未能见效，关键即在虚中有实。遂处将军斩关汤方（熟军炭一钱，巴戟天三钱，仙鹤草六钱，茯神三钱，蒲黄炒阿胶三钱，黄芪一钱五分，炒当归三钱，白术一钱五分，生熟地各三钱，焦麦芽三钱，另用藏红花三分，三七末三分，红茶汁送服。），甫服一剂，崩即停止；再经调理，恢复健康。

陈东升太太，经水淋漓，经二月不已，审其病从盛怒而得，症见头晕、胸闷、泛恶，自服人参五钱许，胸闷窒塞更甚，两目昏黑，视物都作蓝色。先君曰：“此肝木亢旺于上，冲任亏虚下也。”以黑蒲黄散〔蒲黄（炒黑）、棕皮（炒黄）、川芎、丹皮、香附（醋炒）、白芍、阿胶、当归、地榆（炒炭）、熟地、荆芥、血余炭〕加龙胆草、芦荟各五分治之，三剂获痊。

《近代中医流派经验选集》

汪逢春

李右，三十五岁，十二月十二日。

经行一月有余，迄今不止，面黄无华，两脉细弦而滑，心跳不安，胸闷气滞。病由肝气太盛，冲犯络分。拟以先和厥太二阴，补涩之剂，宜乎暂缓。

逍遥丸四钱，布包 枯子芩钱五 抱茯神四钱 干荷叶三钱
杭白芍五钱，青皮一钱同炒 玫瑰花一钱 合欢皮三钱 陈棕炭三钱
淡吴萸钱五，川连七分同炒 制半夏三钱 粉草钱五同炒 橘子络钱五
藕节炭三钱 鲜柠檬皮三钱 生熟麦谷芽各三钱 香砂壳一钱

二诊，十二月十四日。

经行已止，胸闷亦舒，腹胀且瘦，阵阵作痛，带下如注，两脉弦滑。再以和肝运脾，兼治八脉。

逍遥丸四钱，布包 炮姜炭一钱 首乌藤一两 延胡索钱五
杭白芍五钱，青皮一钱同炒 淡附片钱五，秋石一钱同拌 抱茯神四钱
七制香附三钱 淡吴萸钱五，川连七分同炒 乌贼骨四钱，洗净
金狗脊五钱 合欢皮三钱

新鲜紫河车 三分，去毛，研细末，以小胶管装好，匀两次送下。

《洵庐医案》

周镇

朱寅生室人，崩经数年，不时举发。今且血崩，头晕，心悸，少寐，腰酸，汗多，胃钝，便溏不固，面黄失华。心脾冲任均虚。兹宗匾药丸法，缮固血室，兼顾中州。生地蛤粉炒四两，首乌四两，阿胶三两，血余灰一两五钱，白及二两，海参开水浸糖盐擦净四两炙，乌梅二两，杜仲四两，茜草二两，川断二两，黑木耳二两，乌贼骨二两，牛角腮二两，丝茧壳二两炙炭， 鳔胶三两， 醋炒五灵脂二两， 墓头回三两，干河车二具，研末，水泛如秫米，晒。别直参二两，於术三两，炒枣仁二两，

麦冬二两，龙骨二两，石莲二两，香附二两，北箭芪三两，菟丝二两，鹿角二两，白草霜二两，杞子三两，五味一两，牡蛎二两，禹余粮二两，潼蒺藜二两，研末，先用炼蜜水洒湿前丸，将后药泛上。晒。早晚各服四钱。崩愈。

荆妇荣氏，自丁巳冬大病复原之后，起居如常。乃庚申夏经来饮冷，后即经少，自谓体虚应少，不之异也。辛酉停经三月，至五月初二日经至而少腹痛气滞。服红花、桃仁、归尾。初三日经下如崩，紫色成块似猪肝状。知其积瘀下行，然恐变脱。初进香附、茜草、归身、党参、升麻、醋炒白芍、续断、血余灰、菟蔚子、合欢皮、狗脊、震灵丹。初四日夜续崩更多，夜不能寐，其势防脱。初五日早诊：脉象散弱，神情倦怠。急备人参汤，并定风固脱之龟甲、牡蛎、枣仁、阿胶、山萸肉、白芍、乌贼骨、龙骨、香附、党参、干地炭、丹皮炭。已购未煎，已初忽气散阳飞，腹痛，上呕下泄，肢厥，冷汗自出，瞬即口鼻气冷，舌冷目暗，面色如灰，脉急止歇。赶于五分钟内进以参汤。将已配之药去干地、丹皮炭，加制附子、桂枝、伏龙肝、淮小麦、炒麦冬、鸡内金等，煎而急进。吐泻冷汗旋止，身渐温，脉渐出，惟肢尚厥。下午续进芪皮、龙、牡、龟甲、山萸肉、白芍、香附、当归炭、党参、炒麦冬、枣仁、淮小麦、川断肉、乌贼骨、熟地炭、合欢皮之类。肢温，神转振，遂得起九死于一生，险哉！以后瘀仍续行，日进人参、阿胶、白芍、当归炭，扶其正气，久而方瘳。

蒋大妻，住胡埭，四十余岁。素多气恼，以夫有外遇也。旧曾血崩。戊寅三月四日诊：经停二月方通，滞而不爽。自服黄糖烧酒，崩血不止，防其下脱。潞党参一两，山萸肉一两，生於术三钱，当归头醋炒三钱，炒枣仁四钱，生地炭四钱，地榆炭三钱，茜草炭四钱，醋炒五灵脂四钱，鱉胶三钱，川断五钱，狗脊五钱，丝吐灰四钱，蒲黄炭二钱，制香附二钱。至九日复诊：述知大崩时药尚未进，冷汗晕脱，险甚。药中自加芪、仲，崩渐减。又变便溏，肢寒，仍欲晕跌，腹痛未止。脉虚，舌淡白，口苦。兹又阳虚欲脱，中兼肝气凤咳，再

为补救。生於术五钱，炮黑姜三钱，熟附片钱半，山萸肉一两，川断五钱，生鹿角四钱，炒枣仁四钱，五味子二钱，款冬花四钱，龟板一两，制香附三钱，百草霜五钱，煨木香钱半，乌梅炭二钱，罌粟壳一两。服二剂即泻，而漏血未楚，自服芪、参、仲、膝等。至四月二日又大崩，服参六元不止。来诊。仍投效方出入，并嘱制丸常服。

张麟祥，小宦。其妻生育多，营血虚，历久少寐。丁巳十一月中旬，血崩鲜红兼紫黑，头晕腰，脉弦虚大。询知血去过多，神乏力疲，须防下脱。拟潞党参、於术、远志、生地、白芍、醋炒当归身、枣仁、棕榈炭、茜草炭、侧柏炭、血余炭、百草霜、川断、桂圆肉、以金马兰一味，煎汤代水。另研牛角觔冲服。一剂，血崩顿止，续予调摄愈。

某氏妇，小产后将近三月，漏下不止。又自服尤渡泻药，大下如崩，盖苏木、大黄铤散云。头晕目花，心悸，子宫下堕。气血大亏，速宜调补。党参、黄芪、於术、当归、醋炙升麻、醋炙柴胡、茯神、枣仁、地榆炭、生地炭、阿胶蛤粉炒、侧柏炭、鳔胶。另牛角觔二钱，煨研细末，空腹开水下。数剂愈。

赵瑞九，住娄巷。其妻即聿师之女，年约四旬外，丙子夏，崩漏将及二月，延诊。面唇萎黄无血色，脉虚带弦，苔薄黄，腹中有气攻撑，血去气无归宿。余拟滋血止崩，敛肝潜阳法。嘱服三剂，二剂而血已止。方为当归头醋炒、白芍、生地炭、龙骨、牡蛎、山萸肉、金铃子、川断肉、狗脊、女贞、旱莲、白薇、丝吐灰、鳔胶而已。习俗遇久崩，每月薪艾、炮姜等，与血去阴伤忌燥之例相抵触。又拘定血脱益气而用参，不知参为硫砒栽培，辽医亦云性亦燥烈也。

邱壬泉妻，血崩至漏一百五十日，脉虚神惫气力衰弱，治以固下补奇经法。当归头醋炒、生地炭、白芍、鳔胶、丝吐灰、地榆、川断、龟甲、狗脊、绵芪、白术、茜草炭、炒枣仁。另黑木耳、牛角觔煨，研末，开水冲服。数剂，漏血已止。嘱其必服丸方以善其后，渠以力乏辞。越半月，经来如崩，又来治愈。代拟丸方，案：久病崩漏，一再反复，心悸无力，脉虚不振，诚恐每月行经过多，不能复原。

潞党参三两，绵芪三两，白术二两，枣仁二两，鳔胶四两蛤粉炒，乌贼骨二两，龟甲心三两，白及四两，女贞二两，菟丝三两，广木香一两，熟地六两，山萸肉六两，川断三两，黄精三两，杜仲三两，河车二钱，禹余粮二两，旱莲草二两，百草霜三两，血余灰三两，牛角腮三两，蜚壳炭二两，茜草灰二两，狗脊三两，当归头二两，地榆炭二两，莲蓬壳二两，研末，用桑椹膏八两，鸡血藤膏四两，溶开水泛丸，晒。早晚各服四钱。

《周小农医案》

翟竹亭

余友索文萃令正，因郁怒伤肝，天癸四月不行。一日忽大下死血成块者十余枚，立刻昏倒于地，四肢厥冷，目闭口开，急迎余往治。诊得六脉极细欲脱。张洁古云：“血脱者补气”。急用炙黄芪30克，当归10克，白术15克，茯苓12克，油桂10克，乌梅5个，炮姜12克，川芎10克，白芍12克，熟地18克，山萸肉10克。水煎服。一帖神清，二帖血止，四帖痊愈。

彭庄宗得玉妻，年三十余。二月经行，于坑边洗衣，此时天气尚寒，及归寒热似疟，天癸停止，亦无痛苦。又二月余，经水暴来，一时许，昏晕数次。某医用十灰散加收涩之药，两剂而止。经血虽住，少腹苦疼，饮食不进，身发寒热，夜间谵语。迎余治疗诊得六脉沉涩，少腹拒按，此瘀血不尽，补益之害。张景岳先生云：“实其实而死者”即此类也。余用攻血汤服一贴，瘀血下两碗许，诸症少轻，腹痛如故。原方又投一帖，又下死血，如桃李者四、五枚。共服二帖，诸症皆痊。

攻血汤

当归尾15克 川芎10克 生地12克 赤芍10克 川牛膝10克
桃仁12克 红花6克 三棱6克 莪术6克 丹皮10克
五灵脂10克 生蒲黄10克 梔子6克 香附6克 甘草6克 水煎

服。

东关王明升妻，因经水适来，夫妇闹气，大怒之后，天癸遂停，由此腹疼，亦不甚重。至五月急下败血臭物，如梅杏者二十余块，立时昏晕欲绝，急迎余疗。诊得六脉如丝，余知气随血奔。时珍曰：“血脱补气”。遂用黄芪补血汤：炙黄芪180克，当归30克。日连二剂，病去四五，后改十全大补，服八帖方收全功。

《湖岳村叟医案》

陆正斋

王女。

一诊：月经初潮，量多如涌，色鲜红，头昏神倦，内热口干，形体消瘦。气阴未充，血热妄行。治宜益气养阴，凉血固经。

大麦冬米炒，6克 软白薇6克 炒白芍6克 炒黄芩5克
炒丹皮5克 阿胶蛤粉炒，10克 云茯神10克 侧柏炭5克
乌贼骨10克 左牡蛎12克 炙甘草5克 梔子炭5克

二诊：经量减少，头昏内热减轻，惟心悸自汗少寐，原方减乌贼骨、梔子炭，加酸枣仁6克、莲心2克、白茅根12克。

三诊：崩漏止，诸恙减。

六味地黄丸，养血归脾丸间服。

冯华珍。

一诊：跌扑后小产，经治获愈。此次经来涌行之后，淋漓旬余不净，时淡时浑，多少不等，头昏，乏力，腰酸，腹隐痛。下元不足，冲任不固。法拟固摄奇经。

左牡蛎15克 全当归10克 阿胶蒲黄炒，10克 乌贼骨10克
云茯神10克 侧柏炭10克 广橘皮3克 红枣4克
陈棕炭研末和服，3克 炒川断10克

二诊：传红虽少，血中夹有小紫块，质稠，腹时痛，脉濡细，似有旧瘀不去，新血不生之象。古人云“不行不止，不塞不流”。改用胶

艾四物汤加味。

阿胶蒲黄炒, 10 克, 烔化和服 全当归 6 克 赤白芍各 6 克
益母草 10 克 紫丹参 10 克 熟枣仁 6 克 茜草根 10 克 大枣 3 枚
杨右。

漏下淋漓不净多日, 腰膝软酸无力, 舌淡苔净, 脉细。冲任不固, 血不归经, 当究奇经。

阿胶蛤粉炒, 10 克 乌贼骨 10 克 炒白芍 6 克 炒枣仁 6 克
陈棕炭 6 克 煨龙牡各 12 克 覆盆子 10 克 鹿角霜 10 克
川续断 10 克 桑寄生 10 克 炙甘草 3 克

《陆正斋医疗经验》

孔伯华

薛妇, 九月十六日。阴虚血燥, 肝热脾湿, 迫血下行, 淋漓不绝, 杂有血块, 曾服补涩之品, 津液较伤, 口干, 脉细数而伏, 宜滋摄育阴。

生牡蛎六钱 赤小豆小钱 石斛四钱 ~~桑寄生六钱~~ 石决明八钱
炒湖丹皮三钱 天花粉三钱 盐黄芩三钱 盐橘核三钱
白蒺藜三钱 旋覆花二钱 代赭石二钱 ~~血余炭三钱~~ 芡实米三钱
地骨皮三钱 干藕节七枚 川草薢四钱 ~~莲心二钱~~
耳环石斛二钱, 另煎兑

二诊: 九月二十二日。症状渐转, 加减前方:

生牡蛎八钱 石决明两 血余炭四钱 旋覆花三钱 代赭石三钱
桑寄生八钱 赤小豆两, 布包 川草薢四钱 蒲公英三钱
湖丹皮钱半 白蒺藜三钱 天花粉三钱 盐橘核三钱
芡实米三钱, 盐水炒 莲心二钱 钗石斛四钱, 先煎 炒谷芽三钱
炒稻芽三钱 干藕节七枚, 带须 耳环石斛二钱 另煎兑

犀黄丸六分(分吞)

杨妇, 十月十四日。经血淋漓, 三月不已, 遂致崩下, 血块颇多,

脉数人尚不甚弦，盖湿热素重，乘血分而迫之下行也，当清滋摄止之。

生龙齿四钱 生牡蛎五钱，布包先煎 血余炭三钱 醋柴胡三钱
龙胆草炭三钱 鲜石斛五钱，劈先煎 薄黄炭三钱 白茅根两
炙升麻二钱 侧柏炭三钱 煨广木香钱 芡实米三钱，盐水炒
泽兰叶三钱 莲房一个

二诊：十月十八日。崩已较止，带下尚多，近两日又为邪袭而发寒热，脉大而伏数，当先以标解之。

鲜石斛四钱，劈先煎 薄荷钱二分 地骨皮三钱 冬桑叶三钱
白茅根两 杏仁三钱，去皮尖 杭菊花三钱 枯黄芩三钱
生侧柏叶三钱 黄梗一钱 梔子炭三钱 知母三钱 干藕节五枚

梁妇，八月初五日。血分湿热，肝家阳盛，迫血下行，不能自己，晋前方药后尚未能止，脉仍弦滑，再依法加减之。

生龙齿四钱 生牡蛎六钱 血余炭三钱 生石决明两
川柴胡三分 赤小豆六钱 川草薢四钱 旋覆花二钱 代赭石二钱
炒胡丹皮钱 台乌药三钱 盐知母三钱 盐黄柏三钱 鲜茅根两
蒲黄炭三钱 藕两，带节须 芡实米三钱

犀黄丸四分（分吞）

何女，三月十九日。据述经水不常，往往一二月淋漓不断，胁痛气短，腰胀且酸，体倦怠，胃纳板顿，食后发恶，脉弦不匀，法当调理脾经，兼和肝气。

当归身四钱 川芎二钱 桑寄生五钱 炒五灵脂三钱
血余炭三钱 炒梔子三钱 赤芍药二钱 细生地四钱 元胡二钱
阿胶珠三钱 艾炭二钱 甘草一钱 生藕节三钱

二诊：三月二十三日。服前方药两剂，经水已止，停药后又淋漓如故，而头痛心烦，胁痛腹胀，肢体酸软，此乃肝脾两虚，肾精又亏，不易治也，脉见弦虚，依前方加减再进。

桑寄生五钱 当归须五钱 川芎二钱 赤芍药四钱 细生地四钱

炒灵脂三钱 木瓜三钱 云苓块四钱 盐泽泻三钱 炒栀子三钱
四制香附二钱 甘草一钱 生藕节三枚

《孔伯华医集》

丁叔度

患者张某某，女，19岁，已婚。小产后漏血，两个月未止，腹痛，腰酸，四肢无力，小溲疼痛，脉弦数。

处方：生地炭15克 当归9克 炒祁艾4.5克 棕榈炭6克
杜仲6克 炒阿胶9克 丹参6克 元胡6克 炮姜1.5克
甘草4.5克 山药9克 黄芩4.5克 生芪9克 生姜1.5克
乌梅1.5克

服上方后漏血大减，腹痛已愈。

二诊处方：生地炭15克 归身12克 祁艾6克 川杜仲6克
续断6克 阿胶9克 茯苓9克 白术6克 砂仁2.1克 甘草4.5克
山药12克 生芪12克 生姜15克 乌梅1.5克

服此药两剂后，漏血已止。又连服三剂，诸症悉退而痊愈。

《津门医粹》

章成之

张女。经曾停止三月有余，因登楼闪动而下血块，从此淋漓不净，四月有余。

熟地12克 炒当归6克 阿胶珠12克 金毛脊9克
仙鹤草15克 苎麻根12克 藏红花6克 川断9克
震灵丹6克，分二次吞

二诊：漏红止，腰酸，上脘隐痛，入夜微有惊惕，皆贫血使然也。

熟地12克 川断9克 党参9克 枸杞9克 酸枣仁9克
黄芪皮12克 龙眼肉9克 菟丝子12克 仙鹤草15克

姚女。经淋漓三周之久，曾三度量多如冲，其色鲜红，此为子宫

出血，非一般月经可比。

阿胶 30克，烔冲 干地黄 18克 小蓟炭 12克 山萸肉 9克
炒黑蒲黄 12克 牛角鳃炭 9克 仙鹤草 12克 川断 9克
金毛脊 9克 陈棕炭 9克 苎麻根 12克

二诊：崩漏之量较前大减，而总不能根除，脉不整调，其人平素有心悸之疾，是血少使然。

阿胶 24克，烔冲 熟地 24克 杜仲 9克 金毛脊 9克
桑寄生 9克 炒黑蒲黄 9克 山萸肉 9克 五味子 4.5克
金樱子 9克 震灵丹 9克，分二次吞

李女。正常月经是生理性出血，崩漏是病理性出血。病者面色㿔白，爪甲无华，舌淡脉细，古籍以为脾不统血，当气血两补。

黄芪 18克 党参 9克 熟地 18克 旱莲草 9克 升麻 3克
炮附块 9克 炮姜炭 2.4克 杜仲 9克 牛角鳃炭 9克
煅乌贼骨 24克 苎麻根 24克 阿胶 30克，烔冲 仙鹤草 15克

周女。往日经过期不至，恒见崩中，今腹胀而腰酸，攻之不可；调整卵巢机能，斯可矣。

全当归 9克 补骨脂 9克 炮姜炭 3克 官桂皮 4.5克
大川芎 6克 巴戟天 9克 淡吴萸 4.5克 升麻 1.5克 清炙草 4.5克
来复丹 6克，分二次吞

二诊：强壮剂只能间接恢复卵巢机能，假使经之须通者，则其力缓。往日经后时，大崩，攻补兼施可矣。桃仁承气加参归法。

党参 9克 川桂枝 3克 生枳实 9克 制川朴 3克 全当归 9克
桃仁泥 12克 生川军 6克

姚女。一月经三见，小腹胀，胀甚量益多；据其色脉，胶艾汤不相当。

炒丹皮 9克 生地 12克 小蓟 15克 旱莲草 15克 生茜草 9克
地榆炭 9克 冬青子 9克 炒银花 12克 藕节炭 四只 黑荆芥 6克
川黄柏 3克 夏枯草 9克

二诊：服药后，经色仍鲜，腹胀，量多亦如故，今易其法。

阿胶珠 12 克 益母草 9 克 小蓟 12 克 瞿麦 9 克 生蒲黄 9 克
生艾叶 6 克 生茜草 9 克 干地黄 12 克 黑荆芥 6 克

夏女。经淋漓，增加血液凝固之药无效。再拟通涩并进之法。

益母草 12 克 川芎 6 克 藏红花 6 克 桃仁 9 克
乌贼骨 18 克，研细末分吞 瞿麦 9 克 罂粟壳 12 克 五味子 4.5 克
仙鹤草 12 克

二诊：药后经淋漓已净，神疲色萎，气血不足，调补之可矣。

潞党参 9 克 全当归 6 克 熟地 9 克 陈阿胶 9 克 绵黄芪 9 克
仙鹤草 12 克 五味子 3 克 炙甘草 4.5 克

陈女。去年流产后，腹部较平素胀大，且有沉坠感。近来经淋漓不净，当予收缩子宫之属。

益母草 12 克 制香附 9 克 五味子 4 克 川芎 9 克 山萸肉 9 克
瞿麦穗 9 克 生艾叶 4.5 克 苏木 4.5 克 台乌药 9 克
失笑散 9 克，分吞

吴女。行经量多如冲，经历八日，量虽减少，但淋漓不易尽，腰痛如折，良以为苦。今拟收缩子宫与增加血液凝固合剂。

藏红花 3 克 瞿麦穗 12 克 杜仲 9 克 大川芎 6 克 益母草 9 克
川断肉 9 克 熟地 18 克 金樱子 9 克 生阿胶 15 克 藕节 五只
震灵丹 6 克，分二次吞服

张女。经曾停二月。既至，淋漓不易净，迄今一月有余，腹痛则其量更加。此症据其舌、脉，当用补涩；但痛，又当和瘀。二者并用可矣。

益母草 9 克 瞿麦穗 9 克 仙鹤草 18 克 大川芎 6 克
干地黄 12 克 生阿胶 24 克，烊冲 五味子 3 克 金樱子 9 克
陈棕炭 30 克，煎汤代水

周女。虽静卧，亦有少量之经淋漓。治此症之条件有五，而麻醉亦能止血，镇静其血管，使血行不致过速之意。

罂粟壳 12 克 诃子肉 9 克 五味子 4.5 克 阿胶 24 克
牛角腮 12 克 熟地 18 克 苎麻根 12 克 炮附片 6 克 延胡索 9 克
香甘松 9 克

二诊：进药三剂，经淋漓者，静卧则止，起行复见，量仍少。药见其效，仍守原意。

罂粟壳 9 克 五味子 4.5 克 阿胶 18 克 熟地 18 克
苎麻根 9 克 牛角腮 12 克 炮附片 6 克 仙鹤草 15 克

三诊：淋漓已净，稍感心悸、神疲，夜不安寐，予归脾丸以调之。

盛女。经净后，淋漓迄今二十余日，腰为之酸，酸甚量亦频。古
人于此，一用固涩法；一用祛瘀法。其揆一也。

益母草 9 克 藏红花 6 克 肉桂末 1.5 克，吞 炮姜炭 4.5 克
瞿麦穗 12 克 小蓟 12 克 大川芎 6 克 生艾叶 4.5 克 仙鹤草 12 克
桑椹子 12 克 震灵丹 6 克，分二次吞

二诊：生理之经行，与病理之出血连续不断，只能经量多而漏
者，知为经行；色鲜而淋漓者，为漏下。今经行之第二日。

熟地黄 24 克 阿胶珠 18 克 荆芥穗 6 克 川断 9 克
厚杜仲 9 克 瞿麦穗 12 克 桑寄生 12 克 小蓟 9 克 乌贼骨 24 克
十灰丸 12 克，分二次吞

石女。病较重之时症后，而经见淋漓不易净，为时已及两旬，腹
部微痛，痛则下。此宜古人久漏当攻之法。

藏红花 9 克 桃仁泥 12 克 黑荆芥 6 克 瞿麦 9 克
大川芎 4.5 克 延胡索 9 克 益母草 9 克 生蒲黄 9 克，包
赤白芍各 6 克 来复丹 6 克，吞

二诊：以通为止，经淋漓者量已少，亦不感腰酸、腹胀，此可固
摄之。

绵杜仲 12 克 熟地黄 15 克 生黄芪 9 克 升麻 4.5 克
乌贼骨 30 克 金毛脊 9 克 阿胶珠 18 克 川继肉 9 克 核桃肉 9 克
另：常服二仪膏。

徐女。经淋漓五十余日，精神食量称是，疲劳则量多，腹痛亦然。

益母草 12 克 大川芎 6 克 仙鹤草 15 克 藏红花 6 克
瞿麦穗 12 克 苎麻根 12 克

二诊：药后经量反多，多后逐渐减少，此必然者。

熟地 12 克 阿胶 12 克 金毛脊 9 克 瞿麦 12 克 川断 9 克
苎麻根 12 克 仙鹤草 30 克 乌贼骨 30 克 月季花 2.4 克
震灵丹 9 克，分吞

《章次公医案》

张汝伟

陶月娟，年四十四，余杭，住余姚路一七六弄 286 号。肝肾两亏，湿热下注，经漏不止，已达一月有余。腰脊酸楚，胃呆少纳。脉濡弦，苔薄白腻。拟止漏养营，兼化湿热治之。

紫丹参 细生地 炒白芍 原杜仲 川续断 制女贞各三钱
炒川芎一钱 丹皮炭二钱 炮姜炭五分 煅牡蛎八钱，先煎
赤石脂四钱

二诊，服前方二剂。漏下已净，胃气略醒，湿热未除，白带淋漓，腰仍酸楚。苔白脉濡，再宜化湿而益肝肾。

厚杜仲 川续断 桑寄生 乌贼骨 椿根皮 炒苡仁 炒泽泻
威喜丸包各三钱 酒炒桑枝五钱 炒赤芍二钱 煅牡蛎一两，先煎

三诊，带下已减六七，腰酸亦愈，前方增损。

前方去桑枝威喜丸，椿根皮，加炒潞党，生淮药，朱茯神，各三钱。

本证始末：此证由漏而带，非常严重。三方共服十二剂，能得全愈。

《临症一得》

王文选

张某某,48岁,农民。1960年10月初诊。

患者月经落后十日而来,至第五天突然血崩如注,一日内曾服补涩之药二剂未止,时多时少。诊时精神困倦,心情恐慌,时有微恶寒,思睡,发渴,脉沉紧,舌苔滑质淡红,唇燥。按年龄病情为天癸将绝之兆。脉症合参,拟以升清阳、疏风热之法。处方:

荆芥 4.5克 防风 4.5克 升麻 1.5克 柴胡 1.5克 黄连 3克
茯神 4.5克 白芷 3克 续断 4.5克 羌活 3克 沙参 4.5克
黄芪 3克 甘草 1.5克 百草霜 6克,冲服

第二日二诊:服药二剂后,当晚血陆续而止,脉缓舌淡。此为风热已解。鉴于大失血身体虚弱,气血双补继服八珍汤,每隔日服一剂,服十天。再改服六味地黄丸半月,每天二次,每次1丸(9克)。于十二月初,来潮一次后,遂经绝。

茹某某 27岁,农民。1957年7月1日初诊。

患者半年来,月经淋漓不止,多少不定,时有紫块,胁满,少腹痛下坠,腰困酸,面色萎黄,精神萎靡不振,食欲尚佳,气短。曾服药多剂不效,故请诊治。脉象弦而无力,舌质淡红苔白不润。病为脾肝肾俱虚,冲任不固。先以益气补脾,佐以补肝肾,兼以收敛,固冲任,处方:

白术 4.5克 茯神 4.5克 升麻 3克 柴胡 3克 青皮 4.5克
黄芪 4.5克 沙参 6克 黑姜 3克 茜草 3克 胡莲 1.5克
甘草 1.5克 续断 4.5克 杜仲 4.5克 乌梅 4.5克

7月19日二诊:服药二剂,经血大为减少,再以逍遥散加味治之。方药:

白术 4.5克 柴胡 3克 白芍 4.5克 茯苓 3克 薄荷 2克
陈皮 3克 当归 3克 山药 6克 炙草 3克 续断 4.5克 生姜 3克。
三剂。

7月24日二诊：经血已止，以圣愈汤服四剂，再服逍遥丸12克，日服二次，每次9克，开水冲服。嘱以后月经来时，服补中益气汤三剂。如此调理二个月经周期，腊月专程来告，病已痊愈。

任某某，30岁，农民。1957年8月5日初诊。

自诉劳累过度，经来不去，淋漓不止，业经半年之久。虽曾治疗，休息亦少，效果甚微。近来疲倦不堪，常欲静卧，有时少腹痛，腰酸，腹痛时即流血增多。脉象虚带弦，舌质微青，面色恍白，唇干。此乃脾虚不摄，冲任不固之症。拟用补中益气汤加减治疗。处方：

黄芪4.5克 沙参6克 党参6克 白术4.5克 当归4.5克
川芎4.5克 升麻1.5克 柴胡3克 杜仲6克 续断4.5克
炙草1.5克 香附4.5克 青皮4.5克 桂枝3克

8月12日二诊：服第二剂时血减少，服第三剂后血已止。以补中益气丸，早晚各服1丸（9克），用乌梅、巴戟、菟丝子各等分量煎汤冲服。连服一周。

8月25日三诊：近来自觉不倦，脉缓舌淡。八珍汤加减服之半月，告诫经期避免劳累，忌房事。事隔半年，患者告诉，自服药后病愈，现身体健康。

徐某某，30岁。1956年7月19日初诊。

患者病已三月，月经来而不去，止则二三日，时多时少，淋漓不断，小腹下坠，头昏目花，体乏无力，畏冷，口干，脉缓舌淡白。此系中气不固所致。拟升提中气，兼调肝法。处方：

白术4.5克 茯神4.5克 远志6克 茜草3克 沙参4.5克
羌活3克 白芷3克 续断4.5克 升麻3克 柴胡3克 白芍3克
青皮3克 知母3克 甘草1.5克 鸡冠花6克

三剂，水煎食后服。

7月25日二诊：服第三剂药时，血已止，自觉身体有力。恐其反复，继续调治。以归脾丸六味地黄丸各1丸，日服二次，服至一

月，再未复发。

《中医医案医话集锦》

冉雪峰

武昌张某之媳，患血崩，邀往诊视。见病者一身尽肿，喘逆上气，在床头迭厚被坐靠，不得卧，血崩，前后逾半年，剧时每日多至一、二碗，或半痰盂，脉微弱兼带慢而时有结止象，色夭不泽，唇色惨白，指头冷，皮肤亦减冷沁，近月已晕厥数次，因所服方系六味重用熟地加凉血、止血、利小便、消肿之品。予曰：上竭下厥，阴阳离绝，八脉不固，肾阳式微。因拟：黄耆一两，当归二钱，芍药三钱，桂枝一钱五分，附子三钱，蒲黄三钱炒半黑，甘草一钱。时病人母亲在座，曰：小女从未服桂附等药，气喘用黄耆，血崩用蒲黄，是何深意？予曰：此病气不统血，气血两不维系，当归合黄耆为当归补血汤，乃补气以摄血，桂枝协芍药则暖营建中，桂枝协附子则化气温下，固护真元。此病服阴柔药太多，阴气用事，经隧滋滞凝泣，血不归经。用蒲黄者，在本药性能是以止血者行血，而本方意义则是以行血者止，血，合之为补气摄血，温固八脉，以升为降，以通为止。药煎好，迟迟未敢服，人暮，又晕厥一次，无已，及以予药姑试。初服二调羹，越二时许，无恙，再服二调羹，又越二时，气喘略平，因将余药大半钟服下。夜半，病者曰：我倦甚，可将靠被撤去，令我稍平，睡下后，熟眠一小时，月来未平卧者，居然平卧，未熟眠者，居然熟眠，醒后气渐平，崩渐少。翌日复诊，原方桂枝加为三钱，芍药加为六钱，去蒲黄，加桑螵蛸三钱，鹿角霜一钱，一星期气平崩止，后以当归内补建中汤、复脉汤等收功全愈。

宦某之爱人，体素薄弱，经事不调，赤白带下，饮食精汁不变气血而化秽浊，由来者久，近年加剧。崩漏频频，暴下如注，色黑成块，肌肉瘦削，皮肤反浮肿，足腿面部肿尤显著，色夭不泽唇口惨白，喘气矢气，四末清冷，脊膂腰髀酸楚，俨近下痲。抗日战争时期，住重

庆某医院治疗，时历半载，所费不资，后虽小愈，尚不了了。胜利后回汉，病又复作，鉴于前此迁延，心殊惧惧，来我处商治。问：中医能疗此病乎？答：带下崩漏，乃妇科常有病，不过此病延久，病重，渐近癆瘵，五液俱涸，八脉不固，精竭髓枯，下元败坏，阴病及阳，气不统血，不仅虚证，且为虚证之甚者，中法当可治愈。诊脉沉迟细弱，血脱气泄，阴阳俱竭，诸虚百不足，拟方重味填补，升固八脉，不刚不膩，半调半摄，方用：当归四钱，杭芍四钱，茯神五钱，杜仲三钱，鹿角霜三钱，桑螵蛸三钱，蒲黄炒半黑三钱，广木香一钱，升麻一钱五分，甘草一钱。三剂略安，精神较好。二诊，去蒲黄加藜艾炭，三钱，又三剂，崩减，气渐平调。三诊，加炮姜炭一钱，侧柏炭，三钱，四剂崩止。四诊，去姜炭、艾炭、鹿角霜、升麻，加枸杞子、复盆子、女贞子各三钱，守服二星期，漏下亦愈。治疗历程共计不过一月，后以复脉汤加桑螵蛸、龟胶、鹿胶紫河车，膏剂收功。此病养血不用萸、地，补气不用参、术，温下不用桂、附，固涩不用赤石脂、禹余粮，均值得探索。盖参、术呆滞，萸、地滋膩，桂、附刚烈，二石顽钝，要非奇经之妥善治法。妇科此证甚多，学者注意。

《冉雪峰医案》

叶熙春

王，女，三十八岁。七月。富阳。经行半月未止，量多色殷，午后潮热，掌心如灼，心悸头晕，夜寐不安，口干心烦，足跟隐痛，脉来虚数，舌红中有裂纹。肝肾之阴不足，虚火内扰，冲任失固，治拟固经汤化裁。

炒白芍 9克 黄柏炭 3克 醋炙香附 6克 炙樗皮 9克
炙龟版 15克 炒黄芩 6克 侧柏炭 9克 地榆炭 9克 仙鹤草 30克
生地炭 15克 地骨皮 12克

二诊：经漏已止，心悸头晕减轻，夜寐较安。治以前方去侧柏、地榆、仙鹤草，加旱莲草、女贞子，续服六剂。

师，女，十二岁。九月。上海。年未二七，经汛已临，量多色鲜，延已五旬未净，面容少华，午后有虚潮之热，唇色淡红。冲任已损，有人怯途之虑，亟拟固摄奇经。

熟地炭 18 克 黄肉 5 克 煅龙骨 12 克 清炙黄芪 9 克
炒白芍 9 克 炒阿胶珠 12 克 炙侧柏叶 9 克 艾叶炭 6 克
旱莲草 15 克 陈棕炭 9 克 煅牡蛎 30 克 小蓟炭 9 克

二诊：前方服后，经漏顿止，而潮热未清，脉虚无力。血去阴伤，再拟滋养肝肾，以丽八脉。

熟地炭 18 克 阿胶珠 12 克 炒白芍 9 克 炙侧柏叶 9 克
旱莲草 15 克 清炙黄芪 9 克 小蓟炭 9 克 黄芩炭 5 克
制女贞子 9 克

《叶熙春专辑》

施今墨

余某某，女，31 岁。经期不准，常有淋漓不断之象，此次月经已二十日不止，仍呈淋漓之状，血色淡，且有异味，腰腹时作酸痛，心跳、头昏、身倦、睡眠不稳，阴道时常出血，性交时亦出血，前由市立医院检查为子宫颈息肉，建议手术，患者愿求中医治疗。舌苔薄白，脉象缓弦。

辨证立法：阴道常有出血现象，且性交亦见出血，必属阴道子宫局部疾患，并非月经问题可知，但长久失血，气血两虚，病情将日就缠绵，综观脉证，冲任亏损，不能藏血，血去则阴伤，先贤谓暴崩宜补，久漏宜清，因有未尽之宿瘀滞留于冲任之处，宜去瘀生新，养阴清热。

处 方： 贯仲炭 6 克 陈阿胶 6 克，另溶、分二次兑服
龟板胶 6 克，另溶、分二次兑服 老棕炭 10 克 黑升麻 5 克 生地炭 12 克
黑芥穗 10 克 熟地炭 12 克 杭白芍 10 克，柴胡 5 克同炒
茅苍术 6 克 川黄柏 6 克 黑山栀 6 克 川杜仲 10 克 川续断 10 克

熟女贞 12 克

二诊：服药三剂，血已减少，惟稀液异味分泌仍多，脉弦转平，前方加煅刺猬皮 6 克再服三剂。

三诊：前方服二剂之后，感觉腹部不适，旋于阴道中脱出如拇指大之黯红色软质肉块，但未见出血增多，仅有血性稀薄分泌物，精神紧张，身倦无力，食眠仍不佳，脱出之组织已送医院作病理检查，嘱仍将第三剂服完，俟检查结果再行复诊。

四诊：一周后携来检查结果，脱落物为子宫息肉，未见癌细胞，经妇科细检，宫颈正常，未再发现息肉，患者体力已弱，拟进调气理血之剂，并嘱注意调摄。

处 方：杭白芍 10 克、柴胡 5 克同炒 生熟地各 6 克、酒炒
陈阿胶 10 克，另溶，分二次兑服 酒当归 10 克 酒川芎 5 克
粉丹皮 10 克 熟女贞 12 克 朱茯神 10 克 朱寸冬 10 克
玫瑰花 6 克 代代花 6 克

五诊：患者服前方四剂后，精神体力均见好转，食眠具佳，阴道血液及异味分泌完全停止，脉象平稳，本元日复，冲任渐充，嘱其注意调摄，可不服药矣。

高某某，女，47 岁。近一年来，经期不准，忽前忽后，忽多忽少。本月来潮二十余日未净，量多且有血块，背痛腰酸，头晕耳鸣，心跳气短，食欲不振，四肢无力。舌苔薄白，脉象虚弱。

辨证立法：时届更年之期，忽呈崩下之症，血气大伤，统摄无力。血不达于四肢则酸软倦怠；上不荣于头脑则头晕耳鸣；心血不足则气短心跳。肝不藏血，脾不统血，经期延绵二十余日。心肝脾皆为掌管阴血之脏，治此三脏，当可恢复。

处方：野党参 10 克 野於术 6 克 炙甘草 5 克 炒远志 10 克
土杭芍 10 克 柏子仁 10 克 山萸炭 15 克 莲房炭 12 克
鹿角胶 10 克 川续断 6 克 沙蒺藜 10 克 春砂仁 5 克 川杜仲 6 克
白蒺藜 10 克 生熟地各 10 克 五味子 6 克 五倍子 6 克

二诊：前方服四剂，血已减少，精神好转，食欲增，酸楚减，睡眠甚安，心跳头昏显著减轻，仍有少量血块。

原方去莲房炭，加玫瑰花、月季花各5克，再服四剂。

三诊：血已止，症状除，但昨日突然眩晕，恶心，榆血压为80/60毫米汞柱。遂又觉心跳，仍是血不上荣之症，拟补虚养血法。

处方：党参10克 当归身6克 明天麻5克 白薇6克
鹿角胶6克 阿胶珠10克 远志6克 沙蒺藜10克 生龙骨10克
狗脊15克 白蒺藜10克 生牡蛎10克 菖蒲5克 野於术5克

董某某，女，22岁。平素月经尚属正常，十日前因事急怒，又届经期，竟然暴下如注，十日未净，少腹时痛，别无其他症状。脉象大而软。

辨证立法：急怒伤肝，肝为藏血之脏，适届经期，遂致暴下如注，急拟舒肝理血法治之。

处方：鹿角胶10克，另烊化兑服 砂仁3克 醋柴胡5克
阿胶珠10克 生熟地各6克 杭白芍10克 酒川芎5克
当归身6克 醋祁艾6克 白蒺藜12克 炒远志10克 炙甘草3克

二诊：连服六剂，服至第三剂时血量大为减少，现症只余带下粉色，嘱再服二剂，即可停药。

靳某某，女，29岁。三年前由于过劳，适届经期，遂致淋漓不断。时少时多，日无间断，色黑紫有血块。腰腿酸楚，少腹坠痛，头晕气短，倦怠无力，经协和医院检查诊断为子宫粘膜下肌瘤，本人不愿手术，故求诊中医设法。舌质淡并有齿痕，六脉沉迟而弱。

辨证立法：月经淋漓不断，业已三年，气血双损，虚寒为崇，血色黑紫有块，非热结之瘀，实系出血缓慢，稽留时久，凝结所致。察其脉沉迟而弱，舌质淡红，均非热证可知，拟升阳补中固涩为治。

处方：米党参10克 干姜炭3克 祁艾炭10克 苍术炭6克
川续断10克 黑升麻5克 白术炭6克 川杜仲10克 黑芥穗5克
生地炭15克 五味子5克 熟地炭15克

赤石脂 10 克、血余炭 10 克阿布包 五倍子 5 克 山萸炭 18 克
鹿角胶 10 克 陈阿胶 10 克 紫厚朴 5 克 炙甘草 3 克

二诊：服药十剂，此间曾血止两日，为三年来未有之现象，而后血又再来，量甚少，色亦转淡红，头晕渐好，仍觉倦怠。

前方照服，另用仙鹤草 60 克，荷叶 30 克，红鸡冠花炭 60 克，估龙肝 90 克，煮汤澄清代水煎药。

三诊：又服十剂，出血大为减少，有时如红带，气短心跳，头晕均效，精神亦转佳，腰腿酸楚减轻，拟用丸方巩固。

处方：每日早服定坤丹 1 丸，晚服玉液金丹 1 丸

《施今墨临床经验集》

经行发热

黄堂

翁，女，五十三岁，八脉交虚，恙久阴阳偏胜，正值经行，水愈亏而阳愈亢，热势转甚，腰楚怯弱，良有以也。年逾五旬，冲任八脉交虚，脉形乱数，宜育阴和阳。

金石斛 女贞子 白芍 茯神 大枣 细生地 旱莲草 牡蛎 杜仲 湖藕

复诊：前方颇适，但久虚不复为之损，幸胃纳稍振，所谓精生于谷，亦有生长之机，望其一阴来复如何？

三才汤加茯神 牡蛎 川石斛 女贞子 枣仁 白芍 玫瑰露 藕肉

《黄氏纪效新书》

魏长寿

冯尚高之女，年十六岁。住和尚桥。

病名：经期潮热。

原因：血热气郁，每月经水屈期，身必发热。

证候：潮热，腹痛便闭。夜梦不宁，兹值经来，身热更盛。

诊断：脉弦，舌红。血热瘀留，子宫炎之证也。

疗法：清热疏滞破瘀。

处方：柴胡二钱 薄荷一钱 丹皮二钱 焦山栀三钱 赤苓三钱
元明粉三钱 白薇三钱 桃仁三钱 杜红花三钱 制大黄三钱
竹茹三钱

效果：服药后，得泻，经行痛止，热退病痊。

炳按：此症若体强者，用此方效更速。若怯弱者，易丹栀逍遥散，服四五帖亦效，即逍遥散加焦山栀、丹皮。

《慈溪魏氏验案类编初集》

方公溥

刘女。七月五日诊：月事将净，寒热微见，咳嗽缠绵，法当清经理肺。

白当归 9克 粉丹皮 4.5克 地骨皮 9克 白芍药 9克
大生地 9克 云茯苓 9克 炙甘草 4.5克 仙半夏 4.5克
川贝母 9克，去心 炙冬花 9克 香青蒿 9克 枇杷叶 9克，去毛，包

七月七日复诊：经净热解，带下颇多，咳嗽未愈，再与理肺束带。

处方同前，除粉丹皮、生地、枇杷叶、青蒿、加炙紫苑 9克，淮山药 9克、左牡蛎 15克、花龙骨 15克。

七月二十八日又诊：月事将近，寒热乍发，胸闷，气逆，咳嗽痰阻，法当理肺调经。

全当归 9克 香青蒿 9克 白芍药 9克 冬桑叶 9克
紫菀肉 9克 生甘草 3克 瓜蒌皮 9克 象山贝 9克 广桔络 9克
全福花 9克，包 光杏仁 9克 枇杷叶 9克，去毛，包

《方公溥医案》

经行头身痛

费伯雄

某。男以肾为先天，女以肝为先天。盖缘肝为血海，又当冲脉，故尤为女科所重。营血久亏，肝气偏胜，冲脉受伤，每遇行经，尻胯作痛。抱恙日久，不易速瘳。急宜养血柔肝，和中解郁。

全当归 杭白芍 茺蔚子 大丹参 玫瑰花 制香附 黄郁金 台乌药 云茯苓 冬白术 怀牛膝 蕲艾绒 合欢皮 降香片 莽饼

《费伯雄医案》

陈鞠生

经来作痛，有腹痛，有遍身痛，有小腹痛，有经前痛，有经后痛，有经未尽作痛，有经已尽作痛，有吊阴痛，有小便痛，其形不一，所因亦殊。壬辰，余寓都门，有王姓妇，经来月迟一月，遍身疼痛，形色不鲜，恶寒喜暖，症情颇重，来延余诊。切其脉，虚而迟，知是阴血素亏，复感寒邪所致。用当归、川芎、乌药、白芷、干姜、川椒、陈皮、柴胡、炙草、白术为方，数剂，经来渐早，痛势亦轻，后去川椒，加熟地、白芍，调治而愈。乙未，上海有李姓妇，每月经水先期而至，淋漓不尽，腹中攻痛不堪，余诊之，脉数舌绛，知是性躁多气伤肝，而动冲任之脉，合九味四物汤、滋阴丸意为方，数剂，经来少缓，痛势亦平，后仍前方加减，调治而痊。或问：“经水者，阴血也。妇人以血为主，而中气多郁，郁斯滞，滞斯痛，始治宜耗气益血。”余曰：“不然，当随时论证耳。夫气为血配，气热则血热，气寒则血寒，气升则血升，气降则血降，气行则血行，气滞则血滞。果系郁火，气盛于血，不妨用香附散、肝气散与木香、枳壳、槟榔之类，行气开郁，若夫气乱须调，气冷须温，气虚须补。男女一般。阳生则阴自长，气耗则血亦涸耳。

岂可专耗其气战！”

《诊余举隅录》

魏长春

陆吉人君夫人，年二十一岁。五月二十五日诊。

病名：寒客胞中。

原因：经来之后，血府空虚，风寒客之，遂患寒热，头痛肢酸，病已二旬。前医杂进凉药，风寒被逼内闭。

证候：肢冷足痹，不能行动，结胸腹满，胃呆，耳聋沉眠，神识日清夜昏。

诊断：脉弦软，舌淡红。脉证合参，是寒客胞中，即樊星环先生，所谓寒人血室证也。

疗法：用当归四逆汤加减，温通血海寒闭，藉以外达少阳。

处 方：当归三钱 桂枝一钱 赤芍三钱 炙甘草一钱
北细辛三分 通草一钱 荆芥二钱 丹皮二钱 朱茯神四钱
杜红花二钱 鲜桑枝一尺

次诊：五月廿六日。神识清楚，沉迷已醒，胸胁满闷亦舒，耳聋稍聪，四肢未知，畏寒不渴，便闭。脉象迟缓，舌色红润，血海被寒所袭，不能温养肢体，故肢厥畏寒也。再拟温养血分。

次 方：当归四钱 桂枝一钱 生白芍三钱 炙甘草一钱
荆芥一钱 防风一钱 秦艽二钱 丹参三钱 朱茯神四钱 川芎一钱
鲜石菖蒲一钱 明天麻一钱 杜红花二钱 鲜桑枝一尺

三诊：五月廿七日。血得温养，神清肢暖，便闭不渴。脉象迟软，舌淡红润。迟脉为寒，软脉属虚。血因寒凝，肠滞便闭。当和活血行滞润肠法。

三 方：当归四钱 生白芍三钱 桂枝一钱 广地龙二钱
炙甘草一钱 丝瓜络二钱 橘红络各一钱半 川贝二钱 秦艽三钱
防风一钱 杜红花三钱 桃仁三钱 柏子仁三钱 朱茯神四钱

四诊：五月廿九日。大便解后，四肢和暖，稍得行动，身倦乏力。左脉滑，右脉缓，舌红。按厥阴中风，脉微浮为欲愈。今左脉滑，即属浮象。右脉缓，为脾胃失和，营卫渐调。真气未复，腠理不实，还宜善自颐养，尚防变端。

四方：西归身三钱 生白芍四钱 川芎一钱 黄菊花三钱
钩藤三钱 柏子仁三钱 橘红一钱 明天麻一钱 秦艽二钱
桑叶二钱 茯神四钱 丹皮二钱 丹参三钱

效果：服药后病愈。

炳按：经后血府空虚，风寒客之，乘虚袭入，仍宜温通血脉，宣行滞气，俾寒气行，诸疾自失。

《慈溪魏氏验案类编初集》

章成之

戴女。每值经之将行，身心总感不快，头痛，脘闷乳胀，此症古人称为木不条达。其实神经过敏者，受经期影响每作此状。此方为疏肝理气而设，亦调畅其神经之意

醋柴胡 3克 白芍 9克 川芎 4.5克 明天麻 3克 延胡索 9克
川楝子 9克 老苏梗 6克 制香附 6克 香甘松 3克
旋复花 9克，包 香元皮 9克

《章次公医案》

经行感邪

黄述宁

杨姓妇人，感冒时邪，适当经到，去血甚多，血没于初，七日服他医之医，自顶至足，大汗淋漓，神昏谵语，直视摇头，肉瞤筋惕。予按：经水当期而到，因客热动血，大损其荣，与不当期而到，及方到而忽止。列于血室条者，大有间别。其客邪混于三焦者，固已随血

而去，乃因荣液亏虚，阴阳未复，此时若给以浆粥，兼进和荣养血之剂，一二日可愈，医者不察，仍用时邪通套之剂，以致汗出不止，复伤其卫。《内经》谓“血夺忌汗”之是矣，乃投以枣仁三钱，佐以麦冬、五味、远志、归、地之品，二服人事俱清，晌惕皆止。询其年三十六岁，幸体强血富，而获效耳。

《黄澹翁医案》

逆经

郭右陶

沈弘先内人经期发热。鼻血如注，昏迷沉重，肚腹作胀。延余诊之，脉伏，余曰：“兼痧而经逆者也。”弘先善放痧，刺腿弯二针，出紫黑毒血，不愈。余用桃仁、红花、独活、细辛、山楂、香附、青皮，加童便饮之，经行，调理而愈。

《痧胀玉衡》

何书田

癸水自幼未通，鼻衄时作，兼有症癖。此倒经之候也。若论治法，惟有温养肝肾而已。

上肉桂 炒熟地 山萸肉 枸杞 怀膝 紫石英 炒艾绒
炙龟板 全当归 丹参 乌贼骨炭

《竿山草堂医案》

林佩琴

沈氏。按月倒经，血出鼻口。此由肝火上迫，不循常道。宜抑肝火，导归冲任，可使下行，此即搏跃过颡之理。拟四物汤去川芎，其当归用醋制，加生熟山梔各二钱、丹皮二钱、黄芩、枳壳各钱二

分、降香、甘草各一钱，郁金五分。每月经前服四剂，后得转逆为顺，

《类证治裁》

陈虬

永嘉贾楚玉尊政，黄漱兰先生令爱也，孕十四月而不产。永瑞医者日从事于养胎诸剂，而胎终不长不产，因乞予以卜产期。脉之两手均见浮洪，唯左手关稍弱，审其胎前并无弄胎试月诸候。唯恶心至今未除，心颇疑之，因自勘曰：“以为胎耶，何孕已逾年，屡服补剂，而胎终不长？以为病耶，岂有经停年余，而起居食息，步履色泽毫无病状者？”继而思之，孕二三月而呕吐恶心者，盖胚胎初结，血难骤下，故壅而上僭也。迨四五月，则血渐下行荫胎，而恶心愈矣。今十四月而此候尚在，血逆已甚，况脉又浮洪，于法当病，倒经。问向有齿血鼻衄否？皆答以无。忽忆喻江西治杨季登二女案，因再问曰：“比来身常得汗否？”曰：“汗虽常有，但不甚沾濡，不以为意也。”予作而起曰：“得之矣！此病结痼而患逆经，医不细察病情，故往往背谬，请竟其说，以解众疑。”按《病源候论》，称症瘕之病，不动者直名曰瘕，即此病也，故虽十四月，而不动不长，内病瘕而外无病状者，经自行也。凡妇人病，经犹未止，病虽甚可治。今经不行，非果经停也，经逆行旁溢，人自不察耳，盖汗出于心，而心实主血，汗血本属一家，故伤寒家每指血为红汗，若知平时所沁之汗即血，血即是经，则此病不过逆经结瘕，无他故也。盖妇人终身病瘕，而一切如常者，比比皆是，又何独疑于此之经停十四月，而无病状哉？方以木通二钱 莲子带心七枚 正阿胶钱八分 生白芍钱五分 白芨末八分 麻黄根七分 浮小麦钱五分 清心敛肺，养血止汗之品，先收其汗，十剂而汗果止。继以当归钱二分 杞子三钱 阿胶二钱 龟胶二钱 生灵脂杵细八分 桃仁二钱 新绛七条 养肝滋肾，活血通经之剂，以通其经，十五剂而月事果来。命将本方分半守服，二十剂，按期而经水又来，于是群疑始释。筮日，予制一破积消瘕之方，

令其合丸守服，渠家见皆攻伐猛烈之品，畏不敢服，宁甘带病延年。盖血足经行，寝已无几，故渠惧攻中止。仆尝谓认症之诀，当于反正疑似处辨别明白，自解自难，久之自有一种真正道理，横飞跃出，焕然于心目之间，特非多读书，多临症者，亦断不能有此境耳。吁！安得潜心医学者，与之参究其间哉！

《葵庐诊录》

柳宝诒

庞。背气不畅，肝火上行，血从清道而溢，脉弦数内热，少腹痛，此倒经病也。当畅气调营、疏泄木火。

金铃子酒炒 延胡索醋炒 广木香 炒归尾 桃仁泥
长牛膝红花煎汁拌炒 炒丹皮 黑山栀 鲜生地薄荷同打 丹参 青皮 茅根肉

《柳宝诒医案》

方耕霞

丁。当癸事之期而吐血。厥阴之气逆行也。姑降逆通营以平肝木。勿加咳嗽，尚易图治。

蒲黄炒阿胶 旋覆花 沉香汁 血珀 醋炒五灵脂 风归尾
姜山栀 香附 韭汁炒大黄 代赭石 风丹皮

再诊：肝气逆行而吐血，须顺降通营，不可以寒凉遏之。盖木性喜升，愈遇愈逆，其势然也。前方既合，姑且守之。

前方去五灵脂 加醋炒黑大豆 白芍

归。逢癸事至必鼻衄，俗所谓倒经也，脉右尺独大，厥阳之火挟君火上乘，拟熄之降之。

细生地 归身 延胡 香附 砂仁 韭汁 炒大黄 陈皮
丹皮 白术 炙草

《倚云轩医话医案集》

邵兰荪

经停两月，脉沉涩，咳血气促，脘中空闷。此属倒经，宜清降为主。

苏子一钱五分，杵 光杏仁三钱 桑叶三钱 紫苑二钱 川贝二钱
白薇一钱五分 栀子三钱 炒知母一钱五分 侧柏炭三钱 降香五分
丹皮一钱五分 引鲜荷叶一角 二帖

《邵氏医案》

曹南笙

某右。冲年天癸未至，春阳升动寒热衄血，平昔溺后腰痛，耳目甚聪明，先天质薄，阴本难充易亏，最多倒经之虑。

乌骨鸡 生地 白生芍 茯神 天冬 知母 牛膝 荒蔚子
女贞子 阿胶

上药除阿胶用水煎汁，乌鸡去毛翅，另以童便一碗，青蒿汁四碗，醇酒两碗、米醋一碗同煮，再加入煎药汁收膏，入阿胶收炖，暖服五钱。

《吴门曹氏三代医验集》

贺季衡

朱女。倒经数年，每月由左鼻而出，腹中先痛，间吐食物酸水，脉弦细，舌红。当从肝胃两治。

当归二钱 大丹参二钱 川郁金二钱，炒炭 延胡索一钱五分
川楝子一钱五分 白蒺藜四钱 大白芍二钱，吴茱三分拌炒 大生地五钱
生香附一钱五分 新红花八分

马女。血热，肝失条达，痰气又薄结于中，每值经行，必先鼻衄，遍体痛，两乳痛，少腹结胀，脐突，或音嘶，或胁下痛，脉弦滑，舌苔浮黄。业经数年，难图速效。

当归二钱 大丹参一钱五分 川郁金二钱 青陈皮各一钱
大白芍二钱 川楝子一钱五分，醋炒 旋覆花一钱五分，包 川断肉四钱
白蒺藜四钱 柴胡一钱，醋炒 云苓三钱 金橘叶廿片 红枣三个

华女。倒经由鼻口而出，按月以行，血块磊磊，少腹胀满，脘闷
厌食，左耳流脂，脉弦细，舌红中黄。肝家气火上升，冲脉不通所致。
当清肝泄热，导血下行。

鲜生地八钱 桃仁泥一钱五分 藏红花五分 大丹参二钱
粉丹皮一钱五分 郁金炭二钱 淮牛膝一钱五分 黑山栀二钱
京赤芍二钱 当归二钱 藕二两 佛手八分

另：八味道遥丸二两，四物丸二两，和匀。每服三钱，开水下。

《贺季衡医案》

张山雷

胡右。及笄年岁，汛事未行，忽尔衄血大涌，渐以面浮足肿，全
体俱膨。此血络不疏，挟水涵涌，本非轻恙。再授泄水化瘀，病机稍
转，身肿已减，脉弦沉涩。舌不腻，宜踵前意，无事更张。

生延胡 6克 全当归 4.5克 台乌药 4.5克 生紫菀 6克
杏仁 9克，打 炒车前 9克 五加皮 9克 茜草 6克 小蓟 6克
路路通 6克 木蝴蝶 3克 杜兜铃 4.5克 植肉炭二钱

另冬瓜皮 240克 杉木片 30克 丝通草 15克，三物先煎代水。

二诊：衄后足肿面浮，是肝肾阴亏，面肺亦失展布之职。脉左弦
搏，舌不甚腻，证非易疗，姑再宣肺金以通水道。

杜兜铃 4.5克 生桑白皮 12克 条子芩 6克 肥知母 4.5克
生延胡 6克 生植肉 6克 生研代赭石 12克，包煎 五加皮 9克
路路通 6克 广郁金 6克 干地鳖虫 3枚

另 兰田三七 2.4克，研细末，分二次药汁吞 冬瓜皮 15克
大腹皮 15克 丝通草四钱，三物煎汤代水

《张山雷专辑》

魏长春

陈友富之妻，年十六岁。八月二十七日诊。

病名：伏暑倒经。

原因：伏暑内蕴，新凉外束。

证候：恶寒发热无汗，便闭三日，鼻衄呕吐，经水先期而至。

诊断：脉象滑数，舌红苔薄黄。伏暑热炽，迫血妄行也。

疗法：清热凉血通腑，凉膈散合桃仁承气汤加减。

处方：鲜淡竹叶三钱 薄荷一钱 连翘三钱 黄芩三钱
焦山栀三钱 生大黄四钱 元明粉四钱 桃红三钱 生甘草一钱
鲜生地八钱 银花三钱

次诊：八月廿八日。昨服药后，下酱类六七次，经水仍行。微有寒热，咳嗽牵引腹痛，微汗，胃呆，口干。脉象滑数，舌红润，苔薄黄。用柴胡白虎汤合青蒿鳖甲汤加减，便厥阴伏热，外达少阳。

次方：柴胡二钱 黄芩三钱 西党参三钱 炙甘草一钱
制半夏三钱 生石膏八钱 知母四钱 鲜生地八钱 银花三钱
青蒿三钱 炙鳖甲八钱

效果：服后热退病瘥。

炳按：前证伏暑热升，倒经鼻衄，清暑降气，凉血逐瘀，故诸症即平。

董姑娘，年十四岁。四月二十五日诊。

病名：倒经吐血。

原因：学校读书，体操跑跳受伤，冲气上逆。

证候：咳嗽潮热，经来极少，上逆吐血衄血。

诊断：脉弦滑数，舌红。冲脉上逆咯血，病名倒经。

疗法：清热降冲破瘀。

处方：参三七一钱，研吞 鲜生地八钱 天花粉八钱 赤芍三钱
丹皮炭三钱 大黄炭三钱 玄参八钱 益母草三钱

次诊：四月廿六日。得泻热从下降。吐血衄血皆止，经来稍多。脉滑舌红，咳嗽未已。仍拟和营降逆法。

次方：参三七一钱 女贞子三钱 早莲草三钱 赤芍三钱
丹参三钱 益母草三钱 茯神三钱 米仁八钱 瓜蒌皮三钱
苦杏仁三钱

三诊：四月廿八日。咳嗽未止，经水仍来，脉滑舌红。拟清肺凉血法。

三方：桑白皮三钱 枇杷叶五片，去毛 生甘草一钱 杜百合三钱
白芍三钱 瓜蒌皮三钱 白茅根三钱 女贞子三钱 早莲草三钱
苦杏仁三钱

效果：服后咳嗽止，胃苏病痊。

炳按：此证初治，用丹栀逍遥散亦极效，倒经即下行。

《慈溪魏氏验案类编初集》

汪逢春

王女士，十四岁，二月二十六日

年已二七，癸事未通，每月必见鼻衄，流血甚多。衄血不至，则一身疼痛。病属倒经。亟以通利百脉，调达冲任。

鲜金斛一两，先煎 赤芍药钱五 真郁金二钱 藕节廿个
鲜生地一两，苦楝子钱五同炒 真归须三钱 四制香附三钱 苏子霜钱五
怀生膝三钱 焦山栀二钱 粉丹皮钱五 丝瓜络三钱

张右，二十一岁，九月八日。

月事稠黑，鼻干有血，牙痛阵作，两脉细滑而涩，饮食二便如常。病属血凝气滞，拟以调气通络。

鲜怀生地五钱，苦楝子钱五同炒 四制香附三钱 怀牛膝三钱
鲜佛手三钱 赤芍药钱五 真新绛钱五 桔子芩钱五 嫩桑枝五钱
小青皮钱五 真归须三钱 藕节廿个 丝瓜络三钱

益母丸二丸，匀两次，药送下

二诊：九月十二日

月事渐畅，其色瘀鲜不一，鼻血止而牙痛亦愈，两脉细弦而滑。再以前法加减。

怀生地三钱、苦楝子钱五同炒 四制香附三钱 枯子芩钱五
鲜佛手三钱 赤芍药钱五 真归须三钱 藕节廿个 怀牛膝三钱
小青皮钱五 真郁金钱五 延胡索钱五 丝瓜络三钱 嫩桑枝五钱
益母丸二九，匀两次，药送下

《泊庐医案》

孔伯华

李女，九月十五日。湿热过盛，经络被阻，上犯肺络，经停两月，渐致逆经呕血，舌苔白腻，脉象滑数兼弦，宜柔肝降逆，导血归经法。

鲜茅根两 旋覆花三钱 代赭石三钱 炒糊丹皮二钱 知母三钱
鸡血藤五钱 方通草钱 橘核三钱 桃仁二钱 杏仁二钱
赤小豆五钱 川牛膝三钱 苏子二钱 生滑石块四钱 血余炭三钱
藕药

《孔伯华医集》

章成之

谢女。经停四月，代偿于口鼻而出。比来腹感胀痛，色、脉皆无虚象，可攻。

泽兰叶9克 蓬莪术9克 赤芍9克 川芎6克 王不留行9克
紫丹参9克 桃仁泥12克 当归9克 丹皮9克 粉甘草3克
大黄廋虫丸12克

张女。漏红，见鼻衄而量多，病者自以经停四月为妊娠，故不以鼻衄为倒经。

生地榆9克 干地黄15克 仙鹤草9克 旱莲草9克

生侧柏叶 12 克 冬青子 9 克 栀子炭 9 克 干荷叶 6 克 白茅根一扎
蛤粉炒阿胶 12 克 石斛 15 克 黑木耳 12 克

何女。月经愆期十日，鼻衄，此为代偿性月经。患者少腹胀痛，是为瘀阻，可用催经剂。

丹皮 9 克 桃仁 2 克 当归 9 克 川芎 6 克 泽兰 9 克
茜草 6 克 苏木 6 克 生蒲黄 6 克 台乌 6 克

《章次公医案》

王文选

谈某某，18 岁。学生。1952 年 7 月 21 日初诊。

患者于去年冬初，突然流鼻血，量不多，每日午后二三次。三天后月经来潮，量少色红，三天而净，余无不适，嗣后每月如此。自今年来，鼻血逐渐增多，牙龈肿胀出血，五天即止；月经继之而来，量极少，仅数滴即过。每逢经期，胸胀甚，心情悲伤，心神不安，欲坐思行，欲走思坐。如此，等经过后四五日，少觉舒适。身体佳食，面色红润，脉象弦，舌红少苔。虽曾治疗多次，效果不甚显著。脉症合参，此乃年少气血旺盛，秉性倔强，嗜食辛辣，肝气横逆，迫血妄行。治宜泻肝清金。处方：

天冬 4.5 克 远志 6 克 柴胡 3 克 沙参 4.5 克 连翘 3 克
山栀 3 克 知母 3 克 羌活 3 克 白芷 3 克 胡连 1.5 克 甘草 1.5 克

7 月 26 日二诊：服药三剂，月经已过，以知柏地黄丸，每日二次，每次 9 克，开水空心服下，连服半月。

8 月 18 日三诊：经前又流鼻血，但经量多色深红，继服初诊方三剂。

8 月 24 日四诊：经净，再以知柏地黄丸如前服之，接着服丹栀逍遥散一周。如此治疗两个月经周期，前后共治四月而愈。

《中医医案医话集锦》

经行便血

李铎

咸丰己未治一妇，年二十余，患奇证。每当泛期，腹中痛连少腹，引入阴中，小便淋漓，其经血不行于前阴，反从后阴而行，二三日腹痛已，淋漓亦稍愈，然淋漓则常发，次月当期亦如是。余窃议此症与交肠相似，而淋证有五，多属热，交肠症是阴阳失于传送，大小二便易位而出，若交肠然。古用五苓散，专为通前阴而设也，虽淋证亦可通用，而此症经血不行于前阴，又与交肠似是而非者也。检诸书，惟丹溪治一妇嗜酒，痛饮不醉，忽糟粕出前窍，溲溺出后窍，此则前窍患淋，后窍行经，又似可相通者也。彼用四物加海金沙、木香、槟榔、桃仁而愈。余以此方去槟榔加元胡、牛膝、车前、甘草梢，欲通经于前阴，兼可治淋，淋虽小效，诎经血仍复如是，再四思维，情实难解。后偶阅《伤寒集注》舒诏答门人论云：此太阴脾气虚弱，不能统摄，少阴真阴素亏，阴寒内结而为腹痛，侵入厥阴则痛连少腹，引入阴中，其证总为三阴寒极，阻截前阴，经血不能归于冲任，而直趋大肠，宜用参、芪、苓、术大补中气，附、桂、姜、砂以驱少阴之寒，吴萸、川椒以散厥阴寒结，更加山药、芡实兜涩大肠，香附、万年霜引导前阴，一定之理，余始得其法而进退之，调理数月，果经调而孕叶，连产二女一子，世俗所谓得来全不费功夫，可见业医者不可不博览群书，以广其见识。

此的系奇症，吾兄此方施治，立奏奇效，余亦见未到此，斯可为留心医学者开一法门。寿山

《医案偶存》

经行乳胀

柳宝诒

平。向患经行之前，两乳核痛，已属肝气不和之病；此次脘腹撑胀块痛，经行后少腹板滞，酸痛愈剧，营络瘀阻，恐其郁久暴崩。拟与通络和瘀。

金铃子肉 小茴香 煎汁，炒 延胡索 醋炒 归 尾 桃 仁
长牛膝 红花 酒拌炒 橘 络 丝瓜络 乳香 酒煎拌炒 丹 参
青广木 香桂枝 煎汁拌炒 益母草 香橼皮 白芍

《柳宝诒医案》

张汝伟

季右，年三十，宁波。肝气郁滞，胃受其侮，荣血滞而流行不畅，经事愆期，乳中结核胀痛，头晕目花，白带淋漓，屡服平肝养血通瘀之品，胀痛依然，拟柔肝和胃治之。

逍遥丸包 粉归身 阿胶珠包 云茯苓 制女贞子 各三钱 土
炒白芍 土炒白术 炒枳壳 制香附 各钱半 炒川芎 一钱
淡吴萸 六分 绿萼梅 五分

本证治末；季妇之夫，为中药肆职员，因经停，自服茺蔚、延胡、三棱、莪术之品，经不至而乳愈胀痛，服前方二剂，经通乳块亦消。

方义说明：大凡血之不通，气为之滞也。经曰：气为血帅，气行则血亦行。经之不来，血之郁也。乳之作胀，气之结也。徒攻其血，愈伤其气。今用逍遥丸，解肝之郁，以理其气，四物去地加阿胶，以养其血，云苓、白术、枳壳、香附和气化湿，用吴萸以温养之，萼梅以疏达之，自然取效。

《临症一得》

经断前后诸症

曹南笙

某右。天癸当止之年，经来淋漓不断，乃阴衰阳动，入秋深夜寐甚少，汗泄四肢胸臆，夫冲脉隶于阳明，其气行于身前，阳明脉空，阳越卫疏，阴火升举，当宗丹溪补阴丸或虎潜丸之属，久病投汤太过恐妨胃耳。

早服丹溪补阴丸四钱

《吴门曹氏三代医验集》

叶熙春

张，女，四十六岁。山海关路。妇人年近七七，阳气将衰，阴血亦弱，癸水月减，知将终止，亦不为病。惟阴虚者多火，形瘦者偏热。阴虚火旺，木易刑金，肝木发泄太过，金气敛肃失常。气冲而成咳，痰泛而成嗽，气火夹痰上溢，咳嗽并作，头胀而痛，胁塞作疼。甲木不靖，土德不充，消化不力，有时腕胀而痛，有时暖气泛酸。两寸脉弱，右关不振，左关弦劲，舌绛无垢。入冬滋补，当调五行之偏胜。

紫石英 120 克 滁菊 60 克 淡秋石 45 克 炒大生地 90 克
蛤壳 120 克 制女贞子 90 克 制远志 10 克 丹皮 45 克
煅磁石 240 克 熟地炭 120 克 龙齿 120 克 预知子 90 克
橘红络各 45 克 天冬 90 克 米炒麦冬 90 克 杜仲 120 克
石决明 240 克 川贝 60 克 米炒北沙参 90 克 百合 120 克
米炒上潞参 90 克 杭芍 60 克 炒枣仁 60 克 炒沙苑蒺藜 90 克
当归 90 克 甜杏仁 60 克 于术 60 克 青箱子 90 克 炙白薇 90 克
野料豆衣 90 克 川断 90 克 红绿萼梅各 30 克 白果肉、红枣各 120 克
龟版胶 75 克 阿胶 90 克，共炖烊，收膏入 冰糖 300 克，收膏入

《叶熙春专辑》

施今墨

邢某某，女，49岁。月经于本年初断绝。此后即时觉周身酸楚，倦怠不适，头痛，乳房痛且在硬核，大便燥，食睡尚佳。舌苔正常，脉象弦涩。

辨证立法：更年之期，月经闭止，时见营血不调之症，故周身酸楚疼痛，拟用活血通络法为治。

处方：酒川芎5克 酒当归10克 制乳没各6克 桂枝1.5克
薤白10克 稀莩草10克 柴胡5克 全瓜蒌20克 炮甲珠10克
杭白芍10克 炙甘草3克 山慈菇10克

二诊：服药二剂，除周身酸楚见效外，余症依旧，拟前方加力，并施软坚散结以治乳房硬核。

处方：桂枝1.5克 薤白10克 酒川芎5克 柴胡5克
全瓜蒌20克 酒当归10克 杭白芍6克 生鹿角12克
炮甲珠10克 片姜黄6克 白蒺藜12克 白僵蚕5克 山慈菇10克
制乳没各6克 炙甘草3克 蔓荆子6克

三诊：服药颇效，遂连服八剂，头已不痛，全身感觉舒畅，乳房痛减，硬核尚未见消，大便一日一次已不结燥。用前方加五倍量配制丸剂，早晚各服10克，冀其痊可。

《施今墨临床经验集》

年老经断复行

何书田

年逾六旬，经水迭至，冲任八脉伤矣。防腹痛成臆。

上肉桂 黑归身 焦白芍 生杜仲 煅牡蛎 熟地炭 炒枸杞
五味子炭 紫石英 海螵蛸

《竿山草堂医案》

王旭高

潘。年近六旬，天癸久去而反频来，是谓脱营。脱营者，元气极虚不能固摄，血从外脱也。又名下竭，故腰痛如折。下竭者必上厥，故面赤、火升、发热也。血属阴，阴虚则阳亢，故脉弦硬无情。其脉愈数，其阴愈虚。夏令一交，阳亢无制，恐致水涸龙飞，难为力矣。

阿胶赤石脂拌炒 牡蛎 海参 线鱼胶米粉炒 元精石 沙苑子 贡菜洗炭 猪腰子酒洗 茯神 龟板胶余粮石拌炒
生洋参元米炒

朝服震灵丹二钱，暮服威喜丸二钱。

渊按：吴鞠通法也。妙以咸降有情之物补下焦精血。

《王旭高临证医案》

陈在山

病者：冯姓妇，五十岁，奉天牛庄城内人。

病名：老人复经。

原因：暴怒伤肝，郁久化热，血热妄行之故。

证候：腰膝酸痛，手足麻木，头晕口燥，不思饮食，体倦心烦，经水骤然来行。

诊断：经曰：女子七七任脉虚，太冲脉衰少，而天癸竭，地道不通，故形坏而无子也。今已经断三年，一旦复来甚旺。或以肝盛脾衰，冲任二脉不得土气荣养，而受肝邪扰害，久则二脉空虚，必化无形之热，蔓延三焦而入血室也；或以暴怒伤阴，邪趁阴虚，冲动血络，致使血行经道，应期而至也。此脉左手坚弦有力，右手软大而数，蕴热可知。此刻虽有腰膝之患，然以肝盛脾衰，宜忌用补剂，而通俗之治常进以补剂，故不能为功也，溯本穷源，肝未平，热未清，补则上实而下愈虚，血不归源，故泛溢也。欲止其经，使血归源，宜先平肝化热为主，健脾开郁次之，俾周身之经络通畅，二脉融和，则

无冲动血络之患矣。

疗法：以加味逍遥散煎汤服之。方中有归芍养血平肝，术草和中益土，柴胡升阳散热，茯苓理脾宁心，阿胶补冲任之虚，薄荷舒肝胆之热，再益丹皮、栀子泻火以清血道，少许红花、桃仁去瘀以生新血，减去鲜姜，恶其辛散。

处方：当归五钱 酒芍三钱 柴胡三钱 茯苓四钱 白术三钱
甘草二钱 薄荷钱半 丹皮三钱 黑栀子三钱 阿胶三钱 红花五分
桃仁七个

结果：初服二三剂时，较前血行愈多，又服二三剂时，下紫黑块一、二日，再服数剂，竟得全愈。

《医学杂俎》

沈绍九

年逾五十，因怒气伤肝，郁而生热，迫血妄行，致经绝复来，心烦易怒，口苦，脉弦数，宜疏肝泻热。

薄荷梗一钱五分 川郁金二钱 丹皮二钱 栀子二钱 赤芍三钱
竹茹三钱 甘草一钱 鲜藕二两 柴胡一钱五分

按：方用丹栀逍遥散加减。因血分有热，故去煨生姜、当归；血去阴伤，故不用白术、茯苓；加鲜藕、竹茹以凉血清热。

《沈绍九医话》

章成之

朱女。花甲以外之人，天癸已绝，月内漏红再再，腰酸，少腹沉坠。此病理性出血，更恐子宫实质病变生瘤、生癌。此方增加血液凝固，预防大冲。

生熟地各15克 墨旱莲12克 乌贼骨30克煨先煎 冬青子12克
杜仲9克 生阿胶24克烊化、分二次冲 川续断9克

黑大豆 30 克煎汤代水 震灵丹 9 克分三次吞

《章次公医案》

白带

韩飞霞

一妇，年三十余，十八胎九殇八夭，又惊忧过甚，遂昏不省人事，口唇舌皆疮，或至封喉，下部虚脱，白带如注，如此四十余日，或时少醒，至欲自缢，悲不能堪。医或投凉剂解其上，则下部疾愈甚；或投热剂及以汤药薰蒸其下，则热晕欲绝。韩诊之，曰：此亡阳症也。急以盐煮大附子九钱为君，制以薄荷、防风、佐以姜、桂、芎、归之属，水煎，入井水冷与之，未尽剂，剃鼻熟睡通宵，觉即能识人。众诘其获效之故，韩曰：方书有之，假对假，真对真耳。上乃假热，故以假冷之药从之；下乃真冷，故以真热之药反之，斯上下和而病解矣。继后主以女金丹，错综以二三方，不但去疾且调元气，后生二子。所谓女金丹，即胜金丸也，得之异人。倍加香附，而视气血之偏者又加姜黄、条芩、倍川芎之属，取效甚多。（江云：此案治病有法，用药有权，可谓知通变者也。）

《韩氏医通》

吴茱山

一妇人，久患白带，瘦削无力，倦怠欲睡，腰酸腿痛，饮食无味，面黄，日晒烦热，小便淋漓。以归身、茯苓各一钱，炒芍药、地骨皮、白术、川芎、人参各八分，黄芩、鹿角胶各一钱，其胶若湿者入五茶匙，炙甘草、熟地黄、车前子各五分，枣二枚，入水煎服，数服而愈（八珍配茶、胶、车前、骨皮，精妙）。后治数妇皆验。

《名医类案》

程明佑

一妇，病带下不止。医投调经剂，血愈下；复投寒凉药，遂下泄，肌肉如削，不能言，四肢厥逆。程诊其脉细如丝，曰：阳气微而不能营阴。法当温补，阳生则阴长而血不下漏。遂以人参二两，附子三片，浓煎一服，手足微温；再服，思食；继服八珍四十剂愈。

《名医类案》

薛立斋

一妇人，年愈六十，内热口干，劳则头晕，吐痰带下，或用化痰行气，前症益甚，饮食愈少，肢体或麻，恪服祛风化痰散。肢体常麻，手足或冷或热，日渐消瘦。薛曰：症属脾气虚弱而不能生肺，祛风之剂，复损诸经也，当滋化源。遂用补中益气加茯苓、半夏、炮姜，二十余剂，脾气渐复，饮食渐加，诸症顿愈。

一孀妇腹胀胁痛，内热晡热，月经不调，肢体酸麻，不时吐痰，或用清气化痰，喉间不利，带下青黄，腹胁膨胀；用行气之剂，胸膈不利，肢体时麻，此郁怒伤损肝脾，前药益甚也。朝用归脾汤以解脾郁生脾气，夕用加味逍遥散以生肝血清肝火，兼服百余剂，而诸症愈。

一妇人头晕吐痰，胸满气喘，得食稍缓，苦于白带，二十余年矣，诸药不应。薛曰：此气虚而痰饮也（气虚有饮，用肾气补而逐之），饮愈而带始愈，遂用六味地黄丸，不月而验。

一妇耳鸣胸痞，内热口干，喉中若有一核，吞吐不利，月经不调，兼之带下，薛以为肝脾郁结，用归脾汤加半夏、山栀、升麻、柴胡，间以四七汤下白丸子而愈。

一妇人吞酸胸满，食少便泄，月经不调，服法制清气化痰丸，两膝渐肿，寒热往来，带下黄白，面黄体倦。此脾胃虚，湿热下注。用补中益气，倍用参、术加茯苓、半夏、炮姜而愈。若因怒，发热少食，

或两腿赤肿，或指缝常湿，用六君加柴胡、升麻及补中益气。

一妇人逾六十，带下黄白，因怒胸膈水利，饮食少思，服消导利气之药（正治法），反痰喘胸满，大便下血。薛曰：此脾气亏损，不能摄血归源。用补中益气（从治法）加茯苓、半夏、炮姜，四剂，诸症顿愈，又用八珍加柴胡、炒梔子而安。

仲问曰：妇人年五十所，病下利数十日不止，暮积热，小腹里急，腹满，手掌烦热，唇口干燥，何也？师曰：此病属带下。何以知？曾经半产，瘀血在小腹不去。何以知之？其症唇口干燥，故知之。以温经汤主之，以吴茱萸三两，当归、川芎、芍药、人参、桂枝、阿胶、牡丹皮、生姜、甘草各二两，半夏半升，麦冬一升（不用地黄炒），以水一斗，煎取三升，分温三服。亦主妇人小腹寒久不受胎，兼取崩中去血，月水来过多，及至期不来。

丹溪、东垣、沧洲有带下案，附在便浊条中，可参看。

《名医类案》

朱丹溪

陶遵外姑，年七十，形瘦善咳，白带，食前姜汤吞大补丸五十丸，一二次，午膳后及临卧时，各与小胃丹十五丸愈。

胡安人白带下月经甚多，食少倦怠面黄，经中如有血块者，有如筋膜者，与参术等补血气调脾胃后，诸症皆退，惟带未止，以樗皮丸主之。

《续名医类案》

薛立斋

一妇人带下，四肢无力，薛曰：四肢者土也，此脾胃虚弱，湿痰下注，以补中益气、济生归脾二药，治之而愈。

《续名医类案》

孙文垣

吴涌澜母年六十余，久患白带，历治不效。变为白崩。诊得右寸滑，左寸弱，两关濡，两尺软弱，据脉心肾俱不足，中焦有湿。古云崩中日久，为淋带漏下，多时骨亦枯。今白物下多，气血日败，法当燥脾兼补心肾。以既济丹补其心肾，以断下丸燥中宫之湿，则万全矣。果未终剂而愈。

《续名医类案》

萧万舆

龚氏妾年三十，娩未百日，恣啖生冷，呕吐脐痛，病白带月余，行经冲任冒寒，发热烦渴，赤带频下，脉沉迟无力，此内真寒而外假热症也。用四物、二陈加炮姜、肉桂、木香、少佐升麻丸，服月余而愈。

一寡妇年三旬，时或增寒发热，通宵不寐，时或经昼昏睡，喃喃独语，遇劳肢体厥冷，每用姜葱解表，遂致停热脾胃，乘虚下注而患赤带，脉沉伏，重按搏指。以为相火蕴结，外假寒而内真热也。用四物加黄连、龙胆、炒梔、知母、茯苓、木通，投八剂，诸症悉安。

《续名医类案》

来天培

一妇人四旬外，苦于白带，朝夕常流不止，已十余日矣。外症头晕腰痛，诊其脉涩，此肝肾阴亏，气虚下陷所致。法宜以十剂中涩可去脱之剂治之，否则因循虑成弱症矣。以六味饮去萸肉、泽泻，加牡蛎龙骨、川断、肉桂、杜仲、白芍、鹿角胶，不数剂而瘳。

一闺女年十五岁，夏间患白带月余，更兼腹痛，诊之六脉俱弦细而数，按之中指下极沉。此属脾气下陷，肝藏湿热为患，同升麻、

柴胡、苍术、白术、茯苓、半夏、广皮、甘草、黄柏、黄芩，二剂而霍然。

《续名医类案》

秦昌遇

一妇患淋带，头作眩晕，腰痛如折，羸惫倦怠，六脉虚涩。当作血虚症治，为血少不能荣肝，肝木根虚，安得不动摇耶？宜调其淋带则眩自止，所谓培其本也。四物加续断、茯苓、白术、牛膝、杜仲、甘菊、椿皮。

《秦景明先生医案》

何书田

产后失调，肝肾八脉俱亏；腰痠带下，神倦面黄；脉形沉细。已近怯门。

大熟地 炒当归 杜仲 柏子仁 茯苓 桑螵蛸 山萸肉
料豆衣 麦冬 煅牡蛎 山药

冲任脉伤，腰痠带下。治在肝肾。

炙黄耆 全当归 沙苑子 山药 芡实 煅牡蛎 炒熟地
炒萸肉 枸杞子 茯苓 胡桃肉

腰痛带下，奇经八脉病也。当用滋补。

鹿角霜 熟地 沙苑子 川断肉 山药 桑螵蛸 炙龟板
萸肉 生杜仲 煅牡蛎 茯苓

带下腰疼，临经腹痛。此奇经之病，不易愈也。

炒阿胶 炒归身 生杜仲 山药 牡蛎煅 桑螵蛸 炒艾绒
沙苑子 紫丹参 茯苓 乌贼骨炙

《早山草堂医案》

林佩琴

哇娠。脾宜升则健，胃宜降则和。今脘中食入作饱，腑气不司

下行，医用流气之剂，更致腰痛带下吐瘀，诊脉右关沉微。经所谓浊气在上则生腹胀也。药以辛温通阳泄浊为宜。制半夏、砂仁壳、枳壳、益智仁、韭子、茯苓、陈皮、栝蒌皮、谷芽、杜仲、煨姜。数服诸症俱除。

何氏。五旬外寒从背起，督脉阳虚，带下经旬，肾真失固，多奇经主病。脉象两尺虚涩，右关滑，左寸强，系操劳扰动心阳，中脘停痰，时闷时热，烦嘈干呕，恍惚失寐。先用温胆汤去枳实，加茯神、梔子炒、一服能寐。子后便泻，怯冷有年，阳分素亏，急须温摄，鹿角霜、杞子炭、茯神、杜仲炒、砂仁、潞参、龙眼肉、莲子炒、一啜寒止。三剂诸症全瘳。

徐氏。血崩后继以溺血，溺血后继以白带，淋漓不已。冲任虚滑，治在固摄下元，培养奇脉。阿胶、牡蛎、茯神、杞子、菟丝子、白芍、杜仲、续断、熟地俱炒，蜜丸数服而固。赤带属热兼火，白带属湿兼痰，带久不止，须补脾肾兼升提。此症由崩漏而成淋带。《脉诀》所谓崩中日久为白带，漏下干时骨髓枯也。夫肝肾内损，自必渐及奇经，至带脉不司束固，任脉不司担承，非用摄纳。冲为血海，虚滑易止。李先知所谓下焦有病人难会，须用余粮、赤石脂，亦镇固之旨。

侄女。中年崩漏久愈，近忽身麻心悸，自汗肤冷，带多肢颤。阅所服方，数用阿胶、熟地。遂致食人呕满，大便频滑。不知症属阳虚气陷，胶地滋滑，大与病情凿枘不入。拟方用半夏曲炒、於术生、牡蛎煨、鹿角霜、潞参、茯苓、枣仁、砂仁、小麦。四服诸症悉减，去半夏曲，加杜仲、芡实、莲子、白芍、山药俱炒用，又数服得安。

徐氏。脉沉小数，体羸久嗽，损象已成，惊蛰后重加喘嗽，带下如注。医用补涩太过，致小溲短少，小腹满闷，是病上加病，法在通摄兼用。潞参、茯苓、灯心、湖莲、薏米、杞子、杜仲、沙苑子俱生用、山药炒、橘红、五味，数服诸症平，带止食加。但饥则嗽频，劳则体热，知由中气馁怯。去灯心、薏米、杜仲、沙苑子，加黄芪炙、甘草、饴糖、

贝母、百合，数服而起。

《类证治裁》

抱灵居士

德妇，白带，常胃痛。嫁后初冬，头腰胁痛，恶风，脉浮紧，左甚，以逍遥散不应；以枳壳二陈汤加芎、归、芍、前、苏二剂，头痛减，内热，食生莱菔，头痛恶风，盗汗，颧赤；以黄芪建中汤加防风、丹皮、桔梗三剂，进食，胁痛止。数日夜热恶寒，头胁痛，脉弦，以枳桔二陈汤加芎、归、芍、苏、柴三剂愈。两月头昏心慌，咳嗽吐清水，经期期甚少，脉滑数，以八味道遥散不应；以茯苓补心汤，咳止，太阳痛，头闷，心悸，颧赤，以逍遥散二剂而愈。

许成月，妇，发热头痛，干呕，泻十回黄水，间有白带，素有淋痛、太阳痛之恙，或以正气、败毒、五苓、小柴、补中益气之类不应者十数日矣。呕涎身痛，恶风，五心热，下体时厥，舌边黄、旁紫、中灰黑，渴喜热饮，小腹坠痛，脉长细。以黄连汤，术代参，加吴萸、生姜一剂。惟五心热，舌燥作呕，二便秘。以凉膈散去硝，加灯心、生军一剂，泻二次黄恭，胸宽，呕止，溺利，足冷。以前方加枳、朴一剂，泻五回，足温。以凉膈散去硝、黄，加白芍、黄连、夏、瓜、桔、姜一剂，便秘。以导赤合凉膈散去硝、黄，加法夏、枳实、黄连二剂，热退，饱胀。以香附、枳壳、陈皮、瓜、通、连、芎、归、芍数剂而愈。数日食肉，小腹痛，恶寒发热，以双解散去硝、黄一剂而热退，以小承气汤一剂，利一回，小腹痛，以龙胆泻肝汤三剂而愈。

《李氏医案》

徐守愚

嵯城同道喻晓人令媛。年二十余，字乡间农家，操劳过度，患带证逾年未愈。饮食日减，起居坐卧无力以胜，至今加足胫肿，腰胁酸。少腹左边有一块，痛楚不堪，似症非症，似瘕非瘕。兼且气急咳

嗽，每日午后潮热如焚。粒米不进。询其带下，如鸡子清，淋漓不断，如是者已月余矣。从前诸医皆谓漏底劳损，莫可救药。晓人骨肉情深，不忍遽舍，接归自家，亲自邀诊。其脉两手沉迟，舌苔薄白，小腹块痛喜按。余曰：“此脾肾虚寒已极，寻常升提固摄之药不能胜任，惟崔氏八味加杜仲、五味子始中病情。”晓人素信余医有理，欣然与服。才投一剂而腹痛块减一半，而带下如鸡子清者变为微黄，一日之间不过点滴而已。后晓人自行调治收功，不知其药用何方。

方中桂心以桂枝易之，与附子并用，茯苓、熟地各六钱，余照本方。

《医案梦记》

费伯雄

某。脾肾两亏，湿热下注，以致腰疼带下。宜培脾肾，利湿束带。

杜仲 川断 金毛脊 全当归 新会皮 丹皮 茯苓 制香附 统车前 银杏仁去壳三十粒 苍术

《费伯雄医案》

张乃修

汪右。带下如注，腹满不舒。脾胃湿热，尽行下流。深恐元气难支。

制半夏 金铃子 海蛤粉 赤白苓 炒椿皮 广皮 泽泻 草薢 生薏仁 伏龙肝一两，煎汤代水 愈带丸

二诊：和中分利湿热，带下仍然不减，遍体作痛。虚肝纵横，脾胃亏损，不能收摄。勉拟柔和肝木，双培脾肾。

当归 川断肉盐水炒 菟丝子 芡实 醋炒青皮 白芍 潼沙苑盐水炒 破故纸 莲子 伏龙肝

三诊：带下稍减，而肝气纵横胀满，右乳作痛。再益脾肾而疏肝木。

香附 破故纸 白芍 菟丝子 盐水炒 潼沙苑 盐水炒 川断肉
木香 金铃子 杜仲 伏龙肝八钱，煎汤代水

王右。淋带不止，气撑腹痛，里急而欲解不解。冲任损伤，不能固摄，图治不易也。

白芍一钱五分 乌贼骨四钱 阿胶珠二钱 川断肉三钱
当归灰二钱 生地四钱 茯苓三钱 艾炭五分 丁香三分 砂仁五分

二诊：带下不止，气撑而下坠则痛，大便闭阻。再温润大府，疏泄肝木，略参同涩法。

乌贼骨四钱 金铃子一钱五分 当归炭二钱 香附三钱
光杏仁三钱 炒椿皮一钱五分 鲜苁蓉六钱，洗 瓜蒌仁四钱，打
磨沉香五分 砂仁五分

梁右。带下腰酸，小便不禁，心悸火升。带脉不固，肝肾空虚，阴气上逆也。

奎党参三钱 生山药三钱 潼沙苑 盐水炒，三钱
菟丝子 盐水炒，三钱 阿胶珠二钱 生牡蛎五钱 桑螵蛸二钱炙
杜仲三钱 杞子三钱 芡实三钱

二诊：带下大减，小便亦能约束，心悸火升。的是阳升而奇脉不固。效方进退。

阿胶珠三钱 潼沙苑 盐水炒，三钱 甘杞子 盐水炒，三钱
煅牡蛎五钱 厚杜仲三钱 桑螵蛸三钱炙 莲须八分 菟丝子三钱
于术一钱五分 肥玉竹三钱

三诊：带脉渐能约束，火升亦定，然寐醒舌干口燥。阴液耗损不复。前法参入甘凉。

石斛四钱 牡蛎五钱 天冬二钱 山药三钱 莲须八分
炒阿胶二钱 沙苑三钱 杞子三钱 桑螵蛸炙，一钱五分
菟丝子 盐水炒，三钱 杜仲三钱

《张聿青医案》

王旭高

王。向有淋带，月前血崩，崩止淋滞不断，少腹板痛，脉象细数，身发寒热，脾胃大虚。此血瘀未尽，复兼肝气夹寒也。法当通补。

鲜生地渣姜汁炒焦 当归炭 荆芥炭 杜仲 陈皮
生姜渣鲜地汁炒焦 香附炭醋炒 香谷芽

渊按：鲜地、生姜互炒，名交加散，能通瘀调气，和寒热，而不伤血耗气，女科之妙方也。

《王旭高临证医案》

柳宝诒

欧。种玉必先调经，兹经水如期，营分并无疾疴。前人谓瘀阻子宫，奇脉气滞者，均于受胎有碍，用药即仿其意。

香附一斤须用九制 当归炒 川芎 川断酒炒 茯苓
菟丝子酒炒 枳壳醋炒 春砂仁 川郁金 丹参 法半夏
长牛膝酒炒 杜仲酒炒 桂心 上药共为细末，用益母膏化水泛丸，每服四钱。

顾。肝血虚则生热，而经速腹痛；脾气虚则湿陷，而腰酸带下。脉象濡细，肝脾两虚。法当培养，参人调营固下之品。

全当归 白芍 生地炭 於术 茯苓 炙甘草 丹皮 香附
砂仁 木香 牡蛎 川断 菟丝子 乌药 银杏肉 胡桃肉
二诊：肝有郁热，营血因之不畅。经速腹痛，血不归经。当以清肝和营为主，其带下之病，宜另从肝脾调治。

全当归 白芍 生地炭 丹皮 丹参 香附 黑山栀 金铃子
延胡索 橘核 木香 砂仁 芫蔚子 月季花

林。素质阴虚，兼有带下之疾，故足三阴均形亏损。春间时感咳嗽，历今未愈。阴气不得上承，则肺金虚而不降，故稍感微邪，辄复咳甚。脉象软细，左手尤虚。论治自当以补养为主，但舌苔微黄

而浊，当于养阴中，佐以清降肃肺。

北沙参 麦冬 白芍 蛤壳 菟丝子 茯苓 苡米
桑白皮炙 大生地炒炭 砂仁 紫菀蜜炙 银杏肉 枇杷叶

范。脾土先虚，湿邪留滞，水谷之液，不能化为营血，乘奇脉之虚，下注而为带下。其发于经水之前者，因冲任气动，则奇脉亦因之下陷也。右关脉弦，中气不旺，左脉软弱，右见数大，舌质偏红，乃营血不足。虚火易动之体，滋养肝肾，统摄奇经，此调经固本，一定之法。惟此证宜培脾利湿，兼固带脉，乃与病机有裨。

党参 於术 茯苓 炙甘草 生地 白芍 归身 淮山药
木香 砂仁 川柏 苡仁 牡蛎 沙苑 杞子 川断 菟丝子
银杏炒香，打碎，绞汁，冲入 煎汁熬收，烱入阿胶三两，白蜜十两收膏。空心陈皮汤送下。

另：威喜丸 封髓丹等分 空心开水送下。

王。脾虚湿陷，乘虚下注奇脉。带下不已，阴液枯损，渐生内热，神倦纳少，脉象虚细，有肝脾两损之虑。当清阴健脾，两法兼用。

野於术 炙柏片 砂仁 苡仁 白茯苓 广陈皮 牡蛎 生地炭 菟丝子 金狗脊 白薇 银杏 椿白皮

尹。所见经水不匀，带下腰脊酸痛，头晕筋惕，上热下寒，诸症均属肝肾不足，奇脉不调所致，法当潜摄；惟脉象弱细而涩，舌苔晦浊，纳谷不舒，气机窒于脘膈，此不特肝气逆行，肺气痹阻，并有痰浊阻于胃中，断难遽投滋补。况大症初至，寒多热少，似乎牝症，亦属阳微痰阻之病。刻当善后之际，尤不能遽与柔膩，拟先用调气通痹、温运中宫法，俟气分疏达，再议调补可耳。

括萎皮姜汁炒 薤白头 广郁金 姜半夏 薏仁 於术 桂枝 茯苓 白芍 淡干姜 枳实 姜竹茹 广陈皮

二诊：前与调气通阳十剂后，牝症得止。但时觉烘热，胸闷气迫，脘中膈胀，兼作纳少便艰，甚则作呕，脉象较前稍畅，右关独弦，舌苔黄膩。胃中痰气窒阻，木火郁而不达，逆行于上，则膈阻气

痹，凡此皆气分病也。从前经候愆迟，带白腰酸，营分虚而不畅，亦因气阻所致。气为血帅，自当以调气为先，观古人调经一门，未有脱却气分者，可以识其意矣。拟方再与疏肝安胃，化痰通痹。

姜半夏 干姜 盐水炒 川连 姜汁炒 括萎皮 姜汁炒 枳实 旋复花 薤白头 郁金 黑山栀 姜汁炒 青皮 醋炒 橘红 竹茹 制香附 木蝴蝶 炙研，冲服

石。病后营阴不复，肝阳易于浮动，加以劳倦，脾土亦少健运，带下不已，阴液愈耗。平时见证，阴虚火动者居多。调理之法，以滋养潜熄为主，佐以培脾。

党参 洋参 大生地 归身炭 白芍 於术 龙齿 牡蛎 丹皮炒 黑山栀 姜汁炒 杜仲 酒炒 茯神 净枣仁 川连 煎汁，拌炒 广陈皮 菟丝子 盐水炒 淮山药 土炒 潼沙苑 春砂仁 煎汁 滤清 熬收，烱入阿胶三两、炼蜜八两，酌和冰糖收膏。

加减：如带下不止，另用新制白带丸，盐花汤送下。

温。脾土虚陷，湿热下注于奇经，则带下不止。病经数载，髓液均伤，腰脊酸楚，内热形寒，皆由乎此。刻诊脉象左手带数，右部虚软；少腹痠撑脘腹，气闷作痛；癸水参差不期，又属肝脾不调，营气损窒之象。总之，肝肾奇脉，均因病久而虚；而脾胃气机，又因肝气不和而窒。愈延愈虚，势且渐入营损之途。刻下急当和畅肝脾，冀其痛止纳旺，再议调补下焦。

归身炒黑 东白芍 吴茱萸煎汁，拌炒 炒丹皮 稻豆衣 煨木香 砂仁 盐水炒 连皮苓 菟丝饼 制香附 於术 牡蛎 刺蒺藜 谷麦芽 香橼皮

二诊：带脉属脾，土虚湿陷者，每致带下不止。久则奇经髓液下注，故八脉均亏。况肝气不畅，则营气不调，而脾土愈困。刻诊脉象渐和，而痠气不化。拟方和肝培脾，调固奇经。

於术土炒 归身 蒸熟炒黑 东白芍 吴茱萸煎汁，拌炒 川断 酒炒 山药土炒 菟丝饼 茯苓 杞子 蒸炒 车前子 盐水炒 潼蒺藜 刺

蒺藜 春砂仁 盐水炒 制香附 醋炒 煨木香 丹皮炭 上药为末，用大生地煎浓膏，打糊为丸。

米。眩晕肢酸，内热惊惕少寐，皆肝失血养，木燥化火之病。血藏于肝，而生于脾。脾土先虚，湿热下注于奇脉之中，饮食所化之津液，皆变为带下之浊脂，则血无来源，肝阴焉得不虚？调治之法，固当滋养肝阴，尤宜兼培脾土，以补营血之源。拟膏方以归脾，养荣，两法增损。

党参 归身炒黑 白芍土炒 炙甘草 於术 制首乌 茯苓
淮山药 大生熟地各 枣仁炒 春砂仁 远志炭 煨木香
菟丝子 盐水炒 潼沙苑 盐水炒 刺蒺藜 黄柏 盐水炒炭 牡蛎 盐水煨
墓头回 此味不入煎剂，只可丸膏内用 上药煎汁滤清，熬，烱入阿胶四两，炼蜜收膏。

《柳宝治医案》

刘子维

鲜金氏，年二十余，为鞠育多劳，病带下，心烧多烦，减形。

干姜三钱 胆草三钱 桂元肉八钱 生地五钱 白果仁三钱
甘葛五钱 白术一两 灯心五钱 香附三钱，酒炒
五付。

李俊注：此火在上也。五行以水火为主，水火不调，则百病丛生。心烧多烦者，火在上而不降也；带下者，水在下而不升也；减形者，火在上，则不生土而消烁肌肉也。

火不生土，则土湿，故用干姜、白术暖之于中。木者，火之母，母能令子实，故用胆草凉之于肝。血为阴而属于心，心烧则阳盛而阴虚，故用生地、元肉凉血养血，合之灯心降心火，甘葛起阴气，则水升火降之功成，而病可愈矣。白果仁温敛肺气以治带浊，病在下取之上也，肺有热者忌之。此症火虽在上，犹未克金，故不忘香附，则开郁利气补中有通也。

服前方病愈两月余，带病复发，就近医治无效，今手足心发烧，面黄瘦。

益母草八钱 龟板五钱 酒泡 干姜三钱 桂元肉八钱 熟地八分
台乌五钱 制附片一两 艾叶五钱

五付。

李俊注：此带下也。人身身半以上为阳，身半以下为阴，带脉当脐环绕一周，适在身之半。《金匱要略·妇人杂病篇》言：妇人因虚、积冷、结气，或历久血寒，积结胞门，寒伤经络，凝坚为诸杂病，共三十六，皆称带下，盖病起于带脉之下，故总名曰带下也。其矾石丸证，言妇人经水闭不利，藏坚癖不止，中有干血，下白物，则与时俗所称白带无异。温经汤证，则以暮即发热，手掌烦热，唇口干燥，为有瘀血在少腹。合二者而观之，则此症无遁情矣。带病复发者，血海少腹之地有瘀血以阻，新血得寒湿则腐化为白物，浸淫而下也。手足心发烧者，手足背为阳，手足心为阴，少腹有瘀血，则阴结于阴而血脉不通，历久生热而独治于阴也。面黄瘦者，心之华在面，土在体为肉，心脾之气血虚于内，则色与形自不足于外也。

艾叶治积冷，台乌治结气，益母草、龟板治瘀血、血热；至面黄瘦由于心脾气血虚，故以元肉补之，干姜运之；熟地则阴以化阳，润以和燥也。

上焦主降，下焦主升，脾胃居中斡运，此人身气化之常也。带病者，土湿水寒，温蒸之化不行于下焦也。然土湿水寒，温蒸不行于下焦，虽为带症所同，而其源则不尽同，此症之初由于火不降，而病源在上；续则瘀血在少腹，而病源在下。据《金匱要略》命名之义，必病源在下者，乃谓之带下也。

服第二方后，病虽愈而羸瘦如故，以人参养荣汤加减调理之。

陈皮二钱 远志一钱 生姜三钱 大枣二枚 生地二钱
白芍三钱 当归五钱 党参八钱 白术八钱 茯苓三钱 甘草五钱
黄芪八钱 肉桂五钱 柴胡二钱

八付，服毕身体复原。

李俊注：此补土生金，补气生血之方也。病由心烧之后，继以瘀血，故用生地护心阴，当归、肉桂活血通脉，白芍、柴胡则和肝达木以培土，陈皮、远志、生姜、茯苓则通气化以成参、芪、术、甘、枣补益之功者也。

心恶热，热则阴虚，惟生地能凉血补阴。脾恶湿，湿则阳虚，惟白术能燥湿扶阳。二藏各病其本气，则各随所喜而用之，如第一方是也。若心烧而脾不湿，则宜生地不宜白术，脾湿而心不烧，则宜白术不宜生地。再调养之方，则阳不离阴，阴不离阳，故有补阳而和以生地，或补阴而和以白术者，第三方即微用生地以和白术之一例也。四隅皆得气之偏，故寒热补泻每有并用之，时医者举一反三，凡二藏以上杂合之病，均可类推矣。

《圣余医案詮解》

方耕霞

徐。便血十余年，血止而转为带下，又已经年。畏寒脉小，此肾液亏也。夫肝为藏血之脏，过事疏泄，肾亦失其闭藏，下焦有开无阖矣。取血肉有情之品，以养厥阴；涩敛镇摄之物，以蛰少阴。是为高年王道之治。

鹿角胶一钱 龟板胶七分 牡蛎四钱 补骨脂一钱半 龙骨四钱
冬术一钱半 白芍一钱半 胡桃肉三钱 归身炭七分 升麻四分
砂仁五分 炮姜五分 精羊肉两，羊肉、胡桃二味先煎去油

《倚云轩医话医案集》

邵兰荪

安昌庞妇。冲任内怯，带下癸涩，腰酸腹痛。脉涩细，右细数。肝风浮越，头疼牙痛。姑宜柔肝熄风为主。六月初三日

煨天麻八分 生牡蛎四钱 钗斛三钱 西洋参一钱 粉丹皮三钱

稻豆衣三钱 小胡麻三钱 炒杜仲三钱 甘菊二钱 钩藤三钱
桑寄生三钱

清煎五帖。

又：带下未除，腹中疼痛，脉涩数，头痛悉差。宜柔肝、调经、涩下。六月十四日。

桑寄生三钱 炒杜仲三钱 丹皮三钱 制香附钱半 小胡麻三钱
远志肉八分 炒白芍钱半 覆盆子三钱 元胡钱半 钩藤三钱
钗斛三钱

清煎五帖。

史介生评：素禀阴亏，冲任皆损，是以腰腿连腹，经愆带下。内风浮越，直上巅顶，则头晕牙痛，治以柔肝熄风，滋液补肾，而头疼牙痛悉差。次因腹中尚疼，故用理气活血之品。

安昌徐妇。血虚气冲，腰腹痛，带下，背板，脉沉弦，脘中偶痛。宜养血、和胃、平肝。

归身二钱 生牡蛎四钱 炒杜仲三钱 川楝子二钱 茯神四钱
草薢一钱 小胡麻三钱 玫瑰花五朵

清煎，四帖。

又：带下未除，脉细，舌黄厚，腹痛恶心。仍遵前法加减为妥。

归身二钱 仙半夏钱半 覆盆子三钱 小胡麻三钱 炒白芍钱半
广皮钱半 炒杜仲三钱 佩兰叶钱半

清煎，四帖。

史介生评：肾虚而带脉失于固束，则背板腰痛而带下。肝阳逆行而阻气，则脘腹作痛。总因血虚肝滞所致。故以和胃平肝，补肾养血为主，次以腹痛恶心，又参用理气之品。

《邵兰荪医案》

王仲奇

朱右，白克路，七月廿八日。冲任脉海虚滑，筋骨宗脉失养，头

眩耳鸣，腰脊痛，肢体酸，带下频仍，气力虚乏，脉濡涩。治以温煦补养。

左牡蛎煨先煎，三钱 白龙骨煨先煎，三钱 紫石英煨先煎，三钱
甘甘枸杞炒，二钱 淡苁蓉二钱 菟丝饼三钱 潼沙苑三钱
当归炭二钱 川杜仲三钱 续断炒，二钱 茯神三钱 桑螵蛸炒，二钱

二诊：八月初六日。头眩稍宁，耳鸣未静，腰脊肢体酸痛，左肋络中难过欠适，带下频仍，脉濡弦涩、脉海虚滑，奇恒为病。仍以温煦补养。

左牡蛎煨先煎，三钱 白龙骨煨先煎，三钱 石决明煨先煎，四钱
龟版炙焦黄先煎，五钱 紫石英煨先煎，三钱 甘甘枸杞炒，二钱
菟丝饼三钱 潼沙苑三钱 川杜仲三钱 续断炒，二钱 金钗斛二钱
鹿角霜钱半 桑螵蛸炒，二钱 骨碎补二钱

朱右，义袋角，七月十九日。经来恒迟，带下频多，上月曾见流产，胞脉益伤，经带更加失调，亦势所必然，然流产易成习惯，调摄不可缓也。

丹参二钱 泽兰三钱 茺蔚子炒，二钱 白蒺藜三钱 续断炒，二钱
于术蒸一钱 菟丝饼二钱 白芍炒，二钱 归身蒸三钱
条芩酒炒，一钱 乌鳢骨炙黄，三钱 白鸡冠花一钱二分

二诊：七月廿八日。流产血耗，胞脉益伤，前以补摄，带下稍为清淡，虚则一时难复，气痛旧恙萌发，惟未如往常之剧。守原意，参以疏肝。

泽兰三钱 玄胡索炒，钱半 娑罗子二钱 瓦楞子煨三钱
茺蔚子炒，二钱 白蒺藜二钱 乌鳢骨炙黄三钱 续断炒，二钱
旋复花布包，二钱 獾肝研冲，六分 伽楠香剉研冲，一分 白鸡冠花一钱

三诊：八月初六日。心胃气痛获愈，胸膈懊闷未舒，带下较前已减，惟腰酸头眩；盖流产血耗，胞脉弗固也。补摄中参以疏肝流气。

左牡蛎煨先煎，三钱 续断炒，二钱 潼沙苑三钱 复盆子二钱

金钗斛二钱 茯苓三钱 茺蔚子炒，二钱 白芍炒，二钱 绿萼梅八分
乌鲗骨炙黄三钱 白鸡冠花一钱二分

四诊：八月十五日。冲脉为经脉之海，经水适来，百脉俱不安，腰疼腿酸，头眩胸闷，遍身欠舒适，带下频多，脉濡。治以摄养冲任，用调经带。

左牡蛎煨先煎，三钱 紫石英煨先煎，三钱 龟版炙焦黄先煎，五钱
甘甘枸杞炒，二钱 丹参二钱 续断炒，二钱 茺蔚子炒，二钱
潼沙苑三钱 野茯苓三钱 甘菊花钱半 新降一钱二分
乌鲗骨炙黄三钱 白鸡冠花一钱二分。

五诊：八月十九日，经水已净，带也减，惟阳明络脉空虚。筋骨失所营养，腰疼腿酸，体仍欠适，胃纳不健，脉濡缓而滑。仍以温煦补养可也。

左牡蛎煨先煎，三钱 紫石英煨先煎，三钱 龟版炙焦黄先煎，六钱
甘甘枸杞炒，二钱 潼沙苑三钱 菟丝饼三钱 川杜仲三钱
续断炒，二钱 骨碎补钱半 金钗斛二钱 新绛钱半 乌鲗骨炙黄三钱
白鸡冠花一钱二分

六诊：九月初七日。带下已减，日来又感伤风，天庭眉棱之间胀闷欠爽，胸宇气闷喜太息，脉濡缓。以轻宣治上，兼舒胸膈。

冬桑叶二钱 甘菊花钱半 薄荷四分 橘络八分 夏枯草三钱
白蒺藜三钱 茯苓三钱 绿萼梅八分 金钗斛二钱 续断炒，二钱
白鸡冠花一钱二分

七诊：九月十六日。经水适来，色淡不艳，少腹作痛，腰俞亦酸；带频已减，天庭眉棱胀闷亦爽，但觉时有火升；脉濡缓。清肝养营，参以温经。

丹参二钱 茺蔚子炒，二钱 白蒺藜三钱 全当归三钱
白芍炒，二钱 续断炒，二钱 泽兰三钱 蛇床子一钱 乌鲗骨炙三钱
茜根炒，一钱二分 白鸡冠花一钱

《王仲奇医案》

袁焯

孟姓妇年逾四旬，素患白带，庚戌秋间卧病，服药不效，遂延予治。病者烦燥不安，彻夜不寐，稍进汤饮则呕吐不已，脐左有动气，白带频流，自觉烧热异常，扪其身凉如平人，脉亦弦小不数，舌红赤光，毫无苔垢。问其家人，病者性情素躁，且已孕育十二胎。盖血液亏竭，阳热偏胜，加以所服药饵，皆辛散苦寒之品，以致胃气益虚，胃液益竭而神不守舍也。乃与黄连阿胶汤加沙参、麦冬、熟地、枣仁、茯神、牡蛎、龙齿、珍珠母、朱砂块、磁石、葵仁等药，芩、连只用数分，熟地、阿胶等则用三钱，以鸡子黄一枚生搅冲服。一剂烦燥定，能安睡，二剂后眠食俱安，但精神疲惫，遂以前方去芩、连，加苁蓉、枸杞填补精血，接服数日而痊。

《丛桂草堂医案》

吴鞠通

戊子二月初十日，达女，十七岁。初因内伤生冷，又加伏暑中之湿热，去冬寒热频仍可知，以致经闭淋带腹痛等症；现在食太少，大便溏。议先与和脾，经谓：“二阳之病发心脾，女子不月”，应从此处入手，近世罕知之；再补土者必先行湿，土恶湿故也。

姜半夏五钱 薏仁五钱 川椒炭二钱 云苓块五钱 草薢五钱
白蔻仁一钱 益智仁二钱 广皮二钱 煮三杯，分三次服。

十三日：照前方再服三帖。

十七日：瘕气绕脐痛，少腹亦时痛。

天台乌药散二两，每服一钱，分早中晚夜四次服，淡姜汤和。如痛甚服二钱，服二、三日再商。

二十一日：腹痛已减，胃亦渐开，脉仍弦数，肢倦。与宣肝络之中，兼两和肝胃。

新绛纱三钱 归须二钱 姜半夏五钱 郁金二钱 旋复花包三钱

降香末三钱 云苓块五钱 广皮三钱 益智仁三钱 生薏仁五钱
煮三杯，分三次服。每日空心服天台乌药散五、六分。此方服十二帖，胃渐开，腹痛止，肢倦减，面色稍红。

《吴鞠通医案》

曹南笙

某右。初诊：女科病多，倍于男子，而胎产调经为主要，淋带瘕泄，奇脉虚空，腰背脊骶牵掣似坠，而热气反升于上，从左而起，女人以肝为先天也。医者不晓八脉之理，但指其虚，刚如桂附，柔和地味，皆非奇经治法，先以震灵丹固之，每服一钱五分。

二诊：淋带瘕泄，诸液耗必伤阴，此参附姜桂劫阴不效，而胶地阴柔亦不能效，盖脉隧气散不摄，阴药沉降徒扰其滑耳，必行之收之固之，震灵丹意通则达下，涩则固下，惟不偏寒偏热，期能效灵。

煎方：人参 鹿角霜 沙苑 桑螵蛸 杞子 茯神 炙草

丸方：人参 鹿茸 生菟丝子 淡补骨脂 生紫石英 生余粮石 茯苓 炒黑小茴 炒黑远志 晚服妙香三钱

某右。产后漏淋成带，入暮溺频不爽，惊恐神呆，骨骱疼痛，是肝肾内损，渐及奇经不司束固，是产后虚在下，甘辛润以补肝肾。不与燥药者，肾恶燥，肝忌刚也。

枸杞子 鹿角霜 归身 菟丝子 生杜仲 沙苑子 茯苓 补骨脂

某右。褥损八脉，经水不来，带下频频，产后下焦先虚，继及中宫，乃血液脂膏之涸，桂附热燥更助劫烁，此温药是温养之意，非温热之谓。

人参 河车 鹿茸 鹿角霜 归身 茯苓 紫石英

《吴门曹氏三代医验集》

陈渭卿

滑胎两次，肝脾营虚气滞，病及奇经，临期腹痛，腰酸带注，腿跏酸软异常。胃钝食减，阳明生化之源不振，无以充养八脉，厥阴肝木，益生其条达。脉左关弦软，右细涩，舌绛无苔。拟养营阴调气，兼顾冲任，千金白薇汤主之。

白薇 香附 菟丝 大生地 丹参 白沙 蒺藜 白芍 阿胶 杜仲 白莲子 艾绒 益母草 女贞

《陈氏医案》

贺季衡

何女。每值经之前后，则头目眩痛，遍体抽掣酸楚，腰俞痛，白带多，气逆咽梗，胸背痛，或仄满，右脉弦数，舌红苔白。荣卫两亏，冲带二脉失职，肝胃不和而来。难收速效。

当归二钱 大丹参一钱五分 川断肉四钱 白蒺藜四钱
大生地五钱，红花四分拌炒

大白芍二钱，桂枝三分拌炒 大川芎一钱
鸡血藤胶一钱五分，或酒冲化 旋覆花一钱五分，包 乌贼骨四钱炙
川杜仲四钱 桑寄生二钱 红枣三个

另：八味逍遥丸一两，四物丸三钱，和匀。每服三钱，开水下。

王女。产后带下如注，腰俞酸楚，月事后期且少，内热多汗，脉弦数，舌苔浮黄满腻。血虚积湿下注，冲带不调而来。治当摄化并施。

大生地四钱炙 川杜仲三钱 焦白术二钱 泽泻一钱五分
白归身二钱 煅牡蛎五钱，先煎 云苓三钱 乌贼骨三钱炙
车前子二钱，盐水炒 大丹参一钱五分 女贞子三钱 桑寄生二钱
红枣三个

《贺季衡医案》

张山雷

徐右。营阴久虚，肝气横逆，胃纳知饥而碍於运化，汛期转为带下，此奇经暗伤，不能化赤也。舌滑而光，夜寐不酣，目花耳鸣，无一非阴虚阳扰。先宜滋填潜阳，非可旦夕近效。

潞党参 6克 枣仁泥 6克 生淮山药 9克 制白术 4.5克
沙苑蒺藜 6克 金钗斛 6克 旱莲草 9克 净萸肉 6克
生鸡内金 4.5克 朱茯神 4.5克 生石决明 9克 西藏青果 2.4克，打
带壳春砂仁 1.8克

《张山雷专辑》

方公溥

马女。

头昏眩晕，胃纳呆钝，咳嗽痰阻，经行色滞，带下颇多，法当调经束带，佐以宣肺化痰。

全当归 9克 白芍药 9克 制香附 9克 生甘草 3克
淮山药 9克 南芡实 9克 赤茯苓 9克 光杏仁 9克 象贝母 9克
香谷芽 9克 新会皮 4.5克 生牡蛎 12克，打 车前子 9克

复诊：经行已净，带下减而未痊，头眩，腰酸，胃纳呆钝如前，再与束带调中。

处方同前，除牡蛎、香附、象贝、芡实。加漂冬术 9克、软柴胡 3克、炒荆芥 4.5克、冬瓜仁打碎 9克、黄柏皮 4.5克。

三诊：头昏眩晕、腰部酸楚已见轻减，带下渐平，药既见效，再从前议出入。

处方同前，除光杏仁、生甘草。

曹女 八月三十日诊

胃纳较增，带下仍多，再与健脾养血固涩。

白当归 9克 白芍药 9克 制香附 9克 漂冬术 9克

制川芎 4.5克 淮山药 9克 清炙草 3克 炒荆芥 9克 炒竹茹 9克
新会皮 4.5克 香谷芽 9克 花龙骨 15克打,先煎
左牡蛎 24克打,先煎

九月二日复诊:带下已大见减轻,胃纳亦增,脉象精神均有进步,药既应手,再与调理善后。

处方同前,除制川芎、炒竹茹。

吴女。十二月十一日诊:带下颇多,头晕眼倦,腰部酸楚,四肢乏力,噤逆时见,治当调中束带。

白当归 9克 漂冬术 9克 淮山药 9克 炙甘草 3克
白芍药 9克 潞党参 9克 炒竹茹 9克 云茯苓 9克 新会皮 4.5克
炒香谷芽 9克 宋半夏打 6克 左牡蛎打 24克

十二月十五日复诊:进束带调中,胃气较平,带下渐减,惟头眩、腰酸未平,再从前法出入。

处方同前,除白当归、宋半夏、云茯苓,加厚杜仲 9克、嫩勾尖 9克、九节菖蒲 4.5克、粉萆薢 9克、车前子 9克。

十二月十八日三诊:腰楚、带下均见轻减,右肋下微感不适,小溲欲解不畅,湿浊下注,再进分清化浊,参以补肾固涩。

处方同前,除牡蛎、党参、勾尖、冬术、谷芽,加赤茯苓 9克、白莲须 6克、台乌药 4.5克、桑寄生 9克。

《方公溥医案》

周镇

葛半山之妻,宜兴丁山。丁巳八月诊:前有小产,症患带下洩频而已。所以紧胞胎者,带脉也;带脉解,子宫下,则胎堕。夫带脉起于少腹之侧,季肋之下,环身一周,络腰而过,如束带然。平日带多则液耗,脉虚则腰酸,阴亏阳僭,头晕以之。矧冲任二脉流于气街,皆归于带脉,冲气上逆,似乎干咳,以夜甚者,非六气之外袭也。阴阳维紧之脉牵连而病,则内热生焉。合之脉象濡小,重按无力,而左

部更弱，是肝肾精血既亏，奇经病证显然。且苔少胃薄，生化之源亦衰。拟长服丸方以调摄焉。冬虫夏草、苁蓉、归身、白芍、紫石英醋煅水飞、大生地、首乌、沙苑、杞子、菟丝、牡蛎、杜仲、狗脊、丹皮、五味、白薇、茯苓、山药、山萸肉、芡实、乌贼骨，研末，用阿胶、龟板胶溶化丸。空腹盐汤下。服之应效。

程某，徽籍木业，乙卯冬来诊。口渴不止，烦懊，心中空虚，带下如泔。按其脉弦数，见其舌无苔光剥，以为阴液大耗大征，当有造因。再三询问，方述向有瘰癧，某医录予芋苳丸一方，以生者数斤为丸，服数月后，胸中如刮，口渴夜甚，且带浊异常之多。因思生芋辛辣麻口，亦伤气液，是必肠胃津液一齐剥蚀，以致由孔窍而泄，如膏如泔，其消耗之酷可知。嘱急停服芋苳丸。疏方金石斛、大麦冬、元参、生地、玉竹、知母、竹茹、花粉、白芍、梨肉、芦根。服三剂，口渴渐愈，苔即重生，惟带浊犹未全已。询其瘰癧，毫未消去。本病未驱，旁症蜂起，抑亦授方者之不及料耳。

《周小农医案》

翟竹亭

邑西林庄林玉升妻，患白带三年余，屡治不愈，迎余诊疗。诊得脾肾脉虚而兼缓，肝脉弦劲，此因肾水不养肝木，木旺土衰，脾不传变，五谷之精不能化血，反协同脾胃湿下走膀胱，所以白滑之物时下也。治宜大补脾土，兼养肾水，水足而肝水自平，脾土无克饮食之实秀，自然化为血矣。不治白带而白带不绝者，余不信也。因制一方，名曰化带汤：焦白术 45 克，茯苓 30 克，芡实 24 克，熟地 18 克，银杏 15 克，黄柏 10 克，黄连 6 克，山药 18 克。水煎服。此方服十六帖，诸症如失。

北门内陈姓老媪，年六十余。患白带，所下之物如稀脓，少腹疼如锥刺，饮食日减，每天午后潮热燥渴，日轻夜重，卧床半载余。利湿清热之药，服过无数，均罔效，奄奄待毙。伊子请余往诊，六脉极

虚无力，幸脉神不脱，或者生机在斯。看服过之药，均系逆治，不知从治之理。遂用生白术 45 克，茯苓 15 克，芡实 24 克，薏苡仁 21 克，油桂 10 克，附子 15 克，炮姜 12 克，煎成冷服。一帖有效，二帖腹痛去有四五。原方去附子又服八帖，诸症如失。又调养两月余，元气复旧矣。

《湖岳村叟医案》

陆正斋

崔某某 女 28 岁

胎中呕恶颇甚，产后食欲不振，带下绵白，面黄足肿，便溏，腹微胀痛，苔薄，脉濡。脾虚湿胜，气机不利。首理脾，次调气，此寻常之法也。

白术土炒 6 克 带皮苓 10 克 炒苡仁 10 克 福泽泻 6 克
当归 6 克 抚川芎 3 克 佩兰梗 3 克 香橼皮 3 克 广橘皮 3 克
炒谷芽 10 克 车前子包 10 克

周某某，女，48 岁。停经数月，带下如注，少腹坠胀，时或瘕块攢动，汗多肢冷，麻瞤舌蹇，奇经损伤显然矣。食少，苔腻。奈何生化之源告竭，颇感棘手。

当归身 4 克 吴萸水炒白芍 10 克 广橘皮 8 克 朱茯神 10 克
半夏曲 4 克 左牡蛎 24 克 建泽泻 8 克 菟丝子 10 克 沙苑子 10 克
炒枳壳 5 克 台乌药 6 克 土炒白术 5 克

二诊：药后已能进食薄糜，苔腻渐化，中土生化已见转机，着力通补奇经为要。

鹿角霜 10 克 菟丝子 10 克 当归身 4 克 熟地炭 10 克
淡苁蓉 10 克 朱茯神 10 克 沙苑子盐水炒 10 克 甘杞子 10 克
炙玄武板 18 克 阿胶蛤粉炒 4 克 羌蔚子 8 克 白莲须 3 克
淡菜酒洗 9 克 二陈丸分吞 6 克

张某某，女，带浊，食少，头晕不支，腰酸如折。其责在脾，肝肾

左右之。

土炒白术 4.5 克 广橘皮 5 克 春砂仁 2.5 克 法半夏 4.5 克
赤茯苓 9 克 当归身 6 克 炒白芍 6 克 沙苑子 9 克 川杜仲 9 克
芡实米 9 克 煅龙牡 各 12 克

《陆正斋医疗经验》

章成之

徐女。带下色淡如水，且无臭气，其脉弱，补之可愈。

杜仲 9 克 金毛脊 9 克 山药 9 克 不牛膝 9 克 金樱子 9 克
五味子 4.5 克 芡实 9 克 鹿角霜 15 克 震灵丹 9 克，分三次吞

徐女。据其面色，可用补剂去其带。

绵杜仲 9 克 玉蜀黍须 15 克 杭白芍 9 克 云茯苓 9 克
淮山药 9 克 山萸肉 9 克 金樱子 9 克 芡实 9 克 金毛脊 9 克

二诊：用补药除带，天然恢复体力之衰弱，间接使其带减少而已。

熟地黄 18 克 杜仲 9 克 云茯苓 9 克 冬青子 9 克 山药 9 克
金毛脊 9 克 金樱子 9 克 龙眼肉 9 克

沈女。主症在腹痛，因痛而带下频，手不可近，自觉有寒热。

小茴香 6 克 延胡索 9 克 白芍 12 克 苦参片 9 克 当归 9 克
象贝母 12 克 柴胡 9 克 桃仁 15 克 白薇 9 克

《章次公医案》

张汝伟

朱右，年三十三，镇海。暑热之令，大产以后，赤足短裤，袭凉入络，瘀凝不运，先患乳痈，溃至传囊，延及三月，迨乳痈稍软，忽为下体痿软，两足酸痛，如锥刺，不能行步，又不能立，加之子宫滞下不摄，白淫如水之流，少腹有瘕块作痛，诊脉濡弦而数，苔剥舌绛，已成血痹虚劳之证，宜养血熄风，通络化湿之法。

当归须酒炒 牛膝稍盐水炒 生熟苡仁 海螵蛸炙 夜交藤
晚蚕砂包 甘枸杞 炒白芍各三钱 防风已酒炒 川独活酒炒 炙乳
香 丝瓜络炒，各钱半

二诊：进熄风通络，化湿理气之法二剂后，胃气已醒而能食，疼痛亦大减，血虚不能奉养心神，动则头汗如雨，白带仍多，再与安神养血，熄风化湿治之。

全当归炒 桑螵蛸 淮小麦 甘枸杞 椿根皮 桑寄生 炒
赤芍 海螵蛸 茯苓神各三钱 紫丹参 炙木瓜各钱半
酒炒川芎一钱

三诊：心脾肾三脏均虚，湿热夹瘀，留恋于大络，足跗胫股酸痛，进前二方以后，痛已全蠲，带浊亦少，能立而不能步，筋骨不和，血不足也，再进温肾育阴，舒筋健骨法。

制熟地 灵磁石同打 淮牛膝 菟丝子 络石藤 炒白芍
鸡血藤膏 桑寄生 全当归 复盆子 首乌藤各三钱
煨牡蛎一两，先煎 宣木瓜炙，钱半

本证始末：此证为虹口资生钱庄朱梅祥之夫人徐香美女士，平日向由伟诊治，此次因乳肿，以伟不擅外科，故就外科，因乳痛绵延腐烂至三月，乃转成此证。共诊五次，三方以后，即能步履，精神如常，中药效之伟大，洵乎其不可磨灭也。

方议说明：第一方养血熄风，化湿通络止痛，第二方侧重止带安神，第三方加重补血，兼固奇经，女子以血用事，产后而起，百脉空虚，所以专主补血，不用补气者，即此理也。

《临症一得》

叶熙春

诸葛，女，四十六岁。十月。兰溪。去秋以来，白带清稀，绵绵不已，而色苍白，形寒肢冷，腰背酸坠，大便溏薄，舌淡红，苔薄白，脉见沉细。脾肾虚寒，带脉失约，治以温补固摄。

鹿角胶 5 克 制巴戟 9 克 菟丝饼 9 克 清炙黄芪 9 克
米炒上潞参 9 克 煅牡蛎 18 克 生龙骨 9 克 淡附块 9 克
潼蒺藜 9 克 炙陈皮 5 克 茯苓 12 克 桂心 2.4 克, 研粉饭和丸, 吞

二诊:腰酸背痛减轻,白带亦少,大便已不清薄。前方既有效机,原意毋庸更改。

鹿角胶 5 克 淡苁蓉 6 克 菟丝饼 6 克 制巴戟 9 克
清炙黄芪 9 克 淡熟附块 9 克 米炒上潞参 9 克 煨益智仁 6 克
炒杜仲 9 克 茯苓 12 克 陈皮 5 克 米炒怀山药 9 克

三诊:带净,腰酸已除,四肢亦暖,嘱服内补丸每 H 6 克吞。

《叶熙春专辑》

施今墨

师某某,女,27 岁。两年来,月经量少,色淡,白带甚多,腿疼足肿,食欲不振,气短自汗。舌苔白,脉细弱。

辨证立法:六脉细弱,气血不足,月经量少,职是之故。气虚提摄无力,白带绵绵不绝,易汗气短,因之而生。肾阳不振,水不化气,而致跗肿,血不荣筋,经脉不充而现腿疼。拟调理气血补中通阳法治之。

处方:桂枝 5 克 砂仁 5 克 嫩桑枝 35 克 杭白芍 10 克
细辛 1.5 克 桑寄生 15 克 米党参 10 克 大熟地 10 克 野於术 5 克
当归身 10 克 炙黄芪 12 克 益智仁 5 克 五味子 3 克
宣木瓜 10 克 白薏仁 12 克 炙甘草 3 克 炒远志 10 克

二诊:服药四剂,诸症均有所减轻,但非显效,病已两年,气血双亏,绝非数剂可愈。前方去桑枝、桑寄生。加功劳叶 10 克,金狗脊 15 克,再服十剂。

三诊:前方服十二剂,精神渐旺,白带大减,月经尚未及期,然腿痛足肿均效,气短自汗亦好,仍遵前方加力。

处方:桂枝 5 克 米党参 10 克 砂仁 5 克 杭白芍 10 克

当归身 10 克 大熟地 10 克 炙黄芪 12 克 川附片 5 克 野於术 5 克
益智仁 5 克 汉防己 10 克 功劳叶 12 克 宣木瓜 6 克
炙甘草 3 克

四诊：服药八剂，期间月经已来，量较多，色亦鲜，白带甚少，食欲增强，腿已不痛，足肿亦消，前方可以常服。

《施今墨临床经验集》

青带

叶熙春

王，女，二十七岁。四月。塘栖。带下青色，腥臭稠粘，头胀目眩，口苦胁痛，脉来弦数，舌质红，苔黄腻。证属肝经湿火下注，拟泻厥阴之火，利膀胱之湿。

龙胆草 6 克 黑山栀 9 克 炒白芍 9 克 甘草 3 克
青陈皮各 3 克 茯苓 12 克 绵茵陈 15 克 柴胡 5 克 川草薢 9 克
黄芩 5 克 炙白鸡冠花 12 克

二诊：前方服后，头胀目眩，口苦胁痛均减，带下色转黄白，腥臭亦减，脉见弦滑，苔薄黄。再守原法。

龙胆草 6 克 柴胡 5 克 黑山栀 9 克 茯苓 12 克 生甘草 3 克
淡芩 5 克 车前子 9 克，包 泽泻 9 克 炒白芍 9 克 郁金 6 克
炙白鸡冠花 12 克

三诊：带下不多，胁痛间或有之，脉弦，苔薄黄。再拟疏肝和营，兼清余热。

炒柴胡 5 克 丹皮 5 克 黑山栀 9 克 当归 9 克 制苍术 5 克
茯苓 12 克 炒白芍 6 克 甘草 2.4 克 薄荷纯梗 5 克 郁金 6 克
炙白鸡冠花 12 克

《叶熙春专辑》

黄带

李铎

邓姓妇，年二十，两关弦劲，知肝阳偏亢，木火乘胃也。喜两尺滑利，为宜男之兆，据述常有带下，依脉而论，非下元虚损，乃湿热下流，谓之带浊也。前进加味道遥散以舒肝而散郁火，乃木郁达之之法，果见胸膈舒畅，为有效也。多服保阴煎，诸病自愈耳。

生地 熟地 白芍 山药 黄芩炒 黄柏炒黑 甘草

《医案偶存》

余听鸿

常熟东乡某姓妇，就寓诊云：带下黄腻水，终日淋漓甚多，且臭秽不可近。诊后椅垫皆湿，腥臭不堪。余思五脏五带，黄带属脾经湿热，清气下陷，不能固摄。然病已半年，亦难速效，姑拟补中益气法，原方去当归，加菟丝、龙骨、牡蛎。使其清气上升，脾有约束，以菟丝、龙骨、牡蛎堵截其下焦，亦杜撰不经之见。不料服三剂，病已霍然。余亦不解其妙。

《余听鸿医案》

丁泽周

倪右。痰饮逗留肺络，咳嗽已久，入夜更甚，带下绵绵，下部患痒痒痛。此脾肾本亏，湿热下注也，宜标本同治。

炙白苏子钱半 光杏仁三钱 象贝母三钱 云茯苓三钱
炙远志一钱 炙款冬钱半 生苡仁四钱 乌贼骨三钱 北秫米包三钱
怀山药三钱 冬瓜子皮各三钱 核桃肉去紫衣，二枚

洗方：

地肤子三钱 豨莶草三钱 白藓皮三钱 苦参片钱半

六一散包三钱

煎水洗痒处。

另用八宝月华丹搽疡上。

洪右。湿热宿瘀留恋下焦，膀胱宣化失司，经事行而复止，带下混浊，少腹作痛。宜祛瘀化湿，滋肾通关。

紫丹参二钱 荒蔚子三钱 清水豆卷四钱 赤茯苓三钱
金铃子二钱 延胡索一钱 杜红花八分 绛通草八分 两头尖包，钱半
青橘叶钱半 京赤芍二钱 通天草钱半 滋肾通关丸钱半，包煎

《丁甘仁医案续编》

周镇

朱秉先室，住惠山。口腻胃呆，内热，带下如崩，日必易裤三次，足重无力。脉濡，苔白。脾虚湿蕴，带脉不固，宜丸以缓调。於术三两，茯苓三两，牡蛎三两，山药三两，石莲一两五钱，芡实二两，狗脊二两，川断一两五钱，樗白皮二两，墓头回五两，丹皮一两，白果肉三两，薏仁二两，扁豆花一两五钱，黄柏一两五钱，豆腐饭滞四两，菟丝子二两，砂仁一两，鸡内金二两，制苍术一两，研末，山药粉糊丸。早晚服三钱。竟愈。

《周小农医案》

陆正斋

汤某某，女，50岁

带下色黄，下部痒痛，周身亦搔痒难忍，口苦，胁痛。

带皮苓9克 焦山栀4.5克 黄郁金3克 福泽泻6克
粉丹皮4.5克 金铃子4.5克 生牡蛎15克 苦黄柏4.5克
龙胆草4.5克 生甘草1.5克 车前子包，9克

王某某，女，23岁

经漏甫止，带黄，溲痛，拟方通摄并施。

炒小蓟 6克 黑山栀 6克 丹皮 参各 6克 当归身 6克
生地黄 3克 炒蒲黄 3克 细木通 6克 椿根皮 9克 生牡蛎 15克
车前子 包, 9克 沙苑子 9克

《陆正高医疗经验》

章成之

张女。经后四月，腹痛而有热，洒淅恶寒，其痛得按更甚，带下频。寒热之来源，痛使然也。

桑白皮 12克 生侧柏叶 30克 台乌药 6克 杭白芍 9克
象贝母 9克 苦参片 9克 飞滑石 12克，包 粉草薺 9克
炙乳没各 4.5克 桃仁泥 9克

二诊：药后，带下减而腹痛之势杀，可见带下与痛有联系。

生苍术 9克 川黄柏 9克 马鞭草 9克 苦参片 9克
生侧柏叶 30克，煎汤带水 毕澄茄 9克 炙乳没各 4.5克
小茴香 4.5克

邓女。黄带多属湿热下注，其质虽粘，却无腥臭。

粉草薺 9克 泽泻 9克 云苓 12克 冬葵子 9克 瞿麦 9克
白薇 9克 三妙丸 12克 小生地 12克 剪芡实 9克 扁蓄草 9克
另：海金沙 9克 飞滑石 12克 二味同泡代茶。

邵女。据其所述之情态，腹痛之原因仍是在带下，中脘之痛乃放散性。

杭白芍 12克 枳白皮 9克 草薺 9克 生侧柏叶 18克
泽泻 9克 瞿麦 9克 象贝母 9克 云苓 18克 甘草梢 4.5克

《章次公医案》

叶熙春

沈，女，三十八岁。四月。宁波。带下黄稠，胸腹闷胀，食无馨味，神倦乏力，腰脊酸楚，小溲赤热，脉滑苔黄。脾虚不能运湿，湿蕴

化热，下注成带。治拟清热化湿。

制苍术 6克 猪苓 6克 淡竹叶 8克 制川柏 5克
飞滑石 9克，包 草薢 9克 赤白苓各 9克 炒苡仁 9克 甘草梢 5克
炙白鸡冠花 15克 炙新会皮 6克

二诊：前方服后，带下显减，腰脊酸楚，胸腹胀闷，均不若前甚。
使服二妙丸，每日 9 克，淡盐汤吞送。

《叶熙春专辑》

赤白带

王九峰

带下赤白，常如漏卮，脉虚弦，舌绛中有红巢，大便艰结难解，少腹左角作痛，遍体关节酸痛，咳嗽震动，按摩其痛不止，甚至呼吸往来，俱觉牵引痛处。此皆血液脂膏耗损，不能营养一身经隧，滞涩脉络，卫分二气，无能流贯连络交经之处。前哲谓久漏非堵塞可止，升提可愈。法当协和二气，调护两维，宣补中寓以收涩之意。

大生地 洋参 阿胶 海螵蛸 杜仲 金樱子 白前 橘红

复诊：连进通以济塞，带下十减一、二，少腹关节酸痛俱缓，大便燥结未润，弦数之脉未静，舌心红活如故。症本血液脂膏耗损，复延奇经，任行身前。督行身后，冲脉从中直上，带脉环周一身，如束带然。阴维阳维，阴阳相维；阴跷阳跷，阴阳相交。八脉具亏，百骸皆损，岂铢两之丸，所能窥其藩牖乎？爰以一通一塞，大封大固之品，煎浓汁如膏如饴，以二两开水和服。下咽之后，入胃输脾，融化营卫，濡枯泽槁，则欣欣向荣，充满一身。庶乎二气协和，奇经复振。

生熟地 海桑螵蛸 洋参 鲍鱼肉 阿胶 龟板 鳖甲 砂仁 黄柏 川断 黄鱼鳔 长流水煎膏，入胶融化收膏，每早开水冲服。

《王九峰医案》

何书田

劳力内伤，赤白带下，八脉伤矣。

小生地 全当归 生杜仲 淮山药 秦艽肉 炙龟板 沙苑子 川断肉 白茯苓 桑螵蛸

《早山草堂医案》

费伯雄

某。内热伤阴，肝木侮土，遂成赤白带下。纳少体倦，脉细少神，此乃内伤劳倦之候。宜培养脾胃，以抑肝木。

炒党参二钱 淮山药三钱 冬术一钱 归身二钱 桑寄生三钱 白芍一钱 炙草五分 莲肉十粒 红枣五枚 桑枝三钱

《费伯雄医案》

柳宝诒

史。带下赤白兼行，而腰不甚痛。湿热伤脾，不能化血，遂下注于奇经。当培脾清湿。

白术炭 炙柏片 砂仁 苡仁 赤白苓 广陈皮 牡蛎 归身 淮山药 桑白皮 椿白皮 炙甘草 沙苑 银杏仁

向。向患带下红白，脾脏湿热下渗，奇经不能固摄。近日肝火郁燔，内犯于胃，则饕杂眩暈；下注冲任，则经水淋漓，甚则少腹滞痛，经与带杂下不止。稍投补涩，则木火湿热无外泄之路，愈觉郁闷不舒。况暖哕并作，气分本失疏畅，尤不可专投血药。夫气为血帅，气滞则血亦滞。肝主藏血，肝不和，则血不能藏。然则调治之道，自当以疏肝和气，为治血之本。若补之、涩之，窃恐肝脾滞陷，愈增其病矣。愚见如此，未识有当病机否？

当归炭 白芍 丹参 炒丹皮 川郁金醋炒 春砂仁 黑山栀 制香附 川断肉炒 菟丝子盐水炒 广木香 川黄柏盐水炒

干荷叶炒 鲜藕

二诊：改方，去黄柏、丹皮、菟丝子，加金铃子、延胡索、炒生地。

《柳宝诒医案》

方耕霞

陶。白带属气虚，亦有属湿热者。既见兼象，须兼治之。

黄芪 当归 柴胡 白芍 陈皮 半夏 黄柏 茯苓 泽泻
白术 砂仁 椿根皮

《倚云轩医话医案集》

陈莲舫

金泽，某。脘腹痛甚，经带夹杂而下，老年防其发肿。

左金丸 全当归 抱茯神 沙苑子 柔白薇 生白芍 焦米
仁 制香附 九香虫 花龙骨 川杜仲 炒侧柏 荷蒂 红枣
松江。某。奇经虚损，赤白似带，每溺作痛，大便后亦为血溢，
渐至腰背酸痛，皆由八脉损乏而来，脉息细涩，拟以清阴利窍。

西洋参 沙苑子 凤凰衣 金石斛 抱茯神 小蓟炭 阿胶
珠 淡乌侧 大丹参 黑料豆 白茯苓 甘草梢 灯芯青黛拌

《莲舫秘旨》

丁泽周

池小姐。血虚肝火内炽，脾虚湿热入于带脉，带下绵绵，赤白相杂。宜养血清热，崇土束带。

白归身二钱 赤白芍各二钱 生地炭三钱 云茯苓三钱
生白术二钱 怀山药三钱 乌贼骨三钱 生苡仁四钱 黄柏炭一钱
粉草藓三钱 藕节炭三钱

徐右。血室有热，脾弱生湿，带下夹红，经事超前，大腹作胀，腑行燥结，头眩内热。宜养血清热，化湿束带。

阿胶珠钱半 白归身钱半 生白芍二钱 生地炭三钱
朱茯神三钱 炙远志一钱 炒枣仁三钱 象贝母三钱 左牡蛎四钱
光杏仁三钱 乌贼骨三钱 贯众炭三钱 炒黑荆芥炭一钱
炒竹茹钱半

二诊：带下夹红已止，纳谷减少，内热苔黄，血虚有热，脾虚有湿，仍宜养血清热，化湿束带。

阿胶珠钱半 朱茯神三钱 生地炭三钱 黄柏炭钱半
生白芍钱半 生苡仁三钱 白归身二钱 怀山药三钱 乌贼骨三钱
广橘白一钱 厚杜仲三钱 生熟谷芽各三钱 藕节二枚

黄右：营血亏，肝火旺，挟湿热入扰带脉，带下赤白，头眩腰酸。与养肝化湿束带。

白归身二钱 云茯苓三钱 厚杜仲二钱 鲜藕切片，二两
生苡仁四钱 乌贼骨三钱 生白芍二钱 嫩白薇一钱五分
川断肉二钱 黄柏炭八分 粉丹皮一钱五分 福泽泻一钱五分
生白术三钱 震灵丹包三钱

复诊：赤白带下，已见轻减。经事超前，营阴不足，肝火有余，冲任不调。再拟养血柔肝，而调奇经。

前方去白薇，加炙鳖甲三钱。

《丁甘仁医案》

傅松元

余初习医时，偶赴表姊丈陈桂堂续胶喜筵，见帘内一妇人，面色如金黄。乃询桂堂：“此妇为贵府何人，似有大病，何以不为医治？”桂堂云：“此我二姊也，嫁湖州唐氏，其病绝奇，恐非人力所能施治。”余知其有隐怪也，以言诘之。始曰：“病已三月余，白昼明了如常人，入夜即昏瞢，而带下赤白，近来更甚。日将落即神昏，日兴绝则带频下而不自知，至黎明心渐清楚，身尚不能动，东方白，手足方能举，日出乃起，如无病矣，故卧床常垫大灰褥以渗之。君现习医

学，曾闻有此奇症乎？”余曰：“有”。“莫问病名，先试医法可乎？”答曰：“可”。遂为疏生脉散一方，三味各重二钱，加桂圆十枚，暮饮其汤，晨服其滓，十剂后再商别治。后五日遇桂堂，谓五剂而病已大愈，是否需再服五剂？但方中用五味子至二钱之多，酸味实难下咽，肆中为我分三次用之，然已酸极矣。余曰：“病者，不平也。医者，平其不平而已。今病已平，当然改辙。”遂嘱日服高丽参三钱。十日而病根悉除。盖其病昼明而夜昏，是阳气之衰残。赤沃漏下，是病名也。妇人属阴体，有邪魅之凭，采其阴中之阳精，阳神无主，故昏；阳气无制，故乱；精血之阳不守，故漏。缘梦与鬼交之故；与男子梦遗同。是以大剂酸甘法滋敛之，更以独参扶其阳而育其阴，故能有效。后见方书，五味子只用三分，是初学之误。但此症必遵古方，恐无如是之速效也。

《医案摘奇》

贺季衡

赵女。赤白带如注，少腹攻窜，或作痛，腰俞酸楚，头痛，心悬，内热，少寐，脉沉细而弦，舌苔浮黄。冲带两亏，湿热下注也。

大生地五钱，炙炭 当归二钱 川楝子一钱五分 川萆薢四钱
乌贼骨四钱炙 清阿胶二钱，蒲黄八分，拌炒 大白芍二钱 云苓神各三钱
川杜仲四钱 粉丹皮一钱五分 香附炭一钱五分，童便炒 石莲肉二钱
另：松石猪肚丸二两。乌贼骨丸四两，和匀。每服三钱，开水下。

张女。白带淋漓已久，色黄如脓，或带赤色，腰俞痛，脉滑舌黄。湿浊久结下焦，冲带二脉失司所致。

焦白术二钱 乌贼骨四钱炙 川萆薢四钱 泽泻一钱五分
川杜仲四钱 云苓三钱 川断肉四钱 煅牡蛎八钱，先煎 白归身二钱
桑螵蛸三钱 桑寄生二钱 红枣三钱

林女。不时于呕者十余年，遍体酸楚作痛，赤白带甚多，且有秽味，经来腹痛，口粘痰腻，脉小数而滑，血虚肝旺。湿热侵入血分，冲

带不调而来。

当归二钱 大白芍二钱 大生地五钱，炙炭 乌贼骨四钱炙
焦白术二钱 泽泻一钱五分 阿胶珠二钱 大丹参一钱五分
女贞子四钱 云苓二钱 炙莲房三钱 红枣三个

另：八味逍遥丸二两，四物丸二两，和匀。每服三钱，开水下。

虞女。六旬外年，始患赤白带交杂，继沥黄浊甚多，洩勤数而作痛，气从下坠，少腹胀，尾间酸楚，脉虚数，舌红中黄。肝肾之阴气久亏，湿浊乘虚下注，冲带二脉不调也。久延非宜。

大生地五钱 白归身二钱 川杜仲四钱 煅牡蛎五钱，先煎
大白芍二钱 泽泻一钱五分 川草薢四钱，云苓三钱 乌贼骨四钱炙
焦白术二钱 川楝子一钱五分 莲子七粒

二诊：高年赤白带，化为黄水，淋浊不已，小洩勤数，点滴作痛，少腹胀，气坠，下及尾间，脉虚细小数，舌心浮黄。肝肾久亏，湿热乘虚下注，冲带不调，最难速效之候。

大生地五钱，炙炭 鹿角霜二钱 大白芍二钱 青升麻六分
炙黄芪二钱 大麦冬二钱 白归身二钱 川楝子一钱五分 云苓三钱
泽泻二钱 莲子十粒连心

另：补中益气丸二两，滋肾丸一两，和匀。每服三钱，开水下。

《贺季衡医案》

翟竹亭

邑痒生步苑仙令堂，年七十余，禀纯阳之脉，脏腑多热，可知屡患病热，后因郁怒伤肝，经曰“肝藏血”，肝属木，木喜条达而恶抑郁，郁则肝叶开张，血不能藏，赤带成矣。此证自三月起九月方剧，止血之药服数十剂，殊无效。迎余诊治，诊得六脉洪大且数，肝脉弦急，余用完带汤加减治之。二帖少效，六帖痊愈。

加减完带汤

当归 30 克 生地 30 克 白芍 60 克 川芎 10 克 柴胡 60 克

香附 15 克 栀子 6 克 酒龙胆草 10 克 丹皮 10 克 甘草 6 克
水煎服。

《湖岳村叟医案》

章成之

邵女。以带下为主症，少腹痛，痛在两侧，此卵巢部分，大致是子宫附属器发生炎症。

生侧柏叶 12 克 象贝母 12 克 杭白芍 9 克 椿白皮 9 克
苦参片 6 克 泽泻 9 克 生山栀 9 克 黄柏 3 克 小蓟 12 克
粉草 4.5 克 马鞭草 9 克 凤尾草 9 克

李女。下赤白带，总是炎症。日来其量加多。改予古人清化湿热之法。

黄柏 9 克 苦参 6 克 萆薢 9 克 白芍 9 克 泽泻 9 克
瞿麦 9 克 象贝 9 克 旱莲草 9 克 滑石 12 克 干地黄 12 克

薛女。九年来，经虽以时下，而时有淋漓；其色或淡或紫，与带下混合，少腹痛。凡痛与带下总是炎症。

椿皮 9 克 侧柏叶 9 克 象贝 9 克 苦参片 9 克 杭白芍 9 克
瞿麦 9 克 威喜丸 9 克，分吞 象牙屑 4.5 克，分三次吞

王女。带下频仍，少腹两侧痛，按之痛益甚，放散于两腿。多属子宫附件有炎症，古人则属诸湿热下注。

川黄柏 4.5 克 苦参片 9 克 白芍 9 克 椿白皮 9 克
生侧柏叶 9 克 小茴香 2.4 克，后下 炙乳没各 9 克 马鞭草 9 克
凤尾草 9 克，二帖

二诊：药后腹痛大定，带下频仍，粘而腥。

原方加丹皮 9 克 小蓟 12 克 大贝母 9 克 甘草梢 4.5 克

杨女。半月以来，白带与经相间，连续不断；最近数日，驯至经带不分，有腥味，腰为之酸楚。

生侧柏叶 15 克 椿根白皮 12 克 怀牛膝 9 克 泽泻 9 克

川黄柏 9 克 生苍术 9 克 小茴香 2.4 克 毕澄茄 9 克

二诊：宗樗皮侧柏叶汤加减，二服后带下腥臭霍然若失。

小蓟 12 克 川黄柏 6 克 杭白芍 9 克 粉草薤 9 克
生苡仁 15 克 紫花地丁 9 克 苦参片 9 克 制香附 9 克
小茴香 2.4 克 象贝母 9 克

陈女。现在之虚弱，基于往日之积劳；产后二月，带下赤白，腰痛如折。

杜仲 9 克 怀山药 9 克 小蓟炭 12 克 扁豆衣 9 克 续断 9 克
芡实 9 克 仙鹤草 15 克 怀牛膝 9 克 白芍 12 克 五味子 4.5 克

二诊：头晕眩，带下如注。

生芪 9 克 怀山药 15 克 甘杞子 9 克 杜仲 9 克 煅牡蛎 30 克
党参 9 克 升麻 4.5 克 白芍 9 克 云苓 9 克

吴女。其主要症候，可划分两部分：一、子宫内膜炎症引起经之先期与带有腥味；二、四肢麻，腱反射降低。上者古人属于湿热下注，下者属于血虚。

苦参片 9 克 香白芷 9 克 象贝母 9 克 淮牛膝 12 克
宣木瓜 9 克 北细辛 2.4 克 稀莨草 9 克 杜赤豆 30 克

孙女。经将行之旬日，下赤白带，质粘而腥，腰酸而腹胀痛，其痛偏向少腹之左方。其为炎症无疑也。

马鞭草 12 克 旱莲草 12 克 生侧柏叶 24 克 毕澄茄 9 克
桑白皮 12 克 川黄柏 9 克 小茴香 4.5 克 小蓟 12 克 瞿麦穗 12 克
甘草梢 4.5 克

另：刘氏猪肚丸 240 克，日二服，每服 4.5 克

王女。经先期始则量多如冲，继则淋漓不绝，淡红中夹有白带，自觉有腥臭。既是腥臭，则非生理之出血；既有寒热，便有炎症。小溲频而短，炎症在泌尿系。

樗皮 9 克 瞿麦 9 克 杭芍 9 克 生侧柏叶 18 克 旱莲草 12 克
白薇 9 克 苦参 4.5 克 象贝母 9 克 猪苓 9 克 飞滑石 12 克

白茅根一扎

二诊：凡子宫附属器炎症，内服剂本难发生直接作用。药后带与腥臭皆衰减，吾人当据事实而确定药理。

檫皮 12 克 黄柏 3 克 白薇 9 克 芎参片 4.5 克 白芍 12 克
柏子仁 9 克，打 炙乳没各 2.4 克 毕澄茄 9 克 制香附 9 克
老苏梗 6 克 生侧柏叶 30 克，煎汤代水

三诊：带下腥臭者固湿法虽能暂止，但非根治，故古人以清化湿热为主。

生地榆 9 克 粉草薢 9 克 生苍术 6 克 瞿麦 9 克 扁蓄草 9 克
黄柏 2.4 克 香白芷 6 克 赤苓 9 克 毕澄茄 9 克 檫皮 12 克
生侧柏叶 30 克，煎汤代水

《章次公医案》

张汝伟

何美娟。年三十三，宁波，住北京路庆余里九号。多产伤阴，剧劳伤气，经来点滴，赤白带淋漓，如屋檐水之直流。神消肉削，面青，气促，音低，腰脊酸楚，有欲断之象。脉来细弱而微，夜有盗汗，已有一月余。未经调治，将成癆瘵。初起尚可图治，进以养血止带，以化湿热。

紫丹参 乌贼骨 川续断 当归身 炒赤芍 桑寄生 厚杜仲 威喜丸包各三钱 炒川芎一钱 莲蓬壳一只，炒剪 煅牡蛎先煎一两

本证始末：何美娟，年三十三，已生八胎，加之经济困难，心烦力瘁，以致猝然而起。月事三月未至，来而点滴。诊时，神消肉脱。大力调补，又无能力，孰料此方仅服三剂，未曾复诊，即告痊愈。往后三月，他荐人诊治，已面红神爽，云又受妊矣。

方义说明：此方偏重止带外，丹参、当归赤芍养血。得力在固摄奇经。桑寄生、杜仲、续断之强筋骨，而和肝肾也。

《临症一得》

叶熙春

马，女，三十二岁。四月。杭州。冲任失调，每次经行愆期，湿火下注，带下赤白，腰酸两腿重滞，食少，神倦乏力，脉象弦滑，舌苔薄黄。二妙散加味。

炒苍术 6克 炒黄柏 5克 飞滑石 9克，包 炙栝白皮 9克
赤苓 12克 川草薢 9克 苡仁 12克 炙海螵蛸 12克 炒赤芍 6克
炙地榆 9克 炙侧柏叶 9克 丹皮 6克

二诊：带下赤白已除，腰酸腿重不若前甚。胃气渐振，原法加减。

炒苍术 6克 炒于术 6克 炒丹参 9克 炒芡实 12克
炒苡仁 12克 炒白芍 6克 炙地榆 9克 川草薢 9克 赤苓 9克
新会皮 6克 炒当归 9克

《叶熙春专辑》

施今墨

由某某，女，69岁。天癸已断二十年，近岁带下日甚，时红时白，经年不绝，颇以为苦。腰酸楚，全身乏力，大便结，小便失禁，食少，睡不安。舌苔滑白，六脉濡弱。

辨证立法：年将七旬，脉现濡弱，气血虚损之象；任脉主胞胎，其为病，带下痼聚。更年期后时患带下者，任脉不充之故耳。腰为肾府，肾司二便，肾气虚则腰酸楚而二便失常，拟补肾固气养血法为治。

处方：砂仁 5克 川杜仲 10克 五味子 5克 大熟地 10克
川续断 10克 五倍子 5克 覆盆子 10克 益智仁 5克 山萸肉 12克
炒远志 10克 鹿角胶 6克 米党参 10克 桑螵蛸 10克
生白果 12枚 炙甘草 3克 阿胶珠 10克

二诊：服药十剂，带下大为减少，全身亦感有力，小便失禁好

转，大便则尚干燥，年事已高，气血非一时可恢复。服药既效，可作常用方，并加服参茸卫生丸，每日1丸服之。

《施今墨临床经验集》

五色带

蒋宝素

经以任脉为病，女子带下痕聚。客秋瘦血后，带见五色，瘦痛如淋，夜寐不安，饮食少进，往来寒热。心移热于小肠，损及奇经八脉，湿热、肝火内扰所致也。

大生地 赤茯苓 白通草 粉丹皮 当归身 生甘草梢 福泽泻 篇蓄 瞿麦 龙胆草 川黄柏

服煎，四剂，带下白减赤多，寒热已轻，瘦痛已缓，夜卧渐安，饮食亦进。原方去黄柏，加银柴胡。

原方加减又服四剂，寒热已解，瘦痛亦除，饮食畅进，赤带仍多，原方加椿根白皮。

原方加椿根白皮又服四剂，赤带亦除，诸症悉退。但二气久伤未复，当以阴阳两补，脾肾双培，以善其后。

大熟地 怀山药 山萸肉 粉丹皮 福泽泻 赤茯苓 人参 冬白术 炙甘草 绵黄芪 当归身 酸枣仁 远志肉 广木香 生姜、大枣、龙眼肉煎水叠丸。早晚各服三钱

《问斋医案》

柳宝诒

岑。向患淋带，今春剧发。渐觉少腹胀满，刺痛酸坠，大便不爽，小溲淋数，所不带浊，杂色粘厚如脓。推其病情，先因肝气不调，致营血瘀阻；更因脾运不旺，致湿浊流陷，瘀湿内壅，下注于奇经，蒸蕴而为秽浊，此带下之所由来也。病久正伤，不特肝营就损，即脾土

亦形困惫。面跗浮肿，虚热上烘，脉象细弱无神，舌尖红而碎，肝脾两脏，损象已深；而两便窒滞，奇经中之瘀浊，仍未清畅。虚实两面，均难偏顾，调治颇为棘手。姑拟培补肝脾，舒气养营，仍兼疏通瘀浊之意，冀得气营两畅，方可专意培补，以收全功。

於术 茯苓 全当归 白芍 木香 砂仁 苡仁 丹皮
川怀牛膝 红花煎汁，炒 茜草炭 牡蛎 川断 车前子 另：西珀屑四
分研，水飞 乳香二分去净油 二味为末作丸，吞。

《柳宝诒医案》

妊娠感冒

薛立斋

一妊娠三月，其经月来三五次，但不多，饮食、精神如故。此血盛有余，儿大能饮，自不来矣。果然。

一妊娠六月，每怒气便见血，甚至寒热头痛，胁胀腹痛，作呕少食。薛谓寒热头痛，肝火上冲也；胁胀腹痛，肝气不行也；作呕少食，肝侮脾胃也；小便见血，肝火血热也。用小柴胡加芍药、炒黑山栀（直清肝火）茯苓、白术而愈。

一妇人每怒发，发热胁胀，小便淋涩，每月经行，旬余未已，受胎三月，因怒前症复作。朝用加味道遥散，夕用安胎饮，各二剂而安。五月又怒，复作，下血如经行，四日未止，仍用前药而愈。

一妊娠饮食后恼怒，寒热呕吐，头痛恶寒，胸腹胀痛，大便不实而色青，小便频数而有血（腹痛小便数，恐是肠痛。今见血宜清肝）。薛曰：当清肝健脾为主。不信，乃主安胎止血，益甚。问薛曰：何也？薛曰：大便不实而或青，此是饮食既伤脾土而兼木侮；小便频数而有血，此是肝火血流于胞而兼挺痿也。用六君子加枳壳、紫苏、山栀二剂，脾胃顿醒，又用加味道遥散加紫苏、枳壳二剂，小便顿清，更节饮食，调理而安。

一妊娠每至五月，肢体倦怠，饮食无味，先两足肿，渐至遍身，后及后面。此是脾肺气虚。朝用补中益气，夕用六君子加苏梗而愈。凡治妊娠，毋泥其月数，但见某经症，使用某经药为善。

一妊娠因怒吐血块，四日不止，两胁胀痛，小便淋涩。此怒而血蓄于上部，火炎而随出也，肋肋腹痛，小便淋涩，肝经本病也。用小柴胡合四物，四剂而止；去用六君子、安胎饮，调理而安。

一妊娠气喘痰甚，诸药不效。询之，云：素有带下，始于目下浮，两月余其面亦然。此气虚有痰饮也（水泛为痰之病）。用六味丸料，数剂而愈。

《名医类案》

张路玉

一妇人素禀气虚多痰，怀妊三月，因腊月举丧受寒，遂恶寒不呕逆清血（血字疑冰字之误），腹痛下坠，脉得弦细如丝，按之欲绝，与生料干姜人参半夏丸，二服不应，更与附子理中加苓、半、肉桂，调理而康。大抵怀孕，母气多火，苓连则安，多寒得桂附则安，多痰得苓半则安。务在调其偏胜，适其寒温，未有母气逆而胎得安，亦未有母气安而胎反堕者（较冯说自然）。所以《金匱》有怀妊六七月，胎胀腹痛恶寒，小腹如扇，用附子汤温其脏者。然认症不果，不得妄行，是法一有差误，祸不旋踵，非比苓连之误，犹可引延时日也。

《续名医类案》

程文彬

孕妇七个月，胸膈饱闷气喘，忽吐出一物如小肠寸许，举家惊，疑其胎烂。程至，诊得寸口脉洪滑，知其气盛血少，胎气凑上，中焦蓄有湿热，湿生痰，知所吐之物乃痰结聚，病名子悬。以紫苏饮加苓、连、贝母，十剂获痊。

宿述世俗有家业薄而厌子嗣多，怀孕用打胎药，殊不知瓜熟蒂

落。打胎毒药，损坏正气，然后痿落，如生果未成熟强摘，犹刀割脐肠，大伤气血，多致丧命。戒之戒之。

《名医类案》

缪仲淳

于润父夫人妊九月，患伤寒阳明症，头疼壮热渴甚，舌上黑胎有刺，热甚危。缪投竹叶石膏汤，索白药子（医马病者）不得，即以井底泥涂脐上，干则易之，一日夜尽石膏十五两五钱，病瘳产一女，母子毋恙。

治妊娠伤寒，护胎为要，否则胎堕多死。以白药子为细末，鸡子清调，摊绵纸上如碗大，自脐帖至脐下，胎存生处，干即以湿水润之，临症者慎忽忘此。

《续名医类案》

孙文垣

竹匠妇孕五月，患心痛。究所由，为失足堕楼也。教饮菲菜汁一盞，痛随止。又服他医药二帖，心复痛，吐鲜血盈盆，胸间冲冲上抵，痛不可言，危在顷刻。再诊六脉皆洪大，汗出如雨，喘息不相续，亟令移居楼下，与益元散五钱，用紫苏汤调服，戒之曰：今夜若睡，听其自醒，切勿惊动，汗止即苏也。服后果睡，至晓汗敛，胸膈不痛，喘息亦定。再与固胎饮一帖全安。先是邻医诊之，谓吐血脉宜沉细，今反洪大，又汗出喘息不休，危在今夜。见病起来，询曰：孕妇不得汗下，及利小便，谓之三禁。昨剂悉犯之，而反获效，何也？曰：医贵审症，盖妇之汗非由病，以楼居低小，当暑酷热逼故也。汗血去而胎失养，故上抵喘息不续，移楼下避暑气，益元散为解暑圣药，紫苏又为安胎妙品，气下则血归元而病痊矣。法出《医全元戎》中四血饮是也。乃唯唯而退。

《续名医类案》

程从周

吴兆行乃吴鹭客之伯兄也，侨寓金陵。九月初旬，天气乍寒，令政年近三十，因往令岳凌别驾衙斋饮食后归来，肩舆中被风寒所侵，随作呕吐不止，孕已五月，水米不入口者数日。白门诸医治之，药皆不纳，兆行因思令弟妇之症乃予起死，不得已，星夜自来广陵邀予过京调治。乃至，病甚危笃，吐仍未止。盖兼胎气而然。其时日已薄暮，随用一剂，即就枕酣睡。醒来便能稍啜粥汤，调整数日而痊。兆行买舟复送予回广陵。盖此症明属风寒饮食而起，人第知发散消导，乃未识其体气中虚，不无克伐太过，故一闻药气，即便呕吐。向在广陵居住，予平日已知其脉之虚，故能一药而愈。是以脉宜常诊，或偶有客疾，便得其情，非草草也。

毛二之妻年三十余，身颇苍厚，妊将七月。十月初旬，因病新愈，起早复冒风寒，致咳嗽发热二、三日矣，六脉俱浮数，右大于左，且喉音带哑。予乃用参苏饮一剂。下午告急云：“服药后顿增喘急，睡不倒。”予思前症、前脉皆属风芽，而药何以不效？岂内热胎气上逼致喘急耶？又用黄芩、枳壳、桑皮、二母、苏梗、清金导痰之类，亦不效。次日再诊，右脉仍大，胸膈间按之觉疼，此必食滞而然。细诘之，乃病新愈，食荞麦饼，因而复病。余悟曰：“右脉大者脾经积带也。观其体气庞厚，既无风邪，决非虚喘。”乃重用山楂、枳实、萝卜子、厚朴、陈皮、半夏之类，连进二剂，胸膈顿宽，喘亦随定。所以临症不妨于细问也。

《程茂先医案》

郭右陶

道方享内室怀娠六月，寒热交作，烦闷不安。延余时，痧在始发，脉固未现，初不觉其为痧，用药不应，忽尔昏沉。次日余诊。左手脉伏，面目微黑，乃识其痧。刺腿弯青筋六针，出毒血，少愈。用

桑寄生、红花、香附、益母草、荆芥、细辛、卜子、神曲，冲砂仁末，微冷服而安。后用小柴胡汤退热，又参、苓、归、地，健脾养血乃痊。

《痼胀玉衡》

王孟英

叶承恩室，怀孕患感，昏谵不语，喜呕，便秘，汗出不解，脉涩，口干。乃营阴素亏，邪热内炽。以元参、石膏、知(母)、(黄)芩、(竹)茹、贝(母)、银花、枇(杷)叶、(白)薇、梔(子)、楝(实)、(石)斛，投数剂而愈。

夏氏妇，怀孕患感。医投温散，渐至气冲不寐，时欲痉厥，腕闷呻吟，渴难受饮。所亲张养之延孟英诊之，脉滑数而溢。与小陷胸(汤)加旋(覆)、雍(白)、石膏、知(母)、梔(子)、(竹)茹、杏(仁)、腹皮、苏子、竹沥、海蛇，大剂投之，旬日而愈。

《仁术志》者，海丰张君柳吟所题孟英之医案也。吾师赵菊斋先生，暨庄舍人芝阶为之序，余以未与其事，深以为歉。秋间，偶过孟英，适有陈姓者牵羊来谢，孟英颇疑之。其人曰：三月间，次媳患时感，而气逆不能眠，医皆畏却，特延君诊，甫按脉。云：“甚滑疾，是为娠象”，用药必须顾及。此时次媳方於去秋娩后，月事尚未一行，君为此言，阖家未尝不窃笑也。迨疾渐平，哺儿之乳亦不觉少，虽自问亦断断非妊。至六月间，腹渐胀，方谓有病，不料昨日倏产一孙。举家敬服高明，故来致谢耳！

孟英因谓余曰：昨诊魏子恒之室，亦妊也，诸医作虚损治，脉虽虚微软数，而滑象仍形，病家深不以吾言为然者。缘病人之女儿二人，皆死於虚劳也。然其伯仲之证，吾皆诊焉，今已十余年矣。犹忆(其)伯，字於关氏，未嫁而卒，证非不治，亦为药误。病中阅吾方案，极为折服。且曰：先生来暮，依不起矣。前此延致诸名家，徒曰虚证宜补，而不治其所以虚，(处)方则群聚补药，必以地黄为之冠，虽有参、芪，亦列於后。即使用药不乖，而阳生阴长，气为血帅之旨，尚未

分晓，况其他乎？吾闻而愕然，何以闺中女子，亦解谈医？细询，始知为乾隆间名医吴颖昭先生之孙女也，尤为惋惜。仲适於陈少帘少府，的系损证，若季者，因其家怀“先入”之见，遂致医人迎合误事，岂不可叹？迨仲秋，果闻魏氏分娩，母子皆亡，方叹孟英之卓见为不可及也。爰采秋冬诸案之治法不同证寻常者，而续成一卷云。

钱氏妇，怀孕四月而患寒热如疟，医与发散安胎，乃至舌黑神昏，大渴便泻，臭痰顿（频）吐，腰腹痛坠，人皆不能措手。孟英诊曰：伏暑失於清解，舌虽黑而脉形滑数，痰虽臭而气息调和，是胎尚未坏，犹可治也。重用气血两清之药，五剂而安。糜粥渐进，腰腹皆舒，胎亦跃跃。

徐氏妇，重身而患四肢疼痛，不可屈伸，药之罔效。或疑为瘫痪。任殿华令其舍专科而质於孟英，诊曰：暑热入于隧络耳，吾室人曾患此。予以桑枝、竹叶、扁豆叶、丝瓜络、羚羊角、豆卷、知母、黄芩、白薇、梔子，照方服之，果即得愈。

《王氏医案》

抱灵居士

赵三嫂，娠有六个月，发热头痛，口渴，以九味羌活汤一剂，热退，头尚痛；以凉膈散去硝下之，午后又热；以解毒散加石膏不应；以通圣散去硝，下结粪甚少；以柴物汤调之；以三一承气汤下黑粪甚多；以柴物汤调之；以大柴胡汤下之，热退身凉，但头痛心慌，此热伤阴血也。以四物汤加连、麦、冬、柴胡、云神二剂，少安。伊停药十日，或下血，舌苔黑，脉疾，坠一死胎。已忌油一月矣，心慌头晕，舌苔退，口渴除，脉弱涩，急令杀鸡饮汁，食肉甚甘；以十全大补汤加附子、枣仁十剂而安。月余寒战，四肢麻，吐清痰，以大建中汤而愈。手战未止，以羊肉汤煮黄芪、全归、生姜、陈皮各一两而愈。

《李氏医案》

费伯雄

某。服药两剂，寒热未减，咳嗽头痛未解，寒甚腰疼。怀孕六月，仍防胎孕受伤，慎之。

前柴胡各五分 姜川朴一钱 酒黄芩一钱 南沙参三钱
白术一钱 煨草果五分 青陈皮各一钱 茯苓二钱 桔梗一钱
大白芍桂枝二分煎汁炒一钱 苏梗三钱 薄荷炭一钱 枇杷叶二片
茅根四钱 姜一片

某。怀孕五月，肝气独旺，胸闷腹胀，寒热咳嗽，脉来弦滑而数，防其损胎。宜养营理气，清肺化痰。

石斛 青蒿 当归 白芍 川贝 姜皮 香附 白术 条芩
橘络 牡蛎 赤苓 藕 鲜佛手

《费伯雄医案》

王廷俊

蓉城东隅大慈寺侧，近机匠妇赵氏，怀孕弥月，得晚发疫，过十八日矣。日日服药，病转增剧，乃延余诊。入其门，诸医满座，见予至，去者半，留二人焉。予召机匠至前，详询所苦，拉杂道之，引入内室，见病妇卧地上，盖单被，离尺许，热气蒸人，面红黑，口裂，鼻息粗壮，唤使举手诊脉，不动；知已耳聋，伊夫以手式示之，忽摇头大叫，掀去单被，体赤露不知羞耻。脉得沉洪面实，见两乳伸缩，不禁大惊，语曰：“病于申酉时当死，此时辰初，犹可用药挽救，然非大下不为功。”留者两医曰：“温疫实证当下？孕妇敢下耶？下不大小俱伤耶？”予曰：“妇之罹此危也，皆诸公固执误之耳。明明阳明热证，当热未团结，白虎汤可解；今已恶候齐备，延至申酉阳明旺时，邪热亢极，津液尽倾，不死何待？且不见乳之伸缩乎？男子厥阴绝，舌卷囊缩而死；女子厥阴绝，舌卷乳缩而死。趁此一线未绝，姑尽吾技，以对病者，心乃安也。”急书大承气与之，两医咋舌而退。予亦乘车而

返。坐未定，伊夫奔来，谓诸医先告药店：“王寿芝所开系送终汤，万不可卖，卖必招祸。”予愤极，自撮一剂，复命与同至病所，督令煎服，坐视之。异哉！异哉！药不香也，病妇闻之，大呼：“好香药！好香药！”予知闻药而香，胃气未绝，即大佳兆。煎成，妇又大呼：“快与我吃。”伊夫掬一小碗灌之，顷又索药，予令与一大碗，且告以刻许，当得战汗，战时尔勿畏，汗出热退，病人必欲上床卧，卧或两三日，断不可惊醒，俟自醒大泻，病自解矣。伊云：“先生施恩小坐，替予壮胆。”连连叩头，见之实不忍走，而腹号甚，令煮饭食我。饭未熟，病妇四支乱动，口眼翕张，而大摇颤约两三刻，汗如雨下，热乃渐退；退尽手如冰，口无气而人死矣。斯时也，若母若姨若姊若妹一齐奔出，大器大闹大骂，门外观者，目瞪耳语，老姬嫩妇，如观戏剧，而其夫乃请予走，余亦心摇目眩，耳聋口干，固不肯走。起而诊脉，脉乍时一动，动而复止，目又续动，大声呼曰：“众人且息，听予一言。若辈谓若死，若顷刻复生何以谢我？”其母曰：“谢线约袍褂两套。”语际，病者大呻，若姨若姊若妹狂奔入室，恐尸走也。予起复诊，脉续续出，又告之曰：“病者再呻，必语欲上床卧，乃可扶起。”果应言而长呻，其气缓，其音平，谓：“何掷我地下。”予促其夫扶之上床，乃去。见老姬嫩妇指予偶语，不闻何说，归始早餐。噫嘻！名医岂易为哉！次日，其夫尚以睡为死，复来问故。予曰：“前言，睡当二三日，汝回静候，不死也。”果二日半乃醒。泻一次，又睡一日，醒大泄如注，腹馁思食。与粥，不欲，欲酸菜汤下饭。其夫来询，可与否？告以少与归，而与食复睡，神气大安。问再以何药，予曰：“不必药，少与饮食，自此无恙矣。”一月后以一豚、一雉、一鸭来谢，问袍褂，曰：“先生怜我怜我！”予笑遣之。

大承气汤

大黄四钱 厚朴八钱 枳实五钱 芒硝三钱

用水先煮枳实，去渣入大黄，复去渣，再入芒硝，俟化与服。

陈古愚曰：承气汤有起死回生之功，唯善读仲景书者，方知其

妙。俗医以滋润之芝麻油、当归、郁李仁、肉苁蓉代之，徒下其粪而不能荡涤其邪，则正气不复，不能大泄其火，则真阴不复，往往死于粪出之后。于是咸相戒曰：润肠之物，尚能杀人，而大承气汤更无论矣。甚矣哉！大承气汤之功用，尽为彼庸耳俗目掩也。

张隐庵曰：伤寒六经，只阳明少阴有急下证，盖阳明秉悍热之气，少阴为君火之化，在阳明而燥热太甚，缓则阴绝矣。在少阴而火气猛急，弗战将自焚矣。非肠胃之实满也；若实在肠胃者，虽十日不更衣，无所若也。仲师所云急下六证，若究省不到，不敢急下，致病此者，鲜有能生之。且予常闻之曰：痞满燥实坚五证皆备，然后可下，噫！当下者，全不在此五证。

一阳明实证耳，孰不知用此方？而注意护胎，遂固执不敢与，以致不得汗，不得下，胃气将枯竭而死，不知经云：有故无殒，亦无殒也，衰及其半而止。金针度人，专为此等重证而言，予用此汤，看似放胆，其实成竹在胸，故敢肩此重任。服后手足乱动，口眼翕张者，阴气大至，脏腑通也。顿时战汗，亦阴阳凑拍，水气周遍，自内达表也；热退手如冰、口无气者，邪热退尽，正气续生，一时转轮不及也。幸此妇身体壮实，胎气稍固，可以听其药力旋转，热退正复，临危而安。若在膏粱罗绮中，剥丧太过，即用此药，亦必邪退而正不复，真死矣。医须眼明手快，胆大心细，方能济事。且《伤寒论》明训：传经三次，至十八日必死。此妇不死，有天幸焉！事后思之，不胜战栗！当时气盛，孟浪成功；在今日阅历久，顾忌多，亦不敢矣。后闻此妇满十二月，方生一子，良由病后虚弱，故羁迟耳。

《寿芝医案》

徐养恬

怀娠八月，寒热如疟。近日但热无寒，前曾得汗下泻几回。脉数大，舌燥苔黄，兼之咳呛口渴。当此秋燥之令，理宜和解清邪，以寓保胎之意为稳。

鲜沙参 知母 香青蒿 黄芩 白薇 煨葛根 炙甘草 天花粉 白芍 肥玉竹 冬桑叶 竹叶 枇杷叶

《徐养恬方案》

张锡纯

天津董姓妇，年三十四岁，怀妊，感受温病兼有痰作喘。

病因：受妊已逾八月，心中常常发热。时当季春，喜在院中乘凉，为风袭遂成此证。

证候：喘息有声，呼吸迫促异常，昼夜不能少卧，心中烦躁。舌苔白厚欲黄。左右寸脉皆洪实异常，两尺则按之不实，其数八至。大便干燥，小便赤涩。

诊断：此证前因医者欲治其喘，屡次用麻黄发之。致其元气将脱，又兼外感之热已入阳明。其实热与外感之气相并上冲，是以其脉上盛下虚，喘逆若斯迫促，脉七至即为绝脉，今竟八至恐难挽回。欲辞不治而病家再三恳求，遂勉为拟方。以清其热，止其喘，挽救其气化之将脱。

处 方：净萸肉一两 生怀地黄一两 生龙骨一两，捣碎
生牡蛎一两，捣碎

将四味煎汤，送服生石膏细末三钱，迟五点钟若热犹不退。煎渣再服，仍送服生石膏细末三钱。

复诊：服药头煎次煎后，喘愈强半，遂能卧眠，迨至黎明胎忽滑下，且系死胎。再诊其脉较前更数，一息九至，然不若从前之滑实，而尺脉则按之即无。其喘似又稍剧，其心中烦躁依旧，且觉怔忡，不能支持。此乃肝肾阴分大亏，不能维系阳分而气化欲涣散也。当峻补肝肾之阴兼清外感未尽之余热。

处 方：生怀山药六两 玄参两半 熟鸡子黄六个，捣碎
真西洋参二钱，捣为粗末

先将山药煎十余沸，再入玄参、鸡子黄煎汤一大碗，分多次徐

徐温饮下。每饮一次，送服洋参末少许，饮完再煎渣取汤接续饮之，洋参末亦分多次送服，勿令余剩。

三诊：翌日又为诊视，其脉已减去三至为六至，尺脉按之有根，知其病已回生。问其心中已不怔忡，惟其心中犹觉发热，此非外感之热，乃真阴未复之热也。当纯用大滋真阴之品以复其阴。

处 方： 玄参三两 生怀山药两半 当归四钱

真西洋参二钱，捣为粗末

将前三味共煎汤一大碗，分多次温饮下。每饮一次送服洋参末少许。

四诊：前方服一剂，心中已不觉热，惟腹中作疼，问其恶露所下甚少，当系瘀血作疼。治以化瘀血之品，其疼当自愈。

处 方： 生怀山药一两 当归五钱 怀牛膝五钱

生鸡内金二钱，黄色的捣 桃仁二钱 红花钱半 真西洋参二钱，捣为粗末

将前六味共煎汤一大盅，送服洋参末一半，至煎渣服时再送服余一半。

效果：前方日服一剂，服两日病遂全愈。

或问：他方用石膏皆与诸药同煎，此证何以独将石膏为末送服？答曰：石膏原为石质重坠之品，此证之喘息迫促，呼吸惟在喉间，分毫不能下达，几有将脱之势。石膏为末服之，欲借其重坠之力以引气下达也。且石膏末服，其退热之力一钱可抵半两，此乃屡经自服以试验之。而确能知其如斯，此证一日服石膏末至六钱，大热始退。若用生石膏三两，同诸药煎汤，病家将不敢服，此为救人计，不得不委曲以行其术也。

或问：产后忌用寒凉，第三方用于流产之后，方中玄参重用三两，独不虑其过于苦寒乎？答曰：玄参细嚼之其味甘而微苦，原甘凉滋阴之品，实非苦寒之药。是以《神农本草经》谓其微寒，善治产乳余疾，故产后忌用凉药而玄，参则毫无所忌也。且后世本草谓大便滑泻者忌之，因误认其为苦寒也。而此证服过三两玄参之后，大便

仍然干燥，则玄参之性可知矣。

或问：此证之胎已逾八月，即系流产，其胎应活，何以产下竟为死胎？答曰：胎在腹中原有脐呼吸，实借母之呼吸以为呼吸，是以凡受妊者其吸入之气，可由任脉以达于胎儿脐中。此证因吸入之气分毫不能下达，则胎失所荫，所以不能资生也。为其不能资生，所以下降，此非因服药而下降也。

何姓妇，年三十二岁，受妊五月，于孟秋感受温病。

病因：怀妊畏热，夜眠当窗，未上窗幔，自窗纱透风，感冒成温。

证候：初病时调治失宜，温热传里，阳明府实，延医数人皆言病原当用大凉之药，因怀妊实不敢轻用，继延愚为诊视，见其面红气粗，舌苔白厚，中心已黄，大便干燥，小便短赤。诊其脉左右皆洪滑面实，一息五至强。

诊断：据此证状脉象观之，不但阳明胃府之热甚实，即肝胆之热亦甚盛。想其未病之前必曾怒动肝火，若不急清其热，势将迫血妄行，危险即在目前。治以白虎加入参汤，以白虎汤解其热，加参以保其胎，遂为疏方俾急服之。

处 方：生石膏三两，捣细 野党参四钱 生怀地黄一两
生怀山药一两 生杭芍五钱 甘草三钱

共煎汤三盅，分三次温服下。

方解：按此方虽非白虎加入参汤原方，而实以生地黄代知母，以生山药代粳米，面外加芍药也。盖知母、地黄同能滋阴退热，而知母性滑，地黄则饶有补肾之力，粳米与山药皆有浓汁能和胃，而粳米汁浓而不粘，山药之汁浓而且粘，大有固肾之力。如此通变原方，自于胎妊大有益也。外加芍药者，欲借之以清肝胆之热也。

处诊：将药分三次服完，翌日午前大便通下一次，热已退十之七八，脉象已非洪实，仍然有力，心中仍觉发热，拟再用凉润滋阴之品清之。

处 方：玄参一两 生怀地黄一两 天花粉五钱 生杭芍五钱

鲜茅根四钱 甘草二钱

共煎汤两盅，分两次温服下。

效果：将药煎服两剂，病遂霍然全愈。

说明：凡外感有热之证，皆右部之脉盛于左部之脉，至阳明府实之证，尤必显然于右部见之。因胃府之脉原候于右关也。今此证为阳明府实，其右部之脉洪滑而实宜矣。而左部之脉亦现此象，是知其未病之先肝中先有郁热，继为外感之热所激，则勃然发动而亦现洪滑而实之脉象也。

《医学衷中参西录》

何长治

右。怀妊七月，感寒积食。脘闷吐水，又兼咳呛，脉浮数。暂从疏化，病势未定也。

焦冬术钱半 生归身钱半 炒苏子钱半 炒黄芩钱半 茯苓三钱
炒青皮钱半 砂仁壳六分 炒枳壳钱半 广木香五分 炮黑姜四分
象贝母二钱 生草四分 加姜汁炒竹茹钱半

《何鸿舫医案》

陈务斋

梁陈氏，年二十六岁。

病名：妊娠燥疫症。

原因：素因性躁而暴，劳苦过度，受娠数月，适染燥热时疫而发病。

症候：初起头目骨节皆疼，全体大热，昼夜不体，皮干无汗，咳嗽气逆，咽干口渴声哑，谵语狂躁，神识昏迷，唇焦齿黑，舌黑而卷，叠起芒刺，不能言语，甚至皮枯甲错，状如蛇将脱壳，以手击之，全体皮肤，响声咯咯。

诊断：皮壳硬浮，不能诊脉，只得舍脉从症，查问病原，断为妊

娠兼燥疫症。检阅前方，尚用耗散药以劫阴，血液垂涸，势难挽救，实因病家再三乞援，不得不勉图救济之法。

疗法：先用犀角地黄汤，凉血清营为君，合人参白虎汤，生津润燥为臣，子芩、莲心、银花、凉血安胎，清热解毒为佐，使以竹沥，清肺燥以活络痰也。连进二服后，始能其声噫噫，舌苔略润。再进三服，能言能咳，声尚未清，舌始能伸，黑苔已退。五服后，人事已醒，言语亦清，思食薄粥。六七日间，全体皮壳脱落，大者尺许一片，小者数寸，形如蛇退，毫毛尽脱，全体焕然一新，粉白微红，然后始能切脉。诊左右细数而涩，咳嗽痰胶，咽干口燥，睡眠不安。次用人参白虎汤，加归、地、芍、薇、元参、柏子仁，以滋阴宁神，凉血养胎，清热降火，生津润燥。十余服后，精神略好，食渐进，咳嗽已除，咽喉不干，睡眠已安。惟元气未复，肌肉未长，诊脉微弱，终用参芪归术汤，以补气生津，养血安胎，补脾健胃，降火宁神以善后。

处方：犀角地黄汤合人参白虎汤加减方

黑犀角二钱，唐汁 鲜生地一两 青连翘四钱 生白芍四钱
生甘草一钱 生石膏八钱研细 白知母四钱 西洋参三钱
青子芩三钱 生梗米三钱 银花蕊三钱 生莲心三钱 煎后，加竹沥一钟和服。

次方：人参白虎汤加味方

生石膏五钱，研细 鲜生地六钱 肥知母四钱 东白薇三钱
生白芍五钱 乌元参四钱 西洋参钱半 大归身钱半 柏子仁三钱
生甘草七分

三方：参芪归术汤

西洋参二钱 北黄芪钱半 天生术钱半 大归身二钱
大生地四钱 生白芍三钱 淮山药五钱，生打 酸枣仁钱半
破麦冬三钱 肥知母三钱 云茯神三钱 川黄柏一钱

效果：五日能语言，人事醒，食量略进，皮肤壳脱。调养至三十日，食量大进，肌肉已长，元气亦复，人皆称奇，谓古今罕闻之症。愈

后两月分娩，母子双全。

廉按：燥疫一症，前哲吴氏鞠通虽有发明，方载吴氏医案，然系寒燥阴毒。今此案娠妇兼患燥热时疫，殊属棘手重症，立法注重气血两燔，烁涸津液，故用人参白虎，清滋气分之燥热，犀角地黄，清解血分之燥毒，双方兼顾，用得恰好，洵救燥疫之良剂。厥后两方，一则清滋气液，一则双补气血，亦为善后所必需，真精心结撰之佳案也。

陈韦，年二十二岁，广西容县。

病名：妊娠兼风燥时疫症。

原因：素因受孕后，气血不充，神烦少睡。诱因秋后风燥时疫流行，菌毒飞扬，由口鼻吸受，直接传染。

症候：初起头痛目眩，恶寒发热，咳嗽痰粘，肢倦神烦，口渴胃钝。继则气喘声哑，咯痰甚艰，咳则咯咯有声，胸膈胀满，食则呕难下咽，肌肉脱落，形体枯瘦，不能起立，起则昏仆，神识乍醒乍昏，谵言妄语，唇缩齿枯，咽干口燥。

诊断：六脉弦数微浮，数则七至有奇，舌苔枯黑而涩，边尖深赤起刺。脉症合参，此妊娠兼风燥时疫症也。余晓之曰：病势危险极矣，辗转思维，只有竭力以救母，不能兼顾其胎儿。若犹欲保胎，恐母命一亡，而胎儿之命亦随之俱亡，请君择于斯二者。病家遂谓照此病势，当然急救母命为首要，请竭力设法，放胆用药可也。予对之曰：脉虽浮数已极，幸未散乱，或能挽救，以图侥幸。

疗法：先用凉膈散合犀角地黄汤去丹皮，加花粉、银花、人中白，取硝、黄、栀、芩荡涤肠胃，降火救阴为君，地、芍、花粉凉血安胎，生津润燥为臣，犀角、连翘、竹叶、薄荷清心肝伏火，凉散风燥为佐，银胡、银花、人中白和解表里，散郁败毒为使。连进二服不应，直至五服后，始得泻数次黑燥结粪，而燥热略平，舌苔略润，谵语已除，人事亦醒。仍见燥渴不眠，食量不思，咳嗽如前，又用人参白虎，合百合固金汤加减，取其润肺生津，平胃降逆，活血安胎，养阴滋

水。连进十余服，则咳嗽已除，声清不哑，燥渴已止，食量已进，睡眠已安，身体已和，舌黑苔已退，转现微白微湿。惟元气衰弱，声低气微，软而无力，诊脉微弱。又用四物汤，合生脉散，加茯神、枣仁、于术、山药，取其补气生津，养阴活血，安胎宁神，运脾健胃。连进十余服，则元气略强，食量大进，起居步履，稍能支持。惟肢体皮肤，微现浮肿，诊脉缓滑，又用四君子汤，合五皮饮，取其补气运脾，去湿消肿也。

处方：凉膈散合犀角地黄汤加减方

元明粉三钱，分冲 生大黄四钱 焦山栀三钱 青连翘三钱
青子芩三钱 薄荷叶钱半 鲜竹叶二钱 生白芍三钱 鲜生地一两
粉甘草一钱 犀角尖三钱，磨冲 银柴胡二钱 天花粉四钱
金银花三钱 人中白钱半

次方：人参白虎合百合固金汤

西洋参三钱 生石膏四钱，研细 肥知母三钱 陈粳米五钱
粉甘草一钱 野百合二钱 鲜生地四钱 川贝母钱半 生白芍二钱
津桔梗二钱 原麦冬三钱 当归身钱半 大元参二钱
熟地露一斤，代水煎药

三方：四物汤合生脉散加减方

大熟地四钱 生白芍二钱 白归身三钱 川芎一钱 西洋参四钱
五味子钱半 破麦冬三钱 云茯神二钱 酸枣仁二钱 贡于术三钱
淮山药五钱，生打

又方：四君子汤合五皮饮

西洋参四钱 贡白术六钱 云茯苓四钱 粉甘草一钱
生桑皮五钱 五加皮四钱 大腹皮三钱 老陈皮二钱 生姜皮二钱
煎服。

效果：五日，人事已醒。二十日，咳止燥平，食量已进。三十日，百病俱除，食量大进，元气已复，后一月，胎儿产下，母子俱全。

廉按：风燥酿疫，秋冬为甚。就余所见，去年深秋至冬，有发白

喉时疫者，有发喉痧时疫者，有发疫痘疫瘡者，直至今春，疫势渐衰，其症虽变状万端，而原因总归于风燥热毒，气血两燔。医者不究病因，见喉治喉，见痘治痘，见瘡治瘡，辄用通套成方，以致枉死载途，良可悲也。此案注重伏火就燥，气血两燔，开首即用凉膈合犀角地黄加减，表里双解，三焦分消，投剂果决，自然效如桴鼓。然非有学识、有胆量、经验宏富者，不敢负此重任。

《全国名医验案类编》

何拯华

宋宝康之妻吴氏，年三十四岁。

病名：孕妇燥咳。

原因：妊已七月，适逢秋燥司令，首先犯肺而发。

症候：初起背寒干咳，咳甚无痰，喉痒胁疼，甚至气逆音嘶，胎动不安，大便燥结。

诊断：脉右浮滑搏指，左弦滑数，舌边尖红，苔薄白而干。此内经所谓“秋伤于燥，上逆而咳。”似子暗而实非子暗，子暗当在九月，今孕七月，乃由燥气犯肺，肺气郁而失音，所以经谓“诸气贲郁，皆属于肺”也。

疗法：当从叶氏上燥治气，辛凉宣上。故用桑、菊、荷、蒹疏肺清燥为君，萎、贝润肺活痰为臣，佐以鸡子白、雅梨皮开其音，使以嫩苏梗安其胎，庶几肺气舒畅，而痰松音扬，胎气自安矣。

处方：冬桑叶二钱 薄荷叶八分 栝萎皮二钱 鸡子白一格，后入白池菊二钱 牛蒡子钱半 川贝母二钱 雅梨皮一两

次诊：连进三剂，音清咳减，咯痰亦松。惟大便五日不通，脘腹胀满，口干喜饮，不能纳谷，脉仍搏数，舌边尖尚红，扪之仍干。法当内外兼治，外用蜜煎导以引之，内用五仁汤加减以通润之。

次方：松子仁四钱，拌 炒麻仁三钱，拌 甜杏仁三钱，去皮
柏子仁三钱，拌 瓜子仁二钱 金橘铺二枚，切片 萝卜汁一瓢，煎汤代水

先用净白蜜一瓢，煎汤代水。

三诊：一剂而频转矢气，再剂而大便通畅，腹胀顿宽，咯痰虽松，而咳仍不止，左胁微痛。幸口燥已除，胃能消谷，脉数渐减，舌红渐淡，可进滋燥养营汤，冲润肺雪梨膏，保胎元以除咳。

三方：白归身钱半 生白芍三钱 蜜炙百部钱半 蜜枣一枚剪
细生地三钱 生甘草五分 蜜炙紫苑三钱 金橘铺一枚，切片
叶氏润肺雪膏一两，分冲

效果：连服四剂，音扬咳止，胃健胎安而愈。

廉按：六气之中，惟燥气难明，盖燥有凉燥温燥上燥下燥之分。凉燥者，燥之胜气也，治以温润，杏苏散主之。温燥者，燥之复气也，治以清润，清燥救肺汤主之。上燥治气，吴茱萸杏汤主之。下燥治血，滋燥养营汤主之。此案孕妇病燥，较男子燥症为难治，初中末三方，皆对症发药，层次井然，且无一犯胎之品，非率尔处方者可比。

《全国名医验案类编》

罗端毅

徐姓妇，年三十岁。

病名：妊娠疫疹。

原因：妊娠六月，患疫疹，邀毅诊视。

症候：头目浮肿而赤，遍身疼痛，胸腹郁闷，头脑剧痛，疹形略见头面，狂躁不安。

诊断：脉数，舌红。家人惶恐，祈神许愿。毅曰：神鬼之事，何足信哉。盖热毒盘踞于中，则烦躁不安，热气上蒸，则头脑剧痛。疫疹欲出不能出，正在战出之候，则遍身疼痛。妊娠患是症者，最为危险。何则？母病热疫，则胎亦热，胎热则动，疫火煎熬，恐有堕胎之患。少顷，疫疹通身遍出，邻人在旁云：麻疹全身既已出齐，虽有烦躁，亦无妨害。余曰：汝等不知本年患是症者，皆非真正之麻疹，古人所谓瘟疫流行者，即此等之症候是也。虽全身出齐，而亦有异同

之点，疹形松浮者轻，紧束者重，红活者轻，紫黑者重。况伊之症，疹形紧束而兼紫黑，形虽见于外，而毒根深藏于内，故胸腹郁闷不安，前人谓胃热将烂之候，指斯时也。若不急治，危在顷刻。

疗法：用余师愚清瘟败毒饮加紫草茸，大剂凉血以消毒。

处方：生石膏六两（研细） 小生地一两 乌犀角二钱 小川连四钱
焦栀子四钱 肥知母六钱 淡黄芩三钱 苦桔梗钱半 赤芍三钱
生甘草一钱 元参心四钱 青连翘四钱，牡丹皮二钱 紫草茸二钱
鲜竹叶四十片

次诊：服后片时，即小产一女。产后瘀血不行，腹大如未产之状，患者似觉尚有一胎在内，少顷又产一男，但腹痛如前。家人随向邻家，寻觅姜来煎汤与服（吾台风俗产后必食姜炒米饭等）。余闻其言，竭力阻止，若服此等热物，人必狂躁，不可疗救，不但目前不可服，即至数日，亦切勿一滴沾唇。再拟一清热去瘀之方。

次方：全当归三钱 芍药八分 鲜生地六钱 粉丹皮钱半
光桃仁钱半 泽兰三钱 淡黄芩钱半 益母草五钱 制香附二钱
紫草茸一钱 生赤芍二钱 生甘草八分

效果：囑服数剂，余即返舍。随后伊母家请一专科麻疹之老医来诊。病家即将余之言告曰：不可服姜等云云。老医曰：产后无姜，不能去瘀，不妨服下。幸病家素信鄙人，且观其症果系热病，老医之言，似欠妥当，姜等未敢与饮。老医书方与服（未知拟何等方），服后烦躁。仍用毅所拟清热去瘀之原方，服数剂而愈。

说明：本年瘟疫流行，正月起，至今尚未断绝，如疫痘、疫疮、疫疹、疫咳等病症，东南未平，西北又起，死于非命者，不知凡几，殊深惨痛，如吾黄之新桥管、廓屿岙、上云墩数村为尤甚。患疫痘死者十之八九，疫疹死者十之三，医者作正痘麻疗治，用温补顶托、错药而死者，亦十之二三。惟疫咳侵于小儿，村村俱有，极其繁多，父母不知，以小儿咳嗽为平常之症，不服药可愈，至咳久医不及而死者，亦十之二。鄙人诊治，见有疫气传染，不论痘疮麻疹之属，如遍身疹

痛，有汗烦躁，其脉浮沉皆数，则用清瘟败毒饮加减；无汗烦躁，遍身疼痛，胸腹胀闷，脉数便结，憎寒壮热，则用防风通圣散加减；若轻症，但寒热咳嗽发疹，用银翘散加减，或用荆芥穗、防风、连翘、牛蒡、桔梗、杏仁、前胡、葛根、甘草之属，如用加味，或生地、丹皮、紫草，或花粉、银花之类相出入，治愈者约十之八九。观此，医者必须随机达变，切不可拘泥于专科之书明矣。

廉按：台州所谓疫疹，杭宁绍谓之疫瘡，江苏则称疫痧。王孟英曰：麻也，痧也，疹也，瘡也，各地方言不同也，其实一也。其辨症首要，端在形色。先论疹形，松浮洒于皮面，或红或赤，或紫或黑，此毒之外现者，虽有恶症，不足虑也；若紧束有根，如从皮里钻出，其色青紫，宛如浮萍之背，多见于胸背，此胃热将烂之征，即宜大清胃热，兼凉其血，以清瘟败毒饮加紫草、红花、桃仁、归尾，务使松活色淡，方可挽回，稍存疑虑，即不能救。次论疹色，血之体本红，血得其畅，则红而活，荣而润，敷布洋溢，是疹之佳境也。淡红有美有疵，色淡而润，此色之上者也。若淡而不荣，或娇而艳，干而滞，血之最热者。深红者，较淡红而稍重，亦血热之象，凉其血，即转淡红。色艳如胭脂，此血热之极，较深红而更恶，必大用凉血，始转深红，再凉其血，而淡红矣。紫赤类鸡冠花而更艳，较艳红而火更盛，不急凉之，必至变黑，须服清瘟败毒饮加紫草、桃仁。细碎宛如粟米，红者谓之红砂，白者谓之白砂，疹后多有此症，乃余毒尽透，最美之境，愈合蜕皮。若初病未认是疫，后十日半月面出者，烦燥作渴，大热不退，毒发于颌者，死不可救。至若妊娠疫症，母之于胎，一气相连，盖胎赖母血以养，母病热疫，毒火蕴于血中，是母之血即毒血矣，苟不亟清其血中之毒，则胎能独无恙乎。须知胎热则动，胎凉则安，母病热疫，胎自热矣。竭力清解以凉血，使母病去面胎可无虞，若不知此，而舍病以保胎，必至母子两不保也。至于产后以及病中适逢经至，当以类推。若云产后经期，禁用凉剂，则误人性命，即在此言。此皆余氏师愚实地经验独出心裁之名论也。此案诊断颇有发明，方法

悉宗余氏，胎虽不保，而产妇生命幸赖此以保全，即产后清热去瘀，亦属适当之疗法，似此危症，幸收全功，盖不执产后宜温之谬说，对症发药之效能耳。案后说明，确有见地。

《全国名医验案类编》

严绍岐

施双喜之妻，年三十四岁。

病名：伏暑兼孕。

源因：孕九个月，霜降后伏暑晚发，前医或作伤寒症治，或作冬温症治。皆不应，而病反转剧，改延予诊。

症候：黄昏寒热，似疟非疟，入口即吐，无物不呕。

诊断：脉右浮大搏数，舌苔微黄薄腻，脉症合参，经胃热移肺，肺胃不和也。

疗法：用川连清胃为君，苏叶宣肺为臣，皆用轻量泡服，轻清以救其肺胃，佐一味狗宝，镇降气逆以止呕，使以甜酱油数滴，取其咸能润下也。

处方：小川连四分 苏叶三分 开水泡取清汁，冲入甜酱油一小匙，送服真狗宝二分。

次诊：一剂轻减，再剂呕止，脉转虚数，舌红无苔。予即告辞，以极于上者、必反于下，恐胎一堕，即为棘手。病家恳切求治，辞不获已，姑用安胎清暑法以消息之。

次方：青子芩一钱 生白芍三钱 清炙草四分 淡竹茹三钱
丝瓜络三钱 西瓜翠衣一两 银花露一两，分冲 荷花露一两，分冲

三诊：连服四剂，不足月而即产，产后幸而母子均安，惟脉细涩，按之反数，心摇摇如悬镜，恶露点滴全无。予思病将一月，血为伏热消耗，今欲强通其瘀，是向乞丐而逼其焦锅耙也。《内经》谓血主濡之理，当增液濡血为治。

三方：细生地五钱 乌玄参四钱 朱麦冬三钱 苏丹参五钱

芫蔚子三钱 益母膏一小瓢，分冲

效果：二剂恶露虽行，寒热复作。予谓是极子下，必反于上，乃伏暑从上焦外溃也。遂将原方去丹参、芫蔚、益母膏三味，加青蒿脑钱半、东白薇三钱、鲜茅根一两、益元散三钱（荷叶包刺十余细孔）、生藕肉二两（去节），叠进三剂而痊。

廉按：胎前伏暑，凡专门产科，无不注重于保胎。然当辨保胎之法，或由元气之弱者宜补正，或由病气之侵者宜治病，善治其病，正所以保其胎。苟不知其所以然，而徒以俗尚保胎之药投之，若置伏暑而不顾，反致伏热愈盛，消烁胎元，其胎必堕，是保胎适足以堕胎矣。此案诊断，注意上下二焦，别有会心。用药处方，既能清解伏暑，又能安胎保孕，产后又不用强通瘀血之套方，皆有见地，足为胎前产后，挟有伏邪者树一标准。

《全国名医验案类编》

俞道生

包女。妊娠八月，身热不清，旬日以来，陡然神识昏蒙，谵语发痉，脉象乍滑乍细，舌苔色黄，暑湿不得外泄，已直犯心包，上攻脑质，有邪闭厥脱之势矣，症颇棘手，勉拟一方，以冀侥幸于万一。

香茹花 2.4 克 姜汁炒川连 1.2 克 白杏仁 9 克 大豆卷 9 克
广藿香 9 克 鲜佛手 4.5 克 生石决 12 克 辰茯神 9 克
鲜菖蒲 4.5 克 真川贝 4.5 克 梗通草 4.5 克 鸡苏散 12 克，绢包

转方，服药后，热势清以外宣，神志清爽，口渴仍有，除石决明、菖蒲、加净银花 6 克、白蔻仁 1.5 克（后入）。

《俞道生医案》

邹趾痕

秦氏妇，年三十四岁，怀妊七月，患伤寒病。头痛项强，身疼腰痛，骨节疼痛，恶风寒战，无汗而喘，鼻鸣作呕。俗医不知伤寒病之

圣方治疗法，谓仲圣之方妊妇不可服，服之堕胎，当用王海藏妊娠伤寒法，既可却病，又可保胎，斯为两全。病家惊为学识宏富，倾诚倚任，服俗医方，病日加剧。俗医不知变通，死守王海藏之法，糊涂处方，日趋沉重，至于昏愤不识人，谵语时作，手足躁扰，循衣摸床，危险万状。病家始觉庸医之误，延愚往诊。愚曰：王海藏之《妊妇伤寒》书，邪说书也，惑世诬民之书也。无论有妊无妊，凡患伤寒病，皆当服仲圣之伤寒方，既可使病速愈，又可保胎无恙。彼王海藏者，即不知医，敢于造此《妊妇伤寒》一书，遗害万世，且夫医仁术也，仁术之医界中，何贵有此不仁之邪术书哉！此病初起，本是太阳伤寒，寒邪初入皮毛，头痛项强，身疼腰痛，无汗而喘，理合用仲景麻黄汤，覆被发汗，汗出即愈，乃是最轻浅，最易治愈之病。殊不知俗医不知仲圣伤寒法，而用王海藏邪说，迎合富贵之门，因循宕延，遂令轻病变为重病。今病已濒危，命不可知，尚可胎之可保，兹诊得脉弦而不涩，尚有一线生机。仲圣经文云：日晡所发潮热，不恶寒，独语如见鬼状。若剧者发则不识人，循衣摸床，惕而不安，微喘直视，脉弦者生，涩者死。兹脉不涩不短，或可挽救。方用黄芩汤，加黄连、麦冬、生栀子、连翘心，以泻心热，滋心燥，即以保安心神。三日后，身微汗，神识稍清，手足躁扰不作。愚曰：病至于谵语不识人，循衣摸床，手足躁热，可谓危险已极，不敢言必可挽救。今幸得身微汗，神识稍清者，此乃津液绝而复回之效也。所谓尚有一线生机者，正指此耳。今乃可以通大便矣。以大承气汤下之，得大便畅下，胸膈宽舒，乃思食。十日后，乃占勿药，胎乃无恙。妊满十月，居然生子。

《圣方治验录》

魏长春

杨辅君夫人陈氏，年三十七岁。民国十九年九月二十七日诊。

病名：妊娠肺炎。

原因：肺阴不足，常有干咳，怀孕八月，感受温邪，咳逆。服疏透

清肺药不效，延余诊治。

证候：咳嗽咯吐紫血，气喘内热，咽痛胃呆，便秘二日。

诊断：脉洪滑数，舌赤边苔黄白。妊娠血热，温邪犯肺，热喘证也。

疗法：清肺化痰安胎，用苇茎汤合泻白散加减。

处方：活水芦根一两 冬瓜仁四钱 苦杏仁四钱 瓜蒌仁四钱
鲜茅根八钱 桑白皮三钱 地骨皮三钱 黄芩三钱 鲜生地二两

次诊：九月廿八日。咳逆稍平，舌赤咽干，便解，脉滑数，血热未清，肺炎尚炽，母病热，故胎不安。当撤热清肺，即是安胎。

次方：鲜生地二两 玄参八钱 白薇三钱 天花粉五钱
知母三钱 水芦根一两 桑白皮三钱 地骨皮三钱 淡竹沥一两冲
肺露一两冲

三诊：九月廿九日。昨日天气暴热，卧处阳光直射，以致夜热加剧，咳而咽痛，气促无痰，脉滑数，舌深红起泡。用喻嘉言清燥救肺汤加减治之。

三方：桑叶三钱 枇杷叶五片去毛 生石膏八钱打 原麦冬三钱
钱生地一两 川贝三钱 知母三钱 玄参八钱 生白芍五钱
水芦根一两 瓜蒌仁五钱

四诊：十月一日。咳嗽气喘，舌起白泡，咽痛便实，脉弦滑。内热稍减，肺火未清，用苇茎泻白合剂。

四方：水芦根一两 冬瓜仁三钱 玄参八钱 鲜沙参三钱
生桑皮三钱 地骨皮三钱 知母四钱 鲜生地一两 生石膏一两
肺露二两分冲

效果：服药后，热退咳止，气平病愈。

炳按：妊娠肺炎热喘，热甚胎必上冲，喘亦增剧，必须即清肺炎，以平热喘，则胎可安。

李荷生君夫人，年二十四岁。民国十七年七月十七日诊。

病名：妊娠伏暑。

原因：怀孕七月，新凉引动伏暑，病起旬日，曾服安胎止咳方不效，改延余诊。

证候：咳嗽牵引胁痛，气喘潮热，胃呆胸闷。

诊断：右脉滑疾，舌红。证属伏暑热炽，津液酿痰，流注肋膜，病势棘手，非安胎套方所能治。

疗法：清透伏暑，室畅气机为先，继进寒凉清肺。

处方：鲜竹叶二钱 薄荷一钱 连翘三钱 淡豆豉三钱
鲜藿香三钱 焦山栀一钱 苏梗一钱 茯苓四钱 苦杏仁三钱
瓜蒌皮三钱 黄芩二钱

次诊：七月十八日。咳嗽气喘，胸闷，脉滑，舌红苔黄厚。伏邪内蕴，肺胃同病，用清润法。

次方：桑叶三钱 生白芍三钱 苦杏仁四钱 生蛤壳四钱
旋复花三钱包煎 全瓜蒌五钱 海石三钱 黄芩三钱 南沙参三钱
枇杷叶三片去毛 桑白皮三钱 炙甘草一钱

三诊：七月二十日。咳嗽气喘，左胁掣疼，咽痛，潮热未尽，右脉滑数，舌红。肺热胶痰入络，再当清解痰热。

三方：玄参三钱 生甘草一钱 桑叶三钱 瓜蒌仁四钱
川贝二钱 淡竹沥一两冲 竹茹三钱 苦杏仁四钱 枇杷叶三片去毛
旋复花三钱包煎 黄芩三钱

四诊：七月二十一日。胁痛虽止，咳逆气喘未平，便艰潮热。脉象滑数，舌红苔薄。肺热颇炽，宗喻嘉言法。

四方：桑叶三钱 鲜枇杷叶五片去毛 原麦冬三钱 火麻仁四钱
叭杏仁三钱 鲜生地四钱 水芦根一两 淡竹沥一两冲 川贝二钱
知母三钱 全瓜蒌四钱

五诊：七月二十二日。热恋日久，胎气不宁，躁动火升，咳逆气喘，痰黄白稠，吐出颇多，口渴欲饮，便解燥矢。脉象滑数，舌苔黄白腻。仍宗喻嘉言清燥救肺法。

五方：桑白皮三钱 枇杷叶五片去毛 原麦冬四钱 玄参八钱

炙甘草一钱 生石膏八钱 鲜石斛三钱 鲜生地八钱 瓜蒌仁五钱
苦杏仁五钱 鹅管石四钱 旋复花三钱包煎

六诊：七月二十三日。昨服药后，便下四次，均属痰沫，夜卧肋痛复发。咳痰黄厚胶粘，热势未退，头汗气喘。脉象滑数，尺泽脉和，舌色红糙，苔黄白腻。肺炎肠热，痰火上升，病势非轻，宗吴鞠通法。

六方：玄参八钱 原麦冬八钱 鲜生地八钱 知母八钱
生石膏八钱 生甘草二钱 礞石滚痰丸五钱吞 郁李仁肉三钱
鲜石斛三钱

七诊：七月二十四日。昨服药后，汗出如注，便下四次，热势轻减，痛止气平，痰薄。按脉滑，舌红，苔黄白厚腻。蕴痰尚多，虽下未清，再进清肺化痰，降气通腑法。

七方：玄参八钱 原麦冬八钱 鲜生地八钱 知母五钱
竹茹三钱 生甘草二钱 瓜蒌仁五钱 桑白皮三钱 旋复花五钱包煎
礞石滚痰丸三钱吞 黄芩三钱

八诊：七月二十五日。热退身凉，胎安气平，自汗淋漓，咳嗽未已，痰薄，胃醒思纳。脉滑疾，舌红润，苔黄白腻。病势已轻，痰火亦化，用清肃肺胃余邪，轻剂治之。

八方：南沙参三钱 桑白皮三钱 地骨皮三钱 炙甘草一钱
紫苑三钱 川贝二钱 款冬花三钱 稻豆衣三钱 枇杷叶五片去毛
竹茹三钱 橘红一钱 朱茯神四钱

九诊：七月二十七日。热退汗敛，便实溲长，寐安，咳嗽痰薄，气平肢倦，胃欲思纳。脉象右滑疾，舌色红润，苔化。病已痊愈，再进清肺安胎方，为善后疗法。

九方：旋复花三钱包煎 苦杏仁三钱 茯神四钱 竹茹三钱
生白芍三钱 紫苑三钱 款冬花三钱 橘红一钱 川石斛三钱
黄芩二钱 原麦冬三钱

效果：服药后，咳止病愈。足月安产一男。

炳按：此妊娠伏暑夹痰，前后治法，安胎化痰，挟证群起，临机

应变法也。

《慈溪魏氏验案类编初集》

周镇

钱光斗妻，廿余岁，住南门跨塘桥。癸亥八月，病伏暑。原因，楼居伏热；素因，肝气乘胃。且怀妊三月，寒热起伏不清。热时呕吐不止，气逆撑胀，神情沉迷。医投通行梔、豉、藿、郁、茹、荷等品，十余剂，不受。诊脉濡而不爽，苔黄。经事素准，现经居三月，脉虽不滑，总宜兼顾。拟清暑和胃，疏肝理气为法。青蒿、益元散、竹茹、鲜荷梗、银花、金铃子、丝瓜络、黑山栀、陈香橼、老苏梗、淡子芩、桑寄生、霍石斛、芦根、左金丸九分绢包。另狗宝一分，伽楠香一分，鸡内金一具炙，研末冲服。药未进前，嘱先饮酱油冲汤，得不吐，再服药。复诊：呕吐大减。原方出入。末药去狗宝、伽楠香，加沉香末三分。三诊：呕吐又起，苔又加黄，神情更乏。重加清暑之品。生雅连八分，竹茹三钱，益元散三钱包，淡子芩二钱，丝瓜络三钱，芦根二两，枇杷叶五片，桑寄生三钱，鲜石斛四钱，金铃子三钱，青蒿二钱，佛手一钱半，玫瑰花三朵。另狗宝一分，伽楠香一分，研末冲服。服二剂，攻撑、呕吐均止，热亦渐退。愈后足月，生一男，母子均安。

朱右，开原乡。庚子秋，妊五月，患伏暑，身热起伏，发则懊烦，呕吐，面赤，口渴，气粗，有汗不解，便泄日二十行，并无胀痛。脉滑数异常，舌腻粉白，质绛，唇朱，目赤。先进豆豉、黑山栀、滑石、薏仁、川连、竹茹、青蒿、白头翁、黄柏、芦根、荷叶等。一剂，便泄减，热仍起伏，气粗有加。舌本胖大，苔粉白，边紫绛。前方加川朴、鲜佩兰。另郁金、菖蒲研服。得畅汗，胸发赤疹。起伏渐轻，烦闷大退，便泄未止，色酱秽臭，肛痛。脉数减，苔亦化。时天气忽寒，复增咳嗽。用桔梗、郁金、杏仁、鸡苏散、青蒿、银花炭、丹皮炭、象贝母、荷叶、香连丸，便泄咳嗽均止。

华阿南之妻，住仓浜。庚申八月初旬，怀妊五月，风温引动伏

邪，身热起伏，咳嗽痰稠。徐医照妊娠感邪治法，因其腰痛，有党参、当归、阿胶等味。热势日甚，神迷妄言，呕痰黑如锅滞。十二日延诊：热势起伏，渴饮神糊，咳嗽痰多，呕痰灰黑，腹部灼热，溲赤如血。脉弦数异常，舌红苔黄。伏热深沉，恐其内窜。生雅连、黄芩、金石斛、鲜青蒿、益元散、鲜沙参、瓜瓣、竹茹、花粉、丹皮、枇杷叶、茅苇茎、郁金、野苈麻根。鲜薄荷、莱菔、鲜梨同打汁。备方：如昏糊甚，用万氏牛黄清心丸一粒。十三日诊，昨日热轻，咳嗽，仍呕灰黑稠痰，甚臭腥，渴饮，溲赤如血。脉弦数急，舌红苔黄。伏热挟痰，熏蒸沉迷，腹中攻动，腰痛，更防流产。青蒿、黄芩、瓜瓣、杏仁、竹茹、郁金、花粉、金石斛、鲜沙参、浮石、丹皮、鱼腥草、雅连、野苈麻根、茅苇茎、枇杷叶、菴草，梨、莱菔各打汁冲。另西月石、川贝母、雄精、竹黄、研末冲服。十四日诊：昨日热起未甚，咳痰甚稠，未见灰色，溲赤，便解甚腻，胸脘窒闷。脉数不靖，舌红苔黄。伏邪挟风熏蒸，恐再反复。青蒿、黄芩、枳实、姜皮、宋半夏、杏仁、冬甜瓜子、生雅连、石斛、花粉、浮海石、鲜沙参、竹茹黄、丹皮、竹叶、茅苇茎、梨、莱菔。另雄精、月石、川贝母、郁金，研末，丝瓜藤汁温调。十五日诊：热发已轻，口渴尚甚，咳引胁痛，口腻溲赤，便解尚畅，中有痰粘。脉数右减，左数尚甚，苔黄未化。伏热风痰，胶滞未清。蛤壳、丹皮、竹茹、石斛、黄芩、青蒿、花粉、姜皮、紫菀、橘络、瓜瓣、杏、薏、菴草、茅苇茎、竹叶、西瓜子。另月石、川贝母、雄精，研末冲服。竹沥温服。十六日，改加鱼腥草、知母、忍冬藤，渐以辍药。

鲍荣春之妾，戕伐早，常有淋带。丙午夏，怀妊七月，感暑热。身热，呕吐，胸闷，溲淋痛，便不通，时正伏中，暑邪内淫。初疏郁金、香豉、黑山栀、竹叶、淡芩、紫菀、车前、地肤、冬葵子、杏仁、芦根、川连、鲜藕、荷梗。另更衣丸。服药，热减，便解溺爽。然热未退净，脘闷腹痛带下，无片刻之停。复用连翘、知母、白薇、青蒿、郁金磨、苏梗、淡子芩、川贝母、香附、荷叶蒂、莲须、鲜藕。服后，热止带定呕减，而少寐汗多、肢厥不暖者二日，是热伤营液，表甚疏泄。予台参

叶、枣仁、茯神、糯稻根、料豆衣、焦秫米、地骨皮、桑寄生、莲子青心、淮小麦、灯心等，汗止寐酣而安。

《周小农医案》

孔伯华

萧妇，九月初七日。妊娠七阅月，近感邪袭，寒热头痛，周身不适，口渴喜饮，脉滑实而数，大便秘，宜清疏凉化。

生石膏八钱 龙胆草二钱 焦栀子三钱 桑枝四钱 桑叶四钱
鲜芦根两 竹茹五钱 全栝楼八钱 薄荷钱半 地骨皮三钱
忍冬花四钱 杭菊花三钱 苏叶钱 知母三钱 鲜荷叶一个
僵蚕二钱 旋覆花钱半，布包 代赭石钱半

《孔伯华医集》

恶阻

程从周

寇吁甫乃政年三十六岁，肌白而黄，体素孱弱，曾育数胎，近复持斋，不茹荤者数年矣。经事一向欠调，今则过期一月，偶因怒气所伤，呕吐不已，延医诊治，日渐沉困，无力以动，动即恶心之极，反增胸膈不宽。延余过诊，六脉浮滑，而两尺更觉流利，曰：“此孕而恶阻病也，必欲治之，何难之有？”其尊人李邓林文学向余曰：“小女吃斋而体弱，今已数年不育，安得平空有孕乎？”余曰：“据脉系胎，非病也。即胎而兼病，带病而受胎者，世岂无之？”于是，主以安胎健脾，不数剂而吐止。调治两月，腹渐大，胎渐动，方信余言非谬。后月足而正产无虞。大都胎前吐症，体弱者居多，或亦禀赋殊常，故多呕吐，有吐一两月者，有吐半年不止者，有吐至分娩而后已者，有绝不能谷食而稍食诸果者，有小产之后随而吐止者，有小产之后即能饮食者。总之，中气不足，胎亦不旺，因而胎堕比比皆然。由此观之，

当预用参术补中，兼以养胃安胎之药，乃为先务也。

《程茂先医案》

吴麓

皖臬广定山夫人，经闭不行，恶心呕吐。余诊六脉滑疾不散，心部独动而甚，其胎已结三月。伊云：内子续娶十载，从未坐喜，近服通经行血之药，尚且不行，其非胎可知，余答以脉见滑数，证见恶阻，且左手脉大于右，必是男胎无疑，通经破血之药切不可服。即用二陈汤，加竹茹、砂仁、姜汁以胃止呕。遂服数剂，甚效。继以养血安胎调理而愈。嗣获男喜，母子安然。

葆工部夫人受孕三月，呕吐痰水，胸腹胀满，见食即恶。按脉滑疾不散，系脾胃虚弱，气滞而致恶阻也。宜服人参橘皮汤以益胃和中，则呕恶自止。服之甚效。嗣伊问：如将来呕恶复发，此方可常服否？余曰：凡胎妊三月余而呕吐渐止者，盖胎元渐大，则脏气仅供胎气，故无暇上逆矣，无须过虑。

相国王伟人孙媳，怀孕三月，患恶心，呕吐不止，烦闷胀满，吐痰水甚多，粥浆不入。诸医无效，形困势危。余诊之曰：脉洪滑数，此脾虚气滞，胃火多热，中脘停痰所致。即用竹茹汤加知母、黄芩、麦冬以止呕清痰。遂连进二剂，次日呕减神舒、脉洪亦缓。以原方加入参、枇杷叶，其呕恶全止，并思饮食。继以六君子加竹茹、黄芩、归、芍，调摄乃安。

《临证医案笔记》

林佩琴

石氏。洒渐恶寒，呕吐，绝谷汤饮不下者，四旬余，奄奄沉困，身冷而阳垂绝。诊之脉伏，沉候似无，予断为胎，其家疑未信。予谓此恶阻之重者，胎无疑也。夫胞宫血聚，气不下行，必至浊阴上犯，阻塞阳和，呕逆厥冷，非姜附无以通阳泄浊。其翁惧热药胎堕，予曰：

经云有故无殒，保无忧也。先与热姜汁，继和以米汁，呕吐止。进附子理中汤加制半夏，二剂身温，嗣用异功散加砂仁，煨姜，五服而安，至期产一女。

郑氏。寒热咳痰，食减经阻，医谓损怯，进补剂。中满呕哕，恶闻食气，烦晕善惊。更医以为肝风，用和营镇惊。延及神色困惫，时或晕绝，举家惶惑，请临诊一决。予曰：此胎脉，右尺已动滑，勿药可也。经云：阴搏阳别，谓之有子。言阴搏于下，阳别于上，气血调和。即胎脉也。《脉诀》云：尺内不止真胎妇，尺脉绵绵不绝为胎结也。无已，姑用益阴和阳，白芍、柏子仁、茯神、甘菊炒、枣仁、炙草、小麦、桑叶、南枣。四服渐安，后生一子。

《类证治裁》

抱灵居士

龄室，体肥、饱胀、食少、头昏、不渴，白带，经期过二月，脉浮大左甚，尺沉涩，难辨是胎。以逍遥散加贝母、香附一剂，热退，昏甚；以四七汤加陈皮、香附、天麻、白术、生草一剂，进食，腹内微痛；以前方加梔子一剂而愈。两月胎形著矣。生一男。

玖室，娠有七月，头昏作渴作呕，舌净，偏身痛，以生地四物汤加羌、防、西砂、生草、竹茹、生姜一剂，呕止，痛好，咳嗽，头昏；以达生散加白术、黄芩、川芎、桔梗二剂，昏好，渴喜冷，早咳；以参苏散去半、壳、葛、参、术，加黄芩、白术、归、芍、杏仁、生姜、灯心二剂而愈。

刘妇，有娠两月，患伤寒。十余日后，胸痞，呕吐酸涎，溺赤，便秘八日，舌净不渴，脉弦紧。或以正气散、小柴胡汤之类。予以梔子、黄连、苍、枳、通、芍、香附一剂，呕少止；以小承气合陷胸汤，用生军二钱利之，胸宽，微呕吐酸，齿痛，左肋扯痛；以小陷胸汤加白芍、木通、竹茹、生姜、茯苓、陈皮、枳壳、白藓皮一剂，痛减，呕涎，便坠，拒食；以黄连、石膏、青皮、枳壳、木通、麻仁、油归、玉金、半夏、茯苓一

剂，坠好，仍呕；以附子理中汤愈。

《李氏医案》

蒋宝素

素有阴亏火盛，肝风内扰之症。近值有妊三月，离火司胎，阴液愈亏，不能承制五火，煎熬津液成痰。呕吐烦作，浊痰上溢，此为恶阻。饮食迟于运化，肝木久失条舒，脉来弦数无神，虑有子痼之患。当以壮水济火，补阴潜阳为主，辅以养血荣胎之意。

大生地 当归身 大丹参 黄芩 冬白术 白知母 天门冬
大麦冬 大白芍 玄武胶

服壮水潜阳之剂，胎元竟过离宫。半载以来，阴平阳秘，脉亦和平。曾经受孕，即觉体倦神疲，由渐而甚，至产后方平。现在形神拘倦，甚于畴昔，皆缘火盛阴亏所致。仍以壮水潜阳为主。

大生地 当归身 冬白术 黄芩 酸枣仁 玄武胶 肥杜仲
益母花 川黄柏 大白芍

《问斋医案》

何平子

胎前：入春来肝火内炽，呛甚呕恶，脾不输津，以致烦渴不止。暂拟甘寒平胃法。

自注：面赤舌黑。

蛤粉炒阿胶 熟石膏 黑山栀 橘红 茯苓 鲜石斛 大麦冬
广藿 川贝 竹茹

《赤存丹房医案》

李铎

黄氏妇，年二十，妊娠三月，脉弱而呕，谓之恶阻，本脾胃虚弱之病。《大全》云：妊娠禀质怯弱，便有是症。法宜益脾和胃，与六君

加白蔻、竹茹、姜汁、六剂而愈。

王氏妇，年十八，结缡仅三月，呕吐不能食，眩晕体倦，无寒热。请余脉之，两手脉皆细数，询得停经两月，忆《金匱》论怀孕六十日，当有此证，以恶阻病治之，用《千金》半夏茯苓汤加减，水煎服，一剂吐止，四剂全愈。后以此法治恶阻，良验。

上党参 半夏 茯苓 旋复花 橘红 生姜 甘草炒
干生地 捣汁冲服 竹茹

如脉不见细数去生地，脉虚加白术、砂仁。

按：妊娠之脉，诸家之论固有至理，然皆有验有不验。余业医有年，专心究此，阅历多矣。尝见有甫受胎而脉即显呈于指下者，有半月一月后而见于脉者，有始终不见于脉者，有受孕后反见弦涩细数者，甚至有两脉反沉伏难寻者，古人所论亦不尽然也。以是知天下事皆不可以成迹拘也。予诊斯病，直未见孕脉，因询得停经两月，又无他病，以意会之，所谓医者，意也。

平素非博究医书，鲜不为细数脉起疑焉，能悟到病由恶阻，所治无不验，洵得于心者应之手。 寿山

《医案偶存》

徐守愚

嵯城朱茂盛店主妇，瑞英年三十有奇，妊娠六、七月，一闻谷气即呕恶，连声不断，不得饮食者二十余日。其间有谓胎气上逆，以安胎为主，用苏梗、枳壳、砂仁、白术、黄芩等味者；有谓脾胃虚弱不能容受而然，以安胃为主，用参术苓甘四君加广皮者；有谓阴中火虚，气不归元，用景岳理阴煎者。杂投无效，求治于余。诊脉两手弦数，谓曰：“此乃体质虚弱，触动肝气，所以木郁生火，心阳因之上亢。治宜半夏泻心汤加乌梅，取其辛以开之，苦以降之，补以运之，酸以收之，始中病情。”有同道某不读圣经，谓妊娠可用半夏乎？余固争之曰：“此证当重用半夏！以痰气阻塞中脘，阴阳拂逆，非半夏不除。经

曰：有故无殒，亦无殒也。先生岂未之知耶？”彼无从辨，但云：“且看服后何如。”余谓一剂而呕立止，二剂而进米饮，三剂而能食粥，效可预。”必服之果如所言，心以为喜而已。不意越十余日，两足渐肿至腿膝，状似子气。前医私自趋承，谓：“听吾施治，一剂而愈。”彼遂信之，背余服药。谁知一剂而胎动气急，咳嗽痰壅，自午至酉时甚。伊夫夜半叩门求救，说如此如此，总由吾辈无知故耳，望先生恕罪。余阅其方，乃方仙藤散，《胎产心法》中治子气方耳。此非子气，恶得用之噫？医之貽害太矣哉！窃思此系脾气虚弱，不能制水，是以发肿。肺金失其母气则无土以生，是以气促满闷，谓为子气，似是实非。用苓桂术甘汤合干姜、五味子、细辛四剂，而诸症霍然。五日后忽尔小水不通，阴户中有鸡子大一块，胀闷脱坠，苦楚不堪。时师聚讼，纷纷金曰：“非阴挺即阴菌。”余乃从而辨之曰：“妇人七情郁火，损伤肝脾，湿热下注则生阴菌。但阴菌翻出如饼而小便淋沥，此则横踞如栏而小便热闭，判然不同，顾可以张冠李戴耶？”细绎病情，乃太阳府气不化，以致于斯，五苓散重用桂枝、仙居术二、三剂可愈。有疡医某趾高气扬，妄自炫能云：“此胞痛，下一针，其愈较速；不然一至溃烂，不可救药。”余戏之曰：“先生真神乎技矣！窃恐用针一法，即俗所云石板医驼背耳，背直而命将奈何？”举座大笑，余亦哑然而退。次日清晨伊夫趋寓而告余曰：“昨服药后，终夜熟睡。至天明，小水一通，而块自觉小些，是药已验矣。”余曰：“然须复诊处方。”少顷，新昌吕南棠偕来，余将至新，过伊家一诊，嘱原方再服数剂。不意南棠固留四日，比余归得，服药八剂，而病竟霍然！由是观之，凡疾痛痼痒，悉委之于命，而见医即请者，可废然返矣。

《医案梦记》

朱增蕸

杜青六妻某氏，患恶阻证。投以止吐温中之剂而更甚。肌肉消瘦，已卧不能起矣。床头枕边呕吐清涎，水谷不进将近一月。青以

为决弗治，不过延余以尽其力。余思温中止呕之剂服而不愈者，乃胃气不能统摄。听津液之消亡，故呕吐清涎，肌肉日就消瘦。不补胃养液，鲜克有济。遂用人参、山药、芡实、炙草专补胃中气液，煨姜畅胃调中。一服呕止，十余服而体复。此与王朱氏案争在引用一味，治法判若天渊。

《疫证治例》

余听鸿

常熟支塘邵聿修先生，余忘年友也，医道之识见心思，超人一等，而喜景岳、医通两书，偏于甘温。其生平为人，性直气爽，不谈人短，不攻同道，不恃己才，不耻下问，深可敬也。余每过之作长夜谈，娓娓不倦。余有过，彼戒之，余有善，彼赞之。天不永其寿，丧我良友，余深惜之。前在范云亭处会诊，与余论医，谓治病贵乎镇静，不可轻投药石，治孕妇之病，尤宜加慎。前老妻妊娠七月，忽起吐泻，腹痛不堪，举家惊惶，即请稳婆。有曰欲小产矣，有曰欲坐草矣，有曰尚未及时，言语杂乱。余诊其脉，尚未离经，痛在胃脘当脐，并不在少腹，而腰亦不痛，令众人不必扰乱，且与洋烟吸三四筒，妊妇已醉，倦而酣睡，使人皆出房，听其安眠，至明午如醒，而诸恙霍然矣。过二月举一男，今已十一岁矣。故妊娠有病，断不可杂药乱投也。

《余听鸿医案》

方耕霞

吴。古人造字，以义成文，二火加疾为痰。可见痰之为物，非火不生，痰能为患，故治痰先治火，求本之道也。今呕哕痰多，成盆盈盎，脉数而滑，舌绛而剥，彻夜不寐，面色光红，无非痰火上逆之征。丹溪云：上升之火。皆从肝出。妇女经事既停，肝热必盛，姑从凉肝降逆一法，以治痰呕之源。

姜川连 黄芩 瓜蒌皮 半夏 川贝 玄胡 旋覆花 竹黄

杏仁 黛蛤散

二诊：服药后痰火少平，仍然舌红苔剥，大便匝月不行，欲思通腑泄热，尤恐有碍胎元，姑仍昨议，再得转机，方有把握。

前方去半夏 竹黄 加火麻仁 山梔

雪羹汤代水

三诊：肝火痰呕居然平静，大便未行，舌苔未化，前次小效，不过得凉降之药，痰火未敢肆行无忌耳。究竟肝胃两经之郁热未清，故尚口渴喜凉，夜不安寐也。今锋锐已挫，勿以小胜而忽诸。

鲜石斛 川连 生草 木瓜 枣仁 麻仁 蒺藜 半夏 旋覆花 黄芩 川贝 姜竹茹 黛蛤散

四诊：舌苔渐化，颇欲思食，胃道已得转顺之机。渴饮虽减，夜寐少安，心阳肝火退而未静。前方苦降凉润，平炎上之火，养既灼之阴，今津液已润，再参濡阴血以宁天君，仿朱砂安神意。

生地 辰拌川连 麻仁 半夏 黄芩 川贝 麦冬 旋覆花 枣仁 玄参 生草 竹茹 枇杷叶

《倚云轩医话医案集》

张锡纯

天津王氏妇，年二十六岁，受妊后，呕吐不止。

病因：素有肝气病，偶有佛意，激动肝气，恒作呕吐。至受妊后，则呕吐连连不止。

证候：受妊至四十日时，每日必吐，然犹可受饮食，后则吐浸加重，迨至两月以后勺水不存。及愚诊视时，不能食者已数日矣。困顿已极，不能起床。诊其脉虽其虚弱，仍现滑象，至数未改，惟左关微浮，稍似有力。

诊断：恶阻呕吐，原妊妇之常，兹因左关独浮而有力，知系肝气胆火上冲，是以呕吐特甚。有谓恶阻呕吐虽甚剧不碍者，此未有阅历之言。愚自行道以来，耳闻目睹，因此证候事者已有多人，甚勿忽

视，此宜急治以镇肝降胃之品，不可因其受妊而不敢放胆用药也。

处 方：生赭石两半，轧细 潞党参三钱 生怀山药一两
生怀地黄八钱 生杭芍六钱 大甘枸杞五钱 净萸肉四钱 青黛三钱
清半夏六钱

药共九味，先将半夏用温水淘三次，将矾味淘净，用做饭小锅煮取清汤一盅，调以面粉煮作茶汤，和以白糖令其适口，服下其吐可止。再将余药八味煎汤一大盅，分三次温服。

复诊：将药连服两剂，呕吐即止。精神气力稍振，可以起坐，其脉左关之浮已去，六部皆近和平。惟仍有恶心之时，懒于饮食，拟再治以开胃、理肝、滋阴、清热之剂。

处 方：生怀山药一两 生杭芍五钱 冬瓜仁四钱，捣碎
北沙参四钱 碎竹茹三钱 净青黛二钱 甘草二钱

共煎汤一大盅，分两次温服下。

效果：将药连服三剂，病遂全愈，体渐复原，能起床矣。

《医学衷中参西录》

袁焯

李姓妇年约四旬，天癸两月未来，呕吐不能饮食，茶汤入口便吐，略有恶寒、发热等症。予诊其脉，缓滑有神，乃告之曰：“孕也。”病家疑信参半，急欲止吐，屡服药而呕吐偏不能止，复延他医诊治，议论纷纭，方药亦各不同。数日后呕吐如故，日渐瘦弱。一月后，其家复来邀诊。入其室，则病人方瘥厥未苏，两手紧握，两膝亦蹇，面色黄瘦。问之，则诸医之药皆无效，而病人又不原服药，故缠绵多日，并问究其何病，死生何如，盖其家已议备后事矣。予曰：“人虽瘦弱，瘥厥可畏，而脉则缓滑有生气，非病也。孕也。”因囑其不必服药，但以粥汤及鸡鸭汤与饮。盖以妇人恶阻，有过六十日或八十日始愈者，不可妄以药治也。又月余，其侄来诊病，问之则已渐愈，稍能饮食矣。乃至腊月，其婿送诊金来，复问之，则已饮食步履如平人

矣。至今年三月，果生一女。《金匱》论妇人恶阻，有绝之之戒，不图于今日见之也。

《丛桂草堂医案》

曹南笙

某右。停经三月，无寒热，诊脉大，系恶阻减食。

细子芩 知母 苏梗 砂仁 橘红 当归 生白芍

某右。脉右涩小数，左弦促，纳食脘胀，常有甘酸浊味，微呕吐清涎，旬朝始终，更衣仍不通爽，询知病起情怀抑郁，由气郁化热，如《内经》五志过极皆从火化，就怀妊恶阻，按徐之才逐月养胎亦在足少阳经，正取清热养胎，况肝胆相火内寄，非凉剂无以和平，古人治病以偏救偏，幸勿畏虚以贻患。

金石斛 黑山栀 茯苓 半夏曲 橘红 竹茹 枳实

某右。血下殒胎未下，浊气扰动晕厥，呕吐腹满，少腹硬，二便窒塞不通，此皆有形有质之阻，若不急为攻治，浊瘀上冒必致败坏，仿子和玉烛散意。

川芎 当归 大黄 芒硝 羌蔚子 大腹皮 青皮 黑豆皮
调服回生丹

《吴门曹氏三代医验集》

金子久

左脉弦涩，血虚肝旺也；右关流滑，湿胜痰滞也。经事愆期，得食欲吐，系是恶阻之兆，原非经阻之候；心悸艰寐，腰痛带下，此由肝肾阴亏，冲任欠摄；时或温温腹痛，虽由腑气失和，延防小产之患。治当和肝胃以止吐，参入养肝肾以固下，而中焦略有痰浊者亦须顾及。

米炒党参 枳壳炒於术 广皮 云茯神 白芍 酒炒归身

盐水炒杜仲 绿萼梅 煅牡蛎 公丁香 盐水炒吴萸 潼蒺藜

《金子久转辑》

丁泽周

刘奶奶。经居五旬，胸闷泛恶，头眩且胀，脘胀纳少，恶阻，浊气上干，胃气不能降和，先宜泄肝理气，和胃畅中。

生白芍钱半 黑稻豆衣三钱 仙半夏钱半 左金丸包，七分
赤茯苓三钱 炒杭菊钱半 薄荷炭八分 制香附钱半 陈广皮一钱
炒竹茹钱半 炒谷麦芽各三钱 春砂壳八分 嫩钩钩后入三钱
荷叶边一圈

王右。经居两月，脉象弦滑，妊娠恶阻之象。宜保生汤加减。

生白术二钱 炒条芩一钱 全当归二钱 云茯苓三钱
陈广皮一钱 大白芍二钱 制香附钱半 春砂壳八分 焦谷芽三钱
佛手八分 桑寄生二钱

朱右。经居二月，胸闷泛恶，不思饮食，恶阻浊气上干，胃失降和，脉象弦小而滑，似妊娠之象。姑宜平肝和胃，辛开苦降。

仙半夏钱半 左金丸七分 陈广皮一钱 赤茯苓三钱
枳实炭八分 姜竹茹钱半 炒谷麦芽各三钱 佩兰梗钱半
白蔻壳八分 佛手八分 柿蒂五枚

《丁甘仁医案续编》

张山雷

汪右。肝胃宿恙，兹以信阻四月，痛势颇剧，呕吐频仍。痛时四肢厥冷，肩背掣疼，脉尚流利而带弦劲，舌质不腻。顺气温燥，非可恣投，暂且摄纳肝胃。

炒山萸肉 4.5克 炮姜炭 1.2克 台乌药 4.5克
川雅连 0.9克 淡吴萸 1粒，同炒 川椒红 7粒，去目炒 紫苏叶 0.9克
制半夏 2.4克 甘杞子 4.5克 金铃子 4.5克 川断 9克 木瓜 4.5克

川朴花 3 克 白砂壳 0.9 克

二诊：麟体四月，素有肝胃宿恙，近稍加甚。但此数日来，痛已不作，惟清涎未免上泛。昨议温养，两和肝胃，益养肾阴，今天胃纳尚安。仍守昨意踵步，不妨多服数剂。真液渐充，可冀肝气驯服。

砂仁末 1.2 克，同炒生地 4.5 克 生萸肉 6 克 女贞子 6 克
煨姜炭 0.9 克 台乌药 3 克 制半夏 2.1 克
川黄连 0.3 克同炒，淡吴萸 7 粒 益智仁 2.4 克 甘杞子 6 克
金铃子 4.5 克 宣木瓜 3 克 川断肉 4.5 克 广木香 4.5 克
广藿梗 3 克 绿萼梅 2.4 克

徐右。汛阻三月，纳谷碍化，时有泛恶，亦或作呕，神稍疲困，脉右三部尚有流利，当宜怀娠论处。舌薄黄而燥，阴液素薄，法宜养液而助运，兼以调肝。

润玄参 6 克 苏半夏 4.5 克 淡吴萸 0.6 克，同炒，川黄连 0.9 克
天花粉 6 克 象贝母 6 克 米炒贡潞党 4.5 克 炒白芍 4.5 克
山萸肉 4.5 克 川续断 9 克 带壳春砂仁 0.9 克 生鸡内金 2.4 克

胡右。经阻五月，泛恶呕吐，颇似怀娠。但腹胀且疼，有时形块震动，情势却非娠状。脉又无神，舌则如恒，姑与和肝顺气以魄动静。

金铃子 4.5 克 炒橘核 4.5 克 生延胡 3 克 制半夏 4.5 克
淡吴萸 0.6 克同炒，川黄连 0.9 克 川郁金 4.5 克 象贝母 6 克
旋复花 6 克 大腹皮 6 克 姜炒竹茹 4.5 克 生代赭石 4.5 克
苏梗 3 克

《张山雷专辑》

沈绍九

妊娠二月余，冲脉之气失调，挟胃气上逆，导致恶心呕吐。肾气不足，故腰酸疼，应予以和胃降逆，佐以温养肝肾。

藿香三钱 紫苏梗二钱 陈皮一钱五分 法半夏三钱 白术三钱

炒白芍三钱 西砂仁一钱 黄芩二钱 广木香一钱 桑寄生四钱
炒杜仲四钱 补骨脂四钱

中年妇人，病恶阻，呕吐少食，精神欠佳，形体消瘦，医治二月余，热药服至干姜、附片，凉药服至石膏、大黄，愈治愈重。病人舌干苔薄，脉象软弱。投以五汁饮加沙参，一剂呕吐即止，续服数剂而愈。盖胃久为药物所困，气阴俱伤，药重必不受，故以甘寒之药养胃获效。

《沈绍九医话》

汪逢春

张右，二十岁，十月二十六日。

经居三月余，得食呕吐，烦杂不安，坐卧不宁，舌苔白，两脉细弦而滑。恶阻停饮之证。拟以疏和安中。

紫苏叶一钱 姜竹茹三钱 四制香附三钱 嫩桑枝四钱
枯子芩钱五 新会皮钱五 香砂仁钱五 丝瓜络三钱
左金丸钱五，布包 麸枳壳钱五 煨姜一钱 赤苓四钱

恶阻甚时，用生白矾如米粒大七枚，白水送下即安。因白矾有分解水分湿浊之功也。

《泊庐医案》

方公溥

郑女。八月一日诊：头昏眩晕，体倦神疲，食欲呆滞，泛恶呕逆，畏寒怕冷，脉虚滑，舌苔白滑，治以和胃降逆安胎。

炒当归9克 白芍药9克 仙半夏6克 新会皮4.5克
漂白术9克 子黄芩4.5克 炒竹茹9克 清炙草3克 苈麻根9克
香谷芽9克 缩砂仁2.4克，后入

八月四日复诊：泛恶呕逆已止，头昏眩晕亦轻，食欲较香，神疲无力。再拟益气养血安胎。

别直参 4.5 克, 另外冲 生绵芪 9 克 漂冬术 9 克 云茯苓 9 克
炒当归 9 克 东白芍 9 克 制半夏 6 克 新会皮 4.5 克 清炙草 3 克
香谷芽 9 克 炒竹茹 9 克 桑寄生 9 克

叶女。五月五日诊: 经停两月, 呕逆殊剧, 胸闷不舒, 恶寒怕冷, 纳呆化迟, 似有妊娠之象, 先与顺气降逆和中。

伏龙肝 15 克, 包 宋半夏 9 克 炒竹茹 9 克 新会皮 4.5 克
云茯苓 9 克 紫苏梗 4.5 克 炒枳壳 4.5 克 香佛手 4.5 克
香谷芽 9 克 藿香梗 6 克 缩砂仁 3 克

五月六日复诊: 进顺气降逆和中, 呕逆已平, 胸脘渐舒, 惟大便秘结, 口干、苔黄, 再从前法出入。

处方同前, 除伏龙肝、藿香梗、云茯苓, 加制川朴 3 克、白芍药 9 克、麦门冬 9 克、象山贝 9 克。

五月七日三诊: 胸次尚有时闷塞, 大便通而未畅, 再从前意化裁之。

处方同前, 除佛手、苏梗。加盐水洗当归 9 克、黑芝麻 12 克。

五月九日四诊: 胸次闷塞渐舒, 食欲渐增, 精神日有进步, 脉滑, 药既奏效仍宗原意增损之。

处方同前, 除香谷芽、象贝, 加子黄芩 6 克、云茯苓 9 克。

五月十五日五诊: 胃纳较香, 腰肢有时酸楚, 大便坚涩, 再进安孕润肠。

处方同前, 除砂仁、川朴、陈皮、茯苓。加桑寄生 9 克、厚杜仲 9 克、地榆炭 4.5 克、香谷芽 12 克。

《方公溥医案》

陆正斋

刘××, 女 28 岁。经停两月, 呕吐清水, 胸脘满闷, 纳少神疲, 苔白润, 脉滑而弱。虚入恶阻, 未可小视。

潞党参 1.5 克 土炒白术 6 克 白茯苓 9 克 广陈皮 3 克

制半夏 4.5 克 旋覆花 4.5 克 佛手花 2.5 克 北秫米 9 克
西砂仁 1.5 克 煨姜一片

袁××，女，24 岁。木火犯胃，头晕而痛，呕逆口渴，经停两月，脉象弦滑，恶阻证也。

老苏梗 4 克 淡黄芩 4.5 克 炒枳壳 4.5 克 川黄连 1.5 克
淡吴萸 0.3 克 旋覆花 3 克 广陈皮 3 克 制半夏 4 克 朱茯神 9 克
姜竹茹 4.5 克 粉甘草 1.5 克

郁××，女，25 岁。肝逆犯胃，肺失清肃，咳呕痰涎，月经二月未至，两尺脉有滑意。恶阻证也。

香苏梗 4.5 克 旋覆花 4.5 克 桔梗 3 克 广陈皮 3 克
云茯苓 3 克 炒白芍 10 克 甜杏仁 6 克 制半夏 4.5 克
霜桑叶 4.5 克 丝瓜络 4.5 克 北秫米 10 克

《陆正斋医疗经验》

叶熙春

郦，女，三十四岁。九月。昌化。经停三月，纳减择食，呕吐泛酸，胸闷作胀，神倦乏力，苔色薄白，脉来弦滑。此妊娠恶阻耳。

苏梗 9 克 姜半夏 9 克 姜汁炒竹茹 9 克 炒白术 5 克
盐水炒刀豆子 9 克 茯苓 9 克 玫瑰花 8 朵 煨石决明 18 克
盐水炒橘红 6 克 阳春砂 3 克，拌，后下 左金丸 1.8 克，吞

二诊：前服调气和胃之剂，脘闷得舒，呕吐泛酸减少；惟倦怠思睡，舌淡苔白，脉较无力。再以调气健脾。

米炒上潞参 9 克 炒白术 5 克 茯苓 9 克 姜半夏 9 克
炒橘红 5 克 炙甘草 2.4 克 阳春砂 3 克，拌，后下 绿萼梅 5 克
盐水炒刀豆子 9 克 左金丸 2.4 克，吞 生姜 2 片 红枣 4 只

三诊：呕吐泛酸已除，渐思纳食，苔白，脉缓滑。再以香砂六君加减，前方去左金丸、刀豆子，加桑寄生 9 克。

《叶熙春专辑》

施今墨

梁某某，女，25岁。

妊娠三月，有饥饿感而不欲食，饭后胸间堵闷欲吐，口干不喜多饮。舌苔薄微黄，脉滑数。

辨证立法：妊娠恶阻，多见于怀孕初期，若已三月，仍不欲食，则为郁热结滞，脉滑数亦足证明。拟用和胃清热法为治。

处方：白扁豆30克 北沙参12克 酒条芩6克 金石斛10克
香稻芽10克 枳实壳5克 砂仁壳5克 厚朴花5克 豆蔻壳5克
玫瑰花5克 旋复花6克，炒半夏曲6克同布包

陶某某，女，36岁。妊娠已四月，仍是食后即吐，甚则呕出血液，困急不堪，急来求治。舌红少津，六脉滑数。

辨证立法：恶阻本属妊娠常见之证，但已四阅月仍行呕吐，且有血液，六脉滑数，舌红少津，一派阴虚胃热之象，即予养阴清热和胃法治之。

处方：金石斛6克 砂仁壳3克 旋复花6克，半夏曲6克同布包
鲜石斛6克 豆蔻壳3克 白扁豆25克 姜竹茹10克 酒条芩6克
炒吴萸1克 炒黄连2.5克 紫苏叶1.5克 炒陈皮5克
生甘草3克

二诊：服药四剂，呕血已止，且能略进饮食，去金、鲜石斛。加北沙参10克，再服数剂。

《施今墨临床经验集》

妊娠腹痛

薛立斋

一妊妇心痛（非真心痛也），烦热作渴，用白术散即愈。后因停食其痛仍作，胸腹膨满，按之则痛，此因饮食停滞，用人参养胃汤。按

之不痛，乃脾胃受伤，以六君子补之，而愈。

一妊妇心腹作痛，胸胁作胀，吞酸不食，此肝脾气滞，用二陈、山楂、山梔、青皮、木香而愈。又因怒仍痛，胎动不食，面色青黄，肝脉弦紧，脾脉弦长，此肝乘其土，用六君子汤加升麻、柴胡、木香而愈。

一妊妇心腹作痛，胎气上攻，吐痰恶心，饮食少进，此脾虚气滞而为痰。用六君子加柴胡、枳壳，诸症渐退，饮食渐进。又用四君子加枳壳、山梔、桔梗而安。后因怒，两胁气胀，中脘作痛，恶寒呕吐，用六君子加柴胡、升麻，一剂而愈。

《续名医类案》

朱丹溪

孙院君因近丧，冒恶气伤胎，肚痛手不可近，发热，口中不思食，须安胎散，遂用青皮三钱，黄芩、白芍各二钱，归尾一钱五分，木香五分，甘草炙四分，二帖。水三盏，先煎苧根二大片，至二盏去苧根，入前药，同煎至一盏，热服。

《续名医类案》

喻嘉言

李思萱室人有孕，冬月感寒，至春而发，因连食鸡子，遂成夹食伤寒，一月才愈。又伤食吐泻作，前后七十日，共反五次，遂成隔症。诊时其脉上涌而乱，重按全无，呕哕连绵不绝，声细如虫鸣，久久方大呕一声，曰：病人胃中全无水谷，已翻空向外，此不可救之症也。无已必多用人参，但才入胃中，即从肠出，奈何？李曰：十两之费，尚可勉备。喻曰：足矣。乃煎人参汤调赤石脂末，以坠安其翻出之胃，气乃少回。少顷不便，人即脱去。凡三日服过人参五两，赤石脂末一斤，俱从大肠泻出。得食仍呕，但不呕药耳。因思必以药之渣滓，如糗粥之类，与服方可望其稍停胃中，顷之传下，又可望其少停肠

中，遂以人参、陈皮二味，剪如芥子大，和粟米同煎作粥，与半盏不呕，良久又与半盏。如是再三日，始得胃舍稍安，但大肠之空，尚未填实。复以赤石脂为丸，每用人参汤两许。如是再三日，大便亦稀，此三日，参橘粥内已加人陈食米，每进一盏，日十余次，人事遂大安矣。仍用四君子汤调理，共用人参九两全愈。然此亦因其胎尚未堕，有一线生气可续，不然用参虽多，安能回元气于无何有之乡哉。后生一子，小甚，缘母病百日，失荫故也。

黄咫旭乃室病膈气，二十余日，饮粒全不入口。诊之尺脉已全不至矣。询其二便，自病起至今，从未一行，止是痰沫上涌，奄奄待尽。或谓其脉已离根，顷刻当坏。喻曰：不然。《脉经》上部有脉，下部无脉，其人当吐不吐者死。是吐，则未必死也。但得天气下降，则地道自通，此症以气高不返，中无开合，因成危候。宜缓法以治其中，自然见效。遂变古人治膈之法，用其意不用其方，缘尺脉全无，莫可验其孕之有无。若有，而不求以赭石、干姜辈伤之，呼吸立断矣。姑阙疑，以赤石脂易赭石，煨姜易干姜，用六君子汤加旋覆花，煎调服下，呕即稍定。三日后渐渐不呕，又三日粥饮渐加，但不大便已月余矣。日以通利为嘱，曰：脏气久结，饮食入胃，每日止能透下一二节，积之既久，自然通透。盖以归地润肠，恐治膈而作呕（喻君子肝肾病治法，终身未晓）；硝黄通肠，恐伤胎而殒命。姑拂其请，坚持三五日，果气下肠通，月余腹中之孕渐著，而病全瘳矣。

《续名医类案》

施笠泽

吴玄水妇妊病呕吐，四十日不进糜饮，二十七日不溲溺。众以为必死矣。诊其脉俱沉滑而数，曰：此痰因火搏，凝结中脘，阴阳失次，气包血聚，是谓关格，靡有攸处，治之则生，不治则死。吴曰：虽九仙之木精石髓，其如不内何？曰：姑试之。乃用鸡脰脰、沉丁香、海石等，末之若尘，用甘澜水浓煎枇杷叶，取汤调服，始吐渐留，旋

进香砂汤，一饮而搜通，再饮而糜进。然喉中有物，哽哽不能上下，曰：此病根也。仍用前汤探吐，吐出结痰如麦冬、莲实者三四枚。其病遂瘳。妊亦无恙（笔仗精工可法）。

《续名医类案》

郑重光

吴饮玉兄令眷，未出室时，左肋下素有气积，时时举发而痛。在家皆用逍遥散治之罔效，嫁后怀孕三月，此积竟冲心而痛。痛甚昏厥，手足逆冷，口出冷气，脉沉弦而紧。此肝经积冷，结为冲疝，非桂附莫效。又属世医之女，且怀有孕，举世皆禁桂附，予何敢用焉？其太翁言修先生曰：“大人要紧，胎且置之。”遂投以当归四逆汤：桂枝、附子、当归、芍药、炮姜、吴萸、甘草、茯苓。服下即应手取效。每食生冷，必发，发则必须前剂，怀孕在腹，屡发屡医而胎竟不伤。今所生之郎，已十有余岁矣。后以东垣酒煮当归丸，服三年未断，其冲疝不发，并形俱消，屡屡生育。《经》曰有故无殒。先圣之言，岂欺人哉！

瓜镇王笃之兄，适严宅之女，怀孕九月，冬月苦寒患病。据严宅云，初病是伤寒，已经半月，发表攻里，俱已备尝。因腹中大痛，恐是临盆，稳婆已伺候矣。迎余决之，诊其脉沉细而紧，畏寒之极，坐卧火箱中，犹抱火烘而，其痛在脐上，左右冲击而动，不在少腹，而脉又沉，非欲产之候，此误用攻导凉药，致中焦寒极，非温不可。而前医犹要用行药，谓通则不痛也。予议用姜、桂，病家畏桂堕胎，予论之曰：“将产之胎，非若一两月血胞，畏桂行血，且中宫冷极，桂至中宫，尚不能敌其寒，何能下达而伤胎乎？失之不温，产妇且危，去病即所以安胎也。”遂用人参、炮姜、肉桂、当归、砂仁、陈皮、甘草，一剂痛减，温补半月方产，产时几至虚脱，得补而回。

《素园医案》

顾金寿

桑吴氏。脉弦而滑，停经四月，腹忽膨大，连服消蛊行血之剂，更增坠痛。问由口角郁怒而起。此气郁生火，以致胎气不安，暴腹胀大。二便通调，与蛊胀逐渐增加者各别，且消导不合，恐其有损胎元，自以平肝疏气为稳。

老苏梗一钱五分 嫩条芩一钱五分 四制香附一钱
大腹皮一钱五分，酒洗 阳春砂仁五分 炒枳壳一钱五分
鲜小卷荷叶连带一个

又。痛止膨消，胎脉大现，左强于右，理应得毓麟儿，但胃气已伤，尚须养胃安胎为治。

老苏梗一钱 嫩条芩一钱 生于术一钱 白扁豆三钱，去皮
炒白芍一钱 阳春砂仁四分 炒枳壳一钱五分 茯苓三钱 荷蒂一个
十剂

问此症，治者皆作蛊胀，且引列诸经，指为血蛊无疑，服药痛增，几乎胎坠，今得疏气平肝，数剂全愈，不数月果举一男，是胎非蛊。此间关系非轻，何以下指辨析无差，请明示之。曰人患不细心耳。余初赴诊时，见其悲啼痛楚，目含怒色，已知病由气恼而得，及下诊觉弦大中又带和滑之象，是胎脉非病脉也。再阅所服之方，但用行经消蛊等药，并无一字疑及有胎，不胜惊诧。细问伊母，方知经停四月，本无他病，因偶尔反目，悲怒交并，腹忽胀大如蛊，并非缓缓肿大，自是肝气夹胎气，郁而不舒，及服前药，方增痛坠，幸药力不深，腹中尚未振动，既得原委。但须舒气安胎，自然捷如桴鼓，迨痛止胀消，脉仍弦滑而和，左强于右，自是得男之象矣。凡妇人胎前，本以调气为主，况女子多郁，疏肝尤不可缓。若经停数月，别无他病，无论胎脉现与不现，俱要调气平肝，庶与胎元无碍，即非胎亦无难，气调经转，薛氏加减逍遥即此意也。若粗心浮气，不问得病之由，遽断定血蛊，用一派行气破滞之药，执迷不悟，鲜不胎坠母死，

竟伤两命，于心忍乎，顾凡为司命者，凛之，慎之。

《吴门治验录》

吴箴

孙氏怀妊五月，骤患心腹绞痛，吐泻交作，胸膈烦闷。按脉弦数，疾徐不伦，脉症不符。此时令不正，痧气陡发，壅塞气分所致。急当刮放，兼旋内服香苏散加藿香、砂仁、莱菔子、厚朴以利气止痛。次日复视，知其如法刮之，胸背肩臂发出红点无数。更以顺气和胃之剂，诸症悉退。

《临证医案笔记》

林佩琴

纪氏。先因右胁痛，继而脘腹满闷，食入胀加。腑气失降，实由肝失疏泄。左关脉不甚弦，右寸近滑，恐属妊兆。泄肝通腑，仍不碍胎为稳。椒目、砂仁壳、茯苓、桔萎皮、杏仁、陈皮、木香。数服而平。

吕氏。将产腹痛血下，脉短滑，左虚芤。予谓：脉未离经，决非正产。右关短滑，系食滞，腹痛见红由触损，但须行气补血。用红米曲、陈皮、查肉、利气消滞，以当归、白芍，和血定痛，逾两旬乃产。

侄女。孕七月，久泄泻，肛坠足肿，吐咳，腹微痛，晡寒热如疟，脉弦，右尺滑大，此中气下陷，土衰木乘。以补中益气汤减归、芪，加砂仁、制半夏、茯苓、煨姜，数服痛坠寒热俱减。因其肠胃久滑，不戒荤茹，泄泻仍作。加谷芽炒、茴香、炮姜等味而安。

《类证治裁》

抱灵居士

罗五妾，夙有胁痛之恙。娠有七月，先患时疫。三发而有胎，为热留血室而得。或手足如踏火，五心热，干咳腰痛，气上触，鼻焦，口干，脉洪滑，以白术、贝母之类不应。予以紫苏饮加黄芩一剂，上触

好，便常秘五、七日；以蜜汤冲服，少有恭；以凉膈散去硝，加续桔梗、熟军一剂，泻一次少许，咳在，腰痛缓，肺气上逆，便秘五日；用前方一剂，泻三次；以紫苏饮去芎，加苓、麦不应，泻三次，吐清水，恶风甚，腹痛不安，脉右弦滑，左濡；以归、芍、苓、术合香苏散，加煨姜一剂，泻止，腹胁痛，干咳，脉右弦、左滑；以泻白散加苓、芍、术、香苏、葱、草二剂，腹痛止，咳逼甚，脉洪滑，恶风好；以紫苏散去参、芍、加枳、桔、黄芩一剂，大小便坠，头胀；以前芍药汤反吐水、发热；以八味逍遥散热退坠好，腰痛甚，以苓、芍、术、鲤鱼汤煎不应。半月生一女，咳止腰好而愈。

《李氏医案》

李铎

聂氏，年二十余，诊得寸关两脉浮大而急，尺脉沉细而涩，潮热蒸蒸，头目昏痛，心腹胀痛，口燥渴。据述因郁气而起，致使胎气不和，凑上心胸，加以感冒，故见诸症，法主调气舒郁，兼固其胎。

香附 苏兜 陈皮 厚朴 川芎 当归 白芍 黄芩 缩砂仁 甘草 生姜 水煎服二帖。

又 前方获效，足征舒郁调气之验，两尺脉见略旺，胎元可保，潮热已退，大为可喜，兹仍仿前法加减，俾气和胎安，则诸证悉除矣。

白术 黄芩 白芍 当归 芎藭 苏兜 艾绒 木香 缩砂仁

《医案偶存》

张仁锡

孙春洲令媳，怀麟九月，忽下红积，色甚晦瘀，日夜百余次，小溲全无，胸膈烦闷。腹中急痛，腰酸后重，且胎气不和。诸医以为此症升之不可，降之不能，颇难用药，不得已，邀余诊治。余谓春洲曰：

脉浮，舌苔白滑，定属风邪乘入营分，证虽危殆，尚可疗也。用防风炭、炒荆芥、薄荷梗、桔梗、枳壳、当归、楂炭、小生地、荷叶梗，午后煎服。至夜半，遍体微汗，腹痛稍缓，痢亦大减。因即原方去薄荷梗、楂炭，连服二剂，痛止痢除。能进稀粥，再以人参、白术、淡芩、生地炭、阿胶等味，调理数日，而起居如故。逾月，始举一雄。

《清代名医医话精华》

温载之

张方伯之子金门，年三十以外，尚无子嗣。夫人患经停之症，来城就医。金门因谒见邑候李听齐，谈其所以。今日业已延医诊视。云系瘀血停滞，已成痞块，急应攻劫。听齐闻之，骇然问：“药服否？”曰未。遂云：“上年，小妾有恙，医亦云痞块。余未深信，另延温载之复诊，乃云是孕，非痞也。用安胎固气之药。嗣后果生一女。彼时若不细心，岂不大谬。君勿妄服，恐致误事。余可代请载之再为一诊，庶免差失。”于是邀余前往。诊其六脉，微而兼迟，左寸已有结珠之象。余直告之曰：“是孕，非痞。岂可妄攻？乃正气素虚，今又为胎所累，是以精神倦怠，不思饮食，腹时作疼。问天癸已停三月矣。此时急宜健脾固气，以养胎元。若作痞治，其胎必堕，大小俱伤。”金门骇而且疑。服两剂后，精神渐加，即能思食，腹亦不痛。数剂而愈。随回乡庄后果生一子，深为感激。逾二年，犹亲带此子来署申谢此事。若非听齐谏阻，鲜不为医所误。仁人之言，其利深溥，信矣！

《温病浅说温氏医案》

许恩普

京几道徐叔鸿夫人胸胀大痛。世医误以经闭三月，症瘕治之，几危。延余诊视，六脉相等，阳搏阴别，孕兆也。徐公曰：“生过三胎，知无孕。”余曰：“十样胎十样生。年近四旬，血气渐衰，正气不敌，胎气引动，素有肝气，故胀痛。拟以安胎养血、调和肝气之品，请姑服

之。”以手试腹如伏鸡状，即知是胎非病。徐公如约，次早来请，言：“真医也！果胎跳矣。”再拟数服痊愈。至秋举一子，即六少爷也。

《许氏医案》

柳宝诒

钟。重身八月，腰腹俱痛。胎气受伤下坠，已属重候。又加寒热无汗，神倦口渴，左关脉弦数，舌尖绛苔黄。温邪郁伏，颇觉深重。姑先疏透里邪为主。

鲜生地 豆豉同打 苏叶 淡黄芩酒炒 枳实炭 黑山栀 瓜蒌皮 杏仁 广陈皮 茯苓皮 青蒿 竹茹 茅根肉

《柳宝诒医案》

巢渭芳

郑答里郑某某女，适魏村镇刘叔云先生，怀孕七月，少腹右半胀痛，延两旬矣，有某医以转胎治，将孕妇抱卧稚儿所睡之竹床上，左右倩人摇曳之，使小儿不偏郁一边，刘君到家果如法行之，一摇未终，其妇腹中剧痛，汗流号呼欲绝，踌躇间，彼夫回忆所坐馆村郑君丕显，述及情形，并请诊之。而丕显因同设帐北杨村，又以刘之叔丈情关戚谊，转恳渭芳出视。即雇轿到魏镇。先将少腹解衣看之，脐右肿高约半寸，绕及腰际，色尚不红，按之痛不可忍，脉象数大，大便又实，乃胎痈也。遂以炒生军、桃仁、赤芍、大贝母、生草、银花、瓜蒌仁、火麻仁、陈皮、淡昆布、当归、西血珀。刘之堂兄觉，有惧惑意。丕显曰：吾素知渭芳之谨慎仁爱，命投之，两剂肿痛皆退，外敷黄柏炭、芙蓉叶、大黄、银花、生草、大贝。间日再诊，去炒生军加丹皮，调理半月方安。后闻产一男。翁、夫皆谓：“斯症也，其或有渭芳而无丕显，终成画饼矣。”所谓用药如用兵，一令既出，事被掣肘，不败者几希矣。丕显之襄助，用此险方，治此险症，竟成两全。世叹管

仲或有之，而鲍叔难一见也，信夫！

《巢渭芳医话》

何长治

右。胎前温邪内蕴。寒热未已，腹痛便秘；脉涩，舌剥。法以导滞。

苏梗钱半 六曲三钱 枳壳钱半 麦芽三钱 前胡钱半
杏仁三钱 郁金钱半 陈皮八分

《清代名医何鸿舫医案》

邹趾痕

金玉璋者，逊清之文孝廉也。其妇三十七岁，妊娠方七个月，腹中子鸣，自检方书，得妊娠子鸣之治疗方，服之无效。召愚诊视，谓愚曰：“敝内妊娠七个月，腹中子鸣，声闻于腹外，用医书所载方服之而子鸣不愈，是用敬求妙手。”愚问：“子在腹中，焉能鸣乎？”金曰：“确乎能鸣，家中人莫不闻之。”愚曰：“必无是事。”金曰：“医书言之矣。”遂出一书示愚。愚视之，书名《胎产大全》，载有妊娠子鸣证，其书云：“妇人妊娠，不可伸手向高处取物。若伸手过高，儿口中街有血珠，伸手过高血珠脱出儿口，儿啼有声，闻于腹外。治疗之法：散钱于地，令妊妇亲手拾之，血珠复还儿口，子鸣乃愈。”愚览书毕，微哂而言曰：“君既知尊夫人之证为子鸣，书中已有治疗法，胡不依法治疗乎？”金君云：“已经依法治疗无效，是以求趾君妙方。”愚曰：“尊夫人病非子鸣，乃腹鸣也。《伤寒论·太阳一百六十节》曰：伤寒心下痞硬，干噎食臭，胁下有水，腹中雷鸣下利。尊夫人之病，即此病也。”金惊悟曰：“是矣，病人时作呃逆，自言胁下胀满，漉漉有声，自腹中出。今乃知敝内之病为腹鸣，无怪乎以子鸣之法治之无效也。”愚曰：“君以为《胎产大全》一书，够得上医书乎哉？自愚视之，直扣烛为日之瞎说耳。君以为该书所载之子鸣证，实有其证

乎？愚以医圣之道考之，愚敢断定绝无其证。”金曰：“然则此书言之凿凿何也？”愚曰：“饰伪如真，是无识妇孺之惯技，君不闻闾里流传玉皇七女嫁在人间之确凿事实乎？请将此等伪医书，作闾里流传荒唐剧本观，可也。”玉璋摆手曰：“不然，此书颇有至理，不得妄加驳斥如云血珠脱出儿口则啼，血珠复还儿口则啼止，则亦理之不易者也。奚可以与无稽之书一律等观乎？”愚曰：“君以血珠脱出儿口则啼之说，为不易之理乎？不知愚正以其说为不知理也。原夫儿在母腹之生命，是植物法，植根于母之肾脉，以脐带输母之气血，入于胞衣之中，日生月长，以成胎形。既出母腹后，割断脐带，取消植物之生命，别开动物之生命，乃用饮食洩便法也。明得此理，便在儿在母腹不饮食、不洩便，彼伪医书谓儿在母腹口衔血珠，必无此理，绝无此事。而彼医书竟有此说，直谓之不知医之书可耳。”金君乃大觉悟曰：“是矣，今乃知儿在母腹之生命，在脐带，不在血珠也。以脐带输母血以结胎，犹之以瓜藤输地气以结瓜，同一理也。此真不易之理也。假使儿在母腹能饮食，即能洩便，更向何处觅厕所？鄙人受此医书所惑之矣，今乃知污吾目矣。”掷令仆役化之以火，向愚致恭而言曰：“敝内之病，请君主方，敬谨遵服，不敢以私意交易于其间也。”愚于是主以生姜泻心汤，加茯苓、厚朴、枳壳、桔梗，服一剂，呃逆越增。愚察非方不合病，乃病重药轻故耳。仍用前方，生姜、半夏各六钱，外加杏仁三钱。以后视病之进退转移而加减以应之，服六七剂，得大汗，又得大便，而胁下宽舒，呃逆解，腹鸣愈，金君极表感谢。

论曰：天生万物，大概分两类，植根于地者曰植物，离地而动者曰动物。植物之生命在根之吸收土气，故止其根于不移之处。动物之生命在口食五味，故动其身于地之遍处。是故动物之所以能成其动者，必先有受胎时不动之植物生命，而后乃有出胎后能动之动物生命。凡飞走潜之动物，莫不皆然。当其在腹中也，皆以植物法之生命，断不用口衔血珠之生命。彼俗医书谓口衔血珠则不啼，何其

妄也！此种伪书，污玉璋一人之目尤其小也，污我医界圣神宝贵之名誉，乃其大者也。擲令仆役化之以火玉璋诚快人也，趾痕且十倍称快焉。

《圣方治验录》

曹颖甫

丁卯新秋，无锡华宗海之母经停十月，腹不甚大而胀。始由丁医用疏气行血药，即不觉胀满。饮食如常人。经西医考验，则谓腹中有胎，为腐败之物压住，不得长大。欲攻而去之，势必伤胎。宗海邀余赴锡诊之，脉涩不滑，不类妊娠。当晚与丁医商进桃核承气汤，晨起下白物如胶痰。更进抵当汤，下白物更多。胀满悉除，而腹忽大。月余，生一女，母子俱安。孙子云：置之死地而后生，竄其然乎？

《经方实验录》

孔伯华

屠妇，八月二十四日。孕经九月，肝胃不和，脘次疼痛，舌苔厚腻，脉弦滑而实，两关并盛，宜清平摄化兼和中焦。

广藿梗三钱 青竹茹四钱 台乌药三钱 生牡蛎四钱
旋覆花钱半 代赭石钱半 大腹绒钱半 川厚朴钱 炒枳壳钱半
荷梗尺许 知母三钱 橘核三钱 炒香谷芽三钱 炒香稻芽三钱

二诊：八月二十七日。加桑白皮二钱、鲜苇根两。

按：妊娠脘腹疼痛，多属肝胃不和，气机郁阻失畅所致。治则一仍常法，并选用生牡蛎。

桑寄生、杜仲炭、芡实米等以事安摄。

《孔伯华医集》

章成之

姜女。妊娠而见腹痛，已属可虑，腰脊酸楚，小溲短小，尤为可

虑。急当静卧，助以药力，或可弥患于无形。

杜仲 9 克 桑寄生 12 克 熟地 18 克 金毛脊 9 克 川断 9 克
绿升麻 2.4 克 仙鹤草 15 克

赵女。结婚四年，未曾生育，今经停二月，少腹剧痛拒按。曾在某医院诊断谓宫外孕。

当归 18 克 延胡索 9 克 两头尖 9 克 白芍 15 克
小茴香 2.4 克 炙乳香 9 克 炙没药 9 克 炮附块 6 克 丹参 15 克

按：宫外孕用行血逐瘀，佐以温通，法颇可取。

《章次公医案》

胎动不安

薛立斋

鸿胪张淑人痢疾后胎动，心神不安，肢体殊倦，用八珍散二十余剂渐愈。因劳加烦热头痛，以大剂补中益气汤加蔓荆子治之，热痛顿止。仍用前散又五十余剂而安，其后生产甚易。

一妊妇八月胎欲坠如产，卧久稍安，日哺益甚，此气血虚弱，朝用补中益气汤加茯苓、半夏随愈。更以八珍汤调理而安。

一妊妇小腹作痛，其胎不安，气攻左右，或时逆上，小便不利，用小柴胡汤加青皮、山栀，清肝火而愈。后因怒小腹胀满，小便不利，水道重坠，胎仍不安，此亦肝木炽盛所致，用龙胆肝汤一剂，诸症顿愈。乃以四君子加柴胡、升麻，以培脾土而安。

《续名医类案》

孙文垣

张溪亭子室，妊已七月，梦见亡过祖母，挥拳背打一下，即觉胎动不安，血已下，大小便皆急，腰与小腹胀痛者五日，诊之两寸俱短弱，此上焦元气大虚，当骤补之。人参、阿胶、黄耆、白术各二钱，当

归、白术、条芩、杜仲各一钱，砂仁、香附各五分，苧根嫩皮三钱，葱白六钱，一剂而血止。再剂诸症悉除。四剂后减去葱白、苧根、调理旬日，足月产一女。

《续名医类案》

吴孚先

孙氏妇，妊六月作泻，欲小产，诊之曰：此水胎也，四君子加炮姜、制附，十余剂而安。

《续名医类案》

陈三农

一孕妇腰痛甚，如欲小产，用杜仲一两、姜汁拌炒续断一两，二味为丸，白汤下，遂安。

《续名医类案》

薛立斋

一妇，八月胎下坠或动，面体倦，饮食少思，此脾气虚弱，用补中益气汤倍白术，加苏梗，三十余剂而安。产后眩晕，胸满咳嗽，用四物加茯苓、半夏、桔梗而愈。

一妊妇内热晡热，或兼寒热，饮食少思，其胎或下坠或上攻，此肝经血虚而火动耳。先用加味逍遥散数剂，次用六君子加柴胡、枳壳，各数剂而愈。

一妇人每胎三四月作痛欲坠，此为痛胎，用当归二钱，熟地黄三钱而愈。

《续名医类案》

李炳

方廷琥之服真武汤而势始定，其妻忽大呼遍体麻木不知人，腹

中胎上逼，喘促欲笑。或曰：宜投紫苏饮。时三鼓，翁方去，闻此复至。诊良久，曰：非子悬也。病得之悲伤、惊恐，气血虚且乱。治其虚则胎即安。署：熟地黄、白术、炙甘草、当归，重其剂投之而胎果定。

《李翁医记》

许璫

定海巡捕魏小隐夫人，年三十余，前曾有孕四月，因腰疼腹痛，医误认血积，破血殒胎，年余。原医复用前药，致殒。丙戌秋停经四月，腰腹如旧疼痛，乃邀余诊，脉弦虚滑数，尺脉躁动不安。余曰：此胎脉也。问几月矣。曰：将及四月。余曰：脉已离经，胎将堕矣。伊备述前因。余曰：前堕两胎，皆在四月，今届其时，瓜弱蒂脱，又欲堕也。曰：腰腹虽痛。血尚未下。余曰：脉象如此，势必漏下，姑用安胎之法。以四物汤加桑寄生、杜仲、川断、胶艾、砂仁，药未服而血已下。持方来问。余曰：此方正治胎漏，然胎之能保与否，难以预决，而又不得不服。次日下血更多，余复诊之，脉数已减，尺脉稍安。余曰：脉似有根，胎可保矣。渠云：胎即可保，何以下血反多？腰腹仍痛？余曰：此凭脉不凭症也。昨血未下，余断必下者，盖离经之血，自然当下，若只涩之，将来瘀血为患，变症百出矣。已离之血，必当尽下，则未离之血自止。但产期须补一、两月耳。复于前方加参、芪、白术。又服二剂而血始止，胎卒不堕。噫嘻！天下之误药而殒胎者，不知凡几，岂非医之造孽耶？

《清代名医医话精华》

林佩琴

鄞氏。孕七月余，与夫口角，为面杖所伤，左胁大痛，下部如裂，胎气上逼，撑拒欲死。服妇科药，入咽格格不下，喘吼待毙而已。诊之脉洪数无伦，体如烙，面如赭，察其唇舌未变青紫，知胎未损，慰

之曰：幸母子俱无恙也。用牛膝、苏梗、栝蒌、红花各二钱、归尾、枳壳各钱半、降香锉三钱、丹皮一钱。煎服喘止痛定热退，进粥碗许，随用顺气安胎之剂而平。

《类证治裁》

温载之

友人章虚谷之妇，年二十余，怀孕每至三月而堕。此次有娠恰至三月，又复腹痛动红，延余诊视。审其六脉沉迟，四肢酸软。余曰：“此乃元阳不足，中气太虚。腹痛动红乃阴气下坠。急宜温中固气以保胎元。”其人略知医理，深为诧异。遂曰：“昔人云胎前宜凉，黄芩、白术为安胎之圣药。今已动红，想系热灼于中，温药恐非所宜，请申其说，以解疑惑。”余曰：“夫医之一道，不可执一。万病俱有阴阳，胎孕何独不然？子不观夫种苗乎？视地之寒燥以为种植之准，则有用灰粪者，有不用灰粪者。甚至有用牛骨烧灰，石灰插苗，此乃补地气之偏倚也。尊闻六脉沉细，四肢酸软，乃真阳不足之象。胎气不固，因此腹痛动红，名曰胎漏。皆由气不能统之故。若系因热动胎，必然脉现洪数，口渴心烦。此症宜用六君子汤加杜仲、续断、菟丝、姜附以温之。其人疑释，信而服之。次日复诊。欣然告曰：“服君之药，果然痛止红收。今日腹饥思食。今而后方知医乃活法。前此余自用黄芩安胎，反以堕胎。可见，读书要在得间，医道贵辨寒热。”余曰：“君可取陈修园《妇科要旨》熟读，自得其详，余不复赘。”嗣后，并未小产，连举三子矣。矧时当季世阳衰之候，人秉天地之气而生。胎寒者，十之八九；胎热者，十之一二。临症之人，务当详辨。不可以胎前宜凉一语奉为圭臬，则是望嗣者之大幸也。

《温病浅说温氏医案》

沈祖复

毛梓桥下邹姓妇，怀妊六月，七月中旬，腹痛，下红两次。极多。

延陈君诊治，不效。先生诊其脉，并不离经，舌苔白腻。用人参、白术、荷叶蒂、桑寄生、白芍、苏梗、陈皮、砂仁、黄芪等安胎之品，血止，而大便下血块，日二、三次，红紫不一。先生曰：“此肠胃有湿热也。虽与胎漏有别，子怀妊终属不宜。”用槐花炭、川连、黄柏、子芩、木香、苏梗分化湿热、调气之品，便红减而未止。再用槐花炭、地榆炭、子芩、野苳根、鲜藕节、荷蒂、苏梗、砂仁、陈皮、桑寄生、佛手等而愈。

《医验随笔》

方耕霞

李。经居两月余，忽然腹痛经行，业已数日。左右脉颇滑利，大似怀麟之象。

熟地 当归 川芎 黄芪 杜仲 羌活 升麻 陈皮 阿胶
贝母 风茯苓

《倚云轩医话医案集》

费承祖

广东郑宝舟之夫人，怀孕七月，发热有汗不解，已经三候。咳嗽咯血，口渴引饮，舌苔黄腻。右乳生痈，块大如盘，外科敷以药，痛不可忍。自觉胎气下迫，儿足将近产门，有下坠之势。急延余诊，脉来浮洪弦滑。此邪热为痰所遏抑，无从外泄，势必深入，耗气灼营，致生外疡。阳明痰热蕴结已著，痰火交煽，伤及胎元，胎必下坠。夫胎元全赖母气安和，豁痰清热，以泄外邪，治母病正以保胎，舍此别无良法。

川石解三钱 天花粉三钱 银花三钱 连翘一钱五分
生石膏八钱 生甘草五分 薄荷叶一钱 牛蒡子一钱五分
冬桑叶一钱 南沙参四钱 川贝母二钱 钱竹沥四两 鲜芦根四两

二诊：连进二剂，汗出热退，咳嗽咯血已止，乳痈痛减块消，胎

气亦安。惟口干苔黄，溲赤便结。邪热外解，而痰火未清，消烁津液，宣布无权。照前方去牛蒡、薄荷，加甘蔗四两。接服两剂，乳痈结块全消，渴止苔退，溲清便通。照前方去石膏、桑叶、银花、连翘、竹沥、芦根，加麦冬三钱、广皮五分。连服三剂而全愈。

《费绳甫医话医案》

周镇

孙友达室人，住上海。经事一月三次，色紫且黑，易患暗产。近娠二月，恶心欲吐，忽崩成块，阴液大伤，奇经大虚，头晕日花，心悸畏寒，肉眇，少寐，子宫下坠，白带连绵，足软无力，种种虚象。今补其不足，填其漏卮，病愈育麟，仍宜补托也。生地、萸肉、丹皮、首乌、五味、杜仲、川断、当归头、白芍、菟丝、狗脊、功劳、巴戟、合欢皮、阿胶、枣仁、黄芪、柏子、潼沙苑、鳘胶、丝头灰、血余、子芩、二至、天冬、牛角鳃、鹿角、墓头回、百草霜、鸡冠花、黑木耳、金樱、龟板胶、石莲、莲房、白及，研末，用桑椹膏八两，猪脊髓八两，蒸捣，龟板胶二两溶化，和丸如桐子大，晒。早晚各服四钱。一料后，经毕获妊，愈。

蒋耀卿之妻，庚辰春诊：小产后今又经居三月，气滞小腹，腰酸，溲小疼，头痛，白带。奇经已虚，仍恐流产，速宜安胎。必服丸至足月，方可保。照服，竟获一男。大生地、杜仲、川断、山萸肉、归头、白芍、潼蒺藜、牛角鳃、黄芪、蜚壳炭、菟丝、黄精、稻豆、芡实、合欢皮、骨碎补、巴戟、狗脊、白术、故纸、五味、野苳麻根、鳘胶、莲房、研末，龟板胶二两，淮小麦八两，煮糊，为丸如桐子大，晒干，贮。每晨晚餐前各服四钱，盐汤送服。

《周小农医案》

沈绍九

重身五月，脾肾气虚不能载胎，胎动不安，气短神疲，腰痛腰

酸，脉象沉弱，法当益气补肾。

西洋参三钱，另煎兑 炙黄芪三钱 白术三钱 广木香一钱
砂仁一钱 炒白芍三钱 炙甘草一钱 补骨脂四钱 炒杜仲四钱
桑寄生四钱 炒菟丝四钱

《沈绍九医话》

翟竹亭

邑西七里岗李玉琴妻，三十岁禀赋甚弱，怀孕五月，时常有病，最后又患泄泻，饮食日减，胎动不安。某医用凉血安胎之药治之，不只胎不能安，反泄泻加重，腹疼难忍，似有小产之兆。急迎余往治之，诊得六脉极虚细欲脱，此因某医泥于胎前不宜用热之说，以至于此。只知养阴凉血即是安胎之法，而不知孤阴不化之为害；只知有母而不知有父者也。余遂用十全大补汤加减治之，服二帖有效，五帖全瘳。

十全大补汤加减。

党参 15 克 茯苓 15 克 白术 10 克 炙甘草 10 克 当归身 15 克
白芍 12 克 熟地 18 克 油桂 10 克 炮姜 15 克 附子 12 克
炙黄芪 15 克 五味子 10 克 川断 12 克 升麻 6 克 杜仲 10 克
砂仁 6 克 水煎服。

余毗邻潘传国妇，怀孕四月，请某医诊断，某曰：“此是气滞经闭之症，决非孕脉，通经破血药，十剂即可痊愈”。服至四剂而腹疼下坠，饮食大减，头晕目眩，不敢再服，迎余往诊。诊得左关滑数极虚细，两尺重取虽无力亦不绝，孕脉无疑，且男也。倘作病治，恐母子不祥，当急服安胎药，三帖孕妇饮食大进，诸症均瘳。十月胎足，果生一男，今已十八岁矣。

开封曹门内路北，协盛布行伙计，长垣人，伊妻三十六岁，天癸三月不行。请本城第一名医诊断，言是经闭证，非破血通经弗愈，服药二帖，腹疼下坠，适逢余有事往伊号内，恳于决断，诊寸洪关滑，

两尺不绝，真胎妇脉也。左手大于右手，确属男也。令勿药善调养，十月胎足，果产一男，今已十岁矣。笔此，并祈同道君子，倘遇少妇经闭，慎之！慎之！不为过也。

《湖岳村叟医案》

陆正斋

李某某，女，27岁

湿痰内阻气机，脘胁腰部窜痛，呼吸不利，时感恶风，胎动不安。拟顺气安胎，并治客邪。

香苏梗8克 大腹皮8克 带皮苓9克 当归身8克
炒白芍9克 川芎4.5克 春砂仁1.5克 橘皮络各3克 天仙藤8克
制香附6克 桑寄生12克 丝瓜络8克

《陆正斋医疗经验》

章成之

谢女，经居三月，其脉滑。脉滑者，孕象也。所虑不在恶阻，而在腰酸、带下，此为重身者所不应有，有之则须防其流产。

春砂仁2.4克，后下 沉香曲9克 云茯苓9克 陈皮4.5克
乌梅肉7.5克 伏龙肝24克，煎汤代水 五味子4.5克 金毛脊9克
杜仲9克 桑寄生12克

朱女。经停三月有余，数日来带下较多，继以漏红，少腹及腰沉坠。急起直追，犹恐不及。

熟地24克 黄芪12克 续继9克 杜仲9克 阿胶24克烊冲
陈棕炭12克 苎麻根15克 金毛脊12克 仙鹤草15克 升麻3克
牛角腮炭9克

《章次公医案》

叶熙春

施，女，二十九岁。十月。临安。气阴两虚，冲任失固。迹又妊娠三月，漏红旬日未止，腰脊酸楚，小腹下坠，头晕耳鸣，两腿软弱，小便频数，脉细滑无力，舌淡苔白。亟宜气阴两顾之法。

米炒上潞参9克 炒白术5克 清炙黄芪9克 桑寄生9克
炒杜仲12克 川断炭9克 艾绒3克 炒阿胶12克 小蓟炭9克
炙侧柏叶9克 炒菟丝子9克包 大生地18克

二诊：前方服后，漏红已止，小腹下坠，腰脊酸楚均差，小便频数亦减。仍步原意再进。

米炒上潞参9克 炒白术5克 盐水炒菟丝子9克，包
煨狗脊12克 炒川断9克 艾绒2.4克炒 阿胶12克 清炙黄芪9克
炙甘草2.4克 大生地18克 炒杜仲12克 炒陈皮5克

二诊：诸恙悉减，胎气得安，脉亦较前有力，舌淡苔白。续服泰山磐石散，每隔五日进服一剂。

《叶熙春专辑》

胎漏

倪复贞

台中邓公秉修侍宠有娠六阅月，偶下血不止。诸医以为气虚，每日进人参饮，血下更甚。孕妇如风中旋转，诸方家言匪啻胎不可保，即怀者安全亦难。召余诊之，按得左寸沉微而涩，右寸数大而滑，左关微涩，右关浮大，两尺弱甚。因思经曰：女人贵乎血盛气衰，是为从，从则百病不生。血衰气盛是为逆，逆则诸病皆至。今此脉病是气有余血不足，人参乃补气之剂，多服参使气益有余，血益不足矣。丹溪云：气有余便是火。眩晕不能立，火之象也。只以补血药君之，安胎药佐之，眩晕可除而血可止，胎亦可安矣。法用当归头

一两，南芎三钱，熟地三钱，阿胶、白术、黄芩各一钱，水用大茶盂二盅，半浓煎一盅，空心温服。一剂血止半，二剂血止其七，三剂血尽止，而旋晕尽蠲矣。于是子母俱康，因血漏多而胎少滋，怀十二个月，生一男子。明乎气血之虚实，补泻各得其宜，此二命所以克全也。

《两都医案》

程从周

余内子体素孱弱，生育多胎，而小产数次，且一受孕便恶阻不堪，闻谷气以呕，日用诸果品杂物而已。至六、七月上始觉稍定，以故一产一虚，其来非一日矣，因而不敢再望生育。年至四旬，经事忽过期一、两日，恐其是孕，即用通经药二、三剂，绝无响应。由斯不敢再进，姑俟之以待将来。既而果系妊娠。一月上，经事忽尔大行，意谓其孱弱之躯不能复孕，而小产必矣。正惧其坐蓐艰难，若果小产，不幸而幸，且势又不能安，莫若以桃仁、红花、玄胡、归尾破血之剂而逐之。服药一剂而经止矣。予大惊愕曰：“用此药而经反止，岂有命之儿不宜驱逐耶？”复用参芪止血之剂，血反大行，予曰：“此真不可安矣！”再进桃仁、红花之药一、两剂，而血又止。不得已，复用补中之法，血又大行如注者五日。余暗忖曰：“去血如此，胎岂磐石耶？据脉系胎，据症必无有胎之理。然而，胎与不胎，且治病为急。”乃用参术大补之剂，调理半月，渐渐向安。十月足乃得一子，三儿汉标是也。先男女数人皆不足月，独此儿月分既充，禀赋稍异。于理母气大虚，而胎亦宜弱，今反月足而体不同，岂真天意有在焉？吁！吾道中误用行血药一两味，或胎不存，而病家不免归咎于医。若以吾内子观之，则此儿安然无事者，岂人力也哉！书此一则俾吾之同道者，藉以解嘲，二则俾汉标他日有成，庶几知母氏之万状艰难，不独劬劳顾复而已矣！

《程茂先医案》

郑重光

许寥齐太守令眷，中寒痰饮，姜附时服，平素皆然，产后十年不孕。甲申秋自称怀孕，下血，胎脉不现，用补气安胎药三、四剂随止。隔一月，又下血，又如前药，又随止。隔一月，又大便下血甚多，以平常时有之症，不服药而饮灯心汤，又服凉药，不但血不止，更增腹胀不食、头眩身麻、冷痰上壅、大便下迫、不能坐立，诊脉弦细而紧，胎脉不见。余遵《内经》阴络结则血上溢治法，用人参、白术、桂枝、当归、赤芍、炮姜、甘草，少加附子，四剂血随止。即现中寒风疾，胸腹胀大，呕吐痰涎，喘促不能卧，脉更沉小。此证必须姜附，然恐伤胎，而令尊汪闲先翁主持谓：“大人要紧，遑顾其胎，且怀胎四月，三见血下，脉不又旺，姜附素常服惯，竟用无妨。”遂用姜、附、茯苓、半夏、吴萸、橘红，日服三剂颇安而胀呕不减，换生附子连服七剂，始得不胀、不喘、不呕，方改用熟附、炮姜，加参术，胀满然后全消。未儿又气虚似脱，心内怔忡，令人抱按，方能卧，又非痰证怔忡，余暂用人参三钱，归脾汤三、五日，正气虚回，痰饮又发，仍用前剂，但以干姜、熟附，兼用参术，而对夏苓，将一月。年终病退，即不药矣。乙酉之春，因痰咳嗽相招，胎脉始见，腹大有形，至六月大产男胎，产后本日血不下，小便一日夜不通，脉两尺沉迟无力，此产后下焦虚冷，不能小便而病人自云旧年病急，多服姜附，致内热小便不通。余亦不与辨，至更余则腹胀如鼓，直坐于床，不能转动，腹中冷气上冲，彼方知尚属虚冷，向余云：“内热之说误言耳，惟求急救，若迟则痛胀死矣。”其时亦汪闲先翁主持，用附子一两，肉桂、干姜、当归、茯苓各三钱，大铤急煎顿服，少刻腹内肠鸣，尿血大下，至五更方得平卧，后用温补而愈。怀孕服姜桂附子药百剂而不伤胎，产后一夜，服附子一两亦不觉热。此证世不多见，《经》云：有故无殒。其斯之谓欤！

任贤斗

王宗绪之妻，怀孕五六个月，间下血水，此漏胎也。其人食强神健，举动快捷，脉六至有力。夫食强者脾健，神健者气足，脉有力者孕娠最宜，本似无病，何致漏胎？惟举动轻快，乃阳火之象，必有内热，迫血漏下，与四物汤加黄芩、阿胶，七八剂漏止胎安。

凡胎不安者，惟气虚，脾虚者最多，若火热者却少，余经医四十年，因火者只此一个。

《谿山医案》

王孟英

满洲少妇，怀妊漏血。诸医投以补药，漏如故。间或不漏则吐血。延逾两载，腹中渐动，孕已无疑。然血久溢于上下，甚至纳食即吐，多医不能治。孟英诊之，脉滑数有力，是气实而血热也。证不属虚，补药反能助病。愈补愈漏，胎无血荫而不长，其所以不坠者，气分坚实耳。予大剂清营药，血溢遂止。而稀沫频吐，得饮即呕，口渴心中，气短似促。乃用西洋参、麦冬、知母、石斛、枇杷叶、竹茹、柿蒂、生白芍、木瓜、重用乌梅，投之，复杯即安，次日能吃饭矣。

《王氏医案》

林佩琴

汤氏，孕四月，胎漏鲜红，系伤胞络。辄用芩芍芩根汤，转致腹痛泄泻。据脉候虚缓，本非火迫络伤致漏，宜温补弥隙自安。仿胶艾汤，海螺蛸、阿胶、杜仲、茯苓、杞子、艾绒、续断、炙草、砂仁。数服而安。

某氏。过期不产，按月经行，事所或有。今述孕已两载，兼见乳汁腹大不产，计欲攻堕，然细诊却非产脉，须知漏卮不塞，孕何由成。且万无攻坠之理，虽属怪症，应以常法主治，惟明理者知之。方

用熟地、潞参、当归、白芍、白术、炙草、杜仲、杞子、续断、砂仁、广皮、莲、枣，此以气摄血之剂，多服则漏止胎长，接服二十剂，又逾八九月而产。

某氏。经闭成块，疑为瘀，腹痛猝崩。医云：瘀滞未净，用攻消药，淋胀日甚。予谓：瘀血既行，理无作胀。诊脉阳虚而阴搏。知妊娠血漏。用七味阿胶散，加白芍、木香、杜仲、续断，血止胀消，后果孕产。此安胎止漏，兼畅脾摄血，胀痛自除。盖妊娠下血，名曰胎漏，多由闪挫损伤胞络致之。若转用攻伐再动新血，益加虚痛作胀，直至堕胎方悔耳。

《类证治裁》

李铎

壬戌治一妇，年三十八岁，临月骤然血下不止，其老姑以为下胎浆，当临盆也。因其血下过多，胎仍未动，而人事沉困，神气顿夺。召余诊视，脉沉微无力，又捏其手中指节，亦未见跳动，又腰腹并无痛苦，及询其又未伤动，此非果产也，实名海底漏。此由元气大虚，冲脉不摄而营脱于下，急煎大剂参芪鹿茸与服，血遂止，人亦渐安，逾月产一女，母女皆无恙。此证若误用催生下胎药，胎孕一下，产母必顷刻告殒矣。

此证若非吾兄识见超卓，亟投大补元气，十不救一矣。寿山

熊氏妇，年四旬，妊五月。患胎漏下血，医以动胎治，用大补气血安胎药，而血下更多。更医谓非孕，拟调经血之剂，未敢遽进。适余在邻家诊病，邀余脉之。诊得寸口脉滑大，两关皆弦，两尺俱实，此因肝脾二经风邪搏激，挟热而致。盖血得风而流散，挟热则妄行不能归经，强以药补之，乃不胆实实虚虚也。余用疏风清热法数剂，血止胎安。

白术 防风 黄芩炒 桑寄生 续断 蕲艾 当归 白芍

凡胎动，胎漏皆下血，而胎动有腹痛，胎漏无腹痛为异耳。故胎

动宜调气，胎漏宜清热，最宜分辨。若辨证不明，混杂以治，以致药不克专，无有不失。 自记

《医案偶存》

张乃修

穆右。经停五月有余，不时漏下，饮食起居，悉如平人，脉缓微滑。胎漏见象。宜和阴泄热，参以调气。

阿胶珠二钱 粉丹皮二钱 地榆灰二钱 广木香三分
当归灰二钱 炒于术一钱五分 杭白芍酒炒，一钱五分 细子芩一钱五分
鲜荷蒂三枚

二诊。漏下已止，脉缓微滑，起居如平人。良由血热不固，仍以胎漏主治。

细子芩一钱五分 老苏梗一钱五分 缩砂仁后下，五分
川贝母一钱五分 阿胶珠二钱 粉丹皮二钱 细生地四钱
地榆灰二钱 鲜荷蒂三枚 杭白芍酒炒，一钱五分

《张聿青医案》

丁泽周

汪右。怀麟二十月，屡屡漏红，过期不产，此漏胎也。迹因风邪袭肺，形寒头胀，咳嗽则遗溺，本虚标实显然可见，先宜祛风化痰。

炒荆芥一钱 嫩前胡钱半 冬桑叶三钱 光杏仁三钱
象贝母三钱 炙远志一钱 苦桔梗一钱 薄橘红一钱 净蝉衣八分
冬瓜子三钱 荷叶边一圆

许右。腰酸骨楚，漏红已延四五月，时轻时剧，脉象细弱，小便不利，冲任亏损，气化不及州都。宜益气摄血，滋肾通关。

生黄芪三钱 阿胶珠二钱 生地炭三钱 乌贼骨三钱
北沙参米炒，三钱 白归身二钱 厚杜仲三钱 桑寄生三钱
生白术二钱 生白芍二钱 川断肉三钱 黑芝麻三钱

滋肾通关丸包钱半

藏右。怀麟三月，屢屢漏红，肝肾两亏，血室有热也。虑其堕胎，姑宜养血清热，以保胎元。

白归身二钱 大白芍二钱 生地炭三钱 阿胶珠二钱
侧柏炭二钱半 生白术二钱 炒条芩钱半 厚杜仲三钱 川断肉三钱
桑寄生三钱 鲜藕去皮入煎，二两

《丁甘仁医案续编》

魏长春

徐炳昌君，夫人冯氏，年二十七岁。民国二十三年六月二十一日诊。

病名：妊娠虚热。

原因：怀孕三月，阴虚发热，西医误诊为劳，迭治无效。

证候：妊娠胎漏，养胎之血下泄，潮热眩晕，形瘦肢酸，便闭。

诊断：脉象滑疾，舌红。妊娠阴虚发热，经来乃是漏胎，勿疑损证，而致误治。

疗法：育阴清热安胎，仿罗谦甫法。

处方：西归身二钱 生白芍三钱 大生地四钱 秦艽三钱
青蒿二钱 银柴胡二钱 地骨皮三钱 知母三钱 黄芩三钱
瓜蒌皮三钱 天花粉三钱 炙甘草一钱

次诊：六月廿三日。潮热较清，漏血已止，头眩肢倦，腰背酸楚。脉滑，舌红润。宗朱丹溪法，育阴凉血。

次方：知母三钱 川柏三钱 生龟板五钱 大生地五钱
黄芩一钱 西归身二钱 白芍三钱 青蒿梗三钱

三诊：六月廿五日。烦热尚未退尽，腰酸已愈，背脊拘挛。左脉弦滑，右脉缓和，口润。宗叶天士调和肝胃法。

三方：桑叶三钱 苦丁茶三钱 真滁菊三钱 西秦艽三钱
玄参五钱 银柴胡一钱 地骨皮三钱 生白芍三钱 黄芩三钱

生龟板四钱 石决明四钱 左金丸五分吞

四诊：六月廿七日。脉缓，舌红，热退，背似拘挛，头痛，孕妇阴虚血热。再仿罗谦甫法。

四方：玄参五钱 黄芩三钱 炙鳖甲五钱 青蒿三钱 知母三钱
鲜首乌四钱 炙甘草一钱 天花粉四钱 银柴胡二钱 秦艽三钱
地骨皮三钱 瓜蒌皮三钱

效果：病愈，足月分娩。

炳按：妊娠阴虚血热，胎漏，养胎之血下泄，胎失所养，则扰动不安，退热止漏，以固下泄，热退胎安，自无半产之患。

《慈溪魏氏验案类编初集》

汪逢春

董右，二十六岁，五月二十六日。

经居五十余日，忽然见红色淡而少，两脉弦滑，泛呕食少，曾经小产。拟以安和中焦，宜乎静养，毋劳为要。

紫苏叶一钱 四制香附三钱 桑寄生一两 姜竹茹二钱
枯子芩钱五，炒 土炒白术四钱 丝瓜络三钱 左金丸钱五，布包
香砂仁钱五，打 香稻芽四钱

玉液金丹一九，匀两次，药送下。

二诊，五月二十八日。

漏红已止，中心虚弱，胃纳渐开，气逆作暖，左脉弦滑，右细濡。拟再以安和调气。

紫苏叶七分 土炒白术四钱 制半夏二钱 四制香附三钱
枯子芩钱五 香砂仁一钱 桑寄生一两 丝瓜络三钱
左金丸钱五，布包 姜竹茹二钱 香稻芽四钱 抱茯神四钱
深黄连衣桂园二枚

玉液金丹一九，药送下。

《洵庐医案》

胎热

江篁南

一妇，妊娠三月，因闪挫伤胎，腰痛，小腹疼，下血，内有热，用当归、白术、黄芩上，熟地、川芎、防风、砂仁中，艾叶上，香附下（上下之分，即君臣佐使之法），右用水煎服，血止，小腹不痛，去砂仁，又用鸡子黄三个，以酒搅化，煮熟食之，即痊。（《本草》鸡子黄治胎漏）

《名医类案》

堕胎

石山

一妇，长瘦色黄白，性躁急，年三十余，常患堕胎，已七八见矣。诊其脉皆柔软无力，两尺虽浮而弱，不任寻按。曰：此因胎堕太多，气血耗甚，胎无滋养，故频堕。譬之水涸而禾枯，土削而木倒也。况三月、五月，正属少阳火动之时，加以性躁而激发之，故堕多在三、五、七月也，宜用大补汤，去桂，加黄柏、黄芩，煎服，仍用研末蜜丸服之，庶可保生。服半年，胎固而生二子。

《名医类案》

薛立斋

一妊娠五月，服翦红丸而堕，腹中胀痛，服破血之剂，益甚，以后按之商痛。薛曰：此峻药重伤，脾胃受惠。用八珍倍人参、黄芪、半夏、乳香、没药，二剂而痛止，数剂全愈。（痛以手按之，痛、不痛分虚实。立斋以按之痛甚竟作大虚治，非明眼者不能）

一妇素怯弱，四月生女，自乳患疥疮，年余不愈，遂至羸困。五月，勉强执姑丧礼，旬月，每欲眩卧，一日感气，忽患心脾高肿作痛，

手不可按，而呕吐不止，六脉微细之极。医以为脉虽虚而病形则实，误认诸痛不可补气，乃用青皮、香附、吴茱等药而愈。继复患症且堕胎，又投理气行气之剂，病去，元气转脱，再投参芪补剂不应矣，六脉如系欲绝，薛诊云：皆理气之剂，损真之误也。连投参、芪、归、术、附子、姜、桂六剂，间用八味丸，五日眠食渐甘，六脉全复。薛云：心脾疼痛时，即当服此等药，症亦不作矣。

《名医类案》

江篁南

一妇人，堕胎后血不止，食少中满，倦怠烦燥。脉沉大而数，重取渐弦，乃作怒，气伤肝感动胃气。以二陈汤加川芎、白术、砂仁，二十贴而安。

《名医类案》

薛立斋

一妇人堕胎昏愤，不时吐痰，自用养血化痰之剂，昏愤不省，自汗发搐，痰涎涌出，彼以为中风，欲用祛风化痰之剂，薛曰：此属脾气虚寒所致，遂用十全大补汤加炮姜，二十余剂寻愈。

一妇人年二十余，疫疾堕胎，时咳，服清肺解表，喘急不寐。薛谓：脾土虚不能生肺金，药损益甚。先与补中益气加茯苓、半夏、五味、炮姜，四剂渐愈。又与八珍加五味，及十全大补汤，全愈。

《续名医类案》

龚子才

一妇人，每怀孕至三个月必堕，不肯服药。教以四五老母鸡煮汤，人红谷小黄米煮粥食之，不数服而胎固，至足月生男。

方节庵之夫人朱屡受产难，因就医乞堕胎方，服之无效，复求方于专产医郑氏。郑云：堕胎不下，必贵儿也。今后宜服安胎药矣。

一日方闲步，阡陌间见一道人，手携竹筐，坐于桥下，与之语，道气盎然，因设斋留之。到家问筐中何物？曰：此济痲病人丹药也。因授一方，名曰回生救产丹。并劝修合普施。朱夫人诞弥厥月时，服一丸，则果如达矣。遂连生二子，长名鹏，字矫亭。次名凤，字改亭。后一为宫詹，一为御史云。

《续名医类案》

薛立斋

一妇苦于生育，孕及三月，以面粉烧酒调服堕胎，胎去下血不止，呕吐，汤药不纳，六脉细小欲绝，作毒药伤胃气，胃气虚不能司纳，以人参二钱、甘草五分，水煎徐徐与服，呕止用八珍汤，调理而安。

又治一孕妇用前药患前症，胸腹饱满，呕吐不止，用绿豆甘草汤，饮之而安。

一妇怀孕三月而堕，堕后发热自汗，四肢软弱，曰：气血虚不能荣养其胎，故堕。堕后益虚，阴虚则发热，阳虚则自汗，以十全大补汤去桂，加五味子，而安。

《续名医类案》

吴桥

程应兆妻故多病，三月不月，已忽微行，诸医以为积血而力导之，恶乃大至，举身汗溢，垂绝而苏，则又为虚极，而重剂补之。上视反张，惊搐昏冒，饰巾待尽。桥诊之，脉虽离经，按之不绝，曰：此妊娠脉也。误谓积血迫之大行，胎离经面欲下，则血竭而途穷，阳气无阴血可依，则浮腾而上越，胎随阳上逆而触心，故上视反张，惊搐昏冒，法不当死。乃予顺胎散，始进甚艰，既及半而药力行，嗜焉面寐。诸医目桥曰：死矣。桥曰：药中病乃寐，诸公待之。顷之呻吟，始云头痛。诸医以为余烬也，夜分乃终。桥曰：中夜阳生，比当来复，

时至而圉，圉乃少舒，诘朝爽然，俄仆卧内，诸医目摄桥曰：真死矣。桥曰：胎欲下而血垂尽，塞阏不得行，寻以顺胎散下之，则血块大如拱，诸医摄桥曰：吾向固以为积血，果然。桥徐应曰：非积血也，胎也。立引水激而濯之，外紫而中白具人形。病者渐安，诸医乃服。

《续名医类案》

程从周

吕渭源表婢年四十余，面色黄白，形瘦而长，素勤女红，维持家务。二月间，患咳嗽咯红，背胀盗汗，夜卧不宁，邀余诊候。左手寸关二部五至无力，右脉则沉而濡缓，两尺沉微至骨，云是妊娠二月矣。余曰：“脉不似妊，恐经闭耶。”彼谓其生育多胎，可拟是妊，余曰：“前症乃因过劳，有伤心血，火邪侵肺，故令咳嗽而咯红，右脉濡缓良由忧思伤脾，脾虚则盗母气以自养，故令夜卧不安，而盗汗者，亦阴虚而然也。”乃用归脾汤，加天冬、麦冬、浮小麦一撮煎服，二剂盗汗止，而即小产。余始悟，曰：“前日脉不应于两尺者，胞胎脉络已先悬绝于内。今因此药以助新血流动，故胎滑利而下，乃从前方加减，服十余剂而瘳。后因恼怒，仍服前方而愈。又尝诊一妊妇，脉亦不应，越一日即小产，意与此症颇同，故附录之。大都妊脉阴搏阳别，两尺滑而流利，纵禀赋敛小，脉虽沉微，亦自带滑可别。然亦有尺脉沉微而孕者，详论于后。

《程茂先医案》

李用粹

疡科君略曹先生，长君大美内正。日晡潮热，经候不至，治者皆云：血枯经闭，用通经之品，寒热愈甚，呕吐恶心。予诊两手滑利，为结胎之兆，非经闭也。寒热者，乃气血护养胎元，不能滋荣肌肤耳。至五、六月后，胎元已充，气血自盛，则寒热自止。时以予言为谬，延原医调理，仍加破血之剂，忽夜半崩如泉，痛势频，逼下一肉块而形

已成矣，此时尚未得子，悔恨不逮，染成产毒，逾年而卒。

庠生陆符九夫人，系董文敏公之孙女也。怀孕三月，忽崩涌如泉，胎堕而胞息，胀闷昏沉，发热谵语，上视见鬼，面黑流涎已三日矣。此皆瘀血灌满胞中，上掩心肺，故恶证毕现。治法须分先后，用肉桂、归尾、泽兰、香附、红花、牛膝、元胡索煎成，调失笑散去其胞中垢秽，使不上升。继以参、芪、芎、归、肉桂助其传送，庶或有救。如方修服，神志稍清，觉痛阵连腰，恍恍如下坠。将鹅翎探入喉中一呕，而胞下胀闷诸苦若失。

《旧德堂医案》

王三尊

妇人科以四物汤为通套之药，随证加减治之，称家传而贵妥当。殊不知其不然也。缪妇，怀孕两月，值太姑去世，悲泣过度，遂致饮食不进，胎坠痛。予以调脾理气消痰之品治之。年幼不遵调摄，又时着气恼，故不效。往母家就医，医惟治以四物汤兼保胎之药，饮食愈减，血渐下，小腹坠痛愈甚。复回延予诊视，脾胃之脉弱极，然胃口壅塞作呕，以香砂六君子汤加枳、桔开提之。二帖思食，减去积、桔又二帖，饮食大进，下焦痛止，而血小板反下，继下一物，大如鹅卵，内如蛋白状，是知胎已久坏，因胃气痞结，以致下焦气亦不通，故坠痛不下。服此药得胃气运行，而瘀血死胎，有不与之俱下乎？若再服四物保胎等药，予不知其变为何证也。

陈良友妻，每三月堕胎，兹堕双胎。信老姬言：“以胎焙灰酒调服。可永不堕，不令人知，知则不灵”。故家人医生，皆不知也。予诊脉大有力，以为胃有积滞，因产后不敢大克伐，微与消导，不效。后更请吴克宪先生兼治，始言此事，兹后方敢大胆克伐。盖最补有毒之物，兼以双胎之多，济以火煨酒下，其热可知。因痰火不能逐清，年余方愈。郭育材婢，因疟堕胎，亦三月。盖三月堕胎不致大虚，且疟未止，不敢遽补。惟以小柴胡汤兼四物汤加减治之，不效。后

朱体云以附、桂而愈。是知此二证，缘三月堕胎，一虚一实，相悬天壤。

《医权初编》

程文图

召翁夫人怀孕三月，胎动血崩发晕。促往诊视，乃告翁曰：“妊娠胎下血晕，已为重险，今胎未下而晕先见，倘胎下晕脱奈何？”翁嘱立方。予曰：“血脱益气，舍独参汤别无良药。”翁问所需若干？予曰：“数非一两不可。”翁出取参。予闻房内雇妇私语，胎产服参不宜。亟呼之出，语曰：“尔何知，勿妄言以乱人意。”少顷翁持参至，予欲辞回，思适才雇妇所言，恐病人闻之疑而不服，岂不愆事，只得俟之，翁持参汤，予随入房，病人果不肯服，翁无如何。予正色言曰：“性命安危，在此一举，今若不服此汤，胎下晕脱莫救。俗见胎产忌服人参，无非恐其补住恶露。在胎下后，犹或可言，今胎未下，与平常临产无异，岂平常临产可以服参，今昏晕欲脱，反不可服乎？予治此症颇多，勿为旁言所惑。”病人疑释，一饮而罄。予曰：“有此砥柱中流，大势可守，尚防胎下复晕，其参粗再煎与服为妙。”诘朝复诊，翁云：“昨遵谕，仍将参粗煎服。薄暮胎下，恶露无多，晕亦未作。”令多服培养气血之剂而痊。续翁媳升冶兄令政半产，胎下血晕，时值寒冬，晝夜招诊，两脉已脱，面白肢冷，亟以参附汤灌苏。一家两证，势俱危险，皆伏参力保全。胎产不可服参，殊属谬语。

汪心涤兄夫人，体孱多病，怀孕三月，腹痛见血，势欲小产，延予至时，胎已下矣。血来如崩，昏晕汗淋，面白如纸，身冷脉伏。予曰：“事急矣，非参附汤莫挽。”金谓：“用参恐阻恶露。”予曰：“人将死矣，何远虑为。”亟煎参附汤灌之，少苏，旋复晕去，随晕随灌，终夕渐定。续用参、术、耆、草、归、地、枸杞，大剂浓煎，与粥饮肉汁间服，旬日始安。再投归脾汤数十剂乃愈。后张效伊翁夫人证同，亦照此法治验。乾隆甲寅秋，予室人叶孕三月，胎堕血晕，口进参芪十

数两乃定。后仍半产数次，势皆危险，均赖补剂挽回，倘惑于浮议，并殆矣。

《杏轩医案》

王孟英

胎前产后，疑似（之证）极多，号曰专科，尚难措手。陈肖岩孝廉之媳，屠仲如之女也。汛愆一度，次月仍行，方疑其病也。孟英诊曰：尺虽小弱，来去缓和，是娠也。继而果然。

屠仲如令弟子缘之室，经事稍迟，孟英偶诊，亦发妊断，寻验。甫三月，患胎漏，适孟英丁内艰，遂不克保而堕。堕后恶露虽行，而寒热头痛，时或自汗，且觉冷自心中出。医谓类疟，与温化之药，病日甚。交八日，孟英始出门，即延诊之，脉来沉实而数，舌苔紫黯，乃瘀血为患耳。与桃仁、泽兰、山楂、茺蔚、旋覆、红花、丹参、通草、琥珀、蛤壳、丝瓜络之剂，服之，腹痛大减，下瘀血如肺者一枚，次日，诸恙较减，乳汁大流，再以前方去通草，加麦蘖投之，服后仍腹痛，复下瘀块累累，而诸恙若失。

或问曰：先生尝言，产后腹无痛苦者，不可妄行其血。此证恶露已行，腹无痛胀，何以断为瘀阻，而再行其血耶？孟英答曰：正产如瓜熟蒂落，诸经荫胎之血，贯患流通，苟有瘀停，必形痛胀，堕胎如疮痍未熟，强挤其脓，尚有未化之根绊，不能一剂尽出。所以胎虽堕，而诸经荫胎之血，萃而未涣，浅者虽出，深者尚留，况是血旺之躯，加以温升之药，挽其顺流之路，窒其欲出之机，未到腹中，胀痛奚作？吾以循经通络，宣气行瘀之法，导使下行，故出路始通，而后腹痛瘀来，必然有脉可征。非谓凡属堕胎，皆有是证也。

金碗香令媳，半产后，营分不摄，淋漓数月，治之勿瘳。孟英于季夏诊视，两尺皆浮，左寸关弦，与“三甲”、“二至”、“二地”、（青）蒿、（白）薇、柏叶、（海）螵蛸、黄柏为方，服之渐愈。

仲秋，诊其脉，即断（为）受孕，渠谓怀孕，必无病矣。而不知病

久初痊，正须培养，虽即受孕，涵蓄无权，果至仲冬而胎堕矣。

李华甫继室，娠三月而崩，孟英按脉，弦洪而数。予大剂生地、银花、茅根、柏叶、青蒿、白薇、黄芩、续断、驴皮胶、藕节、胎发灰、海螵蛸而安。奈不能安逸，越数日，胎堕复崩。孟英于前方去后六味，加犀角、竹茹、元参为治。

或谓胎前宜凉，产后则否，乃招专科及萧山竹林寺僧治之。咸用温药，且执“暴崩宜补。”服药数剂，虚象日著，时时汗出昏晕，畏闻人声，懒言息微，不食不眠，间有呃忒，崩仍不止，皆束手待毙矣。复邀孟英视之，曰：此执死书以治活病也。夫血因热而崩，胎因崩而堕。岂胎堕之后，热即化为寒乎？参、术、姜、桂、棕灰、五味之类，温补酸涩，既助其热，血亦奔流。又窒其气，津液潜消。至现以上诸证。脉或不知，而苔黄黑燥，岂不见乎？因与犀角、石膏、元参、知母、花粉、竹沥、麦冬、银花、栀子、石斛、旋覆、青蒿、白薇等，大剂投之，神气渐清，旬日后，各恙始平。继去犀角，加生地，服二月，痊愈。

《王氏医案》

林佩琴

魏氏。经止两月，腹胀，食减夜热。医谓经闭，用通利药，血下不止。更医见同，用牛膝、红花、炮姜、枳壳，漏益甚，腹加胀痛，头晕腰疼，烦热不寐。予诊之，觉尺脉搏指，两寸独别，胎脉也。但热久攻伐药多，恐损动胎元，且致胞系不固耳。用香附童便制、白芍炒行气和血以除痛服，蒲黄炒黑、荆芥醋制止血而除晕，杜仲酒炒、阿胶水化、熟地炒固肾以摄下，茯神、麦冬、枣仁炒安神以止烦。一服症减而思食，胎如指堕。前方去白芍、阿胶、蒲黄、麦冬，加查肉、当归醋炒、炙草、莲子，数服乃安。

谢氏。孕逾三月，男女分形，病者漫谓血症，治者误行攻伐，致血下注胎堕，身热汗烦，眩晕不寐。索方乃桃仁、牛膝、莪术、红花等剂，明晨更加生查肉。予见骇甚，询之，则曰胎堕，未便告知。婉云：

瘀血已行耳，医尚未知所下男胎也，因叹庸手杀人，殊堪发指。急以参、芪、茯神，固摄元气，佐以炙草、荆芥醋炒、阿胶烊、麦冬、五味、牡蛎醋煨、龙眼肉、红枣，数服汗收血止。

（类证治裁）

李铎

周炳元之侄女，年二十，适许坊杨某。因热病服硝黄峻攻之剂，遂致堕胎，发热大渴，头痛如裂，眼目昏暗，心腹疼痛，大汗不止，头摇手搐，诊脉浮洪而大，按之空虚，是气血大伤，阴阳两脱之候。急用丹溪产后大补气血法。

酒芪一两 当归三钱 党参八钱 白术五钱 附子五钱，包干姜钱半，炮黑 炒荆芥一钱 甘草一钱炙 安桂心六分 龙眼肉四两同煎，滤浓汁，频频温服。又口渴勿与茶水，只服汤药，或间服童便一小杯对热酒冲服，此真脱证，产后危险之极，倘再投凉药，命在须臾，必无救矣。因证危方峻，恐不敢进，故叮咛若此。

又连进大补气血之剂，昏冒少可，渴止痛缓，汗止热退，逆候差除，足征峻补之验。诊视丝毫不紊，可许无忧。今六脉反见细弱，显属真虚之象，致头摇如眩，目跳如眈，是伤风使然。因产后正气一虚，风邪乘虚而入。又少腹尚有阵痛，必有停瘀未清也。法宜补血祛风，兼佐行瘀。

黄芪炙 当归 川芎 丹参 荆芥炭 天麻煨 白附 钩藤 肉桂 甘草炙

误用硝黄峻攻，以致阴阳两脱，不用大剂补法，亦难挽回，产后气血两虚，误下之不可，误汗之不可，此可为鉴。寿山

《医案偶存》

陈如生

妊娠至三月，最易堕胎，其说已详于前，然能调护如法，胎动无

有不安者。某年月日，余与人治一胎动不安，腹痛见红症，有乙以胎动为气虚，重用党参、术等药。初诊时，余令加入条芩、生地以佐之，服后，痛止胎安。惟血未净，有癸在暗中，以冷语恐主人，谓生地、条芩苦寒不可服，迨复诊时，乙与知癸谋，迎合主人意，专任参术等味，概置地芩不用。余曰：“芩、地属苦寒，然合之参、术，一为两仪膏，一为安胎饮，以寒佐热，以阴济阳，实尽制方之妙。使去芩地而偏用参术，是如有昼无夜，有火无水，有春夏而无秋冬，有风日而无雨露，岂造化补偏救弊之道欤！”余虽力辨，乙固不从，服药后，腹果大胀，血亦大下，盖参、术等药，补气太过，气有余，即是火，火迫血而妄行，西医所谓“有炭气无养气”也，胎由是不安而堕。主人因是咎乙，乙谓戊曰：“我辈被陈修园书所误。”噫！是非古人误今人，直今人诬古人耳！夫古之医书，汗牛充栋，大抵为补偏救弊设也，如伤寒书重发表，所以救不发表之失；温病书重清里，所以救不清里之失。东垣书重补阳，所以救不补阳之失，丹溪书重滋阴，所以救不滋阴之失。而且重发表者，未尝不清里；重清里者，未尝不发表。重补阳者，未尝不滋阴；重滋阴者，未尝不补阳。可合众书为一书，可分一书作众书。默而识之，会而通之，酌而用之，化而裁之，是盖存乎其人。乃俗人祇知取巧，读书不竟，取古人一二笼罩语、别致语，执守以论千变万化之病，是犹胶柱而鼓瑟，坐井而观天，不通甚矣。关尹子曰：“遇微言妙行，慎弗执之。执之者，腹心之疾，无药可疗。然则执一不通者，腹心先成痼疾，不暇自疗，而欲疗人之疾焉？乌乎能？”

《诊余举隅录》

张乃修

卢右。胃痛日久不止，经来淋漓，少腹坠痛，两足酸楚，不能步履。营血不足，营滞未楚。调治不易。

生熟蒲黄 元胡索 茜草炭 乌贼骨 制香附 白蒺藜 全

当归 川断肉 川芎 乌药 降香

服此方后，下血球形如长芋，坠痛乃减，盖小产也。小产亦宜服苦草汤。正蒙附记。

二诊：热势渐退，少腹痛坠亦定。再和营而除陈布新。

当归 川芎 桑寄生 酒炒荆芥 白蒺藜 春朮 丹参 炒川断 茯神 泽兰

三诊：少腹坠痛渐定，营卫渐通，手足酸痛大退。再除陈布新，宣通络坠。

怀牛膝 酒炒荆芥 当归 秦艽 川芎 桑寄生 酒炒红花 川断 丹参 泽兰

四诊：小产仅二旬耳，当风纳凉，视同儿戏。言者淳淳，听者藐藐，岂值头疼身热而已哉。姑以轻剂疏之。

川芎 当归 秦艽 续断 丹参 桑寄生 牛膝 僵蚕 玉竹 苏子 酒炒荆芥

《张聿青医案》

袁焯

癸丑冬月，裕大昌木行。伊君夫人年二十六岁，怀孕三月，骤然腹痛下血，既痛且胀。痛甚则头出冷汗，手冷鼻冷，胸闷呕吐，前后阴皆阻胀不堪。左手脉伏不现，右脉弱小，面色淡黄白而无光彩，舌色淡无苔，此气血虚寒之象，殆由劳力受寒使然。盖中下焦阳气不足，腹部受寒，则血脉流行阻滞而为胀痛；胃脏受寒，则消化停阻而呕吐；子宫之血管破裂则下血。左手脉伏者，血为寒凝，营卫之功用失常度也，右脉弱小者，气血虚寒之本相也。前后阴与腹部阻胀拒按者，血为寒凝，阳气不能运行也。额冷、鼻冷、手冷、面色无神者，亦皆虚寒之本色也。其病殆与伤寒直中阴经无异。特孕妇之病，又兼漏下，与常人异耳。问之，果因送其伯父之殡，夜间操麻雀牌未眠，黎明乘輿登山，饱受风寒，归家即病，拟方以胶艾汤合建中汤

法。当归、地黄各四钱，川芎二钱，阿胶三钱以止血安胎。肉桂八分，制附子一钱五分，桂枝二钱，炒白芍三钱以回阳止痛而散寒邪。砂仁一钱，木香一钱五分以温胃消滞而通阻胀。党参三钱，红枣三枚，生姜三片以扶元气而和营卫。作煎剂服。明日复诊，痛胀均大退，呕吐亦止，能对予发言，亦能进粥，左脉亦现，面色亦较有生气，但下血未止，心内常觉空虚。乃以原方去木香、砂仁、桂枝、川芎，并稍减桂附，改地黄为熟地，而当归亦减用二钱，加枸杞子三钱，茴香二钱，接服三剂，饮食起居，略如平人矣。一月后，始强健，而胎则杳然，盖下血时已随波而堕矣。

《丛桂草堂医案》

周镇

淑仪女，乙亥怀孕三月，元月廿五日因服劳太甚，黄昏小产，血崩至廿六日午犹不止。来电招诊。知曾昏晕，目瞪自汗，肢强。即嘱先服人参末一钱。迨醒，诊：脉虚大而革，舌白无华。血去阴伤，阳无附丽，欲脱。拟扶元振阳，益阴止血。山萸肉一两（甑权止月水不定），甘杞子五钱，当归头醋炒一钱，川断五钱，杜仲四钱，稻豆四钱，冬虫夏草三钱，生地炭三钱，台参条一钱，生於术三钱，潼沙苑三钱，紫石英三钱，泽兰一钱，益母草汤代水（此方煎时，又烦躁冷汗一次）。廿七日晨诊：服药未汗，崩又循止，心神未安，足厥颧红，脉仍大而不敛，脱势犹在。吉林参条一钱，於术三钱，茯苓神三钱，制附片二钱，生芪皮五钱，川断五钱，杜仲四钱，炒枣仁四钱，当归头醋炒一钱，龟甲一两，冬虫夏草三钱，杞子三钱，料豆三钱，丹参钱半，泽兰一钱。服药后如再冷汗，嘱连服二剂。廿八日晨诊：面戴阳减，足厥已暖，脉大略减。疏方参条一钱，芪皮三钱，生於术三钱，当归头一钱，白芍六钱，阿胶三钱，杜仲四钱，龟板一两，川断五钱，炒牛膝三钱，茯苓四钱，炒枣仁四钱，首乌四钱。十剂后，嘱续配十剂，研末，为丸，晒干，每服三钱。竟愈。

朱骥毓之室，丙寅四月，怀娠三月，腹痛见红。逢儒往诊，因脉软弱，进补剂安胎。诿越日自用保产无忧散，内有厚朴、枳壳，服后痛滞一夜。十三日晨即血下如崩，大汗淋漓，畏寒。上午急诊。案云：小产血下如崩，汗多肤冷，脉微苔浊，腹痛不止，恐其虚脱。吉林参条八分，麦冬三钱，五味子八分，生地炭五钱，阿胶三钱，牡蛎一两，龟板七钱，龙骨七钱，冬虫夏草一钱，炒枣仁三钱，甘杞子六钱，山萸肉四钱，乌贼骨三钱，生黄芪三钱。上下午两剂。翌日诊：服药后，汗止肢软，神情转振；惟少腹偏左时或作痛，胞络均伤，下血过多。脉象已起，苔消不加。再益元化浊，兼涤余瘀。潞党参五钱，於术二钱，茯苓三钱，全当归二钱，抚芎一钱，生地炭三钱，金铃子二钱，橘核络一钱，醋炒玄胡三钱，螟胶三钱，制香附三钱，冬虫夏草八分，甘杞子四钱，益母膏三钱冲。十六日逢儒诊：昨夜腹中攻撑，呕吐酸涎，胃纳不旺，少腹微滞，时或作痛，脉软，苔白微消。肝木犯胃，拟和胃肝兼去瘀。金铃子三钱，玄胡三钱醋炒，茯苓三钱，制香附三钱，郁金三钱，绿萼梅八分，全当归三钱，党参五钱，乌药一钱，冬虫夏草七分，甘杞子三钱，野蔷薇花一钱，益母膏二钱。十七日去冬虫、乌药，加白术二钱，扁豆衣五钱，益元散五钱，佛手八分。渐愈。

《周小农医案》

章成之

朱女，流产十余日，经即见，故一月中曾数下，其色紫；无论其下与否，少腹皆痛，其痛游走无定。

延胡索 9克 桃仁 9克 益母草 15克 瞿麦 9克 荆芥穗 4.5克
炒丹皮 9克 全当归 9克 官桂皮 2.4克 炮姜炭 2.4克
来复丹 6克吞

何女。流产后，体力迄今未复，稍疲劳，则有热。予补中益气，呕加健胃剂。

黄芪9克 潞党参9克 云苓9克 陈皮6克 白术9克
升麻3克 当归9克 柴胡3克 姜半夏6克 旋复花12克,包
省头草6克 炙甘草4.5克 生姜二片 大枣五枚。

《章次公医案》

小产

李用粹

李元吉妻,半产后,血崩如注,头晕眼暗,饮食少进,面色青黄,六脉虚大无力,甚至昏晕不苏,一日数次,延予治之。予曰:血脱益气,阳生阴长,《灵枢》之旨也。况阳为阴之使,阴为阳之守。今久患崩中,宜乎几微之时而欲绝,奚能固其内守之阴?所以经流不竭,皆阳气不能卫外故也。若徒事养阴止湿,是人已入井而又投之以石耳。用补中益气汤加五味、艾叶服之,势不稍衰。予思古语云:大虚必挟寒。再以人参一两,熟附一钱煎成呷下。乃熟睡片时,醒来晕减神清,后以养荣汤去肉桂,加附子调理而安。

《旧德堂医案》

郑重光

李子立兄令眷,年三十外,频次半产,产后未及满月,便乘凉食瓜果,中秋夜乘凉,外感风寒,即咳嗽恶寒,呕吐痰水,又当经水大行之后。前医不辨外感风寒,犹用调经养血补剂,见咳嗽益甚,又疑去血过多,阴虚咳嗽,再用麦冬、贝母,以致表邪不解,内冷益深,恶寒发热,汗出咳喘,坐不能卧,吐不能食,腹胀作泻,遍身麻木,筋骨冷疼,自疑必死,促备终事。急迎救疗,脉浮细而紧,余曰:“风寒积冷,表里皆邪,须重剂方解,无足虚也。”以小青龙汤加减,用桂枝、细辛、防风、赤芍、附子、干姜、半夏、茯苓、杏仁、厚朴,二剂得冷汗一身,遂喘定得平卧,如斯八剂,表邪解后,咳喘身痛甫退。旋即里

冷发作，腹痛下痢白脓，转用附子、干姜、肉桂，合胃苓汤八剂，冷积消，胃气本厚，故易效也。

王蔚园兄令眷，山右先生六媳也。怀孕八月，忽下血不止，其胎欲堕，又值秋暑，呕吐非常。医士沈日南，与余同道，主以固气防脱，用大剂参附汤，频灌一夜，服参三两，熟附两许，天明胎堕而产母幸全。惟虚惫之极，脉微似脱，饮食就枕匙进，扬俗产后例不用参。次日不免大减，至第三日忽然床上跳下，满房乱走，或笑或哭，竟似颠狂。而沈医先生，认为瘀血发狂，用芎归汤加童便，煎成将服矣。余适至，急止之，诊其脉散大无伦，面赤气促，不避亲疏，予曰：“前夜血脱于下，今复阳亡于上，不急救瞬息脱矣。此亡阳证也。”仍用前法，以人参五钱，附子二钱，急煎与服，随又一剂方定，令人抬上床，闭目一刻，及醒，前事皆忘。仍复卧床，头不能举，继用参、芪、归、术、炮姜等药，医治七日，忽腹大痛，先泻后痢，红白频下，二便不禁，势更危笃，因询夏月食瓜果否，若曾恣食反果，尚为寒痢，不然，此即五脏之气绝于内，为下脱证，万无生理矣。家人答以日食西瓜，于是告以必须姜附，王兄首允，即用附子理中汤加肉桂、赤芍、茯苓、砂仁，七日痢止，转变呕呃，吐痰眩晕，大便频而溏，不能登桶，全不欲食。盖平素胃冷多痰，元气稍振，本病复萌，其呕吐眩晕，皆痰饮也。屏去血药，专用附子理中汤加茯苓、半夏、天麻、白豆蔻，每剂人参三钱，医治百日，计服人参数斤，床上方能坐，若其狂跳时，倘无灼见，则差之毫厘，便失千里矣。

《素园医案》

陈念祖

小产后奇经八脉交损，气冲，内有结瘀。病已逡巡半载，肌肉消瘦，食人腕腹觉痛，内热咯痰见血。明是产后阴分已虚，阴虚必生内热，经有明训。乃医者误以有形之故，多从瘀血例治，攻之消之清之，纯是一派苦辛。药既无中病情，反致伤及胃气，重犯虚虚之戒，

渐至延成蓐劳。日来食渐减少，气逆心烦尤甚，防其反复增剧，治属棘手之症。拟先两和肝胃为法，俟能加谷，庶几可图。

当归身一钱 紫石英五钱 枸杞子三钱，炒 柏子仁三钱
白茯苓一钱五分 沙苑蒺藜一钱 小茴香七分，炒

《南雅堂医案》

顾金寿

王管氏，硯香令媳。脉见两尺虚数，重按欲又涩而带缓。怀孕六月，肝胃两气举发，致胎坠不固，且前此交三月即坠。今番已六见矣。虽由肝胃不和，湿热久积，实因八脉受伤，肝无血养之故。趁时半产，气血两亏，正可修补亏缺，议养营聚精法，兼顾奇经为治。

炙黄芪一钱五分 归身一钱五分 炒白芍一钱 西党参一钱五分
大熟地五钱，砂仁炒 茯苓三钱 鱼鳔胶二钱，蛤粉炒
沙苑子三钱，盐水炒 阿胶一钱五分，蛤粉炒

又 照前方加龟胶三钱，蛤粉炒，鹿胶三钱，蛤粉炒。

又 调治月余，精神寝食复旧。脉亦渐有起色，肝胃旧疾亦未举发，可以丸药缓调，即照前方加十倍，以猪脊髓十条，煨烂同捣为丸，如桐子大，每空心，开水送三钱。

又 服丸药两月，经期不至，脉象见滑，怀妊之兆，但象有三月半产之症，不可不防，丸药仍服，另用。

白丝毛鸡蛋四十九枚，每蛋用丝棉一张，重重包裹，以苕麻丝缚满，用水煮熟。空心吃一枚，蛋尽而止。

问半产连见六次，前医屡用安胎不效，今服丸未几，即得生女，且连接二男三女，岂前此安胎，俱不得其法欤？曰：女子以奇经为本，虽素有肝胃旧疾，实由肝无血养，胎系不固，故每逢厥阴养胎时，便脘痛胎坠，治者但治其标，未固其本，此半产所以六次也。今趁其气血大虚之候，即进血肉有情以填补空乏，迨受胎两月，即用固胎法，预为提防，自然无碍。即内经不治已病，治未病之法也。若

待腰痛下红，胞系已动，即仙丹恐亦难救矣。

《吴门治验录》

王孟英

张慈斋室，自春间半产后，发热有时，迄于季秋。广服滋阴之药，竟不能愈。其大父陈霭山延孟英诊脉，按之豁然。投以当归补血汤而热退，继以小建中（汤）愈之。

顾氏妇，半产后，因吃饭腕痛。人以为停食也，进以消导。痛甚发热，卧则右胁筋掣难忍。孟英曰：此非发散攻消可疗。与旋覆、丝瓜络、冬瓜子、莲秆、苇茎、竹茹、贝母、枇杷叶、兰叶、通草为方，一剂知，二剂已。

《王氏医案》

方南薰

弟妇洪氏黄昏小产，失血过多，元气将脱，魂不守舍，大呼邪魔相招，家叔亦以为祟。余因尔时乏药，用鹿角切片，酒炒八钱，结洋参切片，米炒四钱；龙眼肉十二枚，煨姜四片，黑大豆一盞，醇酒炒焦，煎汤热服，血止神清。若非消息病情，御之以理，鲜不以为祟矣。

《尚友堂医案》

蒋宝素

郁怒，火起于肝；烦劳，火起于心胞；思虑，火起于脾；悲哀，火起于肺；恐惧，火起于肾。五志过极，皆从火化。火炎水耗，饥嘈求食，自觉烟焰上腾，贯膈冲咽，口糜起泡。火乘阴位，腰下蒸热。值半产去血过多，又复因惊气乱，肝失荣养，血燥化风，头眩如载舟车。时觉憎寒，火极似水。病起客夏，延今一载，现在饥嘈，求食反欲淡素，肌肤反觉充盈，血色不华，又非浮肿。盖胃火炽甚，饮食倍常，肌肤漫长，不得其正，是以似肿非肿。腹中作胀，胸次即舒；胸中

作胀或饥嘈，腹中即畅，此乃惊恐乱气所致。六脉弦数少神。暂以清和中胃，静养三阴，观其进退。

大生地 人参 川黄连 川黄柏 黄芩 云茯苓 炙甘草
制半夏 陈橘皮

清和胃气，静养三阴，已服四剂。饥嘈较减，喉间烟焰渐平，夜来蒸热渐退，血色渐华，眩晕亦轻。水火既济，有机。小便觉热，火从下降；胸次郁闷，热蒸气腾；腰脊髀股憎寒，热极反兼寒化。六脉渐转洪长，乃夏令时脉，最是佳征。药合机宜，原方增损。

大生地 人参 川黄连 黄芩 川黄柏 陈橘皮 紫琥珀
淡竹沥 生姜汁

原方增损，又服二剂。腹中微痛，便泻，痛随泻减，腹内觉宽。此乃热泻，火从下降。心胸嘈杂较前虽减，一日尚有十余次，嘈时能食粥一碗。是症但能由重而轻，自能渐入佳境。脉仍洪数而长，乃夏令本位之脉。服药前此共六剂，已获效机，依方进步可也。

大生地 人参 川黄连 川黄柏 黄芩 陈橘皮 赤茯苓
福泽泻 淡竹沥 生姜汁 金钗一股

依方进步，又服二剂。血色渐华，饥嘈亦减。胸次仍然气闷，热蒸气腾；四肢麻涩不和，荣卫俱虚，二气源头不畅；唇色不红，脾虚不能化血；腹中隐痛，气机不利；食多便少，胃强脾弱；面目浮肿，湿热相乘。仍以两仪三黄为主，加以清气化痰之品。

大生地 人参 川黄连 川黄柏 黄芩 黑山栀 制半夏
陈橘皮 冬白术 淡竹沥 生姜汁 金钗一股

两仪三黄为主，辅以清气化痰之品，共服十有二剂。大火已平，余氛未靖，其余别症，自可徐徐调治。经以心为君主之官，神明出焉；肝为将军之官，谋虑出焉；胆为中正之官，决断出焉；胃为仓廪之官，五味出焉；脾为谏议之官，知周出焉。烦劳伤心，抑郁伤肝，思虑伤脾，因嘈饮食不节则伤胃，因惊气乱则伤胆。情志不治，二气乖违，致病之由本此。宜乎和喜怒，适寒温，省思虑，一精神，辅以药

餌，何恙不已。

大熟地 人参 白茯苓 当归身 冬白术 柏子仁 酸枣仁
远志肉 琥珀

水叠丸。早晚各服三钱，滚水下。

《问斋医案》

汪廷元

程少繇兄令眷小产后，外寒内热，头痛食少，恶露淋漓，不断溲泄，日夜多次，汗出不寐，腰脊酸疼，左脉濡小，而右更软弱。予谓：“心脾内虚，奇经失职，延绵时日，必成瘵劳。察症凭脉，则血病，由于气病，皆中气下陷不能升举其阳也。惟用甘温以补气，气旺则清升浊降，阳生阴长，而诸病皆可愈矣。此李东垣补中益气之识，所以超出群贤也。今即用此汤，加枣仁以宁心，赤石脂以固下，鹿角霜以通奇。三味亦皆甘温补气妙品，可以相得益彰矣。”数服而效，半月复初。

《广陵医案摘要》

张乃修

韦右。小产之后，气血两亏，胃呆少纳，头痛眩晕心悸，腰酸带下。拟补气和营熄肝。

奎党参三钱 炒木瓜皮一钱五分 杭白芍酒炒，一钱五分
厚杜仲三钱 炙甘草三分，酒炒，当归二钱 茯苓神各二钱
生熟谷芽各二钱 黑豆衣三钱 玫瑰花三朵

二诊：甘以益胃，酸以制木，胃纳稍起，心悸眩晕亦减，然带下不止。前法再参固摄。

奎党参三钱 生山药三钱 黑豆衣三钱 炙黑草三分
厚杜仲三钱 炒木瓜皮一钱五分 煅牡蛎五钱 潼沙苑盐水炒，三钱
池菊一钱五分 茯神三钱

三诊：心悸已定，胃纳不馨，带下眩暈。再和中健脾，以退为进。

制半夏一钱五分 范志曲炒一钱五分 陈皮一钱 砂仁五分
莲须一钱 炒山药三钱 炒干术二钱 潼沙苑盐水炒，三钱
资生丸四钱，二次服 煅牡蛎四钱

《张聿青医案》

柳宝诒

盛。时邪郁伏已久，适值小产，血室空虚，脏气震动，蒙陷于里。始则狂谵，继则昏蒙，口噤戴眼，循衣撮空，种种恶候，层见迭出，势已难于挽救。所见之证，大抵在于厥阴。腑垢屡通，而病仍转剧，其邪机深入于脏可知。脉数弦带促，舌光红，鼻煤气逆，阴液伤而肺胃亦被燔灼。姑拟潜熄厥阴，清养肺胃，而化热托邪之意，即寓其中，然亦不过聊尽愚忱，以冀万一之幸而已。

羚羊角 丹皮 白薇 紫丹参 泽兰叶 郁金 西洋参 麦
冬肉 鲜生地洗打去汁，用姜汁拌炒 黑荆芥

另：妇科回生丹一粒，研，和入琥珀屑四分，即用药汁调，冲入童便一杯，服。

二诊：瘀热已化，神识渐清，危病转机，病者之幸也。刻诊脉象软数未净，耳聋面浮，筋节麻木，寐则多梦，脏腑大热虽去，而营中之余热，经络之郁气，岂能一旦肃清？当此大病伤残之候，须清其余热，和其胃气，畅其经络。凡膩补之品，尚难骤进。况偏卧痰多，脾肺之气，胎前久已失调，刻下尤宜照顾。拟清营和胃，佐调脾肺之法。缓缓图复，冀其不致再生波折为幸！

全当归 东白芍 小生地 白薇 丹皮 橘络红各 枯萎皮
桑白皮 郁金 冬瓜子 西洋参 石斛 甜杏仁 夜交藤 竹
二青

《柳宝诒医案》

方耕霞

金。始而疟疾，继而小产，产后寒热接连，及今已涉三候，尚然胸痞渴不多饮，时而恶心，舌腻带灰，脉数无力，此血舍空虚，而湿热之邪留恋太阴、阳明未化也。至于咳无痰，乃挟秋燥使然，际此金囚木将亢，再延防邪犯厥阴而昏厥，姑拟泻心温胆合方，佐以宣化肺邪，慎勿犯下焦耳。

干姜 陈皮 枳壳 杏仁 竹茹 川贝 川连 半夏 茯苓
蔻仁 桑皮 前胡

《倚云轩医话医案集》

张锡纯

天津张姓妇年二十六岁，流产之后胃脘满闷，不能进食。

病因：孕已四月，自觉胃口满闷，倩人以手为之下推，因用力下推至脐，遂至流产。

证候：流产之后，忽觉气血上涌充塞胃口，三日之间分毫不能进食。动则作喘，头目眩晕，心中怔忡，脉象微弱，两尺无根。

诊断：此证因流产后下焦暴虚，肾气不能固摄冲气，遂因之上冲。夫冲脉原上隶阳明胃府，其气上冲胃气即不能下降胃气以息息下行为顺，是以胃中胀满，不能进食。治此等证者，若用开破之药开之，胀满去而其人或至于虚脱。宜投以峻补之剂，更用重镇之药辅之以引之下行，则上之郁开而下焦之虚亦即受此补剂之培养矣。

处 方：大潞参四钱 生赭石一两，轧细 生怀山药一两
熟怀地黄一两 玄参八钱 净萸肉八钱 紫苏子三钱，炒捣
生麦芽三钱

共煎汤一大盅，分两次温服下。

方解：按方中用生麦芽，非取其化食消胀也。诚以人之肝气宜升，胃气宜降，凡用重剂降胃，必须少用升肝之药佐之，以防其肝气

不舒。麦芽生用原善舒肝，况其性能补益胃中酸汁，兼为化食消胀之妙品乎。

效果：将药煎服一剂，胃中豁然顿开，能进饮食，又连服两剂，喘与怔忡皆愈。

《医学衷中参西录》

陈莲舫

南翔，某。小产后气阴未复，肢楚气怯，腰部酸软，脉见濡细，治以和养。

制香附 炒当归 炒丹参 川杜仲 法半夏 甘草梢 青黛
拌灯芯 炒冬术 生白芍 菟丝子 沙苑子 广陈皮

《莲舫秘旨》

袁焯

王姓妇小产后，心慌不寐，发热恶寒，头晕汗多，口干，舌苔少，舌尖破皮，脉息虚数，此临产时去血过多，气血两虚之象。盖阳虚则恶寒，阴虚则发热，阴阳俱虚，则恶寒发热也。问之，果下血三日而胎始堕，胎堕时，又极艰苦，晕厥数次，而体质又瘦弱。遂以补养气血，安神敛汗之方，一剂而安寐汗收，寒热俱退，能起床行立，进粥半碗，一剂而痊愈矣。方用熟地、阿胶、麦冬、牡蛎、枣仁、茯神各三钱，干地黄四钱，黄芪二钱，红枣三枚水煎。

《丛桂草堂医案》

陈在山

孙保如之内人，患小产，脉沉细而微，不食腹满，腰膝疼痛，曾记今春患肝瘀脾虚等证，经余治愈，今又小产，气血大伤，虚寒显露矣，趁此产后之际，重温补为要。

西参 焦术 当归 香附 陈皮 川芎 茯神 炙草 熟地

莲子 川续断 砂仁 川膝 坤草 引元酒

内人服前方数剂，颇见功效，虽腰膝有时作痛，较前亦轻，仍以前方如减，配丸药一料，缓缓服之，必获大效。

人参 皮苓 茅术 当归 炙草 川芎 杜仲 木瓜 牛膝
坤草 元胡 橘皮 川断 南茴 乌药 熟地 黄芪 山药
厚朴 香附 共面蜜丸，三钱、每元酒送下

《云深处医案》

魏长春

张阿林之妻，年四十三岁。九月四日初诊。

病名：半产蓐劳。

原因：半产三次，冲任早已受伤，血液空虚，内风因之旋动。

证候：头眩耳鸣，月事先期，来且甚多，脱脘胃呆，盗汗不寐，营卫失调，洒渐寒热。

诊断：脉象细弱，舌色淡红。证系半产之后，阴血亏耗，加以情志抑郁，肝胆之气化火，虚中挟实之证也。

疗法：用养营和血，纳气潜阳法。

处方：当归三钱 白芍三钱 大生地炭三钱 黄菊花二钱
女贞子三钱 枣仁三钱 炙桂枝五分 焦甘草一钱 血余炭三钱
炙龟板四钱 丹参二钱

次诊：九月六日。脉象细弱，舌红苔黄。营虚血热，寒热，口干，胃呆。拟清厥阴阳明。

次方：桑叶二钱 稻豆衣三钱 柴胡一钱 茯苓一钱 枳壳一钱
炒白芍三钱 泽泻三钱 青蒿二钱 焦甘草一钱 当归三钱
通草八分

三诊：九月八日。寒热虽止，胃呆不寐，脉细，舌红苔黄糙。虚中挟实，肝胃未和，阴虚内热，治宜柔肝和胃。

三方：桑叶二钱 稻豆衣三钱 黄菊花二钱 钩藤三钱

茯神四钱 川连三分 北秫米三钱 橘白一钱 制半夏三钱
焦甘草一钱 夜交藤四钱

四诊：九月十日。寒热止后，胃苏胸畅，夜寐得安，身力渐健。脉细，舌红苔化。肝胆风火已平，肠胃宿滞亦清，用养血和中善后。

四方：西归身三钱 炒白芍三钱 茯神四钱 焦甘草一钱
夜交藤三钱 黄菊二钱 桑叶二钱 川芎一钱 制半夏二钱
北秫米三钱 炙龟板四钱 川石斛二钱

效果：服调理方，病愈身健。

炳按：半产后，营虚成劳，宜调养营卫，健运脾胃，俾有复原机会。

《慈溪魏氏验案类编初集》

沈绍九

妊娠四月流产，失血过多，气血大亏，头晕，气短，心悸，自汗，腰疼，腹痛，面色苍白，两脉微弱，有气随血脱之虞，急于益气摄血。

西洋参五钱，另煎兑 炙黄芪五钱 白术三钱 炮干姜二钱
炙甘草一钱 桂圆肉三钱 陈艾炭二钱 茯神三钱 炒枣仁三钱
杜仲四钱 补骨脂四钱 龙骨四钱

《沈绍九医话》

周镇

秦某之妻，马山。丁巳秋因跌仆半产，延至十一月，已百日矣。小腹痛，溲淋便艰，纳食亦呆。此因瘀滞凝塞子宫，气机亦滞。全当归、金铃子、玄胡、小茴、乌药、乳香、牛膝、蒲黄、五灵脂、两头尖、山甲片、刘寄奴。另用血竭、琥珀、没药，研服。二剂，小腹板滞已松，痛犹未退，溲淋仍滞，脉甚细涩。瘀滞阻塞，水道不通。复拟全当归、抚芎、玄胡、蒲黄、五灵脂、枫果、木通、乳香、橘络、红花、桃仁、花蕊石、琥珀、没药、甲片。另润肠丸。二便渐通，小腹痛偏于左，溺尚不

爽。复用归尾、蓬术、赤芍、橘核、玄胡、炙乳没、蒲黄、鼠矢、乌药、川楝、鸡血藤、海金沙、石韦。渐愈。

陈阿根，舆业，子福，媳孙氏，廿岁，住慧山要货公所。新婚后怀孕八月，己未正月五日，与夫归宁，酒饭竹战后返家。半夜寒战，陡呼腹内剧痛，口涌痰沫，继即人事不知，遂即小产，恶露不多，目闭，口噤咬牙，两手狂动，气逆痰上而至晕厥。其家以病起于骤，疑鬼祟也，进巫延道禳祷，不减；延医进至宝丹、竹沥等，无效。五日内厥去三次，撤帐含银，尸寝三日，将入木矣。因犹未气绝，其父痛女情深，初十晨来延急诊，往则见殓衣着身，脉沉不起，右部更微，舌淡红，面灰白，肢厥，两手劲而自举，目闭痰涌。谛思病因，瞥见床之右有隙孔，寸许阔而三尺长。询其夫病夜曾否入房，不应，经其友再四详问乃得。是寒邪由子宫而入厥阴，痉挛腹痛，胎堕以之。口噤咬牙，风痰上涌，瘀血停阻，气塞肝横，痉厥不醒，危险已极。勉拟桂枝、防风、僵蚕、川芎、钩藤、天麻、赤芍神、菖蒲、全当归、泽兰、五灵脂、蒲黄、鼠矢、鬼箭羽，用益母草、苏木，煎代水。另西血珀、荆芥、血竭、没药，研细，参须汤调灌。外治用雄鸽剖开，麝香一分放病者脐内，将鸽覆盖，布扎。三时许，产妇腹热觉痛，有呻吟声。其父俯而细察，闻腹中攻动。其家以病者难过，揭而去之。得此寒邪提出，转回阳分。煎未续进，涌吐痰涎半盅，并下恶露，神识陡省，目珠活动。翌晨已初，即招呼父坐，手足转暖，无力举物，微有咳嗽。问腹中犹痛。因风卧三日，迨醒即悬帐矣。十一日复诊：神识已省，手狂举已定，沃吐痰涎，微咳，腹痛，恶露大爽，脉沉已起。寒邪内袭，动肝犯心，与平常产恙大异，势虽挽回，尚宜温通化瘀。旋复、前胡、荆芥、细辛、独活、乌贼骨、当归、赤白芍、抚芎、僵蚕、玄胡、鼠矢、灵脂。另血珀、没药、血竭，研服。并嘱备麝、鸽剖而重覆。厥去五日，得庆更生，将养数旬而健。越一年，又生育矣。

张右，典桥头。丙辰季夏小产之后，不时淋漓腹痛。病经月余，久沥精血防竭。当归身、白芍、香附、乌药、金铃炭、黑山栀、百草霜、

生地炭、左牡蛎、丹皮炭、泽兰、震灵丹。数剂、淋漓即止。

孙云，青山湾山户。其妻三十余岁，已育六胎。壬戌六月诊：天暑且旱，所饮山涧，伏热挟积，蕴于胃肠，兼症肝气撑胀。怀妊七月，白痢日夜八十次，临圉后重，胎气动甚，腰部作酸，通宵不寐。脉数如沸，苔黄口燥（询知曾饮大烟过笼水）。湿热积滞闭塞，后重，子宫亦滞，深恐流产。益元散三钱荷叶包，扁豆花三钱，银花五钱，归身五钱，白芍五钱，石斛三钱，白头翁三钱，黄柏二钱，芥菜花一钱，黄芩二钱，山楂二钱赤沙糖炒炭，生於术二钱，贯仲四钱，荷蒂五枚。用野苳麻根二两，煎代水。香连丸钱半、苦参子五十粒取不碎者，用冰糖汤送服（因病者腰酸神乏，日夜下床八十次，必致小产。故嘱卧而便解，不可下床。下积用润导，不用攻伐）。复诊：服药后便粪较白痢为多，腰酸畏烦，里热易汗，肛灼溲热，下积极秽。热毒深沉，兼挟肝气撑胀，妊娠患此，势属重险。白头翁五钱，秦皮一钱，黄柏二钱，银花五钱，扁豆花三钱，大青八分，归身四钱，白芍五钱，续断五钱，石斛四钱，於术三钱，子芩二钱，川楝二钱，防风根七分。另备山黄土二两包、野苳麻根一两，煎代水。香连丸二钱加苦参子不碎者五十粒，冰糖汤吞服。又伽楠香八厘、上雄黄一分，鸡内金一具，研末冲服。三诊：下痢便秘为多，次数已减，右脉极濡，左脉尚形数疾，腰酸气滞即痢，烘热口燥。暑热积滞连阻，气阴均伤，有流产虚脱之险。再扶元达邪，清热化积，兼和肝气。鲜石斛七钱，北沙参五钱，地榆三钱，桑寄生五钱，竹茹三钱，金铃子炭三钱，子芩三钱，鲜青蒿五钱，白头翁五钱，白芍五钱，秦皮一钱，银花一两，黄柏三钱。另葶苈一两，山黄土四两，野苳麻根二两，煎代水。另香连丸钱半，苦参子五十粒，冰糖汤下。清晨另服山梔仁末二钱，冰糖汤调服。四诊：子痢大减，白腻已少，便解秽臭已轻，口渴腰酸均觉减轻，得酣寐后形神亦振，脉左数疾亦减。虚体伏热挟积未撤，还宜慎旃。鲜石斛五钱，知母三钱，花粉三钱，竹茹三钱，桑寄生五钱，丝瓜络五钱，白槿花二钱，白头翁五钱，秦皮一钱，白芍五钱，金铃子三钱，黄柏三钱，黄芩二钱，白薇二钱。外用

陈关蛇二两，野苧麻根二两，山黄土三两，律草一两，煎代水。香连丸钱半，苦参子五十粒，冰糖汤送服。翌晨另服黑山梔木二钱，荷蒂壳四钱，研末，冰糖汤下。痢日夜仅数次，乡人以为大幸，辍药不延医，迟延月余，流产，服三剂调理而康。

秦顺金之妻，寓惠山至德祠。癸亥三月廿八日诊：不时身热，由于怀胎未足月即产，产后五旬，咳热屡作，羸瘦腹痛。脉弦数，苔薄。藏阴不足，肝火刑金，募劳之证。紫菀、百部、粉沙参、黛蛤散、甜杏仁、象川贝母、白芍、黑山梔、银柴胡、白薇、瓜瓣、金铃子、天竹子。服数剂，身热较减，即疏丸方服之而愈。丸方案云：不时身热，怀胎未足月即产，产后屡热，咳逆呕吐，腹痛，得吐乃减，夜则足腓转筋。经事产后经年方行者，二月即行，淋漓腰酸，面浮足肿。脉象有热时弦数，无热时虚。良由久热伤阴，气郁动肝，冲逆为吐，伤脾则肿。拟敛肝纳冲，大补黄庭出入。潞党参二两，怀山药三两，芡实肉二两，干河车一具，制香附一两，木瓜皮一两，山萸肉二两，獭肝二两，杞子二两，麦冬二两，银柴胡一两，当归头二两，青蛤散二两，黄荆子一两，乌贼骨二两，乌梅五钱，五加皮一两，研末，四仪膏八两溶化为丸，如绿豆大。每服四钱，晨晚餐前盐汤下。

《周小农医案》

章成之

季女。据其症候十之八、九是小产；少腹右侧作痛，凡痛多是子宫粘膜有胎盘残余瘀着，当排而去之。

生蒲黄 12 克 粉丹皮 9 克 苏木 9 克 藏红花 3 克，另煎冲
五灵脂 9 克 赤芍 9 克 生茜草 9 克 制首乌 9 克 川芎 6 克
全当归 9 克 炙乳没各 9 克

二诊：再予胶红饮加味以通之。

阿胶珠 15 克 藏红花 3 克 蒲黄 12 克，半生半炒 小蓟 12 克

茜草 9 克 干地黄 18 克 当归 6 克 冬瓜仁 30 克 藕节 12 克

《章次公医案》

张汝伟

吴右，年二十六，无锡。怀麟五月，有故而堕。既感气郁，复受风寒，频进通瘀，致伤营血，肝不条达，咽中如有炙脔，吞之不下，吐之不出。涎多泛酸，胃呆口苦，绕脐腹痛。苔腻，脉弦硬无情，夜不安眠，神情销削，便坚溲黄，已成损证之象。宜先柔肝解郁，理气化痰，泄热安神治之。勿拘于通瘀养血。

竹半夏 大腹皮各二钱 生香附 广郁金 新会皮
姜竹茹各钱半 生枣仁 茯苓神辰砂拌 山梔仁 地枯萝 猪赤苓
砂翘心各钱半 小川连三分 北秫米包 紫石英各四钱
生蛤壳八钱，先煎

二诊：肝肺不和，痰气阻滞，进解郁理气，化痰泄热之法后，咽中炙脔已化，微觉梗梗，咳窒，痰吐其坚，大便更而极少，小溲短赤，腹中鸣鸣作响，气从上逆。仍宜宣肺疏肝，养阴清热，兼化痰理气之品治之。

原金斛先煎 天花粉 光杏仁 川贝母 肥知母 炒萎仁
鲜荷叶筋各三钱 鲜沙参 真珠母先煎 石决明先煎，各六钱 橘白络
佩兰梗 鲜竹茹 线瓜络各钱半

本证始末：此大中华橡胶厂吴正麟之爱人，已诊治月余，无效。神情销削，气短音低，有八损之象。上列二方服后，诸恙渐平，調理一月，共诊七次，完全健康。此为产后症之特辟蹊径治法。

方义说明：按证中，有咽中有如炙脔，吞之不下，吐之不出，似乎如梅核气。宜四七越鞠逍遥等法。今因痰多泛酸，胃呆口苦，知属于痰热。绕脐腹痛，夜不安眠，知属于有滞。而心脾之阴不和，故用半夏、秫米，以和阴阳之枢纽。枣仁、川连，以安神宁心。腹皮、枯萝以化滞。其余用香附、郁金以理气，茯苓、陈皮以化湿。妙在用石

英、蛤壳，温凉平降，佐以山栀、翘心以清心热，有如乱丝一把，徐徐地分头顺解。第二方，注重清热化痰，热清则痰不生，痰少则阴自复，真不必养血化瘀之刻板死法也。

《临症一得》

滑胎

王九峰

胎元本于气血，盛则胎旺，虚则胎怯。气主生胎，血主成胎。气血并调则胎固，气血偏盛则胎堕。曾经半产五次。俱在三月之间。二月手少阴心包络司胎。心主一名膻中，为阳气之海。阳气者，若天与日，离照当空，化生万物，故化生着于神明，长养由于阳土。君火以明，相火以位，天非此火不能生长万物，人非此火不能生长胎元。人与天地相参，日月相应，天一生理也。俱此火平则为恩，亢则有害。胎三月则堕。正属离火暴甚，阴液耗虚。木失滋营，势必焦悴，譬如久旱，赤日凭空，泉源干涸，林木枯槁，安能不堕？脉来滑数无神，证是咽干舌绛。法当壮水之主以制阳光。

生地 冬术 黄芩 龟板 甘草 归身 川断 杜仲 元参
知母 沙参 白芍 煎膏

《王九峰医案》

林佩琴

陆氏。孕五月屡堕，翁商之，予谓孕逢五月，足太阴脉养胎，想脾血素亏耳。若获孕，先二三月预服固摄之剂。用胎元饮，参、苓、术、草、地、芍、归、陈、杜仲、续断、砂仁、菟丝、芡实、姜、枣，水煎，每月服五七剂。胎遂固，生一子，仅绵一线，后竟不孕。

《类证治裁》

许愿普

李实之太史放甘肃主考时，夫人住京，系宋相国之孙女，湖北廉访之女，内阁章京伯平之妹。产后病剧，延余诊视，脉沉细，四肢拘挛痿痹，溺黑。知受风寒化热为痹，拟以独活寄生汤加减，见效，断为加减数服而愈。朱即请，以夫人小产数胎为忧。余诊视，脉沉无力，气血两虚。拟以泰山盘石散、千金保胎丸合参，令有孕时服三十剂。果胎安矣，连举二子。

《许氏医案》

余听鸿

余在师处见一施姓妇，年未三旬，每受妊至三月，即小产，已经三次。是年受妊近三月，恐其又滑，就诊吾师。此妇面色桃白，而略兼青色，口淡不渴，饮食不能克化，脉细濡面形寒。吾师进以附桂八味汤，服十余剂，面色稍红，饮食稍进。谓其夫曰：不必服药，惟每日服附桂八味丸三钱，服至临产，自然母子俱安。后果无恙。余问师曰：方书所载，胎前忌热，产后忌凉，胎前忌泄，产后忌补，何以此妇胎前反多服热药。师曰：譬如瓜果结实，贵在天气之温和。人之养胎，亦贵阴阳调和。人之体热火旺而滑胎者，如瓜果方结，曝日亢旱，雨露少滋，自然叶萎而果落，故宜用凉药以润之，使热去而果自可保。寒体滑胎，如花后结果，阴雨日久，天气寒凉，无阳和之气，果亦不克长成，故服热药，使其阳气舒发，阴寒去而果乃可保。若拘于成书治病，即无从下手矣。况安胎本无成方，热者清之，寒者温之，气血不足者固之补之，气血有余者，理之和之，所谓大匠诲人，能与人规矩，不能使人巧也。

《余听鸿医案》

吴鞠通

范氏，二十八岁。每殒胎必三月，肝虚而热也。已殒过三次。考古法用桑寄生汤，按寄生汤内用人参五钱，又非二、三帖所能保，况业已见红，即人参其便，亦不能定其必可以保，况力不足者多，能用参者少；且寄生未定其桑也，柳寄生亦复不少，药不真焉能见效。内经谓“上工治未病”，何若于未孕未殒之前，先用药为妙，故用专翕大生膏一料，计二十四斤，每日服一两，分早中晚三次，一料尽，又受孕，自二百四十天仍旧不保。其夫来报，余甚惭愧，自以为计之不善也。其夫云：“不然，前次之殒，滑不可解，若不知者然；此次之殒，宛如大生，艰难万状，是药力已到而未足其补之量也，皆久滑难补之故。望先生为加减，急急再做一料，乘月内服起，必可大生也。”于是照前方加重分量，共计生料八十斤，外加嫩麋茸二斤，作细末和膏内，得干丸药三十斤。以后连生四五胎，无一小产者。

专翕大生膏酸甘咸法

人参二斤，无力者以制洋参代之 熟地黄三斤 杞子炒黑，一斤
白芍二斤 沙蒺藜一斤 牡蛎一斤 伏苓二斤 五味子半斤
海参刺大者，二斤 麦冬不去心，二斤 乌骨鸡雌雄一对 鲍鱼二斤
龟板另熬胶，一斤 猪脊髓一斤 莲子湖南，二斤 鳖甲另熬胶，一斤
羊腰子八对 芡实三斤 阿胶二斤 鸡子黄去白，二十圆 白蜜一斤
右药分四铜锅，忌铁器搅，用桐杓 以有情归有情者二，无情归无情者二，文火细炼三昼夜，去渣再熬六昼夜，陆续合为一锅，煎炼成膏，未下三胶合蜜和匀，以方中有粉无汁之茯苓、白芍、莲子、芡实为末，合膏为丸。每服二钱，渐加至三钱，日三服，一日一两，期年为度。每殒胎必三月，肝虚而热者加天冬一斤同熬膏，再加鹿茸二十四两为末。本方以阴生于八、咸于七，故用三七二十一之奇方守阴也；加方用阳生于七、咸于八，三八二十四之偶方以生胎之阳也。古法通方多用偶，守方多用奇，阴阳互也。或加桑寄生一斤。方论：夫干其动也直，其静也专，是以大生焉；夫坤

其动也辟，其静也翕，是以广生焉。此方法乾坤之静，取静以制动之义，专治阳极而亢、阴衰而躁，如产后血虚郁冒，自汗出，大便难，瘵痼（俗名惊风），每殒胎必三月，温热误下误汗，邪退后阴之所存无几，一切阴虚而阳不损之症，荟萃三阴柔药，半用血肉有情蠕动而不呆板之物，养阴最速，接其生气，而以收藏纳缩之少阴为主。盖阳主开，阴主闭，故从来治肾以大封大固为主，经云“肾为封藏之本”。兼湿、燥、寒三项阴邪之病者禁用。

《吴鞠通医案》

覆竹亭

阳圉集士人潘姓妻，二十八岁小产。一连四胎，又怀胎三月，惟恐小产，就余诊治。诊得肝肾二脉濡细无力，古云“肝为血脏，肾主胞胎”。二脏虚亏，胎赖何养？遂用大补肝肾之品，每月服三剂，至十月胎满，果产一男，今已十岁余。方开于后

熟地 18 克 山药 15 克 茯苓 12 克 丹皮 10 克 山萸肉 10 克
泽泻 6 克 当归 10 克 白芍 12 克 川芎 10 克 砂仁 6 克 杜仲 10 克
白术 10 克 香附 10 克 川断 10 克 炙甘草 6 克
水煎服。

《湖岳村叟医案》

子瘕

雷丰

三湘喻某之内，孕经七月，忽受燥气，咳嗽音嘶。前医贸贸，不询月数，方内遂批为子瘕，竟忘却《内经》有“妇人重身，九月而暗”一段。医者如此，未免为识者所讥，观其方案，庞杂之至，所以罔效。丰诊其脉，弦滑而来，斯时肺经司胎，咳逆音哑，显系肺金被燥气所侵之证。宜辛凉解表法去蝉衣、淡豉，加桑叶、菊花，橄榄为引，连尝

三服，音扬咳止矣。

《时病论》

魏长春

秦端甫君夫人，年约三十余岁。三月九日初诊。

病名：妊娠肺热音哑。

原因：素体火旺，怀孕八月，感寒化热。

证候：音哑内热，口燥干咳不爽。

诊断：脉象弦滑，舌红苔薄，客寒包火，热壅肺闭证也。

疗法：用麻杏膏甘汤加味，开肺润燥化痰。

处方：炙麻黄五分 苦杏仁三钱 生石膏五钱 炙甘草一钱
淡竹沥一两冲 射干二钱 马兜铃二钱 瓜蒌皮三钱 玄参五钱

次诊：三月十一日。音哑，干咳无痰，脉滑，舌红苔黄。肺系胶痰壅寒，热闭音哑，宜用开透。

次方：射干二钱 马兜铃三钱 玄参五钱 生甘草一钱
瓜蒌皮五钱 苦杏仁二钱 川贝一钱半 黄芩三钱 知母三钱
西藏青果一钱 天花粉三钱

三诊：三月十三日。脉滑，舌红润。咽润，咳痰，音开，病见差。仍宗前意清宣之。

三方：西藏青果一钱 玄参五钱 瓜蒌皮五钱 生甘草一钱
柿露四钱 玉蝴蝶五对 原麦冬三钱 制半夏三钱 紫苑三钱
叭杏仁三钱 冬瓜子三钱

效果：音开咳愈。

炳按：妊娠音哑，宜即清肺热顺气，以安胎元也。

《慈溪魏氏验案类编初集》

子嗽

郑重光

曹启心兄如君，生育多胎，体质虚弱，有脑寒鼻塞流涕之证。怀孕七月，先咳嗽，前医不谙，以流涕为伤风，误用发散，因虚愈咳，咳甚则吐食；又以为胃寒，用六君子汤加炮姜，服之愈甚。继召余治，脉弦数六至，胎脉固当数，然不滑数而弦数，此必阴血大亏也。启兄云：“平素胃寒，麦冬、贝母入口便吐泻，奈何？”予曰：“治病必以脉为准，今脉弦数，定属阴虚，滋阴不可，补阴独不可乎？此因咳而吐，非不咳而吐也，但治其咳，自不吐矣。”《脉经》曰：阴虚阳无所依，令人多呕者此也，岂阴虚独无呕病乎？”定以熟地黄为君，山萸、茯苓、山药、石斛、苡仁、沙参为臣，枇杷叶为佐，四剂知，十剂咳嗽全止，而产一男。产后再以当归、川芎、桂枝、辛夷、炮姜、黄芪温补之剂，以医鼻矣。

《素园医案》

陈念祖

妊期已至九月，乃足少阴肾脉养胎。近以风温上受，风为阳邪，温渐化热，肺阴先已受伤。是以发热口渴，咳嗽不已，胸中痞满，大小便艰涩，此肺与大肠相表里之明征也。宜先从上焦治，燥者润之，热者凉之。上通则下自降矣。

鲜生地三钱 阿胶二钱 淡黄芩二钱 知母一钱五分
天门冬一钱五分 花粉一钱

《南雅堂医案》

王孟英

汪氏妇，自孟秋患痢之后，大便溏泻未愈。已而怀妊，恐其堕

也，投补不辍。延至仲冬，两目赤腫满遮，气逆碍眼，腕疼拒按，痰嗽不食，苦渴无洩。屈孟英诊之，脉甚滑数。曰：此温补所酿之痰也。夫秋间滞下，原属暑、湿、热为病，既失清解，逗留而为溡泻。受妊以来，业经四月，虑其堕而补益峻，将肺胃下行之令，皆挽以逆升，是以胸次堵塞而痛，喘嗽不能卧。又恐其上喘下泻而脱也，补之愈力，以致治节尽废，洩闭不饥，浊气壅至，清窍两目之所以蒙障而瞽也。与沙参、蛤壳、枇杷叶、冬瓜子、海石、旋覆、苏子、杏仁、黄连、枳实、海蛇、黄芩、梔子、重加贝母，服二剂，即知饥下榻，目能睹物矣。

朱砥斋司李之夫人，累患半产，每怀孕，服保胎药，卒无效。今秋受妊后病（咳）嗽，孟英视之，尽屏温补，纯与清肺。或诘其故？曰：胎之不固，或由元气之弱者，宜补正。或由病气之侵者，宜治病。今右寸脉滑大搏指，吾治其病，正所以保其胎。苟不知其所以然，而徒以俗尚保胎之药投之，则肺气愈壅，咳逆愈甚，震动胞系，其胎必堕矣。朱极钦佩。服之，良效。次年夏，诞子甚茁壮。

《王氏医案》

林佩琴

族女。孕八月，因劳吐红，鲜紫成盆。火升则呛咳，颧赤少寐，口不知味。服童便、阿胶不止，诊脉左寸关大，两尺俱伏，此君相之火逼伤阳络，必得火降呛咳平，红自止。用生地、山梔、连翘、白芍、杏仁、贝母、百合、茯神、甘草、莲子、灯芯、阿胶，三服咳稀血止安寐矣。后用熟地、当归、白芍、杜仲（盐水炒）、杞子以实下元，尺脉亦起。

《类证治裁》

王燕昌

一市人，妇瘦夫健。妇每孕必咳唾如痰，百治不愈；比产，不药自愈。计生十一男三女。

按：医妇女，难于医男子；尤难者，孕证也。当结胎之际，或因妇之禀赋有异，或因天时寒暖非常，或因境遇顺逆不同；乘此结孕，有如常者，有变异者，其证多端，难拘一定。苟不加察，误作常病，轻者药证不应，重则受药害矣。须于临证时，勿论病见何状，但问得平昔经期无差，今及期而经止，或在一期而止，或至二期、三期皆止，又诊得右尺、左寸较强，余脉平平，则知为孕证矣。其状无定，皆非病也，安胎而已。间有一二脉证相符，若右尺、左寸脉略强者，亦须防其是孕，不可径作病治。总之，见为经止之后，勿论何证，每立方禁用伤胎之药，常用保胎、固气、固血之药，而不用破气、破血之药乃妥。

《王氏医存》

陈知生

妇人二三月，经水不行，疑是有孕，又疑血滞，心烦寒热，恍惚不定，此时调护非法，往往误事。辛卯正月初，余寓济南，张勤果公以舆速往，为大女公子诊病。据云，去年小产后，癸水仅一见，至今不至，已三阅月，咳嗽间红腹痛便溏，浑身骨疼，食少神疲，症情颇剧，人以为劳，余切其脉，细而数，即曰：“非劳也，是胎也，胎赖阴血以养，阴血不足，内热自生。咳嗽吐红，火刑金也；腹痛便溏，木克土也。热久不清，诸症以起，前次半产，职是之故。”因用复脉法，去桂枝、生姜，易麻仁为枣仁，加生地、白芍、川连、地骨皮为方。时有以川连为苦寒，生地、地骨皮为阴寒，非久病所宜，告余易去者。余曰：“有是病，始用是药，去之即不效”。照方服之，一剂，咳嗽平，吐红止；再剂，饮食进，神气振；三剂，腹痛便溏等症均愈。又阅数月，与以保产无忧汤，胎赖以安。癸巳春，余寓都门，吾友冯念勤之室，本体素弱，且有腹痛便溏宿症，经水适两月不来。速余往诊，脉象虚细，按左关尺，颇有和滑之致，大似育麟吉兆。主人疑气血太亏，未能受胎，防成虚劳。答曰：“脉象已见，为胎无疑。”用和中益气法治

之。嗣后，阅一月，或两月，必延余诊，余仍前法加減。又阅数月，果举一男。大凡妊娠至三月名始胎，手厥阴心胞络脉养之，此时最易堕胎，不可不慎，缘心经火盛故也。至六七月后，苟非起居不慎，决不小产，再按月服保产无忧汤，一、二剂尤妙。壬辰秋，余至天津，有一妇，产后必大病。是年，其夫为未事之谋，问治于余，余以此汤与之，越两旬余，其夫来谢。盖此次产后，固强健胜常也。后客都门，有何姓室，胞浆水裂已半日许，速余往诊，余即以此汤治之，夜半即产，平稳如常。可知汤名无忧，凡在产前，所宜多服，惟人之气质有不同，时之寒热有不同，用此汤时，不妨略为加減，改而不改，古人当不以多事责余。譬之周因殷礼，殷因夏礼，所损亦可知也，因时制宜之道也。

《谗余举隅录》

柳宝诒

苏。肝气上逆于肺，升于巅顶，窜及经络，而以气急一项为最重。又值重身，木火易逆。近日发热痰黄，肺胃兼有客热。病情繁重，总以泄肝清肺为主。

羚羊角 桑白皮 牡蛎盐水洗 黑山栀 滁菊花 鲜沙参
前胡 钩钩 刺蒺藜 夜交藤 淡黄芩酒炒 连翘 豆卷 竹茹
芦根去节

《柳宝诒医案》

丁泽周

余右。风湿燥邪，蕴袭肺胃，咳呛痰内带红，内热形寒，舌质红，苔黄，脉濡滑而数。怀麟八月，宜辛凉清解，宣肺化痰。

炒荆芥一钱 嫩前胡钱半 光杏仁三钱 象贝母三钱
抱茯苓三钱 炒黄芩一钱 轻马勃八分 瓜蒌皮三钱 马兜铃一钱
冬瓜子三钱 水炙桑叶皮各钱半 鲜竹茹二钱 活芦根去节，一尺

杨右。怀麟五月，肝阳升腾，风燥之邪袭，肺，咳呛咯痰不爽，头眩且痛，先宜清泄风阳，清肺化痰。

桑叶皮水炙，各钱半 川贝母二钱 瓜蒌皮三钱 光杏仁三钱
抱茯神三钱 肥知母钱半 炙远志一钱 黑稻豆衣三钱 薄荷炭八分
冬瓜子三钱 福橘络一钱

《丁甘仁医案续编》

张汝伟

沈慧明，年二十七，上海，住福生路一百零七弄八号。怀孕三月，心主司胎，心气郁结，肝火相乘，致成子嗽，已兼旬不止。胃呆，精神疲乏，白带淋漓。苔腻，脉濡弦，不亟调治，慎防胎堕。拟养肝肃肺，化痰止咳。

炒川芎八分 炙紫苑 制香附 广郁金 佩兰梗
炙竹茹各钱半 紫丹参 炒白芍 象贝母 焦麦芽 海螵蛸炙
桑寄生各三钱

二诊：进前方后，咳嗽已减，白带仍多，胎火犹旺，大便燥结。脉弦滑，宜再安胎育阴，润腹泄热，兼以止带。

粉归身 炒白芍 元参心 象贝母 桑螵蛸炙 乌贼骨 大
麻仁 肥知母各三钱 春砂仁一钱，后下 款冬花 姜竹茹
淡子芩各钱半

本证始末：此为朱天兴之爱人，怀孕后，因儿女众多，心烦神疲，以致咳呛不止。来诊时，神消肉削。二方仅服三剂，即告痊愈。

方义说明：此二方的扼要，在安胎顺气，与寻常之见咳治咳不同。第一方，重要在川芎、丹参、桑寄生、麦芽。安胎和胃，而用郁金、香附、佩兰利气，白芍养肝，紫苑、象贝以治咳耳。第二方，则以通便清胎火为主。故用淡芩、麻仁、元参，佐之以桑海螵蛸止带，归身白芍养血，血充气利，则诸病自能向安矣。

《临症一得》

施今墨

高某某，女29岁。患喘息病已八年，不分季节，时常发作，咳少喘多，不能平卧，喉间痰鸣，吐痰不多，自汗、心跳，睡眠乱梦纷云。曾用组织疗法，单方等均未见效，现又怀孕三个月，喘息发作，痛苦之至。舌苔薄白，舌质痰、脉细软而滑。

辨证立法：肺主气，司呼吸，若肺气闭塞，津液不布，聚而生痰，则痰鸣漉漉，倚息短气不得平卧，治宜通调气息，行其水气，但因怀孕三个月，不可过分开通，以防伤及胎元

处方：云茯苓6克 桑白皮3克 橘红5克 云茯神6克
桑叶5克 橘络5克 北细辛1克 炙紫苑5克 车前子6克
五味子3克 炙白前5克 车前草6克 生银杏12枚，连皮打
炒远志6克 白杏仁5克 苦桔梗5克 炒枳壳5克 甘草梢2克

二诊：服药四剂，喘渐少，咳增多，已有痰，仍心跳气短。

处方：云茯苓6克 细辛2克 陈橘红5克 云茯神6克
五味子3克 陈橘络5克 西洋参6克，另炖兑服 炒远志6克
苦桔梗5克 炙白前5克 瓜蒌子6克 炙紫苑5克
旋复花5克，关夏曲同布包6克 瓜蒌皮6克 野於术5克 炙款冬3克
粉甘草2克

三诊：前方服八剂喘更见好，已能平卧，咳嗽仍多，吐痰甚爽，心跳稍好。仍遵原法，前方去五味子、细辛，加南沙参6克。

四诊：服药四剂，病已大为减轻，突于昨夜又再发作，喘息不能平卧，一夜未眠，脉现浮数暂拟宣肺降气法治之。

处方：北沙参6克 炙麻黄1.5克 条黄芩10克 北细辛1克
莱菔子5克 云茯苓6克 五味子3克 白芥子1克 云茯神6克
陈橘红5克 黑芥穗5克 炙苏子5克 陈橘络5克 炒远志5克
苦桔梗5克 白杏仁6克

五诊：服药四剂，喘已大减，夜能安卧，自觉发作之势犹存，有

待机再发之象，大便干，小便黄。拟前方去白芥子，加瓜蒌子、皮各6克，再服四剂。

六诊：服药甚好，喘已基本平定，仍心跳、咽干、食欲欠佳，拟以清热法治之。

处方：朱茯神10克 炙紫苑5克 陈橘红5克 朱寸冬10克
炙白前5克 陈橘络5克 苦桔梗5克 酒黄芩6克
旋复花5克，半夏曲6克同布包 白杏仁5克 西洋参6克，另炖兑服
野於术5克 炙甘草1.5克

七诊：前方服六剂，症状大减，自觉几年来未有如此之舒畅。大便稍干，小便黄，拟用丸药巩固。

处方：台党参30克 远志30克 旱莲草30克 车前子30克
寸冬30克 朱茯神30克 酒黄芩30克 桔梗15克 五味子30克
女贞子30克 橘红15克 金沸草30克 火麻仁60克 杏仁30克
枳壳15克 半夏曲30克 桑叶30克 野於术30克 陈阿胶30克
炙草30克

共研细末，蜜丸如梧桐子大，每日早晚各服10克，白开水送下。

《施今墨临床经验集》

子烦

陆正斋

张某某，女30岁，邪热狂躁，阴液受劫，肺胃气遂不降，胎孕扰乱不安，心烦咽干，病绪多端，虑生枝节矣。拟方候酌。

川黄连1.5克 广皮白3克 苏叶梗各1.2克 干切茯苓10克
肥知母4克 吴萸水炒白芍10克 淡黄芩4.5克 姜竹茹4.5克
辰灯芯0.3克

《陆正斋医疗经验》

子悬

薛立斋

一妊妇，每因恚怒其胎上逼，左关脉弦洪。乃肝火内动，用小柴胡加茯苓、枳壳、山栀而愈。但体倦不食，用六君子加枳壳、柴胡、山栀而瘥。

孙文垣治费少垣乃眷，妊已九月，痰多喘嗽，胎气上逆，眼撑不起，两太阳微疼，此子悬症兼痰火也。以大紫苏饮为主，才服一帖即不上逆，胸膈顿宽。唯喘咳不止，与七制化痰丸而安。

《续名医类案》

陆祖愚

梅养中子妇，孕七月，其夫出外经商，患胎上冲心，不时昏晕，或与紫苏安胎饮，数剂不效。脉之寸大于关，关大于尺，俱带弦数，此血虚极而火上炎之故也。用清气养荣汤，磨沉香四两、牛黄二分，煎就徐徐灌之，不终剂而苏矣。

蔡元度宠人有孕，夫人怒欲逐之，忧悸成疾，乃取香术散，用莪术煨二钱、丁香一钱、甘草三分，共为细末，分作三服，空心盐汤调，觉胸中如物推下之，而愈。

《续名医类案》

万密斋

徐太和之妻，娠八月得子满病，或作子悬治不效。腹满转甚，胎坠下迫，玉门大张，脆形外露，但仰卧不能坐，其脉两手俱大坚搏指，谓曰：病无害，乃双胞胎也，胎肥气弱。

《续名医类案》

李用粹

河间司李朱思皇长公令方夫人坐孕之月，胎肿异常，喘急不能言，并不能卧者月余。举家傍徨，投药甚乱。一医用人参、白术以实脾。一医改用商陆、葶苈以润肺。相去天渊，益增疑思，邀予决言。予曰：此症似危，脉幸洪滑，产前可保无虑，即应分娩之后，颇费周旋耳。舍前两治。余不过一、二剂，便获安机矣。座中訝出言之易，各言辨驳，予据理折之，曰：胃为清阳之海，肺为元气之龠，故呼吸升于丹田，清浊输化赖于中土。若平素膏粱太过，则中州积热。况胎孕内结，则相火有余，至六、七月以来，肺胃用事，胎渐成大。故肺气愈逼而火愈旺。湊逆于上，喘呼不卧，名曰子悬者是也。兹用参、术温补，则肺气壅塞，若用葶苈苦寒，则胃气孤危，均致变症蜂起。岂非实实虚虚之患乎？疏方用苏梗、枳壳、腹皮各三钱，茯苓、陈皮、半夏各钱半，甘草五分，生姜三片，一帖便能言，再剂则安卧。合门信为神丹，余曰无欢也。胎前喘急药石易疗，恐临盆在迩，其喘复生，虽灵丹在握，不能为也。须预备奇策，调护真元，不致临产涣散，乃可万全。不数日，产一子，甚觉强健。越两日。喘果复作。惊呆无措，进食亦减常时，此胃土虚而不能生金之象。以大剂参、术、苓、草、五味、肉桂数剂乃安。

《旧德堂医案》

子肿

薛立斋

一妊妇，每胎至五月肢体倦怠，饮食无味，先两足肿，渐至遍身，后及遍头面。此脾肺气虚，朝用补中益气汤，夕用六君加苏梗而愈。

元丰中淮南陈景初，名医也。独有方论治妊妇子肿病，其方初

谓之香附散，李伯时易名曰天仙藤散。王荆公居金陵举家病，以诗赠景初，曰：举族贫兼病，烦君药石功，到家何所有，一一问征鸿。因此见方得于李伯时家传方，录于临川张右丞宅。

《续名医类案》

郑重光

适朱宅三小女，体素虚寒，怀孕将产，先胃寒呕吐，服理中汤而止。续即两足水肿，未旬日，上肿至腿，渐上至少腹，内怀二胎，其腹胀大欲裂，气喘不能行立，脉细如丝，两足冰冷，小便点滴不通，水已上溢，不急治水，胎必浸伤，而孕妇更不能保矣。凉桂附尚不能敌水，何暇伤胎，且胎已足月，桂附不能犯，遂用附子、干姜、桂枝、人参、白术、茯苓、泽泻，大剂与服，日投二剂，四剂后足微温，小便略有。服至十剂，上腹略软，水尽下注于两足，惟卧床不能坐矣。又十余剂，水从大小二便齐出，消大半，而双生两男。产后因胎前药力，三朝尚全无病，遂经理家事，忽然腹大痛，大吐大泻，困急于床，脉细紧无伦，惟恐痛脱，仍用前人参、附子、干姜、肉桂、茯苓、甘草，因腹痛，故去术也。日服人参六钱，药三剂，六日痛止，加白术，温补四十日始康，其产后惟两血饼，所下皆水。此阳气虚，血反化水，若执怀孕桂附伤胎而水不下，必致子母两殒。《经》云：有故无殒。良不诬也。其所生之子，出痘甚轻，则桂附不贻害于儿，亦可知矣。出痘之儿，因痘甚轻，未满月便出户见风，至满月后，作泻十数日，忽患惊风，幼科皆称“慢惊”不治，已掷于地，惟候死耳。予视之，忽啼号数声，即手足抽搐，眼珠上视，头向后仰，身体僵直，今有此数症，则非慢惊，盖天钓风也。其先啼者，腹中痛，谓之内钓，内钓后即外钓抽搐，此因痘后失调，又经久泻而兼内邪，故有是证。必须温经补中，余遂用桂枝、赤芍、钩藤、人参、白术、炮姜、附子、半夏、甘草，灌下二剂，即回苏，但不能吮乳，日进米粥，然一日必啼号十数次，抽搐十数次，而参附药不辍，幼科畏热，暂止数日，即泻不止，泻甚则

内钩、外钩亦甚，不得已，坚用之，抽搐止，即右手足痿软，半身不遂，如此大剂，一岁之儿，服至百剂，泻方止，足可站立，但右手尚不能持物，笑则口歪。若非参、术、桂、附、干姜，何能有生，有斯病则用斯药，岂以幼儿纯阳，不堪辛热，执为定论者哉！

《素圃医案》

陈念祖

怀妊五月，气短，肢倦乏力，不思饮食，两跗先肿，渐及腰胁。此乃肺脾气虚不能化湿，湿淫于内，势必发为漫肿。法宜益气补中，庶湿走肿消而恙自平。今仿东垣法，略为加减。

炒白术四钱 炙黄芪二钱 人参二钱 陈皮一钱 当归身一钱
白茯苓三钱 升麻三分 柴胡三分 炙甘草五分

《南雅堂医案》

李铎

黄氏，年二十八岁，诊左脉缓细，右滑大，症见右身半以下偏痛不能举步，起坐甚艰，卧则不痛。余疑右脉滑大似属妊象，询其家人，谓果有六月之妊，此血虚兼风湿，乃着痹证也。初投四物减地黄，加桂枝，防风、羌活、秦艽以驱风湿，继以四物合二妙，加牛膝、米仁、木瓜、桑枝，十帖而愈。

陈辛亥先生曰：《药性》牛膝、米仁损胎，此则用之而愈，所谓有故无殒也，识卓胆大，佩服佩服。

《医案偶存》

王延俊

邻妇五氏，孕已弥月，头面四肢肿，腰腹重坠，如将生娩，数日后不能坐。必须两足支于床柱，始得稍安。生父延予诊治。话时两泪盈眶，谓医用乌鱼汤，令洗不效，已告技穷。闻之惻然，偕往诊脉，

空弦鼓指；察其外象，咳嗽气紧，欲呕不得，告之曰：“汝女气虚而兼痰饮，前医固守安胎套药，所以致此，不畏半夏、附子堕胎，尚可一治。”以小半夏加茯苓汤投之，六剂后，大吐绿水两盆，气乃稍缓；继进术附汤十剂，腰腹不坠，可起立矣。命其止药，生产后再议。是夜解怀，其子肥如瓜瓠，举家皆喜。闻而笑曰：“受胎时已挟有痰饮，母病子亦病。肥者水气，非真元足也。”半月余愈呆滞，终日不出一声，儿科与药，殇。此后专心调理产妇，三年中白术用至十斤外，附子用至七斤外，复受胎生子。

时医以半夏、附子为堕胎药，相戒不用，有时用半夏，更以芝麻油炒之，皆遵李时珍说者也。不知仲景以附子汤治妊娠腹痛，干姜人参半夏丸治妊娠呕吐不止。《金匱要略》著有明训，不必为俗说泥也。但须审证明确，不可用于阴虚胎火重妇耳。

小半夏汤

制半夏六钱 生姜八钱 加茯苓四钱

陈灵石曰：《神农本草经》载，半夏之功治甚大，仲师各方，无不遵法用之，凡呕者必加此味。元、明后误认为治痰专药，遂有用朴硝水浸者；有皂角水及姜水浸者；有用白芥子和醋浸者，市中用乌梅、甘草、青盐等制造者更不堪入药，近日通用水煮，乘热以白矾拌晒切片者，皆失其本性，不能安胃止呕，宜从古法以汤泡七次，去涎用之；或畏其麻口，以姜汁、甘草水浸透心，洗净晒干，再以清水浸三日，每日换水，蒸熟晒干用之。支饮之证，呕而不渴，旁支之饮未净也。用小半夏汤者，重在生姜散旁支之饮；半夏降逆安胃，合之为涤饮下行之用，神哉！

术附汤

炒白术一两 熟附片五钱

喻嘉言曰：脾中之阳遏郁而自汗，宜术附汤；又谓术附可以治寒淫，用所当用，其效如神。

前两解方意明确矣。予借以治此证者，盖以此妇脉空，知其阳

虚；脉弦知其阴盛；咳嗽气急，欲吐不得，知其有痰饮。夫阳虚阴盛，水饮弥漫，焉得不四溢而为肿？至欲倒悬而不能坐起，气不举胎无疑矣。此时更以滋阴补血之品安胎，几何不两土同崩，真阳灭熄哉！计惟补火生土，以御滔天之水，然水无出路，土何能温？必先逐去水饮，始克奏功。故用小半夏以止逆涤饮，阳气上升，所以快畅而吐，吐去宿水，大用温补，看似雄峻，其实有制之师也。

《寿芝医案》

柳宝诒

曹。木火挟郁痰升逆于上，颈项浮肿，咽物不爽，癸停四月，间作鼻衄，右尺浮动。似乎有勿药之占；况胎火上浮，亦能作衄。拟方以清肝泄火为主，佐以化痰畅气。

东白芍酒炒 黑山栀 元参 橘红 枳壳 淡黄芩 广郁金
丹皮炭 黑荆芥 象贝 牡蛎 砂仁 夏枯草 竹茹

《柳宝诒医案》

魏长春

吴永源之妻李氏，年二十岁。九月八日诊。

病名：妊娠肿。

原因：所适远在蟹浦，地处海滨，住居不洁。怀孕八月，感受湿邪，气机不畅，湿化为肿。

证候：遍体浮肿，脐突阴肿，带下如注。

诊断：脉迟，舌淡不荣。湿邪内伏，病名子肿。

疗法：五皮饮，宣肌肤伏湿为先。

处方：大腹皮三钱 茯苓皮三钱 五加皮三钱 桑白皮三钱
橘皮一钱

次诊：九月九日。左脉沉伏，右脉滑。遍体浮肿，气促渴饮，小溲略长，大便已解，舌尖糙，根苔腻。用和中化湿利水法。

次方：绵茵陈四钱 泽泻三钱 猪苓三钱 带皮苓四钱
桑白皮三钱 大腹皮三钱

三诊：九月十日。小溲略长，口气秽臭，渴饮，脉滑，舌苔腻，肿势未退。用清化湿邪，安胎消肿。

三方：桑白皮三钱 地骨皮三钱 大腹皮三钱 黄芩三钱
竹茹三钱 银花三钱 连翘三钱 带皮苓四钱

四诊：九月十一日。便解溲长，胃苏，胸脘满痛。舌转红色，苔化，脉滑。带下如注，湿邪稍化，宜安胎和营。

四方：西归身二钱 生白芍三钱 川芎八分 茯苓三钱
竹茹三钱 黄芩二钱 大腹皮三钱 天花粉三钱 炙甘草一钱
苦杏仁三钱

五诊：肿消热清，胃思纳，腹痛差，脉滑舌淡，头眩，白带未除，病差，可用清补方。

五方：西归身三钱 生白芍二钱 阳春砂五分，冲 木瓜一钱
大腹皮三钱 制首乌三钱 黄芩二钱 泽泻二钱 天仙藤二钱

效果：病痊。足月安产一女。

炳按：妊娠肿病甚多，有子肿、子气，名有现证，各立治法，尤宜参考专书。

《慈溪魏氏验案类编初集》

周镇

胡和尚，慧山，要货业。其妻于乙卯患肿胀之症，孙君治以攻削下水，十余剂不减。九月更延余诊，已胸高气逆，溲秘不通，胸中撑胀已搓至皮破，饮食不纳，以参汤延挨矣。诊脉置如无，苔白，舌质略紫。高枕而卧，犹然气急。如纯由水气，小溲不通，顷刻而糜。因询经事，则停已数月。乃曰：怀娠而肿，此症甚多。”渠家以多年未孕，不以为然。余谓即有胎而水气浸渍，亦万不能生存。拟小陷胸汤、金铃子散加川朴、腹皮、茯苓、泽泻、车前及沉香、琥珀末。一剂。

腹中攻动，洩通瘀行，遂下死胎，其胞已糜腐不堪。下气神气复振，即能饮食，肿胀循退。是故肿而水盛，胎荫之生气竭绝，追上犯而气冲，旦夕有性命之虞。不急下之，未可幸生。及喘而云亡，人亦以为水气应有之变，端不意有此一着也。

《周小农医案》

翟竹亭

城内文化街孙兴冉妻，二十余岁矣，患水臌证。请余往疗，至时见患者卧床，周身头面肿似水晶无异。问其病天数，伊言二十三个月矣。诊其脉肉肿甚厚，浮中沉均不得，推筋着骨，诊得寸洪关滑，两尺不绝，左手大于右手，男胎也。告伊曰：“勿作病治，确系喜兆”。伊姑闻言冷笑曰：“先生差矣。世间哪有怀胎二年不产之妇。再者肿形如此，非水臌之明证乎！”余曰：“非也，此因当受孕时，肺经有水气之故。及受孕后，精神气血齐去养胎，水仍在肺，无气血传送，不能自行，其肿虽胜而水在表，内无大病。迟延不产者，一一经有病，互相关连，它经不能不受其累，受累即是虚，所以不能比常人也，再待一月，必产无疑。”伊始以余言为是。又半月许，产妇之婿，执一请帖，言请余赴喜席。余曰：“何喜之有？”伊曰：“前贱荆之病，先生决断是喜，果产一男，今已九天。”余问临产情况如何？伊云：“产时先下浆水斗余，移片时儿下，发黑明，长寸余，声音洪亮。”谚云“怀胎月数多者必贵”。此儿已近二十岁。亦常人耳。此等迷信，余决不信也。

《湖岳村叟医案》

章成之

吕女。形瘦，两脉大而鼓指。此种人如见气逆，表示循环障碍；两足浮肿，此其的症。循环障碍之来源，体弱，以怀孕九月之压迫，心脏负担太重。

生黄芪 9 克 熟地 15 克 山萸肉 9 克 五味子 4.5 克
巴戟天 9 克 潞党参 9 克 杭白芍 9 克 炙甘草 3 克 旋复花 9 克,包
煅牡蛎 30 克,先煎

二诊:远西脉数者之心弱用毛地黄,脉迟者之心弱用樟脑。国
药毛地黄与附相等,樟脑则与参相似。参附并用,取其镇静,又取其
兴奋故也。

炮附块 9 克 全当归 9 克 五味子 4.5 克 潞党参 15 克
生黄芪 9 克 山萸肉 9 克 汉防己 12 克 生苍术 9 克 延胡索 9 克
升麻 4.5 克 云苓 12 克 炙草 4.5 克

《章次公医案》

叶熙春

庄,女,二十五岁。三月。余姚。怀孕五月,下肢浮肿,小溲短
少,头晕身重,胸闷腹胀,脉缓滑,苔白薄。症属子肿,治当健脾利
水,理气安胎。

炒白术 8 克 天仙藤 9 克 带皮苓 12 克 苏梗 8 克 泽泻 9 克
清炙桑白皮 9 克 炒陈皮 5 克 冬瓜皮 12 克 大腹皮 9 克
广木香 2.4 克 生姜皮 5 克 阳春砂 5 克,料,后下

二诊:小溲增多,下肢浮肿渐消,胸闷腹胀得宽,头晕亦轻。仍
步前方加减。

米炒上潞参 9 克 炒晒术 8 克 天仙藤 9 克 带皮苓 12 克
苏梗 6 克 泽泻 9 克 炒陈皮 5 克 冬瓜皮 12 克 阳春砂 3 克,料,后下
桑寄生 9 克 炒杜仲 9 克 生姜皮 3 克

白,女,三十九岁。十月。杭州。禀体阴虚,妊娠八月,头晕目
眩,面赤烘热,心悸寐劣,下肢浮肿,今晨突然抽搐,不省人事,按脉
弦滑有力,舌绛唇干。厥阴风木内动,夹痰火而上扰,证属子痫重
症,拟羚羊解散化裁。

羚羊角片 2.1 克,先煎 老钩 15 克,后下 生石决明 30 克,先煎

天麻 5 克 甘菊化 9 克 生白芍 9 克 大生地 18 克 茯神 12 克
竹沥半夏 9 克 胆南星 2.4 克 当归 6 克 鲜竹茹 9 克

二诊：前方服后，神苏，抽搐亦定；惟尚感头晕目眩，心悸夜寐欠酣，脉弦滑，舌绛。再拟潜阳熄风，以杜反复。

羚羊角片 1.5 克，先煎 归身 6 克 蛤粉炒阿胶 12 克
生石决明 24 克，先煎 生牡蛎 18 克，先煎 青龙齿 12 克，先煎 麦冬 9 克
茯神 12 克 生白芍 6 克 大生地 18 克 老钩 12 克，后下
炒橘红 5 克 鲜竹茹 9 克

《叶熙春专辑》

子淋

陈念祖

妊娠下痢半月，痢止。小溲癃闭成淋，口渴引饮，饮毕方去滴许，涩痛异常。诊得脉形虚湿，右寸独大。此乃金被火刑，州都气化不行，溺道乃闭。经旨：病在下者治其上，上窍开则下窍自通。且妊娠脉见虚湿，是气血俱虚之候。若再以渗利分消为务，恐势愈顺趋而下，非特病不减，虑或胎动何！

苏子一钱五分 杏仁二钱，去皮尖 桔梗二钱 薄荷八分 紫菀二钱
枳壳八分，炒 炒干葛一钱

《南雅堂医案》

柳宝诒

江。考古人子淋治法，本不忌伤胎之品，诚以病与胎不能兼顾，正合《内经》“有故无殒”之义。此证气机陷坠，颇如气淋见象；而溺白屑，又与砂淋相似。重身三月，相火养胎。仿古人成法而变通之，兼参气淋治法，望其两不相碍，乃为得手。

北沙参 黄芪 升麻 柴胡 甘草梢 赤苓 车前子 黑山

梔 枳壳 春砂仁 海金沙包 淡竹叶 西珀屑

《柳宝诒医案》

施今墨

刘某某，女，28岁。第二胎妊娠五个月，半月前感觉排尿不畅，初不介意，继则加重，小便频数，艰涩不爽而酸痛，色黄，大便干燥，食欲欠佳，夜眠不安，易发烦躁。舌苔白，根部发黄。脉象：滑数。

辨证立法：妊娠小便难，乃热郁膀胱，津液亏少，气化不行所致，宜用清热通淋，调气润燥以治。

处方：川萆薢6克 天麦冬各6克 生地10克 酒条芩6克
南花粉10克 草梢3克 炒枳壳6克 火麻仁12克 山梔5克
台乌药6克 益智仁5克 茯苓10克 川石苇6克

二诊：服药两剂，尿频大减，尿时仍有涩痛之感大便已通，眠食转佳，原方去火麻仁加淡竹叶5克。

《施今墨临床经验集》

妊娠小便不通

吴麓

洪氏，据云受胎六月，脐下作痛，小便不利。余诊脉滑虚数。此胎压尿胞。故脐痛，溲闭。因血气虚弱，痰饮壅滞以致之。即宗丹溪，用参术饮以补气、养血、消痰，使气得升举而胞自通也。遂连服十剂而愈。

《临证医案笔记》

李铎

丁氏妇，胎八月，小便闭三日，少腹胀满，脚肿，服疏导清利药转加胀急。延余诊之，脉细涩，此明系转胞证，乃气血虚不能承载其

胎，故胎压膀胱，偏在一边，下窍为其所闭，是以溺不得出，当补血养气，以四物加参、术、半夏、陈皮、枳壳、甘草、生姜煎服一帖，随以指探喉中，吐出药水，候少顷气定，又与一帖，次日小便大通，胀急顿解，继以参、芪、归、芍、升麻、陈皮，数剂而安。

《医案偶存》

徐镛

郡城孙锦章室，怀胎五月，病转胞不溺，医用清利水道，并不究其转胞由于下焦虚寒、由于中焦气弱、由于肝家血滞。猪苓、泽泻、车前等药徒伤胃气，故饮食减少，夜不得寐，诸恙渐臻，而胞系之繇戾者如故也。日请稳婆抬起，始得溺出，究之元气不支，日甚一日，因而延余诊治。诊其脉缓大有力，许以可救。遵《金匱》成例，投肾气汤一剂，是夜稍得安寝。盖利水之药足以泻肾，投桂、附而命门温暖，故稍得安寝耳。再遵丹溪补气成例，投参术汤一剂，饮食渐能知味，惟病者大便不行已数日，腹中至此更觉不安，改用茺连汤一剂，大便得解，小便仍稳婆伺候。病者因诸恙悉减，深信不疑，再求良治，余为沉思良久，脉象比前更为有力，元气已复而胎气未举，必有瘀血阻塞其间，遂用大剂破血之药，一剂而胀遂消，三剂而胎气举。凡破血之药，最足碍胎，今破血而胎反固，妙在先用补药以助其元气也。

《医学举要》

姚龙光

宦治桐，性诚笃，工写真，长媳王氏秋季患温证，因有孕七月，未敢服药，延至七日，病势危笃，来恳予诊，询知恶热七日，曾未一汗，面红有光，胸闷躁扰，谵妄叫喊，人事间或清醒，大小便俱闭，呃哕连声，滴水不能入喉。诊其脉，两寸洪滑，两关尺弦数，舌本深紫，潮滑无苔，合脉症参之，定属温病，然口不渴，舌潮滑，滴水不能入

喉，则又何也？就此推测而知此为温病之水结胸，如伤寒之水结胸之病也，但伤寒由于寒而误治，此由于热而自成，水气因热上升，填塞胸膈，故舌润，而洪滑之脉见于两寸也，上窍为水气所闭，则下窍亦闭，如壶内贮茶，大口盖紧，小口即点滴不出，故便溺俱无也。水气上冲，气亦上逆，故呕哕不止，而水难下喉，心为水逼，神明无主，故人事不清，且面红为温，有光为水，但泻水之药均能损胎，虽有故无殒亦无殒也，然与流俗难言之故，婉言辞谢，嘱请高明，乃桐翁再三相恳，又邀王炳南为作说客，为用葶苈子三钱，杏仁泥三钱，枳壳一钱半，法半夏二钱，大黄三钱，芒硝三钱，水煎与服，嘱之曰：此方皆损胎之药，然有病则病当之，于胎无伤也。若胎气未动，则病去胎存，最为妙事，若胎气已动，则胎病俱去，亦属无伤，若不服药则胎去病存，人必不保，此方勿轻示人，恐听人言而自误也。药煎出一碗，竟能缓缓服下，无一滴呕出，事亦奇矣，历一时余，腹中大痛，其翁复来问治，余曰：上焦开发，气下行矣，无害也，又历时许，痛定安寝，至天明，小便下行甚多，大便又下行多水，果汗出津津，身倦欲卧，病大退矣。反致众口沸腾，谣诼四起。吾闻之，因不再诊，后医治不中窍，余邪未净，逾年余，转别证而殁。冬月生子，亦未能存，此病后失于清理安胎之未得法也。

《崇实堂医案》

余听鸿

常熟长田岸某姓妇，妊娠四月，小溲点滴不通。某妇科进以鲜生地、龙胆草、青麟丸等寒凉之品，小溲秘之更甚，已有三日。余诊其脉，沉细而涩，少腹胀痛。余曰：此胞阻也。被寒凉凝滞膀胱，无阳不能化气而出。即将葱二斤，煎水熨洗少腹，略能小便。即进五苓散。桂枝一钱，猪苓、赤苓各二钱，泽泻二钱，白术二钱，研粗末，煎沸滤清饮之。仍不能通畅，而少腹痛势稍减。将前方去桂枝易肉桂一钱，服法依前，服后而小便大畅而愈。如曰胎前忌热，专用寒凉，杀

人在反掌矣。

常熟花园浜王姓妇，妊娠九月，胞浆水已破之后，腹痛浆水沥尽，小溲不通，已有三日，少腹不动。稳婆谓胎死腹中，或欲试手法，或欲下死胎方。邀余诊之，见产妇神情恬淡，并无所苦，唇舌均红。使稳婆按其少腹，温而不寒。脉来流利，软而无力。诊毕，稳婆问腹中小儿能保全否。余曰：腹中小儿，酣睡未醒。稳婆曰：何以不动。余曰：因睡而未醒，故不动也。主人曰：腹痛三日，小便不通，小孩不动，恐胎已死矣。请先生一断之。余曰：此名胞压膀胱，此方书所不载，必定是负重或跌仆而损胎元。又因坐蓐太早，气挣于下，胞压膀胱，小溲不能出，溲阻而胀。兼之胎元下坠，两相挤轧，不能转动。如果子死，当唇红舌黑，少腹作冷。按脉未离经，未至临产之时，胎元断断不死。即问产妇，曾否有负重跌仆之事。妇曰：三日前因有安息香两支在地，俯之不能拾，乃跪而拾之，起时胞浆已破。余曰：胞压膀胱无疑矣。可先将灯草刺鼻中，令产妇喷嚏，嚏则肺气开，上窍通则下窍泄，而小便可通，再吸洋烟三筒，将其胎提起，以免挤轧子门。小便通后，可让出地面，使小儿可以转身，临盆即不难矣。问服何药。余曰：不须服药。主人曰：可服催生药否。余乃进以胃苓汤加苏梗，利水行气而已。喷嚏之后，吸洋烟三筒，果然小便通畅，药将沾唇，小儿已下矣。若依稳婆手法，或服下死胎方，母子岂能保全。主人曰：君之催生方极灵，将来可传之于人。余曰：胃苓汤是受湿泄泻之方，作催生方，误事不小。其功不在药，而在灯草洋烟耳。

《余听鸿医案》

巢渭芳

郑右，二十六岁。形瘦，脉来细实，怀孕五月，小溲不畅，腹痛右半为甚，按之更剧，身热舌晦，温补多进，已成胎痢。药用当归、生苡仁、生军、丹皮、红花、赤芍、茯苓、白芥子、甲片、银花、川石斛、生草、藕节，服之。复诊时，脉来细数，腹右高肿，胎痢将成，小溲不行，

症属危险，急与承气加減，以冀获效。方用生川军、粉丹皮、牛膝、红花、甲片、生草、乌药、石斛、木通、赤芍、桃仁、白芥子、藕节。（外贴平安散、加大贝、血竭）两剂已效，未成而消。后闻产一男孩。

《巢渭芳医话》

傅松元

北乡沈小史之媳，怀孕三月，忽癰闭不通者两日，延医服药，初剂有效，次剂辄不应，连易数医，皆然。继邀茜泾陶福田诊，陶曰：“胎脉不见，腹胀如鼓，应作血鼓治。”始以牵牛、桃仁、五灵脂、地龙等，合五苓散投之，继以大黄、芒硝、芫花、大戟、干膝、蟋蟀等投之，竭种种变换方法，连服八剂，仍是初服时一通，即不复再解矣。至第二十四日，乃邀余诊，两脉俱弦，腹胀而癰，食少不渴，按其腹，坚硬不痛，腕左高如覆缶，此血气结于脾外，脉络既阻，故不见胎象，是以陶君作血鼓治，虽不应手，然种种方法，皆已用尽，乃以别无善策告之。其家人再四哀恳，余曰：“无已，但有用砒石一法，名椒仁丸，姑制方相授，信则服之，不信则弃之可也。”沈氏接此方，果疑不敢服。又延二日，病者呼曰：“与其胀死，无宁服砒霜，而或有不死之望。”乃配合而服四丸。第五日，又邀往诊，途遇其邻，询其致病之由，知因夫妻淘气而得此。诊其病，则腕左之肿硬之退，少腹之坚硬未除，小便略通而未畅。乃注重于疏肝和气，以乌药、枳壳、青皮、木香，合四七汤，再下椒仁丸四粒，服如前法。服后月余，不闻消息，至五月中，遇插秧农夫，始知其人早愈，能作田间生活，孕亦未坠。乃知硝、黄、灵脂、桃仁、砒石虽甚毒烈，在当用时，亦不伤胎，经云有故无殒，诚不我欺，特用时必须审慎耳。

《医案摘奇》

周镇

阿合，轿夫之妻，丁卯八月初旬患霍乱吐泻转筋，已经三日。呕

不止，口渴，烦懊少寐，小溲不通。脉数，苔黄。暑邪直凌中土，上扰君主，且有五月身孕，殊属重险。拟清暑安神，通溲和络，以安其胎。陈香薷七分，雅连七分，子芩二钱，川石斛五钱，白芍二钱，辰滑石二钱，通草一钱，竹茹二钱，黑山栀二钱，宋半夏三钱，紫菀二钱，海金沙四钱，连心翘二钱，枇杷叶四片，鲜竹叶三十片，西瓜翠衣七钱，野苈麻二两，车前子一两。地浆四碗澄清，煎汤代水。另血珀二分研末，开水送下。先饮酱油汤（王潜斋法），吐止，服药。得溲，懊略减，原方增损，竟愈。

《周小农医案》

妊娠小便频数

薛立斋

一妊妇遗尿内热，肝脉洪数，按之微弱，或两太阳作痛，胁肋作胀，此肝火血虚。用加味道遥散、六味地黄丸，寻愈。后又寒热，或发热，或恚怒，前症仍作，用八珍散、逍遥散兼服，以清肝火养肝血，而痊。

《续名医类案》

张子和

一妇人病大便燥结，小便淋涩，半生不孕，常服疏导之药，则大便通利，暂止则结滞。忽得孕，至四月间，医者禁疏导之药，大便仍难，临圉则力努，为之胎堕。凡如此胎堕者三。又孕已经三四月，前后结涩，甘分胎陨。张诊之，两手脉虽滑不敢陡攻，遂以食疗之，用花碱煮菠菱葵菜，以车前苗作茹，杂猪羊肉血作羹，食之半载，居然生子，燥病亦愈。屡见孕妇利脓血下迫，极努损胎，但同前法治之，愈者莫知其数。

《续名医类案》

薛立斋

李蒲汀侧室妊娠，大小便不利，或降火理气之剂，元气反虚，肝脉弦急，脾脉迟滞。视其面色青黄不泽，薛曰：此郁怒所致也。用加味归脾汤为主，佐以加味逍遥散而安。

主政王天成之内妊娠，痼病愈后二便不通，其家世医，自用清热之剂，未效。诊其脉浮大面涩，此气血虚，朝用八珍汤加桃仁、杏仁，夕用加味逍遥散加车前子，而瘥。

《续名医类案》

陆养愚

一妇孕九月，大小便不通已三日，忽胎上冲心，昏晕数次，诊之脉沉洪而实，谓当下之，与其大承气汤一剂，少加木香、豆仁，村医见用大黄两许，摇头伸舌，其良人有难色，乃谓之曰：余坐汝家，待其得生始去。始安心煎服，一二时许二便俱行，去黑矢极多，胎亦无恙。乃留调气养荣汤二剂，而不服，数日后小水不利，乃煎服之而愈。月余产一男。

《续名医类案》

陈三农

一妇妊娠五月，大小便不通，胸腹痞满，腿足及心腹刺痛难忍，用芎、归、赤、芍、枳壳、槟榔、木通、滑石、杏仁、葱白，童便、水各一钟，煎八分，人大黄末二钱，车前子末二钱，再沸入蜜四五匙，温服，大小便皆利而安。

聂久吾曰：一医来问云：我治一妇孕八九月，忽然大小便不通，腹胀甚，用承气汤下之，仍不通，今危矣。予曰：此非煎药所能下，教用牵牛大黄丸下之，服至一两许而大小便俱通，次日其夫来谢，因云：诸病皆除，唯小便时，要人将手紧按小腹方可使，否则不能便。

因思此是气尚闭，与青皮、香附等行气药，一剂而愈。逾月生男，母子无恙。（方见咽门）

《续名医类案》

章成之

王女。经停三月有余，腰酸而小便频，妊娠体弱者多有之。

黄芪9克 党参9克 白术9克 当归4.5克 升麻3克
柴胡2.4克 杜仲9克 桑寄生9克 清炙草4.5克

《章次公医案》

子暈

丁泽周

薛太太。怀麟七月，肝气肝阳上升，时令之湿热内阻，阳明通降失司，以致头痛眩暈，胸闷不思饮食，且有甜味，甚则泛恶，舌质淡红，苔薄腻而黄，脉滑数。夜不安寐，胃不和则卧不安也。宜清泄风阳，和胃化湿。

冬桑叶二钱 滁菊花三钱 薄荷炭八分 佩兰梗钱半
清水豆卷三钱 仙半夏二钱 水炙远志一钱 川雅连三分
枳实炭一钱 炒竹茹二钱 嫩钩钩后入三钱 夜交藤三钱
荷叶边一圈

《丁甘仁医案续编》

施今墨

程某某，女，34岁。怀孕五个月，只是头晕，别无他症。舌苔正常，脉象：滑但不满指。

辨证立法：妊娠五月，气血多养胎儿，不能上荣于脑，故生头晕，脉不满指，实是血虚也。治宜气血双补。

处方：炙黄芪 10 克 当归身 5 克 酒生地 10 克 黑芝麻 18 克
鹿角胶 6 克 阿胶珠 6 克 白薇 5 克 炒远志 5 克 桑叶 6 克
桑寄生 15 克 黄菊花 10 克

《施今墨临床经验集》

子痫

薛立斋

一妊妇，出汗口噤，腰背反张，时作时止，此怒动肝火也。用加味道遥散渐愈。又用钩藤散而止。更以四君加钩藤、山栀、柴胡而安。

一妊妇因怒仆地，良久而苏，吐痰发搐，口噤项强，用羚羊角散渐愈。更用钩藤散始痊。又用归脾汤而安。

《续名医类案》

孙文垣

黄氏妇青年初妊，已及弥月，忽午夜口中奴奴，因作上视，角弓反张，裸裎不知羞耻，口眼偏斜，昏愤不知人事，问之不能言。此风痰为怒所动，而成子痫。当从云箕子葛根汤加大腹皮，一两剂可愈也。用葛根、贝母、丹皮、防风、川芎、当归、茯苓、桂心、泽泻、甘草各二钱，独活、人参各四钱，水煎饮之而苏（原注：按贝母令人易产，未临月者用升麻代之）。

《续名医类案》

陆肖愚

谢四府女与夫俱在青年，妊将七月，日间因责婢大怒，又与夫反目，号哭半日夜，即不能寐，至夜半忽口中谇语不已，目上视，竟于床褥中裸形而出，其夫力抱之，遂昏愤不知人事，问之不语，医不

识何病。或以为祟。谢公夜起著红袍，执剑压之，而号叫笑骂，千端万状。召诊悉其症，乃令数妇执而脉之，六部洪数有力，曰：此子疔间症，非祟也。症亦时见，但此殊甚耳。用真正霞天曲、贝母、黄连、山梔、天麻、青皮、白芍、龙胆草、青黛，加灯心、竹沥，一剂而和，二剂减半，四剂全瘳。问其病状，毫不知也。

《续名医类案》

吴桥

程钩妻孕且四月矣，著屐而履桥版，偶失足仆地，扶起则目上视而瞑，昏愦而为鬼言。迎桥视之，寸口脉动而微，尺脉按之不绝，右差胜，曰：非直病易去也，胎且安，主生男，闻者愕然。乃以大剂参耆加安神宁志，仅服过半，舒气一声，而目微开。问之，则历历所遇，皆亡者，言毕复瞑。复进前药，乃苏，日渐得安，七日而愈。或问，向者榆村程氏妇与此同，而彼七日死，何也？桥曰：往者吾不及见，无敢以口给臆之。今病者故中气虚，妊子食母血尽，母失所养而震惊，出其不虞，气下陷而火上炎，痰壅心络，故愤愤欲死，非真死也。又谓见鬼物者何？《经》云：脱阳者见鬼。此无足怪。

《续名医类案》

郑重光

吴绍先兄令眷，年三十余岁，平素脾虚中冷而爽痰饮，生产多胎，气虚时晕。癸未春间，怀孕一、二月，便下血，服药而止。隔一月，又下血，药亦不止，听其淋漓不断者半月，欲其堕而不堕，反自止。本性畏热喜风，兼嗜瓜果，六月夜分，霍乱大吐，吐后汗多厥冷，遂昏沉不语，手足抽搐，目珠上窜。次日往看，脉弦细而紧软，卧于床，手足微温，手筋惕动，而手即挛，灌以药能咽，呃则欲吐，幸小便未遗，欲小便则有起床之状，人扶起能自立而便，但目不睜，口不能语耳。此因大吐中虚，寒痰上涌，须用中风治法。扬医众议不一，适金

坛周医驻扬，议论相合，于是定方六君子汤，用人参一钱，白术、茯苓、半夏、曲、桂枝、吴萸、姜汁、天麻、橘红、灌服二剂，至夜半回苏，计昏厥一昼夜，次日能言，谓周身皆痛，气塞喉中，胸中胀闷，腹痛作泻，外则筋惕而手拘挛，呕呃不能食。又迎鲍医，亦主温补，议用肉桂，予因频次下血，恐桂破血，易用桂枝合真武汤，换炮姜，救其亡阳虚脱，议用人参一钱，白术、茯苓、炮姜、附子、芍药、桂枝、甘草，姜枣为引，如此温补之剂，服一月方能坐床进食。后渐次去附子，調理而愈。至冬杪生产一男，母子平安。若病时执怀孕不用附子、半夏之说，病必不除，则产母不保，母不保，又安有子乎？程案产后中风，则气血交虚，故施重剂，此胎前中风，因未产不甚虚，故剂轻也。

《素园医案》

程文圃

吾郡别驾何公，续迁甘肃，眷属仍居郡城。宅中一仆妇，重身九月，偶患头痛，医作外感治，其痛益甚，呕吐汗淋，至二更时，忽神昏肢掣，目吊口噤，乍作乍止。何公少君六吉兄，当晚遣力相召，晓造其宅，六吉兄告以病危之故，人视搐搦形状，诊脉虚弦劲急，谓曰：“此子痼证也，势虽危险，幸在初起，当不殒命。”六兄曰：“昨夕仓皇，恐驾到迟，故近邀女科一看，亦言证属子痼，然药不效奈何”出方阅之，羚羊角散也。予曰：“此乃古方，原属不谬，不知子痼疾作之由，因子在母腹，阴虚火炽，经脉空疏，精不养神，气不养筋，而如厥如痼，神魂失守，手足抽掣。其病初头痛者，即内风欲动之征也。医家误作外风，浪投疏散，致变若此。至羚羊角散方内，惟羚羊人肝舒筋，当归、枣仁补肝益血，茯神安神，甘草缓急，与证相符，其余防、独、木香、杏仁，俱耗真气，苁仁下胎，多不合宜，岂可以为古人成方，漫不加察耶。”于是乃以本方除去防独等味，参人熟地、沙参、麦冬、阿胶、芝麻，养阴濡液，少佐钩藤、桑寄生，平肝熄风。头煎服后，其搐渐平，随服二煎，搐定，头痛亦减。六兄喜甚。予曰：“病来势暴，

今虽暂熄，犹恐复萌。”嘱再市药一剂，尽今晚服尽，搐不再作，方许无虞。次日复诊，痛搐俱止，神清脉静，纳食不呕。方除钩藤、寄生，加白芍、玉竹、女贞、石斛。逾月分娩，母子俱得无恙。

《杏轩医案》

吴簾

万氏怀孕，四肢不能伸缩，服祛风燥湿之剂，头晕神昏，食少痰甚，手足抽搐不已。余诊脉弦虚数，系营卫虚损，肝火血燥所致。即用八味逍遥散，服数帖，肝火退。更以八珍汤加黄芩、山栀、钩藤钩，调理半月乃安。

《临证医案笔记》

李铎

文庠吴佑球令室，癸亥之秋，内热咳呛，痰涎甚多，夜不能卧，日晡发热，手掌心热常灼灼，医治两月，卒无一效。一医作百日癆治，投清润治咳药不应，改用滋补退热药，咳愈甚，更加喘，痰带血丝，食减神惫，形渐羸瘦，猝然闭厥，始则日厥一二次，渐则时厥时醒，医辞不治。伊父王玉川上舍邀余诊视，脉细数，呼吸六七至，询病者言腹内有一阵烧气上冲，则昏闭，口不能言，心中愤愤，余曰：此明是肝火上冲，乃热厥也。乃翁裕丰参军曰：可治否？余曰：此非不治之症，待我用一法止其厥。与当归龙荟丸二钱，白汤下，即拟一方，北沙参、天冬、广石斛、白薇、石蒲、白芍、生左牡蛎、甘草，水煎服，一剂厥止，咳喘亦减。次日照方与服，因未用前丸，午间复发，厥甚轻，仍令速进龙荟丸，厥又止，脉息亦见差缓，并稍能进食，以前方加生地汁，龙荟丸减用一钱，腹中烧气顿除，厥遂不发。越三日复诊，左脉忽见滑疾，自觉腹中有块常动，余以怀麟断，乃胎动之征。其父询其母曰，汛历已四月，妊则或然，乃兼以子痼治，诸病皆痊，冬月果产一女。可见医者即不能确究病之轻重，万不可妄断人之生

死，貽誤生靈，慎之！慎之！

《醫案偶存》

揚毓斌

陳茂才在芝尊閩。妊娠八月，病角弓反張，手足抽勁，目証無光，口噤齒燥，頭搖，舌短焦黃，面色純青，人事不省，醫藥不應。延訪及予。比至，則群醫麇集，持論棼如。予按脈弦細微數不勻。大便秘澀。兩日來，小溲全無。考孕如面青舌焦，子母兩殞，細繹良久。一线生机只在四肢溫潤，唇色不燥，脈不勁大耳。土氣雖弱，尚未全受木克，但脾肺之氣甚弱，用苦寒清降直折風火，恐非脾肺所喜，且苦能化燥。用涼潤息風，又恐重傷脾胃，且雷龍之火得火愈熾。緣前方內用芩、連、丹皮、麥冬、龜板、鱉甲，故議及此。或謂胎已傷，非下去死胎，如何可救？予曰：“脈已沉陷，再用峻劑下胎，正氣不隨之俱去乎！又或難之，曰：死胎留腹，當作何治？予曰：胎產全恃氣血運送，今氣血虛弱，無力送下，再重傷其氣血，不速之斃乎？鄙意但使症減氣復，胎自不墜而下，何可行險自誤。因擬一方如左，候公訂，或又曰：此藥大半服過無效。予曰：前方份量太少，且藥雜多牽制，故自不應，或謂并數劑合算，亦不為少。予笑曰：譬諸一餐飯，分作數日食，飽乎？否乎！眾始默然相引而散。時癸巳仲春。

生牡蠣四兩 白薇八錢 鮮桑枝五錢 大生地一兩 細木通二錢
鱉血炒柴胡八分 黃芪五錢 黃白菊花四錢 香谷芽六錢
稻豆衣五錢

明日不見來延，心疑症或敗矣，為之不安者數日。越五日復延，據稱十五日服尊方，逾半日人事遂清，能言能食，病愈六七矣。未便再讀，且尊方大效，業有成規，遂令前醫接診，每日兩次藥，亦兩帖。不料四五日來，病又如初，予曰：古方古法且不可泥，何況偶中，如何可法？接診人未免不知活變，但鄙人前治不驗，而見信可也。既驗矣，尚懷疑自誤，得非命乎？如此大証多延一日，正氣多受戕……

日。予不任功，亦不愿代人任咎。力辞不获，转念生死关头，倘有挽回，亦一快事。因偕往，见外势较轻，而脉益微弱，搐搦，惊恐怖啼数作。此心神内亏，魂魄不安，雷龙游火不能归宿。因之金木两刑，啼哭乃金不肯受木刑，愤气欲伸，木气亦藉以疏解。大是生机，于是有拟用人参者。予以今时人参多伪不足恃，且此时自以镇补心阳，收摄雷龙游火为急务，非门面套法可以济事。方用：

醋煅紫石英三钱 真阿胶三钱 炙甘草八分 五味子五分
上桂心五分 生牡蛎二两 炒白芍五钱 煅龙骨三钱 白术四钱
炙黄芪五钱

二十一日，诸症减半，入寐神怯不安。肝气欠舒，前方去阿胶，加抱茯神一两，合欢花二钱。

二十二日，诸恙悉平，惟便溏不除，饮食不香。

白术三钱 炙黄芪三钱 生白芍三钱 五味子七粒 煅龙齿三钱
煨木香五分 醋煅紫石英二钱 牡蛎三钱 桂枝一钱 炙草一钱
谷芽三钱 煨生姜一片

二十三日，诸恙全愈，啜粥加倍，精神大长。用四君子加龙齿、牡蛎、白芍、陈皮、谷芽调之。二十四日辰刻，气顺胎下，产母安然无恙，饮食有加焉。向非病去正复，调治得宜，安能保泰若此。生死关头，间不容发，抑何险哉。弥月安健如常，为之快。

宋四姑，妊娠八月。吐逆，胸闷，心烦，腰以后痛切，周身努力，角弓反张，咬牙痉厥，日夜频作。入夜神识不清，不思食，杂治十余日不效，惶然求治。予按脉，左关尺沉濡，寸微劲，右滑大。乃土为湿郁，不能转输，胆气失调，相火上逆，留热膈上，其上虽浮热，中下乃困于寒湿，气分既弱，胎无所禀正，恐不育耳。拟方，一剂知，二剂已。

初方：橘皮 姜汁炒竹茹 淡吴萸 土炒 潞党参 茯苓
酒炒白芍 姜汗 大麦糖

诸恙渐平，腰痛甚，前方加：

白於朮 川续断 两服而愈。

《治验论案》

沈祖复

老县前某妇产前子痼，发痉欲死，两目直视，双手乱舞，舌出二寸，胎下不觉，势甚危殆。先生用童便一味，服三日而定，调理乃痊。

北门贝苍陈姓媳，年二十余，怀妊足月，头面四肢浮肿，两目陡然失明。继以痉厥，痰涎上涌，面色青惨，唇紫，牙关紧闭，手足鼓动不止，神识昏糊，目珠直视，脉伏身冷。先生以为热深厥深，邪热引动肝火，风自火生，恐其胎元不保。用羚羊角四分，竹沥二两，随时研末调服。煎药用羚羊角四分，珍珠母、石决明各二两，制胆星七分，滁菊三钱，川贝母三钱，竹沥四两，此午前所服也。晚时再服猴枣一分，月石三分，郁金三分，羚羊角三分，研末调服。明晨请先生诊视，风痉已定，神识时糊时清，牙关时开时闭，腹中大痛。先生恐其即产，而羚羊角凉肝之药，不合用。濂珠三分，川贝母三分，天竹黄三分，制胆星三分，钩钩、竹茹泡汤调服。濂珠虽寒，书有下死胎胞衣之说，故可用之。服后神识已清，神倦嗜卧，呼吸有度，两脉起而不伏，腹痛亦止。唯舌红唇燥，两颧转赤，显然阳明之热也。再用川连五分，川贝母三钱，子芩钱半，知母三钱，竹卷心三十片，连翘三钱，茅、芦根各七钱，钩钩三钱，黄杨脑七个。明日腹中又痛，胎儿下坠，已经腐烂，而邪热未清，瘀不得下。再用丹参二钱，泽兰二钱，郁金二钱，茺蔚子三钱，归尾钱半，桃仁泥二钱，炒川贝一钱，藏红花五分，西血珀五分，入煎取气而不取味，加童便一小杯冲服。明日又去诊视，瘀行不多，脉右数面左郁，舌苔深绛，面色仍红，微热不扬，咳不畅达，口渴咽干。用泄肺去瘀法：枇杷叶、大贝母、茺蔚子、丹参、郁金、桃仁泥、焦山楂、炒瓜蒌皮、炒牛蒡子、制僵蚕、光杏仁，服后咳止，瘀血盛下，大便干结。仍用丹参、泽兰、生山甲、全瓜蒌、火麻仁、郁金、桃仁泥、橘络、焦山楂、益母草，煎汤代水，诸恙皆平，能饮稀

粥，调理数日而愈。

《医验随笔》

王埏

丁未戊申间，余与诸窗友伴读于里中文庙。有窗友燕君名受祯，宽于量，而艰于读，年近三旬，文笔尚未清，故屡试蹶焉。夏间其继室患发热，医药数进，热如故。乃邀余治。诊其六脉沉数，右尺偏旺。余曰，此阴火大动也，不但发热，兼苦头晕。视其方，则所服皆四物类也。乃投以知柏地黄汤，三服而热除。越三月，忽痼疾发，手足反张，昏不知人，痰涎壅结。其里有郭医，以半身不遂治之，药数进而痼发如故。不得已，邀余治。至其家，人适清醒，急诊其脉，则少阴动甚，右寸滑大。乃告之曰，此喜事也。按之而散，胎必三月，其妻红涨于面，首肯之。燕曰，既是胎，何得痼疾。余曰，阴火内甚，胎必不安。壅而生痰，流连肺管，故发则气晕昏倒耳。医书谓之子痼，治之极易。今郭某以半身不遂治之，岂有少年妇人而半身不遂者。乃命服羚羊角散，戒之曰，初服后必大吐痰，忽致惊怪。吐后再服两付，保无事矣。切勿听信郭某，致貽后患也。燕听之，数日而愈。

《醉花窗医案》

沈奉江

病者：陈姓媳，年二十余。

病名：燥痉昏厥。

原因：怀妊足月，腹中素有伏热，因感秋令温燥，陡然病剧，午前特来邀诊。

症候：头而四肢浮肿，两目陡然失明，继以痉厥，痰涎上涌，面色青惨，目珠直视，唇紫口噤，手足鼓动不止，神识昏糊。

诊断：脉伏身冷，舌红兼紫，此热深厥深，燥热引动肝火，风自火生，挟痰刺激神经，恐其胎元不保。

疗法：清热熄风，潜阳涤痰，以急救之。

处方：羚羊角四分 珍珠母二两，生打 滁菊花三钱
川贝母三钱，去心，劈 双钩藤三钱 石决明二两，生打 制胆星七分
淡竹沥四两

晚间，再服猴枣一分、月石三分 郁金三分、羚羊角三分，共研细末，用竹沥二两调服。

次诊：明晨复诊，风痉已定，神识时糊时清，牙关时开时闭，腹中大痛，恐其即产，而羚羊角凉肝之药不合，惟濂珠虽寒，书有下死胎胞衣之说，故可用之。

次方：濂珠三分 川贝母三分 天竹黄三分 制胆星三分
共研细末，用双钩藤、淡竹茹各三钱，泡汤调服。

三诊：服后神识已清，神倦嗜卧，呼吸有度，两脉起而不伏，腹痛亦止，惟舌红唇燥，两颧转赤，显然阳明之燥热也。治以清润泄热，兼佐熄风。

三方：小川连五分 青子芩钱半 川贝母三钱 水芦根七钱
黄杨脑七个 青连翘三钱 肥知母三钱 竹卷心三十支 鲜茅根七钱
双钩藤三钱

四诊：明日复诊，腹中又痛，胎儿下堕，已经腐烂，而邪热未清，瘀不得下，改用通瘀以泄浊。

四方：苏丹参二钱 川郁金二钱，打 当归尾钱半 桃仁泥二钱
泽兰叶二钱 炒川贝一钱 茺蔚子三钱 藏红花五分
西血珀五分，入煎，取气而不取味 清童便一小杯，冲服

五诊：明日又去诊视，瘀行不多，脉右数而左郁，舌苔深绛，面色仍红，微热不扬，咳不畅达，口渴咽干，用泄肺去瘀法。

五方：枇杷叶五钱 茺蔚子二钱 广郁金三钱，打 炒蒺藜三钱
川贝母三钱 苏丹参三钱 桃仁泥二钱 炒牛蒡钱半 焦山楂二钱
制僵蚕钱半 光杏仁二钱

六诊：服后咳止，瘀血盛下，大便干结，治以通瘀润肠。

六方：苏丹参三钱 生川甲三钱 桃仁泥二钱 炒山楂二钱
泽兰叶三钱 广郁金三钱 广橘络一钱 炒麻仁三钱 全瓜蒌四钱，并
益母草一两，煎汤代水

效果：服二剂，诸恙皆平，能饮稀粥，调理数日而愈。

廉按：此由燥热动风，风火挟痰，刺戟脑筋，陡发神经病状，即
产科书中之子痫症也。就予所验，凡临发子痫者，势轻而缓，母子均
可两全。若势急而重，胎儿固多抽坏，其胎多腐，即产母寿亦立倾。
幸而对症发药，急救得法，胎虽不保，母得幸全，似此佳杂，可谓后
学师范。

《全国名医验案类编》

严继春

胡陈氏，年三十四岁，住马回桥。

病名：热病痾厥。

原因：孕已七月，腹中早有伏热，时时心烦，不为之医治，适因
与夫反目，号哭半日，怒火上冲，陡发痾厥。症候：初则谵语不已，两
手发痉，目窜上视，不省人事，约半时许，口吐涎沫，神识即醒。继则
手足瘈瘲，神昏发厥，问之不语。

诊断：脉六部弦洪有力，舌红带紫，此陈良甫所谓子痾。由心肝
热盛鼓风，气升痰升，刺激脑筋，顿失知觉运动之常，所以痾而且厥
也。似此脉症，胎防抽坏，姑以急救母命为首要。

疗法：急急大泻心肝之火，故以连、芩、芍、胆为君，然火假风
威，风助火势，故以羚、麻、桑、菊为臣，使火息风平，则脑筋自安，脑
筋安而痾厥自止，佐以马宝、西黄，异类灵动之品，以开痰清神，使
以竹茹，清肝络以舒筋也。

处方：小川连一钱 生白芍五钱 明天麻钱半 白池菊二钱
青子芩三钱 龙胆草一钱，盐水炒 冬桑叶二钱 淡竹茹三钱

先用羚角片八分 真马宝一分 西牛黄一分煎汤调下。

次诊：据述先进羚角煎，调马宝散二服，昏厥已醒，痼愈其半。继服汤药两煎，犹觉胎热上冲，时欲眩晕。诊脉寸大于关，关大于尺，均兼弦数，此肝风尚未尽息，挟痰火与胎热，同逆而上，即产科书所谓子悬症也。议以潜镇清熄，使肝阳潜而风息，风息则火降痰平，痰平则诸症悉除矣。

次方：石决明八钱，生打 冬桑叶三钱 明天麻钱半
盐水炒川连七分 青龙齿三钱，打 白池菊二钱 辰茯神四钱
陈木瓜一钱

先用金银戒指各一枚 灯心三小帚 煎汤代水。

三诊：眩晕大减，胎上冲心亦轻，惟腹中自觉内热，胎动不发，便秘溺涩。幸而脉弦转柔，数象渐缓，舌红润，略现薄苔，此心肝火平而伏热未清也。议清伏热以安胎。

三方：青子芩钱半 东白薇三钱 冬桑叶二钱 丝瓜络三钱，带子
生白芍三钱 生甘草五分 淡竹茹三钱 肥知母三钱

先用淡海蛇四两 大地栗四个 煎汤代水。

四诊：一剂而胎动渐安，二剂而大便已通，色如红酱，溺虽利而尚热，脉两尺滑搏，此胎未抽坏可知。议养胃阴为君，兼清余热。

四方：鲜石斛三钱 原麦冬钱半 冬桑叶二钱
青皮甘蔗四节，切碎 北沙参三钱 生白芍三钱 淡竹茹二钱
雅梨肉一两，一片

效果：连服四剂，胃纳日增，精神渐复而瘳。

廉按：妊妇热病痼厥，较但病风痉者尤重。方用龙胆泻肝合黄连泻心加味，前哲陆肖愚曾用此法而效。妙在先用羚角汤，送服马宝西黄，较之陆氏方法，更为着力。惟就余所验，马宝虽为子痼之特效药，服后往往痼厥即除，隔二三日或四五日，胎亦随落。此案幸而保全，殆由孕妇素禀尚强，胎元亦足之故欤。

《全国名医验案类编》

周镇

庄根寿，渔业。庚申五月，其室怀妊六月，身热一起，烦躁如狂，厥而不语。少顷微省，热炽牙灰，口渴饮冷，头疼脊痛，呕吐绿水，脊强不能转侧。脉数不起，苔白。始因骤惊动肝，邪热内蕴，由太阳、阳明内窜厥阴，有脑脊膜炎之征。矧有身孕，图治更难。真滁菊三钱，蒿本三钱，秦艽二钱，薄荷头钱半，忍冬藤一两，双钩勾七钱，竹茹钱半，川连八分，晚蚕沙七钱，赤苓神二钱，紫贝齿八钱，珍珠母八钱，丝瓜络五钱，茅根一两五钱。另羚羊尖一分，熊胆一分，制雄精二分，研细末，灯心汤服。吐止，头痛烦渴即减。原方出入，再剂而定。嗣某君照方调治，险境虽离，内热不清。渔户信外邪，攘神驱邪费耗甚多，不与调理。迟延至产孩亦熏坏，妇竟食疗而渐痊。

《周小农医案》

妊娠患疟

薛立斋

一妊妇疟久不已，噎气下气，胸腹膨胀，食少欲呕，便血少寐，此属肝脾郁怒，用归脾汤加柴胡、山栀渐愈。又用六君子汤加柴胡、山栀、升麻而愈。

一妊妇患疟已愈，但寒热少食，头痛，晡热内热，此脾虚血弱，用补中益气汤加蔓荆子，头痛顿止。又用六君子汤加芎、归，饮食顿进。再用逍遥散加白术，而寒热愈。

《续名医类案》

陈良甫

一妊妇六七个月而疟疾，先寒后热，六脉浮紧，众医用柴胡、桂

枝无效。陈言：此疾非常山不愈。众医不肯，因循数日，病甚无计，勉强听之。遂用七宝散，一服愈。

《续名医类案》

薛立斋

一妊妇三月，饮食后因怒患疟，连吐三次，用藿香正气散二剂，遂用安胎饮一剂，而愈。后因怒痰甚狂言，发热胸胀，手按少得，此肝脾气滞，用加味逍遥散加川芎，二剂顿退，四剂而安。

《续名医类案》

薛仲芳

一孕妇疟疾大作，脉得弦数，用知母四钱、柴胡三钱、陈皮二钱、甘草一钱，并、河水各一碗，煎至一碗，露一夜，明早隔汤顿服而愈。不愈加生首乌五钱，自盗汗甚加黑豆三钱，食多加枳壳二钱，此方热多者宜之。

一孕妇疟疾，右脉微滑，左脉微弦，曰：脾虚生痰也。以白术五钱、生姜三钱、井河水煎，露一夜，温服而愈。此方寒多者宜之。

《续名医类案》

王孟英

陈足甫室，怀妊九月而患疟，目不能瞑，口渴自汗，便溏气短。医进育阴清解法，数剂不应，改用小柴胡一帖，而咽痛舌黑，心头绞痛。乃翁仰山闻之，疑其胎坏，延孟英过诊。曰：右脉洪滑，虽舌黑而胎固无恙也。病由伏暑，育阴嫌其滋腻，小柴胡（汤）乃正疟之主方，古人谓为和剂，须知是伤寒之和剂，在温、暑等证，不特手足异经，而人参、半夏、姜、枣，皆不可轻用之药。虽有黄芩之苦寒，而仲圣於伤寒之治，犹有渴者去半夏、加栝蒌根之文，古人立方之严密，何后人不加体察耶？投以竹叶石膏汤，疟止便闭，口渴不体。与甘

凉濡润法数帖，忽腹鸣泄泻，或疑寒凉所致。孟英曰：吾当以凉药解之，人莫识其意，问难终朝，语多不备录。果以白头翁汤两啜而愈。

迨季秋娩后，发热不蒸乳，恶露淡且少，家人欲用生化汤，孟英急止之。曰：血去阴更伤，岂可妄疑瘀停而攻之？与西洋参、生地、茯苓、石斛、女贞、旱莲、甘草为大剂，数日而安。

继因触怒，少腹聚气如瘕，酸痛夜甚。人又颖为凉药凝瘀所致，孟英力为辨析。与橘核、橘叶、橘络、楝实、苡蓉、木香、(山)梔炭、乌药、丝瓜络、海蛇、藕(肉)、石斛、两头尖等药，外以葱头抖烂贴之，两服后，腹中雷鸣，周身汗出而痛止。人见其汗，虑其虚脱，急追孟英视之。曰：此气行而病解矣。但脉形细数，阴津大伤，苔黄苦渴，亟宜润补。奈枢机窒滞，滋腻难投，且以濡养八脉为法。服之各恙皆蠲，眠食渐适。缘平素多郁，易犯痧气，频发脘痛，屡次反复。孟英竭力图维，幸得转危为安，渐投滋补而愈。

《王氏医案》

王燕昌

一幼妇，每孕必疟。医用柴胡，治愈仍矣；及产，不药自愈。

《王氏医存》

妊娠下痢

薛立斋

地官胡成甫之内，妊娠久病，自用消导理气之剂，腹内重坠，胎气不安。又用阿胶、艾叶之类，不应。薛曰：腹内重坠，下元虚也；胎动不安，内热甚也。遂用补中益气而安。又用六君子汤全愈。

《续名医类案》

盛用敬

陈杰妻有胎而患痢数月，昏厥六日矣。所下若屋漏水，棺斂已具。盛诊之曰：无虑。药之痢止，而胎动。越数日生一子。（吴县志）

孙文垣表侄女孕已七月，患赤痢，腹痛后重，体素弱，以白芍三钱，条芩一钱五分，白术、地榆各八分，甘草三分，二帖而愈。后因稍劳，痢复作，以当归三钱、川芎一钱五分、真阿胶二钱、艾叶三分，一帖全愈。（此非积滞为痢，故治法如此）。

《续名医类案》

朱丹溪

八婶将产患痢，脉细弦而稍数，后重里急，用滑石三钱、白芍二钱、枳壳炒一钱五分、水通二钱、甘草五分、白术二钱、茯苓一钱、桃仁九枚，研同煎。

《续名医类案》

张路玉

太学夫人怀孕七月，先疟后痢，而多鲜血，与补中益气汤加吴茱萸、制川连而愈。每见孕妇病疟，胎损而致不救者多矣。

郝氏妇怀孕九月患疟，三四发后即呕恶畏食。诊其脉，气口涩数不调，右关尺弦数微滑，此中脘有冷物阻滞之候。以小柴去黄芩，加炮姜、山楂，四服稍安思食。但性不嗜粥，连食鸡鸭之类，遂疟痢兼并，胎气下坠不安。以补中益气去黄芪，加木香、乌梅，五服而产，产后疟痢俱不复作矣。其仆妇产后数日，亦忽下痢脓血，至夜微发寒热，小腹胀痛，与《千金》三物胶艾汤去榴皮，加炮黑山楂，六服而瘳。

万密斋治典史熊镜妻有孕，先于五月病热，或治之变疟，更医加痢。至八月疟痢并行，脉左沉实有力，右浮大而虚，此男娠内伤风

也。用补中益气汤加条芩、焙白术，十余剂疟痢俱止。后以胡连丸调理而安。后生一男。

《续名医类案》

余听鸿

常熟寺前街李吉甫先生夫人，妊娠七月，痢下红白。他医治以利湿清热分消，痢更甚，肠滑后重，一日夜百余度。裴菊村前辈诊之，意欲治以补中益气汤，恐升提胎元，欲用温补，又恐胎前忌热。左右踌躇，邀余会诊。脉滑利而少力，腹中气机湿滞已通，舌绛滑无苔，头眩耳鸣，虚热。余曰：治病不在胎前产后，有病则病当之。《内经》云：陷者举之，当用升提。脱者固之，当用酸涩。若再用通套利湿之方，恐胎元滑脱矣。拟补中益气法，重用参、术，轻用升、柴，再以木瓜、肉果、煨姜，升提温涩。服数剂，略稀。余曰：滑脱太甚，非堵截之法不可，即以参附汤调赤石脂末，仍服前方。见其舌红渐渐转白，舌燥转润。余曰：清阳已经上升，而能布津于上矣。痢势渐减，再以五味子、木瓜、干姜等研末和赤石脂，饭糊为丸，每日用附子一钱，别直参三钱，煎汁送丸四钱。服药三十余剂，每日痢下仍有十余次，胃气亦苏。分娩时母子俱全，然痢尚有六七次，再服异功、参苓白术等收功。吉甫曰：此儿定然热体矣。余曰：母子同气，岂有母能服热药之寒体，而子乃为热体乎。此儿三四岁时，有痰哮喘病，非温不宜，母子同气之言，洵不谬也。

《余听鸿医案》

张锡纯

天津张氏妇，年近三旬，怀妊，受温病兼下痢。

病因：受妊已六个月，心中恒觉发热，继因其夫骤尔赋闲，遂致激动肝火，其热益甚，又薄为外感所束，遂致温而兼痢。

证候：表时俱壮热无汗，心中热极，思饮冰水，其家人不敢予。

舌苔干而黄，频饮水不濡润，腹中常觉疼坠，下痢赤多白少，间杂以鲜血，一昼夜十余次。其脉左部弦长，右部洪滑，皆重诊有力，一息五至。

诊断：其脉左部弦长有力者，肝胆之火炽盛也。惟其肝胆之火炽盛下迫，是以不但下痢赤白，且又兼下鲜血，腹疼下坠，为其右部洪滑有力，知温热已入阳明之府，是以舌苔干黄，心为热迫，思饮冰水。所犹喜者脉象虽热，不至甚数，且又流利无滞，胎气可保无恙也。宜治以白虎加入参汤以解温病之热，而更重用芍药以代方中知母，则肝热能清而痢亦可愈矣。

处方：生石膏三两，捣细 大潞参五钱 生杭芍一两 粳米五钱 甘草三钱

共煎汤三盅，分三次温饮下。

复诊：将药三次服无，表里之热已退强半，痢愈十之七八，腹中疼坠亦大轻减，舌苔由黄变白，已有津液，脉象仍然有力而较前则和缓矣。遂即原方为之加減俾再服之。

处方：生石膏二两捣细 大潞参三钱 生怀 山药八钱 生杭芍六钱 白头翁四钱 秦皮三钱 甘草二钱

共煎汤三盅，分三次温饮下。

方解：按此方即白虎加入参汤与白头翁汤相并为一方也。为方中有芍药、山药，是以白虎加入参汤中可省去知母、粳米；为白虎加入参汤中之石膏，可抵黄连、黄柏，是以白头翁汤中止用白头翁、秦皮，合用之则一半治温，一半治痢，安排周匝，步伍整齐，当可奏效。

效果：将药如法服两剂，病遂全愈。

或问：《伤寒论》用白虎汤之方定例，汗吐下后加入参，渴者加入参。此案之证非当汗吐下后，亦未言渴，何以案中两次用白虎皆加入参乎？答曰：此案证兼下痢，下痢亦下之类也。其舌苔干黄毫无津液，舌干无液亦渴之类也。且其温病之热，不但入胃，更随下痢陷至下焦永无出路。惟人参与石膏并用，实能升举其下陷之温热而

清解消散之，不至久留下焦以耗真阴。况此证温病与下痢相助为虐，实有累于胎气，几至于莫能支，加人参于白虎汤中，亦所以保其胎气使无意外之虞也。

《医学衷中参西录》

吴鞠通

癸亥七月初五日，汪氏，三十七岁。痢疾古称滞下，况久病脉实，欲便先痛，便后痛减，其为积滞未清无疑。非网开一面不能补虚，仪温下法，所以敢用此者，经谓：有故无殒，故无殒也。

生大黄三钱 官桂一钱五分 焦神曲二钱 炒白芍二钱
黄芩一钱五分 南查炭一钱 老厚朴二钱 云连一钱 广木香一钱
桃仁泥一钱 归须一钱 水四茶杯，煮成六分三茶杯。先服一杯，候四个时辰问病人再便腹不痛，止后服；若欲便之先痛减其半，再服一分之半；痛仍照前再服一分；其第三次亦如前候法。

初七日：服前药全然不痛。

焦白芍一钱五分 茯苓二钱 广木香八分 黄芩炭八分
云连酒炒，三分 老厚朴一钱 焦茅术一钱 莲子二钱 广皮炭一钱煮二杯，分二次服。

初九日：滞下腹痛，已去七、八，咳嗽冷痰，脉近缓，仍然鸡鸣欲便。议宣滞之中，兼醒脾胃两阳。

茯苓块四钱 厚朴二钱 制茅术三钱 焦白芍二钱 半夏二钱
煨肉果一钱五分 黄芩炭一钱二分 广皮一钱 广木香一钱煮三杯，分三次服。

《吴鞠通医案》

何拯华

詹姓妇，年三十一岁，住念亩头。

病名：伏暑子痢。

原因：妊娠已七个月，夏季吸受暑气，伏而不发，至仲秋食鸭，积热下郁肠中而化痢。

症候：下痢赤多白少，如酱色紫，腹中滞痛，里急后重，解出颇难，必转矢气，痢即随出，日夜二三十行。

诊断：脉右弦滞，左弦小滑数，舌边紫赤，苔黄薄腻。脉症合参，此产科心法所谓子痢也。最防胎动而堕，饮食起居，亦宜谨慎，勿谓言之不豫焉。

疗法：法当凉血安胎，以当归黄芩汤合香、连为君，佐香、砂以调气舒肝，虽不用治痢套方，正所以治孕身之痢也。

处方：油当归二钱 生白芍三钱 青子芩钱半 清炙草五分
青木香六分 小川连七分 制香附钱半 带壳春砂五分，杵

效果：二剂痢即轻减，原方加鲜荷叶一钱拌炒生谷芽三钱，再进二剂，痢止胃动而愈。

廉按：孕妇患痢，治之极难，古人有三审五禁之法，三审者：一审身之热否，二审胎之动否，三审腰之痛否。五禁者：一禁槟榔、厚朴破其气，气破胎下也，二禁制军破其血，血破胎下也，三禁滑石、通草通其窍，窍通胎下也，四禁芩、泽、车前利其水，过利必伤阴，胎亦难保也，五禁人参、升麻提塞其气，塞则下痢愈滞，提则胎气上冲也。惟以调气凉血为最稳，张石顽所谓调气有三善，一使胃气有常，水谷输运，二使腹满腹痛，里急后重渐除，三使浊气开发，不致侵犯胎元也。其药以四制香附带壳春砂为最良，其次白头翁、白桔梗、炒银花、炒香鲜荷叶，又次佛手片、鲜茉莉、玫瑰瓣、代代花之属，凉血莫妙于芩、芍、连、梅、蒿、柏等品。此案方法，适合调气凉血之作用，既不碍胎，又能除痢，稳健切当，正治孕痢之良剂。

《全国名医验案类编》

周镇

任右，小疽。丙辰菊秋，怀妊已七月，大便旬日不行，伏热内蕴

而为红痢兼白，肤热溲红。脉细濡，舌红。此妊体液亏热灼，积已熏干，非清润不行。疏火麻仁、干苁蓉、归身、白头翁、黄柏炭、白芍、乌药、莱菔子、楂炭、北沙参、金铃子、山梔仁、玄明粉、香连丸。再剂，积矢渐解，痢由数十次减至六次，原方出入而痊。迨足月，生一男。

王右，阳明乡。庚申八月十六日诊：怀妊七月，下痢纯血，早晚三十余次，愈甚。咳嗽痰白，哺后身热。伏邪感风，兼有各滞，恐其流产。白芍、淡芩炭、槐花炭、生地炭、地榆炭、扁豆花、新会皮、白头翁、秦皮、黄柏、侧柏炭、荆芥、青蒿、葛根、香连丸。服后，痢减至每日三次，红色亦淡，热势减，咳夜甚，再加清肺经伏热之品而瘳。

吴妇，癸亥八月十九日诊：怀妊八月，手阳明司养，伏热挟积留恋，而为滞下红白，腹痛。拟清积热。白头翁、秦皮、白芍、淡芩炭、扁豆花、白槿花、银花、金铃炭、地榆炭、荠菜花、竹茹、桑寄生、野苳麻根、玄明粉。另香连丸钱半加苦参子去碎五十粒，冰糖汤送服。数剂，便解痢止。

《周小农医案》

翟竹亭

毗邻周华堂妻，年三十余，身孕五月，患疫。初得寒热往来，某医投以解表辛散之药，而病日剧，兼大便脓血，日夜二三十度，胎儿上冲心，思饮冰水，腹痛如锥刺；又请某医，以为痢疾，急于安胎，遂投十全大补、八珍、胶艾等汤，泄泻胎动，竟无宁刻。不得已迎余往治，诊得六脉同等洪大已极，知邪流入大肠，乃挟热下利证了。吴又可云：“古有悬钟之喻，梁腐而钟未有不落者。”更加某医发表温补，大剂连进，火上添油，能无坠胎之虞，非大下决无生理。此时，芒硝、大黄即是安胎良药，治乱能将也，用大承气汤加减，辰时服下，午时大便不解。又服一碗，至戌时泻下，如坏瓜烂肉者甚多。至夜渐能安枕，热去六七。《内经》云：“大毒治病，衰其半而止。”后改四物汤，加养阴退热清温化毒诸味，十日后，方得战汗而愈。子母两安，儿子

已十余岁矣。某医生只知安胎，不知通因通用，有是证则投是药，智圆何碍行方。

加减大承气汤

大黄 15 克 芒硝 10 克 厚朴 10 克 当归 12 克 金银花 12 克
枳壳 10 克 连翘 10 克 木通 6 克

加减四物汤

当归 12 克 川芎 10 克 白芍 12 克 生地 10 克 黄芩 6 克
柴胡 10 克 地骨皮 10 克 知母 6 克 金银花 12 克 栀子 6 克
连翘 10 克 甘草 6 克

《湖岳村叟医案》

陆正斋

钱某某，女，31 岁。妊娠三月，泻稀，夹红白粘冻，腹痛阵作，不思纳谷，苔薄黄腻，脉滑弦。湿热壅结肠胃，法当清化。

当归身 8 克 土炒白芍 9 克 川连 3 克 淡吴萸 0.5 克
炒黄芩 3 克 广木香 3 克 茯苓神各 4.5 克 大丹参 8 克
广陈皮 4 克 炒粳米 12 克

二诊：药后泻转白冻，腹痛见轻，喜按喜温，饮食未见增进，乃宜理气调营，佐以温通为是。

当归身 8 克 炒白芍 9 克 炮姜炭 1.5 克 云茯苓 9 克
法半夏 6 克 广陈皮 4 克 煨木香 3 克 西砂仁 1.5 克
炙甘草 1.5 克 炒陈仓米 18 克

三诊：泻减未已，神疲，瘦少，不思纳谷。中土虚馁可知，拟方扶土安胎。

土炒洋参 3 克 茯苓神各 4.5 克 当归身 4.5 克 炒白芍 9 克
土炒白术 8 克 广皮白 3 克 炙甘草 1.5 克 粳米 9 克

《陆正斋医疗经验》

妊娠便干

齐秉慧

曾医房婢，怀孕三月而患热病，求予药。吾见其口燥心烦，渴欲饮冷者，阳明里热也。法宜白虎汤以撤其热；汗出恶热，大便秘结者，胃实也。法宜调胃承气汤以荡其实；口若咽干者，少阳腑证也。法宜黄芩以泻腑热；舌苔干黑，芒刺满口者，内火烁干精液，阴欲竭之征也；腹微痛，而胎欲动者，热邪逼及胞胎也。若不急行驱阳救阴之法，胞胎立坏，不可为矣。即用白虎汤合调胃承气汤，加黄芩一剂，而热势略杀，再投一剂，泄下二次，结去津回，诸症皆愈，其胎立安。比但治其病，不必安胎而胎自无不安也。

《齐有堂医案》

妊娠泄泻

薛立斋

一妊妇，停食腹满，呕吐吞酸，作泻不食，以为饮食停滞，兼肝木伤脾土。用六君子汤以健脾胃，加苍术、厚朴以消饮食，吴茱萸所制黄连，以清肝火，诸症悉愈。又以六君加砂仁调理，而脾土乃安。

一妊妇呕吐胁胀，或寒热往来，面色青黄，此木旺而克脾土，用六君子加柴胡、桔梗、枳壳而安。

一妊娠妇胸胁胀痛，吐痰不食，此脾胃虚，而饮食为痰。用半夏茯苓汤渐愈。又用六君子加枳壳、苏梗、桔梗，而饮食如常。后因恚怒，胁胀不食，吐痰恶心，用半夏茯苓汤加柴胡、山栀而愈（立斋治娠妇，亦时用半夏）。

一妊妇因怒寒热，胸胁胀痛，呕吐不食，状如伤寒，此怒动肝火，脾气受伤也。用六君子加柴胡、山栀、枳壳、丹皮而愈。但内热

口干，用四君子加芎、归、升麻而安。

一妊妇霍乱已止，但不进饮食，口内味酸泛，行消导宽中。薛曰：此胃气伤而虚热也，当服四君子汤。彼不信，乃服人参养荣汤，呕吐酸水，其胎不安，是药复伤也。仍与四君子汤，俾煎熟，令患者嗅药气，不作呕则呷少许，恐复呕则胎为钩动也。如是旬余而愈。

《续名医类案》

陈三农

一妇有孕，常作泻，久泻属肾，用白术四两煮熟，山药二两炒，甘草一两炙，杜仲姜汁炒，松花炒，各七钱，米糊为丸，服愈。

《续名医类案》

薛立斋

边太常侧室妊娠泄泻，自用枳术黄连之类，腹闷吐痰，发热恶寒，饮食到口即欲作呕，强匙许即吐酸不快，欲用祛痰理气。此因脾胃伤而痰滞中脘，若治痰气复伤脾胃矣。遂以参、术、炮姜为末，丸如黍粒，不时含咽三五丸，渐加至三百，后日进六君子汤，寻愈。

进士王缴征之内怀妊泄泻，恶食作呕，此脾气伤也。其君忧之，强进米饮。薛曰：饮亦能伤胃，且不必强。别用人参养胃汤饮之，吐水酸苦，又欲投降火寒药。曰：若然则胃气益伤也。《经》云：损其脾胃者，调其饮食，适其寒温。后不药果愈。

一妇人因怒，胸膈不利，饮食少思，服消导顺气之剂，脾胃愈弱，饮食愈少，大便不实，且无度，久而便黄水、或带白。视其面色黄中隐白，曰：黄色脾虚也，白气肺虚也。朝以补中益气汤升补胃气，夕以六君子汤培补脾气，而愈。

《续名医类案》

王孟英

谢氏妇，怀妊五月，便泻四日，医投姜、附、桂一剂，遂四肢麻冷，气塞神昏，溺闭汗淋，大渴呕吐。延孟英诊之，脉未全伏。先饮以酱油汤，吐渐止。随与(西洋)参、(黄)连、(黄)芩、(黄)柏、(竹)茹、(石)斛、银花、扁豆叶、蒲桃干、芦根、绿豆、以冬瓜汤煎，徐徐温服，外用醋炭薰之，各恙皆差。

次日复诊，脉弦滑，泻未止，以白头翁汤加(西洋)参、(甘)草、银花、扁豆、蒲公英、蒲桃干、砂仁，二剂而痊。

《王氏医案》

何长治

右。温中以理子泻。

焦冬术钱半 炮黑姜四分 煨肉果八分 焦白芍钱半
炒萸肉钱半 炙甘草四分 泡吴萸四分 煨木香五分 补骨脂钱半
沉香片六分 制附片五分 广陈皮八分 加砂仁末四分，冲

《何鸿舫医案》

孔伯华

萧妇，七月二十一日。孕将五月，滑泻月余未愈，口渴思凉，舌赤，脉象滑数，右关较盛，胃热颇盛，亟宜清滋渗化。

生牡蛎四钱 地骨皮三钱 上川连三钱 知母三钱 云苓皮三钱
肥玉竹三钱 车前子三钱 乌药三钱 鲜石斛四钱 建泽泻三钱
炒秫米三钱 川黄柏三钱 芡实米四钱，盐水炒 大腹绒钱 厚朴钱
竹茹三钱 生石膏五钱 鲜西瓜皮两

《孔伯华医集》

妊娠便血

郑重光

李怀白兄令眷，程休如先生之令爱也，怀孕六月而便血者，三月矣，群医治不效。请余治之，诊其脉，濡弱如绵，视其爪甲，全无血色，两足虚肿。问其食，每餐一盂，食后即腹痛泻去，方不胀满。问其药，则四物汤加地榆、秦艽、蒲黄、香附、陈皮而已。余曰：“脉证如斯，脾土大伤，不急补脾，何以大产？”用白术、茯苓、炮姜、砂仁、甘草补脾为君，桂枝、当归、赤芍、艾叶温经为卧，姜、枣和胃为佐。如此四剂，三月不止之便血，一朝而止矣。继以此药，不加减者两月。至次年大产一男，皆吉。产后半年，又复便血，习以为常，一月不药，因劳昏仆，此乃复病。遂卧于床，用参数两，服前药弥月方愈，反不似怀孕之时，真阳在腹而易效也，嗣后遇怒，便血常发。

《素园医案》

林佩琴

薛氏。孕六月，因劳便红，头微眩，此肠风宿恙，因热伤阴分而成。用白芍、地榆俱酒炒、当归、荆芥俱醋炒、山梔炒、茯神、炙草、阿胶酒化、侧柏叶捣，水煎，三服而瘳。

《类证治裁》

妊娠肢痛

严继春

徐氏妇，年三十一岁，住本镇徐家湾。

病名：热窜隧络。

原因：孕已五月，时值夏令，手足初觉麻木，继则剧痛。专科恐

其胎陨，用四物汤加减以安胎，四剂不应，来延予诊。

症候：腹热口干，四肢串痛，不可屈伸，小溲短数。

诊断：脉两尺弦滑，右关洪数，舌红苔黄。予断之曰：此伏热横窜隧络也。

疗法：清宣络热以除痛，痛止则胎自安。

处方：鲜竹茹三钱 焦山栀三钱 白知母三钱 大豆卷三钱
冬桑叶二钱 青子芩钱半 东白薇钱半 鲜荷梗五十

先用丝瓜络一两 嫩桑枝一两 煎汤代水。

效果：连服二剂，痛止胎安，不劳他药而痊。

廉按：伏热横窜隧络，病从旁枝而出，乘其势而宣通之，通则不痛，两剂而痊，信然。

《全国名医验案类编》

妊娠发斑

雷丰

建德孙某之妻，怀胎五月，忽发温毒之病，延丰诊之，已发斑矣。前医有用辛温发散，有用补养安胎，不知温毒得辛温愈炽，得补养弥盛，是以毒势益张，壅滞肌肉而发为斑，其色紫者，胃热盛也，脉数身热，苔黄而焦，此宜解毒清斑，不宜专用安补。遂以石膏、芦根，透阳明之热；黄芩、鲜地，清受灼之胎；佐连翘、甘草以解毒，荷叶以升提。服一帖，身热稍清，斑色退淡，惟脉象依然数至，舌苔未见津回，仍守旧章，重入麦冬，少增参叶。继服二帖，诸恙尽退。后用清补之法，母子俱安。

《时病论》

胎死不下

许裕卿

邵涵贞内子孕十七月不产，不敢执意凭脉，问诸情况，果孕非病。但云：孕五月以后不动。心窃讶之，为主丹参一味，令日服七钱。两旬余，胎下已死而枯，其胎之死，料在五月不动时，经十三月在腹不腐而枯。如果实在树，败者必腐，亦有不腐者，则枯。胎之理可推也。

《续名医类案》

张路玉

马云生妇，孕十三月不产，脉来微结，为处十全大补汤，服至二十余剂而下，胎枯色白。治虽异而胎枯则一也。

《续名医类案》

喻嘉言

顾季掖乃室，仲夏时孕已五月，偶尔下血，医以人参、阿胶勉固其胎，又经一月身肿气胀，血逆上奔，结聚于咽喉胸膈间，饮食才入，触之痛楚，转下甚艰，稍急即呕出，全似噎症。数更医，咸谓胎气上逼。延至秋，计孕已八月，病已极，呼吸将绝，诊之脉与病反，其脉尺部微涩难推，独肺部洪大无伦，其喘声如曳锯，其手臂青紫肿亮，如殴伤色，乃骇曰：似此凶症，何不早商？然不必明言，以滋惊恐，姑以善药投之，通其下闭上壅可也。必求病名，曰：上壅者，以肺脉之洪大，合于会厌之结塞，知其肺当生痛也；下闭者，以尺脉之微涩，合于肉色之青肿，知其胎已久坏也。善药者，泻白散加芩、桔之苦以开之，不用硝黄等厉药也。服一大剂，腹即努痛如欲产状，问欲产乎？曰：肺气开而不行，多时闭拒，恶秽得出可也。奚产之？云：再

进一剂，身肿稍退，上气稍平，下白污如脓者数斗，裹朽胎而出。旬余尚出白污，并无点血相间，可知胎朽腹中已近百日，荫胎之血和胎俱化为脓也。病人当时胸膈即开，连连进粥，神思清爽。然朽胎虽去而秽气充斥，周身为青肿者未去也；胸膈虽宽而肺气壅遏，为寒热咳嗽者未除也。乃一以清肺为主，旬余获痊（然则肺病未成，乃秽浊之气上攻而然耳）。

《续名医类案》

薛立斋

一稳婆之女勤苦负重，妊娠腹中阴冷重坠，口中甚秽，意其胎必死，令视其舌，果青黑。与朴硝半两许，服之，随下秽水而愈。（《济阴纲目》是薛案）

一妇胎死服朴硝而下秽水，肢体倦怠，气息奄奄，用四君子为主，佐以四物、姜桂，调补而愈。（同上）

李将军妻病甚，呼华佗视脉，曰：伤娠而胎不去，将军言：间实伤娠，胎已去矣。佗曰：按脉胎未去也。将军以为不然。佗舍去，妇稍小差。百余日复动，更呼佗，佗曰：此脉固自有胎，前当生两儿，一儿先出，血出甚多，后儿不及生，母不自觉，旁人亦不悟，不复迎，遂不得生。胎死，血脉不复归，必燥著母脊，故使多背痛，今当与汤，并针一处，此死胎必出，汤针既加，痛急如欲生者。佗曰：此死胎久枯，不能自出，宜使人探之，果得一死男，手足完具，黑，长可尺许，佗之绝技，凡此类也。

《续名医类案》

陈斗岩

一妇，孕四月而堕，堕后腹肿，发热气喘，脉洪盛，面赤，口鼻舌青黑，陈曰：脉洪盛者，胎未堕也；面赤者，心火盛而且干也；口鼻舌青黑，肝气绝而胎死也。以蛇脱煎汤，调平胃散加芒硝、归尾，服之

下死胎而安。

华佗甘陵相夫人有妊，六月腹痛不安，华佗视脉曰：胎已死矣。使下之，果下男形，即愈。

《续名医类案》

陈良甫

廖宅厥媳孺人杜氏，生产不下，家人百方救疗皆无效，召诊之，曰：产前脉不可考，但当察色而知之，遂揭帐明烛以察之，其面色赤，舌色青，见此色者知胎已死，母却无忧矣。或问曰：何以知之？答曰：面赤舌青者，子死母活，明矣。躬自合至宝丹二粒，服之胎即落矣。此以见古人处方神速。

《续名医类案》

郑重光

孙思睿翁令眷，壬戌年怀孕丧子，悲泣过伤，因而咳嗽，自秋至冬，渐至喘不能卧，两足水肿，腹胎六月，诸医治咳分利罔效。最后召予，水势泛滥，腹大如鼓，其面反瘦，脉细如丝，两尺全无，此肾水也。孕妇患水，其胎必伤，况两尺脉全无，胎已息矣。宜急治其水，以全孕妇，惟金匱肾气汤可救。遂以本方加人参一钱，附子、肉桂各一钱，如此半月，水忽大下，尽湿被褥，流溢床下而腐胎随堕。有时气脱昏厥，令急服参附汤，而稳婆诸妇，争论不肯煎，盖以扬俗产后，禁用人参故也。幸思翁自主，推诸妇出房，用大铫自煎频灌，半日半夜，通服人参六两，附子两余，夜半回苏，而余咳余水未尽，仍用金匱肾气汤一月，始水尽咳止。

张渭光兄令眷，年逾二十，怀孕三月，时值仲秋，胎动见紫血水。前医犹用生地黄、黄芩保胎，一、二日紫血下不止，腹胀痛甚，延予托诊，脉沉紧，坚而搏手，此下焦冷极，胎已无气，所以血紫也，再用凉血，是益其冷矣。用芎、归、炮姜、砂仁温中活血之药，腐胎始

下，痛止而胀不消，腹坚如石，胁肋胀满，上冲于心，滴水难下，嘔呃烦躁，坐不能卧，卧则气喘，两尺脉皆伏，他部弦细而紧，不任寻按，据症脉竟是肝脏中寒，须作厥阴伤寒治法。其产后芎归套剂，一片不能入口矣，此暑月贪凉食冷，不慎起居，积冷下焦之病。一医犹用参术补中，病家因胀甚不与，病状危笃，力辞不治，坚托无奈，用半硫丸一钱，以开膈上之寒痰，方能纳药。继用生附子、生干姜、肉桂、赤芍、吴萸、半夏、茯苓，每日三剂，兼服半硫丸三十粒，如此三日，方就枕不喘，能下谷汤而胀呃犹然不退，肋下有形而痛。前药换熟附子，又服六、七日，胸口稍软，嘔呃始减，而少腹犹坚，再加当归，以和厥阴之血，腹内碍冰，幸而不利，服半硫丸半月，大便通，色皆青绿，终无一点血下，而腹亦消。扬俗满月洗浴，以致受寒病复，前症皆集，但不喘能卧耳，仍用前药治半月方回，胎前积冷，产后中寒，竟与前孙案相同，但此证不大虚，惟不用人参差异也。怀孕内眷，当以此示警。

《素圃医案》

吴篪

梁氏产期将近，因孩子顽要，向腹一撞。忽然腹痛血多，腰酸下坠。余曰：凡胎脉必滑疾数大，今两手反见细弱，且舌青面赤，是触伤胎元，子殒腹中不下。亟投脱花煎加人参助其气血，当速去其胎，以救其母。连服数帖，则胎逐而下。视其死胎已青，色将腐矣。产妇安然无恙。

《临证医案笔记》

林佩琴

狄氏。月闭劳热，医用通经之品，喘嗽气促，怔忡自汗。又用寒凉退热，食减肌削，乍寒乍热，诊其脉弱数而促，此下损及中也。急用潞参、茯神、黄芪、炙草、白芍、当归、五味、枣仁、银柴胡，四剂诸

症渐减，加山药、熟地炭、莲、枣。补心脾兼调肺肾，热嗽悉除，能进食矣。逾月后，忽腰腹痛，下胎形三寸许，儿头已半损烂。予深自咎，临诊未审其母舌青黑与否，然计其经闭后已六阅月，乃知胞宫血涸，胎形不长，干黑累月，必反枯溃深隐。通经破血药数十剂不能令堕，俟气血通调，瘀腐之膜者，乃去而不复留也。况血枯经闭，漫与三棱、莪术、牛膝、桃仁，不速之毙乎，志此为榨干汁者鉴。

《类证治裁》

徐麟

同乡八石板旧友斯福庆室人，怀孕十月，偶染暑邪，口渴舌红，身热腹痛，当时不即服药，延至六、七日，腹大痛拒按。福庆自付将产，忙催稳婆坐待三日，痛极而厥。厥后崩下水血血块以数斗计，亦色紫黑，腹顿收如平人，痛犹乍作乍止，稳婆不解，妄进血瘀之说以惑之。福庆未之深信，旋叩余扉，邀诊是否血瘀。随诊六脉数实有力，右关洪大而扎，干苔青紫，张口一噎，臭秽之气弥漫一室。病者踉跄似脱命，按其小腹，冷若冰疑，以证合脉，显系胎死腹中，危险之至。若用寻常下胎套方，产妇命必不保，跋前疐后始得治法，拟十全大补汤大剂与服，方未写就，福庆急止而问曰：“素知足下于医一道究心有年，胎产腹痛未已，遽用峻补，于意云何？”余曰：“尊病体质本属虚寒，热充表里三焦，薰蒸互中，胎受热逼，热极胎伤，而热挟胞胎污秽之气升腾于上，所以痛极而厥也，验其苔色青而少腹冷，又兼口臭，如此知其胎已朽败。据述所下之血色紫而瘀，明知下焦阴寒之气。与朽败之秽浊互相感召而凝结。况其人中宫素寒，人身犹小天，暑月六阳尽出乎地上，凡阳气有余于外者，必不足于中，若不急投温补之剂，则所凝之瘀从何而化？若不峻补其气血，则朽败之胎必不能送之使下。吾虽初学知理，大旨知不越此，兄其不必过于谨慎，速进汤药，毋自延误。”于是福庆命侄速去配药，服之约二时许，产妇腹痛大作，狂呼踊跃，促余再诊。刚及暗房室内，

止余快退，余遂还座少顷，而福庆侄妇向余欣欣称贺曰：“先生果有先见之明，药进之后，产下一物，头青腹破，四体筋连骨脱，想在母腹中死已多日耳。”余亦不之遑答，嘱福庆即服生化汤加丹参一剂，可保无忧。旁又一人诘余而言曰：“如热毒逼胎，而方中之肉桂辛热，不啻火上添油，用之反收奇功，此中之义还敢质之。”余乃从容示之曰：“如此证初起能用祛暑解热之品，本可母子双全其命。任其暑热散漫，不即医治，以致热伤胞胎，胎伤热犹未得出路，直待崩决而下，热随崩泄，犹譬诸伤寒热邪传里，用承气汤相仿，热得下而已除，所留者仅血液凝聚，并本然之阴寒，胶滞于子宫，又有腐朽之胞胎，横逆倒置，步位迁移，非肉桂之辛热，焉能散其寒而化其胶结也。更藉参芪归芍地术之多脂多津，以襄助之，则肉桂方能尽其长而神其技也。上古神农医药三品，义只如是。”众座称善。福庆又曰：“假如当时听信稳婆，命岂能保乎？然则善后又当如何？”余思产后百会疼痛，因虚所致，以生化汤加参芪接服五剂。按照常产调护，百会痛止，腹中疼减，药可止矣。外宜谷肉果菜，食养两致，无使过焉。百日工夫，庶克夏元。福庆一切领纳，余亦窃喜，初次临证，得成侥幸之功，而红汗已透襟襦矣！

《医案梦记附案》

王燕昌

一妇，产前诸稳婆扶之走子室内，三日三夜歌少行多，忽死复苏。诊得六脉沉弱、四至，乃胎死也。因伪呼曰：母子两全，宜平身静卧，不许再行走矣。用保产无忧散，一服死胎立下。

一幼壮妾，初孕，胎见脐右，十月未产，腊尽逾两月矣。稳婆伤其胞，日夜晕死十余次，且六七日不食。诊其六脉沉细不数，面色不青，是胎死母可活也。亟用保产无忧散一服，连用脱花煎一服，得死胎下，而大泻；用土炒当归、白术、灶心土服之，痢止；用归、芎、桂、

姜、术、甘等味而愈。

《王氏医存》

许恩普

庚寅年，户部员外宝源局监督胡吕瑞少君淪生鰥尹壶相小产，胎不下者十余日。诸医均以攻伐之药，胎更不下，而疼以绞，命在旦夕。延余诊视，脉濡以体素弱，加以小产误服攻伐，重伤气血，以致血竭而胎不下。以十全大补汤加重，以助气血，加朴硝一钱以化死胎，即下。去硝，用生化汤加参芪以扶气血，数服而愈。

《许氏医案》

沈祖复

迎迓亭某茶肆主，苏人也，其妻怀孕八月，患伏邪，烦躁不安，神情倦怠，面色青晦，两脉沉伏，舌苔焦黑，腹中不动者半月矣，无力延医。先生诊之曰：“此邪热内燔，胎元恐已不保。若顾其胎，命在旦夕。”用寒凉香开之剂，服之胎下，已半体溃烂。后用去瘀等剂化险为夷。

《医验随笔》

巢渭芳

腊月，本城，屠氏媳怀孕，如月足分娩，尚少半月之数，因而劳力数天，腹中作痛，人人知产矣。而婆云未足月，乞先生细为切脉。邀余时，有二鼓后，诊其脉左大右无，重按细丝若脱，当命该媳急速服药，恐痛甚有扞胎之患，小儿决难保矣。随书方用荆芥、菟丝、当归、木香、炮姜、川断、橘红、法夏、川芎、羌活、红花、肉桂，一剂。及四更产一死儿，举家惶而反喜，喻为先生之赐矣。是症稍有不治，两命难全，全在乎神而明之，存乎其人也。

《巢渭芳医话》

吴鞠通

黄芪，三十岁。死胎不下，已三日矣；六脉扎大，心悸甚，汗大出而喘。按俗派金以平胃散加朴、硝，兹阳虚欲脱，前法下咽即死矣，与救逆法，护阳敛汗，阴阳和而胎自下。

辽参三钱 牡蛎五钱 莲子五钱 云苓四钱 龙骨五钱
炙甘草三钱 麦冬朱砂拌三钱 煮三杯，服一杯而汗减喘定，服二杯而死胎自下，服三杯而神定，以天根月窟膏两补下焦阴阳法，两月而安。

《吴鞠通医案》

严继善

范蔚卿之侄媳陈氏，年三十余，住范家埭。

病名：热病殒胎。

原因：仲夏热自内发，身不甚热。晋城就产科钱某诊视，用四物汤去芎，加子芩、白术、苏梗、砂壳、阿胶、杜仲、川断等出入为方，专心补血安胎。旬日势已垂危，不克坐船，改延予诊。

症候：面红齿燥，斜目弄舌，神识昏厥，口秽喷人，手足瘈瘲，腹热如烙，舌伸出口，约有半寸，便秘溺无。

诊断：脉两寸关洪数，两尺如无，舌青紫而燥，边尖鲜红如朱。予断之曰：此伏热盘踞腹中，内蒸殒胎，胎已早腐。欲保胎而胎反不保者，由不知清透伏热，徒以滋补助其热，热遏久灼，则胎自腐也。

疗法：宜急下之，或可冀幸。若犹欲保胎，非但胎不可保，即孕妇生命亦可立倾。其家力恳堕胎方，遂以调胃承气合犀角地黄汤加味。

处方：生川军四钱 元明粉三钱，后入 生赤芍三钱 毛西参三钱
黑犀角五分，磨冲 鲜生地八钱 粉丹皮三钱 生甘草一钱

先用生淮牛膝一两 益母草一两 灯心五分煎汤代水。

次诊：连服两煎，胎落果已臭烂，形色青紫，而神气即清，诸症大减，腹热亦轻，舌红而青亦退，尺脉已起，余亦小数，当通络瘀以清余热。

次方：益母草五钱 苏丹参三钱 丹皮三钱 鲜生地三钱
童便一杯，冲 真西珀八分 拌研飞滑石四钱，包煎 净查肉三钱
鲜茅根八钱，去皮

效果：三剂后，瘀行胃动，粥食日加。后以生藕肉四两，红枣四枚，煎汤代茶，调理旬余而瘳。

廉按：咎氏产宝谓：“面赤舌青，则其子必死，面青舌赤，则其母必亡，若面舌俱见青色，口角两边流涎沫者，则子母二命俱不能保也。”就余所验，亦不尽然。此案热病系实邪，误补则助热殒胎，必然之势。所云急下，或可冀幸，语亦圆活。往往所见胎下之后，母命随之而殒者亦甚多，必腐胎下后，热退神清，别无变症，方可许入坦途。虽然，凡一应殒胎、子死腹中者，须当急下，勿使上奔心胸，然必验其舌青面赤，肚腹胀大，腹冷如冰，口中有秽气出者，方可议下。然犹必审其入之虚实寒热，或宜寒下，或宜温下，或宜峻下，或宜轻下，随其宜而施之，方免貽误。

《全国名医验案类编》

曹惕寅

苏垣神仙庙姚成衣之妻，产难经七日，稳婆固已束手，西医又不能必其安危，举家惶急，莫之所措。复以家贫药资拮据，遂情其邻商余往救。余曰：“生产妇人常事，熟记瓜熟蒂落四字便了。”此人必因用力太早所致。切其脉，或大或小。察其神，面赤舌冷，舌下脉青。论胎已呈绝望之征，即产母亦处危境，爰赠以番佛二尊，配药两剂。一以补气养血润滑为旨，方用败龟板一两，党参四钱，车前子五钱，全当归一两，熟地五钱，冬葵子五钱，川芎一钱半，血余炭二钱，煎汤一大罐，只吃头煎，徐徐饮之。不及一小时，死胎下而产母安。于此可知

操司命之术者，于贫病之人，万不可不存怜惜也。

《翠竹山房诊眼录稿》

其它

汪石山

一妇，形质瘦小，面色近紫，产后年余，经水不通。首夏，忽病呕吐，手指麻痹，拳拳不能伸展，声音哑小，啞不出声。医皆视为风病，危之。汪诊脉皆细微近滑（和滑为孕），曰：此妊娠恶阻病也。众谓经水不通，安有妊理，汪曰：天下之事有常有变，此乃事之变也。脉虽细微似近于滑，又尺按不绝，乃妊娠也。遂以四君子加二陈治之，诸症俱减，尚畏粥汤，惟食干糕香燥之物而有生意。

给事游让溪夫人病新愈，月余经事不行，呕啞眩晕，饮食艰进。医以为二阳之病发心脾，女子不月，法在不治。篁南诊之，尺脉虽小，按之滑而不绝。此妊而恶阻，非凶候也。六君加砂仁数服而安，后产一女。

《名医类案》

薛己

一妇孕三月，呕吐恶食，体倦嗜卧，此恶阻之症，用人参橘皮汤，二剂渐愈，又用六君加紫苏，二剂而安。

一妊娠吞酸恶心，欲作呕吐，此饮食停滞。用六君加曲蘖、炒黑子芩、枳壳、香附治之而愈。

《名医类案》

张子和

一妇，为室女时心下有冷积如覆盆，按之如水声，以热手熨之如冰，于归十五年不孕，其夫欲出之。张曰：可不必出。若用吾药，

病可除，孕可得。从之。诊其脉，沉而迟，尺脉洪大有力（尺洪大有力，方能受孕），非无子之候也。乃先以三圣散吐痰一斗，心下平软；次用白术调中汤、五苓散，后以四物汤和之，不再月，气血合度，数年而孕二子。张尝曰：用吾此法，无不子之妇。信然。

一妇年逾三十，夜梦鬼交，惊怕异常，及见神堂阴府，舟楫桥梁，如此一十五年，竟无妊娠。巫祈覲祷，无所不至，针肌灸肉，孔穴万千，黄瘦发热，引饮中满，足肿。张曰：阳火盛于上，阴水盛于下。鬼神者，阴之灵；神堂者，阴之所；舟楫桥梁，水之用。两手寸脉皆沉而伏，知胸中有痰实也。凡三涌三泄三汗，不旬日而无梦，一月而孕。张曰：予治妇人使有孕。真不诬哉！

少傅颍阳许相公，年五十八岁，如夫人年近三旬，从来十二年不孕。相公欲其有子，命宿诊视。六脉和缓，两尺大而有力（凡妇人两尺大而有力，皆有子）。告曰：此宜子之象也。尝诊相公脉，沉而缓，知精血欠充实耳，宜服大补精血药。市得麋鹿二角，煎胶，制斑龙二至丸一料，服未周年孕，次年生公子。

尚宝少卿徐孺东公，年五十余，有宠九年不孕。闻前药效，亦命制前丸服之，十个月而孕得一子。后以此方与高年艰子嗣者服之，多效。

宿曰：此虽偶中，实有至理存焉。《月令》：仲夏鹿角解，仲冬麋角解。鹿以夏至陨角而应阴，麋以冬至陨角而应阳。鹿肉暖，以阳为体；麋肉寒，以阴为体。以阳为体者，以阴为末；以阴为体者，以阳为末。末者，角也，故麋茸补阳，利于男子；鹿茸补阴，利于妇人。王桢所著甚明，今合二角为二至，乃峻补精血之良药，男妇俱可服，此以血补血，非一切草木之可比也。男子精盛则思室，女人血盛则怀胎，安得不孕？

《名医类案》

程世光

一有胎妇儿腹啼，皆不治。乃倾豆于地，令妇低头拾之，儿啼止。

万密斋曰：儿啼腹中，此症临月将产妇人有之。师母钱氏嘉请戊子有娠九个月，儿在腹中哭，钱大惊，令作男子拜而止之。过二十日生师兄邦孝（师母以下似万门人语，邦孝似万之子）。

李有怀妾高氏，怀妊二十七月，举子后亦长成。

朱丹溪曰：怀孕爱物，乃一脏之虚。假如肝脏虚，其肝气止能养胎，无余用也，不能荣肝，肝虚故爱酸物（治法）。

邢氏亡其名，朱胜非妇偶小疾，命视之，曰：小疾尔，不药亦愈。然不宜孕，孕必死。其家以为狂言，后一岁朱妇得男，其家方有抱孙之喜，弥月妇疾作，急召之，坚不肯来，曰：去岁已言之，无可疗之理。越宿而妇卒，人共奇之。

《续名医类案》

薛立斋

一妊妇，胎六月，体倦懒食，面黄晡热，而胎不长，因劳欲坠，此脾气不足也。用八珍汤倍参、术、茯苓，三十余剂胃渐健，胎安而长矣。

一妊妇因怒寒热往来，内热晡热，胁痛呕吐，胎之八月而不长，此因肝脾郁怒后所致，用六君加柴胡、山梔、枳壳、紫苏、桔梗，病愈而胎亦长矣。

《续名医类案》

鍾大延

一贵家孕妇，小便秘肿胀，面赤发喘，众医莫效。大延诊之，曰：是可弗药，乃胎压膀胱耳。令其周身转运而瘳。

孙卓浮梁人工精岐黄，正德间邑令以宸濠之变，先与送其夫人避山中，病前秘五日，腹膨如鼓，仰而张目，息已微，急召孙，孙曰：此盛暑急驱，饮水过度，羞溺而转脬也。法以猪尿脬吹气贯满，令女婢投入冲之，而溺淋淋下，遂起。

《续名医类案》

孙文垣

一富家妇，大小便秘者三日，市师以巴豆丸二帖，大便泻而小便愈秘，胀闷脐突二寸余，前阴胀裂不能坐卧，啼泣呻吟，欲求自尽。孙曰：此转脬病也。柏树东行根皮一寸，滑石三钱，元胡索、桃仁、当归、瞿麦各一钱，临服人韭菜汁半杯，服后食顷，小便稍行，玉户痛甚，非极用力努之，则不能出。改用升麻、桔梗、枳壳、元胡索，煎成调元明粉二钱，乃提清降浊之意，服后大小便俱行，始不胀急。次日报云，每便时腹先痛，有淡血水，小便短，再以丹参、丹皮、当归、白芍、甘草、青皮、香附、元胡、茯苓、山栀、山查，两帖而安。

孙君又有四卷七十七页一案，亦转脬病，治法大抵如前，唯多令患者横卧，舁有力妇人以患者两脚膝弯架肩上，将下体虚空提起，摇摆数四，则尿脬倒上，徐徐放下，患者去衣不及，小便箭射而出，热如汤，黑如墨，顷刻盈盆一段。（按：转脬病，古人但令患者横卧榻上，高其下体，良久其尿自通，殊不费力）

黄履素曰：予窗友贺立庵方伯，常言其伯父贺岳精于医，曾治一孕妇将坐草，患小便不通，百药不效，愈饮愈饱，束手待毙。贺君诊之曰：此乃脾气虚弱，不能胜胞，故胞下坠压塞膀胱，以致水道不通，大健其脾，则胞举而小便自通，以白术二两土炒，加砂仁数钱，别加一二辅佐之药，服一剂小便立通，其神如此。予常记此言于怀中。壬寅岁内人有妊，临月竟同此病，药无功，危甚。余以此法告医者，喜医虚心，如法治之立效。遂举长子寅锡。余若不闻此言，母子

均殆矣。

《续名医类案》

李时珍

数人小便不通，及转脬危急者，令将葱管吹盐入茎内，极有捷效。又小儿不尿，乃胎热也，用大葱白切四片，乳汁半盏，同煎片时，分作四服即通，不饮乳者，服之即饮乳。若脐四旁有青黑色，及口撮者，不可救也。

《续名医类案》

薛立斋

司徒李杏冈仲子室，孕五月小便不利，诸药不应。薛曰：非八味丸不能救。不信，别用分利之药，肚腹肿胀，以致不起。

儒者王文远室，患小便不通，小腹肿胀，儿至于殆。用八味丸一服，小便滴沥，再以前丸之料加车前子，一剂即利，肚腹顿宽而安。

《续名医类案》

陆养愚

方思桂女年十四，患大小便不通，已三日，村医与丸药数十粒，如芝麻大，服之大便立通，而泻小便仍秘。又二日胀闷脐突，小腹时时抽痛，不能坐卧，啼泣呻吟，欲求自尽。脉之沉数，而两尺尤甚。曰：此转脬病也。时尚炎热，以六一散井水调服之，小便稍行，行时阴中极痛，后仍点滴不畅，大便努责而无积，腹痛时作，痛则如刀刺，再诊脉仍沉数。乃用升麻三钱，柴、葛、甘、桔各一钱，以提清降浊，服后二便俱行，小便纯血，大便亦带血水，其家犹危之，曰：今无患矣，向者丸药必巴豆也。病本热郁，而以极热之药攻之，向之刺痛，今之溺血，皆巴毒使然也。以犀角地黄汤加黄连、山栀，数剂而

愈。

《续名医类案》

万密斋

一娠妇淋漓，小便不通，医作转胞，治之不愈。乃用槟榔、赤芍二味研末，顺取长流水，煎汤调服效。此方治男妇一切血淋及淋涩，水道疼痛，用之无不神验。

《续名医类案》

马元仪

沈氏妾，妊娠八月，下利二十余日，利后患小便淋闭，渴而引饮，饮毕方去滴许，涩痛异常，已三昼夜，诊得肺脉独大，余脉虚涩，曰：下利经久，脾阴必耗，燥火自强，今见肺脉独大，是火据肺位，金被火制，气化不及州都，便溺何由而出？《经》曰：病在下者，治上。令上窍越则下窍自行矣。且妊娠之体，脉见虚涩，气血不能养胎可知，若再行趋下，不惟病不除，且有胎动之患。因与紫苑五钱，专达肺气下及膀胱；干葛一钱，升发胃气，敷布津液；火郁则气燥，以杏仁、苏子润之；燥胜则风生，以薄荷清之；加枳壳、桔梗开提三焦之气。一剂小便如泉，再剂利下亦止。

《续名医类案》

吴桥

赵氏妇故孱弱，有身七月，病不得大小溲，医者递以四苓利之，卒不利，久则小腹前后胀急痛楚、燥乱昏愠，殆将不胜。桥诊之，则以补中益气汤加黄连，为剂一服，小溲稍行，明日为汤液五斗，呼挈壶者口授之，扶病者坐临盘，递引汤沃病者腹，沃已，口授产姬举手奉其胎，大小溲即行，病愈矣。病得之食砒而唾未尽，其遗毒触胎，病者故内虚，胎气下堕而压脬矣。或曰胎压脬矣，或曰胎压脬而不

得小溲，诚是也。大溲何为？桥曰：小溲塞则鼓膀胱，是将壅大肠，其气亦为不利故尔。闻者曰善。

《续名医类案》

张路玉

一妇怀孕六月，因丧子悲哭动胎，医用黄芩白术等，二服不应。改用香附、紫苏、枳壳、砂仁，一服胎遂上逼心下，胀闷喘急，口鼻出血。第三日薄暮往诊，其脉急疾，如狂风骤雨，十余至则不至，顷之复至如前，因喻之曰：此孕本非好胎，安之无益，不若去之，以存母命。因思此胎必感震气所结，震属木，惟金可制。令以钹斧烧红醋淬，乘热调芒硝一两，灌之。夜半果下异胎，下后脉息微和，神思恍惚，所去恶露甚多，又与安神调血之剂，数服而安。

《续名医类案》

孙文垣

张氏妇年二十一，诊之左寸关短弱，尺滑，右寸亦滑，关濡弱，尺沉微。诊毕其夫问曰：脉何如（不告病原）？曰：心神脾志皆大不足（圆圆得妙），肺经有痰（孙君平生多以一痰揣病），因踌躇不决，久之曰：左寸短弱如此，安得有孕？云：已七十日矣。问曾经孕育否？曰：已二次，今乃三也，问：二产皆足月否？男耶女耶？曰：始产仅九月，手足面目俱全，第无啼声，抱起已身冷矣，细检之，乃知其无水火也。（水火，前后阴也）。次亦九月而产，亦无啼声，验之口中无舌。二胎之异如此，乃为制方，以补心脾为主，令多服，以百帖为率。枣仁、茯神、远志各一钱，白术二钱，白当归、枸杞各一钱五分，甘草五分，生地八分，艾絮二分，龙眼肉五个，水煎服。足月产一子。次年又有身，不以前事为意，至九月产下，形体具备，外有脂膜一片，包其面不能去，即殒。因思上年所产获，全药之力也。乃以前方黏壁间，才觉有身，即照方服之，后生子女皆无恙（凡小儿有不足之症，皆嫌父母有虚损处。

观此当举一三反)。

郭茂恂嫂金华君，产七日不食，始言头痛，头痛已又作心痛，既而目睛痛，如割如刺，更作更止，相去无瞬息间。每头痛欲取大石压，良久渐定；心痛作则以十指抓壁，血流满掌；痛定日又痛，又以两手自剗取之。如是十日不已，众医无计。进黑龙丹半粒，疾少间，中夜再服，乃瞑目寝如平时。至清晨，下一行约三升许，如蝗虫子，三疾减半，已刻又行如前，则顿愈矣。

河南开封府有丹客之妇，怀娠甚巨，动跃间似双胎也。丹客语妇曰：若生二男，当名虎四儿，虎五儿。一日欲出而天若雨状，谓妻曰：晴履可耶？抑雨具去可耶？妻未答，则腹中朗应无雨。丹客惊惧曰：汝何人？则曰：虎四儿也。言未竟又闻声，曰：虽不落也，有几点。丹客曰：汝所为，竟炼不成，必须炉如何置，火如何候，药如何辨，又曰：如何如何乃毛也，如何如何小点化，如何如何大点化。待吾母为之可也。丹客遂如言行之，火然硫黄。偶客至门，室既不深广，而客又不行，其父与二儿俱曰：黄气迫人，奈何奈何，至夜熏蒸死。世今有点化之术，谓其传也。予则以为岂非天怒其泄，故欲灭其口耶？然亦不知何妖也。

钱国宾云：山西大同军人朱刘禄娶妻孔氏，七年始孕，其腹极大，月不能行，八月不能动，仰卧于床，延诊右寸及两尺脉主别部一倍，经断当生双女，其怀胎之状主难产，令服易产汤剂，以救其母。至十月期足腹痛，产下一女，其腹不减，至三日腹阵痛，再产一女，其腹仍大，咸谓怪异，必伤其母矣。次日腹又阵痛，又产一女，腹始如故，初生二女存，三生之女毙。

《续名医类案》

滑伯仁

仁孝庙祝杨天成一女，薄暮游庙庑见黄衣神，觉心动，是夕梦与之交，腹渐大而若孕，邀伯仁治。诊之曰：此鬼胎也，其母道其

由，与破血坠胎之药，下如蝌蚪鱼目者二升许，遂安。

《续名医类案》

薛立斋

一妇人经闭八月，肚腹渐大，面色或青或黄，用胎症之药不应。诊之曰：面青脉涩，寒热往来，肝经血病也。面黄腹大，少食体倦，脾经血病也。此郁伤脾肝之症，非胎也。不信，仍用治胎散之类不验。薛用加味归脾、逍遥二药，各二十余剂，诸症稍愈。彼欲速效，别服通经丸，一服下血昏愤，自汗恶寒，手足俱冷，呕吐不食。薛用人参、炮姜二剂，渐愈。又用十全大补汤，五十余剂而安。（此案依《妇人良方》鬼胎门选入）

东白马氏妇有妊，历十四月不产，形瘠羸且黑。松阳周汉卿脉之曰：非孕也，乃为妖之所乘耳。以药下一物如金鱼，疾旋已。

《续名医类案》

薛立斋

一妇人，虚羸有鬼胎症块，经候不通。诊之曰：此病也，非胎也。令服四物汤加芫花根，而块渐消。又令用吴萸、川芎、柴、秦、强蚕、巴戟、巴豆不去油、芫花醋制，为末，炼蜜丸梧子大，每服七丸，蜜酒下，即出恶物而愈。后以八珍汤，调理而安。

钱国宾云：余之太仓有长年吴山，其妻怀孕十有八月，胎形渐大，山以贫人难治，日怀生死之忧，求便道一诊，其脉浮沉长短，去来至止，上下不一，知痰，非胎矣。曾见痰火专门书中一款，凡妇人当经受惊，其痰由心胞络流入血海，如怀胎状，经闭渐大，活动身安，此假胎也。以清痰活血轻剂，用芎、归、地、芍、贝母、天冬、半夏、香附、白芥子、茯苓、陈皮、枳壳各一钱，煎服数月，乃愈。

六和塔农夫朱言之妻，生平无病，为人言寡，凡有气恼不发，肝火久郁可知矣。子天启二年，经后胎渐大，起居饮食如常，至十月不

生，又十月不生，家人忧甚，医皆莫知其故。钱亦曾诊，见六部浮鼓，亦未敢断。又过五月，终日撒屁，如此两月胎消。因当经著气，伤肝久郁，冲于血海，似怀胎而无形，此名气胎。表出以识。

《续名医类案》

张子和

吴产祥之妻临月病喘，以凉膈散二两，四物汤二两，朴硝一两，作二服，煎令冷服，一服病减大半，次又服之，病痊愈矣。张曰：孕妇有病，当十月九月内，朴硝无碍，八月者忌之，七月却无妨，十月者已成形矣。

《续名医类案》

周仁斋

一孕妇痰喘，用生半夏钱半，肉桂、干姜各五分，五味子三分，麻黄二分，先以水煎，后下药，勿令太熟，热服其喘即止。（半夏肉桂，皆孕妇所忌，宜酌用之，切勿轻率）

《续名医类案》

薛立斋

吴江人史万湖仲子室，年二十余，疫疾堕胎，时咳，服清肺解表之药，喘急不寐，此脾土虚而不能生肺金也。药复损而益甚也。先与补中益气加茯苓、半夏、五味、炮姜，四剂渐愈。后往视之，用八珍汤加五味，十全大补汤而愈。

《续名医类案》

薛立斋

一妊妇，嗽则小便自出，此肺气不足，肾气亏损，不能司摄。用补中益气汤以培土金，六味丸加五味以生肾气，而愈。

一妊妇咳嗽，其痰上涌，日五六碗许，诸药不应，此水泛为痰，用六味丸料及四君子汤，各一剂稍愈，数剂而安。

一娠妇因怒，咳嗽吐痰，两胁作痛，此肝火伤肺金，以小柴胡汤加山梔、枳壳、白术、茯苓、治之而愈。但欲作呕，此肝侮脾也，用六君子汤加柴胡、升麻而愈。

《续名医类案》

薛立斋

一妊妇，烦热吐痰，恶热恶心，头晕，此脾虚风痰为患，用半夏白术天麻汤，以补元气祛风邪，渐愈。惟头昏未痊，乃用补中益气汤加蔓荆子，以升补阳气而愈。

一妊妇烦热兼咽间作痛，用知母散（知母、麦冬、黄芩、子芩、赤芩、甘草）加山梔、竹沥，以清肺金而愈。后内热咳嗽，小便自遗，用补中益气加麦冬、山梔，以补肺气滋肾水而痊。

《续名医类案》

薛立斋

一妊妇，因停食服枳术丸，胸腹不利，饮食益少，服消导宽中之剂，其胎不坠。此脾气虚而不能承载也，用补中益气及六君子汤，中气渐健，其胎渐安。又用八珍汤加柴胡、升麻，调理而痊。

一妊妇饮食停滞，心腹胀痛，或用人参养荣汤加青皮、山楂、枳壳，其胀益甚，其胎上攻，恶心不食，右关脉浮大，按之则弦，此脾土不足，肝木所侮。用六君子加柴胡、升麻而愈。后小腹痞闷，用补中益气汤，升举脾气乃痊。

《续名医类案》

薛立斋

一孕妇，无故悲泣，用大枣汤而愈。后复患，以四君子加麦冬、

山梔而愈。

陈良甫曰：卿先生郑虎卿内人黄氏，妊娠四五个月，遇昼则惨戚，悲伤泪下数次，如有所凭。医与巫者兼治，皆无益。良甫时年十四，正在儒中习为业，见说此症，而虎卿皇皇无计。良甫遂告之，管先生伯同说先人曾说此症，名曰脏燥，悲伤非大枣不愈。虎卿借方看之，甚喜对症，笑而治药，一投而愈矣。

《续名医类案》

孙文垣

程玉吾内人妊已七月，乳忽红肿而痛，洒淅恶寒，发热，将成内吹。以大瓜蒌四钱为君，当归尾二钱为臣，甘草节、蒲公英、贝母、连翘各一钱二分为佐，青皮、柴胡各八分，橘叶五片为使，二剂而瘳。此方治验不可胜数。妇女怒郁，肝经为多，瓜蒌、甘草为缓肝之剂，贝母开郁，连翘、蒲公英解毒，柴胡、青皮调气，橘叶引经，当归活血。血活气调毒解热散，而肿痛消释也。若将成脓，可加白芷。

《医经纲目》治妇人吹乳皂角散。歌曰：妇人吹乳治如何，皂角烧灰蛤粉和，热酒一杯调一字，顷间揉散笑呵呵。

《续名医类案》

龚子才

刘尚书妾有孕患恶阻，呕吐不止，饮食不下，心中烦躁，头目眩晕，咸以二陈汤、藿香正气散、保生汤之类，遍投不效。诊之左脉微数，气口数，此血虚气盛，有火也。若不养血则火不降，火不降则呕不止。以茯苓补心汤加姜汁炒黄连、竹茹，二服全愈。

卢不远治史氏妇，呕吐之声远闻百步，脉之左关鼓指，不连于寸，两尺滑搏，于左独加，水饮不入唇七日矣。与透肝之剂，断其必孕男，药进而呕定，月足果产男。是症初寒热大作，呕吐不食，人皆以为伤寒，卢以尺中脉搏，知其为妊，其关不连寸者，盖肝郁善怒而

不善发也。顺其性而伸之调之，肝舒气平，恶自无阻，而呕自定耳。

《续名医类案》

张玉路

钱氏妇去秋疟久大虚，饮食大减，经水不调，季冬略行一度，今春时发寒热，腹满不食，服宽胀利，水药不应。拟进破血通经之剂，张诊之其脉左手厥厥动摇，右关与两尺虽微弦，而重按久按却滑实流利，惟右寸左关虚濡而数，寻之涩涩少力，此阴中伏阳之象，询为胎脉无疑。良由中气虚乏，不能转运其胎，故作胀耳。前医曰：自结婚至今距十二载，从未受孕，病后元气太虚，安有怀孕之理？张曰：向之不孕，必有其故。今病后余热留于血室，因而得孕，亦恒有之理，细推病机，每粥食到口，辄欲作呕，惟向晚寒热之际得热饮入胃，其寒热顿减。岂非胃气虚寒，水精不能四布，留为涎液，汪洋心下乎？俗名恶阻是也。其腹满便难之虚实，尤当明辨。《金匱》云：跌阳脉微弦，法当腹满，不满心便难，乃虚寒从下上也，当以温药服之。况大便之后每加胀急，以里气下通，浊阴乘之上扰，与得下暂时宽快迥殊，其治虽当安胎为主，但浊阴之气非藉辛温，不能开导其结。遂疏六君子汤益入归芍，以收营血之散；稍借肉、桂，为浊阴之向导。使母气得温中健运之力，胎息无浊服侵犯之虞，桂不伤胎。庞安常先有明试，余尝屡验之矣。服后寒热渐止，腹胀渐宽，饮食渐进，胎息亦渐形著。至仲夏因起居不慎，而胎漏下血，前医犹认石瘦，欲进破积。喻以左寸动滑，断属干象，与扶脾药得安，后产一子（此案手笔绝似喻嘉言，岂秀才文艺园应如是耶）。

《续名医类案》

陈三农

恶阻诸药不纳，以苏梗三钱、砂仁一钱，煎服。或乌药为君，沉香次之，人参、甘草又次之，为细末，以姜切片粘药末，咬嚼咽津液，

极至丹田，过一时又如此嚼，即愈。

《续名医类案》

薛立斋

一妊妇停食腹满，呕吐吞酸，作泻不食，此饮食停滞兼肝木伤脾土，用六君子汤以健脾胃，加苍术、厚朴以消饮食，吴茱萸所制黄连以清肝火，诸症悉愈。又以六君砂仁调理，而脾土乃安。

一孕妇呕吐酸水，胸满不食，此脾土虚为肝木所侮，用六君子加白芍而愈。又用四君子加枳桔而安。

《续名医类案》

薛立斋

一妊妇下血，服凉血之药，下血益甚，食少体倦。此脾气虚而不能摄血，用补中益气汤而愈。后因怒而寒热，其血仍下，此肝火旺而血沸腾，用加味逍遥散血止，用补中益气汤，而安。

一妊妇下血，发热作渴，食少体倦，属脾气虚而肝火所侮。用四君子加柴胡、山梔，血止。因怒复作，用六君加柴胡、山梔、升麻而安。

一妊妇六月，每怒血下，甚至寒热头痛，胁胀腹疼，作呕少食。薛谓寒热头痛，乃肝火上冲（此语无人解通），胁胀腹痛，乃肝气不行；作呕少食，乃肝侮脾胃；小便下血，乃肝火血热。用小柴胡加白芍、炒山梔、茯苓、白术而愈。

一妊妇胎及六月，形体倦怠，饮食少食，劳役下血，胎动不安，用六君加当归、熟地、升麻、柴胡而愈。

《续名医类案》

张子和

一妇娠半年，因伤损下血。张诊之，以三和汤，一名玉烛散，承

气汤、四物汤、对停，加朴硝煎之，下数行，痛如手拈，下血亦止。此法可与智识高明者言，膏粱之家慎勿举似，非徒骇之，抑又谤之。呜呼！正道难行，正法难用，古今皆然。

《续名医类案》

孙文垣

侄孙妇三孕而三小产，六脉滑数，乃气虚血热也。因血频下，甚恐怖，终日偃卧，稍起血即大下，与生地、白芍、白术、地榆、桑寄生、续断、甘草、升麻、椿根白皮、黄柏、条芩，服之血三日不来，惟白带绵绵下，因起身稍劳血复行，谓血滑已久，若不涩必不能止。又血海甚热，亦肝风所致，防风子苓丸正与病对，宜制与之，又制白芍六两，侧柏叶、条芩各三两，防风、椿根白皮各二两；蜜丸服之，逆血止，胎安。足月产子，此后绝无胎漏之患，后遇此症，第用此法，皆验。

《续名医类案》

张路玉

郑墨林夫人，素有便红症，妊七月，正肺气养胎时，患冬温咳嗽，咽痛如刺，下血如崩，脉较平时反觉小弱而数，此因伤热太阴血分也。与黄连阿胶汤二剂，血止后去黄连，加萎、蕤、桔梗、人中黄，四剂而安。

柴屿青治其妾母怀孕五月，与女伴争竞致伤，腹痛见红，稳婆验云：昨夜子已在产门，定死腹中。诊其六脉如常，验其舌红活，断以决无此理。用安胎养血药，二剂而起，至十月满足产一子。

叶杏林曰：一妇人妊娠，月信不断，而胎不损，产科熊宗古曰：妇人血盛气衰，其体必肥，是以月信来而胎不损，若作漏治则胎必堕。若不作漏胎治，则胎未必堕也。

《续名医类案》

薛立斋

一妊妇尿血，内热作渴，寒热往来，胸乳作胀，饮食少思，肝肺弦弱，此肝经血虚而有热也。用加味逍遥、六味，兼服渐愈。又用八珍汤加柴、梔、丹皮而全愈矣（未选入）。

《续名医类案》

薛立斋

一妇人素口苦，月经不调，或寒热。妊娠五月，两臂或拘急，或缓纵，此肝火血热所致也。用四物加柴胡、山梔、丹皮、钩藤，治之而愈。

一妊妇因怒寒热，颈项动掉，四肢抽搐，此肝火血虚风热，用加味逍遥加钩藤，数剂而痊。

一妊妇颈项弦直，腰背作痛，此膀胱经风邪所致。用拔萃羌活汤，一剂而愈。又用独活寄生汤及八珍汤，以祛邪固本而痊。

一妊妇四肢不能伸，服祛风燥血之剂，遗尿痰甚，四肢抽搐，此肝火血燥，用八珍汤加炒黑黄芩为主，佐以钩藤汤而安。后因怒，前症复作，小便下血，寒热少寐，饮食少思，用钩藤散加山梔、柴胡，而血止。用加味逍遥散，寒热退而得寐。用六君子汤加白芍、钩藤，饮食进而渐安。

《续名医类案》

万密斋

一婢临月，病口眼喎邪，腰背反张，手足挛曲，不省人事，用黄连解毒汤加朱砂，干开口灌之稍定，其夜生一男，产后犹昏迷不省，以七珍汤与之即安。（据万云即子病）

《续名医类案》

难产

滑伯仁

一妇人产难，七日而不乳。且食甚吵。伯仁视之，乃以凉粥一盂，搗碎枫叶煎汤调啖之，旋乳。或诘其理。滑曰：此妇食甚少，未有无谷气而能生者。夫枫叶先生先落，后生后落，故以作汤饮也。

丹溪曰：世之难产者，往往见于郁闷安佚之人，富贵奉养之家，若贫贱辛苦者无有也。方书只有瘦胎饮一论，而其方为湖阳公主作也，实非极至之言。何者？见用此方，其难自若。予族妹苦于难产，后过孕则触而去之，予甚悯焉。视其形肥而勤于女工；构思旬日，悟曰：此正与湖阳公主相反。彼奉养之人，其气必实，耗其气使和平，故易产；今形肥，知其气虚，久坐，知其不运而其气愈弱，久坐，胞胎因母气不能自运耳。当补其母之气则儿健而易产。今其有孕至五六个月，遂于大全方、紫苏饮加补气药，与十数贴，因得男而甚快。后遂以此方随人之形色性禀，参以时令加减，与之无不应者，因名其方曰大达生散。

《名医类案》

庞安常

一妇，将产，七日而子不下，百治不效。庞视之，令其家人以汤温其腰腹，自为上下拊摩，孕者觉肠胃微痛，呻吟间生一男子，其家惊喜而莫知所以。庞曰：儿已出胞而一手误执母肠，不能复脱，故非符药所能为。吾隔腹扪儿手所在，针其虎口，痛即缩手，所以遽生，无他术也。取儿视之，右手虎口针痕存焉。

一妇累日产不下，服催生药不效。庞曰：此必坐草太早，心下怀惧，气结而不行（气行血行之理），非不顺也。素问云：恐则气下。盖恐则精神怯，怯则上焦闭，闭则气逆，逆则下焦胀气乃不行矣。以紫苏

饮，一服便产。及妇人六、七月子悬者，用此往往有效，不数日胎便下。其方紫苏吐一钱，大腹皮、人参、川芎、陈皮、白芍各五分，当归三分，甘草一分，细切分作三服，每服以水一盞半，生姜四片，葱白七寸，煎七分，空心服。

《名医类案》

陈良甫

一妇，有孕七个月，远归，忽然胎上冲心而痛，坐卧不安。两医治之，不效，遂言胎已死矣。已用蓖麻子研烂加麝香，调贴脐中以下之，甚危急。陈诊视两尺脉绝，他脉平和。陈问医作何症治之，答曰：死胎也。陈曰：何以知之？曰：两尺脉沉绝。陈曰：误矣，此子悬也（观此凡两尺沉细，未可断胎死）。若是胎死，却有辨处：面赤舌青，子死母活；面青舌赤，母死子活；唇口俱青，母子俱死。今而不赤，舌不青，其子未死，是胎上迫心，宜紫苏饮治之。至十贴面胎乃近下矣。

《名医类案》

吴蒋仙

一妇，产难，三日不下，服破血行经之药，俱罔效。吴制一方，以车前为群（车前以生者为佳，佐白芷尤妙），冬葵子为臣，白芷、枳壳为佐使，已服午产，众医异之。吴曰：《本草》谓催生以此为君，《毛诗》采芣苢以防难产。（江云：其详诸症辨疑可考）

盛启东为御医，侍禁掖。忽夜半召入宫，锦帐中出手按脉。盛曰：六脉已离经。此必母后将分娩，但子抱母心，非针不能下，且难两全。中使具状闻。上曰：俟母后商之。后曰：得子可安天下，全我何为？命用针针出，即生太子，是为宣宗。

刘复真过府判女产不利，已斂。刘以红花浓煎，扶女子凳上，以绵帛蘸汤遏之，连以浇帛上，以器盛水，又暖又淋，久而苏醒，遂生

男子。盖遇严冬，血冷凝滞不行，温则产。见亦神矣哉！

《名医类案》

薛立斋

地官李孟卿娶继室，年三十五孕，虑其难产。与加味芎归汤四剂备用，果产门不开，服之乃产。

西宾费怀德之室，下血甚多，产门不开，两日不生。服前药一剂，即时而产，后育胎，并无此症。费传与服者，皆效。

一妇人分娩最易，至四十妊娠，下血甚多，产门不开。亦与前汤下剂，又用无忧散斤许一剂，煎熟时时饮之，以助其血而产。

一医宿客店，值店妇数日不产，下体已冷，无药甚窘，以椒橙叶、茱萸等煎汤，可下手则和脐腹人门处皆淋洗之，气温血行遂产。

《名医类案》

张子和

一妇人年二十余，临产召稳婆三人，其二姬极拽妇之臂，其一媼头抵妇之腹，更以两手扳其腰，极力为之，胎死于腹。良久乃下，儿亦如血，乃稳媼杀之也。岂知瓜熟自落，何必如此乎？其妇因之经脉断闭，腹如刀刺，大渴不止，小便闷绝，主病者禁水不与饮，口舌枯燥，牙齿黧黑，臭不可闻，饮食不下，昏愦欲死。张先以冰雪水，恣意饮之约二升许，病缓渴止（近时专科及庸手，遇产后一以燥热温补为事，杀人如麻，阅此宜稍知变通矣）。次以舟车丸、通经散、前后五六服，下数十行，食大进，仍以桂苓甘露饮、六一散、柴胡饮子等调之，半月获安。

一妇人临产，召村姬数人侍焉，先产一臂出，姬不测轻重拽之，臂为之断，子死腹中，其母面青声冷，汗浆浆不绝，时微喘。张曰：命在须臾，针药无极，以壮绳以膏涂其钩，令其母分两足向外偃坐，左右各一人脚上立足，次以钩其死胎，命一壮力妇倒身拽出死胎，下败血五七升，其母昏困不省，待少顷以冰水灌之，渐咽。二日大醒食

进，次日四物汤调理，数日方愈。张常曰：产后无他事，因侍姬非其人，转为害耳。

凌汉章治吴江妇，临产胎不下者，三日呼号求死，凌针刺其心，针出儿应手下，主人大喜问故？曰：此抱心生也。手针痛则舒，取儿掌视之，有针痕。

按：此二案与宋史庞安时一案仿佛大抵，医既有名，人益附会，如近时吴门有享盛名者，里人时向余道其神验，皆古人案中所载，若以蟹治漆毒，以土坑治香气，不一而足。所谓俗语不实，流为丹青者也。

《续名医类案》

孙文垣

侄元素内人难产，夜半叩门，起问何状？曰：产已及门不能下，用力则胸膈间有物上冲，痛不可忍。思顷之曰：此必双胎，胞以分为一上一下也，及户者在下欲出，在上者以用力而上冲，故胸膈痛也，势亦险矣。治法必安上，而下者乃可用力以产也。即取益元散一两与之，令以紫苏汤送下，药甫进，胸膈痛止，不逾时产二女，母亦无恙。或问曰：益元散非产科急剂，何能取效如是？曰：紫苏安胎下气，滑石滑以利气，亦催生上品。盖医者意也，兹亦以意裁取之耳。此法方书无载，记之以备采用（妊妇案中，治竹匠妇常以此方安胎）。

冯楚瞻之媳向患吐血下热之症，自受妊以来，八味丸加牛膝、五味，日服勿间（此其孙所以百日内生养痾症之由也。案见小儿胎毒门）。及临盆胞水已下而数未产。脉之洪数而带坚象，此阴道枯槁已极，何能流通生育乎？投以补养气血催生以药，脉候如故。知为群药攻力不专，乃单以熟地三两浓煎，日进三次，脉始洪缓而软，但坐蓐数日，子母俱困，胎气毫无运动下达之意象，疑胎死矣。再以人参五钱，煎汤一钟。细刮肉桂之最佳者钱许，调服之，连进三剂乃生。

一妇难产，五日后精神已竭，六脉沉微，恹恹一息，腹中毫不觉

动，下部肿极，知母子俱困，何能健运以出，乃与参、芪、归、芍、姜、桂、白术、牛膝，温暖调补气血之剂，下咽少顷，腹中运动，疼痛而产，母子俱活。

歙有神医常路遇异棕者，棕中血流出，医曰：此尚活，可治也。开视则弥月妇人，颜色未改，以针针其心，遂产一男，手有针孔，母子俱无恙。其子至今尚存。

《续名医类案》

张所望

妇人产一子，忽叫痛欲绝，举家惊愕莫措，所望诊之曰：腹内尚存一子未下，投一丹而子下，母遂苏。

《续名医类案》

张文仲

一妇一横产，先出手，诸般符药不捷，乃以艾灸其妇人右脚小指头尖头三壮，炷如小麦大，下火立产。

高道者不知何许人也。得长桑君禁方，当明初挟技游银阳。一日值柩于途，谕之乃孕妇丧也。道者验其遗衣血曰：此犹未死耳。启棺视之，一针遂苏。俗惊道者能起死人，以比秦越人云。

《续名医类案》

陆祖愚

高济亭室胎前恶阻，或以清凉调治，既而内伤饮食，消导太过，元气甚弱，胎动欲产，临盆三日夜，方得分娩，疲惫昏冒不知人事。诊之遍身冷汗，口鼻之气有出无人，寸关无脉，两尺如丝，不及服药，令壮盛妇女对口，接其出人之气，俟其气之人而呵之，次用人参、归身、熟地各一两，熟附四钱，煎服，加童便一酒杯，徐徐灌下，四肢温和，人事清爽，连三剂便能饮食。此时若不先用接气之法，必

俟药熟，不几气绝耶？

万密斋治朱宅一妇女李氏，常苦难产，形颇壮，性急少食，此气滞也。与一方，枳壳、甘草、香附为主，当归、川芎、白术、陈皮佐之，至八九个月内，每月服三帖，后生三子，甚快。

《续名医类案》

叶杏林

一妇人分娩甚易，至四十外下血去多，玉门不开，与加味川芎汤一剂，更以活水无忧散斤许，煎熟时时饮之，以助其血而产。

产妇坐草时，取路傍旧草鞋一双，用鼻络小耳绳烧灰，温酒调服，如得左足者男，右足者女，覆者儿死，侧者有惊，自然理也。似非切要之药，催生极验。

王执中云贵人内子产后暴卒，急呼其母为辨后事，母至为灸会阴及三阴交，各数壮而苏。母盖名医女也。

余素不信阴阳家言，因召工筑屋，或谓年月不利，不听。时荆妇娠，身已九月及产，一稳婆甚青年，见势不顺，乃托故亟归，易其姑至视之，曰：此非可望生下，欲全母命，非齑而出不可，余亟令安卧勿怖，以熟地四两、杞子二两、当归一两，煎百余沸，先饮一钟，再煎再饮，不及时许一女已死，乃脐带结于项间所致，幸母无恙。稳婆詫而去。《妇人良方》云：凡有孕妇之家，不宜造次修治，良有以也。

凌表侄妇年二十余，暑月临蓐，自旦及暮不得产。体素弱，屡发晕迷闷，时师诊之，以为挟痧，不可服参。渐危急延余，视无他，乃肾气不能作强，肝虚不能疏泄，又血液枯竭，致胎不易下耳。与熟地二两、杞子一两、当归五钱。曰：服下即产矣。已而果然。次日觉恶露行少，饮沙糖老姜汤，血行甚涌。专科以炮姜、白术、枣仁、茯神、当归、白芍等不效，反加自汗口苦，小便热涩，烦躁不眠。再延诊，曰：但以余前方加枣仁、当归，愈矣。一剂而安。余此方催生则用当归，止崩则用枣仁，甚者杞地俱倍之，凡治百余妇人无不神验。无力之

家可代人参，且无后患，古今诸方，无出其右者。

《续名医类案》

王三尊

朱帝间之妻，将产血下不止，心烦乱，无紧阵。予令且服独参汤一钱。彼信庸医稳婆之语，恐补住胎与瘀血。只与三分，心烦乱少止。告予只饮三分之故。予急令服完，彼又只与三分，血止，又告以前故。予又急令服完。少顷紧阵至而胎下矣。因其贫甚，后未补益，竟成羸疾。数年而卒。噫！向使不敢用参，命在顷刻，安望数年乎？此证若执定芎归汤加人参，则血亦不能止，妙在独用人参以生气固血。血止气壮而胎下矣。予内子生第五胎，时已久患脾泻，紧阵不至，大汗已出，预以圆二斤浓熬尽饮之，汗止而胎下矣。后君瑞兄媳，恶露不下，用木香、槟榔、枳壳、元胡、肉桂、大黄，破气破血以行之。此胎不下，一用独参汤生气固血，一用圆汤壮气运血以达生之，是皆有至理存焉耳。

《医权初编》

吴旌

托氏产难经日，腹痛已甚，视其形体壮盛，别无危象，此缘初产，胎滞不生。由于木血下多，子道干涩难出也。即投经验滑石散，遂用此果效。

滑石飞过一两 白密 香油各半盏

将油蜜慢火熬熟三四沸，掠去沫，调滑石末顿服，外以油调于产妇脐腹，上下摩之，立效，古法用滑利之物，如猪脂油、白密酥油、葱白、葵子、牛乳、滑石、榆白皮之类，润之亦济急之法也。

禄氏临产，经日不生，察其脉形尚充，别无危证。此由于郁闷安逸，气血壅滞，以致胎元不能转动。宜速用脱花煎催之。连进三帖，顿然分娩。

翁氏产难三日。询据稳婆说系交骨不开。余曰：此阴气不足，阴不足则气不达，所以不开。不开则产必艰难。即投加味芎归汤，补而开之，自有奇效。遂连服二剂，顿然分娩。

生过男女妇人发一握，烧存性 败龟壳一个或占过者亦可酥炙 川芎 当归各一两

上味每用一两水煎服，不问生死，胎即下。

章氏产难，经日不下，问系产门不开。余视其形体消瘦，精神委顿，乃阴气虚弱以致血气不能运达而然。当仿薛氏治法。即用加味芎归汤，并以无忧散斤许，煎熟，时时饮之，以助其血，果未半日而生。

《临证医案笔记》

王孟英

一少妇，分娩，胞水早破，胎湿不能下。俗谓之“沥浆生”。催生药遍试不应。孟英令买鲜猪肉一、二斤，洗净切大块，急火煎汤，吹去浮油，恣饮之，即产，母子皆生。且云：猪为水畜，其肉最腴，大补肾阴而生津液。余尝用治肾水枯涸之消渴，阴虚阳越之喘嗽，并具奇效。仲景治少阴咽痛，用猪肤，亦取其补阴虚而戢浮阳也。后贤不察，反指为有毒之物。汪认庵非之，是矣。惟外感初愈，及虚寒滑泻者，湿盛生痰之证，概不可食。以其滋腻更甚于阿胶、熟地、龙眼也。猪以渐产者为良，北猪不堪人用，吾杭之燥肉鲞即猪皮为之，可以致远，入药尤为简当，不必泥于“皮”与“肤”之字而穿凿以夸考据也。

孟英又云：昔老友范君庆簪语雄曰：解渴莫如猪肉汤。凡官炉银匠每当酷暑，正各县倾造奏销银两纳库之际，银炉最高，火光迎面，故非气血充足者，不能习此业。然人受火烁，其渴莫解，必须猪肉，以急火煎清汤，撇去浮油，缸盛待冷，用此代茶。雄闻而悟曰：此渴乃火烁其液，非茶可解。猪为水畜，其肉最腴，功专补水救液，允

非瓜果可比。因此推而及虚喘、虚闭、下损、难产诸证之无液者，无不投之辄应，乃知猪肉为滋阴妙品也。

《王氏医案》

许恩普

甲午，农部李有荣之夫人，临产三日未落草，咸谓胎死腹中，夫人自期亦死。李情急，许稳婆百金下死胎，以保夫人之命。稔稔无策，延余诊视，脉缓，舌苔、面色均无青赤，知胎无恙。询之稳婆，向言尚未顺胎，知经人早浆破血竭，犹鱼在盆无水，不行数日，不生者多也。安慰夫人不要慌乱，静心安卧，包管无恙。即重用达生散加重参、芪、归、芎各一两；外加葱头七个；黄杨脑七个。熊亦奇太史知医，斟酌意药太重。余言：“非此重剂不能壮气生血，毋疑。”幸李素信余医，留坐茶点少待。服药时许，家人报喜，生一少爷，母子均安然矣。

己丑，工部员外杨味春夫人吴勤，惠公小姐，产时搐搦不少人事，集医治以肝风不效。适夫人嫡堂兄吴纯甫太守进京引见，与余父子世交，延余诊视。脉虚，知为血晕，非肝风也。先用韭菜根置两壶中，加醋煮开，以壶两嘴对两鼻孔，热气熏之，立时生男苏醒。拟以当归参芪千金汤，服之安然，继而胞衣不下者一日，合家惊惶。余着寻鸡头菱叶，撕破加炒皂刺三钱同煎，服之时许，胞衣随恶血分碎而下，安然无恙矣。

《许氏医案》

巢渭芳

万绥南池沿上，某妻，年近四旬，第七产矣，值八月中旬，腹痛，午后已产一子，并无瘀恶，少腹坠痛依然，彼夫惊惶无措，转友邀渭诊之，两手脉仍弦上鱼际，唇红神畅，形体不丰。曰：双胎也。令高坐，下垫草纸十余层，如在矢坑凳上，则气升而壮。以黄芪、当归、牛

膝、川芎、生地、潞党参、龟版、童便、桂心。嚼药片时，又生一男。

又有渡船头恽某妻首产，已经六日不下，邀渭诊之。两脉弦滑，不上鱼际，因房中惊犹太过，随命其夫尽呼出之，留一催生姬足矣。以妊妇两股臀高坐在床沿上，下垫粗草纸十余层，上面织狭，下面稍阔，徐徐叠上，约有五寸厚，命静坐，再针刺两足小指外侧，各灸一壮，候药力到可产耳，亦投潞党参、龟版、川芎、桂心、血余、怀牛膝、炙生地、生蒲黄、当归、菜油、童便，一剂即生。所谓“能使人规矩，不能使人巧，”两妇之产难，若专以药力，或不如是之速也。

《巢渭芳医话》

费承祖，

安徽刘锡之之夫人，难产腹痛一昼夜，人颇不支，延余诊之，脉来沉细。此气血皆虚，不能传送。

黄芪二两 党参八钱 甘草一钱 熟地二两 当归六钱
大白芍三钱 川芎一钱五分 生龟版一两 枸杞子六钱 菟丝子六钱
川贝母六钱 白蔻壳一钱五分 白茯苓六钱 车前子三钱
煎服一剂，顺流而下，母子俱安。

《费绳甫医话医案》

吴鞠通

黄氏，三十四岁。难产五日不下，呼吸定息脉再至，阳气不充，里寒，且有症瘕，与温经。

肉桂五钱 云苓块五钱 川芎二钱 人参一钱 川椒炭三钱
全归三钱 煮三杯，分三次服。尽剂而生，大小无恙。

又，产后惟腹中症痛甚，仍以前方内加：

炮姜四钱 淡吴萸三钱 炒小茴香三钱 桃仁三钱

煮三杯，分三次服。服后下血块长六、七寸者二枚，略如狗形无

腿，腹中尚有一枚，不敢再攻，以服通补奇经丸化净，而身体大健。

《吴鞠通医案》

孔继炎

亡友赵君之女，王姓妇也。患难产，其弟告予，予书脱花煎付之。逾时复来，言药不能下也，人事不醒，牙关已紧。予往视之，人见此女，乃拥被在床，教人掖以坐，瞪目直视，不言亦不呻。索手为诊，两趺力牵不能出，盖卷抱胸前，如曲铁然。强攀一只诊之，脉紧而劲，不为指挠。曰：此中寒症也。屋中岂无火乎，何以至此？一姬曰：前宵大风发屋，夫妻露卧至明，此时受寒，亦未可知，然日间初未言病，过午腹痛，知为欲产，此晚胞浆已破，胎抵产门，许久不下。将用药催生，忽大寒战栗，浑身俱缩，胎复上冲心腹，人事一丝不省矣。所以抱扶使坐，恐放倒气绝矣。既气不绝，腿直不可复屈，将如胎何？予曰：慎勿放倒。遂出书方，用川芎、当归各一两，制附子六钱，陈皮六钱，肉桂、红花各三钱，令奔马急取。又令以葱二斤，煮沸汤，入罐中，覆以布，围以棉，一人扶持置其怀，熏令汗出。又泡乌梅擦其牙。此药至煎成，身已得汗，手足渐软，牙关已开矣，遂灌以药。药尽，又令取前开脱花煎，重加肉桂，煎以俟。妇弟曰：药已入腹，可保无虞乎？予曰：难必。夫产至不顺，性命已不可测；寒中而入脏，生死尤不可知。况当临盆坐产之时，加以至险极凶之症，一药不愈，犹能俟要求治法乎？盖胎至将产，败血随之而下，新血因之而动，此骨节开张，脉络交驰时也，猝遇暴寒逼迫，大战大缩，气逆而上，骨肉凝重之胎，已被提入心胸，其散行离经之血，有不冲入脏腑，贯入胸膈者乎？此症不言不呻，人事不省，正是血入心包，汨乱神明之故。若止寒邪为害，在外则肢体强劲，在内则心腹大疼而已，不能如是昏闷也。惟寒胜而气为之厥，气厥而血从之逆，乃于痛苦至急之顷，现此知觉全无之象。若更历一时不解，寒凝血结，不可问矣。现在肢体柔和，牙关自开，乃外治之效，内病尚未可知。且胎之下者已

上，生理之自然者已乱矣。即令更转而下，而人之困也已甚，生气之不绝者微矣。倘因产而脱，谁续其生？既幸而不脱，而逆行上窜之血，犹恐稽留不下。若产后败血不见，或见而不顺，肿胀瞽乱诸症，顷刻并起，险矣！汝曷入验其舌，若舌色不青，胎犹未死，是犹险中一善机也。言未已，有娠出，问：胎抵小腹，又将下矣，预备之药用否？予令急服。服后不久，而胎下女也，竟犹未死。而病人则昏然，人事犹未醒也。天将曙，问：病人稍醒否？曰：能言能动，尚不识人，败血亦如常顺下。予诊之，见脉紧悉化，别无恶候，为书理气活血之方，囑令续服，遂归。

附：脱花煎方：牛膝二钱 车前二钱 红花二钱 当归八钱
川芎三钱 肉桂二钱 酒一盅，引热服。

若死胎不下，加朴硝三、五钱，即下。

《孔氏医案》

邹趾痕

金玉璋之妇，横产三日不下，请愚诊视。玉璋谓愚曰：“儿一手先出，稳妇为敝内抱腰搓腹，作诸运动无效。请君主一催生之方，以辅助之。”愚曰：“催生之方，不可乱投，据云儿一手先出，是谓横生，儿既横卧腹中，纵服催生方，亦不得下。稳妇无知，抱腰搓腹，意在促儿速下，殊不知不合理之乎法，越促速下，越不得下。须知生产之道，当取自然顺下之法，断不可强迫横下，况强迫亦不能横下。今日之法，不必今日产生。此时产母坐盆已久，身体劳乏已极，宜令休息，宜令仆妇将产母抬置床上，平卧养神。产母平卧，儿亦平卧，既免儿身下坠之苦，又得调济精神之益。平卧一日，俟其母子精神俱皆强旺，然后令稳妇用芝麻香油擦抹儿手，轻轻向腹内推送。因为平卧，乃可推送入腹，若一次不能全推入腹，多推几次，必能全入，全入之后，再平卧数小时，儿自转身以头向下，仍可顺产而出也。”玉璋聆愚说，颇有疑虑，问曰：“儿已手出身不出，若又推手入腹，再

缓数小时，儿在腹中，呼吸不通，宁不气闭而亡乎？”愚曰：“君不闻儿在腹内，不以鼻通呼吸，不以口纳饮食乎？惟因儿在母腹惟以脐带之吸收为生命，不以饮食呼吸为生命，是故儿在腹内，十个月无闭气之苦，岂虑一日半日而闭气乎？”玉璋悟曰：“甚矣，鄙人之不智也。前者敝内腹鸣证，君已将儿在胎中以脐带之吸收为生命告我矣，我今尚尔梦梦，宁不愧死。”于是吩咐仆妇稳妇毋庸妄动手脚，将产母抬置床上，教以安卧，稳妇将儿手送入腹内。仆妇稳妇莫不遵照办理。明日果然儿自转动，腹中大气一催，竟得顺生而下。玉璋喜不自己，谢曰：“君真明医也！敝内陷于危险，又得重生，皆君之赐也。”

论曰：脐带与九窍者，乃植物与动物之两大生命也。凡植物只有托根于土中，伸于或藤于土外之生命，动物乃有植根于母体，伸脐带于胎中之植物生命，又有呼吸空气，饮食洩便之动物生命。方其在母腹也，纯用植物生命，及其出母腹也，则断绝脐带，脱离植物生命，而接以呼吸饮食之动物生命。大呼吸之生命，成于天之九数，饮食之生命，成于地之十数。天之九数者，天之空气也，天以空气入人之鼻中而起呼吸，故曰悬命于天。地之十数者，地之五味也，地以五味入人之口中而起饮食洩便，故曰资生于地。《六节藏象论》曰：“天食人以五气，五气入鼻，藏于心肺。地食人以五味，五味入口，藏于肠胃。”此之谓也。

《圣方治验录》

施今墨

丁某某，女，28岁。患者平素体健，怀孕已足月，产前检查未见异常。昨日中午1点破水后，即送至某医院产科，至今日下午已超过二十四小时，仍未生产。检查无产道异常、胎位不正和胎儿畸形等情况，医院考虑作剖腹产手术，患者不愿，由其母前来问方。

辨证立法：羊水已出多时，生产困难，显系阴液不足，气滞不降

所致，拟用养阴润燥，调理气血为治。服药后五小时，如胎儿仍不下，即施手术，万勿拖延。

处 方：菟丝子 15 克 火麻仁 18 克 赤白芍各 6 克，打碎
冬葵子 12 克 油当归 12 克 香附米 6 克 紫河车 10 克
炒桃仁 10 克 炒枳壳 6 克 炙甘草 6 克

《施今墨临庆经验集》

恶露不下

滑伯仁

一产妇，恶露不行，脐腹痛，头疼，身寒热。众皆以为感寒，温以姜附，益大热，手足搐搦（按姜附后搐搦，由燥剂搏血而风生），语谵目瞤。诊其脉弦而洪数，面赤目闭，语喃喃不可辨，舌黑如炷，燥无津润，胸腹按之不胜手。盖燥剂搏其血，内热而风生，血蓄而为痛也（此等案宜细心熟玩，若是虚寒，手足岂不厥冷。况逆有舌黑，腹不胜按，在三四日者乎？又况面赤洪数之脉耶）。曰：此产后热入血室因生风。即先为清热降火，治风凉血，两服颇爽；继以琥珀、牛黄等，稍解人事；后以张从政三和散生血破瘀，三四服，恶露大下如初，时产已十日矣，于是诸症悉平。

一妇新产受寒，四肢逆冷，脉沉弱，亟合附子，大丸三四粒饵之立效。

一妇盛暑月中产三日发热，其脉虚疾而大，恶露不行，败血攻心，狂言叫呼，奔走掣捉不住。以干荷叶、生地黄、牡丹皮浓煎汤，调下生蒲黄二钱，一服即定，恶露即下，遂安。

一产妇郁冒，脉微弱，不能食，大便反坚，但头汗出。所以然者，血虚而厥，厥而必冒，冒家欲解，必大汗出，以血虚下厥，孤阳上出，故头汗出。所以产妇喜汗出者，亡阴血虚，阳气独盛，故当汗出。乃大便坚，呕不能食，小柴胡汤主之。（郁冒即暈）

《名医类案》

程从周

吴彦超令政年近二旬，七月尽间分娩后一、二日小腹胀疼，恶露不下，渐逆胸膈间，不能卧倒。初医专用行血之剂，未效。次日渐重，夜则谵语，直视卧倒，则逆上心胸，靠住则稍稍降下，以为瘀血奔心。夜半延余诊视，脉之右大于左，气口紧甚，余知其食而兼气郁也。问之，果食猪腰、鸡与蛋之类过多，且有私事拂意，余曰：“宜行气消导而兼破血之剂。”或曰：“恶露不行而胀痛者，血也。今专用消导行气，何据？”余曰：“血乃有形之物，乌能遽上而遽下乎？今既能上又复能下者，乃无形之气也。况血随气形，余今多用行气，即行血也。若之何而不可？”于是剂以山楂、苏梗、乌药、香附、青皮、陈皮、归尾、川芎、桃仁、红花之类，一剂而能就枕，再剂胸膈顿宽，数日后霍然而起。

《程茂先医案》

郭右陶

顾月溪内室产后三日，腹中绞痛，胀大如臌。恶露不通，延余诊之。余思产妇腹痛，当在小腹，大腹胀痛，亦仅微疼。今产妇大腹绞痛异常，非产妇本症。及按脉洪数有力，余曰：“此产后兼痧胀也，当取痧筋验之。”不信，漫服产后药，益觉昏迷不醒，复求余治。势已危极，痧筋不现，先取童便一杯饮之，少苏。阅十指筋，刺出紫黑毒血二十一针。然后扶起，放腿弯痧六针，绞痛稍定，用独活红花汤微温服之。迨痧毒消尽，胀痛尽止，恶露俱通，后调补乃痊。

《痧胀玉衡》

王三尊

旋兄君瑞大媳，产后恶露不下。予始用暖下焦散瘀血药，不效。继而恶露上冲，呕痛不食。予视脉体皆实，问其饭量，可食升米。胃

中必有宿滯，气闭不通，以致下焦之气吸而不行，瘀血因之不下矣。遂与槟榔、青皮、枳壳、木香、肉桂、元胡、桃仁等。加以九蒸大黄，二便俱下恶物，臭不可闻者而愈。又孙妇甚健，疫证堕胎，恶露不下，参以下证，亦以熟军下之而愈。此兼时疫，又有少别。虽然使未阅张子和书，敢斗胆若此乎？一医闻予言，以为此法可常行，遇一产后恶寒发热，竟与寒凉发散之剂，几至立毙。予与朱笥用参、附、姜、桂而愈。噫！若见解少有未透，此法可轻试乎？

《医权初编》

任贤斗

王秦川之妻，初胎产时，水下胎落，胞衣亦下，血不下，腹胀大，按之坚，瘀血停滞不行，须破瘀行血。奈本妇阳虚气弱，精神不足，况生产又延四日，其气愈虚，破瘀之药皆伤中气，气弱之体，岂堪复伤气乎？若不投破药则瘀血不去，气弱之人又岂堪瘀血上冲乎？细思惟补气为上策，复思若待补药助阳而逐瘀，非一日之功，况瘀血不宜久停，乃用菖蒲、姜、葱、柑叶芬香等物，石臼舂烂，作一大饼，敷于肚上，上用熨斗盛火游熨，许久腹内即响，约一时瘀血尽下，腹中豁然，然后进助阳补中之剂，数服神强体健而大安。

《塘山医案》

黄凯钧

许氏，二七，产才三朝，腹痛身热，系恶露留阻，当生化法。

当归 川芎 益母草 香附 棠球子 炮姜 炙草

两服愈。

《肘后偶钞》

王孟英

朱氏妇，产后恶露不行，而宿瘕顿发，专是科者不能下手。孟英以丹参、桃仁、贝母、茯苓、滑石、花粉、桂枝、通草、蛤壳、苡仁、紫苑、山楂、旋覆、琥珀、丝瓜子、羌蔚子等，出入为方，三日而愈。

予荆人 婉后恶露不行。或劝服生化汤。适孟英枉顾，诊曰：阴虚内热，天令炎蒸，虽赤砂糖，不可服也。以生地、丹参、丹皮、豆卷、羌蔚子、茯苓、桃仁、山楂、梔子、泽兰、琥珀，投之即效。且无别恙而易健。可见体质不齐，药难概用，况其致病之因不一，病机传变无穷。语云：“量体裁衣”，而治病者，可不辨证而施治耶？孟英尝曰：凡产后，世俗多尚生化汤，是以一定之死方，疗万人之活病，体寒者固为妙法，若血热之人，或兼感温热之气者，而一概投之，骤则变证蜂起，缓则瘵损渐成，人但知产后之常有，而不知半由生化汤之历阶。此风最盛於越，方本传於越之钱氏，自景岳采入《八阵》，遂致流播四海，人之阴受其害者，数百年矣。从无一人能议其非，今特为此长夜之灯，冀后人不至于永远冥行，或可稍补於世。但景岳最偏於温补，而独於产后一门，力辨丹溪大补气血为主之非，可谓此老之一隙微明，惜犹泥于产后宜温之谬说，盖由未入仲圣之宫墙也。

金亚伯廷尉之笪室，产后恶露不行，渴、泻、痰多。孟英以北沙参、滑石、生薏苡、扁豆、蛤壳、豆卷、石斛、竹茹、枇杷叶、琥珀、茯苓等药，数剂而愈。

庚子春，戴氏妇产后恶露不多，用山楂、益母草酒煎，连服数日，遂发热自汗，口渴不饥，眩晕欲脱，彻夜不眠。孟英视之，曰：此素禀阴亏，血已随胎而去，虽恶露甚少，但无胀痛之若者，不可妄投药饵。酒煎益母草、山楂不特伤阴，且能散气。而汗泄口干，津液有立竭之势，即仲圣所谓“无阳也”。盖人身天真之气谓之阳，阳根於津，阴化於液，津液既夺，则阳气无根而眩晕，阴血不生而无寐，若补气生阴，则舍本求末，气血不能生津液也，唯有澄源洁流，使津液

充而气血自复，庶可无忧。以西洋参、生黄芪、龙骨、牡蛎、玉竹、百合、甘草、麦冬、生苡仁、生扁豆、石斛、木瓜、桑叶、甘蔗浆，投之，一剂即安，数日而愈。后以滋填阴分，服之乃健。

《王氏医案》

何平子

产来几及二旬，恶露不下，结痞作痛，自汗频泄，兼之不食脾泄。防其虚脱，姑拟扶正温通，佐破瘀法，图其奏效。

炒黄党参三钱 带皮茯苓三钱 煨木香五分 统当归二钱
土制于术二钱 炮姜一钱 炒橘核钱半 瓦楞子五钱 炒车前三钱
益母草二钱

复诊：焦白术 元胡索 茯苓 煨木香 粗苏叶 全当归
瓦楞子 泽泻 川楝子 冬瓜子

《壶春丹房医案》

张晚香

毛姓一妇，孕八个月，霜降后患伏暑，黄昏寒热，似疟非疟，无物不呕。是上中焦症，其阳之不通，以禁用滑石故也。然日用厚朴、藿梗，更多医，呕总不除。予以喻氏进退法，一剂呕止，即告辞。以极于上者，必反于下。一产即为棘手，病家再三嘱治，用安胎清暑法，不弥月而产。产后母子均吉，惟恶露点滴则无。予思病经一月，今欲求其血，是迫饥民而征敛也，理当加本求利。于是以丹参八钱，当归三钱，川芎二钱，再加沙苑子一两，以代地黄。经血大至，服十剂恶露已净。黄昏寒热又作，予谓是极于下，必反于上也。用薄荷、滑石辛凉解肺而愈。

《医病简要》

徐镛

东门鞠上玉室初产患恶露不行，胸腹饱胀，其脉数大而疾，上兼鼻衄。余用当归二两煎汤，冲热童便与服，稍稍安稳，但恶露止有点滴耳。更医用炮姜等温通套剂，遂至胸腹增胀，恶露点滴不下。有欲依产后春温春例，大进苦寒之品。余日又非稳治，坚用归、地、丹、芍等凉血和血之剂十余日，恶露大行而全愈。凡产后病解能食，七、八日更发热者，当作别病者，初产后即发热者，则仍作产后治，但各有寒热，两途不可不条分缕析。

《医学举要》

张乃修

右。新产之后，恣食冷物，以致恶露不行，腹中结块作痛。姑拟宣通，以觐造化。

延胡索酒炒，一钱五分 当归须二钱 五灵脂酒炒，三钱
炒赤芍一钱五分 干漆炒令烟尽一钱五分 炒蓬莪术一钱五分
南查炭三钱 乌药一钱五分 山甲片一钱五分

又：结块已化，腿足作痛，是必瘀流络隧。寒热交作，阴阳争战。再为宣通。

延胡索一钱五分 制半夏二钱 郁金一钱五分 青蒿二钱
南查炭三钱 大豆卷三钱 酒炒当归二钱 乌药一钱五分
红花汤炒橘络一钱

周右。产后恶露未行，气血凝滞，腹中有形作痛，临圉更甚。脉细关弦。气升汗出不止。此营滞阻气，气滞为液，液泄为汗，宜宣通和化，所谓通则不痛也。

延胡索 金铃子 焦查炭 炒赤芍 火麻仁 乌药 香附
归尾 香橼皮 上徯桂饭丸

二诊：上逆之气稍平，而临圉仍然腹痛，大便艰涩。血燥气滞。

前法參入子和玉燭散出入。

炙生地 酒炒歸身 制香附 金鈴子 延胡索 川朴 縮砂仁 炒赤芍 酒炒上湘軍后入二錢 徧桂飯丸

三診：脈弦稍收，便稍轉潤，臨圍作痛亦減。足見血燥氣滯，府濁因而不泄。前法再參破濁。

金鈴子 九節葛蒲 川朴 郁金 藿香 延胡 磨沉香 炒赤芍 香附 砂仁 火麻仁

四診：痛勢已定，惟臨圍尚覺不爽。的是血凝氣滯，不能上交少陽，而反下陷于太陰也。前法再進一籌。

醋炒柴胡五分 金鈴子一錢五分 查炭三錢 香附二錢
杭白芍三錢 醋炒青皮一錢 當歸二錢 砂仁五分 烏藥一錢五分

鄭右。因痢而產，產後痢仍不止，腹痛里急后重，惡露不行，少腹按之硬痛。所下之色，夾雜瘀黑，查不思納，胸膈不舒。脈滯而硬。此暑濕熱三氣郁阻腸中，瘀露不行，府氣更加郁結。胎前下痢，產後不止之條，古人言之鄭重，非虛語也。勉擬通化一法，以希天佑。

木香七分 烏藥一錢五分 澤蘭二錢 土炒白芍二錢
五靈脂酒炒，二錢 生蒲黃五分 乳香去油，六分 延胡二錢
山楂四錢，赤砂糖七錢并炒，綳包 赤白苓各二錢 炮姜五分
伏龍肝一兩五錢，煎湯代水 又 查肉四錢
赤砂糖七錢，二味拌炒枯，研細為丸，每服三錢

二診：投劑之后，屢下紫黑瘀塊，少腹亦舒，圍數頓減其半。然臨圍猶然后重，氣墜不爽，查不思納，胸中似乎有物硬塞，由此而飲食更覺妨礙。脈虛無力，苔白少華。惡露既通，府中之阻滯稍宣，而中陽結痹。雖得轉機，尚不足恃也。

台參須六分 烏藥一錢五分 廣皮一錢 蘇木五分
酒炒延胡一錢五分 赤砂糖五錢 查炭二錢，與砂糖同炒，包煎
熟附片五分 公丁香二分 茯苓二錢 乳香五分 梗米一兩，包煎
伏龍肝一兩，煎湯代水

改方：服方硬塞处觉灼热微痛，去参须、丁香。

三诊：头面遍身发出赤痞，口渴较前稍定。暑热之气，藉得外越。无如少腹结块虽消，而按之尚觉作痛，下痢虽大减疏，然昼夜犹然在二十次左右，少腹之痛松，则胸中之痛甚，上下互相联络。良以冲瘀未清，则冲气逆上，盖冲脉起于气街，而布散于胸中，所以此响而彼应也。鼓棹迎风，茫茫涯岸。再为宣瘀，以冀冲脉得通，胸中得旷，若能安谷则昌。

细生地 姜汁炒炭四钱 酒炒归尾二钱 生牛膝三钱
五灵脂 酒炒，三钱 炙乳香五分 单桃仁去皮尖，打三钱 台乌药一钱五分
元胡索一钱五分 生蒲黄七分 赤白芍各二钱 生米仁四钱
生熟木香各三分 人参回生丹一九，分二次化服

改方去回生丹，加橘白一钱，稻根须五钱，玫瑰花二朵得效。正蒙附记。

《张聿青医案》

王旭高

孙。前年小产，恶露数日即止，因而腹中作痛结块，心神妄乱，言语如癫。此谓血风病也。胞络下连血海，上系心胞，血凝动火，火炽生风，故见诸症。诊脉弦搏，肝阳有上亢之象，防加吐血。为治之法，当以化瘀为先，清火化痰为佐。

川贝 赤芍 丹参 蒲黄炭 五灵脂 川连 香附 延胡
焦山栀 茺蔚子

另：回生丹一粒，开水化服。

渊按：血风病有数种，此因产后瘀凝而得，病在冲任血海，上及心胞，不脱产后着笔。

章。先痉厥半日而后产，产后厥仍不醒，痉仍不止，恶露稀少，汤水不能纳，纳则仍复吐出，而赤身温，脉洪而荒。肝风炽张，营虚气耗，虚阳外越，冷汗遂出，恐其厥而不返，奈何奈何！姑拟一方，希

冀万一。

肉桂五分 当归三钱

煎汤冲童便一杯，化下回生丹一九。

渊按：脉荒者，乱也。究属杜撰。虚风挟痰上逆，化痰降火，冲入童便最妙。

又：前方勉灌三分之一，恶露稍多，面赤稍退，脉大稍软，而厥仍不醒，舌色灰黄，时沃涎沫，两日饮食不进。营虚气滞，胃虚浊泛。必得温通化浊，以冀阳回厥醒为妙。

肉桂 炮姜 半夏 全当归 丹参 山楂肉 陈皮 茯苓 紫石英 童便冲入

又：厥醒进粥半盏，诸无所苦，惟周身疼痛，不能转侧。舌苔白，口不渴。拟温养气血，兼和胃气。

肉桂 炮姜 黄芪 半夏 当归 丹参 茯苓 陈皮 桑枝

《王旭高临证医案》

黄述宁

蒋姓妇人，产后污浊不行，又因气郁相触，脐上人骨下，大如两拳，按之坚如石，四围充满，较之十人怀胎者而倍大。盖怀孕只腹大，而胸口不高，诸医以调气活血之药，投之不效，因用回生丹四九，一九分作三服，当其肺气喘逆，则配以疏肺之药，肝气冲逆，则兼用伐肝之品。三日后，胸前之坚者软，少腹及两胁之膨者亦消，其人始能起坐，犹以似八月怀胎之腹，忽添心慌意乱，汗出脉软，恶露少下，而大便无度，只得暂停攻伐，以八珍加沉香、木香，固其正。三五日后，神气稍旺，又复以通逐而小其剂。初时只有浊物从二便出，至此始得浊气流通，渐消如三月之腹，又忽添少腹虚痛，小便不禁，竟似胞门大开之象，非峻补无以收功，又恐腹中余剩之坚，得补面固，甚为棘手，因与家传胎产金丹十九丸赠之，令其每日服半丸，以黄

丝绵汤送之。越半月，而神旺腹消，洩便如常矣。

《黄澹翁医案》

张士驥

学琴夫人，产后三四月恶露未见，腹无胀痛，冲逆呕吐涎沫，头痛目眩，口渴，胸膈冲疼，堵塞满闷，号叫不止，汗出不寐，便难。前医进以生化汤加减，数剂不应。更医照三冲治法，进以行气破血宣郁方，其闷愈甚。诊脉虚大而芤，病因身体素弱，生产之时去血已多，无复余血恶露，腹无胀痛是其征也。王孟英论生化汤之弊云：“体寒者固为妙法，若血热之人耗阴伤液，莫此为甚，变症蜂起，蓐劳之渐。夫产后之虚，虚在八脉，五液大伤，再加以生化汤之辛窜劫夺，风阳陡动，冲突上逆，种种见症无非液伤风动，挟冲脉以上逆，以冲任丽子阳明故耳。”吴氏鞠通于产后郁胃、痉厥、大便难三大症，皆主以三甲复脉、大小定珠及专翕大生膏等法。今遵其意，选用定风珠一法，以消息之。十余剂而痊，且弥月后，身体更觉肥胖。因产后恶露未见而用此药，未免骇人听闻，病家多有不敢服者，故特为表明之。

元武板八钱 西洋参三钱 大麦冬三钱 东阿胶三钱
青龙骨五钱 生牡蛎八钱 净淡菜三钱 旧熟地五钱 炒白芍三钱
五味子钱半 炙甘草二钱 云茯神三钱 浮小麦四钱
鸡子黄一个后冲 净童便一杯，同煎

《雪雅堂医案》

巢渭芳

石桥，恽右。大产五日，因家境困难，行动太早，腹痛甚于脐下，寒热并作，恶露顿止，苔白，脉小急，大便阻塞，肠痈之象，宜于和营化痰化。炒归尾、生苡仁、荆芥炭、白芥子、怀牛膝、木香、桃仁、银花、红花、赤芍、丹参、粉丹皮、生草、两头尖。三剂效。

万绥祈庄村，某妻，年三十五岁。大产后下瘀突少，发热面黄，食减胸闷，已越一月，右膝上外侧肿胀绕及委中，肉色晦暗，按之始痛，此是瘀凝络道之外疡也。渭芳明喻之，彼家方知痼症，投气血双补之剂，高突处针刺出黑紫血如墨汁。其夫谓为不治症，渭治以建中加減而愈。

《巢渭芳医话》

王仲奇

胡右，辛家花园。产后十三日，恶露早断，气滞血瘀，湿热乘隙侵袭，发热午后较甚，胸闷欲呕，腹痛，少腹右旁有症癖作梗，脉弦数，苔灰糙。治当两顾。

法半夏 香白薇炒 白豆蔻 杏仁去皮尖 茯苓 佛手柑
川楝子煨 玄胡索炒 青皮炒 陈枳壳炒 五灵脂炒去砂石 泽兰
山楂炒炭

二诊：产后已越两候，恶露早断，瘀凝气滞，少腹右旁有症结作梗，腹痛时作时止；湿热之邪乘隙侵袭，前以两顾，恶露得下但仍未爽，热轻未净，痛已见减，胸闷欲呕亦平，脉濡弦稍数。守原意以治。

法半夏 香白薇炒 白豆蔻 杏仁去皮尖 条芩炒 茯苓 益母草 五灵脂炒去砂石 泽兰 川楝子煨 玄胡索炒 旋复花包
獾肝研末冲

《王仲奇医案》

吴鞠通

癸亥五月二十六日，丁氏，二十八岁。血与水搏，产后恶露不行，腹坚大拒按，神思昏冒，其为瘀血上攻无疑。

归尾五钱 藏红花三钱 川芎一钱 桃仁三钱 两头尖三钱 煮三杯，分三次服。间服化症回生丹五丸。

二十七日：血化为水，瘀滞攻心，昨已危急，因用回生丹，以直

人厥阴阴络之两头尖为响导，续下瘀滞，而神气已清，但瘀滞尚多。议以化症回生丹缓攻为宜。

藏红花二钱 泽兰二钱 两头尖三钱 广郁金三钱 煮两盅，渣再煮一杯，分三次服。化症回生丹三丸，每次和服一丸。

二十八日：腹中无处不痛，脉沉数有力，瘀血尚多。

归尾五钱 元胡索四钱 泽兰三钱 桃仁三钱 京三棱三钱 莪术三钱 红花二钱 两头尖五钱 川芎一钱五分 煮四杯，每杯和化症回生丹一丸服。

二十九日：瘀滞已去不少，腹痛减去八、九。经谓大毒治病，十衰其六，即无毒治病，十衰其九，勿使过剂。今日头晕而冒，视岐见两物，不可猛浪再与攻瘀，议七味丸加车前子、牛膝、琥珀，一面摄少阴生气，一面宣络脉之血，方为合拍。此时生死相关之际，不可不精细也。

茯苓炒黄，四钱 熟地炭八钱 肉桂炒焦三钱 炒泽泻六钱 萸肉炭三钱 丹皮炒焦，四钱 山药炒焦，三钱 车前子四钱 牛膝四钱 共炒炭，煮成三碗，又加琥珀细末九分，分三次冲服。

三十日：同前。

六月初一日：瘀血随冲气上攻，神昏，又用化症回生丹五丸。

初二日：前用摄少阴开太阳法，小便稍利，肿胀征消，但冲气上动，咳而不寐。议伐肾邪以止冲气，和胃以令寐。

茯苓块连皮，八钱 半夏六钱 紫石英生研细，三钱 桂枝术三钱 秫米一握 制五味一钱 甘澜水煮成三杯，分三次服。

初三日：昨与伐冲气，兼和胃，业已见效，仍宗前法；腰冷少腹胀，加小茴香。

猪苓三钱 茯苓块连皮，八钱 半夏八钱 泽泻三钱 老厚朴一钱 秫米一合 桂枝三钱 小茴香炒炭一钱五分 甘澜水煮成三杯，分三次服。

初五日：脉渐小，为病退；左关独大，为肝旺。夜间气上冲胸，浊

阴随肝阳上升之故。产后阴虚，不敢峻攻，食少，宜开太阳，兼与和胃。

茯苓块连皮，五钱 桂枝三钱 小枳实打碎，一钱 旋复花包，三钱
泽泻三钱 五味子制一钱 焦白芍三钱 半夏六钱 广皮炭一钱五分
广郁金一钱五分 泽兰一钱五分 煮三杯，分三次服。

初七日：诸症悉除，惟余痰饮咳嗽，喘满短气胸痹，皆系应有之症，无足怪者。经谓“病痰饮者冬夏难治”，况十数年之痼疾，又届产后乎？

桂枝五钱 姜半夏六钱 厚朴二钱 桂心冲，三分 生薏仁五钱
薤白一钱五分 猪苓三钱 茯苓块五钱 广皮二钱 泽泻三钱 煮三
大杯，分三次服。

《吴鞠通医案》

孔继炎

族弟继湖，道千公之次子。其妇李氏，产后一日而疟，寒热并重，败血因以不下。十余发后，疟渐止，而腹痛大作，上臋胸肋，甚则昏绝，饮食不下，强进则呕，兼之心中烦热，神气昏愤，小便短少，大便溏泻。此予见时，已弥月矣。诊其脉沉而细，且涩且数，根脚尚固。谓道千公曰：症虽危，脉犹可治。前日曾用何药？道千公取方付予，则皆温经、活血、破滞、止泻之品，正治也，而每服则病辄加重。予为沉思，药非不合，何以加病？忽悟曰：此症尚有外邪。六脉沉细，此久病之正脉也。败血未下，兼涩则宜，其数何来？此非疟邪内归，即是寒邪外染。近来疫气盛行，壮人犹或不免，况以产后久病之体，有不乘虚而中者乎？由此言之，前方为不对矣。温经则益其热，破滞则损其正，和血犹为无碍，止泻适以固邪。邪以固涩而不得下，乃串扰腹中，挟败血而作疼、作胀、作呕矣。且神气昏愤，甚至目不识人，非外邪安得有此？道千公曰：前日大热大渴，时静时烦，吾亦疑有外邪。因连日以来，热退渴止，转而腹疼作泻，不似外感。医

又金云脉沉，故皆从产后立治。今当何如？予曰：外感之治，汗、吐、下三法而已。今热退脉沉，邪入脏腑，安可复汗？呕哕已多，病未见减，安可复吐？惟泄泻是邪之去路，然已日行十余次，方虑正气随之俱竭，安可复泻以益其虚乎？惟当急利小便，导引邪热从膀胱而下。膀胱之气一顺，则热邪可以渐去，正气不致日损，膈疼烦呕诸症自见轻减，而肠胃之邪热亦可移而归之小便，而泄泻自止矣。特此外尚有两死，不可不虑。道千公曰：更有何死之足虑？予曰：败血之为害也。产后一日，恶露即止，其败血之蕴于腹中者，正复不少。前日疟作而寒，经十余次之缩栗，早已提入各经。近日疫盛而热，经十余日之燔灼，料必结为硬块。在经之血非利其气不能下，已结之块非破其坚不能出，试思此时之病躯气血尚有几何？可以破气而攻坚乎？夫膈疼、呕泻、昏愆、烦热，现在之诸症也。现在失治，不过膈而死、疼而死、泻久而死，余皆不死矣，此人之所共知也。惟诸症既退之后，败血骤下而不可止，则阴尽阳越，将有虚脱之患。败血终止而不下，则积成块著，即是症瘕之根。虚脱死也，症瘕亦死也，有此两死，岂膈疼诸症一止而遂为愈乎？道千公忧曰：奈何？予曰：此亦视乎治法何如耳。败血业已不下，其散在经络者，愈行则愈远；其聚在胞宫者，愈结则愈深，必俟他症既退而后图之，晚矣。及今为日未久，方以小便一途开外邪之去路，而即于方中主以养阴之药，阴复则热自退，而膀胱之气化日充；佐以和血之品，血和则气益顺，而巨阳之引经不滞。此于外邪之正治，有相资而无相妨，迨外邪渐近，败血渐动，而真阴亦已渐复，可无虚脱之患矣。惟现在正气过弱，不堪胜任领载之任，将来败血即动，亦未必能从容顺下，而预用补气之味，又为外邪助势增热，此处殊为棘手耳。然而消息于邪正进退之间，亦可委曲以求济，语所谓活法在人，未可先事而预定也。道千公遂悬坐治，予以茯苓、半夏、橘皮降其逆气，当归、芍药养其阴，而加以元胡、鳖甲、红花活其滞血，泽泻、猪苓、木通利其小便。再剂，小便利，遂去木通。再剂，邪热平，遂加党参，数剂之后，诸症全退，败

血徐下，饮食亦大进矣。调理十日，而病瘳矣。继溯请为案，予乃录而志之。

《孔氏医案》

范文甫

张师母。产后受惊，腹痛，恶露不行。血府有瘀，诸证皆由此而起。

当归 9克 生地 12克 桃仁 9克 红花 6克 甘草 3克
枳壳 6克 赤芍 9克 柴胡 9克 川芎 6克 牛膝 9克 茜草 9克

二诊：恶露行，乃是好事，腹痛亦瘳。

当归 9克 生白芍 9克 茯苓 9克 川芎 9克 桂枝 3克
丹皮 9克 桃仁 9克

《范文甫专辑》

魏长春

叶新友君，夫人蒋氏，年二十一岁。八月五日初诊。

病名：半产发斑。

原因：怀孕七月，臂生一疮未溃。上月廿九日，跌仆伤胎。本月一日半产，产后恶露不行，热炽神昏，曾延西医治疗不效，遂邀余诊。

证候：身热甚炽，遍体发斑，有汗，目赤，气促，便下溏泻，神识时清时昏。

诊断：脉数舌红糙。半产之后，恶露不行，瘀热内阻，邪搏血分，而出于表，故发斑也。

疗法：用犀角地黄汤，加清暑解毒之品。夫产后凉药治例，金匱有竹皮大丸之法。徐灵胎、王孟英亦有深切发明。若泥于产后宜温之说，每致僨事，治病当知活法。岂可胶柱鼓瑟哉。

处方：犀角片一钱 鲜生地一两 丹皮三钱 赤芍四钱

桃仁二钱 紫花地丁草三钱 玄参四钱 黄芩三钱 白薇三钱
天花粉三钱 生鳖甲八钱 银花三钱 生石膏一两 紫雪丹八分
杜红花二钱

次诊：八月六日。赤斑渐隐，肌肤色淡，身热略减，口干唇裂，神识明昧，头汗目赤，脉左缓，右洪滑数，舌红起刺。臂疮开刀，脓血颇多，热毒已有出路，用三甲复脉法，育阴潜阳清热。

次方：生龟板八钱 生鳖甲八钱 生牡蛎八钱 玄参四钱
西洋参二钱 大生地八钱 鲜生地一两 原麦冬四钱 生甘草三钱
鲜糯稻根四两，洗净煎汤代水煎药

炳按：宜加通恶露药。

三诊：八月七日。大便日下二次，热退身凉，渴痊神清，臂疮疼痛未敛，肌肤红色，脉象缓和，舌色红润，病势转机。拟清解热毒法。

三方：生甘草二钱 银花三钱 鲜生地四钱 鲜金钗三钱
连翘三钱 生苡仁八钱 紫花地丁草三钱 丹皮三钱 益母草三钱
天花粉三钱 原麦冬三钱

效果：服药后，胃苏力强，臂疮未敛，产后恶露未行。拟调营和卫，解毒润燥方善后，静养二旬痊愈。

炳按：产后瘀热发斑，清解热毒之中，仍宜通瘀热随瘀去，则效更速，乃今恶露至愈不来，或瘀血已从大便出也。

《慈溪魏氏验案类编初集》

曹颖甫

同乡姻亲高长顺之女嫁王鹿萍长子，住西门路，产后六七日，体健能食，无病，忽觉胃纳反佳，食肉甚多。数日后，日晡所，觉身热烦躁，中夜略瘥，次日又如是。延恽医诊，断为阴亏阳越。投药五六剂，不效。改请同乡朱医，谓此乃桂枝汤证，如何可用养阴药？即予轻剂桂枝汤，内有桂枝五分，白芍一钱。二十日许，病益剧。长顺之弟长利与余善，乃延余诊。知其产后恶露不多，腹胀，予桃核承气

汤，次日稍愈。但仍发热，脉大，乃疑《金匱》有产后大承气汤条，得毋指此证乎？即予之，方用：

生大黄五钱 枳实三钱 芒硝三钱 厚朴二钱

方成，病家不敢服，请示于恽医。恽曰：不可服。病家迟疑，取决于长顺。长顺主与服，并愿负责。服后，当夜不下，次早，方下一次，干燥而黑。午时又来请诊，谓热已退，但觉腹中胀，脉仍洪大，喘仍服原方。实则依余意，当加重大黄，以病家胆小，姑从轻。次日，大下五六次，得溱薄之黑粪，粪后得水，能起坐，调理而愈。独怪近世医家遇虚羸之体，虽大实之证，不敢竟用攻剂。不知胃实不去，热势日增及其危笃而始议攻下，惜其见机不早耳！

《经方实验录》

周镇

秦冬泉妻，西门外。向有肺痰咳喘，怀妊后略好。丁巳五月生男，恶露不畅。五朝食糯米饭，其夫斥之则大怒，迨晚寒热，恶露更少。北郭王君用回生丹等，不应。迨六月十一日延诊，脉数，苔白。视其面瘦，咳喘大盛，痰韧成碗。鼻窍扇动，亦为败征。审其病因，暑热开窗，产时手不停扇，暑邪挟风可知。少腹曾大痛，下瘀不多，因气而血滞，亦为血瘀。产后喘盛有自汗，防变。初拟炒荆芥、杏仁、蒲黄、旋复、荷叶、泽兰、川贝母、赭石、郁金、香附、乌药、蓬术、玄胡、五灵脂。另西血珀、伽楠香、没药、血竭，研末服。复诊：瘀略行，喘略减，惟汗犹自泄。前方去荆芥、杏仁、香附、蓬术、泽兰，加蛤壳、桂枝汤炒地骨皮、丹参、两头尖。药末去血竭、没药，加猴枣，清其热痰。热大轻，痰喘骤定。三诊：鼻扇、气逆、涌痰均止，腹痛退，尚板滞，胸中不舒，自汗肤冷，便泄力乏。脉转虚微，苔浊化，舌淡红。气滞不清，元阴大虚矣。拟东洋参、野于术、冬虫夏草、桂枝汤炒地骨皮、白芍、淮小麦、茯苓神、米炒麦冬、五味子、煨木香、楂炭、炒枣仁、杞子等。渐觉脉振卓，汗泄止，力复原而安。

于君之室，南苏秦于巷。乙卯春，因胎前肿胀，产后复剧。向有宿咳，胸痛气胀，少腹中结块如杯，坚而疼痛。询知产后恶露甚少，积久有形。南城某君诊系湿热，服多剂不退。允渡所售之产后药已进数剂，亦不甚验，因来诊。脉濡左弦，因宗气滞停瘀，兼挟痰饮例，疏旋复、橘皮、半夏、橘核、川楝、玄胡、归须、香附、乳香、没药、两头尖，而别以葱须、麦秸煮水煎药。服数剂，面肿略减。复询肝火素旺，气机不畅。用四七气汤、金铃子散、失笑散加丹参、泽兰、防己、蓬术、郁金等。服后上身之肿大减，腹中瘀块已软，向本足胫轰热亦定。再予旋复、紫菀、香附、苏梗、乌药、当归、泽兰、防己、蓬术等。腹痛止，瘀块已化；脘满既松，食亦大增。至四月初浣，肿势全退。病者因胎前肿胀，绵延产后数月，多医广药而不见退，故一经应效，即谨慎饮食，服药忌盐，迨乎善后，毫无反复阻滞。续拟丸方：当归、赤白芍、川芎、姜汗炒生地、泽兰、丹皮、丹参、防己、川楝、黑豆、茺蔚子、郁金、香附、乌药、麦芽、鸡内金，研，以神曲煮糊为丸，早晚两服。连服两料，甚觉相宜，而告全愈矣。

《周小农医案》

翟竹亭

邑西郭外彭庄王金铭女，年二十余。九月临产，产后二日出外洗衣，至家寒热大作，恶露立止，腹疼难忍，满面发赤，几死者数次，诸医袖手。请余时业已六日。此证产后为虚，瘀血为实，王好古曰：“不能固其虚，安能攻其余。”遂用扶正攻血，二帖瘀血大下，诸症已去六、七，又服一帖，恶露方尽。后用八珍汤三帖病良已。

扶正攻血汤

党参 15 克 茯苓 10 克 白术 10 克 炙甘草 10 克 桂枝 15 克
干姜 15 克 三棱 12 克 莪术 12 克 焦山楂 30 克 穿山甲 10 克
桃仁 24 克 红花 10 克 水煎服。

《湖岳村医医案》

叶熙春

郭，女，二十九岁。三月。杭州，产后一候，夹感，先有形寒，继而壮热，胸闷，烦躁不安，口渴喜饮。今起恶露减少，色呈紫黯，小腹胀疼，苔黄而干，脉象浮数，有热入血室之虑。治以辛凉解表，佐以行瘀。

青连翘 9克 炒荆芥 6克 黑山栀 9克 炒香鼓 6克 花粉 9克
金石斛 9克，劈，先煎 冬桑叶 9克 炒桃仁 6克，杵 炙当归 9克
杜红花 5克 炒蒲黄 6克 益母草 12克

二诊：服后得微汗，身热已减，胸闷渐宽，烦渴亦差，恶露增多，小腹已不胀痛，苔薄黄，脉滑。再宗原法。

炒荆芥 6克 冬桑叶 9克 川石斛 12克 杜红花 5克 甘菊 6克
青连翘 9克 新会皮 5克 川郁金 6克 花粉 9克 竹二青 9克
炙当归 9克

《叶熙春专辑》

恶露不绝

王孟英

金氏妇，自仲夏堕胎，迄今四月有餘，恶露淋漓不断，两臂近复患疮，浑身肤痒，脉数而弦，多药罔效，亦为产后宜温之谬说所误也。用西洋参、银花各二钱，生地、龟版各四钱，冬瓜皮三钱，梔炭、竹茹各一钱五分，白薇、青蒿、黄柏各一钱，甘草六分，不十剂愈矣。

《归砚录》

费伯雄

某。产后受寒，兼之郁怒伤肝，血海空虚，冲气上逆，在腹胀满而痛，恶露淋漓，至今月余。宜以温中降气和营。

当归三钱 酒炒白芍一钱半 川断三钱 丹参二钱
青陈皮各一钱 六曲炒三钱 桂枝三分 乌药一钱半 制香附二钱
炙草五分 煨姜二片 橘饼二枚 桑枝三钱

《费伯雄医案》

黄述宁

陈家集林舒言令弟上国之内，产后重恙，召往诊病。因产后恶露未尽，生男数日而殇，以致气逆恶留，腹大如孕，手肢青肿，饮食不进，终夜坐起，烦躁不宁，小便不通，数日前，溏粪一、二遍，诸医有虑其脾泄，用四君五苓，加土炒当归不效。因立案云：产后，污败不行，始于冲任，流于隘道，以致胁痛肢肿，冲胃阻食，所喜未伤心肺，尚属可治，方用郁金、延胡、归尾、沉香、泽兰、香附、砂仁，和入回生丹，连进二服，灯后二便俱通，左胁胀痛消软，调理五日而安。

《黄澹翁医案》

王仲奇

陆右，牯岭路，十月廿三日。流产弥月，胃火升逆，面浮，耳颊颌下俱肿，且有结核，牙龈肿痛色紫，吞咽咽间作梗，舌苔黄浊厚腻，脉滑而数；恶露未净。治以清泄。

忍冬藤三钱 粉丹皮炒，钱半 茯苓四钱 紫地丁三钱
陈枳壳炒，钱半 佩兰三钱 土贝母二钱 法半夏钱半 生苡仁三钱
条芩炒，一钱二分 陈赤豆四钱 山豆根钱半

二诊：十月廿八日。牙龈肿痛已愈，紫色亦淡，面浮、耳颊颌下肿核俱消，咽间仍稍有作梗，耳鸣头眩，目花多泪，疲倦欲眠，脉濡而滑。血中热浊已渐见清，而流产血亏，脑力未复。仍守原意出入治。

左牡蛎煨先煎，三钱 石决明煨先煎，四钱 紫贝齿煨先煎，三钱
甘甘枸杞炒，二钱 白蒺藜三钱 金钗斛二钱 甘菊花钱半

白芍炒，二钱 野料豆三钱 女贞子三钱 茯苓三钱 谷精草二钱

三诊：十一月初二日。耳颊颌下肿核已消，咽间作梗亦爽，面浮已退，赝肿色紫较淡、胀尚未愈，头眩耳鸣，寐则多梦，脉软弦，苔黄腻。仍以清肝火、化胃浊而清脑安神。

夏枯草三钱 苦丁茶钱半 甘菊花钱半 霜桑叶二钱 茯苓四钱
白芍炒，二钱 粉丹皮炒，钱半 条芩炒，一钱二分 金钗斛二钱
蒲公英三钱 法半夏钱半 陈枳壳炒，钱半 佩兰三钱

四诊：十一月初六日。赝肿已愈，色紫亦退，寐梦颇觉安静，面容清爽，苔黄亦已融化，惟左耳仍有鸣响，脉软弦。仍以镇静柔剂，以安宗脉可也。

青龙齿煨先煎，三钱 石决明煨先煎，四钱 夏枯草三钱
苦丁茶钱半 甘菊花钱半 霜桑叶二钱 金钗斛二钱 白蒺藜三钱
白芍炒，二钱 粉丹皮炒，钱半 茯苓三钱 女贞子三钱

《王仲奇医案》

丁泽周

张右。新产后营阴亏耗，恶露未楚，旧患便溏，脾土薄弱，胃呆纳少，舌苔薄腻，脉象濡缓，新邪旧恙，治宜兼顾。姑拟和营生新，扶土和中。

全当归二钱 云茯苓三钱 生白术一钱五分 益母草三钱
紫丹参三钱 杜红花五分 焦楂炭二钱 大川芎五分 炮姜炭四分
炒谷芽三钱 炒赤砂糖三钱 干荷叶一角

二诊：新产三朝，昨起寒热，至今未退，头痛骨楚，胸闷不思饮食，舌苔薄腻，脉象弦滑带数。此营血已亏，恶露未楚，氤氲之邪乘隙而入，营卫循序失常。姑拟清魂散合生化汤加味，一以疏邪外达，一以祛瘀生新。

紫丹参二钱 大川芎四分 炮姜炭三分 炒黑荆芥炭一钱五分
益母草二钱 杜红花六分 清水豆卷三钱 炒赤砂糖三钱

全当归二钱 焦楂炭三钱 炒谷芽四钱 炒白薇一钱 干荷叶一角

三诊：新产五朝，寒热轻而复重，头痛骨楚，胸闷不思饮食，舌苔腻布，恶露未止，脉象弦滑带数，宿瘀留恋，氤氲之邪挟痰滞交阻阳明为病。再拟清魂散合生化汤，复入疏散消滞之品。

紫丹参二钱 杜红花八分 枳实炭一钱 炒白薇一钱五分
炒黑荆芥一钱五分 全当归一钱五分 焦楂炭三钱 益母草二钱
淡豆豉三钱 大川芎五分 炒谷芽四钱 保和丸包煎，三钱

四诊：新产八朝，形寒身热，有汗不解，胸闷，饥不思纳，渴不多饮，舌苔薄腻而黄，脉象弦滑带数。客邪移于少阳，宿瘀未楚，营卫失常，有转疟之机括，还虑缠绵增剧。再拟小柴胡汤合清魂散、生化汤复方图治。

吉林参须五分 杜红花八分 清水豆卷四钱 嫩白薇一钱五分
软柴胡五分 全当归二钱 紫丹参二钱 大川芎四分 炒黑荆芥一钱
全瓜蒌切三钱 炒谷芽三钱 益母草二钱 通草八分

五诊：新产十二朝，寒热得退，胸闷不纳如故，小溲短赤，舌苔薄腻，阴血已亏，蕴湿未楚，脾胃运化无权。再拟养正祛瘀，和胃化湿。

吉林参须五分 赤茯苓朱砂拌，三钱 全当归二钱 清水豆卷三钱
炒黑荆芥五分 福泽泻一钱五分 谷麦芽各三钱 益母草二钱
陈广皮一钱 紫丹参二钱 通草八分 佩兰梗一钱五分
大砂仁研，五分 干荷叶一角

《丁甘仁医案》

汪逢春

李右，二十四岁，四月五日。

产后恶露未净，止血太速，少腹胀满坠痛，舌苔垢厚浮黑，两脉细弦滑。拟以芳香化浊，调和络分。

泽泻叶钱五，后下 四制香附三钱 怀生地五钱，苦楝子钱五同炒

紫丹参三钱，米炒 生熟赤芍钱五，枳实钱五同炒 真归须三钱
台乌药钱五 藕节四钱 鲜佛手三钱 延胡索钱五 嫩桑枝五钱，
丝瓜络三钱

玉液金丹一九，匀两次，药送下。

二诊：四月七日。药后诸恙渐愈，腹痛已缓，知苔黄渐化，两脉细弦滑。前法既效，毋庸更张。

泽泻叶钱五，后下 怀生地钱五，苦楝子钱五同炒 丝瓜络三钱
料豆衣四钱，黄酒浸 藕节四钱 生熟赤芍钱五，枳实钱五同炒
真归须三钱 紫丹参三钱，米炒 佛手花一钱 四制香附三钱
延胡索钱五 嫩桑枝四钱 台乌药钱五

加料：玉液金丹一九，匀两次，药送下。

《泊庐医案》

章成之

汤女，产后恶露淋漓，迄今两月未净。其色鲜红，当是子宫出血，腹不胀痛，只宜温摄，不宜去瘀。

生熟地各12克 萸肉9克 乌贼骨15克，煨 阿胶24克，烊冲
牛角鳃炭9克 五味子4.5克 炮姜炭2.4克 生艾叶4.5克
诃子肉9克 震灵丹9克，分二次吞

陈女。七月早产后，迄今四旬，恶露未净，时下白带而腥臭，可知生殖器官有慢性炎症，带下频则腹痛更急。

白芍12克 当归9克 毕澄茄9克 生侧柏叶15克
干地黄12克 象贝母9克 苦参片6克 黄柏6克
小茴香2.4克，后下 台乌9克

张女。因滞下而早产（九月不足），产后滞下如故。腹中痛，其痛一因恶露未尽；二则肠粘膜刮剥而下。暮甚于昼，大致是虫痢。恶露不尽，则因子宫尚未收缩，此症主要有三点：一、恶露；二、滞下；三、热与咳。用药并须扼守产后岂寒之说，不能因痢下而用白头翁

汤。

醋炒柴胡 6 克 薤白头 9 克 桃仁 12 克 杭白芍 12 克
生枳实 9 克 炮姜炭 3 克 大川芎 5.4 克 油当归 9 克
生艾叶 4.5 克 失笑散 12 克 炙紫菀 9 克 肉桂末 0.9 克,分二次吞
另:山楂末 60 克,用赤砂糖调吞,三日服完。

《章次公医案》

胞衣不下

任贤斗

朱履亭之妻,临产四日,胎始下,胞衣不下,合室惊惶,稳婆云门户紧闭,衣不能出,问瘀止否?答曰瘀血未止。问精神何如?胸膈畅否?答云皆如常。余曰不妨,令产妇勿惊。夫胞衣不下是怕瘀血停止,若瘀血不出,胞衣必致胀大,胞衣胀大,瘀浊之气必上腾而为气喘神昏,最为可畏,若胞衣仰盛瘀血,更为可畏,即令惯熟稳婆,以手探衣仰盛瘀血,更为可畏,即令惯熟稳婆,以手探入产户将胞衣攀开一角,使瘀血随流,胞衣亦下。此人瘀血未止,胞衣不致胀大,精神如常,胸膈畅达,是正气尚能主持,敢许安然。盖因生产用力,数日气虚,不能推送也。稳婆云门路紧闭,纯是胡说,不可信也。但宜补气,气足自能推逐瘀血,瘀血既出,胞衣必致缩小,总宜安心服药,切勿惊恐,惊则神气耗散,阴邪必乘虚上侵而气喘,定致坏事。与六气煎加附片,服至第六日,胞衣缩小而出,诸症皆愈,而产妇亦安宁无恙。

六气煎

黄芪 肉桂 人参 白术 当归 甘草

《瞻山医案》

巢渭芳

北门，邱大妻。产后胞衣不下，恶露不清，面色㿗白，身热入夜尤甚。其翁并其生父皆医生，无法为辞，乃转友商请余诊。其脉弦涩，神昏闷乱，阴液两伤。急与牛膝、瞿麦、木通、当归、红花、桂心、冬葵子、桃仁、丹参，另加黑豆（煎汁）四两、童便三杯、菜油二两，冲入。覆碗未三小时，即下瘀，胞亦随出。此乃和血行瘀药效。越五日，见其生父陈某曰：颇能起居矣，惟稍有寒热，谅无妨。余曰：速调营养肝，不然旬日后热不退，即成脱症耳。不信，果半月后闻厥热动风而殁，惜哉！

《巢渭芳医话》

周镇

林姓儿，庚子产时，适值腊月。约一时许，胞衣不下。收生者屡用手术不应，势甚危急。余诊此，念本有效方。然处方购药水煎，乡村更缓不济急。忆及《肘后方》有用蓖麻子十四粒去壳研，涂足心之法。即购捣，如法用之，立时便下，大劳佛手失笑散方。惟胞下速宜试去药物，否则肠下。一方本药研涂顶心，可摄肠令上，但未试。

《周小农医案》

产后血崩

薛立斋

一产妇血崩，小腹胀痛，用破气行血之剂，其崩如涌，四肢不收，恶寒呕吐，大便频泻，用六君炮姜，四剂稍愈。又十全大补，三十余剂全安。

一产妇血崩，因怒其血如涌，仆地口噤目斜，手足抽搐，此肝经血耗生风，用六味丸料，一剂诸症悉退。但食少晡热，佐以四君、

柴胡、丹皮而愈。

《续名医类案》

孙文垣

黄氏妇，产未弥月，醉犯房事，血来如崩，发热头晕，大小便俱热，六脉洪大，以竹茹、蒲黄、白芍各一钱，香附、茯苓、侧柏叶各七分，甘草、炮姜、艾叶各三分，血止大半，腰犹胀痛，下午胸膈饱闷。改以川芎五分，当归、茯苓、补骨脂、蒲黄、香附各八分，姜炭、甘草各一分，陈皮七分，人参一钱而愈。

《续名医类案》

吕东庄

从子在公妇，半产恶露稀少，胸腹胀甚，脉之濡数，当重用参芪，不然必崩。因力艰未服，已而果崩溃不止，下血块如拳如碗者无数，神气昏愤，两足厥冷至小腹，两手厥冷至肩，额鼻俱如冰，头上汗如油，旋拭旋出，按其脉至骨不得见，乃投大剂补中益气汤，加人参一两，未效（如无一两之参，单服补中益气汤，则立脱矣，不可不知）。急用人参一两，附子一两，炮姜二钱，浓煎灌之。至暮渐减，戒曰：俟其手足温即停药。至三鼓手足尽温，崩亦止，家人忌戒，又煎前进之，比晓视之，脉已出而无伦，痰忽上涌，点水不能饮，人口即吐呕，并独参汤不能下。曰：过剂所致也。即投生地黄五钱，熟地黄一两，当归、白芍、枸杞各三钱，甘草一钱，浓煎与饮，病者意参饮尚吐，况药乎？不肯服，乃强之曰：试少饮必不吐，进半瓯殊安，遂全与之，尽药而痰无半点，神气顿清矣。午后体发热，曰：此血虚热恒理也。复用十全大补，调理而痊。

《续名医类案》

张飞畴

陈子厚媳，八月间因产不顺，去血过多，产后恶露稀少，服益母汤不行，身热汗出。产科用发散行血更剧。自用焦糖酒一碗，遂周身络脉窻楚难堪，恶露大下，昏沉戴眼，汗出如浴，但言心痛，不可名状（即瘀血心痛也）。此去血过多，心失其养，故痛。肝生筋，为藏血之地，肝失其荣，故脉络窻楚不堪。且汗为产后之大禁，非急用人参，恐难挽也。用四君合保元汤，加白芍、五味，一剂汗止。因其语言如祟，疑为瘀血未尽，更欲通利。曰：音怯无神，此属郑声，且腹不疼痛，瘀何从有？此神气散乱不收之故。前方入枣仁、龙齿，诸症悉平。后服独参汤，至弥月而安。

《续名医类案》

薛立斋

一产妇，月经不调，内热燥渴，服寒凉之剂，其血如崩，腹痛寒热，作呕少食，用六君子二十余剂，诸病悉愈。以加味道遥散，调理而安。

一产妇月经年余不通，内热晡热，服分气丸，经行不止，恶寒作渴，食少倦怠，胸满气塞。朝用加味道遥散，夕用四君子汤，月许诸症悉愈。佐以八珍汤，煎服两月而愈。

《续名医类案》

马元仪

金氏妇，产后一月血来不已，厥逆，自汗不止，或与养血补阴不效。诊之两尺空大无神。曰：褚氏有云，血虽阴类，运之者其阳和乎？今厥逆自汗，脉大无根，为脾肾之真阳内弱，故血无所附而溢，所谓阳虚阴必走也。法当大补真阳，以摄虚阴，若养血补阴恐血未必生，而转伤阳气，则阴血愈不守矣。以人参三两，白术一两，附子三钱，

茯苓、炙甘各一钱，一剂知，二剂已，数剂精神胜常矣。

《续名医类案》

缪仲淳

贺函伯乃正，小产后阴血暴崩，作晕恶心，牙龈浮肿，喉咙作痛，日夜叫号不绝，曰：此因失血过多，阴气暴亏，阳无所附，火空则发，故炎上，胸中觉烦热，所谓上盛下虚之候也。法当降气，气降则火自降矣，火降则气归元，而上焦不烦热，齿龈肿消，喉咙痛止，阳交于阴，而诸病自己耳。用苏子研青蒿子各二钱半，麦冬、白芍、鳖甲、牛膝、生地、枸杞各四钱，五味五分，枣仁五钱，续断、橘红各二钱，枇杷叶三片，河水煎，加童便一大杯，郁金汁十二匙，空心，服时进童便一杯。

许竹溪夫人年三十余，产后自己至酉血暴下如注，呵欠连连，遂目闭口张，面色青惨白悴，汗出不止，发根尽湿，六脉全无，势欲脱矣。其初亦以童便灌之，韭醋熏之，殊不应。乃用熟地二两，杞子、枣仁各一两，令煎汤，候药至投入，不待稠脓，即徐徐灌之，才尽一锺，汗止目开口闭，渐知人事。再与之，血止而睡，醒后进粥。次日仍以前方，令日服一剂，四日全瘳。当其亟于诊也，时方与人会饮，掷杯而往，疏方而返。坐有业医者数人，询其症，咸曰：犹与药乎？用何方？曰与某某。咸诧笑曰：君真买干鱼放生也。咎将随任，余笑而不言。

宋申甫室人妊数月，时长夏归宁母家，召医诊之，以为经阻也，投破瘀辛热之剂，四帖遂半产，血行如泻，亟余诊，至则大汗淋漓，脉将脱矣，伏几上，去床数步，不能就寝，以血行之猛也。时唯亲戚朱某在，乃属其母煮水，待药煎百余沸，即与服，再煎再与，不及稠浓也。急偕朱就近铺买熟地四两，杞子、枣仁炒各二两，如法服立瘳。

张建东室人年三十余，妊娠五月，素有肝症，偶不快，邻医与

荆、防、广木香、砂、郁金、元胡之类，五剂遂见红，腰腹酸坠，气促面红，诊之脉不接续。曰：胎已难保，第与滋养二阴，以防其崩耳。其产必在子夜，若待崩而延诊，服药恐缓不及事，先疏方与之，熟地二两、杞子一两、枣仁一两。令察其面若加赤，气若加喘，血必暴下，宜急饮之。至时——如言，果获无事。次日就前方减半，人人参一钱，二剂面痊。后数年复孕，因肝虚发厥，余用生地、杞子一剂，不敢服，遂至变症百出，产后上咳下利，余与杞子、生地、沙参、麦冬，病少退。次日仍前方，告以必萎仁乃可，以服参、术、姜、附既多，热郁甚，非此莫能解也。遂不复邀。后闻其日进参、芪、术、附，卒致不起。人之生死岂皆命乎？

《续名医类案》

李铎

某氏妇，产后两月，红下不断，势成血崩之渐，乃经脉已伤，营卫衰弱，以及数产女而不产男，忧郁恚怒，脏气不平所致。陈无择曰：产后血崩，不是轻病，是为重伤也。议养营固精法止之。

党参酒炒 黄芪酒炙 当归 白芍炒黑 白术 鹿茸酥 血余 鹿角霜 续断 乌贼骨炒黄 蒲黄炒黑 甘草炙

服十帖，去蒲黄加紫石英，甚效。

又拟丸方

鹿茸二两半，炙 阿胶蒲黄炒，二两 归头一两五钱 龙骨煅，二两 赤石脂两半，煅 续断一两半，炒 乌贼骨炒黄，二两 姜炭一两

共制为末，羊肉汤泛丸。

此方以一派固血，兼入奇经，不用补气之味，尤妙在鹿茸能引血上升。《本草经》云：主漏下恶血。陈修园曰：鹿为仙兽而多寿，其卧则口耳对尾间，以通督脉，督得其补则大气升举，恶血不漏，以督脉为阳气之总督也，然角中皆血所贯，冲为血海，其大补冲脉可知

也。

《医案偶存》

徐鏊

郡城张六老室，产后月余，崩中不止，时当暑月，医用和中养血，俱不能止。病已三日夜，视为必死。余诊其脉，浮大欲脱，连声索救，神气尚清。急令煎黄芪一两、当归一两，服之顷刻立止。古方当归补血汤，黄芪多于当归五倍，今加当归与黄芪等分者，时当暑月，恐黄芪之过亢也。

《医学举要》

张士驥

柳，太阳伤风，眩暈，脉浮缓模糊，左尺少紧。

桂枝三钱 防风三钱 杭芍三钱 细辛六分 炙草钱半
生姜二钱 黑枣三枚

产后月余，经水淋漓不止，时或暴下鲜血，头眩身浮，口渴不食，腹无痛楚。两尺滑短无力，滑为血虚，短为气虚。两关缓涩无力，为气血两虚。峻补气血，是为正法。

大熟地八钱 阿胶珠三钱 炮姜炭一钱 炙绵芪五钱
当归身二钱 断艾叶二钱 乌梅炭一钱 正丽参三钱 杭白芍三钱
炙甘草二钱 血余炭三钱 砂仁末一钱

三剂血全止，脉症均见递减，口渴渐止，饮食照常。因肝木虚阳上窜，头痛如劈。左关浮滑带数。固补之中参入镇肝，服八剂。再拟丸方善后。

乌鱼骨五钱 甘杞子四钱 正于术三钱 杭白芍三钱
阿胶珠二钱 高丽参二钱 大熟地五钱 炙甘草钱半 生牡蛎四钱
砂仁末一钱

《雪雅堂医案》

张锡纯

天津李氏妇，年近四旬，得产后下血证。

病因：身形素弱，临盆时又劳碌过甚，遂得斯证。

证候：产后未见恶露，纯下鲜血。屡次延医服药血终不止。及愚诊视，已廿八日矣。其精神衰惫，身体羸弱，周身时或发灼，自觉心中怔忡莫支。其下血剧时腰际疼甚，呼吸常觉短气，其脉左部弦细，右部沉虚，一分钟八十二至。

诊断：即此脉证细参，当系血下陷气亦下陷。从前所服之药，但知治血，不知治气，是以屡次服药无效。此当培补其气血，而以收敛固涩之药佐之。

处方：生箭芪一两 当归身一两 生怀地黄一两 净萸肉八钱
生龙骨八钱，捣碎 桑叶十四片 广三七三钱，细末

药共七味，将前六味煎汤一大盅，送服三七末一半，至煎渣再服时，仍送服其余一半。

方解：此乃傅青主治老妇血崩之方。愚又为之加生地黄、萸肉、龙骨也。其方不但善治老妇血崩，即用以治少年者亦效。初但用其原方，后因治一壮年妇人患血崩甚剧，投以原方不效，且服药后心中觉热，遂即原方为加生地黄一两则效。从此，愚再用其方时，必加生地黄一两，以济黄芪之热，皆可随手奏效。今此方中又加萸肉、龙骨者，因其下血既久，下焦之气化不能固摄，加萸肉、龙骨所以固摄下焦之气化也。

复诊：服药两剂，下血与短气皆愈强半，诸病亦皆见愈，脉象亦有起色。而起坐片时自觉筋骨酸软，此仍宜治以培补气血，固摄下焦气化，兼壮筋骨之剂。

处方：生箭芪一两 龙眼肉八钱 生怀地黄八钱 净萸肉八钱
胡桃肉五钱 北沙参五钱 升麻一钱 鹿角胶三钱

药共八味，将前七味煎汤一大盅，鹿角胶另炖化兑服。方中加

升麻者，欲以助黄芪升补气分使之上达，兼以升提血分使不下陷也。

三诊：将药连服三剂，呼吸已不短气，而血分则犹见少许，然非鲜血而为从前未下之恶露，此吉兆也。若此恶露不下，后必为恙。且又必须下净方妥，此当兼用化瘀之药以催之速下。

处方：生箭芪一两 龙眼肉八钱 生怀地黄八钱 生怀山药六钱
胡桃肉五钱 当归四钱 北沙参三钱 鹿角胶四钱
广三七三钱，细末

药共九味，先将前七味煎汤一大盅，鹿角胶另炖化兑汤药中，送服三七末一半，至煎渣再服时，仍将所余之鹿角胶炖化兑汤药中，送服所余之三七末。

方解：按此方欲用以化瘀血，而不用桃仁、红花诸药者，恐有妨于从前之下血也。且此方中原有善化瘀血之品，鹿角胶、三七是也。盖鹿角之性原善化瘀生新，熬之成胶其性仍在。前此之恶露自下，实多赖鹿角胶之力，今又助之以三七，亦化瘀血不伤新血之品。连服数剂，自不难将恶露尽化也。

效果：将药连服五剂，恶露下尽，病遂全愈。

《医学衷中参西录》

何长治

右。产后崩冲，肝不藏血，以致心悸头眩，耳鸣，惊恐难寐，腹胀气攻，脉弦软。肝脾交困，调复非易也。

枳实四分 炒白芍钱半 龙齿三钱 茯神三钱 首乌三钱
木香五分 米仁三钱 丹皮钱半 阿胶二钱 青皮钱半

《何鸿舫医案》

曹惕寅

苏检厅长王仁山之媳，以孕育过多，营阴亏乏，肝木上亢，大咳

逆，大失血。或注射收敛血管之西药，药性一过，病复如旧。或投以大苦大寒之猛剂，血益涌冒。忽于黎明邀余往诊。察其形色，颧赤倦语。按其脉搏，弦劲洪大。一派阴竭火炎之象。寒之只可暂遏，非益阴潜阳不为功也；配方更须重剂，庶可制止亢阳。方用蚕豆花露五两合大生地七两打汁，徐徐温服，佐以龟板、元参、白芍、二母、白石英、十灰丸、黑山栀、泽泻、芦根、藕汁、童便等，一剂而血止。同时并令以陈酒脚温洗两足，复以大生地、盐附子捣涂足心。翌日，神色安和，脉亦宁静。盖治血之旨，实火宜凉，虚火宜补；血紫宜凉，血鲜宜补。倘属虚火而误服寒凉，犹沸油中泼水，激之使怒，望其潜降可乎？

《翠竹山房诊暇录稿》

张山雷

陈右。七月十七日小产后鲜瘀杂下，淋漓不绝。八月初旬崩中数次，所失甚多，迄今未已，时且大下，脉细小，胃纳尚安。去岁七月亦曾小产，治宜益气固摄。

党参 4.5 克 冬术 4.5 克 炮姜 1.2 克 乌贼骨 6 克 当归炭 6 克
陈棕炭 9 克 柏叶炭 6 克 青皮 3 克 陈皮 4.5 克 黄芪 4.5 克
白芍 6 克 龙齿 9 克 牡蛎 30 克 桑螵蛸 6 克 木香 1.5 克
阿胶珠 3 克 砂仁壳 1.2 克

俞右。曾患崩中，久虚未复，近又分娩，崩漏几危。昨又鲜红直下，脉细微无神，舌光无苔，本元薄弱，已臻极步。非大补真阴，何以挽回元气，奈何尚以芎，归升动为固脱耶！

老山别直参 3 克 生西芪 9 克 滴乳香 4.5 克 净没药 4.5 克
甘杞子 9 克 带壳砂仁 1.2 克 净萸肉 6 克 炒白芍 6 克
生牡蛎 9 克 花龙骨 4.5 克 枣仁泥 6 克 新会皮 4.5 克

《张山雷专辑》

魏长春

任陆氏，年二十五岁，四月十七日诊。

病名：半产后崩漏。

原因：去年九月怀孕，岁初忽患寒热咳嗽，胎漏淋漓日久。今春二月半产，尔月后漏下不绝，成崩。

证候：面色萎白，耳鸣乏力，漏下赤白不绝。

诊断：脉象虚大，舌色淡红。脉证合参，病系元气大亏，血海空虚，崩漏之象，延恐成损。

疗法：温补奇经，升举中气。宗李东垣、叶天士二家治法。

处方：西归身三钱 白芍三钱 大生地四钱 炒杜仲三钱
紫石英四钱 生黄芪四钱 四党参三钱 海螵蛸三钱 冬术三钱
茯神四钱 牡蛎八钱 菟丝子三钱 杞子三钱 炙龟板八钱
制首乌三钱

次诊：四月廿一日。经漏已止，胃苏腰酸，胸腹气畅，脉缓，舌色淡红。病差，效不更方，仍宗前法出入。

次方：生黄芪四钱 西党参三钱 冬术四钱 茯神四钱
炙甘草一钱 西归身三钱 生白芍四钱 大生地四钱 炙龟板八钱、
杞子三钱、菟丝子三钱、紫石英四钱、鹿角霜三钱 淮山四钱

效果：服药漏止，服高丽参及归脾汤等调理，渐复原状。

炳按：半产后崩漏，脾不摄血，当补脾摄血，则崩漏自止矣。

《慈溪魏氏验案类编初集》

翟竹亭

东关扬姓妇，年二十余。三月临产，接儿后，血下如涌泉，急迎余往，见产妇满面油汗，四肢如冰，口张手撒，气机欲绝。问及二便，幸无泄泻。忆《济阴纲目》曰：“临产下血不止者，为产后崩是也”。莫妙独参汤。慢言伊是贫人，即使富者不惜钱财，也一时难得。余遂

用炙黄芪 240 克煎汤，令其频饮，约一碗许，病者即能呻吟。又一时许，言语略能出声。后用十全大补汤，服二十余帖，始得子母两安。临时制宜，岂不难哉。

十全大补汤加法

党参 15 克 白术 12 克 茯苓 10 克 炙甘草 6 克 当归 10 克
川芎 10 克 白芍 10 克 熟地 12 克 炙黄芪 10 克 油桂 6 克
炒枣仁 10 克 川断 10 克 砂仁 6 克 茯神 10 克 附子 6 克 水煎服。

《湖岳村叟医案》

丁叔度

患者丁某某，女，26 岁。流产后崩血四月，腰酸四肢无力，胸闷，食减，脉弦数，宜和血舒肝之剂。

处方：归身 9 克 续断 9 克 杜仲 9 克 祁艾 4.5 克 黄连 2.1 克
制香附 6 克 元胡 6 克 泽泻 6 克 砂仁 2.1 克 阿胶 9 克
狗脊 9 克 甘草 4.5 克 生姜 1.5 克

服药三剂后，崩血已止，诸症大减。

二诊处方：归身 12 克 川续断 9 克 杜仲 9 克 焦杭芍 9 克
祁艾 4.5 克 香附 6 克 元胡 6 克 山药 12 克 泽泻 6 克 黄连 2.1 克
炒酸枣仁 9 克 狗脊 9 克 甘草 4.5 克 陈皮 4.5 克 服此方四剂，病得痊愈。

《津门医粹》

张汝伟

王右，年二十六，杭州。心力劳瘁，以致半产，瘀露经月不净，又感气郁，肝火冲动血室，逐成血崩，如江河之直泻，大块纷堕，面色晃白如灰，两脉数急，神志昏迷，宜先平肝降热，止血镇摄治之。

荆芥炭 炒赤芍各二钱 归身炭 棕榈炭 干藕节 细生地

小蓟炭 丹皮炭各三钱 煅代赭石五钱 降香片后下，八分
炒川芎一钱 旋复花包，钱半

二诊：进平肝降逆止血镇摄之法后，崩势即定，仅余点滴，惟腰脊酸楚，肝火仍旺，防崩再至，治以清营养血。

紫丹参 条芩炭 广郁金 生香附各钱半 归身炭 炒白芍
炒丹皮 茜草炭 大生地 厚杜仲 二至丸各三钱，包

本证始末：王女士，为伟住新大沽路时同居房客，其病来势甚剧，一剂服药，十二小时内，即告平复，同居多，咸宅为奇事，二剂服后，照常雀战矣。

方义说明：第一方所用之止血药，亦不甚重，所以能见效如神者，矧因她体力尚强，所得病之因为终夜雀战，伤气伤络所致，故用荆芥以去其寒，旋复以理其气，川芎以升之，降香以降之，使其气血调整，余为止血清热之品，所以能见效，若不知其得病之源，见面色晃白，而用参桂姜附之品，必致不救，此为诊病眼目。

《临症一得》

叶熙春

田，女，三十九岁，十一月。杭州。产后半月余，恶露仍多，来势如崩，血去过多，气阴大伤，面色苍白，四肢厥冷，自汗淋漓，头昏眼花，精神恍惚，舌质光淡，脉象沉细。有阴竭阳脱，危在顷刻之虑。

别直参9克，先煎 淡附块9克 川桂枝5克 炙归身6克
炙黄芪12克 北五味5克 麦冬9克 五花龙骨5克，先煎
生牡蛎30克，先煎 炮姜5克 炙甘草5克 阿胶12克

二诊：进服前方，崩虽止，而淋漓未净，四肢虽转暖，但自汗未尽收，头晕神倦如故，舌如前，脉仍细软无力。前方即效，增减再进。

别直参6克，先煎 大熟地24克 炙归身9克 炙黄芪12克
阿胶珠12克 北五味6克 麦冬9克 五花龙骨15克，先煎
生牡蛎30克，先煎 炒续断9克 淡附块5克 炙甘草5克

三诊：恶露已净，自汗亦止，头昏见差，惟神倦如故，苔转白薄，脉细而缓。再拟两顾气血。

炙黄芪 12 克 炙归身 9 克 米炒上潞参 12 克 阿胶珠 12 克
制续断 9 克 炒冬术 6 克 炙甘草 2.4 克 砂仁 1.5 克，捣 熟地 18 克
炒枣仁 12 克 茯神 9 克 龙眼肉 9 克

《叶熙春专辑》

产后血晕

郑重光

马彬五别驾，未出仕之十年前，尊阃大产，去血过多，昏晕大虚，前医重用人参、芪、术，已虚回血止，饮食如常。惟昼夜卧于床，坐则头眩耳鸣，必睡下乃可，如此下已七十日，日服人参四、五钱不效，招予治之。诊脉惟细迟无力，而饮食不减平时，肌肤、声音似无病者，此产后不慎起居，肝肾气虚，肝虚不摄气，故眩晕也。仲景谓之“褥劳”，久则成痿，用仲景之羊肉汤治之；用精羊肉二两，煮熟去肉，再以黄芪五钱，人参一钱，入汤煎熟，日服二剂，十日后即能起坐，二十日即可步履，回季宅母家调治而痊。

《素圃医案》

中神琴溪

绫小路若挟屋总兵卫妻，产后神气郁，居旬余，齿腭肿痛，立则眩冒，身振振，舌本强。师即以郁金散，吐青黄水半升，乃与桂枝茯苓丸全痊。

《生生堂治验》

许璫

赵姓妇，年十八，生一女，产下即晕绝，汗大出而目上窜，昏厥

不知人，急召余诊。余曰：此败血冲于胃经也。猝不及药。急令先用醋三斤置甑内，以铁秤锤一个，用炭火内煨通红，置产妇前淬之，令口鼻皆受之。烟气薰人，少顷，汗收目开神定，复以童便灌之。方用当归四钱，川芎二钱，桃仁、延胡索、薄荷、五灵脂各一钱，姜炭八分，炒黑荆芥三钱，百草霜一钱，煎服即愈。不知者以为有起死回生之术。其实古人原有此法。余亦不过效颦而已。病似虽危，治之极易，人人得而为之也。

《清代名医医话精华》

王孟英

产后诸证，首必通瘀，然有不可以常理测者。表弟周鹤庭室，新产晕汗，目不能开，心若悬旌，毫无恶露。乃父何君新之，按其脉有虚弦豁大之形，亟拉孟英图之。与以“三甲”、石英、丹参、琥珀、甘草、小麦、绿豆衣等药，覆杯即安，数服而愈。

或诘其何以知非瘀血为患？曰：此阴虚之体，既产而营液大脱，风阳上冒。虽无恶露，胸腹皆舒，岂可误作瘀冲，而妄投破血之药耶？

《王氏医案》

林佩琴

李氏。产后郁冒，昏睡不语，虑其痉厥。用鲜石菖蒲根汁热服，渐次苏醒能言。询所苦，但云目暗咽塞，心系下引，遂闷绝不知人，此为风火，痰阻窍也。因用桔梗、荆芥、甘菊炒、连翘、贝母、茯神、山梔、菖蒲汁冲，二服而安。

徐氏。产后夜热烦渴，脉促数。因决其胎必下，当夜遂产，恶露甚少，逾日鲜血暴注，晕绝。用潞参、茯神、熟地、炮姜、荆芥醋炒、山梔、甘草俱炒黑、石斛、阿胶，神苏血止。

《类证治裁》

李铎

杨姓妇，年三旬，产后去血过多，昏瞢眩晕，真元已败。加以勉强作劳，忽然头眩眼黑，大汗不止，其为气血俱亡，阴阳将脱矣。非大剂六味回阳饮加鹿茸莫能挽救也。

熟地五钱 当归三钱 人参二钱 鹿茸三钱 附子二钱
干姜炮黑，二钱 肉桂一钱 大枣三枚

此景岳新方，不刚不猛，能回失散之元阳，能敛离乱之阴血，济急扶倾，无出其右者，治斯病一剂神效，故特表之。

《医案偶存》

徐镛

郡城七星桥翁氏女经前发厥，厥必数日不少人事。医用朱黄胆星之属，经年不效。己卯六月，延余诊治，脉象搏指。余谓此系经血内瘀，久而发厥，非痰迷心窍也。朱黄胆星，焉能破瘀生新耶？乃合《内经》乌贼骨丸、仲景旋复花汤、河间金铃子散为一方，数剂痊愈，竟不再发。

《医学举要》

杨毓斌

顾仪甫夫人，产后安饭五六日，忽大崩下，眩晕，壮热。次日得汗热解，神识不清，人夜谵语，如见鬼状，且昼昏昏，默默不欲食。问治于予。予曰：前辈谓产后百脉皆虚，总以养正为要，余从未治。况属血脱阳微，自以和阴养阳为宜。拟方服，不效。延往诊，脉微而滑，重按有力，舌苔灰腻，脘闷，神弱，五日未更衣。予曰：此痰滞困中，阳气不足以运，若在平人，亦无难治。但甫经崩下血，脉空虚。温中消克之品，恐阴不胜，或致重伤。为拟建中和阳小济，仍无大效。予绛此证本由脾阳不运，胃无火化，饮食聚而为痰，停滞中脘，乃产后

实证。徒以胆怯，恐耗阴而实则阴邪泻阳。经云：有故无殒。言有病则病受药，不致有他殒也。顾忌多反足误事。爰放笔为拟一方，一剂知，二剂减，三剂霍然愈矣。

米泔浸陈茅苍术 姜汁炒厚朴 盐水炒陈皮 六曲 茯苓
醋炙半夏 炙草 桂心 紫石英 谷芽 煨姜

《治验论案》

余听鸿

辛卯冬，余至五渠夏宅诊脉，回至舟中。有陆二官，余之仆也，其妻迫至舟中，云：家中侄媳病重，欲邀余诊。余因有别事，不能逗留。陆二夫妇匆匆回家，余亦反棹，已去里许。余在舟中忖之，看陆二夫妇惊惶失色，必病势危急，若袖手不救，于心何忍，即停舟步行至其家，见其家中聚集多人，病人势已临危。余即问其病情，因孖胎难产，去血过多，气脱矣。余即诊其脉，已绝，目瞪直视，牙关紧闭，用火刀撬之，舌缩色白，面色如纸，肢体俱冷。余即将艾叶炙其小足指外，两炷，稍能伸缩。余曰：未必竟死，此乃气随血脱也，若不急救，三四时气必绝矣。用黄芪四两、当归二两，炒枣仁三两，煨牡蛎四两，煨龙骨一两，炙甘草三钱，炒淮麦三钱，红枣三两，炒白芍六钱，桂枝钱半，桂圆肉二两，茯神二两，党参四两。给其药资一元。将大罐煎沸，以气熏其鼻，频频灌之，再添水煎，再熏再灌，共服十余碗，肢体渐渐转热，至四更始醒。此症若从市医产后忌补，聊将生化汤塞责，必死无疑。余之亲历产后，每每当补宜速补，决不敢因循误事，以致不救。

常熟吴恒和茶铺老太太云其年轻时产后必要血晕，连生数胎皆然。诸方中惟苏木煎汁，冲入陈酒、童便服之为最妙。因已亲试，故嘱余志之。

《余听鸿医案》

沈祖复

徐右，甲子七月十七日。

产后脉络空虚，血虚木旺，气火窜入筋络隧道，痛无定处。两胁乃肝络地位，其本位最易先入，至两足屈伸作响，血不营筋故也。某医泥子产后宜温，用桂木等品，殊不知桂能枯木，产后阴血素亏，肝阳妄动，化火生风，上升则头眩耳痛，犯胃作恶，入子阳明之络则牙龈红肿，咽喉蒂丁作胀。夜少安卧，无非水不济火也。兹拟平肝火、息风热、化痰浊。

生石决明二两 先打煎，滁、甘菊各二钱 法半夏三钱 连翘四钱
丹皮三钱 制僵蚕四钱 蝉衣钱半 辰茯苓五钱 元参三钱
生竹茹三钱 辰灯心三尺 橘络钱半

复诊：昨投平肝息风，筋络及牙龈之痛大减，唯仍头眩。吾以为药力犹未足也。头晕者，肝阳也；耳痛者，风火也；牙龈作痛者，胃火也；两火相并则风阳更盛。至子两胁疼痛，尚未尽定，产后经两月，脉络还是空虚，气火乘隙而入也。若小溲热亦，略有暑热耳。

珍珠母二两，打，先煎 滁菊二钱 赤白芍各钱半 黑山栀三钱
辰滑石五钱，白蒺藜三钱 茯苓神各钱半 制僵蚕三钱，丹皮二钱
生竹茹三钱 炒车前子三钱 橘络一钱 鲜荷叶一张。

《医验随笔》

方耕霞

唐。初诊，胎元下后瘀露大崩，损伤冲任，胞衣不下，挟瘀上逆，呕吐厥逆，服回生丹后胞衣下而瘀亦随止，少腹不痛，惟目花头眩，神倦脉细，左寸浮弦，心阴失养，肝肾阴伤，勿守通瘀成法，宜固冲任而保心阴，以摄营气。

紫丹参盐水炒，钱半 川芎酒炒，七分 炒枳壳钱半 苏梗钱半
当归酒炒，钱半 炮姜炭三分 半夏曲二钱 紫石英先煎，五钱

土炒白芍钱半 焦查肉三钱 炒青陈皮各一钱 荆芥炭三钱
佩泽兰各钱半 降香屑后下，五分

芫蔚草煎汤代水。

二诊：淤露不崩，来亦不多，为恰好之候。惟营血大损，上焦痰湿内阻，聚于阳阴而作恶，腹中大气不和，有时攻击少腹，不痛通淤宜轻，用费氏去恶平胃，佐以理气和营。

紫丹参盐水炒，钱半 当归酒炒，钱半 炒青陈皮各一钱
土炒白芍钱半 平胃散包，二钱 广木香三分 白蔻仁后下，五分
焦查炭三钱 半夏曲包，二钱 大砂仁盐水炒，一钱 荆芥炭二钱
紫石英先煎，五钱 姜竹茹钱半 飞滑石辰砂二分，同打，四钱，包
玫瑰花二朵

用芫蔚滑石煎汤代水。

三诊：血去阴伤，孤阳无恋，不能卫外而多汗，心阴失涵而善悸，头目眩晕肝虚，手指麻木属脾，虽有痰浊，不宜消克，养血熄火，护阳和阴，庶合治法。

蜜炙绵芪一钱 紫丹参盐水炒，钱半 生枣仁三钱
大熟地与阳春砂仁五分，同拌炒，二钱 青龙齿先煎，四钱 紫石英先煎，五钱
朱茯神三钱 广木香五分 远志肉炙甘草四分煎汁炒五分
酒炒当归钱半 土炒白芍钱半 大红枣二枚

四诊：心悸略减，汗仍不敛，由崩血过多，气分亦弱，臑补又恐滞膈，幸胃气渐醒，得所佑助，去病易而治虚难，旨哉此言也。

蜜炙绵芪二钱 带心麦冬钱半 生枣仁三钱 酒炒当归钱半
五味子七粒 柏子仁二钱 土炒白芍钱半 紫丹参盐水炒，钱半
大熟地砂仁五分拌炒，三钱 朱茯神三钱 广木香五分 紫石英先煎，五钱
煅龙齿先煎，四钱 炙甘草四分 红枣二枚

五诊：自汗稍敛，心悸未平，手指麻木，夜眠不甜，大便不爽，种种皆血虚见象，况左脉细弱而涩，右部濡数而郁，苔质不绛，挟有气分，宜于补血养气中参入流动之品。

蜜炙绵芪二钱 紫丹参 盐水炒，钱半 朱茯神三钱
 大熟地 砂仁五分拌炒，三钱 归身酒炒，钱半 带心麦冬 展砂拌，钱半
 焦冬术一钱 生熟枣仁各二钱 五味子 炙草四分，煎汁炒，七粒
 制香附钱半 广郁金钱半 广木香五分 红枣二枚 紫石英五钱
 煅龙齿四钱 龙骨三钱，上三味同打，先煎

《倚云轩医活医案集》

何长治

右。产后失调，营液亏而木火不熄。腰疼、头眩、心跳、淋漓不止。脉细数无力。拟从滋养法。

生芪 生归尾 细生地 枸杞 牛膝 杜仲 乌贼 赤苓
 木香 白芍 炙甘草 陈皮 紫丹参 藕节

右。偏产后，恶心，多汗泄，时作干呕，而淋漓不已；舌燥白无液，发渴；腰痛艰于举动；右部脉细软无力，左部细不应指。病属胎养无源，气弱不能摄纳，将有上逆之虞。似宜理气为先。勉拟益气 and 肝，参以安神法。未审当否？

人参一钱，另煎 当归身钱半 酸枣仁三钱 龙齿三钱 干姜四分
 陈皮八分 於术钱半 辰茯神三钱 川芎五分 白芍钱半
 五味子三分 佛手柑八分 加姜汁炒竹茹钱半

二诊，偏产后，淋漓虽止，头晕，闻声惊惕；舌燥口乾发渴；脉乳数无力，重按不能应指。此系营液太亏，心神不摄，调复为难。踵前法加减，但冀胃安神定，可图渐复。质之高明，如何？

人参一钱，另煎 当归身钱半 川芎五分 麦冬二钱 煅牡蛎三钱
 辰茯神三钱 陈皮八分 生耆二钱 远志肉钱半 五味三分
 炙草四分 酸枣仁三钱 广木香五分 红枣三枚 加煨姜五分

三诊，偏产后，淋漓虽止，腰痛骨楚，心跳头眩俱作；脉左部细软无力，右部略见浮数。营液亏，心肝失润，腠理不固，多汗。拟养阴为先。春风风人，须善为调理。

生芪钱半 当归二钱 怀牛膝三钱 枣仁三钱 白芍钱半
陈皮八分 於术钱半 枸杞三钱 辰茯神三钱 龙齿三钱 川芎五分
木香五分 加煨姜五分 甘草四分

右。产后营虚。两膝乏力，心悸头晕，脉细数。久虚未易复也。

熟地三钱 杜仲三钱 归身二钱 牡蛎三钱 沙苑子三钱
炙龟版三钱 牛膝三钱 乌贼三钱 狗脊三钱 白芍钱半 虎骨三钱
早服虎潜丸晚服全鹿丸

《何鸿舫医案》

吴鞠通

百氏，二十六岁。产后郁冒，一日厥去四、五次。先与定风珠，即复脉汤去姜、桂、大枣，加龟版、鳖甲、牡蛎、海参、鲍鱼、鸡子黄，一帖而效，服至七日大安。于是作专翕大生膏一料，全壮。

《吴鞠通医案》

魏长春

姜乐琴君，夫人王氏，年约三十余岁。五月二日初诊。

病名：半产血晕。

原因：怀孕二月，跌仆伤胎，以致半产。

证候：产后崩血过多，腹痛自汗，目昏眩冒，两耳失聪，自语郑声。

诊断：脉弱舌淡，证属元气大亏，血室空虚，脑部失其营养、病名血虚晕厥。即西医所谓脑贫血证也。

疗法：用归身止漏，温固子宫；杞子补肾，强壮元阳；龟板养阴治崩；琥珀散瘀安神，合奏扶元化瘀之功。

处方：面琥珀二钱研冲 西归身三钱 甘杞子五钱 炙龟板八钱

次诊：五月三日。崩血未止，头眩目昏，两耳失聪，烦躁不宁，少腹悠痛，头汗自出，四肢微厥。脉弱舌润。用扶正壮神，和养血海法。

次方：西琥珀一钱研冲 荆芥炭二钱 参三七一钱研冲
朱茯神四钱 化龙骨五钱 煅牡蛎五钱 西归身三钱 陈萸肉八钱

三诊：五月四日。崩血虽止，伏痰上蒙，昏狂不宁，烦躁目赤。脉淡红苔薄。宗沈尧封六神汤法，化痰醒神。

三方：旋复花五钱包煎 鲜石菖蒲三钱 淡竹沥二两冲
制半夏三钱 朱茯神五钱 礞石滚痰丸三钱吞 代赭石一两
黄郁金三钱

四诊：五月五日。便解神清，按腹似痛。脉软舌红。用和血镇逆法。

四方：全当归四钱 生白芍四钱 益母草三钱 黄郁金三钱
朱茯神五钱 代赭石八钱 旋复花四钱，包煎 淮牛膝五钱

五诊：五月六日。胃苏神清，腹痛胸痹，畏寒。脉缓，舌淡红苔薄黄。病势将愈，元气已虚，用养血和营法。

五方：当归四钱 生白芍三钱 川芎一钱 熟地四钱 艾叶一钱
桂枝一钱 炙甘草一钱 朱茯神四钱 天花粉三钱

六诊：五月七日。腹痛已止，胃气亦展，肢酸盗汗，脉缓，舌淡红。病势已差，元神渐复，用养血调气法。

六方：当归三钱 生白芍三钱 川芎一钱 大腹皮三钱
香附三钱 丹皮二钱 淮牛膝三钱 桂枝一钱 炙甘草一钱

七诊：五月九日。头晕，胸满便闭，脉缓舌红。病后元虚，用平补三阴法。

七方：当归三钱 生白芍三钱 川芎一钱 丹参三钱 橘皮一钱
制首乌三钱 制半夏三钱 茯苓三钱 远志一钱 夜交藤三钱
淮牛膝三钱

效果：服药后，便畅胃苏，身健。

炳按：半产后崩漏，血虚晕厥，去血过多，元气欲脱，而作晕厥。治宜镇补摄纳，宁神豁痰。

时庆宝君夫人，年四十岁。六月九日初诊。

病名：半产眩暈。

原因：怀孕三月，感受暑湿秽气，动胎半产。病已一候，恶露未断，昨日陡下血块，猝然晕厥。

证候：形寒内热，肢冷麻痹，面唇色淡不荣，自汗眩暈，腹痛，漏下未已。

诊断：脉涩舌白，证系虚中夹实。

疗法：和荣去瘀，升陷达邪，虚实并顾治之。

处方：当归三钱 赤芍三钱 西琥珀一钱，研冲 杜红花炭二钱
茯神四钱 丹参炭三钱 香附三钱 益母草三钱 升麻炭三钱
丝瓜络二钱 丹皮炭二钱 橘皮一钱

次诊：六月十日。昨又崩下血块，今日痛漏皆止，脉弦，舌淡苔白膩。汗减口苦，不寐。用固元和营达邪法。

次方：橘皮一钱 制半夏三钱 朱茯神四钱 酸枣仁三钱
左金丸五分，吞 夜交藤四钱 化龙骨三钱 煅牡蛎四钱 当归三钱
鲜藿香梗一钱

三诊：六月十二日。热退漏止，胸腹舒畅，头眩耳鸣，心悸怔忡。脉软，舌淡苔白薄。产后元虚邪恋，用壮神和营化湿法。

三方：青龙齿三钱 煅牡蛎四钱 稻豆衣三钱 米仁八钱
淮小麦四钱 酸枣仁三钱 远志二钱 当归三钱 辰茯苓三钱

效果：服药后，胃苏，精神渐强病痊。

炳按：产后血虚眩暈，多因崩漏，下血过多，血虚肝风上扰，故养血镇肝熄风，为通治之法。若有外邪，则随症加减。

《慈溪魏氏验案类编初集》

周镇

丁翼清之妻，老鸡桥。体孱阴亏，胎前有虚热少寐。己未五月中旬，产后即舌强而酸，音低，少寐头晕，恶露通行，脉弦大右甚。此

血虚而内风暗动上僭。拟归、芍、生熟地、杞子、枣仁、麦冬、牡蛎、天麻、龟甲、白薇、黑豆、荒蔚子、阿胶、桑寄生。服三剂，头晕减，音亮，舌强略清，好眠掌灼，恶露已少，脉弦大已敛，两尺尚虚，舌滑苔薄。拟养血熄风，宁神退虚热。归身、抚芎、白芍、杞子、麦冬、生地、茯神、贝齿、阿胶、天麻、蒺藜、白薇、川贝母、没药。另用猪心煎汤代水。嗣后依方调理，意愈。

朱顺兴，住惠山。乙丑十月十二日诊其妇，八月流产，胞衣不下，稳婆手术取下。二朝午后，忽云目暗，耳不聪，人即昏沉，脉亦似停。数秒钟始醒，谓梦中魂已出窍至某街云。脉弦急左甚，舌红。述知前二次小产后面浮，谅由体虚流产，用力取胞，不无伤元，厥阳上旋，深恐脱竭。勉拟降气潜纳，安神行瘀。全当归、川芎、远志、茯神、丹参、香附、瓦楞子、料豆、蒺藜、牡蛎、泽兰、五加皮、荆芥、鳘胶_{蛤粉炒}。另血珀五分，研末服。廿三日复诊：脉敛而神情甚疲，遵王潜斋例，疏三甲加归、芍、阿胶、丹参、石英、茯神、杞子、萸肉、泽兰、荒蔚。竟愈。

吴克明室，年仅二十余，年怀一胎，阴虚阳旺，素有胃气。庚申八月，又以产后肢酸腿热，头眩掌灼，夜寐多梦。脉虚数不敛，舌润无苔。血虚风翔。拟育阴潜阳，清肝和络。桑、菊、天麻、潼白蒺藜、归身、白芍、玉竹、首乌、枣仁、杞子、牡蛎、珍珠母、丹皮、磁石、七味都气丸。服后，各恙循减。惟胃分有形，微咳有痰，经事来而不畅，少腹结滞作痛。宜调气行瘀，化痞涤痰。归身、桃仁、玄胡、郁金、丹参、莪术、娑罗子、川贝母、紫苑、乌药、香附去油、没药、藏红花。处用京三棱、莪术、没药、乳香、藏红花、麝香、沉香，研，入白布膏药，贴脘中痞上。服后，经事渐行，少腹之滞已解。惟脘分之形似向下移，部分属痞而有症状如弦。乘其未坚、再行软坚消痞，久延难消。蒺藜、香附、乌药、木蝴蝶、三棱、莪术、川贝母、蛤粉、娑罗子、石斛、没药、丹参。另龙涎香、藏红花、瓦楞子、鸡内金，研末服。满腹气行，脘痞之痛忽消，而左旁有微形。再多贴一膏，原方服。全消而愈。据

称幼年有瘰块，历经多时多医广药方痊，故谨志之。

《周小农医案》

陆正斋

袁某某，女，19岁。小产后头晕少寐，潮热夜甚。

细青蒿 10克 银柴胡 7.5克 肥知母 4.5克 生地 6克
白薇 7.5克 地骨皮 10克 左秦艽 4.5克 丹参 7.5克 荒蔚子 7.5克
赤芍 4.5克 玫瑰花 1.5克 当归 7.5克 生鳖甲 18克

马某某，女，39岁。小产后血注不止，头晕，呕逆频作。此症风扰于上，痰阻于中，阴虚于下，其变幻未可逆料。姑予潜阳、摄血、和中，以观进退。

阿胶 蛤粉拌炒，10克 左牡蛎 20克 半夏曲 4.5克 当归身 4.5克
砂白芍 10克 鲜生地 拍洗，15克 百草霜 和服，2.4克 藕汁 30克
黄酒和服，一盅

二诊：服前方四剂，注血渐止，间有瘀块，头目较清，惟泛泛欲呕，不饥不食，大便秘，左脉细数，右脉洪大而滑，拟方和养胃气。

西洋参 4.5克 金干钗 10克 熟半夏 10克 生熟谷芽 各10克
米砂麦冬 10克 甘澜水煎服。

《陆正斋医疗经验》

张汝伟

王右，年三十八，武进。大产之后，仅交五朝，即乘凉风，且去洗澡，致风寒陷入营分，复食开水淘饭，胃中不易消化，痰滞交阻，恶露遂停，神志昏迷，目睛直视，热度甚高，脉来濡细。今甫八朝，大便未行，小便甚多，防有剧变，姑拟疏解营分，理气化痰，开窍通瘀治之。

荆芥穗 炒川芎 炒防风 广郁金 鲜佩兰 各钱半
竹半夏二钱 陈胆星一钱 九节菖蒲八分 焦楂肉 单桃仁

当归尾各三钱 西血珀八分，冲入

二诊：神志已清，瘀露略见，身热未减，略有形寒，大便未更，苔转黄腻，仍宜和中解表，化瘀理气为要。

细桂枝四分 炒川芎 荆芥穗各一钱 紫丹参 炒白芍 佩泽兰 炒广皮 川郁金各钱半 当归身 朱茯神 羌蔚子 桃杏仁各三钱

三诊：表热退而未净，大便不通，服西药后，一日夜五六次，上则气急咳呛，下则便溜不止，产后气宫两虚之体，本属禁下，今惟有补中益气，以退虚热法，舍标治本乃妥。

土炒党参 锦黄芪 土炒白芍 淮山药 阿胶珠炒 炒枣仁 仙半夏各三钱 旋复花包 紫丹参 炒荆芥各钱半 炙甘草一钱 代赭石五钱，先煎。

本证始末：此证共诊七次，得能转危为安，每日服药二剂，三诊以后，表热全退，大便亦止，得能正常，瘀露亦净，仅余咳嗽痰多，肢体倦怠而已，调理数剂，即告痊愈。

方义说明：第一剂，荆防加川芎，是表营分之邪。胆星、菖蒲是化痰开窍，尤得力者。血珀、郁金、佩兰解气分之郁。桃仁、归尾，逐血分之瘀。植肉化痰，又能通滞。第二方，轻以疏解，用桂枝、芍药以建中。丹参、归身，通中寓养。而佐以佩泽兰、桃杏仁、羌蔚子等，理气逐瘀。第三方，一方而是产后气血两亏，应用之补剂，一方面，是救治两药暴通伤气，所以补中益气，而能见效也。

《临症一得》

叶熙春

陈，女，三十二岁。余杭。旧冬产后突然惊吓而致心气失敛，震荡不宁，夜寐欠安，头昏目眩，面额四肢浮肿。病已半载，难以速疗。先拟平肝宁心安神，佐以健脾运湿。

紫贝齿 15 克 酸枣仁 9 克，炒 珍珠母 30 克 生芪皮 7.5 克

冬瓜皮 12 克 辰茯苓 15 克 猪心拌丹参 15 克 制运志 6 克
柏子仁 9 克 决明子 9 克 煨天麻 6 克 朱砂安神丸 9 克,吞

二诊:药后虽得片睡而多梦扰,心悸未平,头部晕胀作痛,浮肿虽消,但咳嗽有痰。仍宗前法出入。

紫贝齿 12 克 猪血拌丹参 12 克 珍珠母 30 克 决明子 12 克
煨天麻 6 克 辰茯苓 12 克 酸枣仁 9 克,杵 制远志 6 克
姜竹茹 9 克 宋半夏 8 克

三诊:服前方,睡眠已有三、四小时,面颊皮肤浮肿全消,心悸渐宁,惟头晕目眩如故,经愆而成妄行,大便下血。再拟凉血平肝,养阴安神。

旱莲草 15 克 槐米炭 9 克 制女贞 9 克 辰茯神 15 克
紫贝齿 12 克 酸枣仁 9 克,杵 猪血拌丹参 12 克 决明子 12 克
煨天麻 12 克 珍珠母 30 克 甘菊花 6 克

四诊:便血止后,经讯即行,小腹胀痛,头晕目眩,心悸乏力,虚火得戢,夜寐安宁。再拟平肝宁心,佐以调经。

茺蔚子 9 克 泽兰 9 克 猪心拌丹参 12 克 杭白芍 9 克
紫贝齿 12 克 辰茯神 9 克 决明子 9 克 煨天麻 5 克 甘菊花 5 克
女贞子 9 克

《叶熙春专辑》

产后感冒

陆肖愚

吴敬之室年二十余,产前已有感冒,分娩三日后,因责婢离床,时正冬月,觉身上栗栗,遂身热头痛,或用参苏饮发其汗,头痛止而身热不除,遂以产后当大补气血,数剂而烦热日甚。又拟用补中益气汤,脉之两手虽弱而左犹带浮,右已见数,曰:脉虚正产后之平脉,但左手犹浮,知表邪未散,右手见数,欲传里之候也。宜急解其

表，微通其里，少缓便有承气之患矣。用柴、葛、桔梗、黄芩、花粉、甘草、山查，一剂而烦热减，二剂而身凉，以清气养荣汤调之。

《续名医类案》

马元仪

陆氏妇产后恶寒，虽重茵厚被不除，屡次不效，将行桂附矣。诊之两脉沉伏，面赤口燥，胸满，此非产后新虚，乃胎前伏邪也。屡用参术，则邪愈结而正愈阻。肌表恶寒者，邪热内郁，遏阴于外也。口干面赤胸满者，邪气挟火挟食，上凌清道也。仍宜一表一里治之，用葛根、防风、苏梗、枳壳、桔梗、杏仁、苏子、薄荷，一服面表症矣。右关尺转见滑实，随用大黄五钱、元明粉三钱、甘草一钱，一服下积秽盛多，复发疹发颐，此表里两和，余邪毕达之征也。再与辛凉解透之剂而安。此症邪伏于内，久而不宜，用清阳泄表，苦寒达下两泄之，犹发疹发颐，而乃妄行温补，将谓脉伏恶寒为阳虚之候耶？其亦不审病机甚矣。

王氏妇产后一月，神气昏倦，上气喘促，胸满中痛，咳嗽发热，百治无效。诊之两脉沉涩兼结，此胎前已有伏邪，兼产后气血两虚，邪益内结，法宜表里两和，使邪从外达，气从内泄，病自愈矣。以桂枝、柴胡、苏梗、枳壳半曲、葡子、杏仁、广皮，透邪达滞之剂，顿安。脉已稍舒，或投参、地、归、芍，敛滞之品，遂彻夜靡宁，如丧神守，此邪强于中，补之生变也。乃用桂枝、炮姜、黄连、枳实、厚朴、广皮等，一剂而胸满中痛除。复用萎仁、柴胡、桂枝、半夏、枳实、杏仁、苏子、桔梗，再剂而表热喘咳平。但大便不行，此久病津液失养也。加生首乌一两，便行余邪尽去，然正气大亏，再与滋补气血之剂而安。

《续名医类案》

李季虬

魏常正产后饮食不节，复感风寒，遂致发热谵语，喘咳气逆，恶

露绝不至，势盛急迫，谓症皆系外来客邪，尚属可救，设正气虚脱，现诸症者，必无幸矣。何以见之？以脉气浮大有力故也。用大剂疏风消食之剂，二剂便霍然。先是有用白术、芎、归等补药者，几为所误。（广笔记）

《续名医类案》

张意田

一妇产后患病，已及半载，咸作劳损治，且云阴亏已极，势难痊愈。张连诊五次，确知此症，服小柴胡汤，法必当应。奈群议纷纭，以参柴非治阴亏之药，又言肺热咳嗽大忌人参，因立案正心，幸病家见信，一服而寒热大作，三服之后寒热退，而咳嗽平。十服全愈。案云：诊得六脉皆数，右寸大而软，关尺两部沉候弦急，左寸洪数，关部三候皆虚数，尺中空大。夫右寸软大肺气虚也。关尺沉候弦急，关主中州，尺司火位，沉里也，弦肝脉也，此因中气虚，而木邪犯位，木气动而火从之也。左寸洪数，心经虚火也；关中虚数，肝无血养也；尺中空大，肾水虚也。是脉本属阴虚而寒邪乘之，留连不已，以至于此。今所见症，五更发热者，寅卯木旺之时，肝木挟邪，随时而动也；上午寒热得汗热减者，邪稍泄而势稍缓也；咳嗽之声结而不畅，此久嗽伤肺，肺气虚而邪不得越也；胸腹时胀而微鸣，此肝木犯脾，肝主胀也。合脉症是为虚中挟实，不得枢转外出之候也。《大全》曰：产后血气虚弱，余食未平，不满百日，将养失所，风冷客于气血，面容憔悴，饮食难消。感于肺，故咳嗽口干，遂觉头昏，百节疼痛，荣卫受邪气，通于肝，流注脏液，须臾频发咳嗽无汗，寒热如疟，靡劳之候，往往如此。景岳天虚弱之人，外邪初感，不为解散而作内伤，或用清凉，或用滋补，以致寒邪郁伏，久留不解，而寒热往来，或为咳嗽，其症全似劳损，欲辨之者，察其里病情，或身有疼痛，而微汗则热退，无汗则复热，或大声咳嗽，脉虽弦紧而不甚数，即病至一两月，而邪犹未解，此似损非损之症，毋再误也。今此症实类此，当

用小柴胡汤转动枢机，藉少阳之气从内而外，自下而上，则阴阳和，而伏邪解散矣。半夏生当夏半，能启阴气，产后阴亏而兼口燥，故去之。胸腹时胀，脾阴多郁，宜加牛膝以导之，药病相当，自应如桴鼓也。

《续名医类案》

来天培

潘氏妇，季夏产后二十余日，患寒热便血，恶露未净，而专科与香薷饮四剂，服后反呕吐，头眩腹痛，自汗恶心，发热气促，发斑色微红，两颊淡红，诊之左脉如丝，右脉沉细，此虚而兼感。呕吐伤胃，肝木乘相火刑金，肺气受伤，上下拒格之症也。治宜活血滋阴，行气舒脾，散滞降逆，托里化斑之剂。用牛漆、茯苓、杞子、当归、红花、黄芪、木香、香附、广皮、夏曲、生姜，一剂诸症大减，六脉和缓，但微嗽眩暈。心跳胸膈不舒。此邪去正虚所致也。前方去川芎、木香、牛膝，加伏神、丹参、杏仁、贝母，二剂前症尽除。惟心跳头晕，改用归脾汤去人参、木香，加防、党参、杞子、白芍，调理而愈。

《续名医类案》

王三尊

朱笠葦大令爱，向年冬月生产，产难之极。逐咳嗽不食，商之於予。予谓产难气血大虚，虚火炎上，故令咳嗽不止，非温补不可。笠葦少进参芪，觉效，遂大温补而愈。从此气血亏损，至今十三载未孕。今岁三，令爱仲秋发疟以常山截住，愈一日即产。产后觉热，肩手露睡一小夜。小腹微痛，服导瘀药一帖，痛止。三日即起行，动作如故，饮食频进，至六七朝忽身大热，思饮，咳吐胶痰，寒热往来，渐至耳聋谵语。时笠葦在海陵，延予诊视。左脉浮数无力，右脉沉细，似乎孤阳上僭之脉。然气势不馁，面不红，醒睡皆无汗，胃胀欲呕。明系疟邪未清。兼以复感微寒，仍入少阳。又兼饮食频进，虽产后，

实阳症也。热则揭去衣被，故无汗而加重。左脉浮数者，证本少阳也，重按无力，并右脉沉细者，为痰滞所伏也。咳吐胶痰者，肝胃二经实火，上冲于肺也。当以清脾饮加枳、桔、熟军治之。伊翁、夫、伯皆知医道，闻予言愕然，另请江有声视之。有声与予同见，然所用亦甘寒之品，不效。予云：“若先生避议，则瞑眩之剂终无人用矣。”遂立加减小柴胡汤而去。午后脸忽微红，乃柴胡之力。伊等以为孤阳将越，惊慌怨怒。自是疟门之药毫不敢用。越数日，舌苔干黑，擦去旋生，方悟予言不谬。复延予治，予以小承气汤，熟军用二钱，加枳、桔、蒺仁、贝母、麦冬，二帖，去结粪宿垢甚多。断以四物汤加贝母、麦冬、桔梗、桔红二帖，熟睡大汗而解。后饮食不禁，舌苔仍黑，时已满月。伊夫以前方加玄明粉五分下之而愈。又食复，时笠莽已回，又以熟军下之而愈。二证俱系产后咳嗽。虚实天壤矣。

《医权初编》

张晚香

产后左关本虚，以嗣育皆肝藏事。产后去血过多，故须百日后方始复，今况又外感风热，出汗太多。今均已愈，惟胃口尚不如前，左关尚小，再拟益血壮筋。

大生地八钱 炒白芍三钱 炒杜仲三钱 地骨皮三钱 归身三钱
制狗脊三钱 建石斛三钱 陈皮八分 甘杞子三钱 川续断三钱
炒丹皮三钱

《张晚香医案》

雷丰

北乡杜某之内，自诞后气血未复，偶沾三疟，纠缠半载未瘳。发时背如负重，腰如两截，寒洒洒欲复被，热烘烘欲思饮。诊其脉，举之若浮绵，按之不满部，而色白而无荣，舌色淡而无苔，此属奇经本虚，疟邪窜入于阴，阴虚及阳之证。斯宜未发之日，大补奇脉阴阳，

俾正气复充，邪气自却，倘以常山、草果专治其疟，便是舍本求末矣。丰用东参、熟地、鹿霜、狗脊、龟版、牡蛎、炙耆、桂枝、姜、枣为引，约服二十余剂，疟始脱体。

或问曰：曾见景岳治疟，每迎其锐而击之，最捷最效。今先生治疟，用药于未发之先。究遵景岳耶？抑遵先生耶？答曰：治初患之疟，邪气方盛，正气未虚，可以迎其锐而击之。久患之疟，邪气深陷，正气已虚，则不可耳。故于未发用补，补其正气，正气旺，则邪自衰，不用击而疟自罢矣。

《时病论》

陈和生

产劳，多因产理不顺，疲极筋力，忧劳思虑，又或将养失宜，感冒外邪所致，久之必见咳嗽等症。某年月日，余诊一妇，产后咳嗽便溏，脉象细数，声音清朗，无异常人，论其病，不过阴虚内热，而其家以为百日劳，刻期待死。噫！劳症果不可治，前人于产后气虚、咳嗽、骨蒸劳热、自汗、盗汗等症，何以有用异功散、六味丸加麦冬、五味、阿胶、童便？诸治法，可知症非无法可治，特恐治不如法耳。治苟如法，劳何由成？庚寅冬，余寓济南，沈君海帆之室，产后咳嗽，口渴自汗，食少体疲，百节烦疼，夜寐不安，绵延数月，大势似劳，来延余诊。切其脉，细数无伦，右关独滑，舌苔腻而微黄，知是阴亏气弱，中有宿火未清。用八珍汤去芎、归、白术，加石膏、黑栀、怀药、丹皮、陈皮为方。一剂，症减，五、六剂，症平。再承前方去石膏、黑栀，加黄芪、白术、当归，调治而安。或曰：“产后用八珍，是矣，去芎、归，何也？”答曰：“丹溪治阴虚发热，用四物去芎、归，以芎归辛温，非阴虚所宜用耳。”或又曰：“石膏、黑栀，不嫌凉乎？”余曰：“前哲言治‘黎明嗽’非石膏散不为功，又言治虚人早起咳嗽，用补中益气汤加黑栀，盖中有宿火，非膏栀不能清耳。”总之，病无定情，治无定法。谓产后不当服凉药，则可；谓产后不必患热病，则不可；谓产后既患热病，

不容服凉药，则尤不可。以凉治热，千古不易之常经。先之以清火养阴，继之以扶脾开胃，庶乎邪去正安，否则白术、黄芪类能灼阴助火，投之不合，世俗将谓虚不受补矣。夫虚人决无不受补之理。要是不受补之时，时可补则补之，补自有功；时不可补而补之，补反为害。元殊曰：“五行六气，水特其一耳。一水既亏，岂能胜五火哉！医不知邪气未除，便用补剂，邪气得补，遂入经络，至死不悟。”又曰：“劳为热症明矣，尚可补乎？惟无热无积之人，方可补之。必察其胃气及右肾二火果亏，后用补剂可也。所谓时也。”

《诊余举隅录》

张乃修

李右。胎前感风，产后不彻，咳嗽三月有余，痰多口腻，凛寒内热，汗出不能左卧。脉象细数微滑。久咳损肺，阴阳之二气有偏，气即为火，液即为痰，证入损门，非才疏者所能言治也。

南沙参三钱 光杏仁三钱 煨蛤粉三钱 炒苏子三钱
炙紫菀一钱 川贝母一钱五分 旋复花二钱 白茯苓三钱
盐水炒橘红一钱

二诊：咳嗽虽减，然仍不能左卧，大便旬日方行，必悸目昏，凛热汗出。皆属损象，不敢言治。

北沙参四钱 川贝母二钱 光杏仁三钱 炒枣仁三钱
生山药三钱 大天冬三钱 生白芍一钱五分 当归灰一钱五分
炒怀牛膝三钱 炙款冬二钱 茯神三钱 都气丸三钱，开水先送下。

《张聿青医案》

沈明生

刘舜泉孙媳，乙卯夏月产后晕厥，不知人事，时蓐草未离。道中友人及胎产专科皆以为恶露上攻所致，投以去瘀清魂等剂，秽物不行，晕厥益甚。既又改作痰治、食治，皆不效。吾师回翔审视笑曰：

吾得之矣，此暑热乘虚而入，急宜清暑，非黄连不可，谋诸同道，皆言血得冷则凝，今恶露未去，若投寒凉，是速其毙矣，呜呼！可师复笑曰：余与舜泉三十年老友，孙媳犹吾媳，命悬呼吸，诸君一误再误，尚可筑舍道傍乎？设有不讳，吾任之耳！舜泉父子、祖孙见师坚决不移，姑请试之，药甫入口，病者厥苏晕止，如出汤火。凡几进剂而恶露出行，众皆惊服无何。舜泉为藩署，邀进留宿。又为傍人鼓惑，皆云：侥幸不可屡图，苦寒终非长策。盖以黄芩易黄连，旋即已之，至夕忽又晕厥，舜泉归询知其故，仍用原方又数剂，全瘥。因是而请其义于师，师曰：人止作胎产治，殊不知天令炎酷，产时楼小人多，益助其热，乍虚之体，触之岂能不病？经云：暑伤心。又云：心主血。心为热冒，自然晕厥，此中暑，而非恶露明矣，又曰：舍症从时，理固然矣。然血热则行血，冷则凝亦古训也。今用寒凉而恶寒反去，其理安在？师曰：热行冷凝，以血喻水，道其常耳，子独不观失血者，有用温暖药而得止，则瘀血者，岂无用苦寒而得，此造化之微。权逆从之，妙理也，安可执乎。乃退而书诸绅。

《鹤园堂治验》

孔伯华

诸葛妇，九月十六日。产后风邪袭络，右偏头痛，延日较久，迄未得治，身发微烧，口渴舌苔白，脉象弦滑而数，亟宜清解柔肝。

石决明六钱 白蒺藜三钱 桃仁二钱 杏仁二钱 地骨皮三钱
青竹茹五钱 全当归三钱 莲子心钱半 肥知母三钱 芥穗炭五分
真川芎八分 旋覆花钱半 川黄柏三钱 薄荷八分 荷叶一个
川牛膝三钱

李妇，七月二十三日。产后咳嗽，夜间微有寒热，纳物不畅，舌苔白腻，脉左关弦盛，右脉滑大，肝热脾湿，痰阻肺络，阴分中有邪热所致也，宜清疏豁痰柔肝。

鲜石斛四钱，劈先煎 黛蛤粉五分，布包 甜葶苈二钱 清半夏三钱

鲜竹茹八钱 生鳖甲钱五分，先煎 旋覆花钱五分，布包
代赭石钱五分 炒稻芽四钱 陈皮钱五分 桑皮三钱 枳壳钱五分
杏仁泥三钱 地骨皮三钱 知母三钱

陈妇，八月十八日。产后湿热郁于肺络，清肃之令不行，肝家气逆而作咳嗽，医治未得效，脉以左关为盛，宜疏化以肃肺络。

石决明八钱 杏仁泥三钱 旋覆花三钱 代赭石三钱
川牛膝三钱 紫全苏钱半 鲜芦根两 桑白皮三钱 地骨皮三钱
板蓝根四钱 青竹茹五钱 肥知母三钱 生滑石块四钱 梨皮两
鲜九菖蒲根四钱

《孔伯华医集》

师尼寡妇寒热

许学干

一尼，患恶风倦怠，乍寒乍热，面赤心改怔忡，或时自汗。是时疫气大行，医见其寒热，作伤寒治之，用大小柴胡汤杂进，数日病急。许诊视，告之曰：三郁无寒邪脉，但厥阴弦长而上鱼际，宜服抑阴等药。治之以生地二两，赤芍一两，柴胡、秦艽、黄芩各半两，为细末。蜜丸如梧桐子大，每服三十丸，乌梅汤吞下，日三服，食愈。

《名医类案》

薛立斋

一寡妇，因怒，致不时寒热，久而不已，肝脉弦紧。用小柴胡加生地，治之而愈。但见风寒热仍作，此是脾胃气虚。用加味归脾、补中益气二汤，兼服而止。

一室女寒热，左手脉弦长而出寸口。用小柴胡加生地、乌梅，治之而愈，既嫁而诸症悉痊。

一放出宫女，年逾三十，两胯作痛，肉色不变，大小便中作痛如

淋，登厕尤痛，此瘀血渍入隧道为患，乃男女失合之症也，难治。后溃不敛，又患瘰癧而歿。此妇为入妾，夫常在外，可见此妇在内久怀忧郁，及出外又不如愿，是以致生此疾。愈内瘰癧流注，乃七情气血损伤，不可用攻伐皎然矣。按《精血篇》云：女入天癸既至，逾十年无男子合，则不调，未逾十年，思男子合，亦不调。不调则旧血不出，新血误行，或渍而入骨，或变而为肿，或虽合而难子，合多则沥枯虚人，产乳众则血枯杀人。观其精血，思过半矣。

《名医类案》

江篁南

一贵妇，寡居，月候不调，常患寒热，手足或时麻木，且心虚惊悸，或心头觉辣，诸治不效。诊其肝脉弦出左寸口，知其郁而有欲心不遂也。乃以乌药、香附二味投之，二服诸症俱减。

宿按：男女精血盛则思欲，室女孀妇有所思不得，则气结而留瘀血，男思女不得则留精，其理一也。精血已离其位渍入隧道，故变为寒热。肝脉弦出寸口者，夫肾主闭藏，肝主施泄，今肝火不泄，逆而上行，乃知男女失合之症。

《名医类案》

产后发热

孙文垣

一妇人年十六初产女，艰苦二日，偶感暑邪，继食面饼，时师不察，竟以参术投之，即大热谵语，口渴，汗出如洗（暑症多汗），气喘（暑伤气）泄泻，泻皆黄水无屎（协热下利），日夜无度，小水短少，饮食不进，症甚危恶。时六月初旬，女科见热不退，乃投黄连、黄芩、白芍之剂，诸症更甚。又以参术大剂，肉果干姜等止泻，一日计用参二两四钱，泻益频，热益剧，喘汗转加，谵语不彻口，医各束手，谢曰：汗出

如油，喘而不休，死症也。又汗出而热不退，泻而热不止，谵语神昏，产后脉洪大，法皆犯逆，无生路矣。惟附子理中汤，庶侥幸万一。孙诊之六脉乱而无绪，七八至，独右关坚硬（食积）。因思暑月汗出乃常事，但暑邪而食瘀血皆未销铄，补剂太骤，致瘀血如见鬼，若消瘀去积解暑，犹可生也。用益元散六钱，解暑清热，止泻利水为君；糖球子（即山楂）三钱为臣；红曲、泽兰各一钱五分，消瘀安魂为佐；橘红、半夏、白茯苓，理脾为使；三棱五分，消前参术，决其壅滞为先锋。饮下即略睡，谵语竟止，连进二剂泻半减。次日仍用前剂，其下热减，大便只一次，有黄屎矣。恶露行黑血数枚。次日诊之，脉始有绪，神亦收敛，进粥一盞。前方去三棱、红曲、加扁豆，大便一次，所下皆黑屎，热尽退。改用六君子加益元散、青蒿、扁豆、香附、芍药、炮姜，调而安。

《续名医类案》

易思兰

石城王福歆之妃，癸酉六月受孕，偶患泄泻，医用淡渗之药止之。自后每月泻三五日，有作脾泻者，用参苓白术散之类，二三服亦止。然每月必泻五七次，至次年三月生产后，连泻半月，日夜八九次，诸药不效。惊惶无措，召易诊之，两寸尺俱平和，惟两关洪大有力，曰：此暑病也。以黄连香薷饮治之，一剂减半，再剂全愈。惟肝脉未退，又用通元二八丹调理半月后平复。

《续名医类案》

沈明生

刘舜泉孙媳夏月产后，晕厥不省人事，或谓恶露上攻所致，投去瘀清魂等剂，瘀不行，晕厥益甚。又作痰治，食治，皆不效。沈至回翔谛审，笑曰：吾得之矣。此暑热乘虚而入，急宜清暑，非黄连不可，或谓血得冷则凝，今恶露未去，若投寒凉，是速其毙也。沈笑曰：

有不讳吾任之。药甫入口，厥苏羣止，再进而恶露行。盖产时楼小人多，炎歔之际，益助其热，乍虚之体触之，岂能不病。《经》云：暑伤心。又云：心主血，为热冒而晕厥。此中暑而非恶露明矣。或曰：舍症从时，理固然矣，然血热则行，冷则凝，亦古训也。今用寒凉而恶露反去，何也？曰：热行冷瘀，以血喻水道，其常耳。子独不观失血者，有用温暖药而得止，则瘀血者，岂无用苦寒而得行？此造化之微权。逆从之妙理也。安可执乎？

《续名医类案》

易思兰

一妇产后半月余，胃有清水，作逆而吐，以为胃寒，令煮鸡倍用椒姜，初觉相宜（凡内热虚火之人，初服辛热之药，亦有小效），至三五日清水愈多，以姜椒煎汤，时时饮之。近一月口气渐冷，四肢发厥，昼夜作逆，腹中冷气难堪，有时战栗，用四物汤，人参一钱至二钱，初服少安，久则不应。又加炮姜，亦不效。众议用附子理中汤（庸俗必趋之道）。易诊之六脉俱无，以食指复按尺部，中指、无名指按尺之后（珍法妙），脉来实数有力，左右皆同，发言壮厉，一句可说三五句，唇进颊赤，大便五六日一次，小便赤少，此实热症也。询之其俗，产后以食胡椒炒鸡为补，此妇日食三次，半月后遂得此疾。乃用三黄汤治之，连进四盞，六脉俱现，姜椒汤不欲食矣。又进四盞，身不战栗，清水减半，服四日口中热气上升，满口舌尖俱发黄小粟疮。大便八日不通，以四苓合凉膈散，空心一服，至午不动，又以甘草煎汤，调元明粉五钱，热服。一时许腹中微鸣，吐出酸水一二碗，大便连去二次。又服元明粉五钱，下燥矢十数枚，后以四苓、三黄、山栀、枳壳，调理全愈。

按：此为火极似水，乃物极必反之候。凡患此为燥热温补所杀者，多矣。哀哉！

许学士云：记一妇人产后护密，阁内更生火，睡久及醒，则昏昏

如醉，不省人事，其家惊惶，许用荆芥佐以交加散，云服之即睡，睡中必以左手搔头，觉必醒矣。（《本事方》。盖为火所逼也）

《续名医类案》

倪复贞

宁泰道枝麓田公在长安时，有如夫人病，急延余诊。公曰：产后方八日，因外感表不得汗，危在顷刻，乞为救之。余按六脉虚浮无力，身如灼炭。烦躁无宁刻。因语公曰：此非外感证也。乃产后之热，误用表药，愈耗真阴所致。经云：产后以大补气血为主，虽有他症，以末治之。况此脉证俱属产后阴虚不足之热，法用炒干姜为君，当归、南芎为臣，熟地黄、益母草为佐。即煎温服，过一两时辰热尽屏去，霍然无恙矣。公喜谢再四，问曰：身热极反用热药而得凉者，何也？余曰：此以治之法也，温能除大热，正此谓欤。

《两都医案》

程从周

第三年九月复举一子，临盆之时，衣裳稍薄，分娩后便觉恶寒发热，头痛如破，本家谓其平素虚弱，即进参汤一盂。延医俱用补中之剂，而热愈炽，痛愈甚，狂躁谵语，又多鼻衄。医见其补剂不效，而又兼衄，意谓其火热之甚也，改用黄芩、生地、花粉之类，益觉五内俱烦，不安寝者数日矣。第五日方邀余诊视，六脉浮紧，而左更甚，且反侧不安，语言错乱，予曰：“此外感之症，失于表散，当发之即愈。”乃用冲和汤重加姜葱，一剂而汗出，头痛顿止，身热顿凉。午后再诊，脉皆平和。大都此症本属有余，而医执丹溪产后大补之说，误以为不足，虚虚实实，咎将谁归。又医见其鼻衄，误以为水，乃用寒凉，殊不知鼻衄者，正乃寒包热也。经云：火郁则发之。表散之后，调理半月而痊。然产后诸症最难调摄，有以实而真虚，似虚而反实，若以丹溪产后当大补气血，虽有杂症，以末治之之说为拘，则产后

亦有内伤饮食、外感风寒者。夫内伤外感概可补乎”若消导于内伤，或发散于外感，则又有素涉虚羸极难用药，消之则中气遽虚，表之则元气即耗。丹溪之说未必无因，当此之时，要在十分着意，望闻问切四字皆不可遗。倘或诊不专精，草率投剂，鲜有不败事者矣。余故曰产后诸症最难调摄者，亦非未见之言也。

吴蓝生文学令政年二十三岁，曾育五胎。令九月终旬分娩，缘胞衣难下，稍稍劳力，因而身发大热。医认感寒，或用发散，故汗出如雨，且增喘急，四昼夜未能就枕，少腹急疼，秽恶不下，以为寒邪未尽，且禁其饮食，复用柴胡、苏子表散定喘之剂，而汗益多，喘益甚。夜半急邀予视之，六脉洪大而数，手汗淋漓，眉发俱湿，云：“数日以来，未有干时。”予曰：“此虚极矣。肺内主气，外主皮毛，腠理既开，汗乃大泄，肺虚安得不喘？表虚安得不汗？医者不思固守元气，而反叠用疏泄之剂，汗何由止？喘何由定？如再稍迟，则变为亡阳之症矣！”乃以参、芪、归、术、五味、枣仁、茯苓、黑姜之数，一剂即能安卧，且令其少啜稀粥。病者犹以为感寒，不敢进食，余析之曰：“感寒乌得有汗？可速啜之，以压其虚大。”于是日进薄粥数盂，汗亦随敛，喘亦渐定，继之又发战慄，先寒后热，一日一发，或二、三发。蓝生以为疟，予曰：“虽似疟，而实非疟也。正所谓阳虚生外寒耳。疟门之药断不可用。”仍复坚守补中，数日之后，寒热俱无。一月之后，方得痊愈。

《程茂先医案》

郭右陶

蒋南轩内室产后八日，恶露去血过多，忽恶寒发热，胸中胀闷垂危。延余，脉洪大无伦，余思恶露不尽犹可，今恶露去尽，何以骤得此脉。因语之曰：“脉甚凶，若兼痧可救。”南轩善放痧，信余言，入视痧筋紫红色者二条，放毒血。余复诊之，不复洪大，又刺指臂出紫黑毒血三十余针，用独活、细辛、柴胡、金银花、丹参、益母草、牛膝、

石斛、乌药、山楂、陈皮，四剂，微温服之，寒热胀闷俱除，后调补而愈。

王彦甫内室产后月余，发热呃逆，腹胀沉重。其长子谓余曰：“老母产后伤寒六日，沉重异常，忽发冷呃，将若何？”余诊之，六脉弦细而疾，口渴畏热饮，痧症显然。放臂痧三针，血流如注，又放指上痧三十余针。用苏木散，并付桃仁红花汤，加山楂、卜子，二剂，俱微温饮之，乃愈。

《痧胀五衡》

郑重光

瓜镇吴象衡兄令眷，怀孕临盆，丧子悲恸，不数日，生产一女，悲怒交加，产后即胸胀寒热烦躁，历医三、四位，皆主疏气消瘀，至七日不效，始迎余治。脉虚大无伦，烦躁作渴，辗转于床，时值秋暑。目中流火，视物皆赤。予曰：“此产后虚烦，真阳外越，若不温补，必致危殆。”象衡素自用，答曰：“胸胀如此，岂胜补药耶？烦热如此，岂胜温剂耶？”余言之极力，其岳家亦以前用消克，其病愈甚为辞，象衡为理屈，不得已，听余用药，余勉以归脾汤加炮姜，用人参一钱，煎服一剂颇安，再剂则热止得卧。如此三日，诸症皆回，但胀满未解耳。彼怀疑误补，又惑前医之言，以前胡、厚朴、陈皮、半夏、知母、丹皮，清热宽中。五、六日胀满未除，更增腹痛泻利，汗多不食，呃逆似呃矣，病益加重，前医束手无策，又复求治，余曰：“病危矣。前药亦不应，须用附子、干姜，挽回于万一。”言明不效勿怨，遂用人参五钱，附子、白术、干姜、肉桂、茯苓各钱半，大温大补，始克有济，下咽一刻，即汗敛呕止，如此大剂，十日泻止能食，一月方减药，而病亦渐愈。若其复请时，以前医翻案，置怀不一援救，岂不坐视其毙乎？

瓜镇曹实甫令眷，年将三十，产后二日，忽恶寒发热，头痛身疼，医认作伤寒，断食三日，汗大出而热不退，更增烦躁。实甫具病状，问治于镇江何似充先生，何答云：“产后以大补气血为主，虽有

他疾，以末治之，药用参、芪、归、术、茯苓、炮姜、麦冬、五味、甘草。”实甫复呈方于前治之医，斥之曰：“老朽已聋瞽失时，此等伤寒热证，岂堪补耶？”又任其专治七日，则愈热愈躁而脉愈大，暮夜相招，脉散大，呻吟狂躁热渴，扬手掷足，几不欲生。予曰：“产后虚烦，急须温补，发药加参。”实甫以何药见示，药竟相同，遂放心与服，服毕即安卧，次日脉敛热退，嘱其仍要加参，实甫惜费不用，逾一日夜，复热躁欲脱，通夜服人参七钱始安，如前参芪归术，调补匝月而起。

《素園医案》

程文囿

丹溪云：产后当以大补气血为主，他证从末治之。言固善矣，然事竟有不可执者。乾隆乙巳仲夏，岩镇许静（亭）翁夫人病，延诊。据述：产后十二朝，初起洒淅寒热，医投温散不解，即进温补，病渐加重，发热不退，口渴心烦，胸闷便秘，时值溽暑，病人楼居，闭户塞牖。诊脉弦数，视舌胎黄。告静翁曰：“夫人病候，乃产后感邪，医药姑息，邪无出路，郁而为热。今日本欲即用重剂清解，恐生疑畏，且与一柴胡饮试之，但病重药轻，不能见效，明早再为进步。”并令移榻下楼，免暑气蒸逼。诘朝视之，脉证如故，舌胎转黑，众犹疑是阴证。予曰：“不然。阴阳二证，舌胎皆黑。阴证舌黑，黑而润滑，病初即见，肾水凌心也；阳证舌黑，黑而焦干，热久才见，薪化炭也。”前方力薄，不能胜任，议用白虎汤加芩连。饮药周时，家人报曰：“热退手足微冷。”少顷，又曰：“周身冷甚。”静翁骇然，亦谓恐系阴证，服此药必殆。予曰：“无忧。果系阴证，服温补药效矣，否则昨服柴胡饮死矣，安能延至此刻”此即仲景所谓热深厥亦深也。姑待之。”薄暮厥回，复热烦渴，欲饮冷水。令取井水一碗与饮，甚快。予曰：“扬汤止沸，不若釜底抽薪。”竟与玉烛散下之。初服不动，再剂便解黑矢五六枚，热势稍轻，改用玉女煎数剂，诸候悉平，调养经月而愈。众尚虑其产后凉药服多，不能生育。予曰：“无伤。经曰：有故无殒。”

至今廿载，数生子女矣。壬戌岁，与订朱陈焉。予来岩镇谭医，自静翁始。

《杏轩医案》

吴饒

钟氏玉门不闭，发热恶寒，神气困惫，六脉细微。此由阴气大虚，不能收摄所致。宜投补中益气汤，三剂而寒热退。又以十全大补汤加五味子补而敛之，服数帖而玉门敛。

《临证医案笔记》

王孟英

张郑封妻，娩后即发热，服生化汤两帖，热益炽而发赤疹。顾听泉诊之，即予清解药，三剂不应，欲进犀角地黄汤，而恐病家狙於产后以生疑也，乃拉孟英质之。诊其脉，弦滑而数，面赤热燥，胸闷善悲，肢肿而疼，两肘白泡如扁豆大者数十颗，舌上亦有一颗，痛碍水饮，大便不解已旬日矣。曰：此不但胎前伏暑，且有蕴毒，而误服生化汤以助其虚，幸初手即用清解，尚不至於昏陷。犀角地黄（汤），极是治法，但犹恐不能胜任。乃与听泉商加：西洋参、滑石、知母、银花、花粉、人中白、姜仁、竺黄、贝母、桑叶、梔子为剂。其所亲曰：高明断为热证，何以病者虽渴而喜热饮耶？孟英曰：此方中所以多用痰药也。凡胸中有热痰阻碍气机者，每如是，不可以其向不吐痰面疑吾言之妄也。若因此而指为寒证，则祸不旋踵矣。进四帖，始得大解，频吐稠痰，而各恙皆减，饮食渐加。孟英曰：病势虽稳，余热尚炽，苟不亟为清涤而遽投补益，犹有蓐损之虞。其母家果疑药过寒凉，必欲招专科调治。幸将前方示彼，尚不妄施温补，然隔靴搔痒，纪律全无。旬日后，余火复燃。郑封坚恳孟英设法，仍用甘寒疗之。周身肌蜕如蛇皮，爪甲更新，其病之再生也可知。继予滋补真阴而起。

翁嘉顺室，娩后发热，竹林寺僧治之不应。温、龚二医皆主生化汤加减，病益剧。请孟英诊之，脉炊滑微数。曰：素体阴亏，热自内生，新产血去，是以发热。惟谵妄昏瞢，最是吓医之证。渴喜热饮，宛似虚寒之据。宜其猜风寒而投表散，疑血瘀以攻通。遂尔帖帖泡姜，人人桃、桂，阴愈受劫，病乃日加。幸而痰饮内盛，津液未至涸竭，与：蠲饮六神汤去橘（皮）、半（夏），加西洋参、生地、花粉、竹茹、知母、生白芍为剂，数日而瘳。逾旬复发热。或疑凉药之弊，或谓产瘀成癆。众楚咻之，病渐进矣。其小姑适吴氏者，向役於冥曹，俗谓之“活无常。”偶来探病，忽仆地而僵，口中喃喃。或问：“汝嫂病何如？”答曰：须服王先生药。人皆异之。次日，仍乞诊於孟英。曰：脉浮数而弦，是风温也。与前病异，便泻无溺，肺热所迫，大渴无苔，胃汁受烁。亟与：天生建中汤频灌。药主大剂甘凉，果得津回舌润，渐以痊可。

高禄卿室，吴濂仲之妹也。孟夏分娩发热，初疑蒸乳，数日不退。产科治之，知挟温邪，进以清解，而大便溏泻，遂改温燥，其泻不减。另招张某视之，因谓专科误用姜仁所致。与：参、芪、姜、术、鹿角、肉果等药，泄泻愈甚。连服之，热壮神昏，汗出不止，势濒于危。酝香孝廉徐夫人，病者之从母也。心慈似佛。有子十人皆已出。闻其殆，夤夜命四郎季眉，请援於孟英。按脉，洪数七至，口渴苔黄，洞泻如火，小溲不行。因谓季眉曰：病犹可治，第药太惊人，未必敢服。季眉坚欲求方，且云：在此监服。乃疏白头翁汤加石膏、犀角、银花、知母、花粉、竹叶、梔（子）、楝（实）、桑叶予之。

次日复诊，脉证较减，仍用前方。而病家群哗，以为产后最忌寒凉，况洞泻数日乎？仍招张某商之，张谓：幸我屡投温补在前，否则昨药下咽，顷刻亡阳，复定芪、术之方，业已煎矣，所亲张芷舟孝廉闻之，飞告子蕴香处。汾伯昆季，即驰至病家，幸药未入口，夺盞倾之，索孟英方，煎而督灌，且囑群季轮流守视，免致再投别药。孟英感其情谊，快舒（抒）所长，大剂凉解，服至七帖，泻全止，热尽退。乃

去白头翁汤，加：生地、元参、(竹)茹、贝(母)，服半月始解黑色燥屎，而眠食渐安。第臍脏之邪，虽已清涤，而从前温补，将热邪壅滞於膜络之间，复发数痢於胸之乳间。孟英令其恪守前法，复入蒲公英、丝瓜络、橘叶、菊叶等药，服至百剂，始告痊愈。而天癸亦至。·孟英曰：世俗泥於产后宜温之谬说，况兼泄泻，即使温补而死，病家不怨，医者无憾也。或具只眼，其谁信之。此证苟非汾伯昆仲笃信於平时，而力排众论於危难之间，余虽见到(道)不疑，亦焉能有济耶？余尝曰：病不易识，尤不易患；医不易荐，尤不易任；药不易用，尤不易服。诚宇宙间第一难事也。而世人浅视之，可不悲哉！

陈书伯太史令弟妇，娩后三日，发热汗多，苔黄眩悸。孟英切脉，弦细虚数。乃营阴素亏，酷热外烁，风阳浮动，痉厥之萌也。与元参、白薇、青蒿、生地、小麦、稻豆衣、石斛、鳖甲、竹叶，两剂，热退知饥，悸汗不止。去(青)蒿、(白)薇，加：龙(骨)、(牡)蛎、莲心、龟版、(紫)石英而安。

继又因暑风外袭，壮热如焚、渴饮不饥，睹物尽赤。改授白虎(汤)加西洋参、竹叶、莲秆，一啜而瘳。仍与镇摄滋潜善其后而愈。

赵子循室，娩后，服生化汤两帖，更因惊吓，三朝发热，连投四物、六合等汤，病日以甚。半月后，始延孟英诊之。脉象：左弦极，右洪滑数。苔黄大渴，谵语嗽痰，恶露仍行，唇齿干燥。是因阴虚之体，血去过多，木火上浮，酷暑外烁，津液大耗，兼有伏痰之候也。亟与营卫两清，冀免他变。而母家极畏石膏、坚不与服。越三日，势益剧，计无所施。子循之叔笛楼，与其表兄许芷卿，径以白虎加减投之，证有转机。翌日，再迓孟英会同笛楼，暨其舅氏许吉斋山长协商妥治，咸是王(孟英)之议，且以西瓜汁助其药力，热始日趋下行，二便如火。又数日，渐安粥食，神气亦清，起坐梳头，夜能静寐。然热蕴太久，下焦患痢，脓虽即溃，阴液漏伤。脉复空数浮大，便泄善嗅，口干多梦，皆木少水涵，烁津侮胃之见证也。孟英与笛楼商，以白头翁汤加龙骨、“三甲”、甘草、木瓜育阴潜阳，余粮(赤)石脂丸中，加(乌)

梅、(黄)连以熄风镇胃，果得疮口脓干，餐加泻止，脉柔热净，苔退神怡。正须善后，甫授滋填，不期酷暑旬，甘霖忽降，窗开彻夜，复感风邪，身热微寒，鼻流清涕，而阴液久夺，外患未痼，培养碍投，又难发汗，肝风内应，瘕瘰旋形，九仞之功，遂成画饼。门外汉未免以成败论，然此案自堪传也。

陆厚甫室，陈芷澍主事之女也。产后经旬，偶发脘痛。专科用温补药因而寒热气逆，自汗不寐，登圜不能解，而卧则稀水自流，口渴善呕，杳不纳谷，金云不起矣。乃父速孟英诊之，脉弦数而滑。曰：本属阴亏，肝阳侮胃，误投温补涩滞之剂，气机全不下降，以致诸证蜂起。医者见而却走，是未明其故也。与沙参、竹茹、楝实、延胡、梔(子)、(黄)连、橘(皮)、贝(母)、杏(仁)、(石)斛、枇杷叶，为肃肺以和肝胃法，覆杯即安。但少腹隐隐作痛。于前方去杏(仁)、贝(母)、竹茹，加知母、花粉、花粉、苡蓉、白芍、橘核、海蛇，乃解宿垢而瘳。

《王氏医案》

林佩琴

某氏。露产冒暑，烦热汗出，直视不语，脉软数。医谓恶露未行，治宜逐瘀。予曰：直视者足太阳经血虚，筋急牵引直上也。不语者暑先入心，手少阴脉系舌本，络舌旁，邪入营分。舌系缩也。烦热则易郁冒，汗多亦虑液亡，失治必变昏痉危疴。用生脉散加生地、当归、石斛、连翘、丹皮、木瓜、甘草、藕汁冲服。诸症退能言，又加减前方，数十服得安。

张氏。官署坐蓐，辄动乡思，经旬宵热如烙，脉虚疾，插髻银簪，一夕色黑，以纸拭去，明晨如漆，骇极。予云：此产后血虚火炎，汗泽所蒸耳。宜滋阴退热。以熟地、白芍、丹皮、当归、丹参、石斛、茯神、杞子、甘草，四服热退，簪色不变矣。去丹皮、丹参，加枣仁、山药、莲子，蜜丸服，愈。此前取甘凉除热，后取酸涩安神。

包氏。严寒坐蓐，肠出不收，身热面赤。思被冷无温，肠必干涩

难上，如蓖麻子捣涂发顶，法必不验。即冷水喷面，亦虑滋病。令煎芎归汤入净桶，着人扶坐桶上，以旧绢托肠，乘热熏之。肠得热气，自润而升，且托且送，待其将尽，趁手托入。如法而收，再服补剂热退。

《类证治裁》

抱灵居士

瞿室，产后，手足麻，头痛发热，恶寒，汗多作渴，饱胀，以五积散去麻、苍一剂，热退，冷汗多，手足麻在；以二陈汤加芩、归、芍、桂、姜一剂，汗少减，腹冷痛，脉沉弱；以十全大补汤加附子、香附、煨姜一剂，人健，恶风好，出汗三次，泻三次，心慌；以前方加枣仁一剂，脉起，泻、汗在；以补中益气汤加干姜、肉桂二剂而愈。数日食鸡起动，又发热口渴，饱胀出汗，泻十次，以前方加木香、乌梅不应，恶露亦止，此正停血宜破也；晚以二陈汤加木香、厚朴、楂肉一剂，下身痛，腹痛口渴，汗多，太阳痛，泻止；以理中汤加桂、姜、芩一剂，腹痛甚，有痰；或以灯心七根，从额焯至顶七焯，头好；以顺气破血、清火发表之剂，加花粉、木通、青皮、枳壳、益母、桃仁、荆芥、红花、楂肉之类，数剂血行而愈。

石妇，产后十日，季春食鸡，胸痞，恶寒发热，口渴，泻三次，以芎、归、术、草、楂灰、肉桂、干姜一剂好。间日恶寒不食，胸有一块碍痛，以前方加桃仁、荆芥一剂，泻止，热退，泻鲜血，时恶露已尽也，舌干黄苔，口渴尿赤，以二陈汤加楂肉、香附、黄连、桂枝、荆芥一剂，热退，便秘，如狂，尿赤痛，胸块在；以桂枝汤加香附、楂肉、陈皮、茯苓、归尾、熟军一剂，泻一次，胸减，口和，饱胀在，食少，腹热，便秘三日；以芎、归、芍、陈皮、枳实、熟军、泻二次而愈。

福内，产后十日，发热不恶寒，无腹痛，不饱胀，先从足冷，而上则发热，此阴虚之象。每产后数以恶露止，六日为期，气血虚也。以四物汤加干姜一剂不应；以十全大补汤热退，或齿痛出血，舌黑润，

便秘八日；以通幽汤不应，又秘十二日；以莱菔子煮食，兼麦冬汤而更衣，服麻仁苏子粥作呕，后不药而愈。

《李氏医案》

顾德华

张。新产两朝，瘀不下行，发热神蒙，肢麻汗多，脉芤舌红。酷暑外迫，阴气郁冒，血随气逆，时有昏晕，变险可危。急扶产母端坐椅中，敞轩窗以湘帘扩风，切勿听信姬辈，胶执吃热苦草汤也。急嘱，急嘱。

细生地 广郁金 怀牛膝 归身 川贝母 白蒺藜 西琥珀
赤芍 丹皮 白薇 鲜藕肉 童便

又诊：热退神清，气火平降，瘀亦下行，两臂尚麻，少腹酸楚。仍从养血通瘀，即是治风先治血之意也。

细生地 净归身 茺蔚子 赤芍 炒山药 白蒺藜 怀牛膝
丹皮 白薇 查炭 琥珀

《花韵楼医案》

费伯雄

某。邪热内蕴，肺胃受病，发热咳嗽，痰多头眩，胁痛，由产后感冒所致。宜疏解上焦，肃化痰热。

苏子梗各二钱 香青蒿一钱半 豆卷四钱 川贝二钱 防风一钱
法夏一钱 杏仁三钱 萎皮三钱 橘红一钱 茯苓二钱 生草五分
枇杷叶二钱 雪梨半只

《费伯雄医案》

李铎

黄氏妇，新产后服生化汤合失笑散，血气痛止则恶露已尽。昨夜半发热憎寒，头身尽痛，烦躁口渴，脉息紧涩，本气血空虚之候，

然必因感冒风邪，故有诸症。如果血虚发热，内损见证，定然昏瞢眩晕，大渴引饮，汗多气短，此为的辨矣。但虽有外邪，总当补虚而兼散邪。

生芪 当归 文党 荆芥炒 川芎 白芍 柴胡 干葛 甘草 加生姜，水煎服，一剂愈。

补虚散邪不致损伤气血，产后的治，学者当紧记之。 寿山

《医案偶存》

王廷俊

孙秋畚妇，产后服生化汤过剂血崩，医以丹梔逍遥散投之，反增恶寒发热，头痛目痛，口燥、鼻干、下利等证，医知有外感，而泥于产后百脉皆虚，宜补不宜表之说，用补中益气汤，以为稳当，服后崩愈甚，病愈剧。更医，又以为血虚宜养阴，而用知柏地黄汤，进剂，寒战鼓栗，变红崩为白带下利日数十行，困惫以甚。适予在候补库大使余春庭寓治病，孙与比邻，邀予往诊，自谓病已不治，烦君一决行期早晚耳。至病所，腥秽难闻，焚香强诊，浮部浮洪，沉部紧小，以脉参证，确系太阳阳明合病，主用葛根汤，伊见方中麻黄桂枝同用，惊疑问故，告之曰：“尊嫂产后原无病，服生化汤七八剂，酿成内热，乃为血崩，其时必自觉其热，掀去衣被取凉，又受外寒，丹梔逍遥散，虽不对病，而无大碍；补中益气则将寒热之邪，逼之内入；知柏地黄，则更引邪下陷矣。现在病状虽危，而脉之浮洪为风热，紧小为寒闭，确凿有据，何畏乎表。”劝之使服，伊慎重之至，三四次服完一盞，毫无进退，又与一盞，得睡；知药已对证，接服一盞，下利先止，口燥鼻干渐解。次日往诊，紧小渐减，浮洪未退，仍令前方再服一剂，是夜微汗周浹，寒热诸痛悉平，惟白崩不止，复诊其脉，右关濡滑，只以白术末和粥与服，五六日后秋畚来舒云：“带下白昼甚少，惟夜卧不能安帖，醒时带必大至，据病人云，且多怪梦，体亦增热。”消息其意，知为阴不敛阳，径用桂枝加龙骨牡蛎汤，去桂枝，服六

剂，驩驩向安，前医来询余何法治愈，详细道之，且婉劝其读陈修园先生所注书，欢欣鼓舞而去，从此用功，亦吾道中勇于迁善之君子也，然而仅矣。

葛根汤

葛根四钱 麻黄三钱 桂枝二钱 白芍二钱 炙草二钱
生姜三钱 红枣四枚

用水先煮麻黄，葛根，去上沫，纳诸药煮，去渣，温服，覆取微汗。

陈古愚曰：第二方桂枝加葛根汤，与此汤，俱治太阳经输之病，太阳之经输在背，经云：邪入于输，腰背乃强。师于二方，皆云治项背几几，几几者，小鸟羽短，欲飞不能飞而伸颈之象也。但前方治汗出，是邪从肌腠而入输，故主桂枝。此方治无汗，是邪从肤表而入输，故主麻黄。然邪既入输，肌腠亦病，方中取桂枝汤全方，加葛根、麻黄，亦肌表两解之法，与“桂枝二，麻黄一”同意，而用却不同，微乎！微乎！

张令韶曰：太阳与阳明合病，必自下利者，太阳主开，阳明主合，今太阳合于阳明，不从太阳之开，而从阳明之合，病合反开，故必自下利。下利者，气下而不上也，葛根入土最深，其藤延蔓似络，故能同桂枝直从肌络之内，而外达于肤表也。

此小病也，但不读《伤寒论浅注》，骤遇此证，亦必茫然不解，既经行医，又不肯直告病家，谓我不识病，不敢开方，左支左吾，只好模糊影响，开一果于药单而去，自为计则得矣，其如病人何也？又其甚者，大言欺人，谓前医皆有所偏，不如景岳阴阳两补，最为神妙，于是“大补元煎”，“左归饮”，“右归饮”随意写去，一服之后，经输、肌表、脏腑，脉络一齐闭塞，外证全伏，有似病退，而病乃真不可治，此等医家，遍地皆是，有一超出流俗之士，精研经旨，善用经方，而病家无识目之，以偏弃而弗用，左右又有工于逢迎，惯习江湖，经说光而话之好好先生，为之簧鼓，愈治愈谬，直至大命将倾，莫可如

何。始以经方姑为一试，到口即毙，反贻话柄，专为若辈受过，医之难行如此！宜张隐庵，高士宗诸大家，皆闭户著书，而不与时人作缘也，噫！

《寿芝医案》

徐守愚

马仁村马亦宾少妇产后方才七日，忽尔发热，就地医者以为当此湿蒸热郁之时，外感居多，用吴鞠通银翘散数剂而病遂增剧。后请裘小山先生诊视，渠余旧相识，医理明通，方多法古，谓产后百病以未治之，生化汤重用全当归，加益母草，去瘀生新，其热自退。如此治法，本属不错，而无如药仅一剂，旋即作呕，抑且腹痛下痢，日夜六、七次，身热汗出，饮食不进，显系棘手重证。乃求治于余，脉得沉微虚弱，于产后尚不见忌。妇父王问心语余曰：“小女产后，其初不过发热小恙，至今而病变多端，毋乃医者之过欤？”余曰：“误在前医，无咎后医。”问心曰：“呕与痢实起于后。”余乃举以示之曰：“后医之方重用全当归，原不无滑肠之虞。然而亦无所害，而所以发热不休，呕痢交作者，皆由前医之过散以致虚故也。产后中虚，所不待言。”问心曰：“如是则温补可进矣。”余曰：“昔朱丹溪治产后发热，每以四君加川芎、当归、炙芪、炮姜。亦甘温除大热，其方非不可用也。然而治此证则更有进。按《金匱》云：妇人乳中虚，烦乱呕逆，安中益气，竹皮大丸主之。言乳中虚者，以乳子之妇，阴血不足而胃中亦虚，故病烦乱呕逆。经云：阴者中之守也。如此证阴虚不能恋阳，则阳无所丽，浮散于外而发热，亦阴虚不能胜阳，所以气逆则上呕，气陷则下痢，种种见证皆由中气，亦惟以竹皮大丸石膏易半夏，加炮姜，庶几得当，此外别无良法。”于是问心乃命婿亦宾速进此药，以图速效。连服二剂，诸证悉退。次朝余将返寓，临行时问心欣欣揖余而言曰：“先生今又救一命矣！”

竹茹五钱， 姜夏四钱， 生甘草一钱， 白薇二钱， 炮姜一钱半，

桂枝一钱半。大枣生姜以有汗而不用。竹茹除烦治呕，而半夏降逆亦所以治呕，白薇益阴退热，而姜、桂扶阳亦所以退热，甘草、大枣培中焦脾土，则津液生而泻痢乃止。正无一味补药而中即自安，气即自益矣。《金匱》谓中虚而烦乱呕逆主以竹皮大丸，明以烦乱为病，而无腹痛下痢等证，所以方中石膏清上焦之虚热以通乳定烦，为佐。兹则但呕逆而不烦乱，兼之腹痛下痢，故去之。

《医案梦记》

徐养恬

产后将及一年，寒热缠绵不已，形瘦腹痛，此属阳维为病。近加咳嗽，更不宜也。拟仲景当归建中汤意。

嫩桂枝 当归 白芍 炙甘草 软白薇 肥玉竹 阿胶 软紫菀 加姜 枣 饴糖

二诊：产后寒热将及一年，脉细数，腹痛则大便下，下后痛即止。前进当归建中汤，寒热轻，咳嗽减，而腹痛依然，此虚中有滞也。转拟桂枝汤加减以和营卫，旋复花以通络。倘再纠缠不了，必成磨损。

嫩桂枝 白芍 炙甘草 新绛 旋复花 霜桑叶 白薇 当归须 紫菀 粉丹皮 羌蔚子 青葱

《徐养恬方案》

魏树春

丙辰夏，予往临川，寓友人陈韞山处。其甥妇患病重。以予年老，不敢劳远行，即延儿子宏炎往诊。旋归以病状及方治告予。谓产后发热逾旬，少腹微痛，前医用解表及初血之药，而热皆不减。乃询以产后病行多少瘀者。云：瘀行甚少。其为停瘀发热可知。当与以枳实芍药散加泽兰、丹参、桃红、青皮等味。以行瘀清热，兼止其痛。不卜服后果能获效否。予曰：凡产后恶露未净而致发热者，服

消痰药无不立解。此证效可必也。次日又延复诊，询之，果热减痛平，即依此法调理而痊。

《清代名医医话精华》

张仁锡

一妇，坐草后两日，恶寒发热，以轻剂疏解，遂汗至如雨，越日汗收食进。毫无所苦，医议停药。岂知三日夜，顷刻间腹中缓缓作痛，大便溏泄数次，神志不安。自云热极渴极，苦难言状。脉应细而数。余至巳二鼓后，病家急于用药，将欲下咽。索其方，乃去瘀生新，皆产后之通套。余曰：此脱阳也，证属少阴无疑。遂以熟附、炮姜、炙草、炒白芍、人尿、胆汁为剂。服完即睡，醒来热渴顿除。后以四君子去术，加桂枝、归、芍、怀膝、牡蛎。二帖而痊。

《清代名医医话精华》

徐镛

归鞠氏侄女，冬月初产无恙，至六日头痛身热，凛凛畏寒。予用梔豉汤，夜半热退，逾日复热。更医用产后逐瘀成法，遂加烦躁。余谓冬温为病，清之可安。《通评虚实论》曰：乳子而病热，脉弦小者，手足温则生。仍依时邪治例，用白虎汤而愈。凡产后无产证而染他证者，即当以他证治之，而丹溪大补气血之言却不可拘。仲景云：病解能食，七、八日发热者，此为胃实，大承气汤主之。夫阳明经中，仲景尚再三戒人不可轻下，而产后亡血既多，仍云承气主之，盖既为胃实，自有不得不用之理。举一证而产后挟实者可类推也。仲景云：产后下利虚极，白头翁加甘草、阿胶汤主之。夫既曰虚极，仍用白头翁汤者，下痢中既后渴欲饮水热而下重之症，则白头翁汤自有不得不用之理。惟其虚极，故加甘草、阿胶以养其正。举一证而产后之挟虚者可类推也。

《医学举要》

雷丰

四明沈某之室，诞后将匝月以来，忽然壮热汗多，口渴欲饮。有谓产后阴虚，阳无所附；有谓气血大虚，虚热熏蒸，皆用温补之方，严禁寒凉之药。见病者忽尔羸羸，日晡发热，益信其为瘵癆，愈增热补，更加唇焦齿燥，舌绛无津。复请前二医合议，议用导龙入海，引火归源之法，不但诸证未减，尤加气急神昏，始来商之于丰。丰即往诊，两手之脉，皆大无伦，推其致病之因，阅其所服之药，实因误补益剧，非病至于此险也。沈曰：此何证也？丰曰：乃瘵癆也。此即古人所谓阴气先伤，阳气独发，不寒瘵热，令人消烁肌肉，当用甘凉之剂治之。曰：产后用凉，可无害乎？曰：有病则病当之，若再踌躇，阴液立涸，必不可救矣。即用甘寒生津法，加西洋参、紫雪丹治之。头煎服下，未见进退，次煎似有欲寐之形，大众见之，无不疑昏愤之变。复来请诊，脉象稍平，唇舌略润，诸恙如旧，但增手战循衣。丰曰：此阴阳似有相济之意，无何肝风又动之虞。仍守原章，佐以阿胶、龟版，及鸡子黄，令其浓煎温服。是夜安神熟寐，热势大衰。次早诊之，诸逆证皆已屏去，继以清滋补养，调理两月方瘳。

豫章邱某之室，分娩三朝，忽患时行寒疫。曾经医治，有守产后成方用生化者，有遵丹溪之法用补虚者，金未中的，而热势益张。邀丰诊之，脉似切绳转索，舌苔满白，壮热汗无。丰曰：此寒疫也，虽在产后，亦当辛散为治。拟用辛温解表法去桔梗，加芎、芷、干姜、黑荆、稻豆，囑服二剂，则热遂从汗解，复用养营涤污之法，日渐而瘳。

城东孔某之室，素来多病，其体本孱，分娩三朝，忽然头痛难忍，寒热无汗，大渴引饮，脉来浮大之象，此肌表重感秋凉，而曩伏之暑热，触动而继起矣。询知恶露匀行，腹无胀痛，生化成方，可勿用耳。即以白芷、青蒿、秦艽、荆芥、当归、川芎，加败酱草合为一剂。盖白芷为产后疏风妙药，青蒿乃产后却热最宜，秦艽、荆芥活血散风，当归、川芎生新去瘀，本草谓败酱草味苦而平，主治产后诸病。

此方最稳，请服二煎，其热从汗而退。次日邀诊，脉象顿平，询之口亦不渴，惟觉神倦少眠。此伏暑已随秋凉而解，心脾被邪扰攘而亏，当守原方去白芷之香燥、荆芥之辛散，加茯神、柏子以安神，神安自熟寐矣；又加西潞、炙草以扶元，元复自强健矣。后用八珍损益，未及半月而康。

《时病论》

学山公

产后之症，以补养气血为先，虽有他患，以末治之，所以内热口干者，不得任用寒凉。用寒凉则新血不生而胃阳受困，头痛恶寒者，不可专行发散，行发散则气随汗出，而精神告匮。前六、七日時见脉势涩弱，饮食不入，乳汁全无，频频自汗，以为平素体虚，而产后过伤气血，用阴阳平调之剂，从缓治也。目今寒热时发，神气不清，脉来涩数而弱，左关略旺，大抵皆阴阳二气，自为乘侮，非干外邪所致。其神气不清者，一由于血室空虚，留於得以随势而入，一由于胃阳不固，心神因以随自汗而伤。法宜生血以退热，养气以安神，开胃以加食，乃能痊愈也。

《龙砂八家医案》

陈和生

产后瘀血宜消，新血宜生，惟生化汤最当。考《本草》：川芎、桃仁，当归三味，善去恶血而生新血，佐以炮姜、甘草，引入脾经，生血理气，化中有生，实产后之至宝也。然愚谓生化汤一方，所以治无病之常，非以治有病之变。既变而仍用常法治，断乎不可。间常入都，闻有产前血崩，产后服生化汤，以致昏痉而死者；又里中闻有产后服补药，以致胸胀满闷，口鼻流血而死者，此皆泥于产后宜温宜补，不知变通误之也。己卯五月，余室人新产三日，患热病颇剧，先严诊之，凉药外，并用井水浸花露饮之，花露尽，渴甚，取所浸井水饮之，

半月后，先严告余，明日当用热药一剂，至明日午刻，室人果言气闷，窗牖洞开，闷终不解，即以热药浸冷水饮之，少顷，气闷释然，后又用清养药，调治半月而痊。是症也，初终俱服阴药，中间阳药一剂，殆如用兵然，移步换形，随时策应，岂拘守成法者，所能梦见哉！时有谓服凉药太多，难望生育者，先严曰：“多服凉药，正为生育计也。倘祛邪不尽，病必缠绵，尚可望生育乎？”其后连得数胎，今已十数龄矣。癸巳腊月，余由津入都，刘君伟臣之令媛，产后患冬温症，医泥产后，用药不敢过凉，绵延两月，热蕴不化，形乏气喘，夜不能寐，病情颇剧，脉来七、八至，右尺按之尤有力，舌右偏近根处，有老黄腻苔一片，余与清化重剂，喘平寐安，症情大减。正月初，天气骤温，作服过暖，内热复炽，病势顿危，余诊其脉，数疾如前，喘促烦躁，较前更甚。仍前药加犀角屑二钱，服后，症稍平，减犀角，又服十数剂，脉象始和，舌苔乃退。丁丑，同邑青果巷薛仲梧之室，产后十余日，身热面赤，咳嗽气促，胸闷腹满，尿涩便闭，当时麻症盛行，前医疑为时邪，与以豆豉、浮萍等药，不应，来延余诊。切其脉，浮细而数，望其舌，苔腻而黄，审是积滞阻中，诸气为之窒塞。既不得以产后百脉空虚，疑为虚怯，又不得以此盛行麻症，恣用清疏。用二陈汤加枳实、楂炭、焦曲为方，二剂，诸症悉平，后以八珍汤调补而安。丁酉四月初，余客天津，孙慕韩观察之夫人，产后五日患温症颇剧，来速余诊，头晕咳呛，耳鸣耳聋，牙床肿烂，胸腹胀闷，身热汗多，食不甘，寐不安，脉数，右寸关尤甚，综核脉症，知是温邪内蕴，误服柴胡、参须劫阴助火所致，用犀角地黄汤、羚梔枳实汤等方出入加减治之，两旬余而愈。此数症也，一则有热当清，即用治温热法清之；一则有滞当消，即用治积滞法消之；一则既热且滞，即合治温热积滞法清而消之。病皆应手而效，可知方书治病诸法，皆产后治病之法。如遇虚寒症，自当温之、补之；如遇实热症，不妨清之、消之，随时论症，随症论治。在古人既以常法示后人以程途，未尝不以变法俟后人之取用也。带、产后较平时，略慎重耳。虽然，以上数症，皆

病之重者，故所药可重；若系轻病，药又不当重而当轻。壬辰春，余客都门，有殷姓室，产后患痧麻，医用大青、犀角等药数钱以清其中，又用荆芥、防风等药数钱以散其表，大剂投之，身热未除，胸中懊恼转甚，头痛，腹痛，身痛，神疲气促，饮水即吐，尿涩便结，呻吟转侧，苦不可堪。余切其脉，虚细而数，知是中气素弱，不胜外邪之忧，病本轻而药过重，所以加剧。譬如区区小窍，起数十营讨之，贼未能擒，乡间已受其扰，不如任用一二干役，擒之即获，再得实心办事之良有司，劝导有方，即可化莠为良，安贴无虞。若小题大做，非办事之善者，因用川连、甘草、橘皮、砂仁各数分，石斛、白芍、竹茹、苡仁各一二钱为方。明白复诊，诸症释然，再加调养而愈。盖病重者，药宜重，病轻者，药宜轻，随症论治，无可混施。然而南人性缓，遇重病，往往以轻药治，其意但求寡过，而失之因循；北人性躁，遇轻病，往往以重药治，其意急欲见功，而失之冒昧。冒昧固非，因循亦误，要惟两祛其失，为能一衷于是，此通权达变之人，所以夔乎不可及也。

《诊余举隅录》

王旭高

胡。小产半月，感邪发热，又遭惊恐，冲任受伤，少腹胀痛，白带淋浊，眼花口苦，腰膝拘挛。证逾半月，饮食不纳，虑其昏厥。姑仿南阳以浊攻浊法，兼达邪化瘀，备商。

淡豆豉 白前 泽兰叶 延胡索 焦山栀 当归 丹参 焦楂肉 竹茹 交加散 两头尖

另：旧裤裆一方，烧灰存性，药汁调下。

渊按：此名烧裤散，仲圣治阴阳易病。

王。产未百日，骨蒸发热，淹延匝月，热势渐加，迄今五十日矣。诊左寸关轻取虚小，中按之数，重按数而且坚，知其热在阴中，心肝之火独亢；右寸关虚软而数，则知脾肺气虚；两尺皆虚，肾阴亏也。

阴虚阳盛，热气熏于胸中，蒸动水谷之湿上泛，故舌苔反见浊厚耳。耳鸣而聋者，肾虚肝阳上逆也。据述服参、芪则热势愈甚，投胶、地则胃气益惫。节近清明，地中阳气大泄，阴虚阳亢莫制，恐其交夏加剧。刻下用药，以脾胃为要。土旺四季各十八日，清时节后土气司权，趁此培土，冀其脾胃渐醒，饮食渐加，佐以清金平木，必须热退为妙。

北沙参 地骨皮 丹皮 归身 怀山药 白扁豆 茯苓 白芍 生熟谷芽 白蔷薇露

某。产后营虚，内热日久，近感风邪，发热更甚，胸闷心跳。气滞血亏，显然可见。

香豆豉炒 黄芪 防风 全当归 白芍 白术 枣仁 茯神 玉竹 桑叶

渊按：虚多邪少，从补营方中加轻散药一二味，即可祛邪。重加发散，邪转不服，反多变证。

赵。病后小产，产后感邪咳嗽，寒热似疟。服解散疏和药五六剂，邪退未尽，夜犹微热。然头晕心跳，寐则惊惕，虚象见矣。拟养营化邪法。

四物汤合二贤，加苏子、苏梗、苏叶、川贝、杏仁、枳壳、茯苓、款冬花

用三苏、二贤、四物，意在泄血分之风，和血中之气。加化痰止咳药，佐使之耳。

又：补肺阿胶合金水六君，去半夏，加川贝、款冬花。

某。左脉细数，营阴亏也；右脉细软，脾气虚也。产后不能安息，反加劳碌，气血伤而不复，致身常内热，心荡若嘈，久延虑成劳损。人参养营汤加减。

党参 大熟地 冬术 白术 丹参 香附 远志 甘草汤制砂仁 归身酒炒 陈皮 茯神 枣仁

柳宝诒

黄。寒热晚作而无汗，少腹滞痛，脉象细数不畅。病起蓐中，邪机留入阴分，而阻瘀结热。病经一月，营血受伤。当疏营透邪。

鲜生地 生姜同打和，炒黑 丹皮 丹参 全当归 青蒿 苏叶
南沙参 前胡 紫菀 紫蛤壳 白薇

解。产后寒热日作，已过两旬，有汗不解，浮肿气促，咳逆耳聋，舌质紫晦，舌苔色白微浊，其脉象浮数如沸。温邪乘新产而发，内则血瘀热阻，营气不通；外则气郁湿滞，肺胃不畅。热邪久郁，恐即有风痉喘厥之变。姑拟气营两畅，冀得松机。

鲜生地 绞去汁，用姜汁拌炒 丹参 广郁金 炒归身 白薇 青蒿 苏子 前胡 桑白皮 紫菀茸 冬瓜皮 括萎皮 广陈皮 益母草

时。时邪从产后而发，瘀阻腹痛，气窒热蕴。迁延半月，阴液更伤。脉来数疾，舌色光红，中苔灰黄。病势已深，正气恐不能支。姑与疏瘀导热，清透伏邪之法。

归尾 桃仁 青蒿 白薇 山楂炭 延胡 醋炒 枳实 杏仁
括萎皮仁 泽佩兰 丹参 鲜生地 姜汁炒 益母草

洪。小产后发热，恶露即止，少腹即觉块痛，小溲即涩痛不爽，渐至大腹胀满。两月余来，寒热不解。此伏邪与瘀血为伍，蒸蕴化热，瘀阻气窒，不得透达。惟脉虚数不能鼓指，头汗津津，色萎神枯，正气有不安之虑。正虚邪实，恐难挽救。姑拟清托伏邪为主，疏瘀畅气佐之，冀得转机为佳。

鲜生地 豆豉打 丹皮 赤苓 当归 郁金 元明粉 山楂炭
丹参 泽兰叶 琥珀 益母草

李。产后冒风，引动伏邪。壮热有汗不解，咳促痰多，近旬不退。其少腹块痛，引及左胯，乃瘀血阻于经络，与热邪并结不化所致。舌质干绛，苔色灰浊。脉形数急，左部尤浮。营热燔灼，急须清化。拟

用肃肺清营，疏瘀化热之法。

鲜生地 生姜打烂，再同生地打和至渐黑色 丹皮炒 白薇
牛膝 红花煎汁炒 归尾 延胡 鲜南沙参 桑白皮 蛤壳 橘络
丝瓜络 益母草

另：炙乳香去净油 炙甲片 西血珀屑水飞头为末冲

二诊：前方去末药三味，加旋复花、瓜蒌皮、枳实。

《柳宝诒医案》

余听鸿

昭文幕友张彼州之妻，生产正在酷暑。新产两朝，猝然神昏颠倒，言语错乱。余诊之，见喘息气粗，脉洪数极大，汗出如珠，口渴烦躁。余曰：此乃热于里，逼阴外出而大汗，仲景白虎证也。即将席置地上，令产妇卧于地，用盆置井水于旁，使其安卧片时，神识渐清，气亦渐平，脉亦稍静。即拟仲景白虎合竹皮、竹叶之意，进以石膏、竹茹、竹叶、知母、白薇、鲜石斛、益元散、绿豆衣、丹皮、花粉、青荷叶、西瓜翠衣、甘蔗汁，大甘寒之品。服后至晡，神清热减。仍令其移卧于床，进以稀粥，仍以甘凉之剂调理而愈。若拘于产后不可见风，不得服药，此症岂能挽。琴地风俗，新产之后，往往窗户密闭，帷幕重遮，酷暑不异严寒。以致产汗多伤阴，而变为郁冒痉厥者，或竟有触秽中热而死者，不亦大异哉。

《余听鸿医案》

张锡纯

天津李氏妇，年二十七岁，于中秋节后得瘟病。

病因：产后六日，更衣入厕，受风。

证候：自厕返后，觉周身发冷，更数小时，冷已又复发热，自用生姜、红糖煎汤乘热饮之，周身得汗稍愈，至汗解而其热如故。迁延两日热益盛，心中烦躁作渴。急延余为诊视，见其满面火色，且微

喘，诊其脉象洪实，右部尤甚，一分钟九十三至。舌苔满布白而微黄，大便自病后未行。

诊断：此乃产后阴虚生内热，略为外感拘束而即成温病也。其心中烦躁而渴者，因产后肾阴虚损，不能上达舌本，且不能与心火相济也。其微喘者，因肾虚不能纳气也。其舌苔白而微黄者，热已入阳明之府也。其脉洪实兼数者，此阳明府热已实，又有阴虚之象也。宜治以白虎加入参汤更为变通之，方于产后无碍。

处方：生石膏三两，捣细 野台参四钱 玄参一两 生怀山药八钱 甘草三钱

共煎汤三盅，分三次温饮下。

方解：按此方即白虎加入参汤，以玄参代知母，生山药代粳米也。伤寒书中用白虎汤之定例，汗吐下后加入参，以其虚也；渴者加入参，以其津液不上潮也，至产后则虚之尤虚，且又作渴，其宜加入参明矣。至以玄参代知母者，因玄参《神农本草经》原谓其治产乳余疾也。以生山药代粳米者，因山药之甘平既能代粳米和胃，而其所含多量之蛋白质，更能补益产后者之虚也。如此变通，其方虽在产后用之，可毫无妨碍，况石膏《神农本草经》原谓其微寒，且明载其主产乳乎。

复诊：服药一剂，热退强半，喘皆愈。脉象已近和平，大便犹未通下。宜大滋真阴以退其余热，而复少加补气之药佐之。诚以气旺则血易生，即真阴易复也。

处方：玄参二钱 野台参五钱

共煎汤两盅，分两次温饮下。

效果：将药煎服两剂，大便通下，病遂全愈。

《医学衷中参西录》

巢清芳

陈祥林妻，气血素虚，骨肉傭小，值大产未旬日，寒热如疟，来

时战震，床帐为之动摇，溽暑之际，彼夫意为无救。经渭以青蒿、腹皮、草果、秦艽、法夏、橘红、益元散、知母、六曲、霍石斛、荷叶，数剂而痊。

《巢渭芳医话》

陈莲舫

嘉兴，某。产后虚起，因营卫偏胜，乍寒乍热，腰痛，头眩，脉息细弦，虚多邪少，治以和养。

吉林须 白蒺藜 川石斛 黑料豆 宋半夏 生谷牙 黑归身 潼蒺藜 大丹参 川杜仲 广陈皮 荷边

《莲舫秘旨》

何长治

右。产后感受寒邪，湿郁。形寒，汗泄颇多，下体畏寒，头晕且热，手足麻木；心烦神蒙，近加悸惕呃逆，舌红渴喜热饮，腹胀脘闷，白痞与红疹并布，小便赤，脉来软数。此产后阴亏，阴独台下，阳独治上，二气不和；汗多，心阳上越，有亡阳之象；惊恐不寐，少谷胃气不和。久病气阴两虚，邪未尽化。宗仲景交阴阳、和上下法，佐以安神敛液，不致聚劫虚脱。

姜汗炒川连三分 人参一钱，另煎 酒炒白芍钱半 桂枝五分
枳实三分 淡芩钱半 酸枣仁三钱 炙草五分 干姜四分

二诊：产后感冒，形寒身热，有两月余，曾布疹痞，气分之邪已有暗泄之机矣。而阴阳二气不和，阳气独升，头重面浮；阴独下治，足肿而冷；寒热仍有往来，久寒久热，营卫气偏，汗多心宕；阴伤，时有火升，神蒙；脘痞腹胀，艰寐，带下，八脉自虚。难经云：阳维为病苦寒热，邪与湿热杂处中焦，蕴蒸不化，病情虚实互参，正虚邪恋，淹缠变端。仍以两和阴阳，佐以承阴。

姜汁二分 炒黄连四分 鳖血拌柴胡一钱同炒 黄芩钱半

朱砂拌茯神三钱 石决明一两，生拌 白芍五分 炒桂枝四分
枳实五分，同人参一钱，另煎 醋煨紫贝齿三钱 川贝母三钱，勿研
淮小麦三钱 炒丹皮钱半 炙甘草四分 细生地四钱
加枇杷叶露二两，冲入 野蔷薇露二两，冲入

三诊：产后寒热久延，营卫不和，背寒肢冷且热，汗泄而解，如作疟状；此温邪挟湿，蕴于阳明；艰寐，胸闷得谷腹胀；冲脉隶于阳明，阳明湿热下流，而为带下，且溺浊而少；日晡火升，头重足冷，心宕乃汗多伤阴，营阴内耗，阴不涵阳，阳气上冒。踵前法，俾阴交而阳和，上下病情略减，湿热未清，久虚不能即复，庶寒热止而阴气稍能渐复也。也前法增损之。

桂枝三分 盐水同炒川连三分 生鳖甲四钱 秫米三钱，绢包
煨龙齿三钱 枳实四分 同人参一钱，另煎 细生地四钱
姜制半夏钱半 朱茯神三钱 福建泽泻钱半 淮小麦三钱 白芍钱半
炒甘草五分 鳖血拌柴胡一钱 同炒黄芩钱半 加生姜四分
红皮枣三枚 野蔷薇露一两，冲入

右。去年久病，兼产后，正阴皆虚；复感温邪积湿。寒热脘痛，布疹，继发白痞，胸闷头胀；舌白灰而且干，渴喜热饮，齿燥谵语，脉数浮，便溏溺少。湿热之邪，内蒸伤津，阴气久为病魔所耗，风阳借此暗动，肢搐；邪袭气分，渐欲逆传，有昏闭劫津之险。且以苦辛宣通，佐以承阴。

川连三分 豆豉钱半 山栀钱半 连翘三钱 茯苓三钱
川朴八分 生地三钱 藿石斛三钱，另煎 郁金钱半 嫩勾勾三钱
杏仁三钱 加桑枝五钱

二诊：产后正阴两虚，温邪湿热交蒸。布痞，劫津风动，舌黑，津液未回，齿燥，神疲谵语，耳聋，昨曾厥逆，战汗热解，尚未了了，脉弦迟软。此邪退正虚之脉，胃津阴液已虚。拟宣泄中佐以扶正。

川连五分 人参一钱，另煎 鲜斛四钱 瓜蒌三钱 杏仁三钱
生地四钱 郁金三钱 茯神三钱 连翘三钱 加姜二片

枇杷叶露一两，冲 野蔷薇露一两，冲

右。营虚骨热，致偏产后腰骨酸楚，脉细数。当从柔养。忌生冷，少食为要。

生芪钱半 首乌二钱 地骨皮钱半 怀牛膝三钱 茯苓三钱
生草四分 归身钱半 秦艽钱半 鳖甲三钱 焦白芍钱半 远志钱半
炒青皮钱半 加佛手柑八分 白蔻壳六分

右。产后失血过多，肢节骱俱酸痛，骨热难眠，头疼，近发痰嗽，脉数失调。宜养阴和络，调复非易也。

生芪 秦艽 紫苑 生甘草 制冬术 牛膝 玉竹 陈皮
归身 生蛤壳 生山梔 冬瓜子 丝瓜络 桑枝

右。偏产后瘀滞大下，畏寒，手足酸麻，舌干口燥，脉细数无力。因去血过多，浮火上炽，调理非易也。暂拟和营清热一法。

生芪 归尾 丹参 炒丹皮 白芍 牛膝 远志 木香 炒
黄芩 炮姜 陈皮 炙甘草 藕节 姜汁炒竹茹

《何鸿舫医案》

沈明生

袁令默令爱，素禀不足，分娩后，体倦，发热，医者以其弱龄瘦质，且遵丹溪产后当大补之法，遂以参、芪进之，病益其。延师诊之，师曰：脉浮而涩，此不惟有余血，且有风寒在内。夫瘀血未尽，外邪初感，均有用参之诫，是以补之无功耳。遂正前方，而用解表散瘀之药。三、四剂后热除胸爽，然倦怠如故。师曰：参、芪之用，此其时矣，乃令默惩咽废食，因循而弗敢与。越四、五日，忽舌暗不语，举室惶惶，别延三、四医视之，询知前有用参之误，绝意不及补。或以为神虚而用茯神、枣仁之属，不效也；或以为痰滞而用南半、姜、橘之属，不效也；或作火治而用芩、连亦弗效也。于是复恳之师，师察其神情，虽不能语，然每对食物辄，注目以视，得食则神稍旺，更衣则神即疲，且脉空而大。因谓令默曰：《灵枢》云脾之脉，连舌本散舌下。

心之别脉，系舌本。今下上两虚，医药杂乱。经又云：言而微，终日乃复言者，此夺气也。况经月不语乎，不唯用参且应用附矣。遂一力任之，令默尚狐疑。服五、六日，诸症悉愈矣。因是而知病机二字，诚先哲之格言也。夫此机者，间不容发，有昨宜用攻而今宜用补；且宜用热而夕宜用凉。亦唯视其机之所在，以法合病耳。故是症也，不用补之害，与骤用补之害同，失其机甚矣。医道之难也。

《鹤圃堂治验》

红杏村人

钱右，新产气血大亏，腠理疏豁，客邪易于侵袭，因而引动伏气，见症似疟，起伏靡常，头疼胸痞，少腹隐痛，兹交两候，身热不解，有汗不畅，疹未透显，脉濡数舌白不松。血舍空虚留瘀未尽，迁延转变势难逆料。

青蒿 鳖血 拌 黄芩 酒炒 葛根 归身 丹皮 楂炭 蒡 梔 郁金 淡竹

又覆：汗频通畅，疹亦透布，身热退淡，脉数渐减，邪已溃离募原，洵属佳征，第伏邪感发于产虚之体，邪虽外泄，正气内乏，此际用药殊非易易，设一味攻邪虑损元气，欲扶其正犹恐留邪，再四筹维，拟于清化泄邪之中少参养正之品庶为合理。

鲜沙参 玉竹 青蒿 白薇 丹皮 郁金 蒡 楂 翘 斛

《医案》

费承祖

江西曹瑞卿之夫人，分娩三日，即发热咳呛，脘痛口干。医用温散不效，改用补阴清热，热退半日，复热如前。因产后血虚，得补非不暂安，而邪热未能外泄，故热势复炽。医更用补阴益气，而热更壮，有汗不解，口渴引饮。延余诊之，脉浮弦滑数。此邪热伤津。生津泄邪，其热自退。

川石斛三钱 天花粉三钱 生甘草五分 黑山栀一钱五分
淡豆豉三钱 甜杏仁三钱 冬瓜子四钱 鲜芦根二两
连服二剂，热退渴止而痊。

《费绳甫医话医案》

吴鞠通

丁亥四月十二日，某氏，三十岁。产后感受风温，自汗身热，七、八日不解；现在脉沉数，邪陷下焦，癰疽，俗云产后惊风。与复脉法，但须先轻后重。

细生地四钱 麦冬不去心，四钱 大麻仁二钱 生白芍二钱
丹皮三钱 炙甘草一钱 生鳖甲打碎，五钱 阿胶二钱 煮三杯，分三次服。

十四日：产后阴虚，又感风温，身热；与复脉法身热已退，但脉仍数，虚未能复。仍宗前法而进之。

丹参三钱 大生地五钱 生牡蛎五钱 炒白芍三钱 生鳖甲五钱
麻仁三钱 麦冬不去心，三钱 炙甘草二钱 丹皮三钱 阿胶三钱
浓煎，三茶杯，分三次服。

辛卯七月二十七日，普氏，二十七岁。产前暑伤肺卫，身大热，三日而生产，后十五日热不解，并前三日，已十八日矣。逆传心包，神呆癰疽，全入心营，大便结，六脉芤，虚症已深危。勉与邪少虚多之复脉汤法，兼以清上。

细生地五钱 元参四钱 茶菊花三钱 焦白芍三钱
麦冬不去心，四钱 冬桑叶三钱 火麻仁四钱 丹皮三钱 炙甘草三钱
生鳖甲五钱 阿胶三钱 煮三杯，分三次服。外服牛黄清心丸一丸。

八月初九日：产后伏暑癰疽，与复脉法已愈，惟大便结，脉虚。不可以下，只有导法可行，汤药润津液为要。

元参一两 大生地五钱 阿胶五钱 麦冬不去心，五钱

生白芍三钱 麻仁五钱 煮三杯，分三次服。此方服三帖大便通。

十二日：产后阴虚。

大生地六钱 沙参三钱 大麻仁三钱 生阿胶三钱
麦冬不去心，四钱 炙甘草三钱 炙阿胶三钱 归身二钱 桂圆肉三钱
生白芍三钱 黄肉三钱 煮三杯，分三次服。

癸亥二月初四日，王氏，二十六岁。热虽重，而阴脉有余，非虚证也，乃伏暑为病，阳陷入阴之故，痰多咳嗽，胸痞不饥，忌柔药。

炙鳖甲五钱 茯苓皮三钱 干姜一钱 青蒿三钱 广郁金三钱
青皮一钱五分 半夏三钱 青橘叶三钱 生姜三片 广皮一钱五分
黄芩炭一钱五分 煮三杯，分三次服，

初六日：服刚药而寒反多，热反少，脉反缓而小，不渴，太阴湿重也。

茯苓连皮，五钱 茅术炭三钱 青蒿三钱 半夏五钱 广郁金二钱
广皮二钱 干姜三钱 黄芩炭一钱五分 生姜三钱 草果煨，一钱
煮三杯，分三次服。

初七日：脉缓舌苔重，便溏胸痞，色淡黄白，合而观之，为湿重脾寒之象。

半夏五钱 茯苓块五钱 薏仁五钱 杏仁二钱 生茅术三钱
炒黄芩二钱 槟榔一钱 煨草果五分 广皮二钱 干姜三钱
白蔻仁六分 煮三杯，分三次服。

初八日：诸症俱减，宜减其制。

茯苓三钱 淡干姜一钱五分 生茅术二钱 半夏三钱
黄芩炭一钱 槟榔八分 杏仁二钱 白蔻仁六分 广皮一钱 煮二杯，分二次服。

初十日：病退八、九，以养中焦为法。

半夏三钱 茯苓块五钱 薏仁五钱 杏仁三钱 炒于术二钱
莲子连皮，打碎，去心，三钱 广皮一钱五分 白蔻仁研，八分 煮三杯，分三次服。

十三日：产后阴伤，因有寒湿外感症，但见脉缓而阴脉有余之寒湿症，故忌柔用刚。兹湿症全愈，而阴虚脉洪数，阴脉不足之症现，则不得不退刚用柔，因时制宜，医贵乎活泼流动，神明变化，以求合乎道者此也，岂有一毫私意存乎其间哉！

大生地四钱 麦冬不去心，四钱 熟五味打碎，九粒 焦白芍六钱
生牡蛎四钱 炙甘草二钱 炙鳖甲三钱 煮三杯，分三次服。

《吴鞠通医案》

丁泽周

张右。产后两月，营阴未复，重感新邪，内停宿滞，肺胃为病，形寒身热，有汗不解，脘痞作痛，纳少泛恶，且又咳嗽，经行色紫，舌苔白腻，脉象左弦右濡。标邪正在鸱张，不能见虚投补，姑拟疏邪消滞，和中祛瘀，病去则虚自复。

炒黑荆芥一钱五分 清水豆卷四钱 赤茯苓三钱 金铃子二钱
光杏仁三钱 仙半夏一钱五分 延胡索一钱 嫩前胡一钱五分
象贝母三钱 枳实炭一钱 羌蔚子二钱 带壳砂仁八分
炒谷麦芽各三钱 佛手八分

二诊：形寒身热渐解，脘痞作痛，咳嗽则痛辄剧，纳少泛恶，小溲短赤，经行色紫，舌质红，苔薄腻，脉左弦右濡。产后营阴未复，外邪宿滞，挟肝气横逆，肺胃肃降失司。投剂合度，仍拟宣肺化痰，理所畅中。

嫩前胡一钱五分 赤茯苓三钱 川楝子二钱 象贝母三钱
仙半夏二钱 炒枳壳一钱 延胡索一钱 羌蔚子三钱
川郁金一钱五分 光杏仁三钱 春砂壳八分 绛通草八分
台乌药八分 炒谷麦芽各三钱

《丁甘仁医案》

郑叔渔 庄虞卿

刘式聪乃室，年逾四稔，体强，住西乡石牛。

病名：胃肠实热。

原因：初患温热，又复生产，邪热乘虚而陷入阳明，遂成实热之症。

症候：单热不寒，舌黑口渴，两耳无闻，腹痛胸满，大便旬余不解。

诊断：脉左手沉数，右手沉实。脉症合参，此手足阳明实热症也。口渴舌黑，邪火内焚者火极似水也。大便闭、耳无闻者，热蒸清窍也。夫胃气以下行为顺，今为邪热蕴结，失其下行之效用，遂至腹痛胸满，病已结热在里，非下夺决无生理，勿守丹溪产后以大补气血为主之诫，宜遵景岳产后有火，不得不清，有内伤停滞，不得不开通之训。俟下后病退，再服调补之剂。

疗法：急则治标，仿仲景治产后实热例，用大承气汤以夺其邪。下后，即用归、芍、地以养其血，元、麦、生草以滋其液，治分标本先后，庶无实实虚虚之弊。

处方：生绵纹三钱 芒硝钱半 川朴一钱 枳实一钱 水六杯，先煮枳、朴，后纳硝、黄，煮取三杯，分二次服，一剂知，即勿服。

又方：当归身三钱 大生地四钱 生白芍三钱 元参钱半 破麦冬三钱 生甘草八分

效果：一日大便利，耳能闻，舌黑退，胸腹舒，改服次方，旬余就痊。

廉按：辨症处方，殊有卓识，非精研金匱妇人方者不敢用。

—《全国名医验案类编》

胡瑞林

胡氏，年三十余岁，住陈阊。

病名：产后血虚风乘。

原因：产后血虚风乘，瘀凝不去。

症候：产后五六日，头痛发热无汗，语言失常，心神昏愦，如见鬼状。

诊断：诊脉浮细，舌无苔，此欲作风痉也。心主血，产后血去则脉管缩小，气管放松，而风得乘气管之松，居膜腠而不泻。其未至痉而强直挛曲者，邪未行于经络也。产妇瘀犹未净，风邪挟痰上迷心窍，故心神昏愦。肝主血而藏魂，心不生血，则肝亦不藏而魂无所附，游于目自见其魄，故如见鬼状。

疗法：以豆淋酒浸荆芥祛风为君，归芍生血活血、茯神枣仁宁心安神、远志菖蒲开心利窍为臣，泽兰、丹皮、丹参破血和血为佐，寄生祛风、天竺黄豁痰为使，加入炙草以和诸药。

处 方：荆芥穗二钱，大豆炒熟用酒淋之，以酒浸 大川芎一钱
熟枣仁二钱 泽兰叶一钱 石菖蒲八分 全当归 云茯神二钱
炙远志八分，去骨 桑寄生钱半 粉丹皮八分，酒炒 赤丹参钱半
炙甘草五分 天竺黄三分

次方：去天竺黄、大川芎、泽兰叶、粉丹皮、荆芥穗。

效果：二剂头痛发热止，神气清。再服次方四剂平复。

廉按：此症血虚生风，必略受外邪所致。况兼瘀血未净，方用祛风化瘀、活血宁神，可谓标本兼顾。

《全国名医验案类编》

严绍岐

张氏妇，年三十二岁，住鲍渚。

病名：产后温病。

原因：时交暮春，产后三日，自服生化汤，腹痛除而恶露行，伏温遂乘机外溃。

症候：一起即身灼热，汗自出，不恶寒，反恶热，咳嗽气逆，渴喜

凉饮。

诊断：脉右浮滑，左小数，舌红苔黄薄腻，据症参脉，此产后伏温，从血分转出气分也。前哲石顽老人虽云：凡遇胎前产后所患，不拘何病，总以胎产为本，以病为标，若产后当理血分，然亦当随机应变。余遂断之曰，此伏热症，虽在产后，亦当轻清透达为首要。

疗法：以桑、杏、甘、桔轻宣其肺为君，茅根、青箬清透其伏热为臣，生地、白薇凉其血为佐，赤芍、丹参通其血为使，遵内经急则治标之法。

处方：冬桑叶二钱 白桔梗一钱 光杏仁三钱 青箬叶三钱切寸
赤芍钱半 根生地四钱 生炙甘草各三分 东白薇三钱
苏丹参三钱 鲜茅根五钱去皮

效果：两剂即灼热咳逆大减，原方去桑、桔，加鲜斛、归身养胃和营，再进三剂，诸病殒尽却，胃能纳谷而痊。

廉按：胎前宜凉，产后宜温，虽皆熟在人口，然亦一偏之见，总要查悉原因，辨明症候为第一。前哲徐洄溪曰：近人有胎前宜凉之说，颇为近理。至于产后则阴血尽脱，孤阳独立，脏腑如焚，经脉如沸，故促景专以养血消瘀为主，而石膏、竹茹亦不禁用，余每遵之，无不立效。乃近人造为产后宜温之邪说，以姜、桂为主药。夫果阴阳俱脱，脉迟畏寒，血水淋漓，面青舌白，姜、桂亦有用时。乃血干火燥，炖现热症，亦用热药，则经枯脉绝，顷刻而毙，我见以百计。更有恶露未净，身热气塞，烦躁不寐，心烦腹痛，皆由败血为患，亦用姜、桂助其火而坚其瘀，重则即死，轻则变成蓐劳。造为此等邪说者，九死不足以蔽其辜。由此类推，凡胎前伏温，产后陡发，对症用药，另犀角、石膏，亦不必忌，何况其次，如此案之轻清透达乎。但方虽清稳，尚属伏温轻症之疗法，与张氏寿甫之滋阴清胃汤（元参两半、当归三钱、生白芍四钱 生甘草钱半，鲜茅根二钱），异曲同工。

《全国名医验案类编》

陈在山

赵氏，产后伤血发热，因过服柔剂，胃阳失其转运之机，不饥少食，延至月余，身体消瘦，在床九日，身不动转，气息微存，仅能以目视人，凝为妖邪所致，预有千斤犁铧镇压。余诊得六脉微沉而缓，并无性命之忧，用十全大补，一剂可以回生，次日服之，果然全愈。

《云深处医案》

傅松元

陆少梅者，镇洋县吏也，俗称房科。其媳产后因劳受寒，致畏寒身热，痹痛腹疼，恶露已止。及第十二日，少梅邀余诊。据云城中医生，群谓将成蓐劳，并出其所服之方相示，大抵用荆芥、防风、乌药、香附、查炭、泽兰等药。余诊其脉，轻取则浮弦，重按则紧细，断其为表里受寒之症。因告之曰：“前方虽平稳，无如病重药轻，久延必致蓐劳。当此正气未衰，急宜开发，不可留邪，惟恐或嫌药峻，奈何？”少梅请余毋顾忌。乃书生化汤重加炮姜、麻、桂，一剂退，二剂愈矣。

《医案摘奇》

魏长春

林善勤夫人，年二十九岁。民国二十二年七月二日诊。

病名：产后暑瘵。

原因：产后阴伤，感受暑热，病延已久，服药无效。

证候：寒热，咳嗽痰粘，气促鼻煽，衄血自汗，胃呆泄泻。

诊断：脉虚大，舌红干糙脱液。产后血虚阴亏，暑热伤气耗液，邪热炽盛，烁津化痰，病名暑瘵，重证也。

疗法：用生脉散清暑养液，葛根芩连汤清热止泻，加鲜荷叶清暑开气，早米养胃和中，石斛滋液润燥。

处方：西洋参一钱 原麦冬三钱 五味子一钱 川连八分

葛根三钱 黄芩二钱 炙甘草一钱 鲜石斛二钱 鲜荷叶一角
陈早米五钱

次诊：七月三日。泄泻已止，口干唇裂，身热未退，脉数，舌红中剥，边尖略润。手指颤震，液伤风动，用育阴潜阳法。

次方：生龟板三钱 生鳖甲五钱 生牡蛎六钱 生白芍三钱
炙甘草一钱 原麦冬三钱 鲜生地四钱 鲜石斛二钱 肺露一两冲
太子参钱半 鲜荷叶一角包 陈早米五钱

三诊：七月四日。泻止热减，口干引饮，舌红剥光滑，咳嗽痰粘，手指颤震，宜清肺育阴潜阳。

三方：桑白皮三钱 地骨皮三钱 杏仁三钱 炙甘草一钱
肺露一两冲 川贝二钱 鲜金钗三钱 鲜生地五钱 生白芍三钱
鲜荷叶一角包 陈早米五钱

四诊：七月七日。身热虽退，尚有虚潮，脉滑，舌光绛。口干，经停二月未行，耳窍失聪，咳嗽多痰，余热未尽。拟清肝肺二经。

四方：青蒿三钱 鳖甲五钱 地骨皮三钱 银柴胡二钱
川贝二钱 知母三钱 白芍五钱 炙甘草一钱 玄参五钱
桑白皮三钱 鲜荷梗一尺 瓜蒌皮二钱

效果：服后热退，病愈。

炳按：产后体虚，先伏暑邪。乘虚猝发，正虚无力御邪，惟待药力清暑，则旋退旋进，留恋不去，日久成为暑瘵。既成暑瘵，当作阴虚，治兼清暑热，时时救其津液，利其小便，一切消攻之味，皆须禁忌。

《慈溪魏氏医案类编初集》

沈绍九

陈某，产后发热恶寒，头晕汗多，口渴，眉棱骨痛，心悸，胸痞不思食，食则干呕，吐白沫，苔白厚，右脉弦紧，左脉微浮。此新感风寒，因产后八脉空虚，故宗丹溪产后当大补气血，即有杂证以未治

之之论。处方：

秦当归五钱 炒白芍五钱 川芎一钱 茯神三钱 煨生姜三钱
枣仁四钱 鲜藕二两 橘饼一两 天麻三钱 杜仲四钱 补骨脂四钱

再诊：仍寒热汗多，于前方加黄芪三钱，白术二钱，炮姜三钱，去川芎、天麻、煨生姜。连服二剂，寒热不作，汗止，惟脐周围微痛，加小茴一钱，炙草一钱，服后病除。

《沈绍九医话》

周镇

王大梅妻，庙巷内红巷。壬子六月下浣，产后寒热，胸闷不舒。某君照伏暑法，以梔、豉、青蒿、藿香、滑石、郁金、太乙丹之类，不应，来延诊。脉糊数，苔少，质红紫如猪肝色。因思病经兼旬，如系邪在气分，服前药则寒热自可清解。产后每有留瘀成热，邪在血分，当事别论。矧西说瘀热有子宫膜炎，藏体浊胀见有败血者。转用豆卷、六一散、泽兰、川芎、赤芍、连翘、姜汁炒生地、蒲黄、归尾、五灵脂、丹参、荷叶，舌之殷紫渐淡。复诊：增损前方。数剂后，寒热渐清。可见产后之热，有气分之邪，固宜宣泄；不应，即当转从别途着想，不可执一。

袁何元室人，伯渎港。戊午二月中旬诊：产后衰热，已经月余，头痛掌灼，足厥咽干。脉弦数，右盛左弱，舌光无苔。询知以前曾服治疟剂，未应。此产后血虚阳亢，五心灼热，瘧劳须防。予川石斛、大麦冬、白归身、杭白芍、白蒺藜、蔓荆子、丹皮、明天麻、青蒿梗、白薇、牡蛎、淮麦、生山药。另煎肝末。三剂。里热掌灼已减，头痛亦轻。脉之弦数者转静，舌尚觉灼。述知少腹有形，是产后蓄血未撤。再养阴潜阳，兼化营滞。石斛、蔓荆子、归身炭、白蒺藜、桑寄生、炙鳖甲、炒枣仁、赤白芍、生牡蛎、白薇、芡实、明天麻、冬虫夏草、獭肝、没药、琥珀。营滞渐化，里热循止。续予调理而瘳。

李阿泉之妻，住慧山张祠。向有劳热。庚申八月怀妊患伏暑，

九月初一日产女之后，热退。初三日食面，身热起伏，热炽神迷，渐加喘咳。初五日王医诊：产后寒热咳痰，少腹痛，风邪挟瘀在表及里，极难治之候也。丹参、半夏、橘红、五灵脂、蒲黄、楂炭、木通、竹茹、象贝母、前胡、赤苓、益母草汤煎。无参回生丹一粒。王复诊：加浮海石。初八日唐医诊：寒热，胸痞，呕恶，起伏之象，深防成产后肝症。前、杏、蒿、芍、半、郁、苓、神、藿、贝、归身、竹茹、橘皮、百合、枇杷叶。十二日又王诊：汗出统体，外邪解矣。气促痰多，肺热尚盛。右脉弦急，非产后所宜，候商。甜葶苈、桑皮、杏仁、浮海石、川贝母、苏子、兜铃、粉沙参、竹茹、青铅、玄精石、滑石、枇杷叶、沉香。至此王医告辞，十三日乃延余诊。产后恶露五日即停，身热甚炽，神迷呕恶，乳通复闭，咳嗽痰黄胶粘，气喘无片刻之停，鼻扇窍黑无涕，口渴引饮，汗多易泄，脘中按之作痛，腹坚，少腹亦痛。脉数滑，右搏动，舌苔黄腻。间有兼证否，述知曾因人货项恫吓，气忿动肝。产后气喘鼻扇，均为危候，矧阴虚之体乎。姑拟清热化痰，理气行瘀。恰交霜降，慎之。青蒿梗、紫菀、冬瓜子、川贝母、郁金、辰滑石、莪术、娑罗子、竹茹、玄胡、鬼箭羽、丹皮、泡射干、杏仁、枇杷叶、沙参、茅根。另血竭、没药、伽楠香、血珀、猴枣，研末服。十四日复诊：气喘略减，鼻扇窍黑无涕，身热未起，咳嗽痰浓，口渴，瘦赤如血，脘窒，右肋引痛，腿部亦痛，瘀滞不行，便秘不解。肺气窒痹，自汗喘逆，尚在险途。白薇、蒿梗、丹皮、金铃子、玄胡、冬甜瓜子、金沸草、沙参、麦冬、紫菀、甜杏、兜铃、通草、萎霜，另赭石、苏木、茅根、枇杷叶、青铅，先煎代水。另用川贝母、猴枣、龙涎、伽楠、血珀、雄精，取末，竹沥温热，调服。十六日诊：大便先通，气喘大平，鼻扇已定。恶露既行不多，自汗已少，腹痛已减，脘痛未止，咳频，右肋作痛，腿右滞痛，鼻燥未润，瘦色已淡，脉右尚数，左软。是余热留恋，瘀滞未畅，气阴交亏，尚恐转变外疡。白薇、蒿梗、丹参、沙参、麦冬、甜杏、瓜瓣、旋复、新绛、橘叶络、娑罗子、紫菀、萎皮、鬼箭羽。另白茅根、莱菔、青葱、梨肉、枇杷叶先煎。末药用川贝母、龙涎、没药、藏红花、血

珀，研细服。外治用莪术，归尾、炙乳没、甲片、血竭、鬼箭羽，研细，摊膏药三枚，一贴脐下，一贴右胁，一贴腿又骨痛处。廿二日诊：恶露已少，内热、口渴、咳嗽尚有三成，痰转稀薄，瘦色尚红，鼻煤减，有涕，右腿滞痛有形。瘀血入络，伏邪挟痰未撤，故右脉尚数，苔黄唇干。未宜大意，防成蓐劳。兜铃、桑皮、枯黄芩、黑山栀、冬甜瓜子、光甜杏仁、青蒿子、白薇、粉沙参、蛤粉、新绛、旋复、橘叶络、鬼箭羽、萎皮、象川贝母、茅苇茎。另血珀、没药、麝香、藏红花、麝虫，研末服。恶露又行，右腿滞痛已减，惟下午复热。原方加减，三剂而安。停药后冬令，余往慧山，邀诊。内热连绵，虚咳，无力起床。脉虚数，初按如沸，再按软如絮，有蓐劳之象。为拟清补方。以其畏药失于调补，辛酉春，余劝服丸方一料，补益而全愈。丸方附后：向有劳热，勉强早婚。去秋伏邪挟风温，热甚咳喘，产后瘀闭，鼻扇气促，当以感气、伏热、风邪三证兼化瘀着手。病退之后，劳热交节则甚，瘦则澄白，咳则早暮二作，肢寒无力，蓐劳堪虞。拟养脏阴，固卫气，滋奇经，理气郁，为丸长服。归身、白芍、生地、萸肉、冬虫夏草、白薇、萆薢、丹皮、山药、麦冬、珠儿参、男河车、五味子、牡蛎粉、獭肝、黄柏、蛤蚧、金铃子、龟鹿二仙膏，练轻蜜丸一料。服后，虚热、瘦白、咳嗽、肢寒均止。逾年又孕育，茁壮异常。

荣右。乡人。丁巳五月中，产后天时暴热，汗出甚多。第四朝竟自净浴后，开窗而卧者五小时，遂病寒热，肤灼，畏风、无汗，口腻。脉数，苔薄黄。询知本有红痞，迨外袭暑风，热甚，烦躁异常，瘀滞乳少。拟香薷、六一散、荆芥、蒲黄、楂炭、蚕沙、通草、王不留行、归尾、川芎、丝瓜络、红花、川郁金。一剂，汗微解，热退，逾时复起。去香薷、蒲黄、归、芎，加豆卷、佩兰、泽兰、薏仁。另磨服玉枢丹少许。烦躁呻吟即止，热即肃清，痞起而安。

《周小农医案》

翟竹亭

西门内王秦冉妇，二十余岁。五月临产，产后于院内取凉，至夜寒热交作，与疟相拟。某医以治疟方治之，二剂罔效。迎余往诊，诊得六脉沉滞，此系寒凝血滞之故。用生黄芪 15 克，羌活 10 克，炙甘草 10 克，党参 12 克，当归尾 15 克，赤芍 12 克，焦山楂 30 克，桃仁 18 克，玄胡 12 克，桂枝 12 克，干姜 10 克，五灵脂 10 克，生蒲黄 15 克，三棱 15 克，附子 10 克，穿山甲 6 克。共服二帖，病愈矣。

《湖岳村叟医案》

章成之

何女。产后一周后即有寒热，多作于午后，寒少热多，下白物如浊涕，此炎症之象。

春柴胡 6 克 酒黄芩 6 克 酒淋黑大豆 18 克 杭白芍 12 克
黑荆芥 6 克 毕澄茄 9 克 甘草梢 4.5 克 白薇 9 克
生侧柏叶 30 克，煎汤代水 粉草薤 9 克 象贝母 9 克
肉桂末 1.8 克，分二次吞

《章次公医案》

张汝伟

王右，年三十五，常熟。肝旺血热之体，易以受妊，二年一产，已生八胎，本年流产之后，调治虽愈，营分不足，近则头晕目眩，面色青晦而暗黄，加以心悸惊惕，得食即胀，彻夜不眠，亦已旬日。苔刺而上浮罩薄腻，脉沉细无力，下半身及血肢，冷面出粘汗，大便不通，概括病状，全属肝肾之阴亏，而脾胃之阳微，非经温运不可。

淡附片一钱 云茯神 补骨脂 蜜炙绵芪 土炒白芍 酸枣仁 炙远志 鬼箭羽各三钱 煅牡蛎一两 苍龙齿五钱，先煎
紫石英五钱 川桂枝四分 整朱砂五分

二诊：两进温运之法，夜眠颇安，心悸亦定，大便通而带溏。昨日忽见骨蒸战栗之象，汗出如珠，热度又高至四十度以上，而肌肤亦热，得食不胀，脉细如线，苔剥微痛，此断非外感之热，全系气阴气阳均伤，宗甘温退热之旨，用理中归脾法。

吉林人参一钱，另煎冲入 绵黄芪炒 土炒于术 圆囿白芍 云茯苓神 黑稻豆 生豆芽 沉香曲各三钱 细桂枝四分 干荷叶一张 煅牡蛎一两，先煎 生姜二片 红枣三个

三诊：阴结阳微，脾胃两亏之证，用人参理中归脾之法，热已退净，苔剥舌红均愈，无如阳不恋阴，阴不涵阳，汗出不敛，而卧仍少安，进一步加入真武滋肾之意。

吉林人参一钱，另煎冲 生淮药 菟丝子 补骨脂 巴戟天 制熟地 灵磁石四钱，同打 淡附块 土炒黄芪 大白芍 山萸肉 茯苓神各三钱 土炒于术二钱 炙甘草一钱 煅龙 齿 煅牡蛎各一两 龙眼肉三钱

本证始末：王氏，系大中华橡胶厂厂长黄伯勤君夫人。此证当第二诊时，已气息奄奄。黄君因热度高，请数人诊治，欲与表散之剂，经予力争，促其立即灌药，得能转危为安，调理半月，恢复如常。

方义说明：此证第一方之所以用温运之目标，在面色青晦，脉来沉细，下半身冷而出粘汗，所以温补之中，加一鬼箭羽，是治妇人瘀血结滞，兼解鬼毒，因病从小产后起，未免有积滞故也。整朱砂安神定魄，以上二味，是突出。第二方，主要在人参，因热度高，而脉细如丝，大便溏，得食不胀为目标，非大补，何以收敛既散之阳，甘温能治大热之说，即指此等症而言。第三方，阳虽渐回，阴无所附，故欲熟地、磁石、菟丝子、补骨脂等，配和参附芪术，使阴阳得能相涵相恋，而得以完全收效也。

《临症一得》

冉雪峰

河口黄姓妇女产后失调，兼患乳痈，自溃一次，昏厥竟日，嗣虽渐苏，每日午后二时及夜半二时，必潮热昏厥数小时，势急矣，延汉上名医某甲诊治，小效。胸乳环周起红块若疔，渐及肢背，甲以病杂且重，举予以代诊治。予曰：戴阳面赤，或为寒证兼有，唇焦舌枯，完全无津，断非寒证所有，其为热证原无疑义。体质素弱，又产后久病，其虚原无待言。但虚为另一问题，而此为实证，原有痈毒，新感旧邪二者兼有，邪实正虚，但脉沉无外出之机，必不能逆其势面从外解。邪既入营，侧重清营，凭脉辨证，凭证用药。拟方：鲜生地一两，白茅根、蒲公英各三钱，青蒿露、银花露各一两，犀角尖一钱（磨汁），没药一钱五分，丹皮三钱，方意清营解毒，活血透络熄风。或曰：产后不嫌太凉乎？予曰：产后不宜凉乃后人误解，其实产后阴虚，十九均宜凉润，况此病邪火燔炽，瞬有液涸痉厥趋势，沃焦救焚，犹惧弗及，何嫌其凉。服一剂略安，三剂得微汗，热减神清。减去生地十之四，热复炽，复加重，热又减。三日未大便，方中加火麻仁、郁李仁，兼用导大便坐药，下燥屎五、六枚，嗣下浊物甚多，热大退，神大清，食欲大佳。前方去生地、丹皮，加当归、芍药补血之品，热终不退尽，又略有眩冒状，乃去当归之苦温，仍加生地之凉润，热乃净，痈痊愈，痈口平复。善后调补，初用甘凉佐解毒，继用复脉去姜、桂加填精柔肝浓厚之剂，所用方药较汉上普通用药为重，而对此病则犹为轻剂。观治疗经过，前半减生地而热复炽，后半去生地而热不净，即其真义。

《冉雪峰医案》

产后汗症

薛立斋

一产妇，略闻音响，其汗如水而昏愤，诸药到口即呕，薛以为脾气虚败，用参附末为细丸，时噙三五粒，随液咽下，乃渐加至钱许，却服参附汤而安。

一产妇盗汗不止，遂致废寐，神思疲甚，口干引饮，薛谓血虚有热，用当归补血汤以代茶，又以当归六黄汤内黄、芩、连、柏炒黑，倍加人参、五味子，二剂而愈。

《续名医类案》

缪仲淳

于中甫夫人产后气喘，投以人参、苏木、麦冬各五钱，一剂愈。五日后忽自汗无间，昼夜闻响声，乃饮热茶汤，即汗遍体，投以人参、黄芪各五钱，加归身、生地，二剂不效，即令停药。金坛俗忌未弥月不得诊视，乃遍检方书，至《证治要诀》治汗门内有凡服固表药不效者，法当补心，汗者心之液也。洒然曰：是矣。病人素禀有火气，非不足也。产后阴血暴亡，故心无所养而病肝。亟以枣仁一两炒为君，生地、白芍、麦冬、五味、枸杞、牛膝、杜仲、归身、阿胶、牡蛎、龙眼肉，大剂与之，至三十二剂罔效。于惧曰：得无不起乎？或药应更改乎？曰：非也。前投参、芪不应而遽止之者，以参、芪为气分药，剂且大，其不应者必与症不合也。滋得其情，复何惑乎？盖阴血者难成易亏者也，不可责效旦夕。仍投前剂至四十二帖，忽得睡，汗渐收，睡愈熟，至四日夜醒而霍然，颜色逾常，血足则色华也。

琇谓：能于方中炒焦黄连三五分，则数剂可愈。

《续名医类案》

冯楚瞻

一产妇因头汗甚多，延诊，余无他苦，脉之虽洪而缓，曰：头过多诸症谓之亡阳，然产后阴气大虚，正喜其亡阳与阴齐等，此薛氏之论，可勿药而愈也。病家疑，另延一医，峻用参芪温补，遂暴注下泻，完谷不化，益认阳虚，重用参附炮姜，其泻愈甚，不数日其肉尽削，精神困顿。复延诊，六脉洪弦甚数，此真阴竭矣，何能挽救。盖产后头汗，乃阴虚虚火上蒸，孤阳上迫，津液不能闭藏，误作阳虚，重加温补，燥热之气，暴注下趋，而先完谷不化，乃火性急速不及变化而出也。重以温热焚灼，势必穷竭，尚何药之可救哉？

案中正喜亡阳与阴齐等，薛氏谓可勿药而愈，此正薛氏生平不能峻用养阴之缺处也。予常遇此症，以重剂生熟地、白芍、杞子、麦冬、枣仁，察其有火，则少加芩、连，不过二三剂愈矣。冯君论此症虽了了，而不与药，致病家属之庸手而败，亦守而未化之过也。

《续名医类案》

林佩琴

张氏。中年产育，旬日外鲜红下注，自汗身热，此阴虚阳无所附也。用十全大补汤去桂，加炮姜、小麦煎汤，二服汗收血止。是症血去则亡阴，汗多则亡阳，产后危症也。

吴氏。蓐损不复，寒热往来，自汗，咳呕吐沫，心悸耳鸣，脉虚数。经言：阳维为病苦寒热。阳失维护，奇脉已损，况中宫小镇，致咳呕悸眩，肝阳升逆，面色忽青忽赤，延为难治。惟大便未溏，肾关未撤，尚堪借箸。拟晨服黄芪建中汤，去姜，加参、苓、山药、橘白，卫外扶中。晚服熟地、杞子俱炒、牡蛎醋煨、枣仁、白芍、茯神、五味、莲子、小麦煎服，摄阴敛阳。症减，背时凛寒，晨服方中再加鹿角胶，外以白胡椒末掺布膏药贴背脊第三椎至第七节，仍照前分早晚各服

五七剂乃安。

《类证治裁》

李铎

熊氏妇，产后气虚生寒，血虚发热之证。医用香苏、小柴胡诸法，以致大汗如洗，衣被尽透，为害非轻，所喜脉无躁扰，阳欲外越而尚不越，亟宜养营敛阳，勿杂他岐。

当归 党参 黄芪_炙 于白术 龙骨 牡蛎 枣仁 五味
白芍 甘草

又 服养营法寒热已轻，汗亦稍息，已属有效。因停药，又复大汗淋漓，产后藩篱不固，非藉药饵以资之，鲜不僨事矣。兹议十全大补减辛加酸，以酸能收敛止汗也。

上党参 黄芪 五味 当归 白芍 茯神 熟地 枣仁 白
术 甘草 桂圆肉

又 发热自汗日久不已，势成蓐劳，自昨夜以来，腹中痠痛，宗仲景生姜当归羊肉汤。

黄芪_炙 人参 当归 肉桂 生姜 用羊肉一斤，煮汁去肉，人前药煎服，大效。

又 热退十七，痠痛顿除，惟汗出不止，本属气血两虚，与黄芪炒八钱，酒少白芍三钱，归身三钱，枣仁炒二钱，甘草炒一钱，小麦炒三钱，南枣肉、龙眼肉各三钱，煎服，二帖而安，真神效也。

产后气血两虚，误用表解，将必脱汗，治以十全、羊肉汤，理真法密。寿山

《医案偶存》

沈祖复

恒善堂祝某之室畏多男，用药料坠胎，产后大寒战栗，卧床振动，难过异常；寒后发厥，汗出如雨，脉伏日定，危在顷刻。请先生诊

治，谓曰：“此气血交乱，阴阳错杂，寒之不可，温之不能，用药棘手。”拟重用交加散加味，一剂而愈。

《医验随笔》

何长治

右。失血后又复胎产，阴伤及阳。形凛肌灼，盗汗，咳呛，火升，脉数。肺肾已伤，客邪上袭也。

生地三钱 鳖甲三钱 地骨皮钱半 丹皮钱半 蛤壳四钱
沙参三钱 川贝二钱 桂枝五分 炒白芍钱半 桑白皮三钱
加枇杷叶两片，去毛

（时希按）此以桂枝祛客邪，而以生地、鳖甲、地骨皮等治其虚烦，内外有别。复诊客邪去，则去桂枝而改银柴胡、淮小麦，加減之间，井然可取。

复诊：失血后胎产，阴伤及阳。灼热，盗汗，咳呛，胸闷。脉数。劳怯重候也。

沙参三钱 细生地三钱 鳖甲三钱 地骨皮钱半 川贝母二钱
山药三钱 蛤壳三钱 炙草四分 淮小麦钱半 银柴胡一钱

右。产后大小便血，汗出过多，腹膨作胀，气下坠，心跳殊甚；脉左细数无力。营液大亏。拟养营参以理气法，未知合否。

归身 生地 川芎 丹参 木香 山楂 白芍 泽兰 桃仁
炒小茴香 煨姜 炒车前

《何鸿舫医案》

曹南笙

某右。产后骤脱，参附急救是挽阳固气方法，但损在阴分，其头痛汗出烦渴，乃阳气上冒，开泄则伤阳，辛热则伤阴，俱非新产郁冒之治，仿仲景意立方。

生左牡蛎 生地 上阿胶 炒黑楂肉 茺蔚子

某右。初诊：新产阴气下泄，阳气上冒，日晡至戌亥，阳明胃衰，厥阴肝横，肝血无藏，气冲扰膈，致心下格拒，气干膈中，神乱昏谵，若恶露冲心则死，回生丹咸苦直达下焦血分，用过不应，谅非瘀痹。初由汗淋发热，凡外感风邪，邪滞汗解，此热昏乱，即仲景所谓新产郁冒也。倘失治必四肢牵掣如惊似风痼则危，议从亡阳汗出谵语例用救逆法。

生龙骨 桂枝 生牡蛎 淮小麦 炙甘草 南枣

二诊：气从涌泉、小腹中直冲胸臆，而心下痛、巅晕、神迷，此肝肾内怯无以收纳自固，每假寐必魂魄飞越，惊恐畏惧，救逆法镇阳颇应，但稍补虚宁神、益之固之耳。

人参 龙齿 枣仁 茯神 炒黑杞子 黑壳建莲
紫石英一两，捣碎先煎代水。

三诊：两法皆效，下元虚损无疑，八脉无气把握，带下淋漓不止、梦魂跌仆，正经有下虚则梦坠也，议镇固奇脉方。

人参 龙齿 枣仁 茯神 桑螵蛸 炒黑 远志 紫石英煎汤代水

《吴门曹氏三代医验集》

丁泽周

朱右。产后未滿百日，虚寒虚热，早轻暮重，已有匝月，纳少便溏，形瘦色萎，且有咳嗽，自汗盗汗，脉濡滑无力，舌苔淡白。此卫虚失于外护，营虚失于内守，脾弱土不生金，虚阳逼津液而外泄也，蓐劳渐著，恐难完璧。姑拟黄芪建中汤合二加龙骨汤加味。

清炙黄芪三钱 炒白芍二钱 清炙甘草六分 川桂枝五分
牡蛎四钱 花龙骨三钱 米炒於术三钱 云茯苓三钱 炒淮药三钱
炒川贝二钱 浮小麦四钱 熟附片八分

二诊：前投黄芪建中二加龙骨，寒热较轻，自汗盗汗亦减，虽属佳境，无如昔日所服之剂，滋阴太过，中土受戕，清气不升，大便溏

薄，纳少色萎，腹痛隐隐。左脉细弱，右脉濡迟，阳陷入阴，命火式微。脉诀云：阳陷入阴精血弱，白头犹可少年悉。殊可虑也，再守原方加入益火生土之品，冀望中土强健，大便结实为要着。

清炙黄芪三钱 炒白芍一钱五分 清炙草六分 熟附片八分
牡蛎三钱 花龙骨三钱 炒淮药三钱 米炒於术三钱 云苓三钱
大砂仁研，六分 炒补骨脂一钱五分 煨益智一钱五分 浮小麦四钱

三诊：寒热轻，虚汗减，便溏亦有结意，而咳嗽痰多，纳谷衰少，形瘦色萎，舌光无苔，脉来濡细，幸无数象。脾弱土不生金，肺虚灌溉无权，仍拟建立中气，培补脾土，能得谷食加增，不生枝节，庶可转危为安。

炒潞党参三钱 清炙黄芪二钱 炒白芍一钱五分 清炙草六分
熟附片八分 左牡蛎四钱 花龙骨三钱 米炒於术三钱 炒淮药三钱
炒川贝二钱 大砂仁研，五分 陈广皮一钱 浮小麦四钱 红枣五枚

《丁甘仁医案》

魏长春

冯大钧君，夫人胡氏，年三十二岁。民国十七年九月一日诊。

病名：产后寒热脱证。

原因：怀孕九月，于上月三日，病寒热往来无汗，五日分娩一女，恶露甚少，医治二十余日，服药数剂，及生化汤、回生丹等，其病有加无已。

证候：形萎神疲，独语郑声，寒热多汗多痰，呕吐胃呆，腹痛便溏不爽。

诊断：脉象虚数，舌淡红润，苔灰。产前湿邪蕴伏，寒热类症，既产邪陷腹痛，大便溏泻。病久真虚，情形复杂，有邪陷真脱之虞。

疗法：拟龙牡救逆汤加减，先补真元，继进祛邪。宗仲祖先温其里，后攻其表之意也。

处方：化龙骨四钱 煅牡蛎四钱 桂枝一钱 炙甘草一钱

朱茯神四钱 西琥珀八分研冲 当归三钱 焦白芍炭三钱 炮姜一钱
(炳按)不宜再温,炮姜可易炒麦冬三钱。

次诊:九月二日。服药后,便泻五次不爽,腹痛,潮热多汗,口渴
呕逆,神虚,独语郑声。脉数,舌红润,苔黄白腻。湿邪下陷,视其舌
苔,较昨增厚,尚非全虚证也。拟钱氏白术散合左金丸,藉葛根藿
香,升提陷邪;木香左金丸,调和肝脾,以止其痛;参术苓草,和中健
脾,以止其泻。

次方:葛根三钱 杜霍香一钱 广木香一钱 西党参三钱
炒于术四钱 辰茯神四钱 炙甘草一钱 左金丸一钱吞

三诊:九月三日。服后痛差,泻减呕止,口淡而粘,汗敛痰多,独
语未已,恶露稍行即停。脉象缓大,舌淡红润,苔黄白腻。拟香砂六
君汤加味。

三方:广木香八分 阳春砂五分 西党参三钱 白术三钱
辰茯神四钱 炙甘草一钱 橘皮一钱 制半夏一钱 竹茹三钱
川贝一钱五分 丹参三钱 左金丸一钱吞

四诊:九月四日。痛泻皆止,咯痰黄色胶粘,谵语,口淡,潮热未
尽,脉滑,舌红苔薄黄。凡虚实互格之证,在邪实之时,则驱祛之中,
必当先扶正气,以防其脱。盖邪之与正,势不两立,一胜则一负也。
若邪已退,建立中枢,防其遗邪为患,再用清理,以逐余邪,此用定
法也。今仿沈尧封六神汤加味,清痰火而消瘀热,即以撤逐余邪也。

四方:橘红一钱 制半夏二钱 辰茯神四钱 旋复花三钱包煎
益元散四钱 竹茹三钱 丹皮二钱 益母草三钱 钩藤三钱
生姜汁一小匙冲 万氏牛黄清心丸一粒去壳研冲

五诊:九月五日。神识清朗,谵语得止,二便通调。惟口气秽臭,
咯痰胶粘,头汗,潮热未尽。脉象缓大,舌红润苔薄黄。拟和中化痰
清肺,旋复代赭合黄芩汤加减。

五方:旋复花三钱包煎 代赭石八钱 西党参三钱 炙甘草一钱
制半夏三钱 生姜汁一小匙冲 黄芩三钱 生白芍四钱

辰茯神四钱 竹茹三钱 天花粉四钱

六诊：九月七日。脉缓，舌红润，苔黄。潮热未尽，咯痰胶粘，胃呆不纳。拟归芍六君汤加化痰之品。

六方：当归三钱 白芍三钱 西党参二钱 冬术三钱
朱茯神四钱 炙甘草一钱 橘红一钱 制半夏三钱 竹茹三钱
紫苑三钱 米仁八钱 旋复花三钱包煎

七诊：九月九日。痰薄汗止，潮热未退，时欲泛呕。脉软缓，舌红苔薄黄。少阳厥阴余邪逗留，用和解法。

七方：柴胡一钱 黄芩二钱 西党参二钱 炙甘草一钱
制半夏三钱 生姜一钱 茯苓四钱 当归三钱 炙鳖甲八钱
乌梅一钱 天花粉四钱

八诊：九月十一日。湿化热退，寐安胃苏，肝胃未和，微有胸闷。脉象软缓，舌淡苔薄。拟温胆汤加味和之。

八方：杜藿香一钱 阳春砂三分冲 陈皮一钱 竹茹三钱
制半夏三钱 茯神四钱 焦甘草一钱 枳实一钱 远志二钱
佛手一钱 谷芽四钱 麦芽四钱

效果：服药二剂，胸畅胃强，静养半月复原。

炳按：产后正虚寒热脱证，虚实互格，变化无穷，随证设治，在于临机活变。

《慈溪魏氏验案类编初集》

周镇

孙廷芬室，小瀛。己未三月诊：产后数旬，轰热盗汗，胃纳不充，食入脘阻，头晕肢麻。血虚木旺，阳乘于阴也。为拟柏子仁、淮小麦、枣仁、茯苓、白芍、牡蛎、沙苑、南烛子、桑寄生、鲜首乌、秦艽、香椽皮、鸡内金、红枣。复诊：诸恙均减。用生地、萸肉、茯苓、山药、白芍、白薇、地骨皮用桂枝汤炒、龙骨、牡蛎、生黄芪、枣仁、淮小麦、香椽

皮、红枣，数剂即健。

《周小农医案》

陆正斋

王某某 女 24 岁

产后失调，自汗畏风，时感发热，腹胀便溏，时或泛恶，舌淡苔薄白润，脉濡细。营卫两虚，气湿互阻，法当兼顾。

桂枝 3 克 白芍 7.5 克 当归 7.5 克 广皮 3 克 清水半夏 4.5 克
白茯苓 6 克 炙甘草 2.5 克 煨姜一片 红枣二枚

《陆正斋医疗经验》

俞子容

一妇，新产后七日为将息失宜，腠理不密，因风寒所侵，身热头痛，两眼反视，手足瘈瘲，名曰蓐风。用荆芥穗一味，新瓦上焙干，为细末，豆淋酒调下二钱，其疾即愈。古人珍秘此方，隐括其名，故曰举乡占拜散，盖用韵之切语，举乡为荆，古拜为芥。会公谈家翁之自生丹，亦神之也。

《名医类案》

薛立斋

一产妇腰痛，腹胀善噫，诸药皆呕，薛以为脾虚血弱，用白术味炒黄，每剂一两，米泔浸，时饮匙许，四剂渐安，服百余剂而愈。

一产妇因怒两胁胀痛，吐血甚多，发热恶寒，胸胁胀痛，此气血俱虚，用八珍汤加柴胡、丹皮、炮姜而血顿止，又用十全大补汤而寒热渐退。此病苟非用姜、桂辛温助脾肺以行药势，不惟无以施其功，而反补其胀耳。

王时享室产后腰间肿痛，两胁尤甚，此由瘀血滞于经络而然也。不早治，必作骨疽。遂与桃仁汤，二剂稍愈，更以没药丸药剂而

痊。亦有恶血未尽，脐腹刺痛，或流注于四肢，或注股内，疼痛如锥，或两股肿痛，此由冷热不调，或思虑动肾，气所拥遏，血畜经络而然，宜没药丸治之。亦有经血不行而肿痛者，宜当归丸治之。凡恶血停滞，为患虽轻，治之稍缓，则流注而为疔毒，多致不救。

《续名医类案》

薛立斋

一产妇头痛，日用补中益气汤不缺，已三年矣。稍劳则恶寒内热，为阳气虚，以前汤加附子一钱，数剂遂不发。

一妇人产后头痛，面青二年矣，日服四物等药，薛谓肾水不能生肝木而血虚，用六味丸加五味子，两月而痊。

《续名医类案》

薛立斋

一产妇勤于女工，忽仆地，牙关紧急，痰喘气粗，四肢不遂，此气血虚而发痉，朝用补中益气汤加茯苓、半夏，夕用八珍加半夏，各三十余剂，不应，此气血之未复，药之未及也。仍用前二汤，又五十余剂寻愈。

一妇产后恶寒发热，他治以小柴胡汤，致汗出谵语，烦热作渴，四肢抽搐，用十全大补汤，二剂益甚，其脉洪大，重按则无，此药力未及也，遂加附子，服四剂愈。

一产妇筋挛臂软，肌肉掣动，此气血俱虚，而自热也。用大全大补汤而安。

一产妇因劳两臂不能屈，服苏合香丸，肢体软痿，汗出如水，薛谓前药辛香，耗散真气，腠理虚而津液妄泄也。先用十全大补汤加五味子，补实腠理，收敛真气，汗顿止。又佐以四君子，调补元气渐愈。用逍遥散、大补汤，调理而痊。

一产妇先胸胁乳胀痛，痛后因怒口噤吐痰，臂不能伸，小便自

遗，左三部脉弦，此肝经血虚，而风火所致不能养筋，先用加味逍遥散治之，臂能屈伸，又以补肝散、六味丸，诸症悉愈。

一产妇患儿枕腹痛，或用驱逐之剂，昏愤口噤，手足发搐，此血气极之变症也。用八珍汤加炮姜二钱，四剂未应，又以十全大补汤加炮姜一钱，二剂而苏。

《续名医类案》

张三锡

一妇，月中著恼，素体厚多痰，臂病移走，两足且肿，以为虚，治服参归，痛益甚，恶心迷闷。作郁痰治，二陈、越鞠、秦艽、丹皮，二服稍减，大便四五日不去矣。投搜风丸，后用化痰舒气，二陈、二术、酒芩、柏、木通、泽泻、香附，调理而愈。

《续名医类案》

陆养愚

凌绛泉夫人，妊将七月，忽两足软痿，不能履地，分娩后顿愈。一月后仍作，且胸胁痛，夜分发热，或以四物入牛膝、木瓜、虎骨、鹿胶，或作或止。后以脾主四肢，与参、术，胀痛闷绝，仍用养血之品，无进退，经年余。诊之询其饮食如常，肌肉如故，足胫浮肿，胸胁揉按则微痛，否则痞闷，其脉沉缓而滑，此湿痰积于胸胁，流于四肢，故痛而软，宜乎滋阴不减，补气增剧也。用二陈汤加苍术、威灵仙、黄柏、白芥子，数剂痛定热除，加苡仁，十剂步履如故。

《续名医类案》

薛立斋

一产妇，身腹作痛，发热不食，烦躁不寐，盗汗胁痛，服解散祛血之药，不时昏愤，六脉洪大如无。用补中益气加炮姜、半夏，一剂顿退二三，又剂寐食甘美，但背强而痛，用八珍散、十全大补汤，调

理而安。

一产妇遍身头项作痛，恶寒拘急，脉浮紧，此风寒之症也。用五积散，一剂汗出而愈。但倦怠发热，此邪气去而真气虚也，用八珍汤调补而痊。

《续名医类案》

周慎斋

一妇产后受湿，遍身疼痛，众以风药治之，遂致卧床不起，手足渐细，此产后气血虚，而风药愈损气故也。治宜大补气血，用参芪各钱半，防己五分，煎服愈。（大还）

一产妇遍身痛，坐不得卧，已经二月，痰多食减，众治不效。以参、归各一两，木香一钱，为末，酒煎，分为几次服之，愈。

《续名医类案》

马元仪

卜氏妾产后胸中作痛，痛甚则迫切不能支，至欲求死，诸治不效，延至五月，病转危急。诊其脉两手弦涩少神，不能转侧，不得言语，曰：胸中者，阳气所治之部，今为阴邪所入，阴与阳搏，所以作痛。前医破气不应，转而和血，又转而温补，又转而镇逆，不知阴阳相结，补之则无益，攻之则愈结，若镇坠之益足以抑遏生阳，而阻滞邪气，惟交通一法，足尽开阳入阴通上彻下之妙，使阴归于下，阳治于上，太虚之府旷然，何胸痛之有哉！用人参三钱、肉桂一钱，合仲景黄连汤，一剂痛减二三，三剂顿释。次进加桂理中汤，数剂全愈。

按：是症即胸脾痹是也，故入痛痹门。

《续名医类案》

缪仲淳

王善长夫人产后腿疼不能行立久之，饮食不进，因惫之极。诊

之曰：此脾阴不足之候，脾主四肢，阴不足故病下体，身所饮药虽多，皆苦燥之剂，不能益阴。用石斛、木瓜、牛膝、白芍、枣仁为主，生地、枸杞、茯苓、黄柏为臣，甘草、车前为使，一剂辄效，四剂而起。

《续名医类案》

来天培

潘履端内，年约四旬，患头身手足麻木疼痛，步履艰难，发热胸满不食，脉之沉细而涩，曰：此属产后感风，不能节劳，致风入经络而成痛风之症也。询之果以前岁产后而起。以归身、红花养血，风藤、钩藤、秦艽通经络，黄芩、银花清火，羌活走百节，川芎理头痛，菖蒲利膈消满，甘草缓痛，姜皮达肌肤，通腠理，服二剂而头痛愈，腹胀减，惟发热身痛未除，更心神恍惚不寐，脉稍和，此表症稍退，里热未清，改用生地、归、芍、柴胡、地骨皮、续断、钩藤、夏曲、枳壳、枣仁、建莲，二剂而诸症痊，惟两膝内肿痛，扶杖而行，此风入三阴而将愈矣。前方减柴胡、地骨、夏曲、枳壳，加丹皮、赤芍、红花、威灵仙、风藤、防己、牛膝、五加皮、生甘草，又三四剂全愈。

《续名医类案》

薛立斋

一产妇，六月多汗，人倦不敢袒被，故汗出被里，冷则浸渍得风湿，身疼痛，遂以羌活续断汤，数服愈。（未选入）

《续名医类案》

郭右陶

单公廉内室产后六日，遍体疼痛，寒犹如疟，昏闷异常。延余，六脉时有歇指，阅左中指、右无名指，微带黑色，乃知兼痧之症。刺指上紫黑毒血七针，臂上毒血一针，舌底下紫黑毒血一针，昏闷疼痛稍缓。用独活、桃仁、苏木、香附、童便、姜黄、山楂，微温服二剂，

疼痛昏闷俱除。但寒热未缓，用金银花、丹参、益母草、艾叶、柴胡、独活、姜灰、牛膝、山楂，温服四剂，寒热乃瘳，调补月余而健。

《痧胀玉衡》

郑重光

程农长兄令媳，吴宅之女也。二月大产，天气尚寒，未满月便开窗梳洗，方满月便尔洗浴，因受风寒，次日头痛身疼，遍身筋惕，汗多而热不退，脉不浮而单弦。初诊便告病家此产后中风大病，不可轻视。用当归四逆汤；当归、赤芍、桂枝、细辛、茯苓、炮姜、甘草，姜枣为引，医治三月。因本气大虚，风邪不解，更头疼如破，筋惕肉瞤，汗出如浴，手足抽搐，时时昏厥，病甚危笃。余曰：“此产后气血大虚，风邪直入肝经，已现亡阳脱证，须急用人参固里，附子温经，使里气壮，逼邪外解。否则风邪入脏，必昏厥不语，手足逆冷，呕哕不食，不可治矣。”未几果哕，病家遂信予言，重用参附；加于当归四逆汤中，更加吴萸以治哕，间加天麻、半夏，兼治虚寒。如斯大剂，日服人参两许，附子六、七钱，半月后方渐次而回，再去细辛、吴萸，增芪、术，四十日方能起床。此证幸病家不吝人参而任医得专，故获收功也。

英德县令王公仆妇，年三十外，本山西人。夏月恣食瓜果，八月初旬，产后积冷在腹，五日后腹痛，先泻后痢，两关紧滑，用姜桂香砂胃苓汤四剂而愈，两三日，因前寒未解喉痛，又开窗取凉，复受寒邪，以致头疼发热，身痛脉浮紧，用芎苏饮微汗而表解，热尚未除，继用桂枝葛根汤，二剂热即退。忽变为神昏不语，掐指剔牙，肠鸣下利，问病若聋，诊脉弦细无力，产后尚未满月，知属里虚，证类中风，用桂枝汤加白术、半夏、天麻、炮姜、附子二剂，五更后即能言。至未申即不语，坐卧如痴，能言时谓身痛腹疼，其渴饮茶汤，日夜两大壶，随即洞泻八九次，肠鸣不食，脉弦细紧，此为风邪直入肝经，乃厥阴之病。盖厥阴病本消渴，风邪不解，内搏为泻，身痛多汗，

脉不浮，断非表证，乃骨寒而痛也，且午后不语，定属阴邪，准作厥阴治法，不治洞泻，用当归、赤芍、细辛、附子、炮姜、人参、白术、茯苓、甘草，姜枣为引，服六剂，渴全止，夜得微汗，腹痛身疼即解，泻止能言。自立方付彼，令其照方撮药，服十余剂即痊愈。若用育神止泻，不察病名，岂不大误乎？余每见产后不语，不治者多矣。此北人胃气本厚，故合证之药，易于取效也。前程案乃寒中少阴寒水之脏，故终日不语，阴也。此证乃风中厥阴风木之脏，木中有火，午后方不语，非纯阴也，所以药亦阴阳对待，不似程案用纯阳药矣。

《素园医案》

王孟英

顾听泉明经之媳，新产后，头痛甚剧。孟英按脉，右甚滑大。与清阳明法，得大解而瘥。

施氏妇，产后四肢串痛，药治罔效。医谓其成瘫痪矣！延已逾月。丐孟英视之，膏药遍贴，呻吟不息，脉数而洪，舌绛大渴。曰：此非风湿为病，膏药亟为揭去。近日服药，凉皆温补祛风之剂。营血耗伤，内风欲动，势将弄假成真。且吾向见其体丰血旺，何以婉向遽患斯疾？必生化汤、砂糖酒之类所酿耳。其父倪某，目虽瞽，闻而笑曰：君诚神医也。小女服过生化汤两帖，赤砂糖八斤。从此渐病，不识尚可起废图全否？孟英曰：幸其体足於阴，恢复尚易，若阴虚血少之人而蹈此辙，虽不即死，难免不成痿痹。因投大剂凉润壮水之药，一剂知，旬日安，匝月起。

孟英谓：暑令，产妇服生化汤、砂糖、酒，死者甚多，唯六一散既清暑热，又行瘀血，溽暑之令，诚为产后妙方。

《王氏医案》

抱灵居士

瞿妇，产后三日，饱胀，胸痛，恶露净，半月无事。或临风感寒，

心胸大痛，肩背胀痛，恶风，抓床扒席，以灯火炙之，谵语。或为瘀血冲心，用楂核、干漆、桃仁、红花、蒲黄、五灵脂之类，反剧，作呕不食。予视脉浮迟微弦，此本风寒发痼疾，火逆谵语，破血伤正气也。以桂枝汤加荆、防、半、苓、泽兰一剂，呕涎痰，人事清；又以香苏散加泽兰、元胡、肉桂、半夏、荆芥、姜、枣一剂，呕止，調理而愈。

《李氏医案》

黄堂

冯，据述临产恶露大下，凉非尽属瘀积，而两胁胸腹板痛，不能转侧。虽寒热而得大汗，是无邪客可知，其气欲逆而热甚重者，古人有络虚则败血流滞，令人寒热也。拟仲圣通络法。

旋覆花 归须 桂枝 新绛 橘白 广郁金 延胡 楂炭
红曲

二诊：昨进辛香通络，痛减气平，最为佳处。但脉仍芤大，恶心粘腻。盖营虚则阳失其守，浊气易于犯胃，营卫两调法。

桂枝 炮姜炭 延胡 半夏曲 郁金 益智仁 当归 怀牛膝 新绛 料豆衣

《黄氏纪效新书》

杨毓斌

汪茂才毓芝尊闻，新产次日往贺。据称坐蓐时忍饿，去瘀甚涌，饮食不甘，头痛眩，多泪，眼眶微肿，当察其神色如常，起坐甚健，脉浮大滑实。心异之，知必有风湿浊邪，伏于产前，尚未发作，恐触忌讳，默为踌躇而已。嗣闻饮童便饮食加进。越四日来延，据称：头目痛甚，泪多，汗泄，眩晕，不饮食，脉滑实而大。此虽风湿上冒，卫阳不固；然实大之脉见于新产，强寇方张，未易直折，而伊家以正虚所致。请进补剂，勉拟龙骨、牡蛎、姜夏、茯神、阿胶、黄芪、炙草，而返继思，产前浊邪乘虚而发，其势必重，悬揣既久乃寐。次日往视，云

未服药前，渐次神昏语乱，引手抱头；服药后，安卧两时醒，大吐嘈杂，昏冒舌蹇语乱，自言神识若蒙。按脉较昨稍平弱，知浊邪勃发，正不能胜，吐伤胃肠，心神内扰。欲为化浊和胃镇心，见案头有王立功方，用旋复代赭汤加玉壶丸，问服否？曰：刚半服。因止之，曰：更请立功来参酌之，比晚证益笃。立功引陈继之前辈同至。予曰：此产前伏邪乘虚发，见不可泥定新产，众疑之，因立数品，候参订。一服，症减半。次日，复与立功合参一方，迎刃而解矣。

按：此证于未病之先切脉时，已了然于心，以素不为人诊，惧不见信。病机发，始假手以行我法，竟应手收效颇快。然甚矣，医贵有识、有胆，尤贵有权变易，视者乌知其难哉。

初方：龙骨 紫石英 姜半夏 熟枣仁 浮小麦 炙草 加榆炭、荷叶灰、血珀、大枣

次方：龙齿 紫石英 姜半夏 熟枣仁 煨木香 郁金 佩兰 茯神 茯苓 杏仁 煨生姜 荷叶炭

《治验论案》

张乃修

徐右。小溲畅利，腹胀满不舒，心背掣痛。阳气不能流畅，致阴气凝聚，内脏外膈皆阻。产后当此，险如朝露也。

大熟地四钱 老生姜二钱，与熟地同炒 制川乌四分
延胡索酒炒，二钱 炒蜀椒二分 川郁金一钱五分 全当归酒炒，二钱
单桃仁去皮尖，打三钱 熟附片四分 制香附二钱，研
人参回生丹一九，分二次服

二诊：心胸作痛已止，恶露亦得稍通，是分娩至今未有之事也。但腹胀如前，虽得稍稍宣通，还是单薪杯水，尚难恃为稳当。

炮乌头四分 酒炒蜀椒三分 大熟地四钱
老生姜二钱，与熟地同炒 炒全归二钱 川郁金三钱 熟附片四分
延胡索酒炒，二钱 川芎一钱 五灵脂酒炒，四钱 泽兰叶三钱

炒茺蔚子四钱 人参回生丹半九，药汁送下

《张聿青医案》

王旭高

范。产未满月操作，猝遇大雨淋身，水寒之气自毛窍而入于骨节，内舍于肾，外达太阳、阳明，是以始病腰疼，继而上攻头痛，遍体机关不利也。脉沉而寒热，寐少而恐惧，纳少而恶心，邪气留连于胃肾。据云头痛甚则汗出，太阳之表虚矣。用许学士法。

香豆豉 牛蒡子 豆卷 杜仲 磁石 藁本 白芷 川芎
金狗脊 赤苓 半夏 甘菊花

渊按：太阳表虚，风药未免太过，况得之产后乎！

又：前投益肾通经，和胃泄湿，头项腰脊之痛原有松机。今产后两月有余，经水适来，而心跳恐惧，是营气虚而不摄也。拟和营止痛，仍佐理胃泄湿。

党参 桂枝 秦艽 枣仁 杜仲 豆卷 半夏 赤苓 苡仁
金狗脊 归身 陈皮 桑枝酒炒

又：产后营虚，雨湿寒气袭人，经络机关不利。前投宣通养血两法，俱无少效。虽头痛略松，而右半之腿臂转增痛热。犹幸脾胃稍旺。今恶风、发热、口干、是寒湿渐化为热矣。拟疏泄湿热以通经络，再议。

羚羊角 丹参 防风 秦艽 苡仁 陈皮 羌活 丝瓜络
防己 当归 白芷 木通 桑枝 忍冬藤

《王旭高临证医案》

柳宝诒

杨。小产前，即觉少腹痠坠。产后痠痛，连及腰脊，形寒而热象不扬，脉情细数，不能鼓指。此由寒邪先伤经络，产后营气微弱，不能外托。于法当温营化邪，疏导络瘀。所嫌脘闷口甜，不饥少纳。暑

湿时感，着于中焦。有与温化之品相碍者，不得不兼顾及之。

桂枝 苏梗 佩泽兰叶 炒当归 乌药 制香附 丹参 广郁金 青蒿 橘红络 藿梗 益母草

《柳宝诒医案》

黄述宁

周妇人，产后月余感寒，头痛、身痛皆备，投以羌、独、芎、苏三服，除前症不解，反增呕吐，呃逆，错语神昏。细审之曰：“太阳病，服太阳药不效，必有故。”询床侧老嫗曰：“生养时去血过多乎？”曰“然。”“连日尚有血下乎？”曰：“从前已净，连日复下些许。”因立案云：汗因血夺，寒气无从泄越，非养血，则脉之涩弱者不活；非辛温，则血之凝泣者不流。因用羌、苏、陈、半、干姜、当归一服，汗如注而解。

《黄濬翁医案》

陈莲舫

庄。连次偏产，近有腹痛腰酸，寒热往来，脉息细弦，虚多邪少，拟和三阴而调八脉。

吉林须 抱茯神 炒归身 陈阿胶 川杜仲 焦艾绒 制香附 远志肉 生白芍 制丹参 沙苑子 新会皮 西砂仁

复方：奇经不固；由于三阴内亏，以致冲任不主摄胎，每每偏产。现在寒热已除，腹痛腰楚渐得减轻。再拟培阴。

西绵芪 陈阿胶 炒归身 沙苑子 川杜仲 新会皮 潞党胡 制香附 生白芍 菟丝子 桑寄生 阳砂仁

服十余剂后，将方五倍料晒燥磨末，不用火炒，炼蜜为丸。每日服二三钱不拘，卧时开水送下。

《莲舫秘旨》

丁泽周

马右。未产之前，已有痛风，今新产二十一天，肢节痹痛更甚，痛处浮肿，痛甚于夜，不能举动，形寒内热，咳嗽痰多，风湿痰乘隙而入络道，营卫痹塞不通，肺失清肃，胃失降和，病情夹杂，非易治也。宜和营祛风，化痰通络。

紫丹参二钱 炒黑荆芥一钱 嫩白薇一钱 抱茯神二钱
炙远志一钱 西秦艽二钱 光杏仁三钱 象贝母三钱 藏红花八分
木防己二钱 甜瓜子三钱 夜交藤三钱 嫩桑枝四钱

《丁甘仁医案续编》

翟竹亭

邑西十里岗邵姓妇，产后月内，周身疼痛，迎余诊疗。诊得六脉细数无力，余认为产后气血双亏之证。用十全大补汤加减，服一帖虽未见效，而病亦未增。全谓药剂太轻，原方加重份量。又服一帖，至夜间病势大剧，疼痛难忍。大哭不止。患者云：“自服此药觉得心胸满闷，更添少腹疼痛。”余知乃用药之误也。再为详诊，脉比前三日虚者变实，数者更数。余明告伊曰：“此证是产后恶露未尽，因一时误认为虚，反用补药，以实填实，治之不当，故此加重。余虽有过的，其心可原，倘肯再信，定能使病随药减，若再不验，甘愿受咎。”幸患者信而无疑，余即用失笑散加玄胡一味，共三味为细末，用醪流酒四两，煎滚冲服。二时话，少腹大疼一阵，遂下黑血块如桃李者六、七枚，病去五六。又服一帖，恶露始尽，三、四日竟获十全。因一时之误认，几乎令人夜台含冤，至今思之不免愧汗淋漓。敬告同道君子，每临证时，详细诊视，勿似余庸鄙误人，此又切切厚望也。

失笑散加玄胡

灵脂 15 克 生蒲黄 15 克 玄胡 12 克

《湖岳村史医案》

陆正斋

江某某 女 32岁

产后胸闷，头晕，寒热肩腿痛。

羌独活各3克 橘皮5克 黄松节10克 白蒺藜10克
苏梗5克 片姜黄5克 桑寄生12克 桑枝15克 金橘叶11片
海桐皮10克 当归10克 川芎5克

江朝林 女 36岁 住喻家村

产后肩臂酸痛。

全当归6克 宣木瓜5克 海风藤5克 炒牛子10克
白蒺藜去刺10克 夜交藤10克 片姜黄10克 海桐皮10克
杜红花2克 桑枝酒炒15克

《陆正斋医疗经验》

产后腹痛

江篁南

一贵妇，产后四五日患心腹痛。医用行血之剂，痛益甚，常俯卧以枕抵痛处，甚则昏晕。江曰：此极虚也。盖产后亡血过多，暴虚经隧行涩，故作痛耳。以人参五钱，黄芪三钱，当归、芍、芎、炒黑干姜、元胡，二剂愈。

《名医类案》

《衍义》

一妇人产当寒月，脐腹胀满，痛不可按，百治不效。或作瘀血，将用抵当汤，曰：非其治也。此脾虚寒邪客于子门也。以羊肉四两，当归、川芎、陈皮各五钱，姜一两，煎服二三次而安。

《续名医类案》

周慎斋

一产妇腹胀痛，服败血去瘀之药，致小腹胀痛硬入大腹，用姜、吴茱萸、荜拨，数剂而愈。（同上）

一产妇患小腹痛，或作呕，或昏聩，此脾气虚寒，用人参理中汤渐愈，又以补中益气汤加茯苓、半夏全愈。后复作痛而兼喘，仍用补中益气汤，培补脾肺而瘳。

一产妇小腹作痛，小便不利，内热晡热，形体倦怠，用加味道遥散以清肝火，生肝血，用补中益气汤补脾胃，升阳气而痊。（同上）

《续名医类案》

朱丹溪

冯宅妇产后发热，腹中痛有块，自汗恶寒，曾服黑神散，用白术、白芍各三钱，滑石五钱，黄芩、丹皮各二钱五分，人参、川芎、归尾、陈皮、荆芥、干姜各一钱，甘草些须。

《续名医类案》

薛立斋

一妇产后小腹作痛有块，脉扎而涩，以四物加元胡、红花、桃仁、牛膝、木香，治之而愈。

周于文母产后月余，腹中作痛不已，甚至恶心不食，恶寒流涎，杂症不一，有人教用荔枝四两，连核壳敲碎，加以老姜四两，好酒煮服，或作几次服下亦可，果效。此温州平阳事也，其地产后每食老姜汤七八斤为准，盖山水寒冷故也。如少饮，则为患不浅。

《续名医类案》

程从周

鲍明甫之内年二十三岁，素多忧郁，患心脾病，叫号一昼夜，未

药而止。三日后，临盆产一子，脐风而歿。又一日，前痛复作，初医以为感寒所致，用驱寒解表之剂。又医以为败血攻心，乃用桃仁、红花之类，药俱罔效。复邀余治，六脉微弦有力，独脾部弦而虚，余曰：“此心脾因郁而痛也。日前痛发，未必不因恼怒而然。今复子又脐风，未免复又忧郁，盖脾主摄血，新产血去，岂得不虚其脾。医者不察其源，乃认为寒、为瘀，概用驱邪破血之药，此虚而又虚也，病何以安？余乃遵丹溪之议，用参、芪、归、术为君，陈皮、香附为臣，玄胡索、熟蒲黄为佐，青皮、抚芎为使，少加甘草以缓之为引，煎服一剂痛止，两剂而瘥。

《程茂先医案》

王三尊

韩妇生产极难，数日后因酷暑少饮西瓜水。一医用附、桂、芪、术，反增呃逆而时晕绝。一医投清暑甘寒之品而身大热。予诊脉甚微，细揣病情，胃中又有积滞，是脉固当弱，然亦因滞伏所致。今以附、桂与芪、术同用，热留上焦，自助痰滞暑气为疴，以增呃逆，而时晕绝耳。后医以为过服热药，而投以清凉矫弊。殊不知产难而复饮冷，下焦虚寒已极，而复用清凉之药，上焦虽宜，而渐至下焦，下焦愈冷，孤阳逼上，而身大热，势必脉转浮数，顷刻飞越而死矣。予投以附、桂、姜、吴，群队下走大热之药，不使少留胃中，更少加槟榔、木香，以其下气如奔马也。二味虽气分下药，然入血药中，亦不能下达血分。且槟榔少许，只破胃中滞气，不致诛伐无过。服药后下宿滞二遍，减去槟榔、木香，加二陈、芪、术共三帖，痊愈。观二医之方，似觉清通於予，然彼不效，而予反效者，予中肯故也。

族弟有成妇，产后小腹痛。脉证皆虚，贫不能用参。予以桂、附、黑姜、元胡、吴萸、牛膝等加芪、术与之。人见此方争议之，有成信不疑，一帖而瘥。

《医权初编》

陈念祖

曾产前病了肿，迨产后四日即大泄，泄已一笑而厥，不省人事。厥回神识仍清，左胁前后忽胀满作痛。今病已两月有余，形瘦食减，脉虚少腹胀满，小便不利。此脾病传心，心不受邪即传之于肝，肝病乃更传之于脾也。是为五脏相贼，与六腑食气水血成胀者不同，攻补无效，拟先用泄肝和脾为法。

炒白术三钱 炒白芍二钱 宣木瓜二钱 白茯苓三钱
椒目八分，炒去汁 陈皮一钱

腹痛而不作胀，手按得宽，尤喜热熨，脉虚。此体气素亏，产后气血损亡，乃虚而作痛也，法宜温补。

当归身一钱 白术一钱 干地黄一钱 桂心一钱 黄芪一钱，炙

上药五味合作一剂。先宰黄童雌鸡一只，焯锅内，将鸡煮汁至三碗为度。每次用汁一碗，代水煎药，日服三服。

《南雅堂医案》

吴簾

富，述内子新产后，腹痛不止。医者说系儿枕痛，乃母胎中宿血也。服失笑散数剂无效。更延医亦云瘀血所致。用行血驱逐之剂，反口噤昏愠，手足发搐，余曰：脉弱微细，此血气虚极之变症也。急投十全大补汤，加炮姜，三帖而苏。继以峻补之品，调理乃愈。

杨，据云内人产后患儿枕腹痛，医皆认为瘀血，用行血之药仍痛更甚。余诊脉息虚细，系血气俱虚，而非瘀血也。即用殿胞煎（当归、川芎、炙甘草、茯苓、肉桂）以养血祛寒，其痛自止。凡新产之后，多有儿枕腹痛者，摸之亦有块，按之亦微拒手。故古方谓之儿枕，皆指为胞中之宿血。惟景岳先生以为大不然。夫胎胞既去，血亦岂能独留？盖子宫蓄子既久，忽尔相离，血海陡虚，所以作痛。胞门受伤必致壅肿。所以亦若有块，而实非真块。肿既未消，所以亦颇拒

按。治此者，但宜安养其脏，不久即愈。余每遇儿枕腹痛，俱宗此法。无不奏效。故记之。

《临证医案笔记》

抱灵居士

邓妇，产后发热盗汗，小腹块痛。或以十全之类不应；以桂枝合生四物汤加木香、元胡一剂，热退，汗止，下紫血；又一剂，下瘀血，右小腹起块微痛；以四物汤加肉桂、木香，黄芪二剂燥热，间十日又视，小腹左块痛，便秘三日，口渴，溺痛；以当归润肠汤二剂，泻二次；以真人活命饮去芷，加川楝、酒一剂，块半痛减，便秘二日；以代抵挡汤去硝，用生军一剂不下，夜热；以前方加熟地、红花、油归、防风、去桂一剂，泻二次，夜热恶寒，块痛连腰，心悸头昏，脉沉弦；以真人活命饮加赤芍、丹皮、生地、桃仁、童便、酒一剂，块痛肿起，此痛成欲外溃也。以瓜蒌、丹皮、桃仁、薏仁，热退，左季胁空痛，腹块红肿痛，恶寒，脉沉弦；以生芪、防、芷、芍、归、芍、元胡、琥珀一剂，气胁季痛好；以人参养荣汤三剂，外以芙蓉叶敷之，溃脓，口渴，舌苔黄，脉数；次八珍汤用芪，加丹皮，五味五剂，小便溺痛，停药，外以鲫鱼胶敷之而愈。

赵妇，产后二十日，恶露先六日止，恶寒腹痛，胸痞浮肿，面黄口渴，舌黄，脉弦。以代抵挡汤去硝，用生军加苏叶、乌药、桂枝一剂，泻一次，胸宽肿退；以楂肉为君，加桃仁、归尾、赤芍、乌药、腹毛之类一剂，身痒便秘，口炎涕红；以代抵挡汤去硝、加苏叶、乌药、腹毛、生大黄一剂，泻三次黑血，少许，胸宽；以归尾、桃仁、腹毛、乌药、楂肉、元胡、丹皮、姜皮二剂而安。间日头昏，以四神散加元胡、桃仁一剂而愈。

《李氏医案》

何平子

产后腹痛，腰痠神倦，胃气日减，脉来细软，损怯之渐。

焦白术三钱 炒归身二钱 益母子二钱 草郁金钱半
焦谷芽三钱 细香附炒，二钱 炒白芍二钱 小青皮一钱 新会皮钱半

接方：鲜石斛三钱 肥知母钱半 甜杏仁三钱 石决明煨，五钱
生归身钱半 川郁金一钱 麦冬二钱 生米仁四钱 新会红一钱
加枇杷叶两张

《壶春丹房医案》

张乃修

朱右。产后匝月，少腹坠痛，腿股腰尻作酸，带下阵阵，向来并有结块同下，腹满不舒，胃钝少纳。脉象弦紧。此由旬日之间恶露停留，旋虽复至，而脉络已滞，遂令瘀浊化带。恐其崩败。

全当归酒炒，二钱 川断肉三钱 茜草炭一钱 白蒺藜三钱
茯神三钱 川贝一钱 乌贼骨三钱 紫丹参二钱 泽兰叶一钱五分
南枣三枚

改方加炒熟地四钱，乌药一钱五分，香附二钱。

二诊：带下稍减，少腹仍痛。还是瘀浊未清。

全当归二钱 白蒺藜三钱 制香附二钱 乌贼骨三钱
川断肉三钱 紫丹参二钱 台乌药一钱五分 茜草炭一钱五分
生熟谷芽各一钱 鲍鱼片酒洗，二钱

三诊：稍下紫瘀，少腹坠痛已定，带下亦减。然胃仍少纳，头巅作痛。再参和中泄水。

白蒺藜三钱 乌贼骨三钱 全当归酒炒，二钱 川芎一钱
黑豆衣三钱 茜草炭一钱五分 佩兰叶一钱五分 池菊一钱五分
生熟谷芽各一钱 鲍鱼酒洗，二钱

四诊：瘀露通行，带下已止，而外感风邪，咳嗽痰多音塞。肝气

郁发，胸脘作痛。再平肝调气，参以疏风。

粉前胡一钱 象贝二钱 乌贼骨二钱 冬桑叶一钱
陈香橼皮一钱 炒杏仁三钱 橘红一钱 牛蒡子三钱 制香附二钱
砂仁壳五分

张右。产后月事不来，血虚火炽，春升之际，忽发呕吐，味带酸苦，口渴咽燥，气从上升，少腹先满，中脘气冲。脉细弦少力。血不养肝，遂致冲气肝阳逆上。拟和肝胃之阴。

金石斛三钱 大天冬二钱 生熟白芍各一钱五分 阿胶珠二钱
白蒺藜三钱 盐水炒牛膝三钱 煅磁石三钱 大生地四钱
紫蛤壳六钱 车前子三钱

二诊：上升之气稍平，恶心亦减，咽燥较润。的是冲阳上逆。再育阴养肝，以平冲逆之威。

大生地四钱 生白芍三钱 生熟甘草各二分 川贝一钱五分
阿胶珠三钱 紫蛤壳五钱 炒木瓜皮一钱五分 牛膝盐水炒，三钱
大天冬三钱 生山药三钱 车前子一钱五分

三诊：上升之气渐平，胸次窒闷已开，咽燥恶心，仿佛全定，惟稍带呛咳。还是阴分未复，冲阳逆上，肺失降令。从效方出入。

大生地四钱 生白芍三钱 生熟甘草各二分 牛膝三钱
阿胶珠三钱 紫蛤壳五钱 炒木瓜皮一钱五分 山药三钱
川贝母一钱五分 牡蛎六钱

四诊：滋肾育阴，以制冲阳，气升既平，渴亦大定，痰亦渐少，胃纳较进。效方扩充，再望应手。

大生地五钱 大天冬三钱 炒山药三钱 生熟草各二分
阿胶珠三钱 生白芍三钱 紫蛤壳五钱 白茯苓三钱 煅牡蛎六钱
八仙长寿丸四钱，二次服

五诊：滋水育阴，以制冲阳，胃纳渐增，以中气下根于肾也，气逆既定，稍涉劳动，犹觉冲逆，虚而未复，必然如此。起居寒暄，当格外珍卫。

大生地五钱 大天冬三钱 炒山药三钱 盐水炒牛膝三钱
酒炒白芍三钱 阿胶珠三钱 紫蛤壳三钱 白茯苓三钱

《张聿青医案》

王旭高

毛。产后腹痛，一载有余。营虚木郁，脾，胃受戕。时作恶心，时吐酸水。用《千金》当归建中汤法。

当归 炮姜炭 炙甘草 肉桂 川椒 白芍吴萸炒 橘饼
南枣

又：前投建中法，腹痛已止。复因经行之后，劳碌受寒，腹中又痛，加以晡热，饮食减少，舌苔干白。此属血虚肝郁，脾虚木横。用归脾法加减。

黄芪 党参 冬术 茯苓 砂仁 炮姜 木香 陈皮 归身
白芍吴萸炒 橘饼

丁。产后瘀凝未尽，新血不生，身热日久，少腹疼痛，小溲淋浊，带下血筋。此肝经郁热，兼夹瘀凝为患，殊非小恙。姑拟泄肝、化瘀、和营为法。

鲜地渣姜汁拌，炒焦 金铃子 延胡索 丹参 焦山栀
生姜渣鲜地汁拌，炒焦 龙胆草 当归 赤苓 甘草梢 青葱管 新
绛屑

《王旭高临证医案》

柳宝诒

许。子肿至产后而不退，前人有水分、血分之别。刻下少腹滞痛，当以痛瘀为主。

归尾 川芎炭 桃仁 泽兰 乌药 广木香 苏梗 茯苓皮
大腹皮 桑白皮 桂枝 椒目盐水炒 长牛膝炒炭 冬瓜皮 姜
皮 香橼皮 益母草

二诊：瘀血稍行，少腹痛减，而浮肿不退，腰以下尤甚。溲阻于下，气机不化。舍温通别无他法。

桂枝 椒目 盐水炒 茯苓皮 猪苓 瞿麦 车前子 泽泻
於术 泽兰叶 桃仁 归尾 益母草

另：黑白丑 大戟 沉香各五分 共为细末，每服一钱，开水送下。

韩。病起产后，挟时邪瘀郁，绵延一载有余。大势虽平，而营气受损，内热不已。刻诊脉象数软而急，不能安寐，头晕耳鸣，乃肝阴虚，而肝阳升扰之象。脐脘痠撑不化，纳谷作胀，乃肝气不和，横扰中宫之象。熟筹病象，其内热脉数，神痺不寐，已属阴损之候；而肝脾不谐，又未可纯进补剂，此用药之所以难也。兹拟养阴泄肝，和中调气之法，望其病机稍转，再拟滋养。

西洋参 东白芍 细生地炒 丹皮炭 稻豆衣 麦冬肉
净枣仁 川连煎汁，拌炒 嫩白薇 西砂仁 刺蒺藜 广郁金 左牡蛎
夜交藤 莲子心 竹二青

《柳宝诒医案》

刘子维

某之妇，产后七八日，忽腹胀，乳肿不食。

生黄芪五钱 黑大豆二两 生甘草八钱 全当归三两 元胡一钱
熟地五钱 良姜一钱 洋参三钱 干姜八钱 巴戟二钱
生艾叶三钱 甜酒一杯 童便三杯，冲服

五付，二付肿胀皆消，服毕愈。

李俊注：此虚寒胀也。《五藏生成篇》曰：腹满臃胀，过在足太阴、阴明。盖人身脾胃居中，气化所出，未有中能运化，而腹臃胀者。此《伤寒论》所以列腹满于太阴病提纲中也。此症之虚为产后所固有，然亦不无寒也。《六元正纪大论》曰：不远寒则寒至，寒至则坚否腹满。《经脉篇》曰：阳明之脉，从缺盆下乳。胃中寒则胀满，太

阴之脉入腹，是病则腹胀、食不下。《异法方宜论》曰：藏寒生胀满。《伤寒论》曰：阳明病不能食，名中寒。据上以观，此症腹胀不食，乃寒在脾胃，其乳肿则为寒在阳明之经，而不独虚也，明矣。

伤寒有内外之分，腹胀不食，内伤寒也。产后百脉空虚，败血未净，其腹胀不食，固与《伤寒论》太阴病无殊，而气血两虚，血燥血涩，则惟产妇为甚，乃同中之异也。

参、芪、归、地、甘草补气血以治产后之虚，干姜、良姜暖脾胃以逐内伤之寒，而寒客血泣则非当归莫属，故独重用；然血虚则干燥而急，寒盛则收引而急，当归能散寒润燥、活血行血，而缓急非所长，故除用之为君外，并重用甘草为臣，安中缓急以补其阙。《厥论》曰：阴气盛于上则下虚，下虚则腹胀满，兹既胃寒于中，又当产后，营血大损，冲、任、督、带皆失所司之候，其下焦阴邪未有不厥而上者，故重用黑豆镇肾逆，巴戟、艾叶温之、散之，以午为期。夫阴在内，阳之守也。常人内守不足，则补而敛之，在产妇则离经之败血非去不可，故易收敛为镇摄，而以黑豆为要药。若玄胡之活血利气，甜酒之通阳达络，童便之导血行瘀，参、芪得之则补者、通者各行其是，而无固邪之弊矣。

以温补为治，医书有云：胀不受补，及甘能益满者，乃指热实两胀而言，非中虚也。若中虚作胀，用甘温补之，则气归元而胀自己。故《别录》、甄权并云：甘能除满，合之参、芪，其效愈大，洵不诬也。

《圣余医案论解》

方耕霞

五。乳子而癸事不行，此其常也，不足虑。惟胃纳少而腹结块，此血虚气滞，木有余土不足也。法宜抑木和中。

吴萸 川连 白芍 陈皮 延胡 砂仁 茯苓 香附
归身 小茴炒 玫瑰 苏梗

《倚云轩医话医案集》

陈莲舫

王。产后肝脾不协，腹痞攻痛，渐至腰酸神倦，脉息细弦，治以温养。

西洋参 绿萼梅 抱茯神 炒归身 炒苑子 九香虫 红月季 制香附 沉香曲 制丹参 生白芍 川杜仲 广陈皮

上海，某。产虚不复，脘胀腹痞，脾胃久而不协，奇经渐为受伤，愆期前后，色眊，神疲。若不再调，恐成蓐劳。

吉林须 制香附 炒归身 淡乌侧 制丹参 广陈皮 红月季 野於术 绿萼梅 生白芍 川杜仲 九香虫 红枣

《莲舫秘旨》

邵兰荪

产后痼泻，腹中隐隐作痛，脉涩左弦，舌光，呛咳形怯，非轻藐之症。

广藿梗二钱 桔梗一钱 炒谷芽四钱 石莲子三钱，并左金丸八分 原川贝一钱五分 扁豆皮三钱 绿萼梅一钱五分 省头草三钱 砂仁七分，冲 通草丝一钱五分 三帖

华舍施。产后湿膨，溲黄，腹满，足肿，脉滞，舌黄。症势棘手。民国十年七月十九日

杜赤小豆钱半，并 大腹绒钱半 带皮苓四钱 光杏仁三钱 冬葵子三钱 椒目五分 泽泻三钱 地骷髅一两，煎汤代水 晚蚕沙一两，包 淡附片四片 炒米仁四钱

四帖。

又：产后膨胀，舌仍黄，溲较长，脘未展，脉尚滞。症尚棘手。

淡附片五分 鸡内金三钱，炒 杜赤豆钱半，并 枣槟钱半 光杏仁三钱 桃仁十粒 官桂五分 椒目五分 晚蚕沙一两，包 沉香曲钱半 冬葵子三钱 地骷髅一两，煎汤代水。

又：产后膨胀，脉尚滞，瘦长，舌黄。症尚棘手。八月初五日

沉香曲钱半 晚蚕沙一两 蜣螂三只 大腹绒钱半
炒鸡内金三钱 冬葵子三钱 乌药钱半 椒目五分 杜赤豆钱半，并
淡附片四分 原粒砂仁一钱，盐水炒 地骷髅一两，煎汤代水

史介生评：产后而患膨胀须防瘀血凝结，但用普通湿膨之药决难奏效，虽则在后二方用桃仁十粒，亦难济事。若能参用抵挡汤，庶几近之。否则兼与黄连、丹参、大黄、五灵脂、蒲黄等品，下其瘀血，或能中鹄。后闻斯人转就诊于潘星如君而全愈，凉必兼用消瘀之品矣。此方渗湿扶阳若治普通湿膨之症，亦是极好，惟产后血膨，尚欠斟酌。今特录之，以资后人之鉴戒。

《邵兰荪医案》

何长治

右。产后气弱不能行血，血滞致腹痛。用和血理气之剂，不应。拟当归建中法如何。

归身 焦白芍 官桂 木香 橘核 炒小 茴香 甘草
大枣劈碎 生姜 煎就，加粥汤二三匙冲服

右。产后失调，头眩心跳，足肿；又兼腹痛，脉细数。液虚而脾不克运。不节食恐延鼓疾。

焦冬术钱半 秦艽钱半 炒怀膝三钱 木香五分 炒黄芩钱半
炒青皮钱半 炒归尾钱半 川芎五分 焦白芍钱半 香附炭三钱
茯苓三钱 炙草四分 加砂仁壳六分 冬瓜皮三钱

右。昔年产后营血大夺，湿热内蒸，脾阳不运。胸闷腹胀，舌白，脉数。以化湿和脾。

白术二钱 茅术钱半 半仁三钱 腹皮二钱 陈皮八分
香附三钱 六曲三钱 麦芽三钱 泽泻钱半 香橼皮钱半

《何鸿舫医案》

王埤

邻人郝某之次女，产后经数月，饮食不思，精神减少，时兼胸满、面黄肌瘦。延医视之，以为癆瘵。投以八珍汤，获小效，而病复如故。或又以为产后血虚，用大剂四物汤合生化汤，转增腹痛。继有庸手，作伤寒阴症治，去益远而病增剧。法无可施，来求余治。诊其六脉浮弱，右关尤甚。乃曰，此气虚，非血虚也。当补气以生血。他人多用血药，品多清降，不转馁其气乎。因处以补中益气汤。其父素明针灸，颇知医，难之曰，病苦胸满，益以补中，不增甚乎。余曰，令缓胃气下陷，清阳不升，故浊阴不降，以致饮食留滞，故胸苦满，若清阳既升则浊阴下降，胸中自当痛快。命如方服之。三剂而精神作，饮食进。更命易汤以丸，一斤而全愈矣。

友人孟曙之妻，年四十余，新产后，患腹中块痛。延余诊视，按其两脉实大而坚，知非吉象，而以至好，不便明言。乃聊以人参泽兰汤进，服之未效。又请余治，余曰，痛不减，则药不效，请延他医视之。孟不肯，至余门者日三四次。不得已，实告曰，产后之脉，宜缓宜小，今见坚大，恐难愈也。孟曰：试再进一方，万一不愈，亦不敢怨。余曰：岂在怨不怨，但竭力经营，徒费钱无益耳。孟忧疑而去。凡更十数医，无毫发效，五十余日而歿。

《醉花窗医案》

吴鞠通

乙丑四月廿四日，文氏。太阴湿土司天之年，六脉沉细而缓，舌苔满布白滑，得饮则胸满，大便溏泄，面青黄，唇白，身萎不起，显系寒湿所伤，致脾胃两阳大败。法以通补腑阳，使寒湿得行方妙，岂有横补中焦守补脏真之理，皆因其产后而误也。

生茅术三钱 半夏五钱 小枳实三钱 猪苓三钱

茯苓块连皮，五钱 煨草果一钱五分 生薏仁五钱 泽泻三钱
广木香一钱五分 老厚朴三钱 广皮一钱五分 甘澜水煮三杯，分三次服。

二十五日：产后中湿，昨用刚燥通阳，业已见效。今日细询，鼻出凉气，肠鸣腹痛，背恶寒，吞酸，皆表里阳虚见症。余详前案。

姜半夏五钱 桂枝三钱 小枳实一钱五分 生薏仁五钱
干姜三钱 煨草果一钱五分 老厚朴三钱 椒目三钱 广橘皮三钱
生茅术三钱 煮三杯，分三次服。

二十六日：六脉阳微之极，稍缓则难救矣。即于前方内加：

桂枝二钱，共五钱 煨草果五分，共二钱 吴萸泡淡，二钱 良姜二钱
生茅术二钱，共五钱 干姜二钱，共五钱

二十七日：产后中湿，大用苦辛刚燥，已见大效。古法效者减其制，但夜间不寐，非重用半夏不可，宗素问也。

半夏一两二钱 茯苓皮五钱 干姜三钱 椒目五钱 生茅术五钱
秫米一合 草果二钱五分 生薏仁五钱 甘澜水煮三杯，分三次服。

二十八日：吞酸不得寐，照前方内加：半夏八钱，共二两
淡吴萸五钱 秫米一合，共二合

二十九日：前因得效而减其制，但与和胃令寐，今虽得寐，而旧症复来。仍与二十六日方，再服一帖。

三十日：产后中湿，昨日复行大用刚燥，又见大效，今日仍减其制。

茯苓块五钱 半夏八钱 椒目三钱 生茅术三钱 桂枝三钱
干姜三钱 老厚朴三钱 薏仁三钱 广皮二钱 小枳实一钱五分 煎法、服法如前。

五月初一日：昨日减制，病便不大效，今日于前方内加：
薏仁二钱 生茅术二钱 干姜二钱 草果一钱五分

初二日：诸症悉减，惟口不知味，不能起坐，脉微，阳未复也。用

真武汤法。

熟附子三钱 桂枝五钱 生白术三钱 生茅术五钱 椒目五钱
煨草果一钱五分 茯苓块五钱 生姜五片 生薏仁五钱 煮三杯，分
三次服。

初三日：于前方内加干姜三钱 附子五钱 良姜三钱 去白术。

初四日：又于前方内加厚朴三钱 枳实三钱 广皮三钱

初六日：微恶寒，右脉未起，阳不复也。

桂枝六钱 熟附子四钱 干姜二钱 茅术三钱 茯苓块三钱
生姜五片 薏仁五钱 小枳实二钱 煮三杯，分三次服。

初八日：诸症悉减，脉滑不寐，胃不知也，与素问半夏汤。

茯苓三钱 姜半夏八钱 秫米一合 薏仁五钱 杏仁泥三钱 煮
三杯，分三次服。

初九日：仍不寐，加半夏至成两半，寐则不必加。

初十日：温毒颊肿喉痛，牙床木痛，与普济消毒饮；但久病大虚
初愈，药不宜过重耳。

元参二钱 苦桔梗一钱 射干一钱 银花一钱五分 牛蒡子一钱
芥穗八分 连翘一钱五分 人中黄八分 僵蚕一钱 薄荷五分
茶菊花一钱五分 马勃八分，午刺一帖；申刺一帖；戌刺不见重，明早服一帖；若口
喝身热痛重甚，戌刺加一帖。

十一日：照初十日方，服三帖。

十二日：再服三帖 外洗目方：赤烂风弦，脾经湿热，他症不可
用此方也。

桑叶三钱 薄荷一钱 明矾六分 连翘三钱 枳壳二钱
胆矾三分 先煎，四味草药，去渣，后人二矾，上火化令相得，先熏
后洗，洗后勿令见风。

十三日：病减者减其制。

银花一钱 青箱子一钱 茶菊花一钱五分 连翘一钱
苦桔梗八分 冬桑叶八分 蒲荷三分 牛蒡子一钱 生甘草五分

射干八分 煮二杯，分二次服。

十四日：诸症悉减，余热未除，大势可无虞矣。

苦桔梗一钱 银花一钱 冬桑叶一钱 草决明一钱 连翘一钱
黄芩炭五分 茶菊花一钱 儿茶八分 生甘草一钱 煮二杯，分二次服。今晚一帖，明早一帖。

十五日：于前方内加刺蒺藜八分。

十六日：于前方内加草决明、黄芩。

十七日：诸症悉平，惟余肝郁，仍宜两和肝胃，兼宜络脉。

降香末三钱 青皮二钱 生薏仁五钱 旋复花包，三钱 香附三钱
广木香一钱 制半夏六钱 广皮二钱 益智仁一钱 煮三杯，分三次服。

二十日：进食不旺，且与和胃。

茯苓块三钱 半夏五钱 白蔻仁一钱 藿香梗三钱 生薏仁五钱
广郁金二钱 益智仁一钱 广皮炒黑，三钱 大麦芽二钱 煮三杯，分三次服。

廿一日：下焦浊阴，因寒湿蟠踞，且来上攻心胸若痞，舌白滑浊。议蠲饮法。

川椒三钱 淡吴萸三钱 厚朴三钱 良姜三钱 小茴香三钱
广皮二钱 青皮二钱 小枳实三钱 煮三杯，分三次服。

药服后，如腹痛不止，可服天台乌药散一钱，不知，服二钱。

二十二日：昨晚泄泻一次，今日痛减，仍不知味。

茯苓块三钱 泽泻二钱 熟附子三钱 生茅术三钱 广皮二钱
老厚朴二钱 淡吴萸三钱 生姜三片 益智仁一钱五分 生薏仁三钱
煮三杯，分三次服。

二十三日：腹中水气仍然未尽。

茯苓块五钱 半夏五钱 生茅术三钱 生薏仁五钱 干姜三钱
小枳实三钱 老厚朴姜炒，三钱 生姜五片 益智仁二钱 甘澜水头煎
两杯，二煎一杯，分三次服。

二十五日：舌色渐正，是其佳处。大便溏滑，湿正行而未尽也，责在脾不知；不寐者，胃不和也。

半夏一两 茯苓块六钱 薏仁五钱 猪苓三钱 生茅术五钱
干姜三钱 泽泻三钱 益智仁三钱 秫米二合 桂枝三钱 甘澜水八碗，煮取三碗，分三次服。一日一帖，令尽。

二十八日：下焦浊阴上攻，心悸，即冲疝奔豚之类也。议桂枝加桂法。

茯苓五钱 熟附子三钱 全归三钱 桂枝五钱 焦白芍二钱
川芎一钱五分 川椒炒黑，三钱 小茴香炒黑，三钱 生姜三片
肉桂去粗皮，研细，冲，三钱 煮三杯，分三次服。

二十九日：脾阳几无，非再与重劫脾阴不可。

茯苓块五钱 桂枝三钱 生薏仁五钱 生茅术五钱
肉桂去粗皮，钱五分 黑川椒三钱 熟附子三钱 广皮二钱
煨草根一钱五分 煮三杯，分三次服。

六月初一日：于前方内加：附子二钱 干全蝎二个 煨草果五分
肉桂五分

初二日：肝郁胁痛久，必成肝着。速速开朗情志要紧，以痛止为度。

新绛纱三钱 半夏三钱 生香附三钱 归须一钱五分
旋复花包，三钱 广郁金二钱 降香末三钱 青皮一钱五分
苏子霜三钱 高良姜二钱 煮三杯，分三次服。

初八日：肝郁则胁痛，寒湿则腹痛。

淡吴萸三钱 良姜二钱 生香附三钱 旋复花包，三钱 青皮二钱
广郁金二钱 降香末三钱 革拨一钱五分 煮三杯，分三次服

初九日：久病脾胃两虚，切戒大饱大饥，现在不寐。

半夏一两 藿香梗三钱 益智仁煨，一钱五分 秫米一合
广郁金三钱 甘澜水煮三杯，分三次服。以得寐为度。

十一日：诸症悉减，惟余舌白滑，胁下痠痛。

半夏五钱 降香末三钱 生香附三钱 青皮二钱 生薏仁三钱
广郁金二钱 归须二钱 台乌药二钱 元胡索二钱 良姜二钱 煮三
杯，分三次服。

十四日：脾气久虚未复，调理饮食要紧，防成痼疾。在暑月虽常
人之脾必虚，况久病乎？

半夏五钱 茯苓块三钱 厚朴三钱 良姜二钱 广木香一钱
香附三钱 乌药二钱 益智仁一钱 椒目二钱 青皮二钱 煮三杯，
分三次服。

十六日：寒湿未净，复受暑湿。议开太阳阖阳明法。

桂枝五钱 茯苓块五钱 薏仁五钱 半夏六钱 生茅术三钱
椒目五钱 安桂二钱 肉果霜去净油，三钱 干姜二钱 猪苓五钱
益智仁一钱 广皮三钱 泽泻五钱 煮四杯，分早中晚夜四次服。

十八日：客气加临之温病已退，舌苔白滑寒湿伤阳之本病复
举。先与和阳明之阳，以为坐镇中州之计，微泄厥阴之阴，斯乃拨乱
反正之规。

茯苓块三钱 生薏仁五钱 淡干姜二钱 制半夏四钱
吴萸泡淡，二钱 益智仁一钱 生茅术三钱 川椒炒黑，二钱 煮三杯，
分三次服。

十九日：今日腹痛。

茯苓块三钱 半夏三钱 藿香梗二钱 生薏仁五钱 良姜二钱
广郁金二钱 淡吴萸三钱 厚朴三钱 炒干姜一钱 小茴香三钱
广皮一钱五分 煮三杯，分三次服。

二十一日：面色犹然暗淡青黄，舌苔刮白，时退时复，大便或泄
或不泄，得油腻则滑甚，四末时或一冷，则其脾阳未能一时全复可
知。仍以醒脾利湿立法。

生茅术四钱 半夏三钱 川桂枝三钱 茯苓块连皮，三钱
肉桂去粗皮，一钱 广郁金二钱 生薏仁三钱 椒目三钱 生益智二钱
大豆卷三钱 神曲二钱 广皮炭二钱 煮三杯，分三次服。

二十五日：暑湿伤气，腹中按之微痛，善悲者，肺气虚也。补之以辛。

苍术炭三钱 半夏三钱 老厚朴二钱 茯苓块三钱 良姜一钱
生益智一钱五分 生薏仁五钱 干姜一钱五分 广皮炭一钱五分
川椒炭二钱 煮三杯，分三次服。

闰六月初二日：鼻尖凉，与胸中凉风上升者，皆脾阳久困，一时不能复辟之象，口舌淡稍减，思饮是，其佳处。

生茅术八钱 桂枝五钱 熟附子三钱 茯苓块五钱 神曲三钱
小枳实三钱 生薏仁五钱 广皮三钱 煨益智三钱 煮三杯，分三次服。

初四日：诸症悉减，惟余便溏腹痛，口已渴，且减大热纯刚，暂与分利。

薏仁五钱 生茅术八钱 椒目三钱 猪苓三钱 广木香一钱五分
神曲二钱 泽泻三钱 益智仁一钱五分 广皮一钱五分 煮三杯，分三次服。

初六日：泄泻已止，惟食后欠安。

生茅术三钱 半夏三钱 广郁金二钱 老厚朴姜炒，二钱
青皮一钱 焦神曲二钱 生薏仁三钱 广皮一钱五分 益智仁一钱
淡吴萸二钱 煮三杯，分三次服。

十一日：诸证悉除，惟余晨泄，由脾虚及肾矣。议兼理下焦。

桂枝三钱 生茅术三钱 莲子去心，三钱 茯苓三钱 肉果霜三钱
芡实三钱 半夏三钱 大豆卷二钱 生姜三片 椒目研，三钱 煮三杯，分三次服。

二十七日：溏泄虽止，但终夜不寐，胃尚未和也。专与和胃。

半夏二两 生薏仁一两 秫米一合 甘澜水八碗，煮取三碗，渣再煮一碗，分四次服。

《吴鞠通医案》

曹南笙

某右。初诊：产后十二朝，先寒战后热，少腹疼痛、腹膨满，下部腰肢不能转侧伸缩，小溲涩少而痛，此败血流入经络，延及变症，议用交加散。

小生地 生姜 车前子 牛膝 五灵脂 炒楂肉 调入
琥珀末一钱

二诊：十六朝诸症稍减，每黄昏戌亥时冲气自下而上，至胸中即胀闷，肢冷汗出，右腹板实，此厥阴肝藏因惊气逆，今恶露未清，重镇酸敛均为暂忌，议和血调血为稳。

归须 炒桃仁 延胡 炒楂肉 桂枝 香附 川楝子 小茴
某右。初诊：初产，汗出眩晕，胸痞腹痛，宜通恶露。

炒山楂 延胡 郁金 赤芍 炒牛膝 香附 童便冲益母草
汤代水

二诊：腹痛稍缓，但胸痞痰多，治从上焦。

炒山楂 郁金 丹参 橘红 川贝 甜花粉

某右。冲脉为病，男子内结七疝，女子带下瘕聚，故奇脉之病实者，古以苦辛和芳香以通脉络，虚者必辛甘温补，佐以流行脉络，务在气血调和。今产后本虚兼瘀而痛，法当益体攻病，日期已多，缓治为宜。

生地 生姜 丹皮 调琥珀末 回生丹

此苦辛温方，丹皮以通外，琥珀以通内，所收以效。

取乎醋制大黄一味，药入病所，不碍无病之处，故亦效。

《吴门曹氏三代医验集》

丁泽周

戴右。产后匝月，营血已亏，风寒乘隙而入，宿瘀交阻，少腹作痛拒按，形寒纳少，腑行溥薄。宜和营祛风，理气化瘀。

炒黑荆芥一钱 紫丹参二钱 炮姜炭四分 云茯苓三钱
延胡索一钱 藏红花五分 焦查炭三钱 全当归二钱 大川芎八分
失笑散包，三钱 春砂壳八分

薛右。产后气血两亏，宿瘀未楚，营卫循序失常，寒热叠发，已有数月，肢节酸痛，纳谷减少。宜扶正和解，调治营卫，不致延成劳症方吉。

潞党参钱半 炙柴胡五分 仙半夏二钱 云茯苓三钱
陈广皮一钱 象贝母三钱 生首乌三钱 煨草果一钱 紫丹参二钱
鹿角霜三钱 蜜姜二片 红枣四枚 净槐米包，四钱

《丁甘仁医案续编》

傅松元

顾仁甫之妇，六月六日分娩，十六日邀余诊。问产后几日始病？答云：“产后即发热，食少口渴，因与蒸乳之发热不同，七日即请郑女科治三日，初十日恶露止，热更甚，食反大减。又请陆女医连诊三次，总无一效。不得已舍女科，而请我先生之大方脉也。”余问女科云何？答云：“郑先生谓产后受凉防变。初十日陆女医云恶露早停，腹痛有几枕也。”余曰：“今十六日是产后之十一朝，身半以下不能动，腹痛下连髀股，两足不能屈伸，是流经之象，欲作外疡也。身热，汗少，不食，耳聋，口干，泛恶，有伏暑发白痞之候。然一身之病，上热下寒，治以温凉并进，又恐难能，若二者舍一而治，得无热者尤热，寒者更寒乎。考古人有合治法，两者各不可舍，勉从合治如何。”及为之用牛蒡、葛根、青蒿、连翘、丹皮、蝉蜕治其上，归尾、牛膝、桃仁、甲片、查炭、地龙治其下，流水煎、微温服。十七日再诊，见白痞，加腹痛，赤白痢，惟身热稍衰，食可略进。开第二方，去葛根、丹皮，加石斛，去桃仁，加泽兰，二剂。十九日复诊，白痞发至腰腹，密而明，腹痛已减，髀股活动，惟痢不止，余早：“可愈矣，恶露皆从痢出。”后痞停，耳聪，热解，痛止，痢已，调理至七月而起床。所云几枕

者，恶露结于胞门。流经者，恶露流走经络之分别也。

《医案摘奇》

孔继炎

王骑前之室产后八日，胁腹胀疼，医视之，败血未下也，用破血药，血下，不减。用通经丸，前后六两许，下血数斗，痛渐止，而虚症蜂起矣。王有族弟知医，改用补药，不受，病日以剧。王与余善，乃延余往诊。其脉无力无神，左关微弦。病人面黄色，目下微肿，语几不能成声。出谓骑前曰：尊闾病属停饮，治不从水而从血，以致阴阳俱亏，气血欲尽，殆矣。今水邪犹在，血液徒伤奈何。骑前曰：拙室病发产后，不闻患水，医亦未言及也。余曰：医言及此则医矣。试人问之，胁下有水声否？王乃入，少时出，曰：果有之。胁不微闻水声，不知病即此也。适室人细忆，正因彼时偶渴思饮，室中无人，遂饮冷茶碗许，卧而寐，醒即作疼。以产未几日，医又言为败血，故不复忆及此也。今闻君言，追想甚确，不知尚可攻下否？予曰：补之不暇，何暇于攻？王曰：补屡矣，徒增胀热，必不受也。目下室人畏补更甚于畏攻。予曰：补亦有道，何可易言？夫尊闾之病，自发热、恶寒、头眩、心悸，以及腰酸、股软、怔忡、不寐之症俱备，虚亦极矣。而谷人不化，强食辄膈，脾胃虚弱尤臻其极。夫五谷气味，与脾胃正相得者也。相得者且不能运，岂能有力以运药，补之不受，职此之由，非补有误，失于峻也。此时用补，如养饿极将死之人，始以汤，继以粥，渐而硬饭，渐而肉食，积日加增，乃可徐起。若肠枯欲断之时，而骤以干糲大膏投其中，惟一饱而气绝耳，补可易言乎哉？骑前称善。而谓其子曰：孔伯若用参，勿令尔母知也。予曰：此时参尚不用，终有用时，迨有参、术，加至姜、附，病斯起矣，乃可以议攻水。于是订方，用醒脾和胃之药。自三月至六月，往视二十余次，方屡更，参、术、桂、附俱备矣，病人犹未知也，而虚症俱退，步履渐健。其子喜曰：母病将愈矣。母曰：何知？曰：孔伯言，用至附子，病斯起，今用之屡矣。

母訝曰：曾用參否？曰：用已久。曰：何以不熱？曰：附子之熱，十倍於參，用附子不熱，參乃熱乎？母乃喜。至七月，予乃為之立攻水方。曰：此水積久，裹藏已深，层层脂膜，非峻藥不能抉而透之。用甘遂、黑丑、大黃、檳榔，領以牙皂，導以青皮，丸以煉蜜，囑令少服，不知，乃漸加。始服七八丸，漸至二十余丸，水乃下。間二三日。再服再下。數次之後，水囊俱出，又嘔出濁水一二斗，中帶死血，点点如砂砾，猶前通經丸所傷未盡出者，而病人又漸虛矣，予乃為定補養方。會騎前赴試，藥不果用，病人遂不能遽健，閱歲又產，猶時時現諸弱象云。

《孔氏醫案》

張山雷

李右。產後陰陽兩虛，經久不復，萎黃乏力，脘痛嘔惡，畏寒，脈細微已甚，舌皸白無華。幸胃納尚佳，亟投溫養，冀得轉機。

黃連 0.3 克 同炒 淡吳萸 1.2 克 北細辛 1.2 克 明附片 4.5 克
炒潞黨 4.5 克 焦冬朮 4.5 克 天仙藤 4.5 克 台烏藥 4.5 克
姜半夏 4.5 克 九菖蒲 2.1 克 川椒紅 10 粒 烏梅炭 1.2 克
木香 2.1 克 茯苓 6 克

《張山雷專輯》

范文甫

周師母。產後，腹中苦寒痛。前醫作氣滯，久治無效。舌淡脈弱。

精羊肉 30 克 當歸 9 克 生姜 12 克

病家云：吾腹痛日久，治之無效，特從遠地請范老先生高診，並非到小菜場買小菜，處方何用生姜、羊肉？一味當歸，能治病乎？答曰：此仲景當歸生姜羊肉湯，治虛寒腹痛甚效，服之當愈。隔數日，

病家前来感谢，谓药到病除，诸恙若失。

《范文甫专辑》

周镇

丁某之妻，蓉湖庄。甲寅十月，产后瘀血不行，而成寒热。某君以伏暑治之，不减。寻至腕闷呕恶，气急腹痛，有冲胃之势。前医犹投轻剂，晕厥者数次。延余诊：脉象模糊如伏，颜色青白，舌淡。察以前之方，纯系气分之药，瘀血阻滞而从上冲，疏方以逐瘀理气为主。如蒲黄、五灵脂、郁金、丹参、橘皮、苏噜子、川朴、乌药、玄胡、蓬术、鬼箭羽、乳香、桃仁、泽兰。另用琥珀、没药、血竭，研末，先行冲服。腹中攻动，恶露渐下，气降神清。复诊脉渐明爽，原方增减。不数剂，得庆更生。或谓调营如四物加味，毋庸群队行瘀。不知血瘀与血虚不同。败血成瘀，由瘀成胀满上冲，实非大剂破瘀，不能冀幸于万一。彼西送解剖蓐病死症，悉皆五脏溷浊肿胀；子宫膜淡糜烂，可间参证也。

包右，江北人。辛酉十二月八日诊：产后身热，口苦，腹痛，溲少。邪湿阻瘀，恐成肠痈。金铃子、玄胡、乌药、归须、豆卷、郁金、五灵脂、秦艽、炮姜、桃仁、没药、泽泻。另血珀、麝香，研末冲服。外用肉桂、香附、三棱、莪术、白芥子，研，麸皮炒，熨腹部。痛不可按者减其五成，原方出入而安。

朱秉礼，慧山。其妻产后患少腹痛。辛酉正月九日诊：产后不时腹痛，引及腰部，夜则轰热口燥，病在奇经，欲事早而营气窒痹也。当归、丹参、白薇、没药、乳香、五灵脂、金铃子、玄胡、香附、乌药、丹皮、牛膝，猪肾汤代水。另龙涎香、鸡内金、鼠矢，研末服。十一日复诊：夜热稍减，腹痛引腰胀急，小溲甚少，秘而不通。厥气固横，兼夹下虚，宜内外并治。金铃子、玄胡、鼠矢、牛膝、苁蓉、萸肉、白芍、归须、没药、白薇、丹皮、香附、郁金、甘草梢。另血珀五分、麝香三厘、沉香五分、龙涎香一分，研末服。外治用雄鸽一只，麝香七

厘，将麝入脐，剖鸽窠之，布扎。二剂。十四日诊：腰痛已减，腹痛大定，痛在偏右。小溲已通，大便不畅，下虚之故。奇经已伤，再为补摄。砂仁、炙熟地、山萸肉、山药、茯苓、泽泻、苡蓉、鼠矢、乌贼、龟甲、没药、牡蛎、牛膝、鳖甲、淡菜。三剂全愈。

吴克明室，幼患瘵疔伤元，及笄之二年出阁，嗣即一年一胎。至己未闰月，第七胎七月余，腰酸异常。继患间疔数次，即胎漏下血，进清伏热安胎之剂，苏梗、竹茹、青蒿、黑山栀、黄芩、柴胡、桑叶、丝瓜络、秦艽、香附、旱莲草、野苧麻根、四生丸之类。于其发日，服金鸡纳霜丸，仍不克保而堕，亦仅腰酸，未有痛阵即流产也。廿三日诊：寒热循止，腹时作痛，恶露已淡不浓。脉软左弦，苔淡黄。拟退余热，化瘀滞。归尾、川芎、赤芍、丹参、秦艽、青蒿、白薇、云苓、乌药、荷叶。廿五日，寒热已止，尚有气滞。左右胁部二月前有形如指头，按之作痛。恶露未清，络隧窒痹，中有痰浊。和营化痰宣络为法。当归须、川芎、赤白芍、橘叶络、新绛、旋复、香附、丝瓜络、白芥子、萆薢、青葱管。廿七日诊：腹痛，恶露色转殷红。易衣感邪，咽痒频咳，胁部积聚略小，前法再复疏散。苏梗子、荆芥、象川贝母、金沸草、橘红络、新绛、香附、秦艽、丝瓜络、当归须、抚芎、赤芍。廿九日方：咽痒咳甚，晨吐浓痰，胁部之核又减，腹痛亦定，恶露未清，头眩腰酸。脉弦，舌润。风邪痰浊未撤，虽有虚征，早补为难。紧菀、象川贝母、杏仁、旋复、郁金、橘白络、制僵蚕、白蒺藜、归须、竹茹、丝瓜络、桑寄生、萆薢。八月初一日方：恶露已净，咳较盛，口燥痰韧。燥风外客，再行清肺化痰。甜杏仁、桑皮、竹茹、山栀、象川贝母、知母、地骨、橘白络、功劳子叶、花粉、青蛤散、紫菀。胁块小而未化，囑外贴胡庆余观音救苦膏。初七日诊：咳减未净，头眩腰酸，平日见日光畏涩，脉弦不敛。阴虚肾亏，不胜阳光之烁。宜滋潜浮阳，肃肺化痰。黑料豆、白芍、牛膝、潼沙苑、川贝母、青蛤散、女贞、旱莲草、阿胶、橘白络、珍珠母、紫菀。十二日诊：咳已极轻，胃纳已馨，胁下有形甚微。略有行动，头晕足酸。述知暑怕热，冬畏寒，正气不足可知。

再滋潜养阴，参以化痰。玉竹、首乌、白芍、二至、龟板、冬虫夏草、潼白蒺藜、牛膝、杞子、川贝母、紫石英、橘白络、青蛤散。十七日诊：咳似定，头晕腰酸减半。脉弦稍敛，苔薄。肝肾两亏，易妊小产，预宜室欲百日。归身、白芍、生地、首乌、札子、滁菊、山萸肉、山药、茯苓、丹皮、龟板、杜仲、牡蛎、狗脊。服药诸恙均好，脉弦已敛，即予丸方常服，如大生地、山萸、山药、归身、白芍、首乌、甘杞子、滁菊、杜仲、续断、狗脊、沙苑、香附、茯苓、麦冬、桑椹子，研末，以阿胶、龟鳖二胶溶化和丸。每晨服三钱。服之效验。

朱炳宇妻，因子丧不无抑郁，后复生女，少腹作痛。陈医用失笑散、炮姜、川芎等暨回生丹，不应。四月初三日招诊。产后三朝，少腹攻痛，曾经理气行瘀，未效。脉濡不爽，苔滑而白，察目赤沿碎。素有肝火，内热挟瘀为患。拟清肝疏气，行血之滞。丹参三钱，丹皮三钱，川郁金三钱，香附三钱，乌药三钱，橘叶核各二钱，瓦楞子一两，香橼钱半，金铃子二钱，红花一钱，归尾二钱，五灵脂三钱，两头尖五钱。另玄胡一钱，没药八分，伽楠香八分，龙涎香八厘，研末，开水送服。初四日诊：产后少腹作痛，剧时腰部亦痛，牵及乳房。昨服清肝理气行瘀之剂，痛已大减。推瘀血未通，恶露色白枯腻，再前法出入。丹参三钱，赤芍炭，三钱，生蒲黄三钱，丹皮炭，三钱，金铃炭，三钱，黑山栀三钱，川牛膝炒，三钱，莪术三钱，鬼箭羽三钱，香附三钱，乌药二钱，五灵脂三钱，橘核络各一钱，两头尖五钱。另没药一钱，玄胡一钱，血竭八分，龙涎香一分，研末服。腹痛一日未作，至初七日腹酸且痛，朱研末药去龙涎服之，亦止。

荣右，乡人。己亥十二月产时胞衣不下，逆迫气滞血凝。迨胞衣下，腹痛，恶露不多。且阴肿坠如茄，痛楚异常。用归尾、赤芍、五灵脂、蒲黄、山楂、香附、川芎、丹参、桃仁、益母草。恶露虽有，依然不多，阴肿加热，似欲作胀。前方加乳香、蓬术、炙甲片、路路通。服后行出恶露如墨，成块而下，外肿不药而消。当其重时，寝馈不安，乡姬疑是祟，欲卜之。巫覡喻以症虽少闻，实瘀阴所致。通瘀果应。

曹二之室，慧山，要货业。己未二月初旬诊：产后瘀滞未清，此因月内犯房，少腹作痛，气短，微有内热。宜节劳静养。盐水炒小茴、两头尖、金铃子、玄胡、去油没药、制香附、乌药、九香虫、白薇、黑山栀、桂枝、蒲黄、五灵脂。服后，腹痛凜然均止。

《周小农医案》

陆正斋

许某某

产后寒热，面浮腹痛，肠鸣泄泻。

水炙防风 4.5 克 川桂枝 4.5 克 土砂白术 4.5 克
春砂仁 2.5 克 赤茯苓 9 克 橘皮 4.5 克 炙甘草 2.5 克 煨生姜一片
泽泻 6 克 炒谷芽 9 克 砂白芍 4.5 克

关某某 女 28 岁

产后小腹痛，血液淋漓不尽。

当归 9 克 大丹参 8 克 抚川芎 3 克 羌蔚子 4.5 克
炙甘草 1.5 克 炮姜炭 1.5 克 炒艾叶五片 荆芥炭 4.5 克

二诊加蒲黄拌炒阿胶

《陆正斋医疗经验》

孔伯华

赵妇，闰月初八日。产后瘀血未净，结于少腹而为痛楚，拒按，两胁气机横逆亦作痛，脉弦涩不和，当调和气血，兼达经络。

鸡血藤五钱 台乌药三钱、旋覆花钱半、全当归三钱 川楝子三钱
元胡三钱 真川芎钱 大腹绒钱半 川牛膝三钱 桃仁泥钱
橘核四钱 黄酒一杯

《孔伯华医集》

章成之

施女。少腹右侧硬而痛，其痛时轻时剧，痛则洒然恶寒。此证见于产后，当用通瘀散寒之属。

五灵脂 9 克 生蒲黄 4.5 克 桃仁 12 克 苏木 4.5 克
延胡索 9 克 丹皮 9 克 艾草 4.5 克 吴茱 3 克 炮姜 3 克
肉桂末 1.2 克，二次吴吞服

朱女。多产体力暗耗，卫气不能卫外为固，故恶寒甚而自汗，便溏，舌淡，脉弱，温补之。

生黄芪 9 克 川桂枝 4.5 克，后下 白芍 9 克 党参 9 克
山萸肉 9 克 升麻 2.4 克 补骨脂 9 克 煨益智 9 克 白术 9 克
红枣七枚 炙草 3 克 生姜二片

吴女。产后大便难，口唇燥裂，舌红，当育阴润肠。

玄参 9 克 生地 15 克 麦冬 9 克 首乌 12 克 冬青子 9 克
桑椹子 12 克 知母 9 克 绿豆衣 9 克

方女。产后百节空虚，风寒湿三气乘虚而入，遍体疼痛，肢端麻木。寓祛风于养血之中。

当归 9 克 白芍 9 克 防己 12 克 羌独活各 4.5 克 秦艽 9 克
细辛 3 克 金毛脊 9 克 桑寄生 9 克 苍术 6 克 晚蚕沙 12 克，包
豨莶草 9 克

《章次公医案》

王文选

王某某，20 岁。1957 年 8 月 29 日初诊。

产后二十多天，小腹仍然绞痛不已，痛时阴道流少量紫血块，有恶臭气，脉沉舌青。证属儿枕痛，子宫郁以瘀血，不易复原。治宜化瘀之剂，仿生化汤意化裁治之，二剂而愈。处方：

当归 4.5 克 川芎 3.5 克 灵脂 3 克 青皮 6 克 香附 4.5 克

连翘 3 克 山梔 3 克 炮姜 3 克 厚朴 6 克 羌活 4.5 克 甘草 1.5 克
泽兰 4.5 克 益母草 4.5 克

《中医医案医话集锦》

叶熙春

章，女，三十八岁。十一月。杭州。产后二月，时多形寒，肢冷，下午见微热，腹中绵绵隐痛，喜按，得暖则减，乳汁日少，形体消瘦，所幸胃纳尚可，舌淡苔白，脉来沉细。属营血不足，虚寒之证耳。

精羊肉 240 克，先煎代水 酒炒当归 15 克 生姜 60 克
清炙黄芪 12 克 桂枝 2.4 克，炒 白芍 6 克 清炙甘草 3 克
炒冬术 6 克 炒丹参 12 克 鹿角霜 9 克

二诊：连服三剂，形寒微热均除，腹痛亦愈，脉亦不若前之沉细。再拟调补气血。

炒当归 9 克 清炙黄芪 18 克 炒潞党参 12 克 炮姜 2.4 克
炒冬术 6 克 炙甘草 2.4 克 鹿角霜 9 克 炒白芍 6 克 炒川断 9 克
炒丹参 12 克

《叶熙春专辑》

乳汁不行

林佩琴

杨氏。产后鲜血，足膝热，乳少，脉芤，宜摄固下元，兼升举中气。桑螵蛸炙研、熟地、杞子、杜仲盐水炒、黄芪蜜炙、升麻。二服血止。去桑螵蛸，加生黄芪、甘草、当归、红枣，而浮倍常。

《类证治裁》

柳宝诒

下。乳汁不充，乃胃气不能上蒸之故也。平时舌衄口碎，齿龈

瘀肿诸病，又属心脾郁热，燔于营分，浮于经络之象。舌苔剥蚀裂痛，胃津亦伤。养之清之，须从心脾两脏一腑用意。

洋参 北沙参 川石斛 麦冬 大生地 炒丹皮
小川连酒炒 甘草 玉竹 归身盐水炒 稻豆衣 竹茹 上药煎
汁，滤清，熬收，烊化阿胶，冰糖收膏。

《柳宝诒医案》

陆正斋

徐某某，女，24岁，产后乳汁不行。

催乳

当归9克 白芷5克 炙黄芪15克 通草4.5克 王不留行9克
猪蹄一只

《陆正斋医疗经验》

叶熙春

牟，女，二十六岁。九月。杭州。产后月余，气血未复，面色苍白，头昏倦怠，胃纳不佳，肌肤不润，乳汁甚少，大便溏薄，脉虚细。舌淡红，苔薄白。拟两补气血。

鹿角霜9克，包 米炒上潞参9克 清炙黄芪15克 炙当归6克
炒晒白术6克 云苓12克 丝通草1.5克 清炙甘草2.4克
煨广木香6克 留行子9克 大枣6只

二诊：前方服后，乳汁增多，胃纳亦馨，大便正常，头晕神倦亦有好转。原法继之。

米炒上潞参9克 清炙黄芪15克 炙当归6克 炒晒白术6克
炒白芍6克 云苓12克 鹿角霜6克，包 炒紫丹参9克
清炙甘草2.4克

《叶熙春专辑》

施今墨

车某某，女，33岁。

产后三月，乳水不足，月经仍按期而至，心跳、头晕、极易发怒、饮食二便及睡眠尚属正常。六脉虚软，左关较盛。

辨证立法：《良方论》曰：“心、小肠二经相为表里，上为乳汁，不为月水”。虽乳汁、月经两者不同，而由饮食精微所化则一。乳儿期间，天癸闭止，则乳汁充足，此为常理。今则月经按期而至，乳水自应不足，气不固血，血不养肝，虚则易怒，拟养血、补气、强心、舒肝以治。

处方：米党参10克 砂仁3克 醋柴胡5克 当归身10克
大熟地10克 杭白芍10克 炙黄芪12克 鹿角胶10克
炒远志10克 甜瓜子30克 炙甘草3克

二诊：药服八剂，心跳头晕见好，乳汁量增，月经尚未及期，不知是否再来。

原方加：阿胶10克，五味子3克，可多服数剂。

三诊：前方共服十剂，月经及期未见，乳汁仍不甚足，精神好转，希予下乳方。

处方：甜瓜子60克 赤小豆30克 路路通12克

《施今墨临床经验集》

产后遗尿

余听鸿

常熟塔前高姓妇，十一月二十九日生产，至十二月朔，下血甚多。请王姓医治之，进以当归、杏仁、冬瓜子等，又方加以肉桂。初五邀余诊之，脉芤而无力，面色皤白，唇舌俱白，毫无华色，神气疲乏已极，口唇掣动。余诊之曰：此气随血脱，血虚则内风煽动，宜遵

血脱先固气之法，非大补不可。立方党参一两，黄芪一两，枸杞一两，当归三钱，白芍二钱，桂枝五分，炙草六分，龙骨三钱，枣仁五钱，茯神三钱，红枣十枚，桂圆肉十粒。服后神气略清，精神渐振。照方减半，又服二剂。惟小便自遗，大便不更，此系神气不固，血液亏损，津液不能敷布大肠。又改方淡苣蓉三钱，杜仲三钱，杞子五钱，潼沙苑三钱，白芍二钱，菟丝子三钱，蒲黄炒阿胶二钱，红枣五枚，桂圆肉六枚。服后小便遗止，大便已通。后服和营理气，调养肝肾而痊。俗云产后忌补，不可执一而论也。

《余听鸿医案》

陈莲舫

戴奶奶。胎前有伤，产后气郁，发逆小便屡屡不禁，且痛，脉见细数。

由气伤阴，不特膀胱为患，而子宫亦为受伤，恐久而成怯。

炒阿胶 血余炭 生白芍 炙升麻 秋葵子 甘草梢 紫丹参 新会皮 嫩白薇 乌侧骨 凤凰衣 白莲须 煅牡蛎 白木耳

《莲舫秘旨》

产后小便不通

齐秉慧

曾医一症，产后而瘀未行，小便滴沥，醇胀异常。医用破血之剂三服，更加胸腹胀满，人事昏迷，喘促不能卧。余曰：“此非污积，仲景有云：小便不利者为无血也。此病在气分，不当用血分之药，盖为膀胱蓄尿过满，胀翻出窍，致尿不得出。”吾用白蔻宣畅胸膈，砂仁、半夏醒脾开胃，肉桂化气，桔梗开提，生姜升散，令服是药，并教以手从上拂，而膀胱之气乃能转运，期窍自顺而尿出。果如吾言，其

窍通利，自然宽了一节，旋即又行，更觉苏畅。乃索食，食讫则安睡，睡起再行，腹消如故。于是改用扶脾健胃之剂，数服而全愈。此所以小便不利而验其无血也。又医产后一症，身重恶寒，饮食不下，大便泄，小便不利，腹中痞块作痛，庸工谬谓血气，用元胡四物汤，加蒲黄服之无效，转加膨胀矣。于是再加厚朴、木香，则胀满加剧，湊上胸膈，喘促不能卧。予曰：“其身重恶寒者，少阴症也。腹中痞块作痛，阴寒凝结也。食不下者，阴邪逼塞胃口也。且阴邪下奔而作泄，膀胱无阳，其气不化，而小便不利。凡此皆为病在气分，彼妄投血药，阴愈长而阳愈消，又误破其气，则气亏而邪愈湊，其症危矣。”吾用砂、蔻、姜、半宣畅胸膈，温醒脾胃，附子御阴，肉桂化气，使上焦得通，中焦得运，而后气化行。桔梗开提，生姜升散，俾转运之机，乃得先升而后降，一剂而小便通，胸膈略宽。再加芩、术，三剂而腹痛止，胀渐消，饮食加健，身复发热。其家曰：“表见发热，何故也？”余曰：真阳来复，休徵也。经曰：伤寒先厥后发热，下利必自止。”再重加黄芪，白术而泄止，其胀更消。忽加口渴，腹中作饿，食未久又索食，其家恐服附桂助起胃火，故能消食，商议改用清凉。余曰：“不可也。经曰：脉滑而数，手足自温，渴欲饮水，饥欲得食，此阳进欲愈之证也。”再加益智、固纸收固肾气，又二剂而身轻，腹胀俱消，再加复盆，菟丝、鹿鞭、兼补肾阳，数剂而全愈矣。痞块消弭，终无血行下者，调理两月，经信行通知故。

《齐有堂医案》

王旭高

张。寒气客于下焦，瘀凝停于小腹中央，乃膀胱之部也。寒气瘀凝，阻塞胞门，膀胱阳气失化，以致癃闭。产后八日而小溲不通，脉细肢寒，腹中觉冷，恐其气逆上攻发厥。法以温通下焦，化瘀利水。

全当归八钱 川芎四钱 山楂炭五钱 炮姜五分 桃仁三钱

车前子五钱

益母草汤、陈酒各一碗煎药。另研桂心五分，血珀五分，甘遂三分，为末，药汁调下。

渊按：从生化汤加通瘀祛寒药，可法。

又：小洩瘕闭已通，恶露瘀凝未下，少腹板痛。再以温通。

肉桂 延胡索 红花 桃仁 丹参 归尾 山楂炭 牛膝
炮姜炭 冬葵子 两头尖 车前子

《王旭高临证医案》

余听鸿

徐汉泉妻，新产后小洩涩少而艰难，邀数医治之，俱罔效。后请江阴周姓医，进以五苓加通草、瞿麦之类。服后小洩频数而极少，一夜数十行，出如箭速，而子门如烙，热痛非常，发热口渴烦躁，病势甚危。邀余诊之。余曰：仲景云：产后小洩少者，无血也。若以淡渗苦泄，更伤其阴液，则小便更少，而热更甚。急养其阴，自然洩长而虚阳亦潜。进复脉、增液合导赤汤法，生地一两，麦冬五钱，元参四钱，阿胶三钱，天冬二钱，石斛五钱，生草梢一钱，生牡蛎一两，生龟板一两，西洋参二钱，煎浓汁饮之。小洩频数渐减，烦躁发热渐安。服三剂，热痛已平，小洩清长。后服甘凉咸寒十余剂而愈。所以产后温邪热病，伤阴劫液，以致水源竭涸，为医者又复用淡渗利水，何异操刀杀人乎。临症时急宜留意焉。

《余听鸿医案》

何长治

右。产后伏湿中焦，脾胃失于运行，以致周体浮肿，腹大，咳呛气逆，多痰，溺少便溏，舌白脉弦。肿胀已成，未易愈也。

桑皮三钱 葶苈子四分 杏仁三钱 腹皮二钱 茯苓皮三钱

米仁三钱 川桂枝五分 麦芽三钱 加海蜇三钱 地栗四枚

《何鸿舫医案》

金子久

产后腹笥膨满，小溲约束不循常度，决非脾胃湿浊之阻痹，亦非膀胱州都之失职。细参病源，系是临产过久，冲任奇脉致伤，冲任二脉行于腹里，二脉既伤，气街不和，故腹笥不为产后软小也。肝肾居于下焦，以产先伤其下，肝肾受伤则冲任未始不受其害，因冲任隶属肝肾也。肝主疏泄，肾主封藏，肝不足相火易动，动则关窍愈通，肾不足津易燥，燥则在大便维艰。左部脉象弦大，右部亦欠柔静，舌质中央淡绛，两边略起薄白。真阴无有不虚，营分岂有不热，法当养肝肾之阴，以固下元，参用通冲任之气，以调机关。

白归身 杞子 鹿角霜 麻仁 肉苁蓉 白芍 炙龟板 牛膝 菟丝子 小茴 左牡蛎 橘络核

《金子久专辑》

冉雪峰

万县夏某之爱人，分娩后小便不利，秘涩若淋状，助产士为之导尿，惟屡导屡胀，不导即不小便，状若癰闭，所导小便中，时杂血液，自觉少腹坠胀，内中消息停顿，服药不效，时未弥月即来我处就诊，脉弱而数，舌绛津少，烦扰不安。予思此证膀胱气滞不化，类似胞系了戾，但彼在胎前，此在产后，彼为虚中夹实，此为实中夹虚。所以然者，产后空虚，客邪乘之，查阅前所服方药，为肾气丸加减，肾气丸鼓荡肾气，以补为通，虽似相宜，但能化气而不能消痰，未尽合拍，且秘涩若淋，脉带数象，桂、附似当慎投。拟方，当归、白芍各四钱，黄柏、知母各三钱，升麻一钱五分，苏条桂五分，研末冲服。二剂，少腹坠闷若缓，但仍须导尿。复诊，原方加青木香、蒲黄各三钱。又二剂，少腹渐舒，曾自小便一次，量虽少，但启闭有节，因劝其可

忍耐则忍耐之。停止管导，俾气机转动，得以恢复，病可向愈。改方用：当归、白芍各三钱，黄柏、知母各二钱，苏条桂四分，以上同煎，许氏琥珀散八分，用前药汁吞服。越后三日，小便渐次畅利，一星期，已无不舒感觉，与常人无异。（方中琥珀散出许国桢御药院方，为琥珀、蒲黄、海金沙、没药四味等分制散。）

《冉雪峰医案》

产后浮肿

薛立斋

一产妇饮食少思，服消导之剂，四肢浮肿，薛谓中气不足，朝用补中益气汤，夕用六君子汤而愈。后因怒腹胀，误服沉香化气丸，吐泻不止，饮食不进，小便不利，肚腹四肢浮肿，用金匱加减肾气丸而愈。

一产妇泄泻，四肢面目浮肿，喘促恶寒，此脾气虚寒，用六君加姜而泄泻愈，又用补中益气而脾胃健。

《续名医类案》

杜壬

一妇产后忽患浮肿，众作水气治，不效。曰：水气必咳嗽，小便不利，今便利而不作嗽，独手足寒，乃血脏虚寒，气塞不通，故生浮肿也。治宜益和血气，灵苑牡丹皮散愈。

《续名医类案》

张子和

曹典史妻产后忧恚抱气，浑身肿，绕阴器皆肿（肝经所络）。大小便如常，其脉浮而大，此风水肿也。先以芥水擦其疾，以火助之发汗，次以舟车丸、浚川散，泻数行，后四五日方用苦剂涌泻，用舟车

丸，通经散，过十余行，又六日，舟车、浚川复下之，末后用水煮桃红丸四十余丸，不一月如故。前后涌者二，泻皆四，通约百余行。当时议者以为倒布袋法耳，病再来则必死，不知此乃《内经》治郁之玄，但愈后慎房室等事，况风水不同水，无复来之理。

《续名医类案》

中神琴溪

一妇人，产后浮肿腹满，大小便不利，饮食不进。其夫医人也，躬亲疗之不验。可一年而疾愈进，短气微喘，时与桃花加芒硝汤无效，于是请教于师。师往诊之，脉浮滑，按其腹，水声漉漉然。谓其主人曰：“吾子之术当矣。然病犹不知，则又当更求方。夫当下而不下，即更吐之和之，不当即发之，又可所谓开南窗而北风自通，又张机所谓与大承气汤不愈者，瓜蒂散主之类也。”主人曰善，因与大青龙温覆之。其夜大发热，汗如流。翌又与如初。三四日小便通利，日数行。五六日间，腹满如忘，与前方凡百余贴复故。

《生生堂治验》

何书田

偏产后，营虚木旺，神色萎黄。不宜用攻伐之药，且恐肿满。

上肉桂 归身 枸杞 丹参 制香附 陈皮 清阿胶 白芍
杜仲 秦艽 白茯苓

《蔚山草堂医案》

王孟英

姚氏妇，产后昏谵汗厥，肌肤浮肿。医投补虚、破血、祛祟（痰）、安神之药，皆不能治。举家惶怖，转延孟英诊耶。询之，恶露仍行。曰：此证病家必以为奇病，其实易愈也。昔金尚陶先生曾治一人，与此相似，载於沈尧夫《女科辑要》中，方用石菖蒲、胆星、旋覆花、茯

苓、橘红、半夏曲，名“蠲饮六神汤”。凡产后恶露行而昏谵者，多属痰饮，不可误投攻补，此汤最著神效。如方服之，良愈。

《王氏医案》

戚云门

宋大年令政，脾病则九窍不利，以至阴之脏，不得阳和舒布，斯水俗入胃，传送不行，清浊混乱，遂成腹满肿胀之病。此《经》旨所谓脏寒生满病。三阴结，谓之水也。病者胎前即患喘咳，产后继以肿胀，经今百日有余，脉来微弱无神，在右尤甚，可知气血式微，中焦窒塞，升降无由，州都失职，决渎不宜，日居月诸，灌入隧道，津液脂血，浸淫洋溢，悉化为水。总由中央孤脏无气，不能灌溉四旁，以镇流行，则水湿泛滥而难支矣。读病机一十九条，所以胀病独归脾土。盖脾损不能散精于肺，则病在上；胃损不能司肾之关钥，则病于下。三焦俱病，以肾纯阴之剂投之，求其向愈。岂可得乎？勉拟东垣脾宜升胃宜降，合以回阳，不失乎人事之当尽也可。

真武汤加肉桂。

《龙砂八家医案》

柳宝诒

祝。肤肿起于胎前，剧于产后。据述蓐中恶露不畅，弥月不减。古人谓血分化为水分者，以消瘀为主。拟用疏瘀行水，温调脾肺之法。

桂枝 椒目 盐炒 归尾炭 红花酒炒 广木香 杏仁 冬瓜皮 大腹皮 茯苓皮 桑白皮 苏子叶各 青陈皮各 六曲炭 姜皮

二诊：前与疏瘀行水，肿势稍平。舌中黄浊，兼有浊积。拟于前方增入疏滞之品。

桂心研冲 茯苓皮 大腹皮 青陈皮各 冬瓜皮 莱菔炭

查肉炭 六曲炭 枳实炭 长牛膝 红花酒煎拌炒 姜皮 通草

三诊：肿势减而未平，甚于上脘。拟从气分着想。

桂枝 於术 广木香 茯苓皮 大腹皮 冬瓜皮 炙鸡金
川朴 砂仁 焦谷芽 生熟神曲各 通草 姜皮

花。子肿咳嗽，均属脾肺气窒之病。产后浮肿咳喘，寒热无汗，加以口甜脘闷，两便不爽。湿浊阻窒，气机不畅。表里两层，均无外达之路，故病势缠绵不解。拟方疏肺和中，俾邪机得以外达。

苏子叶 杏仁 紫菀 川广郁金 茯苓皮 广陈皮 薏仁
青蒿 苡米 括萎皮 姜汁炒 佩兰叶 益母草 茅根肉去心 桑白皮 大腹皮

《柳宝诒医案》

方耕霞

张。胎前浮肿便溏，中土之虚象已著。产后浮肿不退，泄泻更甚，加之以寒热至以气促，病亟极矣。刻诊身热多汗而不解，脉空大而无神，既无腹痛之瘀阻，且见舌质之淡白，细揣脉证，合诸方书，悉属气血两伤见象。论治法，古人谓血生于心，气主于肺，然后天生化之本，则脾胃为扼要，况泄泻呕吐，中焦久已受伤，若再舍此他图，窃恐无粮之师，非但不能战，且不能守。今拟理中合生化汤意，以冀应手。

理中汤加风全当归 桂枝 炒白芍 苓皮 车前子

《倚云轩医话医案集》

何长治

右。新产营虚，风温易感，形寒咳呛，泛恶多痰，畏风，形浮足肿，脉弦。法以疏散，佐以营卫两和。

细生地三钱 桑叶钱半 前胡钱半 苏叶钱半 象贝三钱

枳壳钱半 防风钱半 杏仁三钱 加生姜二片 大枣三枚

《何鸿舫医案》

金子久

胎前浮肿名谓子肿，胎前咳嗽名谓子嗽。昨日带病分娩，今朝腹笥未瘳，自觉有形如块，甚而动定无常，面部浮肿，肢体亦肿，恶露颇少，带下不多，皆由平时气血亏虚，加以气血凝滞，最危险者，气上冲逆，坐不得卧，咳不得息，幸无面红烦热，而不阳飞阴随。脉象颇具滑芤，重按殊觉无神，面无华色，舌有白苔。阳气虚于上，阴气耗于下，俾得扶过三朝，或无变生枝节。血虚之体，无须化瘀。气滞已见，务宜顺气，气顺则血行，气调则血和，暴产赖乎阳气，益气万不可少。

人参 干姜 五味子 牛膝 川芎 当归 川贝 附块 紫石英 甘草 橘皮 枳壳

《金子久专辑》

丁泽周

徐右。产后两月余，遍体浮肿，颈脉动时咳，难于平卧，口干欲饮，大腹胀满，小溲短赤，舌光红无苔，脉虚弦而数。良由营阴大亏，肝失涵养，木克中土，脾不健运，阳水湿热，日积月聚，上射于肺，肺不能通调水道，下输膀胱，水湿无路可出，泛滥横溢，无所不到也。脉症参合，刚剂尤忌，急拟养肺阴以柔肝木，运中土而利水湿，冀望应手，庶免凶危。

南北沙参各三钱 连皮苓四钱 生白术二钱 清炙草五分
淮山药三钱 川石斛三钱 陈广皮一钱 桑白皮二钱 川贝母三钱
甜光杏三钱 大腹皮二钱 汉防己三钱 冬瓜子皮各三钱
生苡仁五钱 另用冬瓜汁温饮代茶。

二诊：服药三剂，小溲渐多，水湿有下行之势，遍体浮肿，稍见

轻减。而咳嗽气逆，不能平卧，内热口干，食入之后，脘腹饱胀益甚。舌光红，脉虚弦带数。皆由血虚阴亏，木火上升，水气随之逆肺，肺失肃降之令，中土受木所侮，脾失健运之常也。仍宜养金制木，崇土利水，使肺金有治节之权，脾土得砥柱之力，自能通调水道，下输膀胱，而水气不致上逆矣。

南北沙参各三钱 连皮苓四钱 生白术二钱 清炙草五钱
川石斛三钱 肥知母一钱五分 川贝母二钱 桑白皮二钱
大腹皮二钱 汉防己二钱 炙白苏子一钱五分 甜光杏三钱
冬瓜子皮各三钱 鸡金炭二钱

《丁甘仁医案》

范文甫

一妇人，产后患肿胀，腹大如鼓。云初起于腹，后渐及遍体，按之没指而软，诸医以为是水胀也；皮不起亮光，以为是气胀也；而皮不过急，以为是血鼓也。去产后后，恶露极旺，上法治之皆无效果，反而气紧加甚。今气喘，舌淡红，脉近扎，初按之急甚，重按极虚。余思之良久无法，后忆及《冷庐医话》有治产后肿胀，用生黄芪 30 克煎汁，煮糯米半杯，成粥，淡食。依法治之，五日霍然若失。

《范文甫专辑》

张汝伟

汪菊英，年四十一岁，安徽，住瑞金二路一四二弄 11 号。大产后一月，脾胃虚弱，湿热不化。头面足踝浮肿，色黄如疸象，诊脉细软，苔绛。宜健脾运中，以化湿热治之。

炒白术 炒白芍各三钱 炒枳壳 香橼皮新会皮各钱半 地枯
萝 茯苓皮 大腹皮 猪赤苓 冬瓜子皮各三钱 益元散包，四钱
川木通八分

二诊：服前方后，肿势已减退六七，胸中之气闷，亦较宽松，但

仍有些恶寒，此水湿虽行，营分反有如波澜之象，故见形寒，苔薄腻，宜仍前意加減。

炒川芎一钱 新会皮炒 炒白芍 苍白术各二钱 大腹皮 冬瓜皮 福泽泻炒 牛膝梢 生熟苡仁各三钱 炒枳壳钱半 炮姜炭四分

三诊，肿已退净，形寒之象亦无，腹中又觉微痛。按此病因产后已四十余日，瘀露早净，但未畅通。前者湿热积而不化为肿，今肿退血虚，而为腹中之痛，亦必然之理也。今宜养血理气为主，仍佐以化湿利便为要。

当归须 赤白芍各二钱 细生地炒 羌蔚子 猪赤苓 冬瓜皮各三钱 炒川芎 川通草各一钱 川广郁金 炒枳壳各钱半 生延胡钱半，同 广木香五分，打

四诊，诸恙俱安，据述舌白，胃气不香，为之悬方，用胃苓散加減。

本证始末：此证自始至末，共诊四次，计八天，其疾全愈，中间先腹胀足肿，肿退后，形寒如外感，寒去则又腹痛，变得快，治得快，终于八日愈，而十日全部复元，照常工作。

方义说明：此证三诊三方，各有不同，看似见证治证，等于头痛治头，实则对于产后二字的主要关键，始终不肯放松，此为治病要法，不可不知也。

《临症一得》

产后尿血

周镇

都麒麟室人，素体阴亏，产后漫血，又如浓泔赭色，劳动则甚，补摄则减，兼有气忿，头痛齿疼，胃痛撑胀，便燥少寐。肝燥化风，脏液不足，中虚生湿，口腻是征。宜为调补三阴，参以安中益气，疏肝

以固血室。大生地、首乌、阿胶、鱉胶、潼蒺藜、早莲、菟丝、牛膝、丹皮、杞子、小蓟、血余炭、芡实、龙骨、巴戟、萆薢、川断、甘菊、香附、黄芪、益智、远志、于术、鸡内金、青盐、金铃子、骨碎补、天冬、归、芍、牛角腮、黑木耳、柏子、枣仁、珠儿参、合欢皮、乌梅、百草霜、河车、蜚壳炭、龟版胶牡蛎粉炒，研末，桑椹膏开水化，泛丸，晒。晨晚各服四钱。竟愈。

《周小农医案》

产后大便难

程从周

吴君楚乃政年四十外，产后大便闭结半月，百计莫能通，或养血，或清热，或外治用蜜枣，或通利用硝黄，而闭结益甚，胀急殊苦。余脉之，用补中益气汤重加麻仁，一剂而通，或曰：“用此汤即更衣，期何术也？”予曰：“连日因其闭结，无非寒凉降下之品。况中年产妇元气已虚，降下之药非惟便不能通，而气益下坠，肛门不胀胡可得邪？余用此汤提其清气，清气既升，大便随解，正所谓清阳既升上窍，而浊阴自出下窍矣。古云：医者，意也。其斯之谓乎？”

《程茂先医案》

陈念祖

瑞州一妇产后半月余，胃中有清水作逆而吐，以为胃寒，令煮鸡倍用姜、椒。初觉相宜，至三、五日，清水愈多，以姜、椒煎汤，时时饮之，近一月，口气渐冷，四肢发厥，昼夜作逆，腹中冷气难堪，有时战栗，用四物汤，人参一钱至二钱。初服少安，久则不应。又加炮姜，亦不效。众议用附子理中汤，主人自度非寒证，请予。予诊六脉俱无，以食指复按尺部，中指、无名指按尺之后，脉来实数有力，左右皆同，发言壮厉，一气可说三、五句，唇焦颊赤，大便五、六日一次，

小便赤少，此实热证也。询之，其俗产后，食胡椒炒鸡为补，此妇日食三次。半月后，遂得疾。予用三黄汤治之，连进四盏，六脉俱现，姜椒汤不欲食矣。又进四盏，身不战栗，清水减半，服四日。口中热气上升，满口舌尖俱发黄小栗疮，大便八日不通。以四苓合凉膈散，空心一服，至午不动。又以甘草煎汤，调元明粉五钱热服。一时许，腹中微鸣，吐出酸水一、二碗，大便连去二次。又服元明粉五钱，所下皆黑弹粪十数枚。后以四苓散、三黄、山栀、枳壳，调理一月痊愈。

《陈修园医案》

黄凯钧

某氏，产后大便燥结，当气血双补。

黄芪四钱，蜜炙 熟地五钱 归身二钱 橘皮一钱 苏子一钱五分
煨姜二片

四服不但便通，神亦旺。

《肘后偶钞》

张晚香

凡病之起於产后，总属虚症，以去血过也。转侧则淋如注；而大便之难，古人每以益血润肠如攻下，殆今之产科每不知也。至肠上下有块，按之不痛，属肝气之不舒，自觉气闷，不能消遣，即此再拟前法加减。脉弦是肝病之象，蛔虫属肝，虫由于湿热。

大生地六钱 归身三钱 怀山药五钱 炒沙苑子五钱
生牡蛎六钱 阳春砂八分，同煎，炙龟板四钱 川续断三钱 生龙骨三钱
陈皮一钱半 生白芍三钱

《张晚香医案》

吴鞠通

王氏。郁冒自汗出，大便难，产后三大症俱备。因血虚极而身

热发厥，六脉散大。欲云产后惊风，不知皆内症也。断断不可误认外感症，议翕撮真阴法。

大生地六钱 麦冬不去心，三钱 白芍二钱，炒 生龟版五钱
阿胶三钱 五味子制，一钱 生牡蛎三钱 鲍鱼三钱 炙甘草一钱
鸡子黄二枚，去渣后搅入，上火二三沸 海参二条 煮三杯，分三次服。

又：夜间汗多，加龙骨三钱。

又：产后郁冒，自汗后，六日不大便，血少而淡。一以增津补液为主。

元参五钱 大生地六钱 洋参一钱 麻仁五钱 炒白芍三钱
鲍鱼四钱 麦冬不去心，四钱 生龟版三钱 海参三条 阿胶三钱
五味子一钱五分 炙甘草一钱五分 白蜜一酒杯，得大便去此 煮三大杯，分三次服。见大便去元参。

又：于前方内去洋参、甘草。

《吴鞠通医案》

范文甫

张康甫妇。新产患虚证，治之者反以攻表出之，犯虚虚之禁。今见舌胀大而色淡，虚证一；脉洪无力，不耐重取，虚证二；大便不通，无气推下，虚证三；口噤，是牙关硬，不能大开，非咬牙之比，其虚证四；遍体麻木，血失濡养之权，气失温煦之力，其虚证五。头痛亦是虚阳上冲。全是虚证，而反以攻表之剂投之，宜乎？故愈医愈剧也。不得已，姑救之。

桂枝 4.5 克 白芍 12 克 炙甘草 4.5 克 当归身 9 克 生姜 6 克
红枣 8 枚 化龙骨 9 克 饴糖 2 匙 真阿胶 6 克

《范文甫专辑》

叶熙春

姚，女，二十二岁。八月。杭州。新产血虚，营阴内伤，迄今近

旬，恶露未净，大便秘结，少腹作胀，舌淡红，苔薄白，脉象细涩。治拟养血润肠。

炒柏子仁 12 克，拌 火麻仁 9 克 炒枣仁 9 克，拌 炒桃仁 6 克，拌
全栝蒌 12 克，打 松子仁 9 克，打 紫丹参 12 克 炙当归 12 克
蜜炙枳壳 5 克 益母草 9 克 蜂蜜 30 克，分冲

二诊：服后肠道得润，大便自通，少腹之胀亦宽，脉细缓。原意出入续进。

炙当归 12 克 紫丹参 15 克 炒柏子仁 9 克，拌 枸杞子 9 克
炒玉竹 9 克 羌蔚子 9 克，拌 新会皮 5 克 砂仁 1.5 克，捣
熟地 15 克，包 松子仁 9 克，拌 粉甘草 2.4 克

《叶熙春专辑》

产后泄泻

陆养愚

臧舜田内人，脾胃素常不实，产后因怒，大便泄泻，或以胃苓汤加归芍投之，势日甚，且汗出气喘，脉气散大。或谓此非产后泄泻所宜，宜勿药。陆曰：脉虽大而按之不甚空，尚有一二分生意。用人参理中汤加诃子肉果，已煎矣，忽传人事已不省，再诊之，浮按虚数，沉按如丝，手足厥逆，或谓今夜决不能延，乃辞去。陆令急以前药加附子一钱，一剂汗止泻减，再剂病减七分，去附子加归芍，数剂起。

《续名医类案》

陈三农

一妇产后滑泻，勺水粒米不容，即时泻下，半月余矣。六脉濡而弱，此产劳力伤脾也。若用汤药恐滋胃湿，遂以参苓白术散加肉蔻、生姜、枣肉为丸，服愈。

《续名医类案》

薛立斋

一产妇大便不实，饮食少思，五更或清晨遗尿，此中气虚寒，脾肾不足，用补中益气送四神丸而痊。

《续名医类案》

张子和

李德卿妻，因产后病泄年余，四肢瘦乏，皆断为死症。张曰：两手脉皆微小，乃利病之生脉。况洞泄属肝经，肝木克土而成此病，亦是肠癖。癖者，肠中有积水也。先以舟车丸四十五粒，又以无忧散三四钱，下四五行。又进导饮丸，渴则调以五苓散，再与胃风汤，调之半月而能行，一月而安健。

《续名医类案》

王孟英

夏间，牙行倪怀周室，新产数日，泄泻自汗，呕吐不纳，专科谓犯“三禁”，不敢肩任。孟英诊：脉虚微欲绝，证甚可虞，宜急补之，迟不及矣。用东洋参、(炙)芪、(白)术、龙(骨)、牡(蛎)、酒炒白芍、紫石英、桑枝、木瓜、扁豆、茯神、黑大豆、橘皮，投之，四剂渐已向安。余谓新产后，用参、芪大补，而又当盛夏之时，非有真知灼见者，不能也。诚以天下之病，千变万化，原无一定之治，奈耳食之徒，唯知执死方以治活病，岂非造孽无穷？亦何苦人人皆欲为医而自取罪戾耶？

《王氏医案》

曹南笙

某右。产后下焦阴亏，奇脉不固。阳浮上升，风动则飧泄嘈杂，液损必消渴骨热。治在肝肾，静药固摄。

熟地 湖莲 炙草 五味 芡实 山药 旱莲 女贞

《吴门曹氏三代医验集》

瞿竹亭

余胞妹家住长垣，三十四岁。腊月临床后，受寒，大解时有泄泻，不甚介意。由此渐加沉重，每夜间泻三次，日间一、二次，百方调治，服药无算，有效有不效，终不痊愈。适逢余子完婚归宁来杞。诊得脾脉虚弱无力，命门脉细微，幸而均有神。此因火衰不能生土之故。命门火乃水之火，东垣先生云：此火乃雪里花开，水中火发，生命之根，元气之本，人生莫大之关要。倘专补火，恐阴有告竭之患，但补阴恐火有衰灭之虞。余用景岳先生左右归饮加减作丸药治之，初服半斤，稍有效验。一斤服尽，病去二三。共服五斤余，十八年沉痾已获十全。

熟地 60 克 山药 30 克 丹皮 15 克 茯苓 15 克 泽泻 12 克
附子 24 克 白术 30 克 巴戟天 30 克 破故纸 18 克 油桂 18 克
炮姜 15 克 五倍子 24 克 当归身 30 克 炙甘草 30 克 白芍 24 克
辽五味子 15 克 丁香 10 克 砂仁 15 克

上药共为细末，炼蜜为丸如绿豆大，每日辰戌各服 15 克，茶水送下均可。

《湖岳村叟医案》

产后便血

红杏村人

瞿右，产后败瘀未净，流入冲任之络，先患赤白带下，继增便血似痢，已愈两月。有加无减。少腹凝块坚聚作痛，升降无常。心悸多汗，体倦畏寒。种种见端悉由营阴伤损，卫阳无所附丽使然。脉虚小数苔白中空。气血交亏，瘀滞内阻，攻补两形棘手，勉方候高明

采用。

阿胶 蒲黄末炒 艾炒炭 原地炮姜汁炒 当小茴香炒 茯神 旋复
猩猩 香附 白芍桂酒炒 琥珀 川楝 淮麦

又复：便血起于产虚之下，延及三日，虚而益虚矣。少腹凝块偏左，仍然攻痛，谷气减纳，胸脘反形饱闷，心悸自汗频多，脉虚数舌白尖红。阴分大伤，胃气不振，近交冬至大节，深虑陡起虚波，拟养心脾以资化源，和肝络以息余痛，并候高裁。

阿胶 归身 丹参 茯神 枣仁 白芍 芪皮 石斛 香附
琥珀

《医案》

产后下痢

汪石山

一妇，产后滑泄，勺水粒米弗容，即时泄下，如此半月余。众皆危之，或用五苓散、平胃散，病益甚。汪诊之，脉皆濡缓而弱。曰：此产中劳力以伤其胃也。若用汤药，愈滋胃湿，非所宜也。令以参苓白术散除砂仁，加陈皮、肉豆蔻，煎姜枣汤调服，旬余而安。

一妇产后时发昏瞀，身热汗多，眩晕口渴，或时头痛恶心。医用四物凉血之剂，病不减，复用小柴胡，病益甚。汪诊之，脉皆浮，洪搏指（若见此脉元气立脱）汪曰：产后而得是脉，又且汗多而脉不为汗衰，法在不治。所幸者，气不喘，不作泄耳。其脉如是，恐为凉药所激也。用人参三钱，黄芪二钱，甘草、当归各七分，白术、麦冬各一钱，干姜、陈皮、黄芩各五分，煎服五剂，脉敛而病渐安。

《名医类案》

薛立斋

一产妇，食鸡子腹中作痛，面色青黄，服平胃、二陈，更下痢腹

胀。用流气饮子，又小腹一块，不时上攻，饮食愈少，此脾胃虚寒，肝木克侮所致。用补中益气加木香、吴茱萸，渐愈。又用八珍大补，兼服调理而安。

《续名医类案》

龚子才

一产妇血痢，小便不通，脐腹疼痛，以生马齿苋捣烂，取汁三大合煎沸，下蜜一合调，顿服即愈。

《续名医类案》

薛立斋

一产妇，尿后下血，诸药不应。饮食少思，肢体倦怠，此中气虚弱，用补中益气汤加吴茱萸、炒黄连五分，四剂顿止。但怔忡，少寐盗汗，用归脾汤治之而愈。

《续名医类案》

孙文垣

族女小产后二十日矣，患赤痢，一日十余次，怯寒恶食，小腹胀痛，诊之右寸滑大，知其虚中有热，盖缘恶露未尽，故小腹胀痛，专科泥丹溪产后大补气血之语，概施之，因而作痢，乃翁曰：病尚怯寒，何云有热？曰：恶寒非寒，反是热症，盖火极似水也（时师多昧此旨同）。饮药后当知之。以白芍、当归、滑石为君，桃仁、酒连、酒芩为臣，木香、桂皮、槟榔为佐，青皮为使，服下果去黑瘀血甚多，小腹顿宽。惟口干小水少，恶心怕饮食，体倦，仍里急后重。人参、川芎、白芍各一钱，当归一钱五分，酒连、陈皮各六分，木香二分，外与清六丸，服下热除，痢减十之八矣。但大便不实，恶心虚弱，以四君子汤加酒芍、陈皮、木香、肉果、酒连、当归，养之而平。

《续名医类案》

陆养愚

李尚田乃正产后患痢，延及年余，肢肌羸瘦，面色黧黑，咸以不可为矣。脉之两手皆微小，而右关尺之间尚觉有力如珠，舌中常起涎胎，曰：微小乃久痢生脉，脉滑胎黑，必沉积在肠，久而未去也。若大下之，病当愈。李谓初病亦常服通利，今饮食不进者数月矣，安所得积乎？因前方大都纽于产后，大补气血为主，即用消导，多杂参、芪、归、芍，补不成补，消不成消，致元气日衰，积滞日固，至收敛湿淫宜其剧也。乃以润字丸一两，分三服，令一日夜服尽。下紫黑如膏数缶许，口渴甚，煎生脉散，作茶饮之。胃渐开，又以润字日服一钱，每日下稠积缶许，十日后方用补养，一月而痊。

《续名医类案》

张路玉

大兵船上一妇，胎前下痢，产后三日不止，恶露不行，发热喘胀，法在不救。服药一剂，反加呃逆。诊之其脉三至一代，欲辞不治。因前医被留，不与排解，必致大伤体面，乃曰：此症虽危，尚有一线生机，必从长计议，庶可图治。彼闻言，始放其医而求药。遂与蠹一枚，钱数文，令买砂糖熬枯，白汤调整服，既可治痢，又能下痢，且不伤元气，急与之服。彼欣然而去。医得脱而遁，至大兵去乃归。

《续名医类案》

薛立斋

一产妇痢，未至满月，因食冷物及酒，冷热与血攻击，滞下纯血，缠坠极痛，其脉大无力，口干，用黄芩芍药汤，三服而安。（未选入）

《续名医类案》

黄凯钧

某氏，产后起腹痛便溏，时兼痢下，脉细而虚，当从脾家所喜。

茅术八分 厚朴八分 橘皮八分 茯苓二钱 谷芽二钱
砂仁壳一钱五分 白芍一钱五分 炙草四分
四服愈大半，改用香砂六君而痊。

·《肘后偶钞》

林佩琴

邹氏。冬寒当产，艰难损动元气，嗣以月内便泄。交春寒热往来，痰嗽汗泄，晡时火升，颊红唇燥，食入呕满，小腹痛坠，泻利稀白无度，支离委顿。所服丸剂，一味混补，不顾滋腻，岂胃弱火衰，食已不化，小腹重坠，气更下陷，尚堪滑腻增泻，浸至蓐劳莫挽矣。急用温中运脾，痛利可减，呕满可除。炮姜、小茴、益智仁、茯苓、白术、半夏曲、谷芽俱炒、橘白，数剂利止，寒热减，食亦知味。去炮姜、小茴、谷芽、半夏曲、白术、橘白等，加砂仁、熟地黄、潞参、五味、丹皮、山药、莲子、钗斛，虚阳渐退，并去益智、茯苓，加甜杏仁，茯神、白芍、百合，嗽止调理而康。

《类证治裁》

李铎

高世昌上舍内室，新室二日，脉虚浮而大，是为忌脉。且胎前患痢，延至产后不止，全不纳谷，势成噤口，胃气已伤，尤属犯手，据述胸膈胀满作痛，身热腹痛，滞下多白，实有余邪未尽，以产后脉虚噤口，又不敢逐邪，致犯虚虚之戒。姑议大扶元神为主，少佐调气理胃，其余皆未治也。

山参 当归 川芎 姜炭 吴萸 安桂 山楂炭 木香
甘草炙 白芍酒炒

又 初七日复诊，左手脉略见有神，右脉仍虚浮散大，痢虽稍疏，而胃气不变，总是险途。且神昏气怯，呃逆时闻，中气戕败可知。诸书载胎前患痢，产后不止者危，危是死字；若元气未败，脉有胃气，能进粥食者生。举此可知其概矣。除顿养元神，重扶胃气，更无他策也，法以候裁。

人参 黄芪 白术 炮姜 附子 丁香 白蔻 炙草

伏龙肝一大块，煎水澄清，炆药，服后呃止食进，四剂诸病悉除，再用补中益气，元气悉复。

《医案偶存》

雷丰

豫章邓某之室，小产后计有一句，偶沾风痢之疾，前医未曾细辨，以腹痛为瘀滞，以赤痢为肠红，乃用生化汤，加槐米、地榆、艾叶、黄芩等药，服下未效。来迎丰诊，脉之，两关俱弦，诘之，胎未堕之先，先有便泻，泻愈便血，腹内时疼，肛门作坠。丰曰：此风痢也，良由伏气而发。亦用生化汤除去桃仁，加芥炭、防风、木香、焦芍，败酱草为引，服二帖赤痢已瘳，依然转泻。思以立有云：痢是闭塞之象，泻是疏通之象。今痢转为泄泻，是闭塞转为疏通，系愈机也。照旧方除去防风、败酱，益以大腹、陈皮，继服二帖，诸恙屏去矣。

《时病论》

张乃修

右。胎前痛痢，因病而产，产后痢仍不止，里急后重，粘腻色赤而黑。气瘀交阻，极重之证。备方以冀造化。

延胡索一钱五分 砂仁后入，七分 茯苓四钱 查灰三钱
乌药一钱五分 煨木香五分 广皮一钱
赤砂糖五钱，上三味同炒枯，研末装入煎包入煎 泽兰二钱
伏龙肝一两，煎汤代水。

另用查炭三钱，赤砂糖六钱，二味同炒枯研末，米饮为丸如桐子大，每服三钱，药汁送下。

复诊。痛坠已退，腹满亦减，然痢数仍在十次以外。气瘀未化，而脾虚气弱，不克分清。虽见转机，尚不足恃。

于术土炒，二个 煨木香五分 延胡索酒炒，一钱五分
土炒陈皮一钱 泽泻一钱五分 茯苓四钱 桂枝五分
赤芍土炒，一钱五分 泽兰叶二钱 伏龙肝一两五钱，煎汤代水

仍用前法查炭砂糖丸。

三诊：恶露稍畅，痛痢渐止。出险履夷，殆所谓天授，非人力也。

土炒于术二钱 酒炒延胡一钱五分 查炭三钱 炮姜五分
砂仁七分 泽兰叶二钱 茯苓三钱 丹参二钱 降香一钱五分
桂枝五分

《张聿青医案》

余听鸿

常熟大东门外万兴祥茶叶铺执事胡少田先生之妻，素未生育，至三十九岁始有娠。怀孕七月，始则咳嗽，继则下痢，初则不以为意，临产颇难，产下未育，心中悒郁，肝木乘脾，咳嗽下痢更甚。邀余诊之，余曰：虽云新产，年近四旬，气血本弱，况产前咳嗽，本属土不生金，子反盗母气，脾肾反虚，清气下陷，转而为痢，咳痢已有三月，又兼新产，名曰重虚。若多服益母草等味。再破血伤阴，《内经》所谓损其不足，且有无虚虚、无盛盛之戒。余进以十全大补汤，去肉桂，加枸杞、菟丝、杜仲、饴糖等味。众曰：产后忌补，断断不可。余曰：放心服之，如有差失，余任其咎。服后当夜咳痢均减。明日再进。其姑曰：产后补剂，胜于鸩毒，必致殒命。余谓少田曰：既令堂不信，君可另请妇科开方，暗中仍服补剂，免得多言，使产妇吃惊。同道董明刚曰：此计甚善。余即回城，托明刚依计而行。余回寓，使人赠少田人参二枚，曰：不服人参，下焦之气，不能固摄。少田即煎人参与

服。其母知之，执持不可，后将《达生编》与众人阅看，产后并不忌补，其母始信。服后安然无恙。后再服数剂，咳痢均愈。此症若泥于产后忌补，或惑于人言，冷眼旁观，以徇人情，受人人谤，将何以报少田之知己乎。然产后服人参败事者，亦复不少。惟药不论补泻，贵乎中病，斯言尽之矣。

《余听鸿医案》

金子久

胎前泄泻，绵延三四月；产后下利，经有十六朝。久下伤阴，阴虚则生火，火性急速，下而不禁，火升面红，烦冒艰寐。脉象滑疾，重按柔软，舌质干燥，苔见松白。咽喉有糜，两腮有点，阳脱阴耗宜防，育阴潜阳为亟。

盐水炒川连 生地炭 龙齿 牡蛎 蛤粉 炒驴皮胶 枣仁
白芍 麦冬 炙甘草 云神 橘红 谷芽

《金子久专辑》

黄仲权

阎氏妇，年二十四岁，住宿城。

病名：产后伏暑痢。

原因：夏月感受暑湿，至秋后晚时，恶露太多，膜原伏暑，又从下泄而变痢。

症候：痢下红白，里急后重，日夜四十余次，腹痛甚则发厥，口极苦而喜饮，按其胸腹灼手。

诊断：脉息细数，细为阴虚，数则为热。此张仲景所谓“热痢下重者，白头翁汤主之”是也。然此症在产后，本妇又每日厥十余次，症已棘手，严装待毙，僵卧如尸。余遂晓之曰：病热危险极矣，然诊右脉尚有神，或可挽救，姑仿仲景经方以消息之。

疗法：亟命脱去重棉，用湿布复心部，干则易之，方用大剂白头

翁汤加味，苦寒坚阴以清热为君，甘咸增液以润燥为臣，佐以酸苦泄肝，使以清芬透暑，力图挽回于万一。

处方：白头翁四钱 北秦皮二钱 炒黄柏二钱 金银花六钱
川雅连一钱，盐炒 生炒杭芍各三钱 益元散三钱 陈阿胶一钱，烊冲
淡条芩二钱 鲜荷叶一张

效果：次日复诊，痛厥已除，痢亦轻减，遂以甘凉濡润，如鲜石斛、鲜生地、鲜藕肉、鲜莲子、甘蔗等味，连服五剂，幸收全功。然此症虽幸治愈，同业者谤声粉起，皆谓产后不当用凉药。噫，是何言欤，皆不读金匱要略之妇人方，故执俗见以发此排议。甚矣，古医学之不讲久矣。

廉按：胎前伏暑，产后患阴虚下痢者颇多，此案仿金匱治产后下治虚极，用白头翁加甘草阿胶汤，合伤寒论黄芩汤增损之，以清解热毒，兼滋阴血而痊。足见学有根柢，非精研仲景经方者，不能有此胆识。

《全国名医验案类编》

陈在山

刘李氏，年三十三岁，孀居，住辽阳城内。

病名：产后暑湿痢。

原因：其夫歿后将六个月，忧郁成疾，身有妊娠之累。临产时，更受暑气熏蒸，兼之素嗜饮冷水，脾湿久已化热，而产前曾患腹痛泄泻，至产后转泻为痢矣。

症候：里急后重，下痢频频，红白相兼，思饮冷水，干呕恶食，小溲红涩，头汗不止，身热气促。

诊断：脉现弦滑洪大，舌苔黄白相兼而腻。脉症合参，虽谓产后多虚，而症属有余，外邪夹内郁，酿此最危之重症。先哲云：痢不易治者有三，曰产后、疹后、烟后。惟产后为最甚，因用药诸多禁忌，医故难之。今以脉象病形，不避俗说，不拘成法，对症发药可也。

疗法：治病不可执守成方，务在临症变通。古人傅青主，以生化汤加减治产后痢，治血瘀之痢也。薛立斋用胶艾四物等汤治产后痢，治血虚之痢也。其方与暑湿，毫不相涉。今受暑湿夹气郁，当以清暑利湿为主，兼开郁化滞之品。方用藿香天水散（即益元散）、木通，清暑解热，苓皮、薏苡、车前，利湿快脾，白芍、牡蛎，敛阴止汗，木香、厚朴，行气开郁，甘草和中，黄连坚肠，竹茹解烦呕，焦查消宿积，花粉除渴，扁豆止泻。

处方：广藿香钱半 浙苓皮三钱 薏苡仁四钱 车前子四钱
天水散三钱，包煎 汉木通一钱 生白芍三钱 川厚朴二钱
鲜竹茹二钱 炙甘草八分 生牡蛎三钱，打 川黄连一钱

次方：浙苓皮三钱 川厚朴二钱 生薏仁四钱 车前子四钱
生白芍三钱 鲜竹茹二钱 炙甘草八分 广木香八分 焦山楂三钱
生牡蛎三钱，打 天花粉三钱 炒扁豆三钱

效果：服前方三剂，身热退，腹痛止，痢转为泻。再服第二方五剂，诸症皆效，前后共十余日而痊。

廉按：胎前伏邪，产后陡发，其脉有不即露者，惟舌苔颇有可征，或厚白而腻，或黄腻黄燥，或有黑点，或微苔舌赤，或口渴，或胸闷，或溲热，或便赤，或热泻转痢，此皆温湿暑热之邪内蕴。世人不察，辄饮以生化汤之类，则轻者重，而重者危。不遇明眼人，亦但知其产亡，而不知其死于何病，误于何药也。我见实多，每为惋惜。此案由暑湿伏邪，先泻后痢，治法注重伏邪，不拘于产后常痢，诊断独具卓识，方亦清稳平和。

《全国名医验案类编》

陈在山

刘李氏，三十三岁，孀居，奉天辽阳城内住。即刘玉振之儿媳也。

病名：产后痢。

原因：乃因其夫歿后，将六个月，忧郁成疾，身有妊娠之累，临

产时，更受暑暍之气薰蒸，兼之素嗜冷水，脾湿久已化热，而产前曾患腹痛泄泻，至产后转泻为痢矣。

证候：里急后重，下痢频频，红白相兼，思饮冷水，干呕恶食，小水红涩，头汗不止，亦有身热气促之症。

诊断：脉现弦滑洪大，虽谓产后多虚，而证属有余，况有胸怀宿怒郁滞之疾，又感外邪暑暍之气，当此气血虚乏之际，而阴阳必致不和，外邪以夹内郁，酿此最危之重证。先哲云：痢疾不易治者有三，曰：产后、疹后、痢后，惟产后为尤难者何也？因其用药诸多禁忌，医故难之，今以此肺象病形，当不拘成法，不避俗说，对病施方，竟全愈矣。

疗法：疗病之道，不可板定成方，务求临证变通为要，古人留有成方，而无成病。按付青主以生化汤治产后痢，治血瘀之痢也，薛立斋用胶艾四物等汤治产后痢，治血虚之痢也，皆属里证，与暑湿表邪毫无相涉，今者外受暑湿之邪，内夹气火之郁，法当清暑利湿解热为主，兼开郁化滞之品治之，方用藿香、天水散、木通清暑解热，皮苓、薏苡米、车前利湿润脾，白芍、牡蛎敛阴止汗，木香、厚朴行气开郁，甘草和中，黄连养脏，竹茹解烦呕，山楂消宿积，花粉医渴，扁豆止泻。

处方：藿香钱半 皮苓三钱 薏苡 车前各四钱 天水散 木通 白芍 厚朴各三钱 竹茹 甘草 生牡蛎 黄连各二钱

又方：皮苓 生芍 厚朴 山楂炒 花粉 扁豆各三钱 薏苡 车前各四钱 竹茹 甘草各二钱 木香钱半

结果：服前方三剂，身热退，腹痛止，痢转为泻，再服第二方四五剂，诸症皆效，前后共十余日，大获全可。

《医学杂志》

刘世祯

甲午岁作客长沙，有劳德扬之媳，产后患病，发热、下痢不止，

延医诊治月余未愈，几濒于危。请余诊之，脉浮而大不数，知为太阳与阳明合病，《伤寒》云：太阳与阳明合病，必自下利，葛根汤主之。遂用葛根汤加高丽参治之，因久病元气亏故加参，服一剂而下利止，服二剂发热亦除。复诊：脉转弦涩，弦为余邪移于少阳，涩因产后营气虚，用小柴胡汤加当归治之。服数剂告痊。

《医理探源》

周镇

夏妇，住上俞巷。年廿三岁，怀孕七月，因瘧症下痢流产，恶露不下，热痢不止。《医通》有七日不止必危之戒。脉数，苔黄，渴喜热饮。伏热瘀积交阻，危险防变。青蒿四钱，辰滑石四钱，青皮钱半，大腹皮三钱，软柴胡五分，归尾三钱，楂肉三钱，赤沙糖三钱炒枯，赤芍炭二钱，失笑散七钱，白头翁五钱，干荷叶三钱，夜明沙五钱，红曲四钱，伏龙肝一两。楮叶七十片，山黄土三两，煎汤代水。香连丸钱半，吞服。另没药一钱，琥珀五分，蜜虫一钱，炙，藏红花三分，研末，赤沙糖调服。廿七日诊：服药热减，恶露少，痢见瘀血，转由便解之象。苔黄，脉虚数。伏热经邪入腑，再为清热导积行瘀。青蒿四钱，滑石三钱，柴胡五分，青皮钱半，大腹皮三钱，失笑散六钱，红曲四钱，白头翁五钱，楂肉四钱，赤沙糖三钱炒炭，夜明沙六钱，全当归三钱，牛角觥三钱，川芎钱半，没药三钱。另血竭二钱，玄胡三钱，明雄黄二分，研末，分二次，赤沙糖调汤送服。热减痢止，愈。

《周小农医案》

翟竹亭

葛岗李世清妻，患产后痢，日夜十余次，三月未愈，服药不下四、五十剂，均无效验。迎余治疗，至时见病者肉脱骨存，面黄唇白，绝无血色，言语低微，每日食而不过三、四两，诊其六脉虚细欲脱，辞不治。伊夫泣告曰：“堂上有七十双亲，下有二子三女，家贫如洗，

井臼之操，全仗贱荆一人。倘一病不起，床前蹉跎之役，岂男子所为。祈先生大施仁慈，即不愈不敢归咎，万一全愈，没齿难忘。”余曰：“既诚心恳求，以穷吾术，吉凶不敢预定，试治之何如。”遂用桂附八味汤加減。服二帖后，病虽不轻，亦不加增。又服二帖，略有效。十帖之后，病去五六，二十余帖，诸症如失。又调养月余，方能行动。

桂附八味汤加減

熟地 12 克 山药 10 克 茯苓 10 克 山萸肉 10 克 泽泻 6 克
油桂 6 克 附子 6 克 肉蔻 10 克 诃子 10 克 白术 12 克
五味子 6 克 炮姜 10 克 砂仁 6 克 炙黄芪 10 克 禹粮石 12 克
赤石脂 10 克 炙甘草 10 克 水煎服

《湖岳村叟医案》

丁叔度

诊一产后病人，神昏不识人，舌苔黑滑，身大热，脉洪大，沉取乃空，大便日夜 30 余行，泻痢兼见。

神昏舌黑，脉洪大，似有热也，然舌黑而滑，脉大而空，下有泻痢，身有大热，此乃阴盛格阳，如用白虎及苦寒药，下咽必死。遂立一方，系大剂四君子加黄芪 15 克、白芍 10 克、肉桂 3 克、熟附子 3 克。一剂服后，泻止多半，表热亦少退，服两剂症又大轻，三剂而神清识人。后又连用甘温、辛热十余剂，黑苔始退，热退痢止而愈。

《津门医粹》

产后吐泻

中神零溪

一妇人，产后呕吐不止，饮食无味，形貌日削，精神困倦，医者皆以为产劳。师诊之，正在心下酸痛不可按，曰：“水饮也。”与小陷胸汤，佐以赫赫丸，乃已。

一妇人，产后呕吐，久不止。面色黄，大肉日脱，起卧无聊，医或以为骨蒸劳热，治之不验。师诊之，心下悸，按之有水块，如覆杯状者。与小半夏加茯苓汤，兼赫赫丸，数旬乃已。

《生生堂治验》

王孟英

吴馥斋室，新产后，呕吐不止，汤水不能下咽，头痛痰多，苔色白滑。孟英用苏梗橘（皮）、半（夏）、吴萸、茯苓、旋覆、姜皮、柿蒂、紫石英、竹茹，一剂知，二剂已。

《王氏医案》

周镇

王海山，绍兴酒业。妻年廿一岁，产后循绍俗吃胡椒末糖汤太多，顿觉肢冷，汗出欲脱。因素多白带，冬畏寒，夏畏热，阴阳两亏也。越旬余，半夜泄泻，杨医投石斛、干姜、砂仁之类。翌日转筋，呕泄肢冷，乃延余诊。九月十四日诊：产后霍乱，先泻后吐，足转筋，汗出厥冷，泻出腥面非臭，口渴不甚，饮则喜热。脉细而紧，苔淡白。述知曾食油腻，产后中虚，泻多四逆欲脱，汗出不寐，病势危险。勉拟回阳固表止泻大剂，商进。别直参一钱，于术三钱，生芪皮三钱，桂枝八分，白芍五钱，龙骨六钱，牡蛎一两，赤石脂八钱，禹余粮五钱，茯苓神三钱，制附片一钱，乌梅一钱，炒麦冬一钱，薏苡三钱。另瑤桂五分，血珀七分，雅连二分，车前子一钱，辰砂一分，研末水丸，另服。并嘱先以黄土煎汤冲酱油汤饮，不吐则进药。另备药二剂，防吐去再煎服。必得肢温漉通，方有生机。受药后，漉通寐安。因艰辍药，四肢未热，咽痛恶心。又延杨医，进鲜斛、元参、犀黄末、梨半枚。咽痛退，作干恶，烦躁不寐。十六日延余诊：产后吐泻自汗为三禁。此次产后吐泻，肢冷如冰，服回阳固表止泻，厥未全回，肢冷过肘膝，格阳于上，曾有咽痛，服鲜斛、犀黄、梨即退，烦躁干恶，冷汗

仍出，溲通复泄。谅由元阳不振，元阴亦衰。阳即未复，躁烦且欲去被，危状如绘。拟扶元固表，通阳和阴法。别直参一钱秋石水拌，北箭芪三钱，茯苓神三钱，煨牡蛎一两，冬虫夏草八分，霍石斛三钱，制附子五分，青盐一分，于术三钱，炒麦冬钱半，雅连四分，干姜汤炒，白芍五钱桂枝六分煎汁收入，五味子钱半，乌梅二枚。嘱其将剩余瑶桂丸一半服下。并未咽痛。服毕阳回肢温，遂得回生。

《周小农医案》

产后痙病

王孟英

何新之令媛适汤氏，孟冬分娩，次日便泄一次，即发热痙厥，谵语昏狂。举家惶惶。乃翁邀孟英察之，脉弦滑，恶露仍行。曰：此胎前伏暑，乘新产血虚痰滞而发也。与大剂犀（角） 羚（羊角）、元参、竹叶、知母、花粉、梔（子）、楝（实）、银花，投之。遍身得赤疹而痙止神清。乃翁随以清肃调之而愈。

《王氏医案》

李铎

黄氏，年二十，产后不语，手足痙疾，脉虚缓，此中风症也。仿古七珍汤加减，若能发出音声，方许可治。

高丽参 志肉制 菖蒲 川芎 生地酒洗 天麻煨 荆芥略炒
钩藤 防风 归身

又 服此方二剂，痙疾已止，神气稍醒，而口不能言，总是险途，与举卿古拜散二钱，豆淋酒调服，昏睡，醒则能言，但舌音未清，仍与前方加当归一服，诸病悉退，继以气血两补法调理而安。

按：举卿古拜散即华佗愈风散，荆芥略炒，为末，此药清神气，通血脉，治产后中风，口噤，牙关紧闭，手足痙疾，角弓反张，亦治产

后血晕，不省人事，四肢强直，或心眼倒筑，吐泻欲死。其效如神。

《医案偶存》

浅田惟常

一妇人产后患口眼喎斜，半身不遂。余与桂苓丸料加沉香、人中白而愈。以血分有病，人中白能治之也。（产前后口舌赤烂痛甚者，以人中白帖之效，以能入血分也。）

《先哲医话》

杨毓斌

郭筱园尊闾，产后三日，惊风人事不省，闭目咬牙齟齿，努力握固，僵若死状。医谓产后百脉皆空虚，风卒中。治以双补，兼风药辛开。药不能进，厥去一日，半夜不苏，家人仓惶置办后事。比予到时，已三鼓矣。诊得脉象缓滑实大，面色润泽，四肢温和。语曰：脉象有胃气未败，何致无救。此痰火壅闭，气机失运故耳，不可认作虚中。先宜通阴阳，豁痰熄风，时丁酉秋九月初六日夜半。方用：

姜制半夏五钱 姜汁炒竹茹三钱 霜桑叶三钱 茯苓四钱
陈皮一钱五分 勾藤四钱 甘菊花二钱 生姜汁一匙 用箸拨齿徐徐灌入。

初七日中，住诊，人事已苏，清泄两次，小腹隐痛，脉左滑大，左滑软。

炒桑叶二钱 贝母二钱 朱茯神五钱 法半夏四钱
陈皮一钱五分 土炒白术一钱五分 菊花炭一钱 甘草一钱
生麦芽三钱 炒楂肉一钱五分 南沙参三钱 生姜汁一匙

初八日，因语多劳神，复厥如初状，为时较浅，脉滑数而弦，用甘咸微寒平镇法。

南沙参五钱 寸麦冬三钱 甘草一钱 姜汁 炒竹茹三钱
桑叶三钱 菊花二钱 干地黄八钱 牡蛎一两 龙齿三钱

天竹黄一钱五分 羚羊角汁五分 朱茯神五钱 莲心五分

初九日，忽作狂状，谵妄、惊悸，躁扰不安，手舞足蹈，人不敢近。此郁火内伏，乘虚层叠而出，百变无常。总属心胆热邪。用清心泻胆直折法。

竹沥一茶杯 龙胆草三钱 牡蛎二两 龙齿五钱 朱茯神八钱
软白薇五钱 羚羊角汁五分 天竹黄三钱

初十日诊，昨用直折法，今证变太平，用甘寒柔镇以清理之。

按：昨狂状虽属热邪扰乱，然见人则引被蒙头自避，情甚恐怖，究属心胆阳虚，非真阳明狂证，不避亲疏可比，宜稍加振心阳为治，一剂知，二剂已。

紫石英二钱 煅龙齿四钱 朱茯神五钱 元参心三钱 莲心八分
连心麦冬三钱 炙甘草一钱 干地黄四钱 炙鳖甲四钱 白薇三钱
制半夏二钱 黑大豆二钱 炒贝母二钱 梨汁、竹沥各一大勺
姜汁一小匙

梁印甫大令尊闾。产后肢体拘挛不仁，两手不能抬转理发，饮食大减，经半载不能愈。商治于予，为悬拟膏方两料，遂获全瘳。

初方：黄芪 桂枝 炒白芍 炙甘草 生姜 饴糖 杜仲
续断 当归 牛膝 阿胶 茯苓 白术 谷芽

此方心脾为君，养肝和胃为佐。以心生血，肝藏血，脾统血。四肢不仁得于产后，自是血虚不荣筋脉之故。而血生于气，气血又皆生于谷味。用黄芪建中汤两和营卫，补气以生血，加杜仲、续断、当归、牛膝、阿胶养血和经络，熄风兼化积瘀；苓、术、谷芽调补脾胃，以疏肝气，运水谷，俾气血有所资生，药品气味温和，配合匀称，无偏杂之弊，甚足贵也。

次方：肥玉竹 瓜蒌根 苡仁 桑寄生 何首乌 大生地
海螵蛸 木瓜 合欢皮 木通 山茱萸 巴戟天 乌梅肉

按：久病必入络为热。此方全用和平通络，荣筋之法，以调治节，和筋脉脾胃为君，悦心脾，养肝肾为佐。盖肺主治节，阳明主宗

筋，胃为水谷之海。气血之所从生，必和风布护，气血周流，经脉自利。以继前方之后，宜其着手成春也。

《治验论案》

陈虬

黄叔颂令政，产后服姜糖饮过多，渐变痉厥。医以其有寒热也，投以小柴胡汤，不愈，继而认为血少，改投当归补血汤，而热益甚。乃乞诊治。脉数舌绛，长热不解，但渴而不能多饮，知为营液亏少所致。乃告之曰：“此证以误服姜糖饮过剂，夫人而知矣，其始发寒热者，阳虚则寒，阴虚则热，内伤非外感也。投补血汤而益热者，病当增液，不当补血。盖脉数而非涩也，归芪动火，安得不热？”授以养液大剂，如二冬、二胶、杞、地之类，调治旬日而愈。计服冬地各觔许。吾乡恶俗，新产即投以生姜、砂糖，调饮温服。或服姜至四五觔，或十余觔，甚或至二十余觔。妇媼相戒，以为服姜不多，易致产后诸病。但平时片姜不能人口之人，产后虽食姜旬日，或得姜稍缓，即胃反不能纳食，故产家既相沿成俗，医者亦习为不察。其实检遍群书，屡询别省，无是法也。仆始亦相疑而不得其故，近始得之，盖新产之人，气血暴亏，内外皆虚，故能任受辛甘发散、温中去瘀之品。迨服至数觔之后，则辛多甘少，砂糖之温中不敌生姜之耗气，于是中气渐就虚寒，若非辛开温热之品，自不能开胃进食。昧者以为非姜不解，岂知其实由食姜过多所致哉？夫妇人足月而产，如瓜熟蒂落，花放水流，自然而然，自无他故。纵有停瘀别疾，只一味生化汤，随症加减进退足矣。数剂之后，自然畏姜如火，何劳取鴆止渴哉？盖服姜之害有二，偏阳者，易致阴虚，发痉，如此证是也，尚可以药急救之。偏阴之人，则阳气无几，复投以辛散耗气之品，无不暗折其寿元。故我邑产妇，数胎之后，虽在壮年，亦同迈妇，可以知其敌矣。呜呼！安得遭人之铎，遍做聋聩，而使产家皆得免此大劫哉？

《资庐诊录》

柳宝诒

汤。产后溃疡颇甚，营气大损。晚热干咳，脉数，皆虚象也。腹中攻痛，肝气不平。拟方先与疏木和胃，候其纳谷渐增，再图补复。

白芍 姜汁炒 郁金 橘络 苏梗 白薇 丹皮 当归 蛤壳
青皮 醋炒 生甘草 檀香 陈佛手

二诊：去橘络、苏梗，加洋参、制半夏、茯苓、广陈皮。

三诊：风痉本由乎血虚，还因产疡之后，肝阴更伤。腹中攻痛，木气亦欠舒畅。当于养血之中，兼以调理。

生地 砂仁同打 归身 炒黑 白芍 牡蛎 钩藤 蒺藜 郁金
丹皮炒 白薇 首乌藤 稽豆衣 广陈皮 佛手

四诊：手足痉掣，头晕齿齞，神呆不语，此属风阳上冒，兼挟痰浊上蒙之象。每发近晚，病属阴分也。向质阴气不足，肝肾不调，经速而多，乃营虚而兼有木火之象。病起脏气偏伤所致，宜缓与调理。刻先与熄风养营。

细生地炒 大白芍 广郁金 明矾化水拌 炒归身 川贝母 羚羊角 左牡蛎 白蒺藜 首乌藤 丝瓜络 姜汁炒 丹皮炭 小青皮 佛手 竹沥和姜汁少许，冲服

五诊：发痉时神识略清，痰气得通之象也；眩晕仍作，血不养肝，风阳仍扰也。经停两月，频作腰痛，当防木火内扰。拟方养血熄风，佐以清泄肝木。

大归身 大生地 大白芍 石决明 稽豆衣 白蒺藜 女贞子 厚杜仲 菟丝子 生甘草 淡黄芩 砂仁 竹二青 陈佛手

《柳宝诒医案》

沈祖复

乾德里廿号陈姓妇分娩横生，小儿不能转身，稳婆齧割而下。

已经二十余日，忽头痛如劈，日夜呼号，甚至发痉。先生诊之，两脉弦数，舌苔白腻，胸闷不畅。曰：“此去血过多，风火上升，适值盛夏，又感暑热，恐其痛厥之变。”用石决明、白芍、菊花、钩钩、藜梗、佩兰、薏仁、佛手、荷叶、菖蒲诸味，一剂而痛大定，唯少有胸闷。再用芳香、宣气、化湿而愈。

《医验随笔》

张锡纯

天津于氏妇，年过三旬，于产后得四肢抽掣病。

病因：产时所下恶露甚少，至两日又分毫恶露不见，迟半日遂发抽掣。

证候：心中发热，有时觉气血上涌，即昏然身驱后挺，四肢抽掣。其腹中有时作疼，令人揉之则少瘥，其脉左部沉弦，右部沉涩，一息四至强。

诊断：此乃肝气胆火，挟败血上冲以瘀塞经络，而其气火相并上冲不已，兼能妨碍神经，是以昏然后挺而四肢作抽掣也。当降其败血，使之还为恶露泻出，其病自愈。

处方：怀牛膝一两 生杭芍六钱 丹参五钱 玄参五钱
苏木三钱 桃仁三钱，去皮 红花二钱 土鳖虫五大个，捣
红娘虫（即糯米虫）六大个，捣

共煎汤一盅，温服。

效果：此药煎服两剂，败血尽下，病若失。

《医学衷中参西录》

陈良夫

王女。风为百病之长，虽有外感内伤之分，但外感之风，必见表证；内伤之风，不离厥阴。盖肝为风木之脏而主一身之筋，赖血液以养之，血虚则生风，络燥亦生风，此自然之理也。秋间曾患温病，旋

即分娩，延近三月，又复寒热咳呛，咽痛鼻衄，肤色带红。顷转四末浮肿而麻木，诊得脉象细滑而数，舌苔糙黄，根部带灰，唇燥口干，咽道依然未利，筋脉时或抽动。兹将前后症因，参以苔色脉象，当属阴血不足，伏热与肝阳素旺，又感风热，引动厥阴风水，致风阳内窜，筋脉被窒，成风淫四末之候，显然可见。今风阳内炽，走窜筋络，加以平素营虚挟热，计维轻清化养，参入熄风为治，望其风定痛缓，庶无迁变。

羚羊尖 玄参心 制女贞 生石决 鸡血藤 小生地 鲜石斛 炒滁菊。

《陈良夫专辑》

魏长春

郑福龄君夫人，年十八岁。民国十四年八月一日诊。

病名：半产痉厥。

原因：怀孕已达五月，近于旬日之前，初患寒热似症，服安胎治疟方，如归身、白芍、川芎、熟地、艾叶、柴胡、黄芩、白术、生姜、红枣、川贝、半夏、阿胶、苏梗等药，出入数剂，以致暑湿邪陷，于廿七日竟而半产。身热不退，连进生化汤二剂及益母膏、糖酒胡椒等，辛甘增热。于三十日，遂致猝厥，次日急足进城，邀余诊治。

证候：面赤不语，目睛神呆，角弓反张，牙关紧闭，自汗淋漓，恶露不行。

诊断：脉象沉涩，牙关紧闭，不能视舌，阅所服药方，始误于甘温安胎。继误于产后温药逐瘀。夫孕妇之病，先应详究其因，如外感六气，而胎不安者，先宜去病，即是安胎。若母体虚弱，不能养胎，使于不安者，则调理孕妇，即是安胎。非执胶艾汤及黄芩白术为安胎圣药，而可统治百病者也。要知邪若得补，势更猖狂，热迫胎元，能不坠乎。且产后逐瘀，亦非生化汤及糖酒椒面一法。若产前感有暑湿之邪，更不宜服此甘温之品，须详辨其血分寒热，宜温宜凉，及

有瘀无瘀，宜养宜破。今暑邪得补，热炽坠胎，生化逐瘀，迫邪入里，痉厥一昼夜未醒。脉象沉涩不起，其证已臻危境。经曰：血之与气，并走于上，则为大厥，气复返则生，不返则死，勉拟局方紫雪丹，以开其闭，能得神识渐清，始克有效。

疗法：用局方紫雪丹，开闭醒神清热。

处方：局方紫雪丹五分 冬雪水灌服

次诊：八月二日。紫雪丹服后二时，神醒，汗出颇多。今按脉象滑大，舌淡红苔灰。两耳失聪，便闭恶露未行，姑拟清透血分伏邪，从少阳而出，能得转疟，则病始有出路。宗许叔微柴胡地黄汤法，合局方紫雪丹治之。

次方：柴胡一钱 黄芩二钱 西洋参二钱 生甘草一钱
制半夏三钱 桃仁三钱 丹参三钱 天花粉三钱 杜红花三钱
鲜生地四钱 紫雪丹五分 灌服

炳按：半夏太燥，鲜生地宜合捣生锦纹八分，能祛瘀热下恶露。

三诊：八月四日。二日夜半，牙关复紧，手足震动，当解燥矢。今晨复下一次，臭气颇盛，神倦头汗。脉缓，舌苔黄厚腻。伏邪有外达之象。拟清血海积瘀法。

三方：西琥珀一钱 丹参三钱 辰茯神四钱 全当归三钱
益母草三钱 炙甘草一钱 荆芥炭一钱 西洋参二钱 桃仁七粒
杜红花三钱 炮姜二钱 桂枝一钱

炳按：炮姜太燥热，桂枝太温燥。

效果：服后，神清病差，化疟渐愈。

炳按：此证未产误温补，已产误温药逐瘀，病本于热，一再助热，以致转为痉厥重证，后治合宜，得庆更生，亦云幸矣。

《慈溪魏氏验案类编初集》

沈绍九

杨某，年廿余岁，产后感冒风寒，面色晦滞，肢体强硬，转侧困

难，寒热往来，日发数次，舌质淡，胖大，白苔满布，润滑，两脉缓大无神。前医投以小柴胡汤无效。此产后营卫虚，风寒湿邪侵入为患，而寒湿较重，非少阳病也。药宜温通，兼养气血。处方：

黄芪五钱 苍术三钱 桂枝三钱 蔻壳三钱 防风三钱
茯苓三钱 秦当归三钱 川芎一钱五分 狗脊八钱 秦艽三钱
姜黄三钱 生姜三钱 焦黄柏二钱 刺蒺藜八钱 杜仲八钱
宜木瓜五钱 川、草乌各二钱五分，先煎

再诊：肢体强硬减轻。原方去蔻壳、姜黄，加砂仁三钱，独活二钱，制附片五钱，补骨脂五钱。

三诊：寒热已退，情况继续好转。原方去砂仁、独活，加蔻壳、炒白芍、炮干姜、炙甘草、洋参须。

三诊以后，可以坐车前来就诊，又数剂去川、草乌，加重补益气血之品调理痊愈。

《沈绍九医话》

产后发狂

李炳

江满堂侍读之子妇，产后发寒热，手舞且笑，俗所谓惊风也。医曰：宜凉。翁曰：宜温。治以凉益剧。翁令以葱数斤，与布同煮，以布帖少腹。病果已。

《李翁医记》

黄堂

曹，女。产后营虚未复，骤因郁勃，阳升怒狂，或笑或哭，语有错乱，上视搐搦，号佛呼神，脉形弦细窒滞。屢经瘥厥，此乃水不涵木，挟痰迷漫。宗《内经》意，先用铁称锤烧红，沃以酸醋令嗅，取酸先入肝，辛金制木，然后用药。

川连 茯神 钩钩 橘红 金箔 细石菖蒲 阿胶 远志
天竺黄 丹参 石决明 雪羹汤代水。

二诊：风阳稍定，舌黄浊腻，痰凝气滞使然。

西洋参 钩钩 远志 天竺黄 石菖蒲 沉香汁 茯神 橘
红 胆星 血琥珀 石决明 雪羹汤

《黄氏纪效新书》

张仁锡

丙午秋夜，邻人来叩户，云昨日午刻，内人生一男，身体颇安，饮食亦不减，忽于今日酉刻，连叫数声，遂发狂怒，大言骂人。因问其恶露有否。曰：甫产颇多，今尚未止。又问其头上有汗否。曰：无。老人思索良久曰：是殆胎前所聚之痰饮，未得与瘀齐下耳。彼愚用药，爰以半夏、胆星、橘红、石菖蒲、旋复、云神。即前辈所谓六神汤者授之。明晨，其夫人来曰：三更服药，睡至黎明始醒，病遂失。

《清代名医医话精华》

柳宝诒

戴。时邪郁伏已久，乘小产血室空虚，脏气震动，蒙陷于里。始则狂谵，继则昏蒙，口噤戴眼，循衣撮空。种种恶候，层见迭出，势已难于挽救。所见之证，大致在于厥阴。观其脘垢屢通，而病情转剧，其邪机深入乎脏可知，脉象弦数带促，舌光红，鼻煤气逆，阴液伤，而肺胃亦被燔灼。姑拟潜熄厥阴，清养肺胃；而清神化热，托邪之意，即寓其中。然亦不过聊尽愚忱，以冀万一之幸而已。

羚羊角 丹皮 白薇 广郁金 丹参 泽兰叶
鲜生地绞去汁，姜汁拌炒 西洋参 麦冬去心 钩钩 黑荆芥

另：妇科回生丹一粒化开，和入西血珀四分，即用药汁调服，冲入童便。

二诊：痰热已化，神识渐清，危病转机。刻诊脉象弦数未静，耳

聾面浮，筋节麻木，寐则多梦。脏腑中火热虽去，而营中之余热，经络之气机，岂能一旦清肃。当此大病伤残之后，须清其余热，和其胃气，畅其经络。凡膩补之品，尚难骤进。况偏卧痰多，脾肺之气，胎前久已失调，刻下尤宜照顾。拟清营和胃，两调脾肺之法，缓缓图复，冀不再生波折为要。

当归 白芍 小生地 白薇 丹皮 括萎皮 桑白皮 广郁金 橘红 冬瓜皮 洋参 夜交藤 甜杏仁 川石斛 竹茹

苏。病起产后，始则狂笑，继则呆木。瘀热流于厥阴，兼有浊痰蒙胃。病历年余，灵明渐锢，此非轻剂所能奏效。

礞石滚痰丸 每服钱半，空心，临卧前服。丹参 桃仁 苏木 降香 四味煎汁，分两次送丸。

《柳宝诒医案》

袁焯

邮政局邮差某姓妇，产后忽大笑不止，笑声达户外，虽以手掩其口，亦不能止其笑。面色黄淡无华，两脉细小，自汗气促，此临盆下血过多，脑无血养，致脑之作用失其常度。殆由平日愤郁太过，遂来有此变象欤。治法当以补养气血，滋益脑髓为主，而一切治标之药，皆不可犯也。拟方用熟地、阿胶、枣仁、茯神、柏子仁各四钱，白芍三钱，五味子一钱，党参三钱，黄芪二钱，鸡子黄一枚，生冲和服，服后即能安寐。至次日下午，笑复作。盖血液尚亏，一剂之药力不足以填之也。仍以原方服二剂后，笑不作。遂以饮食调补而安。

《丛桂草堂医案》

周镇

尤松记，面店，列潭桥。长媳廿余岁。丙寅冬十一月，严寒至华氏寒暑表念余度，寝至未设火炉，初产迟延临盆，感寒由子宫而入，战振血晕三次。醋炭熏鼻，乃醒。知产孩已殤，更属悲郁。第三日，

腹高脐突，胀满如鼓，不可手按（形如覆釜，较孕时尤高）。大便既秘，小溲多而自遗，淋漓不断。入夜胀甚，不寐，谵语微笑。医投回生丹，仅泻而瘀不行。脉左微弦，右软无力；苔薄黄，糙刺质红。严寒内侵，子宫作胀，气滞血凝。向有肝气，气塞肝横，子宫胀大，压于尿泡则不禁，压于大肠则便秘。谵语微笑，瘀血冲心须防。拟通瘀消胀，内外并治。全当归七钱，丹钱三钱，五灵脂三钱，川郁金三钱，茯神三钱，丹皮炭钱半，远志八分，蒲草三钱，娑罗子七钱，鬼箭羽五钱，单桃仁三钱，制香附三钱，紫菀三钱，瓦楞子煨五钱。另藏红花三分，血珀五分，龙涎香一分，没药七分，鸡内金一具，炙研细末，参须汤调服。外治：因连宵失眠，火僭，苔糙刺，温药内服不妥，故以肉桂末五分，血竭一钱，没药、乳香各一钱，玄胡一钱，失笑散钱半，鬼箭羽钱半，研末，醋调，涂脐腹，大膏药罨之。复诊：瘀血畅行，大解三次甚干，脐腹高突处已软。初更未经，谵妄欲笑，迨成块瘀血下行，即得安寐，小溲不禁亦愈。再理气消瘀，安神宽胀。全当归五钱，川郁金三钱，茯神三钱，远志一钱，丹参三钱，失笑散六钱，鬼箭羽五钱，紫菀三钱，玄胡三钱，红曲三钱，黑豆四钱，制香附三钱，娑罗子五钱。另血竭一钱，没药九分，沉香四分，血珀五分，藏红花二分，研细末服。外治，脐腹仍敷未药。当日服药，呵欠多寐，神情转振。翌日改方，去郁、蒲，加马鞭草、桃仁各三钱。二剂，腹胀全消，愈。

《周小农医案》

其它

薛立斋

一产妇胞衣不下，胸腹胀痛，手不敢近，用滚酒下失笑散一剂，恶露胞衣并下。

一产妇胞衣不下，腹作痛，手按痛稍减，此气虚而不能送出户也。用无忧散而下。前症常询诸稳婆，云：宜服益母草丸，或就以产

妇头发入口作呕，胎衣自出。其胎衣不下者必死，授与前法甚效。

《续名医类案》

吕东庄

陈氏妇半产，胎衣不下，连服行血催衣之药，四剂点血不行，胸痛督乱，吕视之曰：此脾失职也。先与黄芪一两、当归一两，下咽而督乱顿减，时有以《准绳女科》中恶血阻不下，及胞衣不下方书一本进者，上注某方经验，某方试效，以示曰：中有可用否？曰：一无可用。遂用大剂人参、白术、白芍、黄芪、归身、茯苓、甘草等药，一服而恶露渐至，皆惊叹曰：古方数十一无可，用，《准绳》一书真可废也。吕曰：恶是何言，王损庵医之海岱也，顾读书者自不察耳。若唯以恶阻（恶阻二字岂两用耶）及胞衣不下条中求合吾方，宜其谬也。试以血崩及下血条中求之吾方，可见矣。盖此病本气血大亏，而致半产，脾失统血之职，水湮土崩，冲决将至，故生督乱，不为之修筑而反加穿凿，是愈虚也。吾正忧血之下不止，其不合也，又何怪焉？曰：今从子法可得免乎？曰：不能也。穿凿过当，所决之水已离，故道狂澜，壅积势无所归，故必崩急。服吾药第可固其堤，使不致荡没耳。至第三日诊，尺内动甚，曰：今夜子时以前必崩矣。因留方，戒之曰：血至即服。至黄昏果发，如言得无恙。方即补中益气加参、芪各二两也。次用调补脾肾之药而愈。（胞衣二字却不重醒）

《续名医类案》

薛立斋

一妇产后面赤，五心烦热，败血入胞，胞衣不下，有冷汗。思但去其败血，其衣自下，遂用黑豆二合炒透，然后烧红铁秤锤，同豆拌匀，将豆淋酒化下益母二丸，胞衣从血而出，余症尽平。

陈良甫云：有一亲戚妇人，产后胞衣不下，血胀迷闷，不记人事，告之曰：死矣。仆曰：某收得赵大观文局中真花蕊石散，在笥中，

漫以一贴赠之，以童便灌之，药下即苏，胞衣与恶物旋即随下，乘兴无恙。

施介繁室人年三十余，忽有孕又孪生，产后颇健，能食鸡啖饭，数日来渐发热胀，诊之，脉浮按滑疾，沉按结涩，询至恶露已一日不行，谓为瘀也。宜通之乃可，与生地、牛膝、益母、红花、桃仁泥、当归尾、丹参、瓦楞子，畏不敢服，延专科曰：此年过壮而初产育，气血俱伤，属虚也。与焦术、炮姜、归、芍、茯神、枣仁等，一剂热益甚，再剂遂谵语。更一专科其说同，其药仿又二剂，日夜不眠，昏狂不省人事，时忽高声歌唱，与伤寒阳明失下无异。再延诊曰：产数日恶露即停，虽执途人而语之，亦必知为瘀滞，若欲其生，亟进前方可耳。不得已乃服，黄昏进药，至夜分恶露始行，黎明复下一物，已焦黑，乃胞衣也。盖产时稳婆只收其一，谓二人同胞，不知其一犹在腹也，遂贻患乃耳。胞去血行，其病如失。然予初亦不知谓为胞未下也。医诚难哉。

《续名医类案》

薛立斋

一产妇阴脱，便闭下坠，形气倦甚，用十全大补汤，而上因怒仍脱，重坠寒热，小便淋漓，用补中益气汤加山梔、龙胆草，一剂重坠减而小便利。仍用前汤去二味，倍加升麻、参、芪而愈。

一产妇阴脱肿痛，小便淋漓。此因元气甚虚，而肝火旺也。用补中益气汤加山梔、车前子，四剂而肝症悉退。仍用前药去二味，加茯苓，小便利。又用十全大补汤，而肿痛遂渐消。

一产妇元气充实，初产玉门不闭，肿焮作痛，小便不利，薛谓肝经湿热壅滞，欲以加味逍遥散加车前子、牛膝治之，不信。乃服十全大补汤，肿痛益甚，仍用前药更加泽泻，一剂而安。

一产妇阴脱肿痛，脉又滑数，欲作脓也。薛用十全大补汤，四剂脓成，又数剂而脓溃。但小便频数，而患处重坠痛盛，此因元气虚弱

而下陷也。又用补中益气汤，数剂而愈。

一产妇素有肝火，患阴蚀疳疮，内溃痒痛，如虫行状，食少热渴，小水淋漓，用加味逍遥散、加味归脾汤兼服，间以芦荟丸，外以鹤风草煎洗，而愈。

《续名医类案》

龚子才

一产妇，阴门痛极不可忍，教用桃仁去皮尖研如泥，涂之即已（散其毒也）。一妇产后，阴户极痒，令其食盐一两，涂之即瘳（去风热也）。一妇产后肿大，用吴茱萸煎汤，洗立愈（辛以散之也）。

《续名医类案》

薛立斋

一妇胞衣不下，努力太过，致子宫脱出，如猪肚状，令用温汤浴之，即以手捺子宫，去其恶露，仰卧徐徐即入，而安。

一妇人脱肛，用补中益气、加味归脾，各百余剂而愈。后因分娩复脱，仍以前药各二百余剂，始愈（拙裁）。

《续名医类案》

李时珍

一妇，产后子肠不收，用草麻仁捣膏，贴其丹田，一夜而上。但用此膏，病愈即宜揭去，其提拔之力最猛也。又有用催生下胎，用涂脚底，亦宜即时洗去。

《续名医类案》

孙文垣

一仆妇，因产难子宫坠出户外，半月不收，艰于坐卧。有医令服补中益气百帖，需参二斤可愈。乃听之孙，谓此必产时受寒，血凝滞

不能收敛，虽名阴脱，未必尽由气虚下陷也。观其善饭，大小便如常可知矣。授以一法，价廉功省，三五日可愈。用未经水石灰干一块，重二三斤者，又以韭菜二三斤，煎汤置盆中，将干灰投入，灰开汤沸，俟沸声尽，乃滤去灰，乘热坐盆上，先熏后洗，即以热韭于患处揉擦。盖石灰能散寒消瘀，韭菜亦行气消瘀。一日洗一次，三日果消软收入。

按：子宫子肠，有坠下损伤者，有终身不能上如带绶者，要皆初时治之不得其法耳。

《续名医类案》

吴孚先

杨氏妇产后一月，半身以下忽肿胀脐突，小便不通，或以五皮饮加车前、牛膝治之，不效。吴曰：先经断而后肿胀，名曰血分（分平声）。且按少腹有块如拳，知败血尚结于胞门，非温无以化之，以姜桂佐行瘀之剂，下血如黑漆数升，便利肿消。

《续名医类案》

孙文垣

温氏妇产后五十余日，右胁胀痛，手不可近（非虚痛可知），赤白带下多如脓，发热便秘，诊之曰：此恶露未尽，血化为脓，宜急治之也。常见数妇病此，治不善，积久为毒，有成肠痈者，有内成毒从腰俞出者，皆瘀血为患也。急用泽兰叶、山楂、五灵脂，消恶露为君，川芎、当归、茯苓、白芷为臣，益母为佐，香附、青皮为使，外与当归龙荟丸润大便，使热从之去。服后次日腹胁皆宽，痛亦止。又食荤与鸡子，复作痛，但不如前之盛，与保和丸，用山楂煎汤送下三钱，遂愈。

潘印川子室年二十五，因难产伤力，继以生女拂意，后又女死悲戚，即时晕厥，洎醒神思昧昧，手足癱痲，目上视。孙至因癱痲不

能诊脉，细询之自产后恶露绝无，时有女医在旁与人参大嚼，及独参汤并粥杂进。盖参与粥皆壅膈上，故神昏癡痼不已也。教以手探喉中，乃随手吐出痰饮粥食盈盆，癡痼方定。以川芎、山查、泽兰叶、陈皮、半夏、茯苓、香附进之，稍得睡。不虞女医又私与补药，子丑时陡然狂乱，人皆异之，目为神附，禱禳无已。曰：此恶露不尽，乃畜血如见鬼之症，非真有神物相附也（此时何不直言女医之失）。徐以正言叱之，即缄默，断继以清魂散加滑石、童便与之，天明小便乃行，狂乱皆定。既而女医欲要功，又以药进则狂乱如前，理与川芎一钱五分，当归四钱，泽兰、益母各一钱，临服加童便，连进二帖不效。此必胸中有瘀作滞，故药力不行，即用前剂大加山查、恶露一行，神思即静，睡片时手足微动，或以掌批其面，或以手槌其胸，昏乱不息。诊其脉近虚，早间面红而光，申酉时面色白，此血行火退，当补矣。与人参、川芎、泽兰各一钱，当归、山查各二钱，茯苓、陈皮各八分，卷荷叶一片，煎熟调琥珀末五分，服半时许，暖气二声，此清阳升而浊阴降矣。自是恶露微行，大便亦利，饮食渐进而安。

细阅是案，其得肯綮处，全在知恶露未行，及误服人参两著，至其用药，亦只见症治症而已。

《续名医类案》

高鼓峰

一妇人产后恶露不尽，至六七日鲜血奔注，发热口渴，胁痛狂叫，饮食不进，或用四物汤调理，或用山查、青皮、延胡、黄芩等药，卒无一效。脉之洪大而数，此恶露未尽，留泊血海，凡新化之血，皆迷失故道，不去畜利瘀，则以妄为常，曷以御之。遂以醋制大黄一两、生地黄一两、桃仁泥五钱、干漆三钱、浓煎饮之，或曰产后大虚，药毋过峻否？曰：生者自生，去者自去，何虚之有？第急饮之，果寐半夜，次早下黑血块数升，诸病如失矣。复用补中益气而安。

《续名医类案》

薛立斋

一产妇患恶露不下，服峻犷之剂，恶露随久而昏愤，以手护其腹。薛曰：此脾气复伤作痛，故用手护也（虚痛喜按）。以人参理中汤加肉桂二剂，补之而愈。

按：产后恶露不下有二，一则瘀滞宜行，一则血虚宜补。予常治数人，皆二三日而止，察其人果虚，一以大剂营而愈。

《续名医类案》

陆肖愚

谢四府如夫人分娩旬余，忽臂下微微作痛，或谓血虚，用大料芎归，十剂而痛不减。又谓补血当补气，阳生则阴长，加参芪，五六剂而痛益剧。脉之六部沉弦，而左关尺更紧。询之，止左边近肛门一点痛耳。问痛处热否？曰极热。曰：此气血不足而痛也。乃产后败血凝滞于肝经，臀乃肝经所络之地，治而注之，不急治久必成毒，当行血海之瘀滞，解经络之蕴结，庶可消耳，不信。更医仍以八物汤投之，一日痛处顿肿，又过寒凉解毒之品，致疮口不收，大便作泄，饮食不进，肌肉半削。再诊脉微细如蛛丝，按之犹觉有神，曰：今宜大补矣。乃用四君加芪桂附，数剂泻止食进，又加当归、熟地，约十剂，成痂而愈。

一产妇恶露不行，瘀塞溺道，小便不利，遍身浮肿，喘急不得卧，用牛膝膏治之愈。丹皮、大黄、当归、桂心、桃仁、蒲黄、元胡、香附、瞿麦、川芎、麝香，先用土牛膝三两，水五碗煎减半，入上药煎大黄。

《续名医类案》

孙文垣

程达庵之媳，产半月而腿疼，专科曰：虚。与八珍汤，十日疼益

盛，疼虚甚热（非虚右知）。谓曰：慎勿认虚认风，此产后败血凝滞血海，流于经络，不急治则瘀无从出，久必化脓成毒，或为肠痈，今腿疼是其候也。不信，复延专科，曰：风也。但丹溪云：产后当大补气血，虽有它症，从未治。投十全大补，痛转剧，大发寒热，小腹近脐红肿出脓。外科又与收口太早，腰俞复发一毒，肿痛寒热如初，十日后大溃脓，而不收口，精神委顿，肌肉陡削，饮食不进，恶心恶寒，奄奄一息。诊之六脉濡大无力，清水无脓，曰：热亟矣。速为保脾，与人参、白术各五钱，甘草、干姜、附子各一钱，黄芪三钱，白芷、桂心各五分。外科曰：白术作脓，恐不可服。曰：脓不死人，饮食不进则死人也。四帖神气回，饮食进，症减脓成，改用参苓白术散，调理一月而安。

《续名医类案》

朱丹溪

一妇人年十八难产，七日后产，大便泄，口渴气喘，而红有紫斑，小腹胀痛，小便不通。用牛膝、桃仁、当归、木通、滑石、甘草、白术、陈皮、茯苓、红花，煎汤调益母膏不减。后以杜牛膝，煎浓一碗饮之，至一更许大利下血一桶，小便通而愈。

《续名医类案》

缪仲淳

庄敛之次女，产后恶露未净，至夜发热，脾胃却弱，腰腹大痛，时师谓产后气血俱虚，投以人参、当归诸补剂转剧。咸虑其成蓐劳也。诊之谓：不数帖即痊矣。用白芍、扁豆、杜仲各三钱，红曲、苏子、车前各二钱，萸肉、麦冬、青蒿各四钱，橘红、干葛各钱半，炙草八分，牛膝五钱，黑豆八钱，泽兰一钱，十剂而恶露净，发热已，腹痛亦止。但腰痛未尽除，脾胃尚未健，改用白芍、山查、橘红、麦芽、石斛、扁豆、沙参各三钱，砂仁、杜仲、萸肉各二钱，五味一钱，炙甘五分，

牛膝五钱，莲肉四十粒，十余剂脾胃亦健，而全愈。

《续名医类案》

来天培

王正权室人，产后十余日，患寒热腹痛，日赤而涩，羞明疼痛。诊之脉沉而涩，询其恶露未尽，知停瘀为患。以当归、川芎、桃仁、红花、甘菊、生地、丹皮、银花、连翘、蝉退，清火行瘀驱风等剂，六帖而痊。

《续名医类案》

薛立斋

一妇产后四肢浮肿，寒热往来，盖因败血流入经络，渗入四肢，气喘咳嗽，胸膈不利，口吐酸水，两胁疼痛。遂用旋覆花汤，微汗渐解，频服小调经散，用泽兰根煎汤调下，肿气渐消。（未选入）

一产妇腹胀，或用抵当汤，败血已下，前症益甚。小腹重坠似欲去后，此脾气虚而下陷，用补中益气加炮姜，温补脾气，重坠如失。又用六君子汤而安。归脾汤调理而愈。（同上）

《续名医类案》

薛立斋

一产妇，腹中似有一块，或时作痛而转动，按之不通（便非实积），而色痿黄，痛则纹白，脉浮而涩，此肝气虚而血弱也。不信，乃服破血行气，痛益盛，转动无常，又认为血瘀，专用破血祛逐之药，痛攻两胁，肚腹尤甚，益信为瘀确，服下虫等药，去血甚多，形气愈虚，肢节间各结小核，隐于肉里，以为鳖子，畏药而走于外。薛云：肝藏血而养诸筋，此因肝血复损，筋涸而牵结耳。盖肢节胸项，皆属肝胆部分，养其脾土，补金水以滋肝血，则筋自舒。遂用八珍汤、逍遥散、归脾汤加减，调治而愈。

一产妇小腹作痛有块，脉芤而涩，以四物加元胡索、红花、桃仁、牛膝、木香，治之而愈。

《续名医类案》

张子和

一妇，产后第六日血迷，用凉膈散二两，四物汤三两，朴硝一两，都作一服，大下紫黑水，其人至今肥健（即末句推之，则其人素常肥健可知，故可用如此药）。

柴屿青治侍御李符千大令媳，半产大汗，发晕昏不知人（即血迷也），他医立方，俱不敢服。符千乃徒步邀视，先令其以韭叶斤许捣烂，用好醋炒之，乘热熏鼻少苏，用清魂散，加童便、黄酒服之，调理旬日而安。

《续名医类案》

薛立斋

一妇，因产后饮酒，恶露甚多，患血晕，口出酒气，此血得酒热而妄行，虚而作晕也。以佛手散加煨甘葛二钱，一剂而痊。酒性慥悍，人月及产后不宜饮，恐致前症。产室人众，气热喧嚷，亦致此症。

梅师治产后余血不尽，上冲心，胀闷腹痛，以藕汁二升，饮之愈。

《续名医类案》

薛立斋

一产妇，患恶露上攻，昏愤口禁，冷汗不止，手足厥逆，用六君子加附子一钱，以回其阳，二剂顿苏。又以十全大补汤，养其气血而安。

一产妇患前症，手不敢近，用失笑散一服，下瘀血而愈。次日腹痛下利，用十全大补而安。

一产妇患前症，用大黄等药，其血虽下，复患头痛，发热恶寒，次日昏愤，自以两手坚护其腹，不得诊脉，视其面色青白，此脾气虚寒而痛也。用六君子加姜、桂，而痛止。又用八珍加姜、桂，调理而安。

毛执中曰：产后血晕，寒热往来，或血抢心，恶疾也。予阅《食疗本草》，见有用鹿角烧为末，酒调服，日夜数服验者。偶家有妇人患此，令服此神效。因教他人妇，服皆验。但以产后未可饮酒，以童子小便调服耳。最忌服利药。（黄生经）

《续名医类案》

杨乘六

许氏妇，产后动怒，寒热往来，胁痛口苦（肝火病其状如疟，盖胆为肝府，肝病则胆亦病矣），渐次发热晡热。医用风药，混加表散，腹左忽增一块，匾大如掌，日夜作痛。或疑寒凝，或疑食滞，或疑瘀畜，或疑痞积，杂治之病益甚。食减肌瘦，脉之右关弦洪数，面色黑瘦，舌色淡黄而干，症乃怒气伤肝，肝经血少面燥痛也。盖肝居胃左，本藏血者也。血足则其叶软面下垂，血亏则其叶硬面横举，内与胃相磨，外与肌相逼，能不隐面痛乎？凡性燥多怒者，往往患此，而妇女尤多，庸妄不知，误用香燥销克之剂，枉杀者不知凡几，良可叹也。也滋水清肝饮，四剂块消痛止，继用归脾汤去木香，加白芍、丹皮、山梔，间服，十余剂而痊（必用归脾汤，吾知其守而未化也）。

许氏妇产后发热，或时作寒，头痛体倦，医与疏邪降火，烦渴不食。杨诊之，其脉浮，取似数，重按则芤，左手尤甚，唇舌皆白，面无血色。用十全大补汤加炮姜，或曰：如此大热面用姜、桂何也？曰：阳在外为阴之卫，阴在内为阳之守。两相依附者也。今产后阴血大亏，虚阳无附，浮散于外而为热，非引浮散之阳，归于柔阴，其热不退（却不尽然），故用温补血气之剂，欲其补以收之也。又曰：姜桂味辛面散，何云补以收之耶？曰：桂逢阳药固能汗散，若逢血药即为温

行。姜之为用，生则开肌发汗，熟则温中散寒，至炮黑则入血，且能引气药以入血分，而生新血。故以大补为主，以之为佐，使阴得阳生，则热自除耳。四剂果热退身凉，十余剂诸症悉愈。凡产后症多属阴虚血少，第以二地、二冬、杞子，一切养荣之剂，无不立愈。若气血兼补，杂以姜附刚剂，非担延时日，即貽病者后患，临症者宜审之。

《续名医类案》

柴屿青

钱玅沙官侍御，时其夫人产后三日，恶露甚少，而色白唇燥，口干身热（与前案唇舌皆白，而无血色同），拟用参，玅沙以产后不宜用补为疑，柴曰：果有外感，自别有治法，今症属不足，舍此必致貽患，不可用参之说，此不知医者及女流之见也。遂投人参当归散，加好桂一钱，次日口润生津，调理半月而痊。

《续名医类案》

陆祖愚

聂巡司子妇产后百余日，大肠燥结，虚火上冲，便血肠鸣，腹满短气，内外皆热，半月不能进饮食，或与养血清火，愈甚。诊得两浮洪而数，按之无神，脾肾两脉更觉空虚，乃产后元气耗散，真阴不足，而非实热也。用八味丸，清晨淡盐汤送三钱，用四君加归、芍、麦冬、知母、莲肉，作煎剂数服，诸症少缓，后以补中益气加白芍、麦冬，一月瘳。

《续名医类案》

马元仪

陆氏妇产未一月，因起居微触，便血三日，遂彻夜不寐，此新产去血过多，虚而益虚也。凡有所触，必伤其肝，肝伤而血溢，则气亦

不守矣。气虚血弱，心神无养，故目为之不瞑。又与归脾大剂，用参至一两，加鹿茸三钱，两月而愈。

许竹溪室人产后数日，发热自汗，面赤头痛，恶食不眠，恶露虽极少而淡，腹时胀痛，脉则洪大而数，曰：此血虚也。腹胀面赤，其热欲崩，宜峻补。或问故，曰：面赤者阳上越也，腹胀者，阴下陷也，阳上飞则阴下走，势所必然。与熟地一两，杞子、枣仁各五钱，一剂。次日小腹之右忽有块如盘，且硬按之痛甚，于是疑为瘀而误补，欲更张。幸病人素服予药，姑再延诊，曰：其块骤起，即大如盘，虽瘀滞，亦无如是之甚也。此正肝脾失血，燥而怒张，得补犹然，否则厥而崩矣。今脉大渐敛，面赤渐退，非药之误，乃药之轻也。令前方加倍，再入炒白芍五钱、炙甘草一钱，一服块渐平，再服块如失。前方减半，数剂诸症全安。此症若作瘀治，断无幸矣。

《续名医类案》

吴洋

汪伯玉婢杜冬举仲子，会病暗且痿，四肢汗溢而甚恶寒，历春夏滋深，挟扩拥絮，犹栗栗，曰：物极则反，吾且极之。病由递产而虚，势重不可亟反，激而后反，其易为力哉！于是补以参芪，敛以桂枝，面以龙骨、牡蛎，经年寒犹故也。汪以为言，洋曰：毋谓徐徐，及瓜面后可治。又明年夏，先期一月而诊之，曰：药力告盈，其可已。至日则以盘水沃青巾者二，以石水浮瓜者三，谓汪曰：洋无戏言。通言语，彻衣衾，其在今日。乃命女仆奉盘水进，杜难之，手语曰：吾病产后，宜不可水。洋曰：无害。第以两手按青巾试之，病者曰：宜。然后乃沃两履，寻漱以盂水，已复饮之，既剖瓜而华啖其半，于是汗出止声，单衣如常。先是溪南吴千妇，病与杜同，洋治以向法效。

《续名医类案》

楼全善

一妇，产后洗浴即气喘，但坐不得卧，已五日。恶风，得暖稍宽，两关脉动、尺寸俱虚，百药不效。用牡丹皮、桃仁、桂枝、茯苓、干姜、枳朴、桑白皮、紫苏、五味子、薏仁，服之即宽，二三服即卧，其痰如失。盖作汗血感寒治之也。

《续名医类案》

薛立斋

一产妇，喘促自汗，手足俱冷，常以手护腹，此阳气虚脱也。用人参附子汤，四剂愈。

缪仲淳曰：己丑予妇产后五日，食冷物怒伤脾作泻，乃微嗽又三日，泄不止，手足冷，发喘床亦动摇，神飞扬不守。一医投以人参五钱、附子五钱，疗之如故。加参附又不效。渐加参至三两，附子三钱，一剂霍然起。

《续名医类案》

缪仲淳

于中甫夫人产后气喘，投以人参五钱，苏木、麦冬各三钱，一剂愈。（未入选）

《续名医类案》

薛立斋

一妇咳嗽，见风则喘急恶寒，头疼自汗，口禁，痰盛，薛谓：脾胃气虚，腠理不密，用补中益气加肉桂，数剂而安。

一产妇咳而腹满，不食涕唾，面肿气逆，此病在胃而关于肺，用异功散而愈。

《续名医类案》

孙文垣

赞皇令堂产后左胁痛盛(此胁痛缘肺实而气机不利),咳嗽痰不易出,内热气壅,不能伏枕,与以瓜蒌仁六钱,桑白皮、苏子、杏仁、半夏、桔梗、枳壳各一钱,水煎服之,气定喘除,外与保和丸及七制化痰丸而安。

《续名医类案》

缪仲淳

施灵修乃正产后发寒热,咳嗽不止。因本元虚弱,误用姜桂,势甚剧(二句宜细玩之),用鳖甲、白芍、牛膝、生地各四钱,山查、麦冬、益母草各五钱,橘、当归各二钱,青蒿、杜仲各二钱五分,枣仁八钱,远志、五味各一钱,茯神三钱,竹叶三十片,数剂辄定。(方亦太杂)

《续名医类案》

聂久吾

一妇年四十余,因产过多,身热日夜不止,午后益盛,肌肉瘦削,经水不行,诸医无效。与花粉、山药、百合、香附、麦冬各八钱,天冬五分,地骨皮、当归、二母各六分,生地生炒各四分,白芍生炒三分,前胡四分,茯苓七分,生甘草三分,姜一薄片,龙眼三个,服十余剂而身热已退。又加桔梗四分,酒炒芩连各六分,二十余剂而安。

《续名医类案》

陈霞山

一妇产后伤食,致胃虚不纳谷,四十余日闻谷气药气俱呕,以参、苓、白术、炒曲各一钱,陈皮、藿香各五分,炙甘草三分,砂仁五分,陈米一合,用沸汤二碗,泡伏龙肝末,澄清汁前药服而安。

《续名医类案》

薛立斋

一产妇患腹胀，满闷呕吐，因败血散于脾胃，不能运化所致。或用抵当汤（疑是抵圣汤）。败血以下，前症益甚，小腹重坠，似欲去后。薛谓脾气虚而下陷，用补中益气汤加炮姜，温补脾气，重坠如失。又用六君子汤而安。

一产妇停食霍乱，用藿香正气散之类，已愈。后胸腹膨胀，饮食稍过即呕吐，或作泄泻，此脾胃俱虚，用六君子汤加木香，治之渐愈，后因饮食失调兼恚怒，患霍乱胸腹大痛，手足逆冷，用附子散，又用八味丸以补土母而康。设泥痛无补法，而用辛散，或用平补之剂，必致不起。

《续名医类案》

薛立斋

一产妇，小便频数，时忽寒战，乃属脾肺虚弱，用补中益气加山茱、山药为主，佐以桑螵蛸散而愈。后患发热晡热，盗汗自汗，月水不调，用加味逍遥散而安。

一产妇患前症，吐痰发热，日晡作渴，此膀胱阴虚，用补中益气汤，佐以六味丸而愈。又患痢后小便频数，手足俱冷，属阳气虚寒，用前汤及八味丸而瘳。

一产妇小便不禁，二年不愈，面色或青赤，或黄白，此肝脾气血虚热，用加味逍遥散为主，渐愈。佐以六味丸而痊。后因怒小便自遗，大便不实，左目顿紧，面色顿赤，仍用前散佐六君子汤，以清肝火，生肝血，培脾土而瘳。

一产妇小水淋漓，或时自出，用分利降火之剂，二年不愈。以为肺肾气虚，用补中益气及六味丸而痊。

《续名医类案》

薛立斋

一产妇大便秘结，小腹胀痛，用大黄等药，致吐泻不食，腹痛胸痞；用六君子汤加木香、炮姜，治之而愈。

孙文垣治沈三石夫人，产三日腹不畅，女科为下之，大泻五六次，遂发热恶心，又用温胆汤止吐，小柴胡退热。数剂食吐不止，粒米不进，又用八珍汤加童便，昏愤耳聋，眼合口渴，肠鸣（发热恶心，耳聩口渴，多似感症，然此实误下虚之所致。所谓变症蜂起也），眼胞上下及手足背皆浮肿，诊之六脉皆数，曰：脉数所主，其邪为热，其症为虚。与十全在实汤加炮姜，夜半稍清爽，进粥一盂，始开目语言。次日午以药不接，且言语过多，复昏昧不知人事。翌日以人参、白术各三钱，炮姜、茯苓、陈皮各一钱，甘草五分，服讫体微汗，遍身痠疼，热退神爽。下午药又不接，且动怒，昏昧如前，六脉散乱无伦，状如解索，痠亦没，亟以人参、白术各五钱，炙甘草、炮姜、制附各一钱，连进二帖，是夜熟睡，唯呼吸之气尚促（屢进皆效，后之肿毒自非实症也）。次日脉转数，下午发热不退，环跳穴边发一毒，如碗大，红肿微痛。女科复潜曰：向之发热恶心，皆此所致，姜附温补误也，须急进寒凉解毒之药。孙曰：此乃胃中虚火，游行无制，大虚之症，非毒也。若用寒凉，速其死耳。《经》云：壮者气行则愈，怯者著而或痛。惟大补庶可万全。三石然之。仍与前剂，日夕二帖，参术皆用七钱，服后痠疼复起，毒散无踪，热亦退。再以参苓白术散调理而安。是症皆由误下，致变百出，可不慎哉！

按：是症多由产后血津虚耗，及平素多火内热之人常有之，虽日数过，亦无所害，即欲通之，唯大剂二冬、二地、归、杞、苁蓉，不过一二服即行矣。彼桃、杏、麻、柏，及胆蜜之治，犹下乘也。若硝黄肆用，诚失医哉！

《续名医类案》

薛立斋

一妇，产后大小便不通，诸药不应，将危矣。令饮牛乳，一日稍通，三日而痊。人乳尤善。

《续名医类案》

陆肖愚

陈振宇女，年二十七，产后患间日疟，已月余，寒热虽不甚，而身体倦怠，饮食减少，脉之左手平和，右手弱而无力。与补中益气汤二剂，觉胸膈饱闷，遂归咎人参。更医仍用青皮，饮二陈汤等，寒热反甚，用截药或止，数日复作，延至数月，肉削骨立。再诊之，其脉微弱已甚。曰：前服人参两可愈，今非至斤不能奏效矣。用十全大补汤，二剂仍觉闷，疑之，曰：直服至不饱闷，自愈矣。更倍参投之，遂饮食日增，服数十剂方起。

《续名医类案》

万密斋

程氏女，年二十出痘，时娠五月矣。诊其脉，男胎也。惟以清热解毒和中安胎为主，用黄芩、白术为君，人参、生甘草、当归、生地、白芍、紫苏为佐，自初出至成浆无他苦，乃闻家中被盗遁归，医与药，一服胎堕，果男也。再延诊痘变灰白，平塌成倒陷，乃里虚故也。询所用方，乃独圣散。曰：山甲、麝香，皆堕胎药，胎去气血益虚，疮毒内陷，不可为矣，三日卒。

《续名医类案》

薛立斋

一产妇，患虚极生风，或用诸补剂，四肢逆冷，自汗泄泻，肠鸣腹痛，薛以阳气虚寒，用六君子，姜、附知各至五钱，不应。以参、附各一两，始应。良久不服，仍肠鸣腹痛，后灸关元百余壮，及服十全

大补汤，方效。

一产妇患中风，盗汗自汗，发热晡热，面色黄白，四肢畏冷，此气血俱虚，用八珍汤不应。更用十全大补、加味归脾二汤，始应。后因劳怒，发厥昏愦，左目牵紧，两唇抽动，小便自遗，薛为肝火炽盛，用十全大补加钩藤、山梔而安。再用十全大补汤、辰砂远志丸，而愈。

一妇人产后睡久，醒则昏昏如醉，不省人事，用荆芥穗微焙为末，每服三钱，豆淋酒调服，或童便服。此华佗愈风散也。又名举卿古拜散。医用此及交解散（当归、荆芥穗等分，每服三钱，水酒煎）。云：服后当睡，必以左手搔头，用之果然。此症多因怒极伤肝，或忧气内郁，或坐草受风而成，急宜服此，愈可立待。（本草纲目）

《续名医类案》

王肯堂

一妇产后七日，为将息失宜，腠理不密，偶因风寒所侵，身热头痛，两眼反视，手足瘈瘲，名曰蓐风。用前方，其疾即愈。古人珍秘此方，隐括其名曰：举卿古拜散。盖用韵之切语，举卿为荆，古拜为芥。《鲁公谈录》谓之再生丹，亦神之也。（《续医说》薛氏谓前症用此如不应者，急用大补气血，为主。）

吴交山治一妇产后，因虚牙关紧急，半身不遂，失音，以续命汤煮饮，数服而安。

《续名医类案》

薛立斋

一产妇，中风不省人事，言语妄甚，恶风寒，喜热饮，形气倦怠，脉虚浮无力。薛谓气血虚寒，用十全大补汤，二十余剂不应。又二十余剂，稍缓。乃渐加附子至一钱，服数剂，诸症减一二，又二十余剂，十退三四。乃去附子五分，数剂诸症顿退而安。后又发，仍服前

药加附子三五分，而愈。

一产妇不语，用七珍散而愈，后复不语，内热晡热，肢体倦怠，饮食不进，用加味归脾汤为主，佐以七珍散而愈。后因怒不语，口禁，腰背反张，手足发搐，或小便见血，面色或青或黄，或时兼赤，曰：面青肝之本色也，黄者脾气虚也，赤者心血虚也。用八珍汤加钩藤钩、茯苓、远志渐愈，又用加味归脾汤而痊。

一产妇状如脚气，发热脊闷，搐掣惊悸，或用独活寄生汤而痊。后复作，服之其汗如水，更加口禁吐痰，乃用十全大补汤培养血气渐愈。后饮食日少，肌体日瘦，吐痰如涌，此命门火衰，脾土虚寒，用八味丸及归脾汤，诸症渐退，肌肉渐生。

《续名医类案》

萧万興

陈昌之内首胎恃壮，当风澡体，即病发热如燎，口眼喎邪，喘呕有沫，面目青黄，心腹膨胀，扬手舞足，脉见弦数不鼓。曰：此肝虚自招风也，非表病也。急以姜附丸灌下，仍用当归四逆汤加人参、茱萸，两剂面诸症失。

《续名医类案》

来天培

马氏妇，二十余岁产后九日患腹痛，筋挛抽掣不可忍，恶露不绝，脉沉细而紧，视其面色青黄不泽，此肝经血少而兼寒也。与归芍六君加炮姜，一剂腹痛虽未止而筋挛稍缓，另延专科，以广半、钩藤、木香、威灵仙等，腹痛益甚，且血崩不止，更加发热神昏，再求治，以芪、术、归、地、山药、苓草、艾叶、阿胶、姜附，内芪、术、地俱至两外，一剂而腹痛抽掣止，再剂面崩亦痊，用归脾调理面愈。

《续名医类案》

沈明生

袁令默女素禀不足，分娩后体倦发热，医者以其弱龄瘦质，且遵丹溪产后当大补之法，遂以参芪进之，症益甚。诊之脉浮而涩，此不惟有余血，且有风寒在内，夫瘀血未尽，外邪初感，均有用参之诫，是以补之无功耳。遂用解表散瘀之剂，三四服后热除胸爽，然倦怠如故，曰：参芪之用，此其时矣。而袁恧嗜废食，因循勿与，越四五日，忽舌暗不语，或用茯神、枣仁，或用南、半、姜、橘，或用芥连，皆不效。复延治，察其神情虽不能语，然每对食物，辄注目以视，得食则神稍旺，更衣则神即疲，且脉空而大。《经》云：脾之脉连舌本，散舌下，心之别脉系舌本。今火土两虚，医药杂乱，《经》又云：言而微，终日乃复言者，此夺气也。况经月不语乎？不惟用参，且应用附矣。服五六日，诸症悉愈。夫病机者，间不容发，有昨宜用攻而今宜用补，且宜用热而夕宜用凉，惟视其机之所在，以发合病耳。故是症不用补之害，与骤补之害，同失其机甚矣。医之难也。

《续名医类案》

薛立斋

一妇产后劳役，忽乳汁如涌，昏昧吐痰，此阳气虚而厥也。灌以独参汤而苏，更以十全大补汤，数剂而安。若妇人气血方甚，乳房作胀，或无儿饮胀痛，增寒发热，用麦芽二三两炒熟，水煎服，立消。其耗散气血如此，何脾胃虚弱，饮食不消，方中多用之耶？

《续名医类案》

张隐庵

一妇产后乳上发壅肿胀，将半月，周身如针刺，饮食不进，诊之六脉沉紧有力，左乳则肿连胸胁，用麻黄、葛根、荆芥、防风、杏仁、甘草、石膏，温服取汗遂愈。《金匱》云：产后妇人喜中风。《经》云：

开关不得，寒气从之，荣气不从，逆于肉理，乃生痈肿。此系风寒内壅，火热内闭，荣卫不调所致，众以凉药治热，不知开阖故甚，令毛窍一开，气机旋转，荣卫流行，百肿痛解矣。《经》云：食气入胃，散精于肝，病属阳明、厥阴二经，是以饮食不进，今经气疏通，自能食矣。熟谓疡医可不知经乎？

《续名医类案》

薛立斋

一妇人产次子而无乳，服下乳药，但作胀，曰：人乳气血所化，今胀而无乳，是气血竭而津液亡也，当补其气血，自然有乳。乃与八珍汤，倍参、术，少加肉桂，二十余剂乳遂生，后因劳役复竭。夫其初产有乳，再产而无，其气血只给一产耳，其衰可知。

《续名医类案》

王肯堂

一娠妇患乳肿不散，八月用火针取脓，服十全大补汤，外敷铁箍散，不效，反加喘闷，九月产一女，溃势愈大，两乳房烂尽，延其胸腋，脓水稠粘，出脓六七升，略无敛势。十一月乃用解毒和中平剂，外渗生肌散，龙骨、寒水石等。脓出不止，流涎所及即肿泡溃脓，两旁紫黑。疮口十数，胸前肋下皆肿溃，不可动侧，其势可畏，此产后毒气乘虚而炽。令服黄芪解毒，补血生肌，医不敢用。十二月中旬后益甚，始改用王药，时脓秽粘滞，煎楮叶猪蹄汤沃之顿爽，一制一方名黄芪托里汤，黄芪之甘温以排脓益气生肌为君，甘草补胃解毒，归身和血生血为臣，升麻、葛根、漏芦为足阳明本经药，连翘、防风散结疏经，薏仁、莠子解毒去肿，角刺引脓，白芷败脓长肌，川芎、桂炒黄柏为引，用每剂入酒一杯，送白玉霜九疏脓解毒，时脓水稠粘，不可遽用收涩之剂，理宜追之，乃制青霞散外掺，明日脓水顿稀，痛定秽解，始有向安之势。至正月，皆生新血，有紫肿处，俱用葱

熨法，随手消散，但近胁足少阳分尚未敛，乃加柴胡一钱、青皮三分，及倍川芎，脓水将净，即用搜脓散掺之，元宵后遂全安。凡治痈疽，须审经络部分，今所患正在足阳明之分，少侵足少阳经分，俗医不复省别，一概用药，药无向导，终归罔功，甚可叹也（是症得生，全在脓水稠粘，其人必能食，故可治也）。

琇按：乳病全是肝火上逆，入胃大络，不降而成，即肝木侮胃之病。近治鲍绿饮夫人素有血虚肝病，忽一日增寒壮热，头痛口苦，乳肿痛不任，熨吮俱无效。予用生地、杞子、当归各五钱，麦冬、菱仁各二钱，丹皮、赤芍各一钱五分，蒂丁、银花各三钱，二剂即愈。凡此方取效者，不可枚举矣。

《续名医类案》

朱丹溪

一妇人产后患乳痛，用香白芷、连翘、甘草节、当归须、赤芍、青皮、荆芥穗各半两，贝母、花粉、桔梗各一钱，瓜蒌半个，作一贴，水煎，半饥半饱服，细细呷之。有热加柴胡、黄芩，忌酒肉椒料，敷药用南星、寒水石、皂角、贝母、白芷、草乌、大黄，七味为膏，醋调，鹅翎扫敷痛效。（治法）

陈良甫曰：余荆布因产前食素得疾瘦弱，产后乳脉不行，已七十日，服诸药无效，婴儿甚苦，偶有人送赤豆一斗，遂如常煮赤豆粥食之，当夜乳脉通行，因阅本草，赤小豆能通奶乳，漫载之。

《续名医类案》

薛立斋

大尹俞君之内产后发热晡热，吐血便血，兼盗汗，小便频数，胸胁胀痛，肚腹痞闷，此诸脏虚损也，症当固本为善。自恃知医，用降火之剂，更加泻利肠鸣，呕吐不食，腹痛足冷，始信薛言。诊其脉或浮洪，或沉细，或如无（大处之脉内多如此），其面或青黄，或赤白，此虚

寒假热之伏，时虽仲夏，当舍时从症，先用六君子加炮姜、肉桂，数剂胃气渐复，诸症渐退，更佐以十全大补汤，半载而愈。

儒者杨敬之内人患症同前，但唾痰涎，或用温补化痰之剂，不应。面色黧黑，两尺浮大，按之微细，此因命门火衰，不能生脾土，脾土不能生诸脏而为患也。用八味丸补土之母而痊。

一妇人产后血竭，朝寒暮热，肚腹作而痛，按之不痛，以为血气俱虚，用八珍之类，治彼反行更加发热烦躁，乃用当归补血汤，热躁渐止，用八珍、麦冬、五味子，气血渐复。

一产妇朝寒夕热，或不时寒热，久不愈，用六君补中益气兼服，百余剂而安。

《续名医类案》

薛立斋

一产妇惊悸二度，服琥珀地黄丸、局方妙香散随效，再患服之，其症益甚，而脉浮大，按之如无，发热恶寒，此血气俱虚，薛用十全大补汤、加味归脾二汤，各百余剂而愈。后遇惊恐劳怒复作，仍服前药而安。

《续名医类案》

吴孚先

王氏妇产后数日，恶露已尽，身体虚弱，遇回禄异出神惊散乱，身翩翩如在云端，专科用元胡、红花等味，反增烦剧，汗泻交作，六脉虚弱如元。用六君子加黄芪、炮姜、制附、枣仁、钩藤、龙骨、川断、五味，始服症减，继则神清，每日参或一两，或二两，二十剂而安。

《续名医类案》

高鼓峰

用晦室人患产后惊悸，初起时见筐中绵絮，念将所生儿人绵絮

中，不几闷死，即作惊恐忧患之状，后凡有所触，意中以为不耐，即忧患不止。或一端热想，数日才已，饮食不进，面少精采，服诸补心养血药无一效。高诊之曰：孩时得毋因齿病致大惊否？用晦向室人问之，曰：十岁时果曾病齿，治齿者用刀钳之，几受惊而死，子何能识之也？解曰：脉法当如是耳。不精于象数铃法之学者，不能也（此语不必）。少时以惊受损，伤其君火，心色气散，痰得留之，今产后太虚，痰因虚动，病端见矣。夫心为君主，主明则下安，国乃大昌。故凡七情，皆由心起，今心虚甚，痰邪侵扰，思虑亦因之多变，况喜乐气之阳也，忧患惊恐气之阴也，阳虚则阴得乘之，又儿为其所爱，气虚痰入，则爱不得正，因爱而过为防护之，惟恐不至，遂因而生忧矣。今先用归脾、养荣、八味等类，五十大剂，待其气血完备，然后攻之，痰可得而去，而病不再发矣（先补后攻法）。如言治之，果愈。

《续名医类案》

张路玉

汪督学媳产后病虚无气，洒洒然如惊，咳青黑结痰，欲咳则心中愴愴大动，浑身麻木，心神不知所之，偶闻声响，则头面哄热微汗，神魂如飞越状，屡用补养心血之剂罔效，虚羸转剧，诊之脉浮微弦而芤，独左寸脉厥动摇，此必胎前先伤风热，坐草时迸力过甚，痰血随气上逆。冲过膜膈，而流入心包也。朝用异功散，加童便煨淬蛤粉，以清理痰气，夕用大剂独参汤下来复丹，以搜涤痰积，盖痰在膈膜之上，非焰硝无以透之，血在膈膜之上，非五灵脂无以浚之，然非藉人参相之性，不能激之使出也。服数日，神识渐宁，形神渐旺，改用归脾汤加龙齿、沉香、调理而愈。

《续名医类案》

薛立斋

一产妇恶露淋漓，体倦而黄，食少恶寒，昼夜不寐，惊悸汗出，

此脾经虚热，用加味归脾汤而痊，后因怒胁胀，作呕少食，用六君加柴胡，治之而痊。

缪仲淳治王六息乃正产后惊悸，闻声辄死，非用力抱持，则虚烦欲绝，如是累月，曰：此心脾肝三经俱虚也。用人参、枣仁、茯神、远志、白芍、石斛、甘草、麦冬、五味、丹砂为丸，以龙眼汤吞，弥月而愈。

《续名医类案》

薛立斋

一产妇患颠狂，或用大泽兰汤而愈。后又怔忡妄言，其痰甚多，用茯苓散补其心虚顿愈。又用八珍散加远志、茯神，养其气而瘳。

一产妇亦患此，用化痰安神等药，病益甚，神思消铄，薛以为心脾气血不足，用大剂参、术、芎、归、茯神、枣仁、四斤余而安。乃以归脾汤，五十剂而愈。

一产妇形体甚倦，时发谵语，用柏子仁散稍愈，又用加味归脾汤而愈。又因怒狂言胁痛，小便下血，用加味逍遥散以清肝火，养肝血，顿瘳。又佐以加味归脾汤而安。

《续名医类案》

魏玉横

一妇产后数日，日晡壮热大汗，狂言妄语，不可禁制，晨则了了，诊之六脉弦长，不便不食，此临盆去血过多，肝失其养，燥而生火，逆入胃之大络，非如败血上冲之候（若属败血，则昼夜热狂矣）。与生熟地、甘杞子各一两，麦冬五钱，一剂减，二剂瘳。

丁润兄室数有吞酸症，孕八九月，心腹大痛，时时眩晕欲绝，与大补益气汤，十余剂全愈。临盆胞水先去三日而后产，自汗谵妄，专科与炮姜、附子数剂，遂发狂耳聋，更医以茯苓、车前、半夏、浮麦等，多剂无效。诊时已弥月，脉弦急如蛇行，此精血皆夺之候，亟与

地黄、杞子、麦冬、沙参，一剂脉稍和，症稍减，仍召前医，谓不必服汤剂矣。与丸子令服，二三日发厥而终。此与前症大同，一生一死，谓误治可乎？

《续名医类案》

缪仲淳

张璩浦乃正产六朝发狂，持刀杀人，阴血暴崩，肝火炎故也。令先饮童便一瓯，少止，再服龙齿、泽兰、生地、归身、牛膝、茯神、远志、枣仁，大剂，仍加童便，顿服而止。

《续名医类案》

施笠泽

庠友唐仲宜乃正产后惊悸恍惚，语言错乱，此产后心虚，败血停积，上干包络，致病若此，先用佛手散加石菖蒲、五灵脂、刘寄奴、姜黄等药，以除败血，后以归脾调理而痊。至明年五月复产，复病前症，遍延诸医，施仍书前方，一医讶曰：寄奴、蒲黄等药，从何来耶？仲宜疑不复用。至是冬，施偶同学士材过大洪桥，忽遇仲宜，喜而迎曰：内人自乳子后，或歌哭嗔笑，狂妄不常，向服安神清心之剂不效，夜来几自缢矣。今偶值二子，岂天赐耶？幸为诊之。遂偕往，诊之六脉沉涩，曰：瘀血挟痰，久且益坚，非前药所能疗。用归尾、桃仁煎浓，下滚痰丸二服，每服三钱，下去恶物后，用镇惊肝调理而愈。

《续名医类案》

冯楚瞻

一妇产后两月忽患癲疾，久不愈，或连日不食，或一食倍进，或数日不寐，或间宿一寐，脉乍洪乍小，左寸两尺常弱，消痰镇心俱不效。夫诸躁狂扰，火之病也。二阴一阳，火之原也。主智闭藏，肾之用也。产后未久，少阴虚也。以八味加牛膝、五味，大剂冷服，其所

食鸭肉猪肘，入肉桂同煮，调治数日，乃一日稍轻，一日如故，此心脾亦不足主信而为病也。朝服加味八味汤，夕服归脾汤去黄芪、木香，加白芍、麦冬、五味、肉桂，服后渐安，月余全愈。（未选入）

《续名医类案》

薛立斋

一产妇乍见鬼神，或用调经散，愈而复作，仍服前散益甚，痰涎上涌，朝寒暮热，乃朝用八珍散，夕用加味归脾汤，各五十余剂而愈。

盛用敬治金棠妻半产，病数月，日厥者数四，见鬼自顶而出，自口而入，盛曰：脉涩而弦，血少有痰，鬼自顶门出，原神出也。出而不进者死，出而复入可活也。药之，去痰碗许，寻愈。

《吴江县志》用敬即启东之孙。

《续名医类案》

陈良甫

五羊洪运使天锡子舍孺人产后语言颠倒，谵语不已，如有神灵，服诸药无效，召诊之，六脉和平，以夺命散，两服而愈。

《续名医类案》

阴痛

薛立斋

一妇人阴中肿闷，小便涩滞，两胁作痛，内热晡热，月经不调，时或寒热。此因肝脾郁怒，元气下陷，湿热壅滞。朝用归脾汤加柴胡、升麻，解郁结，补脾气，升元气。夕用加味道遥散，清肝火，生肝血，除湿热。各数剂，诸症悉愈。又用四君、芍、归、丹皮，调补肝脾而经水如期。

--妇人阴中寒冷，小便黄涩，内热寒热，口苦胁胀。此因肝经湿热，用龙胆汤祛利湿热，用加味逍遥散调补血气而安矣。

--妇人所患同前，更寒热呕吐，两股肿痛，先用小柴胡加山栀。一剂寒热呕吐顿止。次用龙胆泻肝汤，一剂肿痛顿消。

--妇人阴中寒冷，小便澄清，腹中亦冷，饮食少思，大便不实，下元虚寒，治以八味丸，月余饮食渐加，大便渐实，又月余诸症悉愈。

--妇人阴肿下坠，闷痛出水，胸腹不利，小便频数，内热晡热，口苦耳鸣。此肝脾火症，用小柴胡、车前、胆草、苓、术、升麻，二剂少愈。又用加味逍遥加升麻，数剂渐愈。乃以加味归脾加升麻、柴胡，并补中益气加山栀，数剂顿愈。仍用加味逍遥加味归脾二药，调理全愈。

--妇人患前症热痛，或用寒凉败毒药，饮食不入，时欲作呕，小腹重坠。此脾胃复损，元气下陷，先用补中益气加炮姜，二剂重坠顿愈。又加茯苓、半夏，二十余剂而愈。乃以归脾汤少加柴胡、升麻，并六味地黄丸而康。

《续名医类案》

孙文垣

--妇，当暑月小便不利而痛，玉户肿，又便血发热，左脉弦数，右寸短弱，此肺气不足，肝火太炽。盖肝为血海，又主疏泄，二便玉户为肝经所络之地。治当疏决肝经壅滞，俾气畅则新血得以归经，热解则小水可自利，而肿亦可消矣。以滑石三钱、桃仁、当归、白芍各一钱，柴胡、黄连、人参各八分，川芎六分，甘草、桂枝、白芷各三分，四剂而瘳。

马凤林内子有隐疾，每月汛行，子户旁辄生一肿毒，胀而不痛，过三日以银簪烧红针破，出白脓盖许而消，不必膏药，亦无疤痕。初用针刺，近则以指掐之，脓即出。但汛行即发，上下左右无定所，第

不离子户，于今八年。内外科历治不效，且致不孕。孙曰：此中焦湿痰随经水下流，壅于子户也，经去而痰凝则化为脓，本来非毒，故不痛（怪病之谓痰）。用白螺蛳壳火煨存性为君，南星、半夏为臣，柴胡、甘草为佐，曲糊为丸，令早晚服之，未终剂而汛行不肿，次年生女。

一妇有隐疾，其夫三造门而不言，继至欲言而面赭。孙开喻之，乃俯首曰：言之无任主臣，先生长者谅无晒。山妻子户中突生一物，初长可三寸，今则五寸许矣，状如坚筋，色赤，大可拱把，胀而且痛，不便起止，憎寒壮热，寝食俱减。赅于言，欲求自尽，逡巡百日矣。孙曰：乃阴挺症也。厥阴肝经之脉，女子下系庭孔，湿热则阴挺，犹木有湿热而生翬也（毕竟热则挺纵不收为是）。与以龙胆泻肝汤及猬皮散、当归、黄芩、牡蛎、猬皮、赤芍为末，每用二钱，空心米饮汤调下。去后数月来报，云前症果痊。兹为汛期一月不至，敢问曰：此有身也？彼疑疾甫愈，未必能孕。谓曰：前恙乃肝经有余之症。肝为血海，女子血盛则怀胎。据血盛当先期，今汛逾期，实孕耳，非病也。后果足月生子。

尚某言昔在粤东与都司李某交善，后李没。其妻售濠畔街宅与尚，仍分院而居，两家往为如亲串然。一日李妻私语尚夫人，有女及笄而病，病且甚异，欲求尚诊而难於言。夫人告尚，曰：与李君夙交好，言之何伤？李妻乃言女初患腹痛，久之溲溺甚艰，溲内有物能游泳，或二或三，似有鳞鬣者，取视之，乃比耳目鱼半体也，身微黑，止具一目，其背白，置水中果如所云。试诊之，肝气久郁所致，投以疏肝之剂而愈。李河南人。

有寡妇患阴中痒不可告人，渐至委顿，此妇平日处奉大士，忽有尼僧来，与药一包，曰：以此洗之，数洗而愈。其药乃蛇床子、吴茱萸、苦参也。

何首乌本名交藤，因何首乌服而得名。何首乌者，顺州南河县人，祖能嗣，本名田儿，生而阉弱，年五十八无妻子。醉卧野中，见田中藤两本异生，苗蔓相交，久而解，解合三四，田儿心异之，掘根持

问乡人，无能识者。遂曝干捣末，酒服。七日而思人道，百日而旧病皆愈，十年而生数男，后改名能嗣。又与子庭服，皆寿一百六十，首乌服药亦百三十岁。唐元和七年，曾文象遇茅山老人，遂传其事，李翱因著方录云。

富家子唐靖疮发於阴至烂，道人周守真曰：病得之欲泄而不可泄也。（治法宜内服龙胆泻肝汤，外以甘草末掺之）

有人阴冷，渐渐入阴囊，肿满，昼夜疼痛不已。用上好川椒为末，帛包裹囊，如不觉热，烘热更妙。内煎大苏汤汁服妙。阴冷两丸如冰，出汗，两脚痿弱，宜补肝汤。

王节斋曰：男子阴痿不起，古方多云命门火衰，祖气虚固有之矣。然亦有郁火盛而至痿者。《经》云：壮火食气。譬如人在夏暑而倦怠，遇冬寒而坚强。予常亲见肾经郁火而有此症，令服黄柏、知母，清火坚肾之药而效。故须审察，不可偏认为火衰症也。

薛立斋治一妇人吐痰热，遍身作痛，小便频数，阴中作痒，日晡热甚。曰：此肝脾血虚，气滞而兼湿热也。用加味逍遥散加车前子而愈。

《续名医类案》

立斋

一妇人阴内脓水淋漓，或痒或痛，状似虫行，诊之少阴脉滑。此阴中有疮也，名曰蚀。由心神烦郁，胃气虚弱，气血凝滞所致。与升麻、白芷、黄连、木通、当归、川芎、白术、茯苓、柴胡，煎服，用搗肿汤熏洗，更搽薄黄、水银，两月余而愈。或有胞络虚，风邪乘阴，血气相搏，令气否塞，致阴肿痛当。以菖蒲散治之，更以枳实炒热，帛裹熨之，冷则再炒。或有子脏虚冷，气下冲致阴脱出，谓之下脱。或因产努力而脱者，以当归散治之。久不愈者，以补中益气汤倍加升麻、柴胡，升举之。

靳阁老子阴茎肿痛，服五苓散等药不应，诊其脉左关弦数。此

肝经积热而成。以小柴胡汤送芦荟丸，一服势去三四，再服顿愈。

--妇人阴器肿痛，小水涩滞，遇晚寒热交作，此肝经湿热为患。以龙胆泻肝汤二服，小水通利。又以四物汤兼小柴胡加花粉、木通、山梔，服之而愈。（《外科正宗》以下共六案来选入）

一妇人无故发热月余，忽阴中突出一物，如鸡冠一片，此肝郁脾虚所致，以补中益气汤加青皮、梔、苓、柴胡、甘草，外以白芷、苍术、紫苏煎汤，每日熏洗。十余日，其患渐小，仍用前汤倍参术，月余而安。

一妇人阴中作痒，遇夜五心烦热，作渴不寐，此思虑太过致心肾不交。以四物汤加龙胆草、山梔、知母、黄连。以银杏散约入阴中二日，其痒渐止。又朝以八味丸，午用归脾汤加银柴胡、茵陈，月余而愈。

一妇人阴器半边肿痛，身发寒热，口干便秘，脉实有力。以内疏黄连汤一剂，大便通利，口干乃止，惟肿痛尤甚。此湿毒结聚，欲为脓也。以四物加角针、泽泻，二剂脓熟胀痛。又透脓散一服，出臭脓盅许，痛止。以八珍汤加丹皮、泽泻，十余剂而安。

一妇人肝经风湿，下流阴器，浮肿痒甚，至抓出血不痛。以消风散加苦参、甘草、泽泻、木通、山梔，外以蛇床子汤熏洗，搽擦银杏散，十余日痒止肿消而愈。

一妇人孀居十余载，阴器作痒出虫，含忍不言。后阴器蚀烂，已蚀内脏，疰羸发热，作渴，脉洪而数。询其痒痛日久，阴器黑腐，小水不禁，内脏已坏，不可用药。彼苦求治。痒者虫也，痛者损也，先用鲫鱼数枚，以香米糝炙鱼熟，以丝绵薄裹纳入阴中，夹之良久，取出红虫长者一寸，短者五六分，细如丝线，约二十余条，置温汤中摇摆片时方死。彼家惟悦，以为可治。曰：再取再有，生化无穷。强投养血清肝药，终竟不应而死。

钱国宾曰：浙潮戴氏女年五岁，胎生双阴，溺从上出，下户亦流。因母病延诊，以私语言及余，曰：此女天生双阴也，不闻《楞严

经》云：五种不男之人，即此类也。长大经行生子如常，以上窍为正，从此勿疑，抚养待配。

《续名医类案》

李铎

车姓妇，印山徐聘三上舍之次女也。于归旬日，患阴户痛连关元，痛时面青昏厥，形如尸，初起一日夜，厥仅二三次，渐则日夜十数次，遍治不效。询其病状，昏愤时亦常牵被衿衣，似下体畏寒者，因悟平素下元必虚，且完姻未久，隐曲之事，未免过当，复值经水过多，精血两亏，阴寒乘虚而入，此肝肾督脉之病。按，厥阴肝脉环阴器，抵小腹，肾经、督脉起于少腹以下骨中央，其络循阴器，宜从肝、肾、督脉三经主治。乃叔省三秀才，亦知医，极蒙折服。余用当归、白芍炒、鹿角胶、小茴炒、艾叶、肉桂、干姜炮黑等味煎服，并令老姬贯用灯火者，于脐轮、关元二穴，焮十四炷，应手而痊。

暖其下元，养其营血，此是的治，然非平素究心医学者，未易辨比隐症。寿山

《医案偶存》

袁焯

癸丑四月，小码头洪姓妇。年逾二旬，患失血症，小便下血块，大便亦带血，阴户酸坠，甚至酸及于心，时时欲尿，精神疲弱。服某医参、芪等药数剂无效，且腹胀，而饮食减少矣。诊其脉虚小无力，此血虚而脑筋衰弱之病。殆由房劳过度欤！为制方用熟地、生地、枸杞子、鹿角胶、阿胶各三钱，炒枣仁五钱，柏子仁四钱，朱茯神五钱，香椽皮一钱五分，白芍二钱，煎服。接服两剂，越日复诊，则病已大退，又嘱其服数剂痊愈。

《丛桂草堂医案》

阴疮

徐守愚

嵊北孙岙庄寡妇年三十，素患肝病，医者每以逍遥散、逍遥饮等方聊图目前小效，延至年余。忽而阴户中无故生疮，状若瘰子。有以棉花疮法治之者，大约以升药薰洗为君，因之小水热痛，迫而不通，午后潮热如焚，饮食减少，肌肉黄瘦，渐近虚损，一派似属难愈。就余诊视，左关短涩，右关弦数，是肝郁则脾受伤，脾伤则湿土之气下陷，蒸而为热，下注阴户则生疮、生虫，痒不可当，在所不免。仅仅小水热痛，犹其余事耳。东垣云：“不渴而小便不利者，热在下焦血分也，宜滋阴化气之法。”余以滋肾丸大剂与服，四、五剂而诸证悉退，饮食渐加。后以疏肝健脾合而用之，始得霍然。

知母三钱 川柏三钱 桂枝三钱 原方用肉桂，余易以桂枝。

《医案梦记》

阴痒

林佩琴

夏氏。暑月孕后，小水赤涩，子户痒甚，日晡寒热。此由胞宫虚，感受湿热也。内用龙胆泻肝汤，加赤苓、灯心煎服。外用蛇床子、川椒、白矾，煎汤熏洗。再用杏仁、雄黄、朝脑研末，掺入户内愈。

《类证治裁》

李锋

族某妇，常患阴痒，有时阴中痒极难忍，洗擦不已，浼荆室转述求治。余用蛇床子煎汤洗，内服六味加龟板、鹿角，四服而愈。尝治多妇皆验。又治一少妇，阴蚀，痒时如针刺虫钻，擦破流水，殊苦，以

古方猪肝煮熟，削挺，钻孔数十，蘸雄黄末，纳阴中良久取出，果有虫在孔中，另易一挺纳之，虫尽自愈，屡用屡验。

《医案偶存》

余听鸿

余在业师费兰泉先生处，见师治一姬，年约五十余，阴痒半载，服黑归脾汤大剂三十余剂而愈。余不甚解，问之。师曰：治病所谓世传者，皆有祖父之遗法也。道光时吾族中某太太，年近六旬，阴痒数月。此时吾孟医道正盛，每以利湿清热之剂，或以炙肝片夹之。其痒更甚，彻夜不寐。后延孟河北乡贾先生，即以党参四两，桂圆肉四两，煎浓汁，分申、戌、子三次服尽，即能酣寐，至明日日晡时始醒，其病霍然。众问故。贾先生曰：高年血燥生风，诸公用利湿之品，利去一分湿，即伤其一份阴，湿愈利而血愈虚，血愈虚而风愈甚，其痒岂能止息。治法无奇，惟养血而已。众皆佩服。吾今日之用归脾者，亦东施之效颦耳。余后遇高年二人阴痒，亦宗归脾汤治之，无不应验。故志之以以为世用，不敢负吾师之苦之耳。

《余听鸿医案》

傅松元

同窗某君，在上海娶妻某氏，生子女各一而亡。妇抚孤成人，使子习贾，能勤奋自立，为之娶媳生孙，虽女尚待字，而家庭和顺，温饱无忧，苦节至此，良为不易。某氏年近半百，一日，忽命其子邀余诊，至则屏左右惨然而言曰：“下体痒极难忍，殆已月余，此症何来，令人刻不能支，望先生有以药之。”余曰：“此乃相火旺盛所致，故两脉弦急而数，左强于右，嫂氏苦节多年，余有治法，幸毋过悲。”乃投以龙胆泻肝汤，下青麟丸二剂，不应。又去青麟丸，加焦川槿、芦荟、川楝子投之，其痒非惟不止，并下注于两股，上窜于腹胁，乃再用生地、龟板、寒水石、元精石、黄槿、黄连、大青、板蓝根、柴胡、荆芥、知

母、木通、山梔、黄芩、车前子、冬葵子、乌梅、赤芍等药，增损至七八剂，其痒竟上及颠顶，下至跟踝，总以左偏为甚，日夜不休，痒处阵阵如火烧。某氏几至痛哭求死。余复以生地、龟板、川槿、五茄皮、牛膝、知母等药为剂，调服珠黄、痒始渐退，火亦渐息，如是一月而平。嗟乎！守节之难如此，旌表之所以不可少也。

《医案摘奇》

张汝伟

王右，年七十四岁，天津，住岳州路，前阴内外，忽然痛痒难熬，抑且红肿腐烂，蔓延甚速。加之咳呛气急，坐卧不安，溲赤便坚，此由肝气郁热下滞，冲气被激上逆。宜先治下，勿以年老而投滋补，勿以咳呛而忽阴蚀也。脉弦数，用龙胆泻肝法。

大生地 山梔仁 粉草藓 金银花 木猪苓 西赤芍
炒丹皮各三钱 龙胆草 细柴胡 生甘草梢各一钱 炒淡芩钱半

二诊：服龙胆泻肝法后，肿退三四，蚀腐之势，定而渐干，咳呛气急，因之而减，略可平卧。千年之木，往往自焚，高年相火仍炎，炉灰复炽，惟属不经见也。宜再通营泄化。

当归尾二钱 西赤芍 川楝子各钱半 大生地 海金沙包
驻车丸包 粉草藓 猪赤苓各二钱 川黄柏钱半 生甘草一钱
金银花一两

本证始末：辛酉八月某日，夜半，叩门求治，云起已月余。诸杀虫化湿止痛之药，均服无效，有求死不得之苦。以上二方，共服四剂得获痊愈，不亦快哉。

方义说明：阴湿一症，有属湿者，此症则属于火，故用龙胆泻肝而有效，其见症在红肿，在溲赤，在便坚，治病能探其原，用药自能入寇。湿与热相搏者，往往有毒，况挟无形之相火乎。所以治下症，而上之咳呛亦平。倘专注重治咳，恐咳不止，而阴湿亦不能愈也。

《临证一得》

施今墨

王某某，女，67岁。阴部搔痒，已有年余。搔甚则出黄水，其痒难忍，影响睡眠。经停于48岁，白带多，大便三、四日一解。舌苔黄腻，六脉沉滑。

辨证立法：脉证合参，湿热为病已无疑议。湿热下注则阴部搔痒，时出黄水，并见由带绵绵。治之宜清肝胆泻湿热，以肝脉络于阴器也，化裁龙胆泻肝汤为治。

处 方：醋柴胡 5克 北细辛 1.5克 车前子 10克，布包
杭白芍 10克 大生地 10克 车前草 10克 龙胆草 5克
酒当归 10克 川楝子 10克 海螵蛸 10克 白杏仁 6克
桑螵蛸 10克 晚蚕砂 10克，炒皂角子 10克同布包 白薏仁 6克
酒川芎 5克 酒川军 6克 粉甘草 3克

二诊：服药四剂，搔痒仍然，但黄水较少，大便隔日一次。前方加花椒 1.5克，乌梅炭 5克，盐知母 6克，盐黄柏 6克。

另用熏洗方：蛇床子 3克，百部 30克，花椒 15克，煎汤外用。

三诊：前方服十剂，又加用熏洗方，搔痒大减，白带亦少，希予常服方回乡。

处 方：龙胆草 3克 川楝子 10克 生白果 10枚，连皮打
北细辛 1.5克 盐知母 6克 北柴胡 5克 生熟地各 6克
盐黄柏 6克 杭白芍 10克 沙蒺藜 10克 酒川芎 5克 桑螵蛸 10克
白蒺藜 10克 黑芥穗 5克 川花椒 2克 炙甘草 3克

《施今墨临床经验集》

阴肿

李铎

上舍吴某，客蜀有年，返里才数月，其妻患前阴焮肿，痛如火

烧，小便闭塞，坐卧不宁。延疡科，作恶疮治，投清利攻毒药无效。吴自悔持身不谨，贻害妻室，逆予商治，诊脉沉涩，此明是下焦血分病，实阴火盛而水不足，洁古云：热在下焦，填塞不便，法当治血。血与水同，血有形而气无形，有形之疾当以有形法治之，外以鲜马齿捣烂，敷玉门内外，同服大苦之味，重用黄柏、知母，稍佐桂为引用，煎服二贴，是夜溺如泉涌，烧痛减半，肿亦微消，次日仍照原法内服外敷，烧痛顿止，不数日肿消溺顺而全愈矣。其夫妇常感予德，二十年来情义如昔，亦厚道也。

《医案偶存》

萧伯章

周某之妻，年二十余，患后阴热痛而肿，继连前阴亦然，小溲短热，行动维艰，其夫请方，余疑其为淫毒也，却之。他医以发散及寒凉清利进，益剧。驯至咽喉亦肿痛，水谷难入，复再三恳求，诊之，脉沉微，舌苔白而滑。曰：经言肾开窍于二阴，肾阳不潜，浮游之火，漫延上下，故见此症，以济生肾气丸与之，一剂咽痛止，二剂肿痛减半，三剂顿愈。

《遼園医案》

阴挺

倪复贞

北通州马如云夫人，产后前阴下如衣裙状，医药频投皆不应验。延余至其家，诊得六脉沉迟，此乃虚寒元气下陷之候。法用补中益气汤升麻为君，加干姜、肉桂为使。服四剂，收缩一半。后用皮硝、五倍子煎汤薰洗，如束皮之法；内再服补中益气汤加倍升麻，不用姜、桂，四日、四剂全然无恙矣。此前贤常用之法，缘分偶符遂奏

奇效，博览待用，愿与开下共勉之。

《两都医案》

程从周

王魁之妇，年三十余岁。乙丑年元旦，分娩后子肠拖下约六、七寸长，起居甚为不便，余曰：“此气虚下陷，用力过度，兼之受寒所致也。”乃以补中益气汤去柴胡，合佛手散，再以热物熨其脐下。不数剂肠收而愈。此病若不早治，或复受寒邪，则为终身痼疾矣。乌可视为泛泛哉！

《程茂先医案》

吴箴

金氏产门不闭，阴挺突出肿痛，小便淋沥不禁。诊脉虚弦数，系产后气血俱虚，忧思伤脾，阴虚血热而然。先服八味道遥散，火退肿止。更以归脾汤，数帖乃愈。

《临证医案笔记》

王孟英

翁嘉顺令正，娩后，阴户坠下一物，形色如柿。多方疗之不收。第三日始求治于孟英。令以泽兰叶二两，煎浓汤薰而温洗，随以海螵蛸、五倍子等分，研细粉掺之，果即收上。

继而恶露不行，白带时下，乳汁全无，两腿作痛，又求方以通之。孟英曰：此血虚也。乳与恶露虽无，其腹必不胀，前证亦属大虚，合而论之，毋庸诊视。因与黄芪、当归、甘草、生地、杜仲、大枣、糯米、脂麻、藕（肉）、浓煎羊肉汤煮药，服后乳汁渐充，久服乃健。

《王氏医案》

林佩琴

孔氏。阴挺时流脓水，脉虚涩。内服补阴益气煎加白芍，外用川芎、当归、白芷、熟矾、银花、甘草，煎汤熏洗，拭干，用五倍子研末掺之。

王氏。产后气虚阴脱，两尺空。用补中汤去柴胡，加菟丝子、杜仲、芡实，外用龙骨、牡蛎俱研细托之。

《类证治裁》

李铎

家春云叔之妻，年近三十，产后昏晕虚脱，手足厥冷。余因禁溺女，闻伊家不肯洗育，冒病邀集同人，乘夜往伊家阻救。诂闻产母垂危在床，即进房诊视毕，谓若肯洗女，余包救其母，一面命稳婆浴女婴，一面煎大剂参、附、归、芪、姜炭等味与服，大效。次日复诊，老姬言子宫坠下，不能起坐，遂用炙绵芪一两，当归三钱，文党参四钱，升麻八分，甘草炒八分，水煎服，一剂即上，效验如神。此非偶中，而治多人皆效，故识之，后见《女科辑要》载治一妇子宫下之法，与余所用之方相同，惟多用白术一味，及分量轻重稍异。实先得我心之同焉。

《医案偶存》

过铸

某姓妇，来就余诊，问其所患，忸怩不言，令篷室张氏诊之。诊毕告余曰：“病为阴挺。”修园以为用逍遥散、龙胆泻肝汤之类不效。然此妇两颧色赤，身体壮热，脉则左关独旺，肝经之火盛极，非此二方不可，拟今早晚服之。恐煎剂功迟，以蛇床子、川椒、乌梅、槐花煎汤熏洗之。外以芦荟为末，调猪油敷之；内以小蚌肉蘸冰片塞入，不时易之。内外兼治，未知效否。余曰必效。盖蚌象形性寒而善缩，得冰片则渐渐化水，俾热解而挺自收。余味亦对症发药，面面俱到，

岂有不效。阅四日复诊，诸恙果减。又二日挺缩而病霍然矣。

按：陈修园《女科要旨》云：方书载阴挺乃湿热下注。薛立斋以加味逍遥散、补中益气汤为主，当归芦荟丸、龙胆泻肝汤之类为辅。治之而无一效，误于方书湿热二字，意似只须治湿，故谓番薯味甘属土，土能胜湿，为治此病之专药。且云薯养气长肉，滨海人以此作饭，终身可不病。其说未免太偏，不知吾乡人食此类多腹胀、气闷、纳少等恙。曩余司榷郡地，亦产薯，人多食之。窃疑此种于吾乡，群试食焉，一切旧病如故，至生温。女婢则虽挈之回乡，苟有病，食薯即愈。始悟五方地气不同，人所宜食之品亦随之。南人食米，北人食麦，职是故耳。修园闽产也，故有是说。

《过氏近诊医案》

沈祖复

洛社张巷张钧培室人经事前后无序，白带频下，饮食无味，阴户坠下一块，宛如紫茄，咳则下，卧则缩，服药年余不效。先生诊之，阅前方，皆云膀胱下坠。乃细询其形，色何若？病者曰：“其色紫暗，触之微痛。”先生曰：“此非膀胱也！夫膀胱之色白，小溲不能通利。此乃气虚不固，子宫下坠也，恐难一时见效。”用黄芪、升麻、白术、人参须、葛根、芡实、牡蛎、陈皮、甜杏仁、白芍，神曲，服三剂而缩上矣。

《医验随笔》

孙采邻

吴芳林文学乃室，产后玉门生菌，道光元年五月延诊。据述病原于上年十一月二十七日生产，至十二月二十日，觉子宫内有一物挂下，形如茄子。每日频频作痛，或间三五日一大痛，以及小腹亦痛，甚至玉门肿疼，两旁出水。小溲频数，出不顺利，小便赤大便结，两足冷至膝，左足尤甚，手心热，口内苦。连服补药，亦不去疾。据

云病在肝经，而用药俱不见效。特书病原，救治于予，方案列下。

细审病情，玉门生菌，形如小茄，起于产后，迄今半载，苦难鸣状，非不终朝疗治，而数手频更，究无一效。诊其脉右脉虚细而小，左关沉弦小數，惟寸则浮小空虚。知其产前受惊，产后肝郁，郁火不舒，致成斯疾。无怪乎物一触而心惕，闻一响而胸中跳跃，小腹作疼，子户肿痛，溲赤便结。种种见症，病在肝脾而兼乎心也。本此意而求治，加之静养戒怒，庶乎渐安。

潞党参三钱 焦冬术一钱半 归身一钱半 茯神二钱
白芍药一钱半，炒 酸枣仁二钱，炒 柴胡五分 青皮一钱，醋炙
小茴香一钱 金铃子一钱半 山梔一钱半，炒 用鲜荷叶一小个托底煎药。

二诊：进前方诸证俱减，肿痛渐消。加意图维，自尔平可，仍宗前法出入。

潞党参三钱 炙黄芪三钱 焦冬术一钱半 归身一钱半
柏子仁三钱 炙甘草八分 黑山梔一钱半 柴胡五分 木茯神二钱
新会皮一钱半 龙胆草七分，陈酒拌炒 升麻三分，蜜炙 用鲜荷叶一小个托底煎药。

外用五倍子一两，生明矾六钱，煎汤先薰后洗，早晚各一次。忌海鲜，及鸡、虾、蟹等俱宜戒之。

《竹亭医案》

费承祖

镇江崔苟轩之室，得一奇症。左少腹作痛，即有物坠出阴户之外，其形如茄，浓血淋漓，痛不可忍，经三日脓血流尽，而后缩入。月余再发，苦不胜言。遍访名医诊视，无一人识其病者。就治于予，诊得左关脉来牢结，是湿热伤肝，气滞血凝而成，如男子瘕疝之类。清泄肝经湿热，调气机而化瘀浊，此患可除。

土瓜根五钱 金铃子三钱 山楂子三钱 陈橘核三钱

细青皮一钱 郁金一钱五分 黑山栀一钱五分 枸橘李三钱
京赤芍一钱五分

服三十剂，恙即霍然。

《费绳甫医话医案》

吴鞠通

周氏，三十三岁。产后子肠不收，突出户外，如小西瓜大一块，但软扁耳。脉弦数，气血皆虚，着重在气。先以吴萸细末作袋垫身下；汤药以补中益气汤少加川芎八分，一贴而收，二贴去川芎，三贴去升、柴，加桂圆，弥月而安。

《吴鞠通医案》

孔继炎

姬某氏，凌晨叩门，为其女求治，意甚仓皇。予问病者何以不来？曰：不能移动。问何病？病自几时？曰：下体肿疼才三日耳，而重特甚。问其详？曰：言之殊惭，亦不得不言。此女素本无病，适人未久，三日前，自其夫家来归，亦甚欢愉，及晚，稍觉腹中热疼，次日，阴股已肿，阴中有物外撑，痛乃甚。小便不利，通宵无片刻安。至昨日，阴中之物突出三四寸，赤红粗大，上带锋刺，触之疼彻心肺，不惟小便不能涓滴，并肛门撑阻，大便亦不能下。而其物且方长未艾。目下惟支股卧榻上，哭求速死，不知尚可治否？予曰：但痛亦不至死，小便不通，胡可久也。吾为立三方，一以饮，一以洗，或尚可瘳，然效与不效，明日必来回信。亲朋骇曰：此为何病？君敢慨立三方。予曰：病名予所不识，然其理可意断也。经曰：诸痛疮疡，暴病暴肿，皆属于火。刘守真曰：五志过极皆为火。此必五志之火郁于内，而少年新婚，又有以触之，故其火不炎而上焚，反吸而下就。夫火性极速，其发也暴，故三日而病至此极也。且病之似此者三：曰阴挺，曰阴菌，曰阴痔。其为症多属产后虚劳，中气陷下之故，而总不

闻其肿疼，亦必不至于阻便。今新婚未产，何至于虚？平日无病，气必不陷，不作火治，此外尚有他途乎？予但为之清火，保无舛错。曰：风湿中无此症乎？曰：风之为性也动，必不骤结于一处；湿之着人也迟，必不猝发于一朝。惟心包之火，可下注于膀胱，而肝家之雷火，肾家之龙火，地近壤接，声应气求，势必翕然归一，并起为害，斯其所以沸腾气血，鼓荡肌肉，以至肿劲而突出也。兹用丹皮、连翘清心包之火，佐之以龙胆，臣之以知、柏，凉之以地黄，和之以芍药，而又用车前子、牛膝导引直下，火势即不清，能不衰减乎？洗法特属末事，无足道也。次早，前姬至，讯之，突出之物果消归乌有，痛亦顿止，惟阴股尚余微肿。问药可再服否？予曰：分量过重，减半服之可也。乃服半剂，病遂全愈。

《孔氏医案》

翟竹亭

葛寨王姓农人，妇四十余。五月临产，误听信婆言，坐草太早，产时用力过劳，小儿下地后，阴户内突掉出一物，色黑紫大如茄，不疼不痒，十余日不上。请余诊治，诊得脾肺二部脉濡细无力，此是气血双亏，乃子宫脱出，俗呼为阴茄是也，非大补升提不可。遂开十全大补汤加减，服二帖见效，五帖完全收入。

十全大补汤加减

党参 12 克 白术 12 克 茯苓 10 克 炙甘草 6 克 当归身 12 克
白芍 10 克 熟地 15 克 五味子 6 克 升麻 3 克 柴胡 12 克
炙黄芪 10 克 山药 10 克 五倍子 6 克 山萸肉 10 克 肉桂 6 克 水煎服。

《湖岳村叟医案》

叶熙春

崔，女，二十五岁。九月。常熟。中气素虚，产后过劳，气虚下

陷，收摄无力，下腹重坠，阴中有物外挺，腰酸无力，带下如注，小便频急，脉象虚缓，舌淡苔白。治拟补中益气汤加味。

清炙黄芪 15 克 炒潞党参 9 克 炒晒白术 9 克 炙当归 9 克
清炙甘草 3 克 柴胡 3 克 炙升麻 5 克 陈皮 5 克 炒杜仲 12 克
米炒怀山药 12 克 盐水炒桑螵蛸 9 克

二诊：前用升提补摄之剂，阴中之物外挺略见内收，带减，腰酸亦差。仍以原法进之。

清炙黄芪 15 克 炒党参 9 克 炒白术 9 克 炙当归 9 克
清炙甘草 3 克 柴胡 5 克 炙升麻 5 克 枳壳 5 克 山萸肉 9 克
米炒怀山药 12 克 炒杜仲 12 克

三诊：迭进补中益气，阴中之物已不外挺，下腹重坠消失，带下尿频均除，续服补中益气丸，每日 12 克，二次分吞。

《叶熙春专辑》

阴吹

李铎

傅氏妇，年逾四十，患阴吹半载，别无所苦，其夫求治于余。余未经治此病，检方书云：是胃气下泄，阴吹而正喧，乃谷气之实也，猪膏发煎导之，果验。

猪膏半斛，乱发如鸡子大一枚，和膏中煎之，发消药成，分作四次服，二料即愈。此古方也，用之得效，故录于此。

《医案偶存》

吴鞠通

英氏，三十八岁。阴吹，按金匱妇人门之阴吹，治以猪膏发煎，纯然补阴，注谓肠胃俱槁。再按肠胃俱槁，阴不足者，阳必有余，脉当数，面与唇舌当赤，口当渴。兹面青脉弦而迟，不食不饥，不便不

寐，盖痰饮蟠踞胃中，津液不行大肠，肠虽槁而胃不槁。议通幽门法。

半夏一两 桂枝六钱 广皮五钱 枳实八钱 煮三杯，分三次服。服一帖而减，三帖而退；惟余痰饮，调理脾胃数月而痰饮亦愈。

黄芩，四十岁。痰饮误补，喘而脉洪，汗出，先与大青龙去麻、辛而安。半月后又因感受燥金之气，兼之怒郁伤肝，脉弦紧，身热腹痛，先与柴胡桂枝各半汤，热退而腹痛未愈，且泄泻、阴吹，焉得肠槁；用川椒、吴萸、良姜、丁香合五苓散，而阴吹愈，后调理痰饮一月而安。

《吴鞠通医案》

梦交

沈祖复

光复门外某妇患异疾，每夜恍惚似有人与之交，六年有余矣。四肢乏力，腹中作痛，形神萎悴。据云：与夫同寝，辄有人击其夫两臀，夫寤后隐隐觉痛，现青色，倦怠七日方已。先生诊之曰：“此阳气不足，阴邪乘之，当发越阳气以制阴邪。”用当归二钱，青蒿三钱，雷丸三钱，鬼箭羽二钱，木香七分，香附二钱，石菖蒲五分，防风汤炒黄芩三钱，纯阳正气丸钱半先服，另朱砂三分，雄精二分研末调服。外用雄精研末，涂阴处，并遍洒床帐。是夜又来，离床尺许，不敢近。明日复来诊，用扶阳抑阴，尊大易之旨：人参须一钱，辰茯神五钱，青蒿二钱，雷丸三钱，酸枣仁三钱，辰砂拌灯心，三尺，鬼箭羽三钱，龙齿四钱，朱砂安神丸三钱，另真獾肝一分，雄精二分，金箔一张，研末服。是夜与一妇人同来，劝解曰：“与我银锭若干，则不来矣。”病者见其从窗棂更换黑衣而去，从此遂绝，今已气体强壮矣。

《医验随笔》

中神琴溪

一妇人，年三十余，每交感小腹急痛，甚则阴门出血，而月事常无违，其余腹脉亦无异常，医药万方莫效。先生曰：“所谓下有病，上吐之。”乃与瓜蒂散六分，以吐粘痰升许，与大柴胡汤缓缓下之，后全差。

《生生堂治验》

沈祖复

西门老县前谢姓妇人二十余，生女后久不育，每交媾阴户流血如注。含羞就诊，先生曰：“此非气不固血，系君之相火过动，故肝不藏血也。”拟濂珠、黄柏、黄连、白芍、乌梅、玄参、连翘、黑梔等，服之安然无恙。

《医验随笔》

徐守愚

马仁邳凤山胞妹忽患石瘕，正经所谓骨肉柔脆之人，其质本弱，病胡能已？去岁秋仲，曾延余治，尔时，病形虽重而病根未成，余拟先补后攻之法，许服药数月可以脱然。谁知其母溺受倍深，意欲速愈，不以为然，遂不复诊。乃延三界陈某坐医月余，以致饮食减少，少腹块痛，渐渐加重。陈自知贻误，因而卸去。嗣后朝张暮李，纷纷杂投，日即于危矣。越至今其兄凤山仍复修书，邀途至，诊脉微弱无神，形容枯槁，寒热交作，日夜泻痢三、五次。阅其方药，知从前所服，不外景岳大补元煎、三阴煎、逍遥饮等方出入其间，未有议及温通者。余谓凤山曰：“此证病因、治法俱详《内经》，其曰：寒气客于子门，子门闭塞，气不得通，恶血当泻不泻，衃以留立，日以益大，状如怀子，月事不以时下，皆生子女子，病因也。其曰：可导而下者，治法也。往年余初诊时，乘其元气未败，尚可按症施治。今病笃至

此，虽有成法，亦无所用。”其母涕泣求方，余不得已，始用参芪建中汤和营卫以除寒热，继用附子理中汤加乌梅崇脾土以止泻痢。此法外法也，非云治病，亦聊以尽人事耳。厥后再延数十日，一交午未之月，百药难进，少腹大痛而逝。

《医案梦记》

王旭高

苏。石瘕生于胞中，寒气客于子门，子门闭塞，气不得通，恶血当泻不泻，衃以留止，日以益大，状如杯子。此段经文明指石瘕一症，由于寒气瘀凝夹阻而成。今腹痛泄泻食少，脾胃虚寒，肝木横逆，病延半载，元气已衰，理脾胃，兼温中下，尚恐莫及。备候主裁。

肉桂 冬术土炒 陈皮 木香 金铃子 诃于 茯苓 干姜
泽泻 延胡索 生熟谷芽

《王旭高临证医案》

张山雷

吴右。汛阻成癖，延已及期，形巨而无痛楚。脉细四至，舌如平人。胃纳佳而举动如常。述前服攻破，曾吐瘀而污见，一度瘀黑杂至，症形小减，是非温通不可。

潞参4.5克 炮姜1.2克 龟板9克 桃仁9克 归尾6克
延胡4.5克 蒲黄3克 五灵脂3克 木香2.4克 甘草1.2克
青皮4.5克 香附6克 怀牛膝4.5克 乌药4.5克
金匱鳖甲煎丸4.5克，分两次吞

二诊：昨方一剂，汛事即通，并无紫瘀，脉形起色，举动如常，乃去失笑散、延胡，减桃仁，用3克，改全当归4.5克，余照原方。

三诊：脉象更变，形热有力。汛见如平时，亦无紫瘀，少腹微胀，余则无所不适。舌苔平常，不燥不腻。血行气行，脉乃大显，是为佳兆。再与归脾加减。

潞党参 4.5克 於术 1.5克 川楝子 9克 乌药 4.5克
青皮 4.5克 怀牛膝 4.5克 当归身 1.8克 全当归 4.5克
醋香附 9克 炮姜 0.9克 白芍 9克 木香 1.8克 炙甘草 1.2克
酸枣仁 9克 金匱鳖甲煎丸 3克

• 四诊：前方两服，信事未已，并不甚多，间以紫黑，尚无瘀块，脉亦平静，眠食如常。外贴消痞狗皮膏两天，仍无动静。述痞块外形其大如掌，坚硬高突，即重按亦不痛不酸。既由经闭而来，总以因势利导，疏肝行滞，兼补脾阴，弗伤于峻。

党参 6克 白术 4.5克 当归身 2.4克 当归尾 4.5克
延胡 1.8克 桃仁 1.8克 五灵脂 2.4克 青皮 4.5克 香附 4.5克
炮姜 1.2克 炙甘草 1.2克 木香 2.4克 乌药 4.5克 鸡血藤 4.5克
金匱鳖甲煎丸 4.5克，两次吞

五诊：前方三服，信事如恒，间有紫色，亦无成块，且所见不多。询得经色渐淡，则信来六、七天，行且自止。脉细而和，胃纳有加，皆是佳况，腹膜亦和。惟瘦形如故，则久恙本非旬日可瘳。仍守归脾，参柳洲滋养肝阴。

潞党参 6克 白术 6克 远志 9克 黄芪 4.5克 枣仁 9克
木香 2.4克 枳壳 1.8克 白芥子 9克 茯神 9克 川楝子 9克
杞子 9克 炙甘草 1.8克 当归身 2.4克 全当归 4.5克 砂仁 1粒
青陈皮各 3克 鳖甲煎丸 3克

嘱昨方备日后经行时服三、四帖。

六诊：返棹还乡，舟中痞痛，咯吐紫瘀数口，尚无鲜血，此瘀痞已动其机，但不下而上逆，甚非佳兆。幸一吐即止，痞痛尚不剧，此舟摇曳，致肝气上逆，所以耳鸣眼花。抵家后痛即止，经事亦止，盖信行已八日矣。起居如常，胃口亦好，皆是泰境。来函更方，议归脾汤，仍参导瘀破痞意，冀以刈其痞块之根，但柔脆之质，终不可放胆攻破耳。设在经净之初，尤不可稍涉于峻。

党参 9克 白术 9克 当归身 2.4克 全当归 4.5克

黑香附 4.5 克 酸枣仁 9 克 乌药 4.5 克 降香 3 克 血余炭 6 克
白芥子 9 克 鸡血藤 4.5 克 炙甘草 1.8 克 杞子 9 克
生熟蒲黄各 2.4 克 桔梗 2.4 克 带壳砂仁 1 粒 青陈皮各 4.5 克
鳖甲煎丸 4.5 克

《张山雷专辑》

肠覃

王旭高

蒋。少腹结块，渐大如盘。此属肠覃，气血凝滞而成。拟两疏
气血。

香附 五灵脂 红花 当归 泽兰 桃仁 延胡索 丹参
陈皮 砂仁

大黄酒虫丸，每服二十粒，开水送。

《王旭高临证医案》

王仲奇

程右，盆汤弄。初诊：环脐少腹绷紧膨肿，状如怀子，时或胀
痛，食难消受，大便不利，带下频仍。脉弦涩。似胀满而非胀满，恐
肠覃之属。姑拟一方，未识何如。

制川朴一钱五分 炒青皮一钱五分 泽兰三钱 红花八分
缩砂仁一钱五分 杏仁三钱 陈枳壳一钱五分 茯苓三钱 白敛三钱
煨莪术一钱五分 广木香八分 泡吴萸六分

复诊：腹胀膨肿较消，惟脐下少腹尚觉绷紧，气泄则舒。食稍
增益，大便较利，带淋未减。脉来弦涩。脾钝肠急，气机不行，子脏
亦难免不受压迫。肠覃之患，当预虑也。

制川朴一钱五分 炒青皮一钱五分 泡吴萸六分 煨莪术一钱五分
缩砂仁一钱五分 瞿麦三钱 白敛三钱 陈枳壳一钱五分 茯苓三钱

台乌药一钱五分 煨肉果一钱二分 广木香八分 续随子霜一钱五分

三诊：膏之原，出于鸠尾；育之原，出于脐映。脾钝肠急，气机不行，溢于肠而着于育，故环脐少腹膨胀膨脝，状如怀子。前以舒气调营，腹膨胀膨脝较消，但按之仍觉坚硬，大便日二三起，肠间乍鸣，带淋未已。脉濡涩。守原意为之。

制川朴一钱五分 陈枳壳一钱五分 泡吴萸六分 台乌药一钱五分
炒青皮一钱五分 茯苓三钱 煨莪术一钱五分 缩砂仁一钱五分
北细辛四分 煨肉果一钱二分 制附块二钱 地骷髅四钱
续随子霜二钱

四诊：腹膨胀较消，胀则时作时减，脐下少腹仍然坚硬，大便两日未行，肠间乍鸣。脉濡涩而弦。有形症结，非气瘕可比，虽有化症之方，消弭亦殊不易。仍守原意，冀渐软渐消为幸。

制川朴一钱五分 炒青皮一钱五分 制附块二钱 廔虫一钱五分
泡吴萸六分 海南子二钱 煨莪术一钱五分 台乌药一钱五分
北细辛四分 蛭虻一钱五分 煨草果一钱五分 红花八分
续随子霜二钱

五诊：膨脝较消，胀则时作时减，脐下少腹坚硬略软，肠间乍鸣，昨尝作泻。有形症结消弭甚难。脉弦涩。守原意以治。

制川朴一钱五分 煨草果一钱五分 制附块二钱 廔虫一钱五分
瞿麦三钱 干蟾皮一钱 煨莪术一钱五分 海南子二钱 北细辛四分
蛭虻一钱五分 缩砂仁一钱五分 泡吴萸八分 续随子霜二钱

六诊：少腹膨脝较消，坚硬略软，胀仍时作时减，便泻勿爽，日有数起，肠间乍鸣。脉濡弦涩。有形症结，未易消弭；如能见软，即渐消之朕。守原意出入。

制川朴一钱五分 制附块二钱 炒贯众二钱 甜葶苈二钱
海南子二钱 红花八分 泡吴萸八分 北细辛四分 瞿麦三钱
炒青皮一钱五分 炒桃朮二钱 续随子霜二钱

七诊：症结较软，仍稍膨胀，日来又痛而难过，大便仍溏，日有

两起，惟食不已不胀闷。脉弦。守原意通调肠胃，化症消结。

制川朴一钱五分 台乌药一钱五分 北细辛三分 川桂枝一钱五分
煨莪术一钱五分 泡吴萸六分 炒青皮一钱五分 缩砂仁一钱五分
炒小茴香八分 炒黑川芎一钱 佛手柑一钱 茯苓三钱 真阿魏三分
广木香六分 同研，饭丸吞。

八诊：腹痛减轻，溏泻转鞭，如厕日只一度。舌苔灰黄而腻，已较融化，面容仍稍青晦。环脐腹中症结已消。日来又感时行伤风，咳嗽。脉濡滑而弦。治当两顾。

煨肉果一钱五分 槟榔二钱 炒青皮一钱五分 沉香曲一钱五分
泡吴萸六分 煨川楝子一钱五分 真广皮三钱 獾肝一钱二分
炒五灵脂三钱 紫菀一钱五分 杏仁三钱 佩兰三钱 蒸百部八分

《近代中医流派经验选集》

丁泽周

金右。血虚气滞，肝脾不和，经事行而不多，脐腹作胀，似怀孕之状，脉象不滑，此肠覃症也。姑拟和营理气，调畅中都。

全当归二钱 紫丹参二钱 茺蔚子三钱 光杏仁三钱
云茯苓三钱 陈广皮一钱 大腹皮二钱 象贝母三钱 制香附钱半
春砂壳八分 绛通草八分 冬瓜子三钱

《丁甘仁医案续编》

刘民叔

浙江慈溪人孙月英女士，住上海市北站区塘沽路九九七卫生葆里八号童宅，现年四十九岁。素有洁癖，勤洒扫，工刺绣，仅育一女；于二十七岁时，丧夫不嫁，今已孀居二十二年。近病卵巢癌，久治不瘥，或嘱其试服中药“黄芪”，每日二两水煎服，服至二斤，初甚验，后无效，经其外甥媳张馥臻女士介绍，延夫子诊治，凡处二十六方，每方都加鼠屎三十粒，共服一百一十九剂，停药将养至一九

五三年十月十日，月经始至，至是而人皆认为从此全愈矣。或问：“近来新学之士，倡言黄芪治癌有效，乃服至二斤，而反剧何也？”夫子曰：“癌犹疮也，辨证有始末之异，治法有攻补之殊，用药则或温、或凉、或燥、或润，对证处方，各适其宜，未可固执一端也。若孙氏初期之癌，但腹中大坚，未尝溃也；未溃者，不宜补；黄芪补虚者也，神农本草经称其‘主痈疽，久败疮，排脓止痛。’药不对证，故无效焉。予处方，自始至终，必用鼠屎者，以鼠性善穿，其屎又善破症坚积聚血瘕，故用于未溃时有效；反之，若误用于已溃之后，则其虚虚之祸，又不亚于黄芪之实实者矣。”孙氏既愈，同学蔡岫青访问，得其女曼华亲笔报告一纸，今照原文抄录于后：

家母自一九五二年农历九月中得病，起先是发热五天，请中医诊治无效，后改请西医，拟诊是伤寒，服氯霉素，注射青霉素后，病势逐渐减轻，体温正常，能起床，胃口奇佳。好了约半个月，病势又突然转变，发冷发抖，再请中医诊治，以为伤寒复发。看了十余次中医，仍属无效，腹部也突然膨胀厉害；再改请西医，西医诊断为卵巢癌，就进公济医院住院，在院热度坚持不退，并有呕吐现象，病情恶劣，接血二次，在院吃药打针，仍无起色，要开刀也不能，因怕开了后，疮口不能痊愈，并更加快结束她的寿命。后来有王医生建议吃中药黄芪，因在院中不能进行什么治疗，故就催我们出院，回家休息，隔一星期作一门诊检查。回来后，起先腹部是减小，有进步，后来又没有效果，又膨胀起来，再经友人介绍，看刘民叔大医师，自诊治后，一次比一次好起来，现在已全部恢复本来原有的健康。

初诊：一九五三年四月三日 虚羸少气，小腹中症结大坚，按之如石，定而不移，外形胀大，如妊娠足月待产者然。脉弦细，舌上垢。方用：肉苁蓉三钱 延胡索四钱 楝实二钱 阳起石三钱 鳖甲五钱 当归三钱 紫石英五钱 九香虫一钱 大黄三分三厘 另用七巧守宫丸如绿豆大者三枚，每日上中下午各服一枚。

二诊：五日 方用：肉苁蓉三钱 延胡索四钱 楝实二钱

阳起石三钱 鳖甲五钱 紫石英五钱 当归三钱 九香虫一钱
檀香一钱 大黄三分三厘

三诊：七日 方用：肉苁蓉三钱 延胡索四钱 楝实二钱
阳起石三钱 鳖甲五钱 紫石英五钱 卷柏三钱 当归三钱
九香虫一钱 大黄三分三厘

四诊：九日 连日微下，腹渐安适。方用：肉苁蓉三钱
延胡索四钱 楝实二钱 阳起石三钱 卷柏三钱 鳖甲五钱
当归三钱 川芎二钱 九香虫一钱 大黄三分三厘

五诊：十一日 肉苁蓉三钱 延胡索四钱 楝实二钱
阳起石三钱 鳖甲五钱 当归三钱 川藟本三钱 卷柏三钱
九香虫一钱 大黄二分五厘

六诊：十四日 方用：肉苁蓉三钱 延胡索四钱 楝实二钱
阳起石三钱 鳖甲五钱 当归三钱 卷柏三钱 丹参三钱
母丁香一钱 九香虫一钱 大黄二分五厘

七诊：十七日 方用：肉苁蓉三钱 延胡索四钱 楝实二钱
阳起石三钱 鳖甲五钱 当归三钱 川藟本三钱 卷柏三钱
乌药三钱 九香虫一钱 大黄二分五厘

八诊：二十日 连日下黑粪甚多，腹中坚症，渐渐消减，外形亦
不如从前之胀大。方用：肉苁蓉三钱 延胡索四钱 楝实二钱
阳起石三钱 鳖甲五钱 当归三钱 川芎二钱 老鹿角一钱
九香虫一钱 牛角腮二钱 巴豆壳二钱

九诊：二十四日 头胀身痛，恶寒发热，胸胀呕吐，牙龈肿痛。
凡疗痼疾遇有新病时，须先治新病，后疗痼疾，此大法也。方用：
柴胡三钱 枳实二钱 半夏三钱 甘草一钱 白豆蔻二钱 檀香三钱

厚朴二钱 陈皮三钱 羌活一钱 生姜三片

十诊：二十六日 方用：柴胡三钱 葛根三钱 枳实二钱
厚朴二钱 白豆蔻二钱 陈皮三钱 半夏三钱 茯苓三钱
川藟本二钱 甘草一钱

十一诊：二十八日 方用：鳖甲三钱 鸡内金三钱 枳实一钱
厚朴一钱 茯苓三钱 黄蘗一钱 细辛一钱 甘草一钱 腊梅花三钱
川芎一钱 川藁本二钱

十二诊：三十日 方用：鳖甲三钱 鸡内金三钱 枳实一钱
厚朴一钱 细辛一钱 甘草一钱 川藁本二钱 川芎一钱
山茶花三钱

十三诊：五月二日 新病全愈，还治旧疾。方用：肉苁蓉三钱
延胡索四钱 棟实二钱 阳起石三钱 紫石英四钱 代赭石四钱
鳖甲四钱 当归三钱 川芎二钱 川藁本二钱

十四诊：五日 方用：肉苁蓉三钱 玄胡索三钱 棟实一钱
阳起石三钱 紫石英五钱 鳖甲五钱 当归三钱 卷柏三钱
丹参三钱 檀香一钱 巴豆壳二钱

十五诊：八日 方用：肉苁蓉三钱 延胡索三钱 阳起石三钱
老鹿角二钱 山楂核三钱 橘核三钱 鳖甲五钱 当归三钱
川芎二钱 甘草一钱 巴豆壳二钱

十六诊：十二日 方用：肉苁蓉三钱 延胡索三钱 阳起石三钱
老鹿角三角 巴豆壳三钱 鳖甲五钱 当归三钱 鸡血藤三钱
丹参三钱 甘草一钱

十七诊：十六日 方用：肉苁蓉三钱 延胡索三钱 阳起石三钱
鳖甲五钱 当归三钱 鸡血藤三钱 卷柏五钱 巴豆壳三钱
牛角觔二钱 甘草一钱

十八诊：二十日 方用：肉苁蓉三钱 阳起石三钱 鳖甲五钱
当归五钱 丹参三钱 卷柏四钱 巴豆壳三钱 牛角觔三钱
甘草一钱

十九诊：二十四日 方用：肉苁蓉三钱 阳起石三钱
紫石英五钱 当归四钱 熟地黄五钱 丹参三钱 卷柏三钱
牛角觔二钱 珊瑚三钱 甘草一钱

二十诊：二十九日 方用：肉苁蓉三钱 阳起石三钱

紫石英五钱 当归四钱 熟地黄五钱 珊瑚三钱 丹参三钱
卷柏五钱 老鹿角三钱 牛角觔二钱 甘草一钱

二十一诊：六月六日 症坚腹胀，次第消平。方用：熟地黄五钱
当归四钱 阳起石三钱 紫石英五钱 老鹿角三钱 牛角觔二钱
枸杞子三钱 卷柏三钱 甘草一钱 珊瑚三钱 酸枣仁二钱

二十二诊：十三日 方用：熟地黄五钱 当归四钱 阳起石三钱
紫石英五钱 老鹿角三钱 牛角觔二钱 枸杞子二钱 卷柏三钱
甘草一钱 红梅花二钱

二十三诊：二十二日 腹胀全消，血瘀亦化。方用：潞党参五钱
当归三钱 阳起石四钱 紫石英四钱 龟板五钱 鳖甲五钱
石决明四钱 延胡索二钱 荷花二钱 千年红二钱 红梅花二钱

二十四诊：三十日 方用：潞党参五钱 当归三钱 阳起石四钱
紫石英四钱 龟板五钱 凌霄花三钱 红梅花二钱 丹参三钱
卷柏三钱 甘草一钱

二十五诊：七月七日 方用：潞党参五钱 当归三钱
阳起石四钱 紫石英四钱 龟板五钱 凌霄花二钱 红梅花三钱
丹参三钱 玫瑰花二钱 千年红二钱 卷柏三钱

二十六诊：十四日 方用：当归三钱 阳起石四钱 紫石英四钱
凌霄花三钱 红梅花二钱 玫瑰花二钱 卷柏三钱 丹参三钱
香椽二钱 佛手二钱

二十七诊：二十一日 方用：当归三钱 川芎二钱 阳起石四钱
紫石英四钱 凌霄花二钱 丹参三钱 杜仲三钱 续断三钱
桑螵蛸三钱 香椽三钱 肉苁蓉二钱

二十八诊：二十八日 調理于今，安全康复。方用：潞党参五钱
当归三钱 阳起石四钱 紫石英四钱 龟板五钱 鳖甲五钱
丹参三钱 肉苁蓉二钱 杜仲三钱 续断二钱

附七巧守宫丸方 存心堂集验方 治妇人月闭，腹中坚症积
聚血瘀，阴疮胀痛寒热。通利血脉。生子大良。

守宫二七枚，得东行者良，砂锅熬 廔虫七枚，熬 没药七分
红娘子七枚，熬 蛭螬七枚，熬 浮香七分 雌黄精七分

上药分别为末，称准合匀，炼蜜为丸，如绿豆大，即“七巧守宫丸”也。每服一丸，病重者酌加，老白酒送下，一日三服。

《鲁楼医案》

症瘕

郑重光

周旦友令眷，年近三十，两年前产，值隆冬，又因气郁，少腹之旁，结有弹大一丸作痛。初亦甚微，后渐痛甚，上冲心胁，呕吐不食，必待其痛吐气衰，一、二日方止。医治两年，作气积、血积、寒气，攻劫皆不效，人渐消瘦，经水数月不至。家居于乡，上城就医，其脉弦而紧，询其病状，答以不发时间或寒热似症，胁肋常胀，发则少腹之弹丸即长大如王瓜，痛冲于心，呕吐不能食，衰则仍归于少腹。此产后冲任脉虚，寒气内袭，积瘀凝结，为妇人之症瘕，此厥阴肝病，故自下而厥于上也。用肉桂、附子、当归、赤芍、柴胡、川楝子、乌药、小茴香。数十剂，发日渐疏而痛亦减轻，续以东垣酒煮当归丸服半年，经水始通，痛亦不发。但少腹之弹丸，终不能消，而亦不孕，数年后变蛊病而殒。盖此证攻劫所伤，经水断绝，正气衰微，邪终不散，故寿亦不永也。

《素园医案》

永富凤

有一妇人，四十余岁，下利腰痛，膝胫有时微肿，脉沉而欲绝，微喘潮热，食谷一日一、二盏，腹底有症瘕，摇动则不省人事。余曰：“此下利自症瘕，腰间兼有积冷。”与附子梗米汤，嘱曰：“不可酒色，不可思虑。酒色而发，思虑而发，则非我所知，勿归罪于药也。”服五

十余日，病除八、九。偶其夫婚爱侍婢，妇人觉之，妨忌忿恚，数日诸症并发，遑遽招余。余曰：“病因忿恚，忿恚不散，则难药。”使逐侍婢而再与粳米汤，百余日复归。

《漫游杂记》

中神琴溪

乌丸二条北丹后屋，某妻，年四十，产后其左肋下，有一块。闲卧则无所患，动展辄疼痛不禁，四肢亦然，如此者二年，然身体常肥大。先生诊之，心下满。即桃花汤取泻，日三行或五行，月余乃愈，块亦自消。

《生生堂治验》

王九峰

年甫十五，经水未通，小腹右角有形，大如覆杯，痛如针刺，痛时其形反隐伏不见。盖积居募原之间，如气血源流中击，暂离窠臼，潜行于里。小便不利，且痛如淋证之状，积瘀壅塞膀胱。《经》以膀胱为州都之官，津液藏焉，气化则能出矣。州都气化失常，故小便如淋证之状，非淋证也。胸次气血往来不畅，肿司百脉之气，为水之上源。下流不通，上流壅塞，气不化液，无水通调，水道郁火不伸，非喘促可比。扁鹊云：积者，五脏所生；聚者，六腑所成。脉来细数兼弦，证本先天元阴不足，水不涵木，水乘土位，健运失常，致令血液精华不归正化，凝结于脏腑之外，膈膜之间。少腹厥阴肝水之部，证名肥气。当从养正除积论治。暂拟交加散加味，观其进退。

生地、生姜二味同捣汁，丁香、蔻仁、洋参、青陈皮、水香、红花为丸。

《王九峰医案》

何书田

奇经脉损，冲任失养，少腹症瘕攻冲作痛，久防经阻腹满。拟疏肝破滞法。此方暂服。

上肉桂 香附酒炒 茺蔚子 紫丹参 怀牛膝 炒白芍 归尾酒炒 紫石英 川楝子 郁李仁

癸水阻滞，瘕癖攻冲，奇经八脉病也。难于消退。

上肉桂 炒艾绒 全当归 茺蔚子 酒炒香附 炒阿胶 炒白芍 紫丹参 紫石英 川芎

五旬外癸水复至，腹痞作痛，陡然胀满。此肝肾大亏之象，殊不易治。姑与温补法，以图小效。

上肉桂 山萸肉 枸杞 新会皮炒怀膝 炒熟地 炒白芍 茯苓 小茴香 紫石英

复诊：少腹瘕癖痛缓，大便亦爽，此善机也。再得痛势和平为妙。兹用温润下元法。

上肉桂 淡苁蓉 归身 菟丝子 怀牛膝 沉香 炒熟地 柏子霜 枸杞 日茯苓 紫石英

肝肾亏，而少腹结瘕作痛。急切难许松解。

上肉桂 炒白芍 菟丝子 川楝子 制香附 炒阿胶 枸杞子 炒归须 茺蔚子 紫石英

松江雷氏，年三十二岁，于己卯年五月产后百余日，因事动怒，左胁作痛而胀。医者屡投疏肝理气之剂，罔效。至冬间，腹胀渐甚，医误为孕，服安胎药，日重一日。入春，脐突出半寸，自胃脘至少腹高耸，如抱一瓜，大便闭结，气闷发喘，卧不着枕，纳食作酸；脉沉细弦迟，两尺尤甚。此产后营虚，肝气与宿瘀凝结，滞而不散，内伤冲任诸脉，而成此症癖也。问其平昔有无他病。据述三年前产后，曾患脐旁流脓，隐而不言，未及服药。故近脐处其胀势尤高。其为络伤阴竭，命火失化无疑矣。前医用参、术、阿胶、肉桂、炙草等味服

之，其胀愈甚，甚属棘手。乃用温补下元，宗景岳决津润肠之法。

上肉桂 炙龟板 肉苁蓉 五味子 怀牛膝 大熟地 枸杞子 菟丝子 紫石英 白茯苓

前方服二剂，腹鸣如雷，秽气下泄，大便秘通，每日一剂。四五剂后，夜得偃卧，能进稀粥一碗。至十五六剂，吃饭可碗许，腹胀渐松，脐之突者收缩而平，大势已减十之三四。

复诊：脉六部应指，微觉细软而数。腹胀处坐按似坚，卧按则软。病虽松减，而阴液难滋，奇经无由充复，不敢必其全愈也。

上肉桂 大熟地 归身 菟丝子 茯苓 台人参 炙龟板 枸杞 五味子 坎气

上方服三十余剂，腹软脐收，霍然如常。后用丸方。

上肉桂 陈阿胶 炒归身酒拌 紫丹参 乌贼骨 大熟地 炒艾绒 炒白芍酒拌 茺蔚子

上方服一月，而经阻得通。两月后，期亦不愆矣。

肝痞作痛，经阻肢浮；脉来弦数。已来干血劳矣。

炙鳖甲 制香附 川郁金 炒丹参 陈皮川楝 炒白芍 焦茅术 炒艾绒 炒怀膝 冬瓜子

《竿山草堂医案》

蒋宝素

曾经大产后百脉空虚，病从虚起，恶露未尽，瘀停少腹成症。小便色紫，澄如膏糊，巅顶时疼，浊痰上溢，心中烦热不安，寒热往来如疟，经闭半载有余，饮食迟于运化。舌尖微赤，边隐黑斑，舌本苔黄，红槽时见。病起客春，今秋益甚。脉来细数无神，已入虚劳之境。良由抑郁伤肝，烦劳伤心，思虑伤脾，脾失健运，血积为症。肝主小便，肝不藏血，小便色紫，如膏如浊。舌为心苗，汗为心液，心火上炎，则黑斑红槽互见，虚烦自汗相仍。营卫不和，往来寒热。奇经八脉不振则经闭。清气不升则巅疼。诸症虽见于当前，而致病之由已

萌于疇昔，慮難收效。治病求本，病本于肝，傳之于脾，上連于心，下关于腎，損及奇經八脉。當以治肝為先。土能安木，又當治脾。水能生木，亦當治腎。爰以六味、歸脾加減，一以貫之。

大生地 怀山药 山萸肉 云茯苓 炙黃芪 人參 冬白朮
炙甘草 酸枣仁 當歸身六味 歸脾加減，共服五十余劑，諸証相繼而退。現在眠食俱安，精神如旧，再擬十劑為末，水疊丸。早服三錢，以善其后。

《問齋醫案》

費伯雄

某。癥痞已久。急宜消散和榮。

全當歸二錢 大丹參二錢 金香附二錢 紅花八分 烏藥一錢
陳橘核一錢 延胡索一錢半 金鈴子二錢 枳殼一錢 木香五分
砂仁研一錢 陳皮一錢 川椒目開口的，二十粒 降香五分

二診：癥塊松软。尚宜前法加減。

消痞阿魏膏貼患處。

當歸二錢 白芍一錢 香附二錢 枳實一錢 真福曲三錢
橘核二錢 小茴香二錢 烏藥一錢 陳皮一錢 木香五分 佛手五分
降香五分 砂仁研，一錢

某。診得脉來沉細，左关尺帶澀。蓋沉屬氣滯，細屬陽虛，澀乃留瘀。所得見症，腹滿塊疊不平，皆緣濕痰交阻，營衛乖違，詢及辰下，經停不至。治之當以攻補兼施，邪去而正不傷，方能有治病情，存方候政。

潞黨參 茯苓 旋覆花 木香 炮姜 當歸 延胡 小茴香
橘紅 鸡内金 玫瑰花 厚朴 血琥珀

又丸方：

生錦紋三錢 桃仁二錢 廬虫十四個 烏賊骨 茜草根各一錢半
三棱醋炒，一錢 桂心四分

上药共研末，为丸如绿豆大，每服二十四丸，或三十丸，临晚时陈酒送下，服至半月后，大便有黑紫血块，即停此丸，再为换方可也。

某。脾虚力弱，痞块，丸剂。

潞党参四两 云苓二两 炙绵芪二两 归身酒炒，二两 炙草五钱
煨京三棱五钱 蓬莪术五钱 半夏曲一两 制中朴三钱 枳壳一两
陈皮一两 炙鳖甲三两 醋炒青皮一两 红花五钱 上安桂三钱
川雅连二钱 炮姜二钱

上药如法炮制，糯米粉糊丸如桐子大，每服二、三钱，清晨米汤送下。

某。昨投逍遥散加味，少腹痠聚痛减，左脉不起，右部迟细，肝胆尚未协调。前法加减。

醋柴胡六分 酒当归二钱 丹参二钱 川断三钱 茯神二钱
制香附二钱 酒白芍二钱 延胡酒炒，二钱 破故纸二钱 木香一钱
蒲黄炙生地三钱 炒丹皮二钱 炙草五分 广木香五分 羌薊子三钱
藕节二枚 川朴一钱

《费伯雄医案》

徐镛

郡城侯姓妇年三十有八，因元宵夜游，行走太劳，归即小产。医者皆以其胸腹有块，用逐瘀成法，每剂必加炮姜，俱未有效。后虽停药，而骨节如焚，积块愈大，小便艰涩，热痛异常。至三月初始延余诊，已奄奄一息。诊其脉沉伏之极，隐隐难寻，予固知其阴虚阳盛，但日期多延，宜用缓治。初投复脉减去姜、桂，神气稍安；继投丹溪大补阴丸，诸姜悉减；终投《本事》虎杖汤，积块平复，淋痛皆除。不及一月，饮食大增而全愈。

《医学举要》

张锡纯

邻庄刘氏妇，年二十五岁，经血不行，结成症瘕。

病因：处境不顺，心多抑郁，以致月信渐闭，结成症瘕。

证候：症瘕初结时，大如核桃，屡治不消，渐至经闭后则症瘕浸长。三年之后大如复盂，按之甚硬。渐至饮食减少，寒热往来，咳嗽吐痰，身体羸弱，亦以为无可医治待时而已。后忽闻愚善治此证，求为诊视。其脉左右皆弦细无力，一息近六至。

诊断：此乃由经闭而积成症瘕，由症瘕而浸成虚劳之证也。此宜先注意治其虚劳，而以消症瘕之品辅之。

处方：生怀山药一两 大甘枸杞一两 生怀地黄五钱 玄参四钱
沙参四钱 生箭芪三钱 天冬三钱 三棱钱半 莪术钱半
生鸡内金钱半，黄色的捣

共煎汤一大盅，温服。

方解：方中用三棱、莪术，非但以之消症瘕也。诚以此证廉于饮食，方中鸡内金固能消食，而三棱、莪术与黄芪并用，更有开胃健脾之功。脾胃健壮，不但善消饮食，兼能运化药力使病速愈也。

复诊：将药连服六剂，寒热已愈，饮食加多，咳嗽吐痰亦大减轻。症瘕虽未见消，然从前时或作疼今则不复疼矣。其脉亦较前颇有起色。拟再治以半补虚劳半消症瘕之方。

处方：生怀山药一两 大甘枸杞一两 生怀地黄八钱
生箭芪四钱 沙参四钱 生杭芍四钱 天冬四钱 三棱二钱
莪术二钱 桃仁二钱，去皮 生鸡内金钱半，黄色的捣

共煎一大盅，温服。

三诊：将药连服六剂，咳嗽吐痰皆愈。身形已渐强壮，脉象又较前有力，至数复常。至此虚劳已愈，无庸再治。其症瘕虽未见消，而较前颇软。拟再专用药消之。

处方：生箭芪六钱 天花粉五钱 生怀山药五钱 三棱三钱

莪术三钱 怀牛膝三钱 潞党参三钱 知母三钱 桃仁二钱，去皮
生鸡内金二钱，黄色的捣 生水蛭二钱，捣碎

共煎汤一大盅，温服。

效果：将药连服十二剂，其瘀血忽然降下若干，紫黑成块，杂以脂膜，症瘕全消。为其病积太久，恐未除根，俾日用山楂片两许，煮汤冲红蔗糖，当茶饮之以善其后。

邑城西韩氏妇，年三十六岁，得产后症瘕证。

病因：生产时恶露所下甚少，未尝介意，迟至半年遂成症瘕

证候：初因恶露下少，弥月之后渐觉少腹胀满。因系农家，时当麦秋忙甚，未暇延医服药。又迟月余则胀而且疼，始服便方数次皆无效。后则疼处按之觉硬，始延医服药，诊治月余，其疼似减轻而硬处转见增大，月信自产后未见。诊其脉左部沉弦，右部沉涩，一息近五至。

诊断：按生理正规，产后两月，月信当见；有孩吃乳，至四月亦当见矣。今则已半载月信未见，因其产后未下之恶露，结症瘕于冲任之间，后生之血遂不能下为月信，而尽附益于其上，俾其日有增长，是以积久而其硬处益大也。是当以消症瘕之药消之，又当与补益之药并用，使之消症瘕而不至有伤气化。

处方：生箭芪五钱 天花粉五钱 生怀山药五钱 三棱三钱
莪术三钱 当归三钱 白术二钱 知母二钱 生鸡内金二钱，黄色的捣
桃仁二钱，去皮共煎汤一大盅，温服。

复诊：将药连服六剂，腹已不疼，其硬处未消，按之觉软，且从前食量减少，至斯已复其旧。其脉亦较前舒畅，遂即原方为之加減俾再服之。

处方：生箭芪五钱 天花粉五钱 生怀山药四钱 三棱三钱
莪术三钱 怀牛膝三钱 野党参三钱 知母三钱
生鸡内金二钱，黄色的捣 生水蛭二钱，捣碎

共煎汤一大盅，温服。

效果：将药连服十五六剂随时略有加减，忽下紫黑血块若干，病遂全愈。

说明：妇女症瘕治愈者甚少，非其病之果难治也。《金匱》下瘀血汤，原可为治妇女症瘕之主方。特其药性猛烈，原非长服之方。于症瘕初结未坚硬者，服此药两三次或可将病消除。若至累月累年，症瘕结如铁石，必须久服，方能奏效者，下瘀血汤原不能用。乃医者亦知下瘀血汤不可治坚结之症瘕，遂改用桃仁、红花、丹参、赤芍诸平和之品；见其症瘕处作疼，或更加香附、延胡、青皮、木香诸理气之品，如此等药用之以治坚结之症瘕，可决其虽服至百剂，亦不能奏效。然仗之奏效则不足，伤人气化则有余。若视为平和而连次服之，十余剂外人身之气化即暗耗矣。此所以治症瘕者十中难愈二三也。若拙拟之方其三棱、莪术、水蛭，皆为消症瘕专药。即鸡内金人皆用以消食，而以消症瘕亦甚有力。更佐以参、芪、术诸补益之品，则消症瘕诸药不虑其因猛烈而伤人。且又用花粉、知母以调剂补药之热，牛膝引药下行以直达病所，是以前方可久服无弊。而坚结之症瘕即可徐徐消除也。至于水蛭必生用者，理冲丸后论之最详。且其性并不猛烈过甚，治此证者，宜放胆用之以挽救人命。

《医学衷中参西录》

巢渭芳

蒯信盛妻，年甫四旬，连产九女，因气滞血瘀，少腹结有症块，月事不匀，正月来舍诊之，至七月中旬，未见显效，彼仍静心调摄，不嫌烦耳。渭芳觉有愧颜。所进皆以温经调肝，一日复诊毕，陡然意有所得，加人杏仁、延胡索、白芥子，服后其块顿下，犹如红白布带，长约八寸许，乃去芥子等，宗原意气血并调，至十月怀孕矣。此妇之恒心调治，非朝秦暮楚者所能望其项背也。

《杂渭芳医话》

吴鞠通

乙酉八月三十日，王室女，二十岁。肝郁结成症瘕，左脉沉伏如无，右脉浮弦，下焦血分闭塞极矣！此于血痹之先声也。急宜调情志，切戒怒恼，时刻能以恕字待人，则病可愈矣。治法以宣络为要。

新绛纱三钱 桃仁泥三钱 广郁金三钱 苏子霜三钱
旋复花包，三钱 归横须三钱 降香末三钱 公丁香一钱五分 煮三杯，分三次服。

九月初四日：服前药四帖，六脉沉伏如故，丝毫不起。病重则药轻，于前方内加川椒炭三钱良姜三钱。

再用化症回生丹早晚各服一丸，服至症瘕化尽为度，三四百丸均未可定，断不可改弦易辙也。

十月十七日：症瘕瘀滞，服宣络温经药二十二剂，化症回生丹四十余丸，业已见效不浅，脉亦生动，经亦畅行。药当减其制，化症回生丹每早空心只服一丸，效则不必加，切戒生冷猪肉介属，可收全功。

新绛纱三钱 丹皮五钱 广郁金二钱 香附三钱 旋复花包，三钱
归横须二钱 降香末二钱 广皮二钱 苏子霜一钱五分 煮三杯，分三次服。此方常服可全愈。

《吴鞠通医案》

红杏村人

刘右，产后瘀浊，淋漓未楚，误投兜涩之品，致令肝气郁结，凝瘀成块在于脐旁之右，耕冲作痛，按之形大如掌，甚至上犯作呕，下乘为泻，脾胃并受其戕。已延一载，日益增剧。饮食减损，肌肉瘦削，脉弦数苔薄白。肝胃失和，留瘀内阻，异得信水流通方吉。

附子 肉桂 白术 焦芍 茯神 归身 枣仁 香附 川斛 青皮

又覆：症逾一载，右脐旁之结癖绵绵作痛，始仅小如梅核，其后癖日形大，痛日益剧。近日癖大如掌，犯胃上逆，纳减便溏，中无抵柱。脉虚数苔白微糙。昨进温中泄结，颇获小效，仍宗前法接进。

参 苓 甘术 附子 肉桂 炮姜 赤芍^{土炒} 青皮 川斛

又覆：连进温中和痞、柔肝升降法，其脐右之结癖颇就平贴，痛亦稍减，不得不谓佳征。第胃纳未加，便仍不实，反覆转变不足恃也。脉虚数舌白不化，良由中阳不振，升降无权，宜建立中州，旁动四轴。

参 术 苓 桂 白芍^{土炒} 炮姜 木香 乌梅 肉果 饴糖 炙草

《医案》

曹沧州

某右。腹痕带下，神疲胃不醒，痰吐白沫，近日胁痛甚剧，有妨咳嗽行动，气营两病，脏阴悉亏，理之殊非易事，药石之外，须慎饮食，多怡悦，方觉奏效。

人参须 怀山药 盐半夏 杜仲 香谷芽 西洋参 云茯苓
淡木瓜 清阿胶 台乌药 制首乌 归身 丝瓜络 金樱子

《吴门曹氏三代医验集》

孔继炎

故细郎姓之妻，为其子妇求治。曰：媳年二十，新产月余，忽发热，小腹硬疼，一块条长粗过于臂，横卧阴股，痛如囊锥，手不可触，行坐俱废。白脓点滴，自小便注下，日夜呼号，求赐怜拯。问能饮食否？曰：连数日不能进矣。问二便何如？曰：俱卧而下，不敢蹲立故也。问产后曾病否？曰：小病数日，已用药得愈，此病出月乃发，发辄痛，日甚一日。予为踌思。问汝媳旧曾有病否？曰：未嫁前曾闻有积聚，娶后渐胖壮，至今亦不大瘦。予曰：是矣。乃为立案书方曰：

此厥阴肝经与任脉之症也。盖足厥阴由内股入阴中，上抵小腹；任脉起关元，主胞胎，下抵阴器。经曰：任脉为病，男子内结七疝，女人带下瘕聚。又曰：足厥阴之病，妇人小腹肿，男子瘕疝。此病在男为疝，在女为瘕。裹大脓血，在肠胃之外，宜桃仁承气下之，然非引经药引入两经不可。但恐新产之后，气血虚弱，不任频攻，服一二剂，再为斟酌可也。既立案，适有客至，见之曰：病发产后，安知非败血未尽，稽留作楚，而云旧病乎？曰：若系败血，产后一月之中，久已作痛发热矣，何待安然三十余日，乃骤发大疼，且白脓自何而来，败血岂能复化？此必脓血俱有，特血结而难出，脓溃而易流，故点滴下注，究之其所谓脓者，非脓，乃脂也，即千金所谓脂瘤也，不应作败血治。即系败血，桃仁承气亦不误。曰：乌有症瘕在腹，而能胎孕者。曰：多矣。亦顾其病之轻重，人之强弱何如耳。若结聚适在胞宫，经且将不流，安能复再育？或不在胞宫，而结聚深重，周身气血，尽将阻闭而为病，其人日益瘦损，亦无生子之理。若邪聚本浅，其人又壮，则所伤不过一二经，久之，而结者自结，行之自行，并此一二经之气血，亦曲流旁折而归于正经，是病已自成窠囊，不能肆行阻碍，何谓不孕？曰：若然，则未孕之先，正旺邪当自退，此病何以不下？临产之时，胎下路亦甚顺，此病何又不下？迟至月余何也？予曰：未孕之先，正自正，邪自邪，各不相干，又无药以驱之，病何由下？临产之时，胞宫开张，只有儿出之一路，重墙复壁隔病于外，又何由下？其迟至月余者，凉亦本非定期，大约受孕之后，胎形日大，病为所挤，不能不动，渐渐离其窠囊，渐渐伤其根蒂，特有余地自存，旁络未断，故牵连未遽下耳，及出月以后，气血充足，离窠之病，不能复归故处，而脏腑膈膜之外，气血流畅，转运充沛，又不容余孽偏安，故下抵小腹，横卧阴股间也。若不速为驱逐，痛不能食，能延几日？故必用疏排之药，使坚者溃，软者流，乃可寻络入隙，透入肠胃，自寻出入。非矜奇炫异，而为孟浪之治也。逾二日，郎姓昇其妇来曰：药服二剂，病大减轻，饮食亦进，求一诊视，尚可再下否？予诊其脉，沉

部不弱不滞，浮部尚觉盛大。曰：此病尚有外感，前日为何不言？因问小腹之块尚存乎？曰：较前为小，存者尚多。问泻几次？曰：五六次，血块白脓与粪俱下。问汝始发热时，曾头疼、身疼否？曾作渴否？曰：不甚作疼，惟小腹疼甚，前日亦渴，今不渴矣。予曰：此其外感也轻，故不甚觉，又兼小腹疼甚，何暇顾及头身？今块虽未尽，而脉无滞机，无弱象。无根之病，不现于诊，正气未虚，犹堪再下，驱之易为力矣。惟外感尚在，切不可忽，若肆行推荡，外邪入里，生死转不可知。遂仿佛大柴胡立方，佐以异滞之品。曰：此药平稳，多服数剂，倘不效，异日再来。其后数日不至，闻已全愈矣。

郎姓之妇诣予求诊，同来者其小姑也。问何病，其小姑曰：自临月当产，恐有不测，求一诊视，并决产期之远近。予曰：异哉！产固妇人之常，有何不测？远近之期，渠当自知，何劳予决？观渠形体，虽似重身，面色青暗，兼带浮肿，纯是病象，其中殆有别故，不实言，吾不能为汝诊也。两妇固求，且言曩佃予家，吾其故主也。乃诊之，见六脉涩结，不充不匀。谓之曰：此非胎脉，乃病脉也，何以云当产？其小姑乃曰：实不敢瞒，渠腹中之物，乃巨鳖也，形已成矣。目下上至胸，下抵股，旁撑两胁，阔长如此，将来如何能下？渠昼夜忧恐，寝食俱废，原求良法，以拯其死。予曰：汝何以知其为鳖？曰：有善揣者，谓周围边锋棱棱，尽是鳖边。予曰：此必师婆巫妪狡语吓人，妇女之受其愚者多矣。汝勿以为信，现在脉来涩结，腹中俱是病块，安得指为活物？且产鳖育怪，亦古有之事，然在腹中，必不能如此之大，而又活动如常胎，今汝腹中之物动乎？曰：不动。可以知其非鳖矣，顾症由何起？安得结滞如此之甚？曰：向来胎孕不固，三月必堕，此番又有坠征，血已见矣。以年近五十，求子心急，连用固药，兼以黏米作粥，勉强止住，不料日复一日，变成此症。予曰：若然，亦易治，吾为汝立破积之方，攻而去之，然须知汝腹中俱是症瘕病块，非鳖也，亦并非胎，勿惧，切勿悔。书方与之。时有亲友隔壁坐，暗笑半日矣，二人去乃纵声矣。因谓予曰：症瘕满腹，君何以断以易治？

予曰：其病本系强成，结必不固，形势过大，必非尺属血症。断以易治，先安其心，其心安则其气顺，饮食一进，病自易为矣。曰：因胎致病，何以知其非症，强成之说，何谓也？予曰：人情无自求病之理，其不能不病者，非外邪之暴侵，则内因之渐积，其浅深轻重，皆难以悬断。若此妇者，本可以不病，而一病致此者，胎欲堕而固挽之，无暴感之邪，无渐积之因，所以谓之强成也。然其人为惯于堕胎之人，气血先自不固，而其胎为将堕未坠之胎，根蒂料已早伤，徒以涩药膩物闭其出路，故留而未下耳，夫旧血流畅，新血不能不生，旧血阴凝，新血不能不聚。又幸其人年近五十，天癸将绝，应行之血能有几何？其所以充脇满腹者，血聚而闭其气，气激而鼓其血，欲出无门，欲止无根，故上下四旁，俱见充塞也。究之充塞之处仍是气多而血少，若块然尽是死血，则荣卫不行，脏腑不通，其人之死于痞闷已久矣，宁有今日乎？且其脉来涩结，有迟意而无数象，其中必不热，气搏血聚，无热以灼之，则必无干燥枯涩难下之块，所以断为易治也。若俱以形求之，则彼坚结膨膨亨，岂特治不易治，亦岂有可生之理哉？曰：此义确乎？吾将覘之。予曰：医亦理也，揣度势，理则如此，若是攻之不动，而脾胃先不能支，则亦未易驱除矣，要之凭理论症，即症析理。此妇之病，岂得与他妇之积同议哉？盖他妇之积结于深处，而气从外行；此妇之病，散在浅处而气从中运。他妇之积既已作嗽、作热，而端倪犹未尽呈；此妇之病不能变热、变寒，而棱角先已全露。故其形愈大，其势愈薄，其外弥坚，其中愈溃。若以峻药攻之，如摧枯拉朽耳。吾以其脉属不足，未肯与用峻药。姑俟其服后，视其下与不下，再为斟酌，此时犹未可确然断定也。逾二日其小姑以前方来曰：药服二剂，下死血一二升，病遂全消。

方予之往于王君家也，骑前谓予曰：室人之病，受赐多矣。昨内弟满，以妇病不育，托予求治，予憚君烦，未遽许也。然距此密迹，可奈何？予曰：令亲病属何症？曰：症痕。自闺中已有此病，今结臍八载矣。予曰：瘦损已甚否？曰：室人常见，殊不为瘦。予曰：是尚可

治。乃偕往。比至，骑前令面诊。脉涩不匀，色带青黄。曰：是真症瘕，共有几处？月事犹顺乎？常发热否？其姑曰：块共三，一在小腹，两在胁下；经行不顺，至则腹疼，间有闭时，惟热不常发，亦不常止，时轻时重，历年皆然。予曰：此所以能至今日也，若常发大热则难言矣。然此病已自成疆域，阻碍气血在半通半塞之间，不去之，岂惟不育，终将为害。乃订方用破块活血之剂。病家兼请清热。予曰：清热乃治阴虚之法，非破块之法也。夫阴虚之极，其热如炎如焚，不清阴何以复？此病虽云发热，而脉不数，热必不甚，特以病势内阻隧道，气血壅遏，故郁而为热耳。病去而气顺，热必自清。若于破逐药中，复加清凉之品，寒凝气结，反多稽留，病去终无时矣。病家唯唯。如方服数剂，块不动，再加之，块仍不动。予曰：此根深蒂固之病，非汤液所能窥也。易汤以丸，服月余病渐下，脉亦渐匀，病色则大退矣。盖自服药之后，饮食倍进故也。满私问予曰：病下皆白物何也？予曰：古人论此，原有青、白、赤、黄之不同，名亦纷纷，以愚度之，结于血分者，色紫而间带赤黑，结于气分者，色白而间带青黄。此病惟结于气分，故不甚碍经脉。虽然，血分亦有之，以经行作疼且有闭时故也。特结在气分者，浅而易动，故先下；在血分者，深而难拔，故未开耳。曰：近来经行亦顺矣。予曰：若然，血分之积亦动，可更购一药，服之必大下。为指其处，购三服，病果大下，块减可三分之一。复购复服，间以前药，块日减削。后两月余，予在王骑前家，满往问曰：室人自服药后，两次经行色正，且顺，今逾期矣，忽绝不至何也？骑前曰：得毋孕乎？曰：家人亦以为孕，有相似者。予曰：若然，君太孟浪，此胎必坠，气血虚不能固也。然坠乃君福，不坠反害。满讶曰：何也？予曰：尊夫人之病，以予料之，不过才去其半耳，余者尚多，若坚结把持，牢不可动，将来胎成之后，转动不易，临产之时，出路多梗，是产难在所不免，一害也；若伤残不固，连者易断，日后胎形长大，势必撑离故处，儿出转折，亦将撞断系络，此时病随儿出，满腹受伤，必有血崩之危，二害也。具此二害，福乎！祸乎？然已至此，

前丸药必不可用，再待月余，以观真假可也。满诺。时十月下旬也。过岁见之，曰：真矣，丸药幸未再服，将来当何如？予曰：吾为治之，至时相招未晚也。其后大产，果病随儿下，血溢不止，急招予，予在平阴，觅人往请，被阻不得通，乃延他医。医见发热，曰：产后伤寒也。投以汗剂，遂加喘满。比予自平阴返，而其病已不可为矣。适遇骑前，谓之曰：此病不治，胡遽至是，是治之适以误之也。骑前曰：彼自急于育耳，治而育，复育而危命也，夫何尤？呜乎！予不言，人固不及知也，其果命也与哉！

《孔氏医案》

曹颖甫

曹右，初诊：经事六七月不来，鼻衄时作，腹中有块，却不拒按，所以然者，鼻衄宣泄于上故也。衄上痛，周身骨节烘热而咳，此病欲作干血，以其体实，宜桃核承气汤加味，上者下之也。

川桂枝二钱 制川军三钱 枳实二钱 桃仁泥四钱 生甘草钱半
牛膝二钱 全当归二钱 大白芍二钱

二诊：骨节烘热已减，咳嗽亦除，症块已能移动，不如向之占据一方矣。服药半日，见效如此，非经方孰能致之？

川桂枝三钱 枳实三钱 当归三钱 制川军四钱 牛膝三钱
白芍三钱 桃仁四钱 甘草三钱

常熟鹿苑钱钦伯之妻，经停九月，腹中有块攻痛，自知非孕。医予三棱、莪术多剂，未应。当延

陈葆厚先生诊。先生曰：三棱、莪术仅能治血结之初起者，及其已结，则力不胜矣。吾有药能治之。顾药有反响，受者幸勿骂我也。主人诺。当予抵当丸三钱，开水送下。人夜，病者在床上反复爬行，腹痛不堪，果不骂医者不已。天将旦，随大便，下污物甚多。其色黄白红夹杂不一，痛乃大除。次日复诊，陈先生诘曰：昨夜骂我否？主

人不能隐，具以情告。乃予加味四物汤，调理而瘳。

《经方实验录》

周镇

荣姓妇，年五十九岁。丁丑十月三日诊：肿胀青筋绽露，且有瘕气在腹，脉左弦右濡。气忿则阻水通行，邪湿入脾，不易图治。

甘松一钱 青皮钱半 大腹皮三钱 连皮苓五钱 泽泻三钱
车前子六钱 制香附三钱 乌药三钱 京三棱三钱 莪术三钱
橘荔枝各三钱 玄胡三钱 麦芽五钱 鸡内金五钱 蜣螂一对
五香丸一钱 禹余粮丸三钱，分早晚二次服。另远志肉五钱
蜈蚣三枚去头，研末 茅根二两煎汤送服。五剂。秋石代盐。并以外治：
甘遂、大戟、莪术、炙乳香、没药、水荭花子各一钱，研末，放瘕上，以膏药贴之。溲便均如黄脓，腹软筋潜矣。

《周小农医案》

刘民叔

宁波吴孝宝君，现住上海市嵩山区淮海中路宝康里第五十一号。其夫人杨梅芳女士，年五十七岁。据云小腹久感不适，至一九五一年六月，始赴西医处，几经检查，诊断为子宫癌，皆云无药可治，须施镭锭，以经济困难未果。延至一九五二年二月三日，始求夫子诊治。（下略）

初诊：一九五二年二月三日 小腹坚满痛，宫癌扩坠出于阴道口，漏下赤白沃，另有污水淫淫下。咳逆上气，虚羸不足。大便不实。
方用：茅山苍术四钱 生白术四钱 黄芪五钱 阿胶二钱 茯神三钱
枣仁三钱 象皮二钱 乌贼骨四钱 升麻一钱 蛇床子二钱
甘草一钱

二诊：五日 服前方两剂，颇安适。方用：茅山苍术四钱
生白术四钱 潞党参五钱 黄芪五钱 阿胶二钱 象皮二钱

乌贼鱼骨四钱 升麻一钱 小茴香一钱 蛇床子二钱 甘草一钱

三诊：七日 肠胃渐和，小腹渐柔。宫癌仍扩坠出于阴道口，方用：茅山苍术四钱 生白术四钱 潞党参五钱 当归五钱 阿胶三钱 象皮三钱 乌贼骨四钱 升麻一钱 龟板五钱 蛇床子二钱 甘草一钱

四诊：九日 方用：茅山苍术四钱 生白术四钱 潞党参五钱 当归五钱 阿胶五钱 象皮四钱 升麻一钱 卷柏二钱 白芷一钱 藁本二钱 甘草一钱 蛇床子二钱

五诊：十一日 方用：茅山苍术四钱 生白术四钱 潞党参五钱 当归五钱 阿胶五钱 象皮四钱 升麻一钱 卷柏五钱 赤石脂二钱 甘草一钱 蛇床子二钱

六诊：十三日 赤白沃减少，污水亦少，不复淫淫下。方用：茅山苍术四钱 潞党参五钱 当归五钱 阿胶三钱 线鱼胶五钱 象皮五钱 草薢二钱 卷柏二钱 赤石脂三钱 禹余粮四钱 龟板四钱

七诊：十五日 方用：茅山苍术三钱 潞党参五钱 当归五钱 阿胶三钱 线鱼胶三钱 龟板胶二钱 麋角胶二钱 象皮五钱 赤石脂三钱 覆盆子三钱 禹余粮四钱

八诊：十七日 方用：茅山苍术三钱 潞党参五钱 当归五钱 阿胶三钱 线鱼胶三钱 龟板胶二钱 麋角胶二钱 象皮五钱 赤石脂二钱 白石脂二钱 禹余粮四钱

九诊：十九日 痛止，眠安，咳平。方用：茅山苍术三钱 潞党参五钱 当归五钱 阿胶三钱 线鱼胶三钱 龟板胶二钱 麋角胶二钱 象皮五钱 灶心土三钱

十诊：二十一日 方用：茅山苍术三钱 潞党参五钱 当归五钱 阿胶三钱 线鱼胶三钱 龟板胶二钱 麋角胶二钱 象皮五钱 乌贼骨五钱 石榴皮二钱 灶心土三钱

十一诊：二十三日 虚羸渐复，赤白渐净，宫癌不复坠出阴道

口，污水止。方用：茅山苍术三钱 潞党参五钱 当归五钱 阿胶三钱
线鱼胶三钱 龟板胶二钱 麋角胶二钱 象皮五钱 石榴皮二钱
菟丝子三钱 灶心土三钱

十二诊：二十六日 方用：茅山苍术三钱 潞党参五钱
当归五钱 阿胶三钱 线鱼胶二钱 龟板胶二钱 象皮四钱
熟地黄五钱 山茱萸二钱 酸枣仁二钱 南枣、桂园、荔枝各五枚

十三诊：二十八日 方用：茅山苍术三钱 潞党参三钱
阿胶五钱 线鱼胶二钱 龟板胶二钱 象皮四钱 熟地黄五钱
牡蛎五钱 女贞子三钱 南枣、桂园、荔枝各五枚

十四诊：三月二日 赤白沃已净，子宫安，绝伤续。方用：
茅山苍术三钱 阿胶五钱 线鱼胶二钱 龟板胶二钱 象皮四钱
熟地黄五钱 仙鹤草三钱 旱莲草三钱 酸枣仁三钱
南枣、桂园、荔枝各五枚

十五诊：四日方用：茅山苍术三钱 阿胶五钱 线鱼胶二钱
龟板胶二钱 象皮四钱 熟地黄五钱 仙鹤草二钱 乌贼骨五钱
肉苁蓉二钱 南枣、桂园、荔枝各一枚

十六诊：六日 大便实，饮食增，肌肉肥健，轻身健行。方用：
茅山苍术五钱 阿胶五钱 线鱼胶二钱 麋角胶二钱 象皮四钱
熟地黄五钱 乌贼骨五钱 千年白二钱 藁本二钱
南枣、桂园、荔枝各五枚

十七诊：八日 病人云已痊愈，服此方后，不再来诊可乎？师
曰：可。方用：茅山苍术五钱 阿胶三钱 线鱼胶二钱 龟板胶二钱
麋角胶二钱 熟地黄五钱 乌贼骨五钱 白芷二钱 黄芪四钱
南枣、桂园、荔枝各五枚

附明白丸方 存心堂集验方 治妇人阴蚀恶疮败疽，赤白沃
漏下。解毒气。利精神。

明矾 白及

上药等分，分别为末，称准合匀，炼蜜为丸，如黄豆大，即“明白

丸”也。每日食前服一九，病重者酌加，嚼化白开水送下。

《鱼楼医案》

张汝伟

王右，年三十八，常熟。肝肾两亏之体，冲任失固摄之权，大崩小漏。业已连绵三月，多方无效，近则少腹滞痛，腹中有瘕块，如饭碗大小，上攻。背部形寒，带下色黄如冻，下半身已不能动弹，洩便任其自流，一阵痛来，汗流如雨，发直而厥，逾时始醒，一日数次，姑拟温运理气，柔肝疏泄之法，不可再用止涩。

淡吴萸六分 当归身三钱 小茴香一钱，同炒 酒炒川芎一钱 制香附 炒白芍 半夏曲各三钱 佩泽兰 青陈皮 广郁金各钱半 佛手花一钱 醋煨瓦楞四钱，先煎

本证始末：此常熟会元坊王某之妻，患崩下，又漏下，已三月有余。症状情况，已详列于当时方案之中，但此方仅服二剂，竟能漏止带少，痛定，瘕块化为乌有，三日后，即来门诊调理，自治妇人疾以来，未有如斯之奇效也。

方义说明：大凡病之有形者，如已成之带，已积之瘀，必先通而后止，此证止涩过甚，有如江河之溃决，上方乃不可因势利导之法。内醋煨瓦楞一味，能柔肝降逆，颇有用意。总之女子之病，以肝为先天，用药不离肝，所以能见效者，即在此也。

《临证一得》

陆观虎

刘某某，女，40岁。

辨证：症瘕。

病因：贪食生冷，肠胃虚弱，心脾气亏。

症候：腹块痛硬，不移日大，心悸气短，大便次多，纳少。脉沉细。舌质红，苔微黄。

治法：养心脾，理肠胃。

处方：茯神 9 克 远志 8 克 木香 6 克 荷梗 6 克 扁豆衣 6 克
六神曲 9 克 山楂炭 6 克 苦参 6 克 吴茱萸 6 克 黄连 6 克
焦稻芽 15 克 苏梗 6 克

方解：茯神、远志补心气。木香、荷梗、苏梗行气宽胸。扁豆衣、六神曲、山楂炭、焦稻芽健脾以理肠胃。萸连祛寒火止痛以减大便频多。苦参利窍逐水，生津止渴。

二诊：

症候：腹块痛止，大便止而又泻，心悸气短已减。脉细。舌质红，苔微黄。

处方：按前方去焦稻芽、六神曲、山楂炭、苦参加陈皮 6 克
大腹皮 9 克 黑豆衣 9 克 炒枣仁 6 克

方解：陈皮宽胸利气。大腹皮消胀利水，炒枣仁宁心安神，黑豆衣健脾利湿。

张某某，女，31 岁。

辨证：症瘕。

病因：肠胃虚弱，食积不化，气郁凝集。

症候：右腹有块，跳动作痛，脘脐痛，纳少，便燥秘难下。脉沉数。舌质红，苔浮白腻。

治法：消食润燥，调气理血。

处方：苏梗 6 克 通草 3 克 陈皮 6 克 路路通 5 个
丝瓜络 6 克 木香 3 克 夏枯草 9 克 大腹皮 9 克 当归身 6 克
白芍 6 克 枳实 6 克 各 6 克

方解：苏梗、木香、陈皮宽胸调诸气。通草、路路通、丝瓜络通经活血。在腹皮消胀利水，当归身、白芍养血和血。夏枯草破瘀散结。全枳实润便宽胸利气。

二诊：

症候：右腹块跳痛已减。脘胀见消，纳食已增，脘脐痛已止，大

便见顺。脉细弦 舌质红，苔黄腻。

处方：前方去夏枯草、通草、路路通，大腹皮加焦稻芽6克
陈香橼6克 代代花3克 保和丸6克，包

方解：代代花、陈香橼宽胸解郁，焦稻芽、保和丸开胃化食止痛消胀。

《陆观虎医案》

叶熙春

某，妇，三十五岁。昌化。阳维为病苦寒热，经旨可据。因阳维近乎营卫，合乎冲任，营卫不和，则气血交错，寒热乃作。又云，任脉为病，男子七疝，女子带下痕聚。所以寒后左少腹结有血块，带下时见。今届夏令，卧病月余，人颇困倦，必属病湿无疑。常气滞血泣，少腹之痞痛忽加甚，至今未已。月信数月一度，挟有瘀血而浓液。想冲任阳维既有病于先，经血当行不行，渐成败血于后。败血不行，新血有碍，故经不能准时而下，同时饮食减少，运化失职。血病及气，脏病及腑，病情丛杂，用药难遍。拟方尚希酌服。

抵当丸9克，包煎 丹参9克 生苡仁15克 泽泻6克 青皮5克
木香2.4克 拌白芍5克 茯苓12克 桑海螵蛸各9克
金铃子6克 郁金5克 小茴香5克 拌炒当归9克 香附6克
白术5克

《叶熙春专辑》

施今墨

赵某某，女，46岁。于1954年4月发现阴道少量出血，无任何感觉，即往协和医院妇科，（病历号10277）作活体组织检查。诊断为子宫颈癌2~3期，骨盆组织亦受浸润，已不宜作子宫摘除术，于当年5月深部X线治疗一个半月，后又住院作镭放射治疗，住院十日，全身症状逐渐出现，无力、衰弱、消瘦、阴道分泌增多，大便时

肛門劇烈疼痛，以致大汗，痛苦異常，自此每日注射嗎啡兩次，以求緩解，患者因懼痛而不敢進食，每日只吃流質，配合葡萄糖、維生素、肝精等注射，如此維持一年，病情愈益加重，身體更加衰弱。

現症：危重病容，形瘦骨立，氣息微弱，面色蒼白而浮腫，呻吟床第，呼號無力，每于痛劇難忍時，輒注射嗎啡針，飲食大為減少，僅以流質維持。舌苔光嫩而有齒印，脈象沉細無力。

辨證立法：積病已久，自未覺察，一旦發作，恙勢已重，所謂蚊穴潰堤，積羽折軸，形勢已難控制。脈沉細而無力，乃氣血俱虛，心力將竭，血液損耗之象。書云：“任脈為病，女子帶下瘕聚”，先賢有十二症九痛七害五傷三癰三十六疾之說，而九痛之中所指陰中痛，腹痛，陰中如虫螫痛，以及仲景：“婦人五十所，病下利數十日不止，暮即發熱，少腹里急……”等論，均涉及近世所稱之子宮癌瘤症狀，脈症綜合，險象環生，圖治非易，先擬調氣血，冀減痛楚，未悉能否奏效。

處方：青皮炭 10 克 鹽橘核 10 克 廣皮炭 10 克
晚蚕砂 皂角子 10 克炒焦同布包，10 克 鹽荔枝 10 克 川棟子 10 克，醋炒
炒枳實 5 克 杭白芍柴胡 6 克同炒，12 克 綠升麻 3 克 炒枳殼 5 克
台黨參 10 克 油當歸 12 克 炙綿芪 20 克 淡苡蓉 15 克
台烏藥 6 克 紫油朴 5 克 仙鶴草 25 克 炙甘草 5 克

另用槐朮 30 克，蘇木 30 克煮湯代水煎藥。

二診：服藥三劑痛楚有所緩解，余症同前，而嗎啡注射仍不能停，脈象舌苔無改變，再以前方加力。第一診原方繼續服用，加開丸藥方。

處方：瓦楞子 30 克 晚蚕砂 15 克 牡蛎 30 克 台烏藥 15 克
酒杭芍 30 克 柴胡 8 克 朝鮮參 15 克 廣木香 5 克 綿芪 45 克
鹿角膠 30 克 紫油朴 12 克 莪術 12 克 京三棱 12 克 小青皮 10 克
白朮 25 克 醋元胡 15 克 淡吳萸 8 克 沉香 3 克 炙甘草 27 克
酒當歸 15 克

共研细末，炼蜜为丸，早晚各服6克。

三诊：服汤药二剂，疼痛继续减轻，两天来只在大便后注射吗啡一次，葡萄糖及维生素等未停，脉象虽仍沉细，较前有力，精神已显和缓，虚羸太极，不任攻补，希望气血调和，本元稳固，除旧即可生新。

处 方： 盐橘核 10克 青皮炭 6克
晚蚕砂皂角子 10克炒焦同布包，10克 盐荔枝 10克 广皮炭 6克
炒枳实 5克 川楝子 10克，醋炒 制乳没各 6克 炒枳壳 5克
台乌药 6克 炒远志 10克 云茯苓 6克 炒地榆 10克 醋元胡 10克
云茯神 6克 木蝴蝶 15克 野於术 10克
瓦楞子 海浮石 10克同布包，25克 杭白芍 醋柴胡 5克同炒，10克

四诊：服药三剂（二诊所配丸药已开始服用）疼痛大减，自觉较前轻松舒适，已停止注射吗啡，当服完第三剂药后，觉阴道堵塞感，旋即挑出核桃大球形糜烂肉样组织一块，状如蜂房，质硬，饮食略增，可进半流食物，脉象已有起色，光嫩之舌质已转红润，元气已有来复之象，调气血，扶正气，尚觉合度，再从原意治疗，调摄冲任，去瘀生新。

处 方： 盐橘核 10克 炒枳实 5克 川楝子 10克，醋炒
盐荔枝 10克 炒枳壳 5克 醋元胡 10克 青皮炭 6克 炒地榆 10克
炒萸连各 5克 陈皮炭 6克 炒远志 10克 漂白术 6克
云茯苓 10克 云茯神 10克 油当归 12克 威灵仙 12克
杭白芍 柴胡 5克同炒，10克 台乌药 6克 五味子 6克 炒山楂 10克
炙甘草 5克

五诊：四诊处方共服三剂，症状继续好转，排便时之痛苦，大为减轻，惟大便中仍有时带血及粘液，阴道分泌显著减少，饮食仍以半流为主，食量增加，葡萄糖等仍继续注射，脉象由沉细转而有力，枯荣肤色已见活润，除继续服用丸剂之外，另备汤剂方随症服用，以冀徐徐图治，并嘱慎自调摄。

处方：青皮炭 6 克 云茯苓 10 克 车前草 12 克 广皮炭 6 克
云茯神 10 克 旱莲草 12 克 盐橘核 10 克 金铃子 10 克，醋炒
蕲艾炭 6 克 盐荔枝 10 克 醋元胡 10 克 紫油朴 5 克 炒枳壳 6 克
米党参 10 克 漂白术 10 克 沉香曲 6 克，炒 台乌药 6 克
杭白芍 醋柴胡 5 克同炒，10 克 半夏曲 6 克 蓬莪术 6 克 炙甘草 6 克

六诊：汤药只服六剂，服丸药半年，葡萄糖注射全停，诸症大为好转，大便已基本正常，便时尚觉坠胀，并无血及粘液，食欲增加，已可吃普通饭，脉象不似以前沉细，略带弦意，舌质基本正常，齿印亦消，脉症参合，病情稳定，或有获愈可能。改处丸方，适当投入培元之品，继续巩固。

处方：1. 每日早服逍遥丸 6 克，下午服当归龙荟丸 5 克，晚服参茸卫生丸 1 丸。先服十日，白开水送服。2. 每日早服柏子养心丸 9 克，午服逍遥丸 6 克，晚服人参归脾丸 6 克。继续服十日白开水送服。

七诊：先后服丸药一年，在此期间，偶有大便带血及粘液现象，除感觉坠胀之外，已无任何症状，体重增加，颜面浮肿完全消失，干瘦皮肤已大见润泽，至 1957 年 5 月 1 日能自己下床活动，脉象平和，再更丸方及汤药备用方，于活瘀生新之中，注意恢复体力。

处方：

1. 汤剂：白石脂 赤石脂同打同布包，10 克
血余炭 禹余粮 10 克同布包，6 克 陈阿胶 另炖分二次兑服，6 克 黑升麻 5 克
二仙胶 另炖分二次兑服，6 克 怀山药 打碎炒，30 克 黑芥穗 5 克
白薏仁 18 克 台乌药 6 克 西党参 12 克 广皮炭 6 克 云茯苓 10 克
杭白芍 醋柴胡 3 克同炒，10 克 青皮炭 6 克 云茯神 10 克
炙黄芪 24 克 苍术炭 10 克 白术炭 10 克 炙甘草 2 克

2. 丸剂：元胡索 30 克 晚蚕砂 30 克 台乌药 30 克
蓬莪术 30 克 威灵仙 30 克 酒杭芍 60 克 广木香 18 克
真沉香 12 克 木蝴蝶 30 克 酒当归 30 克 小青皮 15 克

京三棱 15 克 绵黄芪 90 克 二仙胶 60 克 陈阿胶 30 克
软柴胡 30 克 小枳实 30 克 皂角子 30 克,炒焦
桃杏仁各 30 克,去皮尖炒 何首乌 30 克 炙甘草 30 克

共为细末,炼蜜为丸,重 10 克,早晚各 1 丸,白开水送服。

在此期间,再去肿瘤医院妇瘤组检查,据述宫颈癌已完全治愈,自此每年检查一次,迄今未发现转移病灶及复发现象,现已照常操持家务,从 1957 年到 1964 年 5 月,七年以来定期随访,仍健康如常。

《施今墨临床经验集》

女子不孕

任贤斗

任嵩山之女,年三十尚未生育,求种子方药。夫妇人不孕,必是经水不调,而经水不调又必因有病而致,岂有调经种子之呆方乎?须询察病源,以治其本,则经无不调。今食少头昏,面色淡白,脉四至无力,经水先期,乃脾虚阳衰之证。脾虚致食少,阳衰致头昏,经水先期乃脾虚不能摄统之故,宜助阳补中,与温胃饮加附子、仙茅为丸,服一料,经调神壮,越两月怀孕,次年产一子。

温胃饮

人参 白术 扁豆 陈皮 干姜 当归 甘草

《瞻山医案》

王靖

越二年,张七兄之女,适吾乡大郎神村宋,数年不孕,月事不以时至,饮食亦少。春间忽患咽痛,人以为感冒瘟疫,凡解毒散风、消炎凉血诸药,无所不施,而喉痛如故。张求余治,诊其脉沉而滑,恐喉中肿烂,以箸按其舌而视之,则痰核累累如贯珠。自喉连及上腭,

且复如此。乃笑曰，如此不着紧病，乃累赘至是乎。头不痛，鼻不塞，非感冒也；项不肿，喉不闭，非瘟疫也；不渴不热，非火也；不汗不昏，非风也。此乃痰热上潮，结而成疮形，按之软而滑，其痛若口疮。况病者体素肥，痰膜凝结，故数年不孕，月事不至。但去其痰，则血络通，不惟止喉痛，即月事亦当至也。其父喜，急索方，余以芩连二陈汤示之，告曰，二服喉痛自止，再合加味二陈丸一料，时常服之，下半年必更壮矣。病者听之，余亦不问。迨戊午春，于宗人处，见张至，急揖谢曰，小女病，诚如君言，今抱子矣，鄙亲家亦极感谢。为之一笑。

《醉花窗医案》

王苏民

周香丹令媳，乙卯岁鞠月下旬，痰湿体质，经事愆期，经来腹胀，经行颇涌，色紫多块，白带淋漓，胁气频痛，舌苔滑白，吵恶多痰，大便常泻，出室六载尚未孕育，病在肝脾累及奇经，宜丸药调之。

丸方：紫丹参一两七钱 炙甘草七钱 延胡索一两七钱
青、陈皮各一两七钱 土炒焦白术一两七钱 湖丹皮炭一两七钱
益母花三两 金铃子一两七钱 台乌药八钱 羌蔚子一两七钱
茯苓三两

共研细末，用米泔水泛丸，每服三钱。

王稚卿夫人，结婚八年未曾怀孕，月事多缩，来则便泻，色时泛紫，带行晕黄，腰俞作酸楚，眉心及头角时疼，或少腹胀痛，腿干烧生白屑，天寒腿足逆冷，交夏面色晦黄，入夜口咽脱津，有时懊恼无奈，多烦虑、善恼怒，好洁好劳，显然病本在肝，侮及脾胃，久病则病伤营液，累及奇经，悉宜适性怡怀，久延防归损怯。

膏滋方：

土炒秦归身二两 炒松干地黄一两七钱 紫丹参一两七钱

青、陈皮各一两 藕粉炒阿胶一两七钱 土炒杭白芍三两
朱砂青黛染茯苓、神各一两七钱 酸枣仁一两七钱
大贝母一两七钱，去皮尖 合欢花三两 甘草水炙远志肉四钱
香附米一两七钱 土炒冬白术一两七钱 湖丹皮一两七钱 玫瑰花一两
羌蔚子三两 淮山药三两 九孔石决明三两，先熬浓汁用西洋参八钱
兴化正二桂园三两，另熬汁 益母膏三两 收膏，每晚服三钱。

煎方，每逢经期预服三帖，经来亦可服。

土炒秦归身一钱五分 生白芍三钱 朱茯神三钱
土炒冬白术一钱五分 延胡索一钱五分 卷柏四分 佛手花七分
生赤芍一钱 甘草四分 香附米一钱五分 湖丹皮一钱五分
川楝子一钱五分 九孔石决明四钱，先煎

董用候令媳，二天不足，月经期缩，临经腹胀，经少色淡，腰俞酸楚，肢体疲困，常时凄清，结婚八年尚未怀孕，宜丸药调之。

丸方：砂仁水炒透干地黄一两七钱 醋炒抚芎四钱 茯苓三两
益母花三两 川杜仲二两 酒炒赤芍一两七钱 土炒冬白术一两七钱
炙甘草四钱 延胡索三两 玫瑰花七钱 大红月季花一两
酒炒归身三两 紫丹参一两七钱 醋炒香附三两 土炒川牛膝三两
川续断二两 卷柏七钱

红糖水泛丸，每服三钱。

煎方：归身一钱五分 白术一钱五分 炙甘草七分
醋香附一钱五分 川楝子一钱五分 玫瑰花八分 半硫丸四分
赤芍一钱五分 茯苓三钱 紫丹参一钱五分 延胡索一钱五分
羌蔚子一钱五分 兔丝子一钱五分

药前开水送。

《王苏氏先生脉案》

冉雪峰

湖北王某，体质魁梧，然艰于子嗣，膝下犹虚，其爱人某，年虽

少艾，从未生育。因时感夹肝郁，就予诊：为处逍遥散加重疏表之品，一剂得微汗，病减，表气通则里气和，复加利膈柔肝疏里之品助之，胸膈闷痛等证亦愈，因询及种子方药。予曰：普通方剂无济，人体有强弱之殊，病状有微甚之别，岂固定一方一药所能泛应。大抵男子之要在固精，女子之要在调经，男女生殖无畸形，精固经调，生育机会即多。病者曰：我经不调，趑前趑后，多带下，愿先生为我调之。予曰：培本与治标不同，非久治不为功。为拟当归内补建中、五子衍宗二方合裁加减，方用：当归、黄耆各三两，桂枝三两（嫩桂皮肉相连者），白芍六两，复盆子、车前子、菟丝子各三两，桑螵蛸三两（酒洗），甘草一两，研末，蜜丸梧子大，每服三钱，日二服。每经事至时，诊察服汤药三剂，寒则温之，热则清之，瘀则行之，滞则通之，郁则散之，随其所至，使自宜之。越三月，带下愈，经期准，饮食倍增，精神有加，自后两月经不至，自以为停滞，欲攻之，予曰：脉则两尺不绝，体则神气较旺，似为育麟佳兆，俟一月，达三月时期，即朕兆，再俟两月，达四月时期，即可显著。病者半信半疑，亦姑听之，届三月，腹部似有形，届四月，胎形已著，时或动掣，足月产一男孩，儿体壮健。

《冉雪峰医案》

施今墨

郝某某，女，35岁。十四岁月经初潮，经期无定，时赶前，时错后，结婚十年未孕，近年来，月经每至量极多，只能睡卧不能行动，时有带下，腰酸，身倦，目眩，耳鸣、睡不安，多恶梦。舌质淡，六脉沉细而软。

辨证立法：冲为血海，任主胞胎，冲任不调，经期无定，血海不充，提摄无力，经水量多，更致血亏。经云：女子“二七天癸至，任脉通，太冲脉盛，月事以时下，故有子。”冲任不盈，天癸失调，婚久不孕，缘由是起，拟调经养血，使太冲脉盛，任脉协和，自可怀孕也。先服丸药调理。

处方：每日早服强心丹 18 粒，晚服玉液金丹 1 丸。

二诊：服丸药二十日，期间月经曾来，量已减少，血色正常，腰酸，腿痛，少腹不适等症均较往日轻，拟予汤药四剂，更服前次丸药二十日观察。

处方：生熟地各 10 克 醋柴胡 5 克 川杜仲 6 克 杭白芍 10 克
川续断 6 克 酒黄芩 15 克 当归身 10 克 酒川芎 5 克
陈阿胶 10 克 祁艾叶 6 克 炒远志 10 克 鹿角胶 10 克
炒山萸 12 克 巴戟天 10 克 淡苁蓉 20 克 炙甘草 3 克

三诊：汤药丸剂共服二十日，月经二十九天来潮，量已正常，白带甚少，腰腹酸痛均减，头晕、目眩、耳鸣、心跳亦大为好转，精神旺健，仍用丸剂治病。

处方：每日早服天王补心丹 1 丸。午服八宝坤顺丸 1 丸。晚服参茸卫生丸 1 丸。

四诊：服药三十日，月经未见。精神极好，前有之头晕、目眩、心跳、耳鸣诸证逐渐消失，食睡均佳，嘱再服丸药一个月。

五诊：又服丸药一个月，情况很好，月经仍未至，遂停药一个月，现症：食后恶心呕吐，畏油腻，喜食酸，六脉均滑，已有怀孕现象，拟和胃止呕法：

处方：砂仁壳 5 克 玫瑰花 6 克 豆蔻壳 5 克 厚朴花 6 克
旋复花 5 克，半夏曲 6 克同布包 白扁豆 25 克 野於术 5 克 青皮炭 6 克
广皮炭 6 克 香稻芽 10 克 炙甘草 3 克

注：五诊后六阅月，患者生一男孩，因乳汁不下又来诊视，为之处方下乳。

《施今墨临床经验集》

干血癆

何书田

潮热干咳，经水断而左胁结癥。本元薄弱，干血劳之象也。夏令防其加剧。

西洋参 炒白芍 地骨皮 甜杏仁 天花粉 炙鳖甲 冬桑叶 香青蒿 川贝母 广橘白

产后两载，癸水不至，时有鼻红、咳嗽，久而不止，火炎咽干，脉象弦细而数。此即干血劳之候也。防吐血。

西洋参 麦冬肉 牡丹皮 制女贞 橘白川斛 清阿胶 甜杏仁 肥知母 天花粉 枇杷叶

复诊：服前方咳嗽已止，大象安妥，惟经水两载不至，病由产后而起，总以调营通经最善之策。

上肉桂 炒归身 制香附 川芎 怀膝炭 大熟地 炒白芍 紫丹参 丹皮 海螵蛸 月月红

《竿山草堂医案》

余听鸿

横泾有王姓妇，因其夫私有外遇，不顾家事，有儿女各一，男六岁，女三岁，夫妻反目，吵扰不休，气郁日久，左项坚硬，呕吐腹痛，经阻三月，医皆疑为妊。就余诊之，按脉坚硬而涩，面色青黯无华，断无妊娠之理。彼细述家事。余曰：气血久郁，防延变内热咳嗽，则难治矣。问其夫偕来否。曰：在寺前买物，使之先来，稍停即至也。其夫来寓。余曰：症由郁怒伤肝，非妊娠，干血劳，难治矣。察其夫面色略变，有彷徨之状，尚有不忍之心。余曰：若能依我三事，尚可挽回，若不能依，延他医治之。其夫问故。余曰：一要三月不出外，在家代其劳。二要顺其性，倘有加怒，不可违拗。三要殷勤服侍汤

药，调理饮食寒暖。如能依此，一方可痊。其夫一一遵之。早服归脾丸三钱，晚服逍遥丸三钱，再用归芍六君汤加二陈、香附、柴胡，一月服十剂，用海蜇、紫菜等作羹食。调理三月余，项间肿硬已消，月事以时下，夫妻反好如初。后偕至余寓，拟一膏方。余见之欣喜。若七情郁症，不顺其性，十难愈一二耳。

《余听鸿医案》

邹趾痕

刘玉成者，在重庆城内贩卖笔墨人也。逊清光绪十六年，正成之妇，年三十七岁，月经不至半年矣，腹中有硬块，时现时隐。现则腹胀硬，痛剧，瘀热上冲心，则心烦乱欲死，面赤目昏，手心脚心潮烧；隐则诸证不作。食量极少，衰惫困乏。愚曰：此干血癆瘵也。其初因月经当下不下，或下不尽净，余血留中，停蓄为瘀，被肝火之烘灼，始而结为稀薄之粘液，或为软小之涎渣，久则合成大块大团，又久则液干涎竭，大块大团缩小，为干血块，为干血团。以手按其腹中，触指坚硬如石块者，干血成矣。干血既成，每日午正，肾阳上交于心之时，干血块中烈火冲出，直上攻心，则心热如焚，面红耳热，五心潮烧，心中烦躁欲死。午后烈火返回干血块中，诸病悉除。每夜子正，心阳下交于肾之时，干血块中烈火冲出，病状一如午正。因其病由腹有干血坚块而起，故各干血癆。《金匱·妇人杂病篇》第九节曰：妇人之病，因虚积冷结气，为诸经水断绝，至有历年，血寒积结，胞门寒伤，经络凝坚。在上呕吐涎唾，久成肺癆，形体损分；在中盘结，绕脐寒疝，或两胁疼痛，与脏相连，或结热中，痛在关元，脉数无疮，肌若鱼鳞。时著男子，非止女身。此《金匱》原文也。盖言妇人之病，其病因约有三端：曰虚，曰积冷，曰结气。盖血脉贵充悦，而地道喜温和，生气欲条达也。否则血寒积结，胞门闭而经水断绝矣。而其变证，则有在上在中在下之异。在上者，肺胃受之，为呕吐涎唾，为肺癆，而形体消损，病自下而上，从炎上之化也；在中者，肝脾

受之，或寒疝烧脐，或胁痛连脏，此病为阴，或结热中，痛在关元，或脉数肌干，皮肤若鱼鳞。有时著于男子，非止着于女身。此病为热中，为阴阳之交，故或从寒化，或从热化也。今观病人，两手皮肤已有鱼鳞，则癆瘵已成，不能治疗矣，请辞而退。妇坚求救治，妇之夫亦再三请求，且致词曰：“明知敝内病已不治，非寻常医所能挽救，今以先生，非寻常医可比，故为此或可挽救之请求焉。”愚感其诚。语之曰：“请与主人约，此死证也，不治必死，治之或可不死，本无期必之把握。治之而愈，愚不任功，不愈愚不任过。”该夫妇皆允许。愚曰：“既蒙信任之专，理当着手治疗。然犹有虑，不可不与主人先告之。今欲治愈此种大病，当先知医有医之责任，主人有主人之责任。如诊察病状，详询病情，斟酌缓急，开方用药，预告饮食宜忌，起居调摄之法者，医之责任也。而遵守医之预告，宜忌不误，调摄合法者，主人之责任也。必也，医与主人，各尽职责，庶几可冀转危为安。倘有一着不慎，以致不救，不惟主人不甘，医亦败兴。再将此病之始因，说与主人知之，必先知始因之误，然后乃知今日救误之目的；必须主人知此目的，方可收同心协力之效。其始因之误者何也？服热药过多，忌食生冷是也。当月经初不至时，俗医必投以热剂，必戒食生冷，此俗医之定例，最不成理由，最瞎说之例也。他们的医书云：血不宜凉。凡一切血病，皆不可投以凉药。他们的医书又说：血之性质，得热则行，得寒则凝。血能流行，则百病不生；血一凝结，则诸病丛集。他们的医书，又设一比喻曰：试观血在肌肉之内，流行不息，倘遇肌肉破损，血溢于外，流在地面，立时凝为血块，此得寒则凝之明证也。这个说法，巧极妙极，易学之极，只要会用热药，便可医一切血病。因为易学，遂把一切俗医，都造成血病禁用凉药的公例了。究其实，医圣之道，哪有这样害人的公例？这个公例，不知害了多少患血病的人。不说远了，只说愚亲眼看见，无法挽救的，也有十几人。民国十三年，愚著有会谭日记，曾将此邪说极力排黜，无如崇尚此邪说者太多，愚一人孤掌难鸣，终不能挽此狂澜。今主人病，

亦是受了血不宜凉、忌食生冷之害，今欲于受害无法挽救者而挽救之，请先与主人约，必须破除成见，大胆多食生冷，大胆专服愚方，勿求速效，勿畏艰难。服愚方既多，倘值腹痛且胀，瘀血上冲，壅塞胸胁，瞑眩濒危，不须惊惶，更不可乱投别方，耐心看护，自有转机。此中消息，只在出脏则生，入脏则死，一线之间耳。倘一乱投别方，令大功垂成失败，后悔何及！再有告者，愚医此病的最要宗旨，也有先与主人言明之必要。经云：瘀血不去，新血不生。今病人所以枯瘦柴瘠、不生新血者，因瘀血不去之故也，是故法常攻其瘀血。今瘀血既已结成干硬之巨块，倘贸然攻之，试问坚硬巨块，从何觅巨大之出路？必至痛胀难支，血室破裂而死。因为干血出路计必先投以破瘀之剂，使坚硬巨块，破为细碎砂粒，然后攻之，乃得顺流而下也。然破瘀之药，含水蛭、虻虫不为功，而水蛭、虻虫，药铺所售之品无效力，因为办药之人，徒具形式，不知用药之宗旨故也。当俟夏月，特派人到四乡农村畜牛之家，入牛栏中，视有飞嚼牛肤之蚊虻，大和小指头者，捕之，去其翅足，以石灰细末保存之，以一千二百个为率，此为牛虻，方可入药。其它虻虫，不足用也。又觅水田中有水蛭之处，水蛭四川名蚂蟥，北平名水鳖，长者五寸六十，短者一寸半寸，取其一寸半寸者，亦以石灰细末保存之，以一千二百个为率，此一寸或半寸之水蛭，名钻脚蛭，因农人以脚入水中，此等水蛭，便爬在脚上，钻入肉内，嚼血故也。若长一寸以上之水蛭，虽捉置脚上，亦不钻脚矣。今药铺所售之水蛭，乃长二三寸之水蛭，此种水蛭，不能钻脚嚼血，安能破瘀？药铺所售之虻虫，不纯是牛虻，乃麝有粪虻、尿虻在内，毫无破血之用。以上各节，主人深信不疑否？果能照办蛭虻否？果能吉凶无悔否？”病人自言：“贱病受庸医热药行血之害，造成干血坚症，无可挽救之病，危殆至此，无人能知从前之非，今蒙一语道破，使我豁然醒悟，方恨受害太深，回头不早，敢不倾心倚任？幸而生，君之赐也。不幸而危，乃前医误，我不敢疑君也。”愚伟其言，于是着手主方，用黄连阿胶鸡子黄汤，加生地、西洋参，服

之而安。愚曰：凡治大病，不以小效为可靠，亦不以危殆而生惧，当有坚忍耐苦之决心，临乱不惑之认识。于是或以小柴胡汤加黄连、生栀子，或以竹叶石膏汤加黄连、生地榆，间有心烦躁扰，或胸胁痞满，不能卧反复颠倒之发现，然皆大黄黄连泻心汤，或栀子鼓汤，或大小柴胡汤等方可解，尚无大虑。三四月后，瘀血冲心，心中疼热；热上冲头，则面红目赤；热窜四肢，则手心脚心灼热，心神恍惚。初犹能食，渐至于饥而不能食。病剧时烦躁欲死，手足躁扰，捻衣摸床，昏愦不识人，举家惊惶，愚曰：“病本不治，初诊时已言之，徒以请旗之殷，姑且勉力为之，既欲治疗，必经此险，见险而无损，然后乃可脱险。今察此证险象毕呈，尚有一线生机，慎毋乱投别方，当一心一意，倚靠愚方，选派勤慎，晓事妇二人，轮流看护，每日午前十钟，灌药一次，三钟二次，七钟三次，只要药能下咽，便可挽救。”方用桃仁、赤芍、莪术、牛虻、钻脚蛭、生大黄，以降冲气；黄连、黄芩、阿胶、犀角以保心气；西洋参、生地、当归、黄芪以补血益气。第一日，神识稍清；第二日，烦躁不作，手脚安宁；第三日，大便通泻，出黑粪极多，乃能食。又历二个月余，腹痛且胀，有气窜走，上下冲突，愚曰：“此痛因愚用破症之剂，攻破坚症，分裂症块之故，虽痛当耐心受之。”既而痛益勤，既而痛极胀极，愚皆令忍受，病人呻吟曰：“痛胀厉害之极，断难忍受。”愚曰：“若不忍受，前功尽废。”入夜，更加胀痛，至于昏晕不知人，愚命用食盐二两，吴茱萸、小茴香各一两，地榆、槐花、桃仁、茜草各五钱，研为细末，和匀，入锅内微火炒热，布包四五包，以一包取温度适宜，熨其腹，从上而下，冷则换二包，如法换熨，一刻之顷，则有血块血渣大泻而下，泻一次腹胀腹痛减轻一次，连泻三次，胀痛大减，病人亦大安舒。从此随时皆有瘀血从腹中泻出，病人遂如生产后恶露不尽之情形，设油布于臀褥，病人藉油布而坐。三四日后，瘀下减少，然犹点滴不尽，五六日后，乃无下降之瘀，从此胸腹宽舒，食量大增，月事以时下，遂为无病之人。

论曰：作医难，作医书更难。作医不良，则草菅人命，终其身而

害乃止，作医书不良，则造不良之医千百，其书永传，则不良之医永造，其草菅人命之害，遂至于无穷。然愚思俗医之邪说极多，其它种邪说，只能造庸医，不能普及于不知医之妇孺，惟此“血热则行”之邪说，能遍全国，能使家喻户晓，能使妇孺皆知。凡富贵家之妇女，莫不互相严戒曰：经期至，毋食生冷，毋洗浴冷水，毋服凉药。何以若是其普遍也？以其邪说易知易行故也，以其所造之理由，足以蛊惑愚而自智之庸医，又足以蛊惑愚而自智之妇孺故也。其邪说云：血之为性，得热则行，得寒则凝。如是说法，颇近于理，而实无理，庸医无辨伪之知识，又喜其易学，妇孺又喜其易行，于是天下之吐血、衄血、便血、妇女之经期崩带，皆不得服凉药，皆必死于温热行血之公例而不悟，邪说之魄力大矣。再论此证本是死证，因病人救生心切，有虽死不怨之请求，因而姑救之，虽救得生，然已险矣。回忆病人当腹痛且胀，至于昏晕时，未尝不自悔孟浪，几蹈冯妇攘臂之消，至今思之犹有余悸，今后慎毋为第二冯妇也。

《圣方治验录》

范文甫

林右。干血劳病，大肉未脱，脉症尚调，或有可救。

炙甘草 桂枝 生地 麦冬 阿胶 麻仁 党参 生姜 红枣

《范文甫专辑》

曹颖甫

余尝诊一周姓少女，住小南门，年约十八九，经事三月未行，而色萎黄，少腹微胀，证似干血劳初起。因嘱其吞服大黄廑虫丸，每服三钱，日三次，尽月可愈。自是之后，遂不复来，意其差矣。越三月，忽一中年妇人扶一女子来请医。顾视此女，而颊以下几瘦不成人，背驼腹胀，两手自按，呻吟不绝。余怪而问之，病已至此，何不早治？

如泣而告曰：此吾女也，三月之前，曾就诊于先生，先生令服丸药，今腹胀加，四肢日削，背骨突出，经仍不行，故再求诊！余闻而骇然，深悔前药之误。然病已奄奄，尤不能不一尽心力。第察其情状，皮骨仅存，少腹胀硬，重按痛益甚。此瘀积内结，不攻其瘀，病焉能除？又虚其元气已伤，恐不胜攻，思先补之。然补能恋邪，尤为不可。于是决以抵当汤予之。

虻虫一钱 水蛭一钱 大黄五钱 桃仁五十粒

明日母女复偕来，知女下黑瘀甚多，胀减痛平。惟脉虚甚，不宜再下，乃以生地、黄耆、当归、潞党、川芎、白芍、陈皮、茺蔚子活血行气，导其瘀积。一剂之后，遂不复来。后六年，值于途，已生子，年四五岁矣。

按：丸药之效否，与其原料之是否道地，修合之是否如法，储茂之是否妥善，在在有关，故服大黄虻虫丸而未效者，不能即谓此丸竟无用也。

《经方实验录》

冉雪峰

陈镜湖，万县人，半业医，半开药铺，有女年十七，患干血癆。经停逾年，潮热，盗汗，咳逆，不安寐，皮肉消脱，肌肤甲错，腹皮急，唇舌过赤，津少，自医无效，住医院亦无效，抬至我处。困憊不能下轿，因就轿边诊视。脉躁急不宁，虚弦虚数，予曰：脉数、身热、不寐，为癆病大忌，今三者俱全，又加肉脱皮癢，凡如风消，精华消磨殆尽，殊难着手。渠乃为敷陈古今治癆方治，略以金匱以虚癆与血痹合为一篇颇有深意，仲景主小建中阴阳形气俱不足者调以甘药，唐·孙氏又从小建中悟出复脉汤，仲景用刚中之柔，孙氏用柔中之刚，功力悉敌，究之死血不去，好血无由营周，干血不除，新血无由灌溉，观大黄虻虫丸，多攻破逐瘀之品，自注缓中补虚，主虚癆百不足，乃拟方：白芍六钱 当归四钱 生地四钱 鳖甲五钱 白薇三钱

紫菀、百部各三钱 甘草一钱 大黄廋虫丸十粒，煎剂分二次服，丸药即二次用药汁吞下。十日后复诊，咳逆略缓，潮热盗汗渐减，原方去紫菀、百部加藏红花、琥珀末各八分，丸药米酒下。又十日复诊，腹皮急日渐宽舒，潮热盗汗止，能安寐，食思渐佳，改用复脉汤嘱守服久服。越三月，予在高笋塘闲步，在某药店门首见一女，酷似陈女，询之果然，系在渠家作客，已面有色泽，体态丰腴，不似从前羸弱。虚癆素称难治，然亦有短期治愈者。

《冉雪峰医案》

热入血室

许学士

一妇病伤寒，发寒热，遇夜则如见鬼状，经六七日，忽然昏塞，涎响如引锯，牙关紧急，瞑目不知人，病势危困。许视之曰：得病之初，曾值月经来否？其家云：经水方来，病作而经遂止，得一二日，发寒热，昼虽静，夜则有鬼祟，从昨日不省人事。许曰：此乃热入血室症。仲景云：妇人中风，发热恶寒，经水适来，昼则明了，暮则谵语，如见鬼状，发作有时，此名热入血室。医者不晓，以刚剂与之，遂致胸膈不利，涎潮上脘，喘急息高，昏冒不知人。当先化其痰，后除其热，乃急以一呷散投之。两时顷，涎下得睡，省人事，次授以小柴胡汤加生地，三服而热除，不汗而自解矣。

一妇人患热入血室症，医者不识，用补血调气药治之，数日遂成血结胸，或劝用前药，许公曰：小柴胡已迟，不可行也。无已，刺期门穴斯可矣。予不能针，请善针者治之。如言而愈。或问热入血室，何为而成结胸也？许曰：邪气传入经络，与正气相搏，上下流行，遇经水适来适断，邪气乘虚入于血室，血为邪所迫，上入肝经，肝受邪则谵语而见鬼，复入膻中，则血结于胸中矣。何以言之？妇人平居，水养木，血养肝，方未受孕，则下行之谓月水；既孕，则中畜之以养

胎；及已产，则上缠之以为乳，皆血也。今邪逐血，并归于肝经，聚于膻中，结于乳下，故手触之则痛，非药可及，故当刺期门也。

《名医类案》

虞恒德

一少妇，夏月行经得伤寒，似疟，谵语狂乱（此行经在先，而病在后）。诸医皆以伤寒内热，投双解散、解毒汤，服之大汗如雨，反如风状；次以牛黄丸金石之药，愈投愈剧。一日，延虞诊视，脉弦而大。虞思伤寒仙热狂乱，六阳俱病，岂不口干舌黑，况脉不数，病体扪之或热或静，其腹急痛，下意必有内伤在前，伤寒在后，今伤寒得汗虽已，内伤则尚存故也。因细问之，患者曰：正行经时，因饮食后多汗，用冷水抹身，因得此症。方知冷水外闭其汗，内阻其血，邪热入室，经血未尽，血得邪热，乍静乍乱，寒热谵语，掉眩类风，须得玉烛散下之而愈（玉烛散：四物加大黄、朴硝，非大便秘结不可用）。下后谵语已定，次以四物小柴胡汤，调理五日，热退身凉，其患遂廖。

《衍义》云：一妇人温病已十二日，诊之：其脉六七至而涩，寸稍大，尺稍小，发寒热，颊赤口干，不子了，耳聋。问之，病数日经水乃行。此属少阳热入血室也，若治不对病则必死。乃按其症，与小柴胡汤服之（此治伤寒）；二日，又与小柴胡汤加桂、干姜一日，寒热遂止；又云脐下急痛，又与抵当丸，微利下，脐下痛痊，身渐凉，脉渐匀；尚不了了，乃复与小柴胡汤；次日，但胸中热躁，口鼻干，又少与调胃承气汤，不得利；次日，心下痛，又与大陷胸汤半服，利三行；次日，虚烦不宁，时妄有所见，复狂言，虽知其尚有燥屎，以其极虚，不敢攻之，遂与竹叶汤，去其烦热，其夜大便自通，至晓两次，中有燥屎数枚，而狂言虚烦尽解；但咳嗽唾，此肺虚也，若不治，恐成肺痿，遂与小柴胡汤去人参、大枣、生姜，加干姜、五味子汤，一日咳减，二日而病悉愈。以上皆用仲景方。

《名医类案》

薛立斋

一妇人，经行，感冒风寒，日间安静，至夜谵语。用小柴胡加生地，治之顿安。但内热头曙。用补中益气加蔓荆子而愈。后因恼怒，寒热谵语，胸胁胀痛，小便频数，月经先期，此是肝火血热妄行，用加味逍遥加生地而愈。

一妇人因怒，寒热关痛，谵语，日晡至夜益甚，而经暴至（此病在先，而经行在后）。盖肝藏血，此怒动火，而血妄行。用加味逍遥散加生地，治之神思顿清，但食少体倦，月经示已，盖脾统血，此脾气虚不能摄血，用补中益气治之，月经渐止。（此非伤寒）

一妇人怀抱素郁，感冒，经行谵语。服发散之剂，不应，用寒凉降火，前症益甚，更加月经不止，肚腹作痛，呕吐不食，痰涎自出；此脾胃虚寒，用香砂六君，脾胃渐健，诸症渐退，又用归脾汤而全愈。（此症之变）

《名医类案》

江应宿

西村金氏妇，年二十一岁，五月中患热病，发热头痛，渴欲饮冷，六脉紧数，经行谵语。用小柴胡汤，病家疑病人素强健，药有人参，未敢服。过二日，病转剧，腹痛急胀，已经八九日不更衣，仍以小柴胡加大黄四钱，利去黑粪，热退身凉而愈。（此症之常，同一腹痛，而下者，温补者，宜细味之）

《名医类案》

孙文垣

李氏妇胸胁大腹作痛，谵语如狂，寅卯辰三时稍轻，午后及夜痛甚（病在血分）。原有痰火头痛，牙痛之疾，又因经行三日后头痛，发寒热，医以疟治，因大恶热，三四人交扇之，以两手浸冷水中，口含

水而不咽，鼻有微衄（热在经络）。又常自悲自哭（如狂），痛时欲奔窜，剧则咬人（如厥），小水直下不固（肝热），喉哽哽吞药不下，脉之左弦数，右关洪滑。曰：此热入血室也，误服治疟刚燥之剂，扰动痰火，以致标本交作。其胸胁痛者，病属少阳也，剧则咬人者，虫行求食而不得，故喉中哽哽然也。以小柴胡汤加桃仁、丹皮，而谵狂减，次日与安蛔汤，痛止，饮食进而愈矣。

元素侄妇春温后经水适止，余热不退，口中甚渴，胸胁痛而耳重（少阳），脉左弦数，右滑大而数，小柴胡加石膏、知母、桔梗、桔壳、葛根、瓜蒌、半夏曲，服下热渴如旧。改用柴胡二钱，人参、甘草、天花粉、黄芩（小柴胡汤去半夏加天花粉，以血室忌半夏也）、白芍、红花、当归、丹皮、知母各八分，调理而瘳。（此症无谵妄发狂，然以凉解不应，必用诸血药乃应，则仍是热入血室矣）

《续名医类案》

缪仲淳

张璠浦内人患热入血室，发狂欲杀人，医以伤寒治之，煎药未服，邀缪往。缪曰：误矣。复其药，投一剂而安。先与童便（心主血，热邪从血分上乘于心，故发狂，先与童便引热下行，最为元解），继与凉血行血安心神药，遂定。

朱氏妇经行一月不止，每黄昏先寒后热，遍身疼痛，胸膈胀闷，必得大喊叫斯，用手搔吐痰涎乃宽，且渴甚，此痰饮疟疾。今饮食不进，夜如见鬼者，乃热入血室也。用小柴胡加生地、丹皮、桃仁，两帖后以白术三钱，首乌二钱，陈皮、麦芽各一钱，乌梅一个，姜三片，水煎服之，寒热止，诸症皆安。

《续名医类案》

陆养愚

臧尧山夫人向有头风症，八月间患腹痛，日轻夜重，痛作昏愦。

语言不伦，唇口燥裂而不欲汤饮，已十日。或投香燥行气益甚，身热如火，饥不能食，脉之沉数而弦，询之适经行时感冒，身发寒热，头大痛，平日服川芎茶调散，今服之头痛稍止，而身热更甚。遂变为腹痛，再问经行如常否？谓比平素觉住快。曰：此必热入血室也。或谓此伤寒症乎？曰：岂必伤寒而后热入血室哉。凡病末有无客热者，况初得之感冒，因头痛而以茶调散遏之，热无从泄，遇经行血室空虚，热乘虚而入，因以成瘀血瘀下焦。饮食不进而作痛，亦势使然也。用小柴胡以清其热，丹皮、红花、桃仁以去瘀，人参、麦冬生津止渴，二剂神清痛减能食，日服二剂，两日后送化字丸一钱，大便去硬血数枚，痛全愈。减桃仁、红花，加归、芍，调理而安。

《续名医类案》

薛立斋

一妇人多怒，手背患疮出血，至夜发热妄语，服清心凉血药不应，乃热入血室而然也。遂以加味小柴胡汤，二剂血止，而热亦清矣。

《续名医类案》

中神琴溪

医人藤本氏之妻，始患瘟疫，余邪不除者有日矣。神气幽郁，动作乃懒，饮食不进，好在暗处。来见先生告之曰：“余周阅《金匱》《千金》诸书方，苟其可当者无不行矣。然卒无寸功，愿烦刀圭，幸赐临之。”先生诊之，脉细而有力，少腹急结，曰：“邪已除矣。今所患，唯血室有残热也。医治苟误，恐变为骨蒸。夫骨蒸瘀热者，余虽往往见之，然至其真者，盖稀。多是问切不审，药剂不中，竟误之使然也。子其可忽哉？”即与桂枝茯苓丸加大黄汤，复来曰：“诸证虽退，更罹痼疾。圯腹绞痛，里急后重，所下赤白糅然。”先生复诊之曰：“鹧鸪菜汤之证也。”与十又三贴，果下蛔虫数条乃愈。

京师间街五条北近江屋，利兵卫妻，伤寒经水适来，谵语若见鬼状，且渴欲水。禁不与，病势益甚。邀先生诊之，脉浮滑，是热入血室而兼白虎汤证者也。即与水不禁，而投小柴胡汤。曰：“张氏所谓其人如狂，血自下，血下者愈。虽病势如此，犹自从经水而解。”果五六日全痊。

《生生堂治验》

吴箴

驾部周象九述女儿月前感冒，适逢经至，客邪治退，惟昼则神清安静，夜则寒热谵语，似成疟疾否？余曰：脉虚弦数，邪气虽退，但元阳虚弱，尚有余热未尽，以致热入血室，非疟也。当服四柴胡饮加山栀、贝母、芍药以培助正气，兼之和解清热，庶可全瘥。

《临证医案笔记》

王孟英

薰砧远出，妇病如狂，似属七情中病，而亦有不尽然者。

陈氏妇，患此月余，巫医屡易，所费既巨，厥疾日增，孟英切其脉，弦而数。能食便行，气每上冲，腹时痛胀。询其月事，云：病起汛后，继多白带。孟英曰：病因如是，而昼则明了，夜多妄言，酷似热入血室之候，径从瘀血治之可也。与桃仁、红花、犀角、菖蒲、胆星、旋覆、赭石、丹参、琥珀、葱白之剂，两服而瘀血果行，神情爽慧。继去桃仁、红花，加当归、元参，服数剂而瘳。

《王氏医案》

林佩琴

危氏。夏初时疫，恰值经断，血海亏虚，壮热陷里，口燥汗多，夜烦不寐。用清化饮加山栀、泽兰、藕汁，清理血分而愈。

胡氏。冬温化热，月信适来，邪热搏血，医用清解。外不甚热，

而脐腹胀痛，小水赤涩。用导赤散加红花、桃仁、延胡、车前子，再剂愈。

睦妇。伤寒发热咳呕，右胁刺痛，邪在少阳未解，忽经行，少腹烦懣。医不知热陷血海，且有无犯胃气及中上焦之戒。犹用杏、萸、谷芽等味，烦懣益剧。仿陶氏加减小柴胡汤，去参、枣，加生地、丹皮、赤芍、郁金、山梔、枳壳，数服而病霍然。

韦氏。温热症烦渴昏谵，脉虚促不受按，此必病中经行也。询之，则初病旬日内再至矣。以泽兰、赤芍、生地、麦冬、山梔、赤茯、连翘、石菖蒲汁、藕汁冲服，先清血分热邪，昏谵已减。后去泽兰、赤芍，加白芍、当归、炙草、红枣，酸甘和血得安。

丁氏。秋间寒热似疟，入暮谵语潮热，少腹满，此为热入血室。用小柴胡汤去参、姜、枣，加丹皮、赤芍、生地、查肉、归尾，三五剂瘳。

《类证治裁》

张琬香

世交张鲁封六兄，医学高明，凡戚友中病至棘手，延至立法即愈。一媛尚在室，患温邪多日不愈，邀治。舌黑燥，神呆，脉滞大。予认为邪入心包，当用犀角地黄，鲁翁对以业已服过。或剂轻之故，再议以大剂，不应。予又诊，细问其病中曾经走经否？对以十余日至上至，服主人药。予知其必不用医通法也。于是以舌黑为津液之涸，肾水之干。耳聋者，水不上升也。神昏者，精不上交于心也；两腿不能自移，衣服著肌肉即大叫痛者，为血分之亏也。用吴氏《温病条辨》下焦篇中复脉汤加减，内大熟地用至八钱，炙甘草用至六钱。鲁翁嫌手笔太重，予谓其书谓甘草不应加至一两，曾经得效多人，竟用之一剂即知。鲁翁竟以此汤日进，不过十余日，全愈。

道光庚戌六月，水澄苍王元通一妇患温邪六七日，适逢经至，予为道贺，即用前法。其本家有知医者，谓通经当用温药，改为炮

姜、红花等剂。经即停，叫掷烦躁，一夜即死。

范姓一室女，父母皆亡，患暑热，予治。一日予诊脉两手皆洪大，而两尺尤大，疑天癸之至，询王妇，出入三次答以无事。予以暑热太盛，用白虎汤，至晚痊愈。始知其经果至，因室女怕羞，嘱其勿说，遂致不救。

同治壬戌，避难乡间。有一妇患疫八日，经至，又四日，邀治。速用前法。距乡间赴市较远，药未入口，而经已停，遂致神昏不语，痊愈不治。

《医病简要》

吴达

辛巳仲秋六日，有宁友屠云甫，谓久安里朱秀宝者，青楼中翘楚也，近得奇疾，请诊之。至则见其仰卧，两人坐于傍，而各执其手，面微红，唇赤色，吻时时辟翕如吮物状，两手时一跃，或左或右，跃则目珠上窜，舌时伸出而自笑。问之则谵语昏沉，但云有人压我。诊其脉，两关搏指，尺寸皆微。舌心苔浊而黄，舌尖红润，口不喜饮。询知前夜偶发寒热，挑痧后即成此症。余以为挑痧不过略伤营血，何至于是？再询知病前一日，天癸已行，今尚淋漓不绝。予曰：是矣，此乃邪入血室也。随定一方与之，令连服两剂。诘朝往诊，病人正在酣睡。侍者云：进药至二剂，即诸病退而熟卧矣。诊脉尺寸已起，天癸未止，改用和中养血，调理而安。

《医学求是》

姚龙光

吉安康文卿，开隆昌木号，其夫人二十余岁，五日节因多食糕稷椒姜，而患温证，又服医家香窜大热之药，遂身热无汗，腹痛肋胀，胸闷吐血，人事昏沉，语多谵妄，手足搐搦，大便不通，小便赤涩，日轻夜重，躁扰不寐。王升甫为迁余治，诊得左脉弦数，右脉滑

数，其神如痴。问曰：经水何如？曰：初病经水便来，现尚未止，共来六日矣。余曰：此温病热入血室而兼食积也。为用柴胡一钱半，黄连一钱，全瓜蒌一两，青蒿、山楂子、麦芽、赤芍、丹皮、生地各三钱，枳壳、元明粉各二钱，令与煎服。或言太寒，瓜蒌、黄连各减一半，服后热减，复诊时升翁私以告余，余曰：热邪重极，血分大伤，血燥津枯，大便如何下达？今用瓜蒌八钱，余仍旧，一剂果大便畅行，热退神清，惟腹胀尿赤，右脉仍滑数，此食积未行也。为去柴胡。半夏，加酒曲五分，又两剂诸症皆愈，安寝如常。又为易方调理。

《崇实室医案》

柳宝诒

景。接到手书，阅悉一切。令婢母之病，因郁而起，适值经来，则病之涉乎营分者，可想而知。寒热夜发，汗出齐颈。在热入血室者，本有是证；惟仲景所论，主以小柴胡汤，乃伤寒之邪，此证或因温邪，或因郁热，逼人营分，因热蕴而经行，因经行而热陷。病之路径与伤寒同，而致病之邪则异。治是症者，可以师仲景之法，而不可执仲景方也。至阳脱阴虚两层，除头汗外，与别项见证，均不相符，可无论也。询寒热作于酉戌，退于寅卯，邪之涉于阴分，已可概见。汗出于头，颈下无汗，乃热入血室之见证；况病起而经候适行，尤与证情相合。仲景从少阳立法，而以小柴胡汤为主方，原欲从阴分提出所陷之邪故耳。此症本非伤寒之邪，则师其意，当变其方。拟从少厥两经，泄热退邪，俾郁热渐清，则头汗自渐少矣。悬揣之说，未识当否？尚希高明酌采。

鲜生地 生姜打汁，连渣同生地拌打，和炒微黑 紫丹参 炒丹皮 嫩白薇 香青蒿 东白芍酒炒 淡黄芩酒炒 生甘草 牡蛎 茅根肉

加减：前案云额汗，如汗在额，而不及胸后者，乃阳明病，当知母；若小便清利，大便黑者，专属瘀热而设，当加桃、泽、延胡之

类。方中鲜生地改用小生地亦可，姜酌减少。

吴。寒热初来，经水适至。四、五日来，足冷不温，热势夜甚无汗，唇颧俱赤，舌苔红浊，脘痛下掣腰脊。此邪机乘虚内袭营络，而中焦之暑湿，郁而不宣。病机转折甚多，故屡淹缠，更有变幻。拟方清营达邪，疏泄中焦，俾得渐次外达，庶免瘥蒙之险。

鲜生地 豆豉打 带叶苏梗 丹皮 杭菊 泽兰叶 山梔 木香 郁金 连皮茯苓 豆卷 金铃子 川朴 茅根

二诊：前与清泄达邪，足能渐温，寒热较轻。惟里郁之邪颇深，未能一律外达，且邪机留于营分，更多周折，刻下寒热往来，头胀且痛，邪气有从少阳而出之势；舌绛苔浊渐燥，唇红而焦，胃中有化燥之象。拟方从少阳阳明疏邪泄热，仿大柴胡汤而小其制。

细柴胡 青蒿 带叶苏梗 凉膈散包 丹皮 鲜生地 豆豉打 鲜佛手

三诊：入夜热甚谵语，齿缝出血，头痛偏左，烦躁恶心，汗便两窒。邪机不从外解，燔灼营分，波涉厥阴。倘再不从气分面解，即有瘥蒙之虑。拟方专从营分疏邪清热。

鲜生地 薄荷打 丹皮 白薇 蒺藜 连翘 细川连 黑山梔 杭菊 淡酒芩 苏叶 竹茹 茅根

四诊：温邪内郁，不得疏达，汗便不通。脉象两关弦数，左手尤甚，头痛偏左，舌绛苔黄，浊蕴于中，风火上炎。唇干齿黑。拟方且与清泄肝胃，观其动静再商。

黑山梔 杭菊 生锦纹 羚羊角 丹皮 薄荷 蒺藜 元明粉打 淡芩 生枳实 竹茹 茅根肉

五诊：汗便虽得未畅，外发之热，因之得减。各恙均平，而里伏之邪，尚未一律外达，还宜从里疏达。

鲜生地 豆豉打 黑山梔 淡酒芩 豆卷 杏仁 苏叶梗 生枳实 蒺藜 元明粉炒 竹二青 茅根

《柳宝诒医案》

方耕霞

石。向病经行腹痛，今寒热来时，经不期而至，至而即停，于见寒热加重，腹痛晕厥，厥痛相连一候，诸药罔效。脉弦而大，舌腻罩灰，痛在脐上腕下，扪之拒按。思湿热伏邪，往往结于太阴膜原之分，阴土为湿所困，地中之清阳不升，肝木因而被遏，气折不能宣畅行血，即为凝滞。肝邪乘胜来贼，脾气益见窒塞，往来之热，痛厥之势，宁有止期乎！此热入血室之变者，议苦燥以开湿热之伏，辛甘以畅肝木之遏，更佐血药以通之，淡渗以降之，使湿热化而瘀滞通，厥痛庶几有所缓解也。

小川连三分 炙山甲 通草各一钱 生姜 上肉桂各三分
淡芩一钱 红花 桃仁 鳖血拌 柴胡各一钱半

二诊：痛势减半，厥势不作，但往为之热犹不已也。舌苔灰黑转甚，血室之凝滞虽松，湿热之上泛方盛。仍昨意佐以苦温泄满。

前方去红花 加川朴八分

三诊：痛平厥止，寒热亦轻，舌灰未化，湿热欲退未退也。迎刃之势也成，且勿懈怠。

前方去山甲 肉桂 加姜半夏一钱半 川桂枝四分

四诊：寒热退尽，灰苔亦化，知饥思谷，邪去胃醒矣。宜化湿和中。

前方去川连 桃仁 加陈皮 谷芽

《倚云轩医案医话集》

邵兰荪

盛陵蒋。热入血室，疹斑稍现，舌黄滑，脘闷，大便泻痢，微热。势在重险，宜清解。防厥。六月廿一号丙午初七日

贯仲二钱 碧玉散三钱，荷包 大豆卷三钱 小青草一钱
原滑石四钱 赤芍四钱 连翘三钱 通草钱半 银花三钱

炒枳壳钱半 省头草钱半 引活水芦根一两

二贴。

又：血舍已清，泻痢较差，脉濡数，舌黄，呛咳，微热不清，胸前发斑白痞。宜清解为主。六月念四号丙午初十日

淡竹叶钱半 银花三钱 省头草钱半 桔梗钱半 京川贝二钱
赤苓四钱 广郁金三钱 大豆卷三钱 碧玉散四钱，荷叶包
小青草一钱 通草钱半

清煎二帖。

又：泻痢已差，身热亦退，脉濡细，脘腹胀闷，咳逆宜治。防变。
七月四号丙午二十日

桔梗钱半 枳壳钱半 新会皮钱半 白前钱半 川贝二钱
赤苓四钱 广郁金三钱 蔻壳钱半 佩兰钱半 通草钱半 谷芽四钱
引荷叶一角

三贴。

史介生评：伏热由阳明而陷入血室，血下则阳热上浮，而神识不清，语言谵妄。张仲景屡有刺期门之训，因期门是肝经之募，泻其热而通其经，则汗得遍身而蓄热外泄，下血自止而谵语自已。此案治法，虽不宗小柴胡汤之例，而悉遵仲景无犯胃气及上二焦之戒，仍以清热利窍，俾郁热外泄而疹斑透现，确是良方。但肝经之热，恐难速解，故防劫液动风而变痉厥，幸其郁热渐由大肠而自寻出路。惟初方既用碧玉散，则滑石可以去之。第三方若再注重清解，庶免久咳之累。

《邵兰荪医案》

王埶

同谱弟李晓圃，以茂才得广文，后随其堂兄裕州牧理幕事。裕州多得其力，后其堂兄以捻匪滋扰罢任，晓圃随后任守城出力，保举五品衔。辛酉回介，与余往来甚契。一日余至其家，适其侄在坐，

似有所求。晓圃代白曰，舍侄因侄孙妇病甚危，已阅十数医矣。愈治愈甚。而此时尚不知何病，拟请大兄一视，果不可为，好备一切。余以至好随入视之，见病者蒙衾侧卧，形如露骨鸡，而面唇甲爪俱白无色。即曰，此血脱象也，得毋产后乎。其母在旁曰，自四月小产后至今不起数月矣。因私计曰，此血大虚之症，用圣愈汤当有效。细视其头面，血络带紫色而棱起，又疑其血分有热，诊之，则六部沉数，左关肝坚欲搏指。乃顿悟曰，此暴怒伤肝，热入血室之候。其人必性情素暴，此病因忿怒而生，此时必两胁胀痛，目赤耳鸣。且土受木克，脾经大虚，脾虚则肺亦伤，当时而喘嗽，时而泄泻，时而发热，时而心惊，虽非癆瘵，相离不远。赶紧施治尚有转机，若再迟延，恐无及也。病者就枕点首，姬婢亦以为然。出而告晓圃，大家皆称快，因以加味逍遥散合左金丸并处之。告曰，虽不全愈，亦当有效，四服后再视也。越五日，遇晓圃於酒市，问之，则病人不愿服药，缘家务不齐，晓圃亦只听之而已。

同谱王丹文，续弦至四而仍病。始以为不礼于姑，郁症也。请阴雨苍茂才治之，用逍遥散或效或否。月余又请李笛仙茂才治之，问其癸水不至者两月矣，始疑为孕，继觉其非，以療治之，用十全大补汤加桂附，初服则可，继服而热增矣。迁延之久，无计可施，专车迎余。诊之脉细数，而肺部尤兼滑象。告曰，此热入血室症也。初因少阳感冒而起，宜小柴胡汤加生地、丹皮等，以凉其血，则病当愈。阴之道遥尚近理，李之桂附，则真阴本虚，又加热药以熬煎之，是油沃火也。此时必喘咳并作，午后发热，发日昏晕，精神倦怠。解外感，则外感已散；清内热，则真金久为销烁，恐无效也。丹文急请一方，乃以东垣拯阴理癆汤进。告曰，服后当有效，然此病总以癸水为主，癸水至则可治，若癸水不至，虽效亦无益也。越两日，丹文来喜曰：服兄药凡两剂，病已减半，再服可乎？余曰：可再服两剂，再看可也。又两日，迎余去，诊之，数象稍变，而虚弱特甚。惟肺部火不退，乃易以人参救肺汤。三服后，丹文又迎余，问其癸水仍不至，乃

辞焉。……午月末，余由定回介，问之，则四月中已歿矣。

《醉花窗医案》

张锡纯

张温卿之夫人，年三十余，住南皮。

病名：热入血室，变子宫炎。

原因：据述前因恒觉少腹切疼，英医谓系子宫炎症，用药数次无效。继乃谓此病如欲除根，须用手术剖割，将生炎之处，其腐烂者去净，然后敷药能愈。病人惧而辞之。后至奉又延日医治疗，用坐药兼内服药，稍愈。至壬戌夏令，病寝寝增剧，时时疼痛，间下脓血。至癸亥正初，延愚诊治。

症候：疼处觉热，以凉手熨之稍愈，上焦亦时觉烦躁。

诊断：脉弦而有力，尺脉尤甚。此系曾受外感，热入血室。医者不知，治以小柴胡汤加石膏。外感虽解，而血室之热未清，下陷子宫，阻塞气化，以致子宫生炎，寢至溃烂，脓血下注。

疗法：用金银花、乳香、没药、甘草以解其毒，天花粉、知母、玄参以清其热，复本小柴胡汤方义，少加柴胡提其下陷之热上出，诸药煎汤，送服三七细末二钱，以化腐生新。

处方：银花三钱 乳香一钱 天花粉三钱 玄参六钱 甘草钱半
没药一钱 肥知母四钱 川柴胡一钱 参三七二钱，研细 药汤送服。

次诊：疼似稍轻，其热仍不少退。因思此症原系外感稽留之热，非石膏不能解也，遂于原方中加生石膏一两，后渐加至二两。

效果：连服三剂，热退强半，疼亦大减。遂去石膏，服数剂，渐将凉药减少，复少加健胃之品，共服药三十剂全愈。

廉按：子宫生炎，患处必红肿热痛，延久则溃烂，亦必兼下脓血。现今专科，多从淫毒症治，外用洗法，内用龙胆泻肝汤，重加土茯苓为主。此案悟到热入血室，血聚成炎，熏灼既久，寢至溃烂流

脓。方用解毒清热，化腐生新，痛虽稍减，而外感稽留之热仍不稍退，必加生石膏一二两，伏热大退，而痛亦大减，益见热入血室之原因，确有特征。

《全国名医验案类编》

何拯华

许寿山君夫人，年三十四岁，住南池。

病名：热伏肝冲。

原因：内因肝郁络瘀，外因立夏后天气暴热，伏热自内而发。

症候：一起即壮热自汗，渴不恶寒，两胁串疼，少腹尤灼，气上冲心，心中痛热，饥不欲食，食即呕酸。

诊断：脉左弦涩，右弦数，舌紫黯，此热伏于冲脉血室之中，而瘀留于肝膜孙络之间也。

疗法：通络化瘀，理冲泄热，仿曹仁伯清宣瘀热汤加减。

处方：真新绛二钱 广郁金三钱，原支磨汁，分冲 冬桑叶二钱
盐水炒丹皮钱半 旋复花二钱 拌左金丸一钱，包煎

先用活水芦笋一两 鲜茅根二两 鲜葱须二分 三味煎汤代水。

次诊：两剂后，气冲、胁疼、自汗、呕酸渐止，而外凉内热，少腹尤灼，神呆少语，或妄见如狂，脉仍如前，舌转紫干，此由伏热与瘀互结，血得热而愈形胶固，热附血而愈觉缠绵。辗转筹思，惟有仿喻西昌进退法，进则前方加光桃仁二钱，醋炒生川军钱半，退则前方加白薇三钱，归须一钱，姑服各一剂，以消息之。

三诊：先服进法一剂，即行大便一次，其色或黄或黑，或溏或结，神识转清，狂妄即止。次日续服退法一剂，神识渐昏，间发狂妄，脐旁冲脉按之动跃而坚，脉舌尚无更变。再将进法原方，加酒炒生川军钱半，鲜生地汁二大瓢（分冲）。

四诊：一剂后，腹中大痛，宿瘀畅行，其色紫黑如酱。大便后，自

汗肢冷，晕厥一次。脉转沉弦而软，舌转淡紫而润，腹灼渐轻，冲动亦底。姑仿三甲复脉意，潜阳育阴之中，加人参以扶正气，珠粉以镇心神。

四方：生鳖甲四钱，打 左牡蛎四钱，生打 细生地三钱
太子参一钱，秋石水炒 生龟甲四钱，打 陈阿胶一钱，烊，冲 生白芍四钱
原麦冬二钱，辰砂染 清炙草八分 茄楠香二分，冲 清童便二瓢，冲
珍珠粉二分，药汤调服

五诊：连投三剂，晕厥即止，冲亦不动。惟少腹灼热，减而不净，两胁似胀非胀，两腰似酸非酸，胃能渐进米汤，脉转弦软微数，舌色渐转嫩红，此血液虽已大亏，而冲脉尚有余热未清也。治以育阴养血为君，略佐活络清冲以调理之。

五方：陈阿胶钱半，烊，冲 白归身一钱 东白薇三钱 真新绛一钱
细生地四钱 生白芍四钱 紫葳花二钱 生橘络七分

先用鲜藕肉四两 小京枣四枚 煎汤代水。

六诊：四剂，忽然宿瘀畅行二三次，少腹两旁发现紫黑细疹，然后积瘀伏热，始得一律肃清。胃已日进稀粥，神气渐振，脉来虚小，舌亦红活，当于养阴之中，兼扶正气以善后。

六方：大生地三钱 生白芍三钱 潞党参二钱，米炒
霍石斛一钱，白毛，先煎 白归身钱半 陈阿胶钱半，烊，冲 北沙参三钱
广橘白络各五分 生藕肉四两 青皮甘蔗四节，切碎

效果：连服八剂，胃健消谷，精神复原而愈。

廉按：瘀热留于肝冲血络之中，则孙络蚕丛，在细微曲折之处，药力不易于疏通，而又不宜于猛剂攻消，只有通络化瘀、理冲泄热之法，缓缓图功。如曹仁伯清宣瘀热汤例，虽为中额，然必仿喻氏进退法，相机而进，渐次递加，而瘀热始能畅解。益见肝络奇经之症，最为淹缠，治法虽合，难奏速效。第四五六三方，亦皆稳健适度。

《全国名医验案类编》

萧琢如

黄氏妇，年三十余岁，住湘乡。

病名：热入血室。

原因：适月事来，因感寒中断，昇数十里至余馆求诊。

症候：往来寒热，少腹及胁下疼痛如被杖，手不可近。

诊断：脉弦数，舌苔白而暗，即伤寒论热入血室，其血必结，故使如疟状也。

疗法：与小柴胡加归、芍、桃仁、红花、荆芥炭，活血通瘀。

处方：川柴胡钱半 青子芩一钱，酒炒 姜半夏钱半 清炙草六分
当归须二钱 赤芍一钱 光桃仁三钱 片红花一钱 荆芥炭一钱
鲜生姜一钱 大红枣两枚

效果：连服两剂，大便下黑粪而瘥。

廉按：叶氏谓热邪陷入血室，与血相结，必少腹满痛，身体亦重，身之则旁气痹，及胸背皆拘束不遂，轻者刺期门，重者小柴胡汤去甘药，加延胡、归尾、桃仁，挟寒加肉桂心，气滞者加香附、陈皮、枳壳等，去邪通络，正合其病。此案对症处方，虽从经方加减，而却与叶法大旨相同。

邓君之妻，年二十四岁，住湘乡。

病名：热入血室。

原因：小产后患伏热，杂治不痊。检阅前方，皆与症反，势已濒危，其夫仓皇乞诊。

症候：身大热多汗，少腹硬痛，痛处手不可近，溲便皆不通利。

诊断：脉弦数，舌色红而苔白，此瘀血停蓄为患也。

疗法：本宜桃仁承气汤，以病久人困，虑其难于胜受，乃变通用四物汤去地黄，加桃仁、红花、肉桂、醋炒大黄，以缓通之。

处方：归尾钱半 赤芍三钱 川芎一钱 光桃仁二钱
片红花一钱 紫瑤桂五分 醋炒生川军钱半

效果：一剂下黑粪甚多，痛减七八，再剂而愈。

廉按：王孟英谓热入血室有三症：如经水适来，因热邪陷入而搏结不行者，此宜破其血结；若经水适断，而邪乘血舍之空虚以袭之者，宜养营以清热；其邪热传营，逼血妄行，致经未当期而至者，宜清热以安营。此案热入血室，由瘀热互结不行，自应活血通络，以破其结。方用四物汤加减，较之桃仁承气，虽为和缓，而桃、红、桂、军等四味，通瘀亦颇着力，宜其投之辄效也。

《全国名医验案类编》

丁泽周

刘妇，年二十岁。

病名：喉痧兼热入血室。

原因：肝络伏热，感染喉痧，适值经行之际。前医以其壮热神糊，早投鲜生地、鲜石斛、芦茅根等，甘寒凉遏，而病转内陷。

症候：初起痧麻虽布，麻色紫暗，发热烦躁，梦语如谵，咽喉肿腐，不能咽饮，继则腹中绞痛，少腹结块，大便溏泄，壮热即衰，痧点即隐，谵语撮空，牙关拘紧，痰多气粗。

诊断：脉空数无神，亦不能视其舌色。余断之曰：此温疫之邪，已陷入三阴，血凝毒滞，残阳欲绝，无药可救。

效果：于是晚而歿。噫！前哲谓早投寒凉，百无一生，过用疏散，尚可挽回，益信然矣。

廉按：此因伏热内发，疫毒外激，遂致血热妄行，而经水适来。此时救济之法，当然以疏达透毒，活血通络为首要，遵内经火郁则发之例，乃反以阴凝清滋之鲜地、鲜斛，逼疫毒内陷三阴，势必血凝毒滞，内闭外脱，酿成必死之逆候，虽有卢扁，亦望而却走矣。此案可为擅用鲜地、鲜斛者炯戒。

《全国名医验案类编》

孔继炎

姻戚甄绪楚，知医者也。乃室病温，里热方盛，经事适至，数日而狂，越日狂甚。医以承气汤泻之，大下积粪垒垒，狂不减。更用导痰散，吐痰数升，仍不减，乃延予。予时客于沂，重山间隔，相距百数十里，四日乃至。比至，其病已半月余矣，狂势稍退，而妄言不休，哭笑无时。予细询其始末病情，人诊其脉，曰：此热入血室也。无伤于命，而不能骤痊，俟经事再行则愈矣。然目下脉来虚大而数，阴气已亏，而邪热犹盛，非清热养阴不可。绪楚曰：前亦疑为此症，自吐下后，曾用小柴胡汤二剂，以病未大减，又其所现之症与方书不尽相符，是以仍归迷途。君何以确知为此症？予曰：以君之言，于发病之次日而经事至。于经尽之次日而狂兆现，不属之此症，复何属？至于病形所著，古书原自不同。有云胸胁下满，如结胸状，谵语者；有云寒热往来，发作有时，如疟者；有云昼日明了，夜则谵语，如见鬼状者。此症胁胀胸满，心下痞硬，下迄脐腹，按之则疼，是血室之邪，随冲脉而上下，已与阳明之经气相搏，则如结胸状一症备之矣。多言不休，或道亡人，疑神疑鬼，忽哭忽笑，是血室之邪，随包络而上攻，正与心主之神明相持，则谵语如见鬼状二症备之矣。忽而身热，忽而身凉，虽无缩作之形，已有寒热之迹，亦血室之邪，内轶于厥阴，外现于少阳，则如疟一症，又备之矣。具一症者，古人已知为血室之症，今诸症具备，而又有凿然不诬之病因，容可舍血室而别寻歧径乎？夫其异于古所云者，古人止言谵语见鬼，而此症妄言骂詈，甚至于手口伤人。古人明云昼轻夜重，而此则轻重无时，甚或昼甚于夜。以此为疑，不为未见。不知此症未病之先，本有积怒，肝经之气横矣。已病之后，火未大清，阳明之热盛矣。两者俱属阳邪，而与血室之热错杂并见，是以谵妄，进而为狂，白日或重于夜，是其所以不同者，兼此二症之故，非血室之病未确也。今但养阴清热，则肝气可以渐平，阳明不至燔灼矣。惟血室之病，深在胞宫，复壁重垣，攻

之不易，非借经水涤荡，几于无路可出，此古人之所以又有勿犯胃气及上二焦之说。盖必经事再行，热乃随势以去也。不俟经期，而望其旦夕之就愈也，难矣。曰：症诚如是，亦有显然可据之脉乎？予曰：以予所见，有脉来弦细而涩者，是经未尽而热入，热与血搏，合同为病者也。有脉浮盛而数者，是血已尽而热入，乘虚四扰，热独为病者也。此症之脉虚大而数，已形阴虚之候，不见血结之诊，正是经已尽而始入者，要之循名核实，仍当以症为断。古人于此未尝明著何脉，不宜臆妄决也。曰：现在心下硬痛，牵及右股，按之而痛愈甚，其势如抽，何也？予曰：血室者，冲脉之汇。冲与阳明，合于胸前。而阳明之脉，下乳挟脐，过气街，行股前廉者也。血室之热充溢于冲，入于阳明，大经小络，无非热邪弥漫。按其上，而下之鼓胀愈急，一脉之引，呼吸相通故也。绪楚唯唯。予乃以小柴胡汤，合清热养阴之品治之，数日热势大退，饮食渐进，谵妄之形全无，惟语言尚多而已。

方在调理时，其女亦病，无何，而其婢又病。其女为孙毓三子妇，以母病归侍汤药，未免过劳，一病遂剧。诊其脉沉细短数，而身热头痛，口燥咽干，兼以烦满。予曰：此病极似两感，其实发于少阴，古人所谓伏气也。当以少阴立治，导以热邪，从小便泻去，升散解表之药，一毫不可用。若用之，则热邪随药上升，非肿结于咽喉，即血溢于口鼻，甚则气逆喘促，呼吸存亡，危在旦夕矣。转观其婢，脉症悉与主同，遂皆用清热利小便之品，甫一剂，而经事皆至。绪楚大烦曰：现在一热入血室症，辗转二十余日，尚未全瘳，倘此二症复然，一家鼎沸矣。奈何？予曰：急治勿需时，比经尽，热亦可平，料亦不至转入血室矣。且血室即有微热，而无他经之热合势交蒸，为害亦不重。惟症发少阴，势非一汗所能解，此处未免费手耳。乃重剂急服，婢先愈，主次之，二病皆全。而前症犹未尽解，直至经行，病乃霍然。

贺季衡

丁女。温邪一候，热逼营分，经事先期，壮热烦扰，无汗气粗，谵妄作恶，舌苔砂黄，尖边干绛，脉小数不应指，两寸不了了。有化燥及厥闭之虑，亟为清营达邪。

鲜生地一两 柴胡梢一钱 香白薇四钱 川郁金二钱 青蒿二钱
黑山栀三钱 粉丹皮三钱 佩兰二钱 益元散五钱，包
炒竹茹一钱五分 鲜藕二两，切

二诊：昨用清营达邪，神识更迷昧不楚，谵妄喃喃，少腹仍拒按，五心烦扰呕恶，舌质红绛，苔黄根灰，两脉虽数，而久取至数俱不了了。可见瘀滞结于下焦，邪热陷入营分，渐传心包，势将生风，而成痉厥。姑以犀角地黄法挽之。

乌犀角八分，先煎 香白薇四钱 川郁金二钱 粉丹皮三钱
鲜生地一两，切 大杏仁三钱 京赤芍二钱 连翘心三钱
炒竹茹一钱五分 鲜藕二两，切

另：至宝丹一粒，化服。

三诊：昨进犀角地黄汤法，泄其营分之邪热，兼进至宝丹，通其神明，今晨神志就清，语言明了，午后又复神迷，舌本强硬，舌心更干，舌根灰黄如故，惟舌苔前半之黄色已脱，脉之至数渐清，而尺尚欠明了。种种见象，乃营分之邪热尚未达出，渐从热化，而神志为蒙也。当守原方更进。

乌犀角八分 粉丹皮三钱 鲜生地一两 鲜石斛四钱，并
云神四钱 生栀子三钱 童木通一钱五分 香白薇四钱 川郁金二钱
连翘心三钱，兼煎 炒竹茹一钱五分 活水芦根二两

四诊：今日大便通行两次，小水亦行，神明又复清了，惟尚乍明乍昧，右脉至数已清，左部反不若昨之明了，舌质更绛，幸舌心干槁已减，营分之邪热尚在初化，虑直犯心包。宜守原方为治。

鲜生地一两 上川连八分 南花粉四钱 生栀子三钱

净连翘三钱 全瓜蒌六钱 乌犀尖八分 玄参心四钱 香白薇四钱
鲜石斛四钱 细木通一钱五分 活水芦根二两

五诊：今日神识仍属或明或昧，谵妄喃喃，傍晚形寒肢冷，旋即微热，迭经数日，舌灰黄前半已退，舌质仍绛赤少津，左脉仍不了了。邪热留伏二阳，传入营分，刻下似欲由二阳而达，否则逆入心包。姑先清营达邪，顺其性而利导之可也。

鲜生地一两，水炮切 香白薇四钱、朱染 云神四钱 瓜蒌皮四钱
黄郁金二钱 香豉豆四钱，水炮同生地合拌 黑梔子三钱 粉丹皮三钱
净连翘三钱、朱染 大杏仁三钱 甜川贝二钱 生竹茹一钱五分
活水芦根二两

六诊：昨进清营达邪、化痰泄热，今日傍晚热退再起，且曾恶寒，幸未几即解；大腑虽略通，但腕不及少腹仍胀满；咳呛有痰，声嘶渐响，神识仍不清，舌复起苔，腻黄且垢。良由邪从少阳外达不果，中上二焦又为痰浊所搏。转以开泄太阴、清化痰热，以冀邪透热解、痰浊下趋。

生石膏八钱 杏仁三钱 桂枝八分 白薇四钱 射干三钱
瓜蒌皮四钱 川贝一钱五分 炒竹茹一钱五分 梨皮四钱 鲜姜衣三分
另：保赤散两服。

七诊：昨于开泄、清化中兼用保赤散两服，药后大便即通燥粪，但少腹更觉拒按；神志较前略清，两脉幸已了了，舌苔黄燥，舌红尖赤，咳嗽多痰，甚则气促如喘，恶寒已罢，身热犹在。可见入营之邪初有外解之机，肺气失降，痰热内踞，腑气仍实。延有虚者愈虚，实者益实之虞。法众脏腑并治，顾阴于未竭之时，以宣白承气汤加味。

生石膏一两 生大黄三钱 杏仁三钱 瓜蒌皮四钱 知母三钱
川贝母三钱 生竹茹二钱 射干三钱 鲜石斛五钱 麦冬三钱
活水芦根二两

八诊：投宣白承气汤加味，药后腑气畅通两次，身热步减，咳痰气促渐少，神志亦渐清，惟少腹犹拒按，两脉数，舌上黄燥之苔已向

后退，且略有津润，尖仍红赤。痹阻于上中二焦之痰热初具降化之机，腑踞宿积尚未尽去，津阴耗伤未复。再以原方减其制。

原方生大黄改为制大黄二钱，生石膏改八钱，去射干、竹茹、加海蛤粉四钱、白薇四钱。

九诊：药后腑气又通燥粪一段，少腹拒按渐轻，热已减，痰出色黄，舌上黄浊之苔日化，舌质红绛，津犹未尽复。转用五汁饮为法，以泄热存阴。

梨汁 藕汁 勃荠汁 鲜生地 芦根

先将芦根、生地杵汁，和入前三汁内，再将芦根生渣煎汤，频频与之。

刘女。热入血室，将及一月，表热虽退，汗虽畅，白痞虽透，大腑虽迭通，而病情仍有进无退；耳聋神迷，入夜谵妄，渴不多次，少腹痞满拒按，脉滑数无伦，舌苔黄垢满布，邪热为痰浊蒙蔽于窍络，积瘀结滞又交薄于中，欲化燥而不得，势有内陷之虑。

生军五钱，后入 桃仁泥三钱 制半夏一钱五分 江枳实一钱五分
鲜生地一两切 川郁金二钱 生楂肉四钱，玄明粉三钱化水炒
上川朴一钱 香白薇三钱 云神四钱 竹沥一两，冲 姜汁三滴，冲

二诊：昨进桃仁承气汤加竹沥、半夏，开化机窍之痰，得下两次，杂有血质，神识虽渐清，谵妄未已，少腹仍有拒按意，脉之滑数已减，舌苔转黄而松，根端尚腻。可见肠胃余蕴未清，中宫痰浊尚未尽化。当此际也，不宜接下。姑为化痰泄热，以导余积。

鲜生地一两，切 法半夏二钱 江枳实一钱五分，炒 川贝母二钱
全瓜蒌六钱 云神四钱 生楂肉三钱，玄明粉三钱化水炒 粉丹皮二钱
香白薇三钱 川郁金二钱 竹沥一两，冲 姜汁两滴，冲

三诊：先进桃仁承气汤，加入开化痰浊之品，得下污秽两次，杂有血质，脐上痞硬已退，脐下仍胀满拒按，幸烦扰谵妄就解，神志就清，耳听亦较聪，惟右脉复数，舌苔灰黄。下焦瘀浊甫去其半，中焦邪热为痰纠结也。当再荡涤其余蕴

生军四钱，后入 姜川连五钱 全瓜蒌六钱 法半夏二钱
江枳实二钱，炒 川郁金二钱 生楂肉三钱，玄明粉三钱化水炒
大杏仁三钱 粉丹皮二钱 赤苓四钱 炒竹茹一钱五分 藕切片二两

四诊：昨又复予攻下，得下两次，色赤质腻，仍不多，胸腹虽已平软，而少腹仍痞满，舌苔更形腐浊且厚，间有谵语，耳听幸渐聪，脉之数象亦折，不时自汗。可见病久正伤，而下焦之积蕴，方腐化未泄，将来最防虚不可补，实不可攻之害。趁此时机，仍以承气下夺为要务。

生军五钱，后入 姜半夏一钱五分 上川朴一钱 赤苓四钱
炒枳实三钱 大杏仁三钱 炒楂肉四钱 小青皮一钱 全瓜蒌六钱
玄明粉四钱，再后入

五诊：昨又接进大承气汤加味，虽又得利五次，溏结交杂，顾仍不多，脐下及少腹仍胀满，按之痛，惟耳听渐聪，谵妄已少，自汗已止，舌苔复腻，左脉尚数。中焦痰浊、下焦瘀滞，俱有化机。当为清通导化，仿古人隔二隔三法可也。

生军五钱 全瓜蒌六钱 炒枳实一钱五分 云苓三钱
炒楂肉四钱 制半夏一钱五分 小青皮一钱 大杏仁三钱
正滑石五钱 炒竹茹一钱五分 大荸荠四个 陈海蜃一两，洗淡

六诊：昨为清通导化，仿承气小其剂，得下两次，秽浊倍多于前次，且杂血块一枚，少腹痞硬及拒按俱退，谵妄亦更少，耳听亦渐聪，独脘膈尚仄闷，按之痛，不思纳谷，切脉右关尚数。下焦瘀浊虽去，中焦痰浊未清，胃气未和之候。当缓其攻，先为宣中化浊，启发胃气。

全瓜蒌六钱，姜汁炒 法半夏一钱五分 川郁金二钱
施覆花一钱五分，包 江枳实一钱五分，炒 云苓三钱 炒楂肉四钱
小青皮一钱 炒谷芽四钱 大荸荠四个，拌 陈海蜃一两，洗淡
炒竹茹一钱五分

七诊：从进桃仁承气汤，得下污秽血块后，少腹痞满拒按已退，

耳听已聪，谵妄已止，惟脘膈之下尚痞板，腿足痛，胃纳未增，舌苔灰黄而浮腐不实，舌前转白，左脉尚数。足见下焦瘀浊已去，中焦痰浊未清，胃不得和耳。当化浊宣中。

鲜薤白四钱 全瓜蒌六钱 旋覆花一钱五分，包 川郁金二钱
云苓三钱 新会皮一钱 法半夏一钱五分 炒枳实一钱五分
大杏仁三钱 炒谷芽四钱 炒竹茹一钱五分 大荸荠四个，杵
陈海蜃一两，洗淡

八诊：经化浊宣中，阳明腑实及痰热内蒙之象俱退，独脘膈未舒，舌苔腐浊未脱。守昨意接进。

原方去谷芽，加甜川贝一钱五分。

九诊：胃纳稍增，臀部赤肿作痛，舌苔仍腐白垢厚。中焦瘀滞尚水廓然。原方更增和血通络。

原方去川贝、竹茹、郁金，加赤芍二钱、大贝三钱、橘络一钱、丹皮一钱五分。

十诊：热入血室月余，诸多枝节已解，独脘中仍痞满，拒按作痛，胃纳未开，舌苔灰黄，厚腻满布，下体痛，不能转动，脉之滑大已安。可见血分之邪热已有下夺耐骈之，惟中焦之痰滞牢结未化，胃气不得和降耳。再以苦辛通降为事。

上川朴一钱 上川连五分 全瓜蒌六钱 大杏仁三钱
薄橘红一钱 云苓三钱 炒枳实二钱 姜半夏一钱五分 炒谷芽四钱
炒竹茹一钱五分 脾约麻仁丸八钱，布包杵入煎

十一诊：舌上灰白苔大化，后半仍垢浊不宜，大腑欲通未遂，杳不思食。守昨方进步。

原方去川连、谷芽，加莱菔子三钱、川郁金二钱。

十二诊：今日复行干粪两节，通而不畅，仍有坠胀欲便之状，痰咯颇多，仍未思食，脉沉分复数，舌苔仍灰白，腐垢满布。余蕴似尚不少，仍以宣中导下为事。

莱菔子三钱，炒 上川朴一钱 炒枳实一钱五分 全瓜蒌六钱

鲜薤白四钱 炒谷芽四钱 薄橘红一钱 海南子三钱 姜半夏二钱
大杏仁三钱 云苓三钱 荸荠汁一两，澄粉冲 姜汁三滴，冲

另：更衣丸二两，开水送吞。

十三诊：黎明大腑又复行两次，纯属燥粪，且不少，脘中胀满拒按俱退，渐知索食知饥矣；舌苔前半亦渐脱，后端尚灰腻，脉之数象大平。据此见象，中宫痰浊尚未尽去，不过不宜再行攻下。当和中化浊，保其胃气，将来能自由腑通最妙。

旋覆花一钱五分，包 法半夏一钱五分 新会皮一钱 炒枳实二钱
冬瓜仁四钱 全瓜蒌六钱 川贝母一钱五分 炒谷芽四钱
云苓三钱 大杏仁三钱 荸荠四个杵 陈海蜃八钱，洗决

十四诊：大腑迭通之后，胃纳增而复减，痰多涎沫，口舌觉燥，而又不渴，舌苔后端仍灰垢高突，脉之数象已平，惟滑如故。可见阳明痰浊仍未尽去，胃气不和。当再化浊宣中，以和中胃。

鲜薤白四钱 全瓜蒌六钱 莱菔子三钱，炒 姜半夏一钱五分
大杏仁三钱 云苓三钱 省头草二钱 新会皮一钱 藿香一钱五分
炒谷芽四钱 炒枳实二钱 佛手八分

十五诊：药后又复吐痰，午后能知饥索食，舌苔前半腐白而薄，后端灰腻高突。中焦痰浊余湿初化，原方更入辛通之属。

原方去全瓜蒌、鲜薤白、杏仁、佛手，加厚朴花一钱、保和丸六钱（包）、姜一片。

十六诊：改进辛温开化，脘畅神清，得吐痰浊不少，舌苔灰浊腐白。原方出入。

上川朴八分 姜半夏一钱五分 焦谷芽四钱 新会皮一钱
省头草二钱 莱菔子三钱，炒 白蔻五全，炒 云苓三钱 炒苡仁五钱
炒枳实二钱 佛手七分

十七诊：痰吐颇多，舌苔灰白垢腻日薄，肠腑积蕴化而未尽。宗昨法增通腑之品。

上川朴一钱 陈橘皮一钱 大杏仁三钱 姜半夏一钱五分

炒枳实二钱 全瓜蒌五钱 干薤白四钱 云苓三钱 泽泻二钱
炒谷芽四钱 脾约麻丸五钱，并包入煎

十八诊：舌之前半白苔已化，后端尚灰黄，腑未复通，时时欲便。再以润通为主。

油当归二钱 全瓜蒌六钱 泽泻二钱 姜半夏一钱五分
炒枳实一钱五分 炒谷芽四钱 京赤芍二钱 大麻仁四钱
粉丹皮一钱五分 云苓三钱 炒竹茹一钱五分 更衣丸三钱，另吞

十九诊：经治来，各恙俱退，腑气迭通，舌苔灰黄已化，后端之灰垢亦步化，独胃尚未复，间或烦满呕恶，下部肿处略可重按，脉尚数。胃中痰浊未尽，运行未力也。

旋覆花一钱五分，包 云苓三钱 法半夏一钱五分 炒苡仁五钱
陈橘皮一钱 陈橘络八分 京赤芍二钱 泽泻二钱 淮牛膝二钱
大贝母三钱 炒谷芽四钱 姜竹茹一钱五分

《贺季衡医案》

张山雷

某右。二月底起寒热时病，愈后体虚未复，至四月底姙事如期而至，逮三天未净，寒热作于申酉，热时忽笑忽哭，热退即止，前医重用痰药，然素体柔脆，肤如凝脂，骨格瘦小，寒药太过，中宫不舒，遂尔停药。嗣后寒热自解，但每觉胸中气窒，即两目上视，沉沉睡去而呓语喃喃，常与家眷亡人畅谈不休，似所见无非鬼物，不问昼夜，时且如是。呼之亦不易醒，醒则神志了然，半月以后发作渐密，饮食无多，二便如常而不多，近又姙事按期而临，先有腹痛微微，小腹月真胀，姙见先有紫色，继则如恒，今已第四日，渐以无多而胀痛已安，惟迨日呓语中恒述画外不及见之人物，无不与目击者一一吻合，已到丧魂景象。今日其翁来校延诊，适就诊者络绎不绝，坐守两小时同去诊视。适在清醒之时，安坐内室，神清了了，但察其神气兴会全无，言语低小，酷似阴证，面色虽不萎败而凝脂白洁，太乏华

采，又似阴精消亡之象。按脉左寸关不见，左关中按弦大有力，但不甚数，尺后隐隐垂长，是心肝两脏之气遏郁不宣，庶乎魂神不安。惟忽笑忽哭起于汛后，恐是热入血室。兹当姙期，议潜镇化痰安神，少添导瘀。

焦姜皮 6 克 炒枣仁 12 克 辰茯神 9 克 干菖蒲根 4.5 克
生远志 6 克 真天竺黄 4.5 克 大贝母 9 克 黄郁金 4.5 克
橘红 2.4 克 五灵脂 1.2 克 桃仁泥 1.2 克 生牡蛎 12 克
灵磁石 9 克 玳瑁片 9 克 青龙齿 9 克 紫贝齿 15 克，五味先煎汤代水

《张山雷专辑》

范文甫

某右。温热，月事适至而阻。

生大黄 9 克 元明粉 9 克 桂枝 4.5 克 桃仁 15 克
炙甘草 4.5 克 生白芍 6 克 柴胡 6 克

《范文甫专辑》

魏长春

徐文宁之妻，年二十四岁。民国十八年三月二十三日。

病名：风温热入血室。

原因：经来一日，适感风温，热邪陷入血室，经行停滞。

证候：潮热颧赤，胁痛呕逆，咳痰白稠，少腹疼痛，体温一百度，神昏谵语，溲短便滞。

诊断：脉象滑数，舌苔黄白腻。脉证合参，病属风温肺炎，热邪陷入血室。

疗法：王孟英曰：经水适来，因热邪陷入，而搏结不行。此宜破其血结，今宗其法，兼以清热化痰开闭。

处方：旋复花三钱包煎 鲜石菖蒲二钱 赤芍三钱 桃仁三钱
鲜生地八钱 紫雪丹五分灌 全瓜蒌五钱 淡竹沥一两冲

苦杏仁三钱 淡豆豉三钱 焦山栀三钱

次诊：三月廿六日。伏温外达，身热颇炽，神识已清，咳嗽咯痰白粘，体温一百零二度。呕逆渴减少腹痛止。脉滑数，舌红润苔白滑。用清肺化痰，兼以凉营法。

次方：桑叶三钱 枇杷叶五片去毛 玄参八钱 原麦冬三钱
鲜生地八钱 生石膏一两 苦杏仁五钱 火麻仁五钱 炙甘草一钱
全瓜蒌五钱 炙鳖甲八钱

万氏牛黄清心丸一粒去壳研吞

效果：服药后，热退胃苏，服淡竹沥数日，痰化病愈。

炳按：先病热证，适值经来，热陷血室，经忽停止，尽日明了，入暮神昏谵语，为热入血室。治宜开窍通瘀，清热透邪为要，如本证是也。

《慈溪魏氏验案类编初集》

周镇

张某室，小张巷。已未三月下旬诊：热已月余，下午方作，口渴舌灼，瘦黄。脉濡数，舌红尖剥。述知热时鼻灼如烟囱，邪蕴天寒束缚，病者以为劳也。初与桑叶、丹皮、黑山栀、冬瓜子、石斛、银花、知母、黄芩、桑皮、青蒿、郁金、银柴胡、茅芦根，以清客邪。复诊：审知月前身初热，适值经行少而腹痛渐作，是邪热陷入血室。另以生地黄、五灵脂、玄胡、青皮、研细服，腹痛更甚。三服后，经行如墨，兼有瘀块甚多，经行至翌日，身热陡止，而腹痛未已。以四物金铃子散加香附、苏梗、瓦楞子、没药、泽兰、丹皮、青皮，以清营瘀而理气滞，经畅而诸症均退。

戴右，住惠山，年廿余岁。丁丑四月中旬诊：素有痛经，停经三月。兹则感受湿邪，下午身热已二旬，热入血室，经事行而不畅，右腹作痛。脉滑，苔指腻白。湿浊挟瘀，防成积聚。豆卷、川朴、草果、连皮苓、檳肉赤沙糖炒炭、青皮、莪术、荔枝核、乳香、没药、青蒿、赤

芍、失笑散、瓜瓣、皂荚子醋炒，玄胡、乌药，研末，开水调服。二剂。得便宿垢，其痛减半，经亦畅行，惟少腹尚胀，原方增损，续服愈。

管文奎妻，年廿余岁，住城内横街。壬戌八月诊：素性沉郁，与姑勃溪，伏暑外且多气郁，适值经来如无，寒热旬余，热甚气闷。名医严君投白虎加减，转热势不扬，香沉，脉沉细不起，苔白微黄。某医投开气湿及玉枢丹，未应。此伏暑兼气郁，热入血室，故脘腹窒闷也。宜清伏邪，泄肝郁，行气滞，通血瘀。青蒿三钱 黑山栀二钱 丹皮二钱 金铃子三钱 玄胡三钱 郁金三钱 射干八分 香附二钱 苏梗二钱 丹参三钱 五灵脂三钱 益元散三钱 荷叶包。另血珀五分 伽楠香一分 藏红花二分 龙涎香五厘 鸡内金一具炙，研末冲服。复诊：服二剂，转为疟疾，是厥阴之症由少阳外达也。前方去蒿、栀、苏、射，加软柴胡六分 黄芩钱半 旋复花三钱 蓬莪术三钱。并嘱觅善针者刺期门穴。服二剂，疟止，诸恙若失。

孙氏女，青山湾，乙卯四月寒热夜甚，神识不清，谵语恚怒。脉数而滞，舌红苔黄。询知少腹作痛，适值经行甚少。温邪内蕴，有热入血室之征。疏方豆卷、青蒿、荆芥、苏梗、泽兰、丹参、木通、山栀、泽泻、大腹皮、益母、楂炭、郁金。复诊：热仍暮炽，经行仍少，神情依然，夜则谵语，苔黄口苦。加干漆炒川连、玄胡。另用血珀、辰砂、郁金，研末，热昏时冲服。热轻神清后，虽略有起伏，不浹旬而安。此方川连用干漆炒，张路玉常用之。雷少逸云：“热入血室，其左脉必盛。”按如右脉盛，涎潮喘急昏糊，有先化其痰、后治其血结者；与经适断而邪乃乘虚，以及热邪传营迫血妄行，致经未当期而至者，二证治法迥异。

《周小农医案》

刘民叔

上海大木桥人七十三岁老处女姓陈，现住本市常熟区襄阳南路三百八十三街九十三号。其螟蛉子锦鑫之妻金爱丽，于一九五—

年八月二十八日入广慈医院三等病房三十三床，住院证第一六五零号。在下午十一时三十分产一男孩，由潘恩年医师接生，发给出生报告单一纸，“胎次：第一胎。生产情形：顺产。产前检查：有四次。婴儿状况：很好。产母状况：产后精神状态异常。”据锦鑫及其母妹云：产后第三日下红白痢，第六日治愈，但寒热未清，第七日院方说须再住一天，急往探视，第八日晨九时出院。自加家后，日益严重。初，在发病前一月间，曾发红疹白痞；败血淋漓，迄今不净。（鼎按：产褥热？）经同街十九号陆洪海介绍，求师诊治。陆固两次病狂，皆为夫子治愈者。

初诊 一九五一年十月三日 小便癃闭不通，少腹隆起，神志错乱，独语如见鬼状不得眠。脉数。舌赤。裤有血迹。方用：云母石一两 生石膏一两 生地黄一两 龙胆草一钱 紫草一钱 桃仁二钱 水蛭二钱 虻虫一钱 大黄一钱 蜈蚣一钱 鼠妇二钱 蟋蟀三钱

二诊 四日 癃闭通，少腹平，独语不息，日夜不眠。方用：云母石一两 生石膏一两 生地黄一两 蟋蟀三钱 桃仁二钱 水蛭二钱 虻虫一钱 大黄一钱 蜈蚣一钱 鼠妇三钱 蚯蚓四钱

三诊 五日 神识渐清，二便畅行。方用：代赭石一钱 生石膏一两 生地黄一两 丹参三钱 桃仁二钱 水蛭二钱 虻虫一钱 大黄一钱 鼠妇三钱 蚯蚓四钱

四诊 七日 渐能睡眠。方用：代赭石一两 生石膏一两 生地黄一两 郁金三钱 桃仁二钱 水蛭二钱 虻虫一钱 大黄一钱 鼠妇三钱 白芍药三钱

五诊 十日 方用：代赭石一两 云母石一两 生石膏一两 生地黄一两 桃仁二钱 水蛭一钱 虻虫一钱 鼠妇一钱 大黄五分

六诊 十三日 方用：代赭石一两 云母石一两 生地黄一两 桃仁二钱 水蛭一钱 虻虫一钱 菊花五钱 龙胆草六分 生大黄五分

七诊 十七日 眠食皆安，但有时尚胡言乱语，作狂家举动耳。方用：代赭石一两 云母石一两 生地黄一两 桃仁二钱 僵蚕三钱 水蛭一钱 虻虫一钱 菊花五钱 龙胆草六分

八诊：二十二日 语言清，狂象平。方用：代赭石一两 云母石一两 生地黄一两 菊花五钱 水蛭一钱 虻虫一钱 甘草一钱 阿胶二钱 南沙参三钱

九诊 二十八日 方用：云母石一两 生地黄一两 南沙参一两 菊花五钱 水蛭一钱 虻虫一钱 甘草一钱 阿胶二钱 红枣五枚

十诊 十一月四日 方用：云母石一两 生地黄一两 南沙参一两 菊花五钱 阿胶二钱 甘草一钱 红枣、荔枝、桂圆各五枚

《鲁楼医案》

施今墨

李某某，女，32岁。病历四日，发热、头痛、项强，经水适至，呕吐不食，心烦不能眠，甚则谵语妄言，口干，大便已四日未解。舌苔外白中黄，脉浮紧。

辨证立法：暴感外邪，适遇经至，热入血室。即应调和气血，兼以通便。

处方：赤白芍各6克 川桂枝3克 银柴胡4.5克 川独活4.5克 酒黄芩6克 酒黄连3克 紫丹参6克 酒川芎4.5克 粉丹皮6克 姜竹茹10克 炒陈皮6克 香豆豉炒，12克 蔓荆子6克 法半夏6克 晚蚕砂10克，炒皂角子10克同布包 砂仁壳4.5克 白苇根12克 炙甘草3克 豆蔻壳4.5克 白茅根12克

二诊：服前方二剂，发热渐退，头痛减轻，颈项不强，仍感不适，呕吐止，大便已通，但干燥。

处方：赤芍药 6 克 炒柴胡 4.5 克 蔓荆子 6 克 杭白芍 10 克
川独活 4.5 克 酒川芎 4.5 克 牡丹皮 6 克 酒归尾 6 克
鲜茅根 10 克 细丹参 6 克 鲜生地 10 克 苦桔梗 4.5 克
炒香豉 10 克 莱菔缨 6 克 炒山栀 6 克 莱菔子 6 克 炙甘草 3 克
《施今墨临床经验集》

寒入血室

方南薰

一妇人阴寒凝结，腹大如箕，饮食动静悉如平素，举家以为有孕。余以验胎散服之，寂然不动。六脉沉迟，知为寒入血室之证，初用附片一两 炮姜五钱 吴茱萸三钱 白蔻一钱 砂仁二钱 半夏一钱 枳实四钱 厚朴二钱 肉桂一钱，二剂而腹减半。次用附片一两 干姜三钱 胡巴四钱 白蔻一钱 砂仁二钱 半夏二钱 川椒二钱 小茴五钱，又二剂而腹全消。此方治膀胱气痛，肾子肿大，加吴茱萸、川楝肉、桔核仁、荔枝核烧，存性，捣碎，亦效。

《尚友堂医案》

朱增禧

吾戚戴君葵亭之妻欧阳氏，辛卯七月初十日抱病，十五日延余治。诊之，脉细紧数，舌苔白厚。其证初起寒颤头晕，左手足厥冷彻骨过肘膝，手指挛急，腰腹痛甚，口渴饮热，目中见鬼，食不进。经余入门入戴生芸亭调治，用麻黄附子细辛汤，寒颤平。继用人参当归建中汤加杜仲补骨脂，俟余议定与服。余曰：“此邪中三阴，经脏同病。腹痛属太阴，腰痛厥冷彻骨属少阴，厥冷而兼消渴属厥阴。立方当统三阴而治，所主方中宜重加姜附。”服二剂，忽云热自膝腠骨中溜至足跟。余曰：“阴病难于回阳，阳回决愈，宜更增姜附与服。”第不解暑热之时，而有此寒中三阴脱阳见鬼之证。审问间，葵亭嫂氏出

而告曰：“理埋月初，当行经时贪凉，夜静更深席地而卧，寒或由此受。昨宵经复行，未知前药可再服下？”余曰：“可。”乃思《伤寒论》妇人伤寒发热、经水适来，昼日明了，暮则谵语，如见鬼状者，为热入血室。兹邪中三阴，寒凝血室，亦且中见鬼，虽《论》无明文，可比例而得，与脱阳白昼见鬼之论有别。遂用姜附参术桂枝归草温经之剂猛进。寒凝之血得暖续下，鬼物消而诸证除。余归，后芸以参茸术附峻补气血以复其体。

《瘦证治例》

翟竹亭

北朱寨朱姓农妇，年三十六。八月行经，在田适遇大雨，寒甚，经水遂止，腹疼，寒热往来，迎余治之。诊得六脉沉紧，丹溪先生云：“血得温暖则流通，寒冷则凝滞”。遂用四物汤加減，二帖稍效，四帖经水复行矣。

四物汤加法

当归 45 克 京白芍 30 克 川芎 15 克 熟地 24 克 炮姜 18 克
油桂 10 克 红糖 30 克、用药冲服。

《湖岳村叟医案》

脏躁

程文囿

长林胡某，延诊妇病，据述证经半载，外无寒热，饭食月事如常，惟时时悲泣，劝之不止，询其何故，伊不自知。延医多人，有云抑郁用逍遥散者，有云痰火用温胆汤者，药俱不效。又疑邪祟，禳祷无灵，咸称怪证，愿为诊治。视毕出语某曰：“易治耳。”立方药用甘草、小麦、大枣。某问病名及用药方法，予曰：“病名脏躁，方乃甘麦大枣汤，详载《金匱玉函》中，未见是书，不识病名，焉知治法，宜乎目为

怪证也。”某曰：“适承指教，足见高明，但拙荆病久，诸治无功，尊方药只三味，且皆平淡，未卜果能去疾否？”予曰：此仲圣祖方。神化莫测，必效无疑。”服之果验。

《杏轩医案》

张千里

西窑头陈妇，经来色黑久矣，渐致届期少腹必痛胀，似崩似淋，而成紫黑，且有块，兼之去年至今，便血半年，血分郁热之深可见，血燥则脏燥，故悲喜无端，似有鬼神，凡妇科血燥而郁热，则心营之有虚火不待言矣。心主易震，则肝胆相火安得不动，火焰于上则肺受克，而津气易酿痰浊，痰与瘀血为心火所引，则渐入乎厥阴包络，故现症有如此之变幻庞杂也。病之源流标本如此，从此用意，自有治法，总而言之，此脏燥夹痰症也。

鲜生地三钱 白薇一钱五分 五灵脂二钱 川百合二钱
淮小麦二钱 紫草一钱 黑芝麻二钱 羚羊角一钱五分 炙甘草四分
驴皮胶二钱 天竺黄二钱

又 进治脏燥血郁方半月余，诸症皆退，体中颇适，近因经候之期，先觉便难，继以内热，经来仍然紫黑，自觉诸症皆动，而忽悲忽笑，不能自主。此其故，总由血分尚有郁热，深伏于冲任血室之间，届期血动则郁亦动，心主血主火，君火动则五志之火一时焰发，现症种种，几乎无脏不动也，乘其血运之时，因势而内夺之，必得郁火清，则狂澜不沸，心君泰然矣。

犀角尖七分 丹皮一钱五分 酒制大黄三钱 紫草一钱
鲜生地三钱 白芍一钱五分 桃仁泥一钱五分

姚光祖按：案语老练，方亦简洁。

又 脏燥渐减，秋冬之交，竟有三月不大发，然稍劳怒则觉火升鼻干，心神不能自主，而带重腰酸，左足易热，经来参差，腹痛气坠，色仍紫黑，此人脉郁火尚未清化，宜用静剂，专清奇经。

鲜生地三钱 归身一钱五分 白芍一钱五分 驴皮胶二钱
丹皮一钱五分 川贝母二钱 蒲黄三分 五灵脂二钱 白薇一钱五分
西洋参二钱

姚光祖按：此证与《金匱》之脏燥似是而非，此乃血结成燥，彼乃血虚脏燥，故用药亦不同。

《千里医案》

朱增藉

房兄鹤堂为妻氏病，延余治。余往其家，忽闻哭声彻户外，询之。云：“乃媳某氏病经年余，符箓药餌设法待尽不应，每月数发。发则急躁异常，躁极则哭，数时乃止如平人。现较前更甚，旬日数发。”余曰：“此药病也。系脏躁证，以甘麦大枣汤与之。”顾谓余曰：“此方去岁王某已用之矣，服计小麦斗许不应。”余曰：“若是再想方。”次早诊毕，细询家人哭时有泪否？曰：“泪潏潏下。”乃思甘麦大枣汤治脏躁实证，而脏躁岂无虚证乎？年余泪下，必伤肺液，液愈伤则躁愈甚，是以较前更剧。即以保元汤去桂大补气液，加龙骨牡蛎交媾心肾，茯苓半夏洗涤痰饮。十余服决愈，果数剂而病不复作。

保元汤

人参 黄芪 肉桂 炙甘草

《渡证治例》

姚龙光

阶翁夫人，病后二年，生女未存，又因不遂意事，心常悒悒，产后又病，请吾前辈调治，因前辈与蒋亦世交，又是紧邻，且素有时名，故生死倚之，服药无效，日见加重，前辈嘱令邀余商治，前辈向余曰：此病无寒热，亦无痛楚，但饮食不进已有多日，终日啼哭，百劝莫解，舌色淡紫，苔多剥落，是胃气已绝，万无生机，已嘱办后事，君盍往诊，再商一治法，聊以尽心而已。往诊其脉，右三部浮数无

力，左三部弦数无力，舌色红而兼紫，苔剥落，余思脉证均非死候，然不能明言，因复命曰：诚如君言，予亦不敢措手。前辈不许，囑开二陈以搪塞，服讫仍如故，明日复诊，诊后拟至前辈家商酌，适前辈之令郎在坐，请余主持，不必往商，竭力阻余，余思此病尚可挽回，究以人命为重要，不必避此嫌疑，乃用炙甘草五钱，小麦一合，大枣十二枚，令多煎缓服，一贴哭泣便减，舌苔复生，三帖全愈。此盖脏燥证也。《金匱》云：妇人脏燥，喜悲伤欲哭，象如神灵所作者，故取效最速。此证《黄八种》内论之精详，发明《金匱》之奥，诚《金匱》之功臣也。

《崇实堂医案》

吴鞠通

陈室女，十五岁。脉弦数，时时欲哭，每日哭四、五次，劝住一时又哭，无故而然，每逢经后更甚。此行经太早，脏气燥也。与金匱甘麦大枣汤以润之，服十数剂渐愈，后服专翕大生膏四斤全安。

《吴鞠通医案》

蒲文甫

陈右。面容憔悴，郁郁不欢，悲忧善哭，时时欠伸，脉象微弱而细，舌红少苔。此产后营血暗耗，不能奉养心神之故，名曰脏躁。

炙甘草 6 克 红枣 10 枚 淮小麦 30 克

二诊：心神不宁，不寐，余详前。前法不更改。

炙甘草 9 克 红枣 10 枚 淮小麦 30 克 枣仁 9 克 麻仁 12 克
茯神 9 克 肉苁蓉 9 克

三诊：药后见瘳。

炙甘草 6 克 红枣 6 枚 淮小麦 30 克 生地 12 克 当归 9 克
川芎 6 克 白芍 6 克 花粉 9 克

四诊：舌翻红润，脉亦有力些。

生地 12 克 当归 9 克 川芎 9 克 赤豆 12 克 甘草 9 克
小麦 30 克 大枣 6 枚 红花 6 克 桃仁 6 克

《艺文甫专辑》

章成之

冯女，每遇拂逆，其病便易发作。病将发，呼吸紧张、四肢麻木；既发则齞齿，语言难出，神志不清，面色潮红，历二小时许而回苏；既而胸中窒闷异常，善太息。今持其脉大而弦，此为肝厥，亦属“脏躁”一类。

明天麻 4.5 克 杭白芍 9 克 稻豆衣 9 克 广郁金 4.5 克
炙远志 4.5 克 潼白蒺藜各 9 克 旋复花 9 克，包 抱茯神 9 克
佩兰梗 4.5 克 清炙草 4.5 克 生麦芽 15 克 红枣十枚（去核）

《章次公医案》

叶熙春

姜，女，三十四岁。七月。绍兴。素体阴虚，又加情志郁结，寐况不佳，由来多时，食少便秘。迺因受惊，昨起突然哭笑无常，呵欠频作，躁烦心悸，彻夜难眠，口干舌绛，脉来弦细而数。宗金匱法。

甘草 6 克 淮小麦 30 克 生熟枣仁各 9 克，拌 大生地 18 克
野百合 12 克 麦冬 9 克 辰茯神 12 克 炒柏子仁 12 克，打
肥知母 9 克 广郁金 6 克 石菖蒲 6 克 大枣 10 只

二诊：前方连服五剂，寐况好转，大便通润，情志已趋稳定，呵欠不作，躁烦心悸亦差。再宗原法出入。

甘草 5 克 淮小麦 30 克 青龙齿 12 克，拌，先煎 辰茯神 12 克
麦冬 9 克 炒柏子仁 9 克，拌 广郁金 6 克 炒枣仁 12 克，拌
大生地 18 克 生白芍 6 克 大枣 8 只

《叶熙春专辑》

其它

张路玉

詹石匠妇产后五六日恶露不行，腹胀喘满，大便从前阴而出，省其故，平日酷嗜烟酒，所产之儿身软无骨，因而惊骇，遂患此症。以芎归汤加苍术、肉桂、炒黑山查，一服恶露通，而二便如常。

陆圣祥之女方四岁，新秋患血痢，而稀粪出于前阴，作冷热不调，食积，治与五苓散服香连丸，二剂而愈。

钱吉甫女年十三，体肥痰盛，因邻家被盗，发热头痛，呕逆回青，六脉弦促，而便溺易位，此因惊而气乱，痰袭窍端所致也。与四七汤下礞石滚痰丸，开通痰气而安。

《续名医类案》

喻嘉言

姜宜人得奇症，简《本草经疏》治交肠用五苓散之说，以为神秘。喻曰：交肠一症，大小二便易位而出，若交易然，古用五苓治之，专为通前阴而设也。若此症闭在后阴，二便俱从前阴而出，拟之交肠诚有似是而非者，况交肠乃暴病，骤然而气乱于中，此症乃久病，以渐而血枯于内，有毫厘千里之别。原夫疾之所始，始于忧思伤脾，脾伤则不能统血，而错出下行，有若崩漏，实名脱营，宜大补急固，乃误以凉血清火为治，脱出转多，于是乎阳明之血亦渐消，今乃大肠枯槁，幽门骤闭，饮食至此无庸分别，遂清浊并走前阴，势必大肠复通，令渣滓率由故道，斯为得耳。与五苓一方，有何干涉？况五苓一方，又为亡血所深戒乎？向诊时尝问病中多哭泣否？答曰：时时泣下。乃知脏燥者多泣，大肠方废而不用也，交肠云乎哉？今大肠之脉累累而现于指，可虞之时，其来春枣叶生乎？枣叶生而言果验（按此仍是交肠症，惟与骤然气乱者不同耳）。愚拟治之之法，宜集灵膏重

用人参，以补其肺而润之，盖肺与大肠相表里而主气，又肺者相传之官，治节出焉。肺得养，斯大肠之燥可清，又得枸杞、二冬以滋其失血之槁，然后故道可复，而清浊自分矣。

《续名医类案》

薛立斋

一产妇小便出粪，名大小肠交，乃气血俱虚，失行当道。先用六君子汤二剂，又用五苓散二剂，而痊（《妇人良方》作先用五苓散二剂而愈，又用补中益气汤而安）。

《续名医类案》

沈明生

叶惟和室，月夜探亲其母，留之食，时春寒独峭，归途即觉肌肤凛栗，次早复当窗梳栊，重感于邪，无热恶寒，胸膈臌闷。一医见其肌表无热，竟作食伤太阴主治，遽用大黄下之，不特不见效，反致水道闭涩，尤可异者，白物腥秽如膏淋之状，从大肠来，绵绵不绝。渐致肌体萎弱，骨立难支，诊之脉沉而涩，虚寒可知。计惟有温中益元之法，然虑大便尚结，小水未行，或增满之患。遂先用五苓散倍加肉桂，一服而水道果通，再服而宿垢并下。嗣用附子理中汤，三四剂后白物渐止，更以十全大补，调理一月而安。夫白淫白沃，载在灵兰之典，皆指前窍中来，今乃转移于后，何也？盖此病始终是一寒症，初因食在胃脘之上，火衰不能熟腐，而反下之太早，则有形之物不能即降，而无形之寒抑遏于阑门之际，遂致清浊混淆，涓涓不息，似乎淋带，而实非淋带也。今先以五苓分利阴阳，而倍肉桂使寒随溺泄，上下宣通，继以理中之剂撤其余邪，鼓其阳气，令脾土热燥而浊流有制，宜其效如桴鼓也。夫始用行大便之药，大便不行并致小便亦涩，今用利小便之药，小便即利并致大便亦通，其得失为何如哉！

《续名医类案》

龚子才

刘小亭年四十无子，阳事痿弱，精如冰冷，求诊。两寸脉洪，两尺脉沉微无力，此真元衰惫，乃斫丧过度所致。以固本健阳丹加入参、附子、枸杞、覆盆子各二两，制一料服尽，觉下元温暖，如前又制一料，服至半料而乃正果孕，生一子。后传之于刘柏亭、刘敏菴，服之俱得子。

《续名医类案》

汪石山

一妇人形肥色淡紫，年几三十艰于育子，脉之两尺皆沉微，法当补血。以形言之，肥人气虚，亦当补气。遂令多服八物汤，仍以补阴丸加参耆，空腹吞之，三月余有孕。复为诊之两尺如旧，以理论之孕不当有。昔人云：脉难尽凭，殆此类欤？

《续名医类案》

薛立斋

儒者钱思习子室，年三十余无嗣，月经淋漓无期，夫妇异处几年矣。思习欲为娶妾，以谋诸薛，薛意此郁怒伤肝脾，虚火动而血不归经，乃肝不能藏，脾不能摄也。当清肝火，补脾气，遂与加味归脾、逍遥二药，四剂送至其家，仍告其姑曰：服此症自愈，而当受胎，妾可无娶也。果病愈，次年生子。

后妃不妒忌，而百斯男，独中山靖王饮酒好内，生子百十二人。世称全鹿丸为周文王所定，常服之，故生子众多，岂中山靖王亦常服是丸者耶？何生子之多于文王也。

《续名医类案》

[General Information]

书名=中国古今医案类编 妇科病类

作者=

页数=822

SS号=0

出版日期=

封面	-10
书名	-9
版权	-8
前言	-7
目录	-4
正文	1

历代中医资料大全分享

你好，我是**逢原**，你现在看到的这本资料是我从网上收集整理的。

本人自学中医多年，耗时多年搜集珍藏了众多的中医资料，包括了目前已经出版的大多数中医书籍，以及丰富的视频教程，而这些中医资料，是博览群书，勤求古训之必备。

只需要在下面输入你的邮箱并确认就可以直接下载中医资料：

http://list.qq.com/cgi-bin/qf_invite?id=03157beabc6d50e0b64029a2715966596d94dcac7ed0cfd7

如果有你也喜欢中医，需要一些学习中医的资料；或者是学习中医的路上碰到了什么问题需要交流；或者碰到一些疾病的困扰，需要求助，可以通过以下方式联系我：

一、发邮件：fyzy999@qq.com

二、加我 QQ/微信：**2049346637**

三、关注微信公众平台——逢原中医，经常有中医文章更新。

四、关注我的空间：<http://user.qzone.qq.com/2049346637>

免责声明：所有资源均是网上搜集，本人收集整理这些中医资料，仅仅为了方便中医同道中人私下交流学习之用，不为营利，将不对任何资源负法律责任。所有资源请在下载后 24 小时内删除，任何涉及商业营利目的均不得使用，否则产生的一切后果将由您自己承担！如果您觉得满意，请购买正版资源。



私人微信号：2049346637



公众平台：逢原中医